


Ireclota Mene



The New Testament in the Bine Language of Papua New Guinea

Ireclota Mene
The New Testament in the Bine Language of Papua New Guinea
Nupela Testamen long tokples Bine long Niugini

Copyright © 1993 Bible Society of Papua New Guinea

Language: Bine

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 18 Apr 2025 from source files dated 31 Aug 2023
0b7e6c06-9d83-54ea-bc99-bd2fbdf2dfe4

Contents

FRT	1
Matayo	2
Mareko	54
Luuka	85
Yoane	141
Apostolo	178
Rooma	228
1 Korinito	253
2 Korinito	274
Galatiya	288
Epeso	297
Pilipi	305
Kolose	311
1 Tesalonika	317
2 Tesalonika	322
1 Timoti	325
2 Timoti	331
Taitus	335
Pilimon	338
Heberu	340
Yakobu	358
1 Peteru	364
2 Peteru	371
1 Yoane	375
2 Yoane	381
3 Yoane	382
Yuuda	383
Apokalupo	385

Ireclota Mene
The New Testament in the Bine Language of Papua New Guinea
Nupela Testamen long tokples Bine long Niugini

Ireclota Mene

The New Testament in the Bine Language of Papua New Guinea
 [bon]

Translation by Wycliffe Bible Translators

© 1993, The Bible Society of Papua New Guinea

Print publication 1993 by The Bible Society of Papua New Guinea

Web version

© 2013, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

Your are free to share – to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice – For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

Ireclota Mene

MATAYO ME MIIJI MENE

Yeesu Keriso me Kaakesaare Gemi
(Luuka 3:23-38)

¹ Ai lui Yeesu Keriso me kaakesaare bime ngii gemi. Yeesu lui Daawida me kaakesaare ge, Daawida lui Abrahamo me kaakesaare ge.

² Abrahamo lui Isacako me Babe ge,
Isacako lui Yakobu me Babe ge,
Yakobu lui Yuuda piyepu teeme naniganewaleyame bime babe ge,

³ Yuuda lui Perese naabi Sera bime babe ge, teeme mage lui Tamara tage.
Perese lui Hesoroma me babe ge,
Hesoroma lui Arama me babe ge,

⁴ Arama lui Aminadaba me babe ge,
Aminadaba lui Naasona me babe ge,
Naasona lui Salamona me babe ge,

⁵ Salamona lui Boasa me babe ge, teeme mage lui Rahaba tage.
Boasa lui Obeda me babe ge, teeme mage lui Ruuta tage.
Obeda lui Yese me babe ge,

⁶ Yese lui Daawida me babe ge, lui te mope biname me äbituji.
Daawida lui Solomona me babe ge, teeme mage lui Uriya me coga tage.

⁷ Solomona lui Rehoboamo me babe ge,
Rehoboamo lui Abiya me babe ge,
Abiya lui Asa me babe ge,

⁸ Asa lui Yosepata me babe ge,
Yosepata lui Yorama me babe ge,
Yorama lui Osiya me babe ge,

⁹ Osiya lui Yotama me babe ge,
Yotama lui Ahasa me babe ge,
Ahasa lui Hesekiya me babe ge,

¹⁰ Hesekiya lui Manasa me babe ge,
Manasa lui Amona me babe ge,
Amona lui Yosiya me babe ge,

¹¹ Yosiya lui Yekoniya naabibime babe ge. Pui padare cabu Yosiya liba teeme bägrä bine jepänimuji, Babloniya biname cina Israela biname bine joomläjimujisi teeme cewe me waadename.

¹² Israela biname cina liba Babloniya je icrajimuji,
piba Yekoniya Salatiyelu ne jepänuji.
Salatiyelu lui Serubabelu me babe ge,

¹³ Serubabelu lui Abyuda me babe ge,
Abyuda lui Eliyakima me babe ge,
Eliyakima lui Asora me babe ge,

¹⁴ Asora lui Sadoka me babe ge,
Sadoka lui Akima me babe ge,
Akima lui Elyuda me babe ge,

¹⁵ Elyuda lui Eliyasara me babe ge,
Eliyasara lui Matana me babe ge,
Matana lui Yakobu me babe ge,

¹⁶ Yakobu lui Yoosepa me babe ge, lui Mariya me rooriye ge. Mariya te Yeesu ne jirnguji, lui ne Keriso ca einenisi.

¹⁷ Yoo siige, footin kaakesaare gemi Abrahamo ca ngälu Daawida ne oomlaname, cuta nuuja footin gemi Daawida cabu ca ngälu Israela biname bine liba ewadimujisi Babloniya cewe me, cuta puma cita ca nuuja footin gemi ngälu Keriso ne oomlana, biname bine niija cabu ca lui te cire yääsecräremepi.

Yeesu Keriso me Aplimla
(Luuka 2:1-7)

¹⁸ Yeesu Keriso me aplimla apu gyene: teeme mage Mariya lui Yoosepa me ciwelooloyame ge. Teepi camuge atejäclmuta, Mariya liba umle äbitige, egä tabe Aceji Seemo name mäpumäpu gwene.

¹⁹ Teeme ciweloooloyame Yoosepa epu biname ge, lui te iyeta mule bine Moose me Cotre ibi jaawenimuge, yepä tabe singi lica ge Mariya ne biname bime sobe cabu teeme mäpumäpu poto cidi me aitnejame, pui Cotre te lipu jüicenige wawenname, yepä tabe singi ge teebine ogä ägyime.

²⁰ Tabe liba ngene jotwananige teebine ägyime, Yageyame me mename seemo te wama cabu piba taboclomtige teeme bau me, jejige egä, "Yoosepa, Daawida me kaakesaare, wälu gone läbitute Mariya ne coga me acatame, inge tabe Aceji Seemo name mäpumäpu gwene.

²¹ Tabe bägrä ne pa jäärngepi, maane ngii einepi Yeesu, inge tabe te teeme binamewale bine teeme nüya cabu ca cirege äsecerera."

²² Siige, ai mule cina äbitininisi naace täápume toraca me äbitame Yageyame me yepä mename biname te lipu teeme mene jeitnäjuji egä,

²³ "Camu tääpe cama ngulebägrä te mäpumäpu cirege, siige bägrä ne cire jääpänepi. Teebine Emanuwela ca cire yaainepesi." Emanuwela lui egä "Acejiyame pisi nyene mine cama."

²⁴ Siige Yoosepa liba arpinantige, tabe Mariya ne coga me jowenige, Yageyame me mename seemo te teebine lipu jejige.

²⁵ Yepä teepi magebi rooriye bime mule lica jaawenäsi, ngälu Mariya bägrä ne jirngige, siige Yoosepa ngii ecäriye Yeesu.

2

Biname cina Secluji Bimu Acita Gome ca Yeesu ne Pääpäname

¹ Heroda lui padare cabu mope biname me enajuji, Yeesu piba aplimluji Betelehema cewe je Yuudea probins cabu. Pui ingwe gaabe ca lui cina labiberäjininusi wale poto cidi me, seclige bimu acita gome ca Yerusalemame,

² biname bine puma itemläjemisi egä, "Kirece bägrä ärngeji luci yene, lui te cirege Israela biname bime mope biname me äbita? Cine teeme wale ne jääpänepesi, bimu acita gome ca liba tacitepi, siige cine naclige teeme gome kokorare ca äpednerame."

³ Mope biname Heroda liba itecijige ai mene, tabe mage ngenecu mäpu me äbitige cuta iyeta Yerusalemame biname piyepu.

⁴ Tabe ala tesoglicmige iyeta modamoda iiwäreja biname piyepu cotre abiberäja biname bine, siige itemlimige egä, "Keriso lui te biname bine nüya cabu ca cirege äsecerera, tabe luma cire laplimlepi?"

⁵ Teepi Heroda ne jejisi egä, "Tabe cire laplimlepi Betelehema cewe je Yuudea probins cabu. Cine umle apu gemi, inge Acejiyame me mename biname te ituge oogära ai poto cidi me apu egä,

⁶ Betelehema cewe Yuudea gawe cabu,

maane papa cewe lica gäte nuuja Yuudea cewe cabu ca, inge mäame cabu ca cirege mope biname otni,

lui te cäme Israela biname bine cire yaawademepi."

⁷ Heroda liba ai mene itecijige, tabe piba ogä ala tesoglecimige bimu acita gome ca lui cina seclumi Yerusalemame, siige itemlimige egä, "Weene liba jääpänepeye wale ne acita?"

⁸ Heroda liba umle äbitige, wale te liba tacitepi, peei ingwe gaabe ca tabe piba pui biname bine jityepimige Betelehema me apu mene cama egä, "Äte naaclege cängena bägrä ne ärngime. Liba jepänepeye, piba täcnäripeye cebine umle wawenname. Cane cuta piba pa lädepene kokorare ca äpednutame teeme gome."

⁹⁻¹⁰ Siige teepi eclige, gaabegabe jepänisi pui yepä wale ne, teepi lui ne jääpänanepesi bimu acita gome ca. Teepi liba jepänisi, siige mage gege ecisi. Wale te teeme niinäce me äbitige, ngälu emä bojä jegige, bägrä te luma enajige.

¹¹ Teepi mete bora me ebäcnisi, siige bägrä ne liba jepänisi teeme mage Mariya cama, teepi kokorare ca ipednemalimisi teeme gome teebine opo gaabe me acitame. Puma cita ca teepi baiko bine jepatnimisi, isemisi gol, miijirage lengo pauda uubudera täápume piyepu miijirage lengo uli ngedo ngii miira, siige ecärisi bägrä matikäli ne.

¹² Pui ingwe gaabe ca teepi teeme cewe me nuuja gaabe cabu äcnäriye, inge Acejiyame te teebibine wama ca umle jewenimige egä, "Weene gone läcnärininuye Heroda ne umle wawenname."

Mariya Yoosepa naabi Uucräsi Aikupito me

¹³ Bimu me acita gome ca lui biname cina saaclepi, liba äcnäriye teeme cewe me, piba Yageyame me mename seemo te taboclomtige Yoosepa bau me, wama secäriye egä, "Arpinanti, bägrä ne ecati teeme mage cama, uucratnäneye Aikupito me. Puma inajäpi, ngälu cane te pa jijipene weene äcnärame. Weene ai ne naace name pi wawenname, inge Heroda bägrä ne pa jäärngepi budre me aglime."

¹⁴ Puma cita ca Yoosepa arpinantige, bāgrā ne ecatige mage cama, siige ciiye Betelehema ne sebmālānisi Aikupito me otnime.

¹⁵ Teepi puga aanājānige, ngālu Heroda budre ābitige. Ai mule te naace tääpume ābitige ibibi ābitame mename biname te lipu Yageyame me mene jeitnājuji egā, “Aikupito ca cane cāme bāgrā ne ituge ala asogleca.”

Bāgrā bine Eglecimisi Betelehema je

¹⁶ Heroda liba umle ābitige, egā bimu acita gome ca lui biname cina saaclepi teebine sen-gletnājumesi, siige tabe caapocapo claabe te joomlige. Tabe jejemige neeneni kāmāge cama imābāgrā bine coo piiyepu teeme iganewale bine iyeta budre me aglecame Betelehema cewe ngalebora je piiyepu teeme wajwa je lui cewe cabu ta. Tabe neeneni kāmāge cama imābāgrā bine piiyepu teeme ingwe ca lui imābāgrā bine aglecame naace popi jejemige, ingle bimu acita gome ca lui cina saaclepi, tabe teeme bau ca umle lābitepi, egā neeneni kāmāge ngalebora teepi pui wale ne jāāpānanepesi.

¹⁷ Apu toraca me ābitige mename biname Yereimiya lipu niināce gaabe me itu jiiucuji egā,
¹⁸ “Teepi Raama cewe ca ala itecijenemige
piiyeputu ngenecu bora babo ele.
Raakela ele ongenige teeme bāgrā bime tääpume,
tabe singi lica teebine owe āswime,
ingle teepi opo puma lica gemi.”

Yoosepa naabi Aikupito ca Tācnārānisi

¹⁹ Heroda liba budre ābitige, piba Yageyame me mename seemo te taboclomtige Yoosepa bau me Aikupito je, wama secārige egā,

²⁰ “Arpinanti, bāgrā ne ecati teeme mage cama, ācnārāneye Israela gawe cabu me, ingle lui cina bāgrā ne aglime jaawenanepesi, budre gemi.”

²¹ Puma cita ca Yoosepa arpinantige, mage bāgrā bine aacatige, ācnārānisi Israela me.

²² Yoosepa liba itecijige, egā Arkela teeme babe Heroda me puupu itu jaacatepi, mope biname me itu lābitepi Yuudea probins ngalebora, siige tabe wālu ābitige Yuudea me acenutame. Puma cita ca Acejiyame te cuta nuuja wama secārige tabe otnime Gallaya probins cabu me, siige tabe piiyeme ādige.

²³ Teepi puga aanājānige cewe ngii Nasareta je. Apu ibibi ābitige Acejiyame me mename biname bime mene egā, “Teebine Nasareta biname ca cire yaainepesi.”

3

*Yoane Niiye ca Āciseja Biname te Mene Jejananemige
(Mareko 1:1-8; Luuka 3:1-18; Yoane 1:19-28)*

¹ Pui padare cabu Yoane niiye ca āciseja biname te tādige, gije abacitige mene jajaneneme daapo taatu cewe cabu je Yuudea gawe ngalebora.

² Tabe apu jiicemige egā, “Weene niiya mule cabu ca atatrōngārīneye, ingle Acejiyame te mameta gyene biname bine waadena.”

³ Yoane peese nyene pui biname, Acejiyame me mename biname Isaya lui potu cidi me itu jiiucuji egā,

“Daapo taatu cewe cabu biname te babo tagepogogo ca cire jiiucepi egā,

‘Gaabe ne emacētnājeyē Yageyame tääpume,

weeme mule bine conocāco jēwenemeye teeme otni tääpume!’ ”

⁴ Yoane me cābletāāpe lui kamela me ngāli ca wawenāneji ge, piiyepu tabe kamela tääpe baagi ca asigrāneji ge ibi cabu. Tabe sesi pana gwidape bine yāārngājimuge piiyepu uri niiye yāānājuge.

⁵ Biname cina saacluge teeme bau me Yerusalema ca, iyeta potu ta Yuudea gawe cabu ca piiyepu Yoridana baduge neeneni potu ca.

⁶ Tabe piba teebibine niiye ca jicisājemige Yoridana baduge cabu, teepi liba teeme niiya mule bine jewabudnājimisi.

⁷ Yoane liba jepānimige bucurage Parisea sigu biname piiyepu Sadukea sigu biname cina otni teeme bau me niiye ca āciseja tääpume, tabe jejemige egā, “Weene cobyame pana angletne-jayame biname gemi! Weene apu jingenininige, egā weebibine liba niiye ca birige āciseja, weene siige piba cire uucratnipeye māpu daremu cabu ca, Acejiyame te lui ne cire täätyepēpi.

⁸ Weene eei mule bine jēwenemēpeye, lui cina jiwabininusi, egā weene siige bii tata-trōngārīniniye niiya mule cabu ca.

⁹ Piiyepu cuta weene apu gone jingenininige egā, ‘Ingle Abrahamo lui cime kaakesaare gyene, peei name pi cine māpu daremu ne lica cirege pāpāna Acejiyame bau ca.’ Cane

weebibine jijenininine, egä Acejiyame liba singi gyene, tabe ibibi gyene ai kula bine atepलगंajame Abrahamo me kaakesaare täápume.

¹⁰ Yäpä acitäneji gyene uli maape. Lui uli cina miihirage kuu lica yäyemuge, yaargaw-
imus, uliobo cabu me yisabimusi.

¹¹ Cane weebibine niye ca jicisäjenininine awabame, egä weene siige bii tata-
trongärininiye weeme niya mule cabu ca. Yepä laati te pa tädepi căme ingwe ca, tabe
weebibine Aceji Seemo ca piyepu uliobo ca page jicisäji. Uliobo te lipu domäji bine
yaabemuge, tabe pepu pagege weeme cabu ca jugijugi mule bine äciseja. Tabe baborage
gyene, cane matikäli gäne. Cane ibibi lica gäne teeme ernge gwidape seea iibirame.

¹² Teeme pisi nyene wiiti kuu ämleceja gwidape wiiti kuu mäwä cama maramara me
wawename. Tabe kuu bine teeme mete cabu me cire yaawademepi, mäwä bine ätuma căo
uliobo cabu me cire yisabemepi ayi täápume.”

Yoane te Yeesu ne Niye ca Jicisäji
(Mareko 1:9-11; Luuka 3:21-22)

¹³ Piba Yeesu tädige Galilaya gawe cabu ca Yoridana baduge me Yoane te teebine niye ca
puma äcisejame.

¹⁴ Yepä Yoane singi ge Yeesu me ngenecu atatröngtame, siige tabe jejige egä, “Maane te
cebine miiji niye ca äciseja, peei name pi maane ngeno me tädite căme bau me niye ca
äciseja täápume?”

¹⁵ Yeesu jejige egä, “Ai taje maane jeweni, cane ngena täápume naajenine. Apu mule ca
mine jewenenago, Acejiyame ngena täápume singi.” Yoane Yeesu me mene jecatige, siige
teebine niye ca jicisäji.

¹⁶ Yeesu ne liba niye ca jicisäji, tabe piba tarpatige niye cabu ca. Piba taatu cabucewe
te iitnige teeme täápume, siige tabe jepänige Acejiyame me Seemo te äina je gimäe ele pana
teeme papa cabu me.

¹⁷ Puma cita ca tagepogogo te tädige cabucewe ca egä, “Ai lui căme ngenecurage bägrä
gyene. Cane baborage ngenecu miiji gäne teeme täápume.”

4

Satani te Yeesu ne Epicetneräji
(Mareko 1:12-13; Luuka 4:1-13)

¹ Puma cita ca Aceji Seemo te Yeesu ne ecanige daapo taatu cewe cabu me Satani te
teebine puma apicetnärajame.

² Tabe liba footi bimü footi ciye cama deedei căo enajige puma, piba loolomecewe te
joomlige.

³ Puma cita ca Satani te teeme bau me tädige, jejige egä, “Maane liba Acejiyame me Bägrä
gäte, ai kula bine jejemi buluduu me atepलगंame.”

⁴ Yeesu jejige egä, “Oogäräneji mene te apu jiićenige egä, ‘Deedei taatu te ireclota lica
yääcärimuge biname bine, yepä iyeta mene Acejiyame lui jiićenuge.’”

⁵ Puma cita ca Satani te Yeesu ne ecanige babo cewe Yerusalem me, Acejiyame täápume
mara me lui cewe wawänäneji ge, siige teebine puga etecwantige iiwäreja mete toro cabu
caburage je,

⁶ jejige egä, “Maane liba Acejiyame me Bägrä gäte, maane ama cita ca uuplacamti gawe
me, ingle Oogäräneji mene te jiićenige egä,
‘Acejiyame te teeme mename seemo bine cire jaajemepi mäáme poto cidi me;

siige teepi meebine teeme ime cabu cire naacanepesi,
piba maane mäame ernge ne kula cabu lica pa jimudnärepi.’”

⁷ Yeesu Satani ne jejige egä, “Oogäräneji mene te cuta jiićenige egä, ‘Maane dupe päpäname
määmämu gone läbitute Yageyame mäáme Acejiyame ne apicetnärame, egä tabe kälyä
nawenuge.’”

⁸ Puma cita ca Satani te Yeesu ne ecanige babo podo caburage me, puma teebine
jewabäjiige maramara mope biname bime gawe piyepu teeme iyeta lijali ja gwidape,

⁹ siige jejige egä, “Iyeta ai cane meebine nääcärenine, maane liba kokorare ca
ääpednutenite cebine awejename.”

¹⁰ Yeesu teebine jejige egä, “Satani, äyebingti căme bau ca, ingle Oogäräneji mene te apu
jiićenige egä, ‘Yageyame, mäáme Acejiyame ne yaawejanuye, cuta teeme taatu singi ne
jewenepi.’”

¹¹ Siige Satani te Yeesu ne ecmalige; Acejiyame me mename seemo cina piba seclige
teebine ätityerame.

Yeesu Teeme Kaakese ne Jegednige Galilaya Probins cabu
(Mareko 1:14-15; Luuka 4:14-15)

¹² Yeesu liba itecijige, egä Yoane ne krokeciye mete me bisinglantisi, tabe acnenutige Galilaya probins cabu me.

¹³ Tabe Nasareta cewe je lica enajige, yepä tabe ädige Kaprenauma cewe je lenajame, lui tage Galilaya sawa gome Seblona Napatali naabime gawe cabu.

¹⁴ Apu toraca me äbitige mename biname Isaya me mene egä,

¹⁵ “Seblona piyepu Napatali naabime gawe piyepu lui gawe Meditarenia malu gome, piyepu Yoridana baduge me bimu acita gome ca lui gawe piyepu Galilaya gawe, Acejiyame umle cäco biname cina luma icrajinige;

¹⁶ ai maramara gawe cabu, lui biname cina krokeciye cabu icrajinige, teepi babo apacyera ne cirege päpäna.

Cuta lui biname cina wäluwälu icrajinige budre mule name pi, apacyera te teeme cabu me cire luungepmalepi.”

¹⁷ Yeesu lui padare acnenutige Galilaya me, tabe gije abacitige mene jajanename egä, “Tatatrongärineye weeme niya mule cabu ca, ingle Acejiyame te mameta gyene biname bine waadena.”

*Yeesu Poto Cibubade Biname bine Ala Tesoglicmige
(Mareko 1:16-20; Luuka 5:1-11)*

¹⁸ Yeesu liba ädige Galilaya sawa ligi ta, tabe jääpäniige nanigane wäsi bine, Simona (lui ne einenisi Peteru ca) piyepu teeme igane Andrea. Teepi net bine yiisabäjemäsi sawa bora me, ingle teepi cibubade biname ge.

¹⁹ Yeesu teebibine jaajige egä, “Siclege cane cama otnime cäme abiberäja bägrä lenajame. Weene niinäce lipu cibu bine toomläjenanemumeye, page cane weebibine ibiberäjinine biname bine cäme bau me pepu waadename.”

²⁰ Piba taatu teepi teeme net bine ebmalemäsi Yeesu cama yepä otnime.

²¹ Puma cita ca cerämu tabe ädige, cuta nuuja nanigane wäsi bine jääpäniige, Yakobu naabi Yoane Jebedayo me bägrä. Teepi teeme poo cabu jage teeme babe Jebedayo cama, net bine emacetnäjemäsi. Yeesu Yakobu Yoane naabibine ala taasoglicige teta cama otnime.

²² Teepi piba taatu teeme babe ne ebmaläsi poo cabu, Yeesu cama aalige.

*Yeesu Biname bine Ebiberäjimige, Mene Jejananemige, Pita cabu ca Miji Jewenanemige
(Luuka 6:17-19)*

²³ Yeesu Galilaya probins cabu iyeta poto ta waatnetnäjuge. Tabe biname bine yaabiberäjimige teeme abasecretna mete cabu ta, Miji Mene jaajanemuge, egä Acejiyame te biname bine pagege waadena, piyepu cuta tabe biname bine maramara pita cabu ca miji me jaawenanemuge.

²⁴ Yeesu ne idre jecenanisi iyeta poto ta Suriya gawe cabu. Pipu pi teeme bau me biname bine sewadäjemisi, lui cina cewe loocananinusi maramara pita coo mäpu name pi, naace niyarage cable teeme trupa cabu, oonina pita piyepu tääpe nuuja poto budre. Yeesu iyeta teebibine miji me jewenanemige.

²⁵ Bucurage biname cina Yeesu ne ingwe sicwisi Galilaya gawe cabu ca, Ten Modamoda Cewe gawe cabu ca, Yerusalema ca, Yuudea gawe cabu ca piyepu Yoridana baduge me bimu acita gome ca.

5

Ngenecu Miji Laati Bem?
(Luuka 6:20-23)

¹ Yeesu biname tomi bine liba jepänimige, tabe piba jegelige podo cabu me, puga adnatige. Teeme abiberäja bägrä cina jewaclomtisi teebine,

² siige tabe gije jecitige teebibine abiberäjame egä,

³ “Ngenecu miji eei gemi,
laati bemi owecumete seemo ireclota ngalebora;
Acejiyame te teebibine yaawadimuge.

⁴ Ngenecu miji eei gemi,
laatibi ele yaangenetnemuge;
Acejiyame te teebibine owe yäaswemuge.

⁵ Ngenecu miji eei gemi,
laati bemi Acejiyame taatu cabu me ire;
teepi jääpänimusi Acejiyame ngena tääpume ituge iicana.

⁶ Ngenecu miji eei gemi,
laati bemi baborage singi wawename Acejiyame me singi;
teeme peei singi te toraca me läbituge.

⁷ Ngenecu miiji eei gemi,
laatibi poto biname bine owecu jaawenimusi;
teepi cuta owecu ne jääpänusi teeme täápume.

⁸ Ngenecu miiji eei gemi,
laati bemi yepä taatu ngene atwana cama;
teepi Acejiyame ne jääpänusi.

⁹ Ngenecu miiji eei gemi,
laati bemi poode wawenetnäja biname;
teebibine Acejiyame me hägräwale ca birige aina.

¹⁰ Ngenecu miiji eei gemi,
biname cina lui bine sabe jaawenanemusi,
ingle naace popi teepi Acejiyame me singi ne jaawenusi;
Acejiyame te teebibine yaawadimuge.

¹¹ Weene ngenecu miiji gemi, biname cina liba niiya mene jicemusi weeme poto cidi me, sabe jiwenininusi piyepu walya jicamininusi cämiji pi.

¹² Weene miiji baborage ngenecu miiji piyepu gege, inge weene cabucewe je baborage daremu ne cire jepänepeye. Acejiyame me mename biname lui cina weeme niinäce gaabe itu secluji, teebibine cuta pepu ituge sabe wawena.”

*Yeesu me Binamewale Epu Pana Gemi Caapereniye coo Apaclyera Liityepu
(Mareko 9:50; Luuka 14:34-35)*

¹³ “Weene caapereniye pana gemi gawecewe biname bime täápume. Caapereniye me kaakesea pisi nyene, yepä teeme mite te liba lapiruge, weene ingwe ca äblicäco caapereniye ne cuta mite me wawena. Mite cäco caapereniye nuuja miiji lica gyene, peei name pi gaabe cabu yaajarusi, biname cina siige ernge ca jääbrecäjusi.

¹⁴ Weene apaclyera pana gemi gawecewe biname bime täápume. Babo cewe te podo papa cabu äblicäco ämlitäneji lenajame.

¹⁵ Biname te liba lampa ne jaabotuge, tabe diiba ca lica yaacwabuge, yepä cabu me yaatecwantuge, siige puma cita ca biname bine saapaclyäremuge mete ngalebora.

¹⁶ Weene pepu cuta biname bine yaapaclyäremuge, egä teepi liba weeme miijimiji mule bine jääpänanemusi, siige piba eso yäcärusi weeme Babe ne, cabucewe je lui te enajenige.”

Yeesu me Abiberäja Mene Cotre poto cidi me

¹⁷ “Weene gone apu angä, egä cane itu tädujine Moose me Cotre mene bine piyepu Acejiyame me mename biname bime abiberäja mene bine sabe wawename. Eewe, cane tädujine peei mene bine toraca me wawename.

¹⁸ Cane toraca jijenininine, egä cabucewe piyepu gawecewe liba taatu aanajenige, licarage nuuja leta ne coo matikolä maaku ne cirege äyebingta Cotre mene cabu ca, ngälu lui mule poto cidi me jicenenemige, cirege äbita.

¹⁹ Pipu pi laati te liba jaatropangtuge yepä cotre ne, ngänu gyene matikolä cotre, piyepu biname bine yaabiberäjimuge teepi peei yepä mule wawename, tabe matikälä gyene Acejiyame te lui biname bine yaawadimuge. Yepä laati te cotre bine yäcäwetimuge piyepu biname bine yaabiberäjimuge teepi peei yepä mule wawename, tabe baborage gyene Acejiyame te lui biname bine yaawadimuge.

²⁰ Cane toraca mene jijenininine: weeme conocäco mule cina liba lica itucärenemisi Parisea sigu biname piyepu cotre abiberäja biname bime conocäco mule bine, siige Acejiyame te piba weebibine lica iwadininuge.”

Yeesu me Abiberäja Mene Claabe Äbita poto cidi me

²¹ “Weene ituge ätecija, egä mime saarewale bine sasa jajeji gemi egä, ‘Gone nuuja biname ne budre me yaagluye. Laati te liba yaagluge biname ne budre me, teebine cirege ablawa.’

²² Yepä cane te jijenininine weebibine, egä laati te liba claabe läbituge nuuja ätrunga biname täápume, teebine miiji birige ablawa. Coo laati te liba teebine jaajuge egä, ‘Maane papa biname gäte,’ siige pui biname ne miiji yaacanusi mutre biname cina ablaware. Coo piyepu laati te liba nuuja ätrunga biname ne jaajuge egä, ‘Maane Acejiyame umle cäco biname gäte,’ tabe epu niyarage gyene, egä tabe miiji uliobo puupu cabu me otni.

²³ Peei name pi maane liba yaacanute owecu gwidape ne Acejiyame me mete cabu iiwäreja dade cabu acitame, siige maane puma ngene jwaatwute egä, ‘Nuuja ätrunga biname te claabe gyene cäme täápume,’

²⁴ maane owecu gwidape ne ebmalepi iiwäreja dade opo gaabe, ädepi poode wawename mäame biname cama, piba tacnenutepe owecu gwidape Acejiyame ne ceerame.

²⁵ Laati te liba naaitnäjuge, siige singi birige ablaweja puupu cabu me acaname, maane gaabegabe teebine watawata poode me jaawenute, weene liba cäro camu ge ablaweja

puupu cabu me atyaramta. Maane liba poode wawena cäco, cije tabe ablaweja biname me ime cabu naacituge, siige tabe te teme ätityera biname bine jaajemuge meebine acaname krokeciye mete cabu acitame.

²⁶ Cane toraca mene naajenine: maane lica tasatute, ngälu iyeta daremu yaapirute.”

Yeesu me Abiberäja Mene Magebi piyepu Ngulebägrä Ero poto cidi me

²⁷ “Weebibine ituge abiberäja egä, ‘Sargi ero mule gone.’

²⁸ Yepä cane toraca jijenininine, egä laati te magebi ne coo ngulebägrä ne singisingi jwääpänuge ten cama ero mule wawename, tabe teme ngenecu bora uja ero jwaawenuge.

²⁹ Määme camu poto irecu te liba naawenuge singi ädrime maane niiya mule wawename, maane miiji watatarage määme peei ngene atwana ne äyebblingta, epu pana irecu ne lipu juungyatute, siige yaajarute. Niiya gyene maane yepä piicwa ne apesera, yepä cerämu niiya gyene maane iyeta piicwa cama uliobo puupu cabu me otni.

³⁰ Määme camu poto ime te liba naawenuge maane singi ädrime niiya mule wawename, maane miiji pui ngene atwana ne watatarage äyebblingta, epu pana ime ne lipu jooptote, yaajarute määme bau ca. Niiya gyene maane yepä piicwa ne apesera, yepä cerämu niiya gyene maane iyeta piicwa cama uliobo puupu cabu me otni.”

Yeesu me Abiberäja Mene Coga Ägyi poto cidi me

(Matayo 19:9; Mareko 10:11-12; Luuka 16:18)

³¹ “Biname bine cuta ituge abiberäja egä, ‘Rooriye te liba singi teme coga ne ägyime, tabe miiji peba ne oogära ägyi poto cidi me, siige pui peba cama jwäätyepuge teme coga ne.’

³² Yepä cane te jijenininine: lui rooriye te liba teme coga ne jwäägyuge poto ingle name pi yepä lica sargi ero mule name pi, siige tabe teebine jwaawenuge ero wawename, tabe liba nuuja rooriye ne yaacatuge. Cuta nuuja rooriye lui te teebine waacatuge, tabe ero jwaawenuge.”

Yeesu Ngena Ebiberäjimige Mene Atropengta poto cidi me

³³ “Weene cuta ituge ätecija, egä mime saarewale bine sasa jajeji gemi egä, ‘Maane gone määme mene atropengta, yepä jewenepi maane Acejiyame me ngii cabu ngena ituge jaji wawename.’

³⁴ Yepä cane te jijenininine weebibine, egä weene liba mene iicema je, weene gone nuuja me ngii cama iicana pui mene ne atropengta cäco me wawename. Weene gone cabucewe me ngii cama iicana, ingle Acejiyame me lenaja puupu gyene.

³⁵ Cuta gone gawecewe me ngii cama iicana, ingle teme ernge acita gawe gyene; cuta piyepu Yerusalema me ngii cama gone iicana, ingle babo mope biname me cewe gyene.

³⁶ Määme mope me ngii cama cuta gone jiiicute, ingle maane äblicäco gäte yepä matikäli edingäli ne bulubulu me coo cäsäcäsä me wawena.

³⁷ Weene gone nuuja mene jiiicuye, yepä ‘yoo’ taatu jiiicuye, weene liba singi ngena wawename, cuta ‘lica’ taatu jiiicuye, weene liba singi lica. Nuuja mene cerämu weene liba jiiicuye, peei lui Satani me bau ca gyene.”

Yeesu me Abiberäja Mene Daremu Wawena poto cidi me

(Luuka 6:29-30)

³⁸ “Weebibine ituge abiberäja egä, ‘Biname te liba nuuja biname me irecu ne sabe jaawenuge, pui biname ne cuta miiji daremu awecnista teme irecu ne sabe wawename. Piiyepu biname te liba nuuja biname me giricu jääglecnutuge, pui biname ne cuta miiji daremu awecnista teme giricu ne äglecnutame.’

³⁹ Yepä cane te jijenininine weebibine, egä nuuja biname me niiya mule gone daremu wawena. Biname te liba camu poto lakace cabu nooruge, maane latatrongtute tabe meebine säwäci poto lakace cabu cuta oororame.

⁴⁰ Piiyepu biname te liba naacanuge ablaweja puupu cabu me, ingle tabe singi läbituge määme soto täapume, maane miiji cuta määme acwaba gwidape yääcäruete.

⁴¹ Piiyepu biname te liba näädretnicuge maane teme gwidape bine waadename yepä kilomiiita pana padare me, maane neeneni kilomiiita pana padare me ewademepi.

⁴² Biname te liba ngena täapume näätinäruge, maane miiji ecärepi. Coo tabe liba singi määme gwidape watawata acatame, gone läbwäricute.”

Yeesu me Abiberäja Mene Cubuyame poto cidi me

(Luuka 6:27-28, 32-36)

⁴³ “Weebibine ituge abiberäja egä, ‘Weene weeme biname bime täapume singi inajininuge, yepä lui cina weebibine jimugitninusii, weene cuta teebibine jäämugetnemuye.’

⁴⁴ Yepä cane te jijenininine weebibine, egä lui cina weebibine jimugitninusu, weene teeme täápume singi inajipi, piyepu lui cina sabe jiwenininusu, weene teeme täápume irecu ätumutipeye,

⁴⁵ weene piba päbitipeye weeme Babe me bägräwale me, cabucewe je lui te enajenige. Tabe yepärage bimu ne jaawenuge acitame niya biname bime täápume coo miiji biname bime täápume. Tabe cuta ngupe sääcärimuge, lui cina conocäco mule jaawenimusu cuta lui cina conocono mule jaawenimusu.

⁴⁶ Weene gone Acejiyame bau ca miiji daremu ne awagrija, weene liba eei biname bime taatu cabu me singi, lui cina weeme täápume singi. Niyyarage täks rarekaake uutecrena biname cina cuta pepu jaawenusu.

⁴⁷ Piyepu weene liba weeme binamewale bine taatu jaawablimuye, weene peei lui nuuja mara gwidape ne lica jaawenuye. Acejiyame umle cäco biname cina cuta pepu jaawenusu.

⁴⁸ Weene miiji epucäco lenaja, weeme Babe te lipu cabucewe je epucäco gyene.”

6

Yeesu me Abiberäja Mene Ceera poto cidi me

¹ “Weene miiji cängena ire, egä weene gone miijimiji mule bine wawenetnäja biname bime sobe cabu naace täápume teepi päpäname. Weene liba apu läbitininuye, weene nuuja daremu ne lica cirege päpäname weeme Babe bau ca, cabucewe je lui te enajenige.

² Pipu pi maane liba owecumete biname bine yäacäranemute gwidape, gone cabucabu yäacäranemute, walya biname cina lipu läbitininusu abasecretna mete cabu ta piyepu gaabe cabu ta. Teepi apu naace name pi läbitininusu egä biname cina teebibine awepyeräjame. Cane toraca mene jijenininine, egä teepi lui awepyeräja ne jepänenisi biname bime bau ca, teeme daremu gyene. Teepi nuuja daremu ne Acejiyame bau ca lica cirege päpäname.

³ Yepä maane liba ngena owecumete biname bine yäacäranemute, ogä jenenemepi epu, camu poto ime te liba ngena jaawenuge, säwäci poto ime te umle cäco.

⁴ Piba biname cina umle lica birige mäame miijirage mule. Yepä mäame Babe lui te iyeta gwidape täápume umle, tabe meebine miiji daremu cire näacärepi.”

Yeesu me Abiberäja Mene Ireku Ätumuta poto cidi me (Luuka 11:2-4)

⁵ “Weene liba irecu lätumutinuye, weene gone läbitininuye walya biname bime pana. Teepi liba irecu lätumutinusu, teepi singi birige aclajutame abasecretna mete cabu coo piyepu gaabe cube cabu, ingle teepi singi biname cina päpäname. Cane toraca mene jijenininine weebibine, egä teepi lui awepyeräja ne jepänenisi biname bime bau ca, teeme daremu gyene. Teepi nuuja daremu ne Acejiyame bau ca lica cirege päpäname.

⁶ Yepä maane liba irecu lätumutute, maane miiji mete bora me abacitepi, grana sermepi, siige piba irecu ätumutepi mäame Babe bau me, lui te päpäname cäco gyene. Maane ngena ne ogä jaawenute, mäame Babe te nääpänuge, siige daremu näacärüge.

⁷ Weene liba irecu lätumutinuye, weene gone bucurage papapapa mene iicema Acejiyame umle cäco biname liyepu, lui cina apu jaangemuge egä, ‘Acejiyame te niticijinininige, ingle mime irecu ätumuta lui lecarage gyene.’

⁸ Weene teeme pana gone läbitininuye, ingle weene liba yäätinäruye, tabe weeme Babe te uja umle bäbitige, weene singi ngena tääpu memi.

⁹ Weene apu irecu ätumutipeye:

Cime Babe cabucewe je,
mäame miijirage ngii ne opo gaabe me naacitesi.

¹⁰ Maane te biname bine ewademepi.

Mäame singi ne gawecewe cabu jaawenesi,
cabucewe je lipu jenenenisi.

¹¹ Page nicäranini cime bimu gaabegabe deedei.

¹² Maane gone cime niya mule bine yaawadimute,
cine lipu lica yaawadimusu biname cina lui niya mule niwenininusu cibibine.

¹³ Maane gone cibibine niwadininute mäpurage apicetrnära cabu me,
yepä niwärimtipi niya te oomlana wälu pi.

¹⁴ Weene liba weemeweme niya mule bine lica yaawadimuye, piba weeme Babe te cabucewe je weeme niya mule bine lica yaawadimuye.

¹⁵ Yepä weene liba weemeweme niya mule bine yaawadimuye, piba cuta weeme Babe cabucewe je weeme niya mule bine yaawadimuge.”

Yeesu me Abiberäja Deedei cäco Lenaja poto cidi me

¹⁶ “Weene liba Acejiyame ne awejena name pi deedei cāco inajininuge, weene gone owecumete opo inajininuge walya biname cina liiyepu. Teepi naace name pi owecumete opo yaacrajuge, ingle teepi singi biname cina pāpāname, egā teepi deedei cāco icrajinige Acejiyame ne awejename. Cane toraca mene jijenininine, egā teepi lui awepyerāja ne jāpānusi biname bime bau ca, peei lui teeme daremu birige. Teeme nuuja daremu lica cirege.

¹⁷ Yepā maane liba deedei cāco naanajuge ingle Acejiyame ne awejena name pi, miiji maane opo lācisājute, mope oil ca laganute.

¹⁸ Pipu pi nuuja te umle lica birige, egā maane deedei cāco naanajuge, yepā määme Babe, lui te pāpāna cāco gyene, tabe taatu umle birige. Tabe te daremu cire nācārepi, ingle tabe umle gyene, maane ogā ngena ne jaawenute.”

Gone Gwidape bine Yaatomlicmuye Ai Gawecewe cabu

(Luuka 12:33-34)

¹⁹ “Weene gone miijimiji gwidape bine yaatomlicmuye weeme tääpume ai gawecewe cabu, potāte cina luma gwidape bine sabe jaawenimusi, liiya te luma joomlemuge, cuta piyepu eromaame cina liiyeme saacluge ero me.

²⁰ Yepā weene jewenemepeye miijimiji mule bine. Peei lui epu pana gyene, egā weene miijimiji gwidape bine yaatomlicmuye weeme tääpume cabucewe je, potāte cina luma sabe lica jaawenimusi, coo liiya te lica joomlemuge coo piyepu eromaame cina āblicāco ābācna ero me.

²¹ Määme miijimiji gwidape cina luma, määme ngenecu te cuta puma.”

Irecu Lui Tääpe me Lampa Gegi

(Luuka 11:34-36)

²² “Irecu lui tääpe tääpume lampa gegi. Määme irecu cina liba miiji birige, määme tääpe te iyeta apaclyera taatu birige.

²³ Yepā määme irecu cina liba niya birige, määme tääpe te cuta krokeciye cabu yaanajuge. Siige määme cabu lui apaclyera liba krokeciye birige, piba määme krokeciye lipu baborage gyene.”

Yeesu me Umle Mene Acejiyame piyepu Rarekaake poto cidi me

(Luuka 16:13, 12:22-31)

²⁴ “Biname te āblicāco neeneni modamoda biname bine acenena. Tabe nuuja ne jāāgyuge, nuuja tääpume singi lābituge. Tabe nuuja ne opo gaabe me yaacituge, nuuja ne kaake ca sääcelyāruge. Peei name pi weene āblicāco gemi neeneni bine acenena, Acejiyame ne piyepu rarekaake ne.

²⁵ Cane peei name pi jijenininine, egā weene ngenecu gone, egā weene ngena jaarwuye, ngena yaanuye, coo piyepu weene ngena lasigrānuyē. Egāsu ireclota lui baborage gyene, deedei piyepu niye papa gemi; piyepu tääpe lui baborage gyene, cābletāape lui papa gemi.

²⁶ Jepānemeye, cabu je lui ele cina uujanānini, teepi gije lica yāātemusi, lica yāārucnimusi, deedei cumā lica yaacranimusi, yepā weeme Babe cabucewe je tabe te teebibine cāngena ire jetwenenemige. Egāsu weene modamoda gemi, ele lui papa gemi.

²⁷ Weene nāā miiji gemi weeme ireclota bine ngenecu māpu ca lecaleca me wawename?

²⁸ Piyepu weene ngena name pi ngenecu māpu cābletāape poto cidi me? Weene jepānemeye baace popo cina lipu uteninini. Teepi kaakesea lica jaawenimusi, cuta asigrera gwidape bine lica yaaterutājimusi.

²⁹ Yepā cane weebibine jijenininine, egā ngānu gyene, mope biname Solomona puu miijirage cābletāape ca abasogāruji, yepā tabe epu miiji opo lica ābituji ai baace popo bime yepā te liiyepu.

³⁰ Acejiyame te liba apu yaabasogārimuge baace bine, page lui cina ireclota gemi, ciyeciye siige uliobo cabu me yiisabimusi, egāsu tabe cuta weebibine isigrerājiminuge cābletāape ca. Weeme ātrunga lipu matimati gemi!

³¹ Weene miiji māpu ngena atwanena bine abmalācemame deedei, niye piyepu cābletāape poto cidi me.

³² Acejiyame umle cāco biname teepi te jāārngemusi ai gwidape bine, yepā weeme Babe cabucewe je tabe uja umle gyene, egā ai weeme singi gwidape gemi.

³³ Pātā weene miiji niināce ābitipeye Acejiyame te weebibine waadename piyepu weene wawename, tabe ngena tääpume singi, siige Acejiyame te piba icārininuge iyeta weeme singi gwidape.

³⁴ Pipu pi weene ciyeciye tääpume ngenecu māpu gone; ciyeciye me māpu lui teeme yene. Ai bimū me māpu ibibi gyene ai bimū tääpume.”

7

Yeesu me Abiberāja Mene Biname bine Atrana poto cidi me

(Luuka 6:37-38, 41-42)

¹ “Weene gone biname bine jaatranimuye, piba weebibine lica cirege atrana.

² Ingle naace popi weene lipu teebibine jaatranimuye, weebibine cuta pepu cirege atrana. Weene luma ngine yaatonāremuye biname bine, weebibine cuta puma ngine birige atonera.

³ Peei name pi gone määme nuuja ātrunga biname me irecu cabu plāpu ne ire jaatwanute, maane liba uli pargi ne lica jääpānute määme irecu cabu.

⁴ Baborage uli pargi liba pisi nyene määme irecu cabu, maane miiji lica gāte määme biname ne jaji egā, ‘Cane määme irecu cabu ca plāpu ne jaacatene.’

⁵ Maane walya biname gāte! Maane miiji niināce uli pargi ne määme irecu cabu ca acata, piba maane cāngenarage jepānenite määme biname me irecu cabu ca plāpu ne acatame.

⁶ Lui gwidape ne mara me ituge wawena Acejiyame tääpume, weene drego bine gone yääcārimuye, teepi cije tatatrongārininusi weeme bau me, tuusasemalininusi. Piiyepu cuta weeme kusa bine gone yisabimuye blome bime bau me, teepi cije jääbrecājemusi.”

Weene Itināreye, Jirngeye, Eyājeye

(Luuka 11:9-13)

⁷ “Itināreye, piba pagege weebibine ceera: jirngeye, weene piba pagege pāpāna; eyājeye, piba pagege weeme tääpume iitnana.

⁸ Iyeta lui cina yāātinārusi, teebibine yääcārimusi; lui cina jāārngusi, teepi jääpānusi; lui cina yāāyājusi, teeme tääpume jūtnusi.

⁹ Bāgrā te liba yāātināruge teeme babe ne deedei tääpume, tabe kula lica yääcāruge.

¹⁰ Coo tabe bāgrā te liba cibi tääpume yāātināruge, tabe niyarage cobyame lica yääcāruge.

¹¹ Weene puu niya biname gemi, yepā weene unle gemi miijimiji gwidape weeme bāgrā bine ceera. Egāsu nata weeme Babe lui cabucewe je enajenige, tabe cuta piba yāācāranemuge miijimiji gwidape, lui cina teebine yāātinārusi.

¹² Weene singi biname cina ngena wawename weeme tääpume, weene miiji pepu wawena teeme tääpume. Ai abiberāja lui Moose me Cotre cabu pisi nyene piiyepu Acejiyame me mename biname cina apu ebiberājimujisi.”

Lui Gaabe te Ādenige Iyeteta Ireclota cabu me

(Luuka 13:24)

¹³ “Weene susurage grana cabu me ebācneye, inge lui grana gyene uliobo puupu cabu me, daamle gyene pui grana, piiyepu lui gaabe te ādenige pui grana cabu me plowa gyene, siige bucurage cina piiyeme otneninisi.

¹⁴ Yepā lui grana gyene iyeteta ireclota puupu cabu me, susu gyene pui grana, piiyepu lui gaabe te piiyeme ādenige māpu gyene, siige nesae taatu cina pui gaabe ne jepānanenisi.”

Yeesu me Abiberāja Mene Uli piiyepu Teeme Kuu poto cidi me

(Luuka 6:43-44)

¹⁵ “Weene ireire inajipi walya mename biname bime tääpume. Teepi weeme bau me saacluge maamoi bime opo pana, yepā teepi teeme ngenecu bora agliyame wulp pana birige.

¹⁶ Weene lipu uli ne opo yaawatnuye teeme kuu cabu ca, weene cuta teebibine pepu opo yaawatnimuye teeme mule cabu ca. Pāgepāge seeasea cina waina kuu lica yāāyemuge, cuta gargale cina lica piigi kuu yāāyemuge.

¹⁷ Miijirage uli lui miijimiji kuu yāāyuge; niyarage uli lui niyaniya kuu yāāyuge.

¹⁸ Miijirage uli te āblicāco niyarage kuu āyi; niyarage uli te āblicāco miijirage kuu āyi.

¹⁹ Iyeta uli lui cina niyaniya kuu yāāyemuge, yaargawimusi, uliobo cabu yisabimusi.

²⁰ Yoo, weene walya mename biname bine cuta teeme mule cabu ca opo yaawatnimuye.”

Mene Atrana Bimu poto cidi me

(Luuka 13:25-27)

²¹ “Iyeta lui cina najananusi egā, ‘Yageyame, Yageyame,’ teepi iyeteta ireclota ne lica cirege pāpāna Acejiyame cama cabucewe je, yepā eei taatu cina cirege pāpāna, lui cina jaawenimusi cāme Babe cabucewe je ngena tääpume singi.

²² Atrana bimu liba cirege, piba bucurage cina cire najanepesi egā, ‘Yageyame, Yageyame, cine nata määme ngii cabu Acejiyame me tagepogogo mene jaajanemus, cuta määme ngii cabu niyaniya cable bine yāāyecrājemusi piiyepu bucurage ciitaca mule bine jaawenanemus.’

²³ Puma cita ca cane pui biname bine cire jaajemepene egä, 'Cane umle cäco gäne weene. Weene niya mule biname gemi, äyeblogäjäineye cäme bau ca.' "

Yeesu me Abiberäja Mene Neeneni Mete Raranga Biname poto cidi me
(Luuka 6:47-49)

²⁴ "Iyeta biname lui cina yäätəcijemuge cäme ai mene, siige pui mene ibi jaawenimusi, teepi umle biname pana birige, lui te mete ne kula papa cabu erangige.

²⁵ Tabe lui mete ne erangige, siige ngupe te piba secirige, igi cama tädige, cuta babo buuwe te tipwäjige, yepä mete te lica itramige, inge kula papa cabu jage.

²⁶ Iyeta biname lui cina yäätəcijemuge cäme ai mene, yepä pui mene ibi lica jaawenimusi, teepi buduma biname pana birige, lui te mete ne koriyo papa cabu je erangige.

²⁷ Ngupe te secirige, igi cama tädige, babo buuwe te tipwäjige, siige pui mete te iyeta peega ecirige."

²⁸ Yeesu liba teeme ai mene iicema epirige, biname cina mutäcäco ge teeme abiberäja mene name pi,

²⁹ inge teeme abiberäja mene epu lica ge cotre abiberäja biname bime liiyepu. Pätä tabe epu ebiberäjimige, lui biname me conocäco pisi nyene biname bine jajime teepi ngena wawename.

8

Yeesu Lepera Pita Biname ne Miiji me Jewenige
(Mareko 1:40-45; Luuka 5:12-16)

¹ Yeesu liba täinige podo cabu ca, bucurage biname cina teebine ingwe sicwisi.

² Piba yepä lepera pita biname te tädige teeme bau me, kokorare ca ääpednutige teeme opo gaabe je, jejige egä, "Babo biname, maane liba singi gäte, maane miiji gäte cebine pita cäco me wawena."

³ Yeesu ime uutige teeme bau me, joomlige, jejige egä, "Yoo, cane singi gäne. Maane pita cäco äbiti!" Piba taatu tabe miiji me äbitige teeme lepera pita cabu ca.

⁴ Yeesu puma cita ca teebine jejige egä, "Maane näätəcijege, gone nuuja biname bine umle jaawenimute, cane lipu meebine miiji naawenine. Yepä maane conocäco ädi iiwäreja biname bau me, tabe te määme tääpe pa naawatnäjepi. Moose lui owecu gwidape jiiucuji Acejiyame ne iiwärejame, maane piba pui ecärepi teebine tabe iiwärejame. Biname cina piba umle pa läbitipesi, egä maane miiji gäte."

Yeesu Cubu Mope Biname me Kaakesea Bägrä ne Miiji me Jewenige
(Luuka 7:1-10)

⁵ Yeesu liba abacitige Kaprenauma cewe me, cubu mope biname, lui te Israela biname lica ge, piba tädige teeme bau me, itemlige teebine ätityerame.

⁶ Tabe Yeesu ne apu jejige egä, "Babo biname, cäme kaakesea bägrä te ätwtäneji enajenige mete cabu. Tabe pita name pi naabe cewe oocaninige, äblicäco ge arpinenta."

⁷ Yeesu jejige egä "Cane tädenine teebine miiji wawename."

⁸ Yepä tabe pui cubu mope biname te jejige egä, "Oo babo biname, cane nuuja miiji lica gäne! Cäme mete me gone tädute. Maane yepä mene taatu jiiucepi cäme kaakesea bägrä te miiji äbitame.

⁹ Cäme cuta piti nemi niinäce gaabe biname piyyepu ingwe gaabe biname. Cane liba cäme ingwe gaabe biname ne jaajune egä, 'Ädi, tabe läduge. Nuuja ne liba jaajune egä, 'Tädi, tabe täduge. Cuta piyyepu cane liba cäme kaakesea bägrä ne jaajune ngena wawename, tabe jaawenuge."

¹⁰ Yeesu liba teeme mene jitəcijige, tabe mutäcäco äbitige, siige teeme ingwe äcwiyame biname bine jejemige egä, "Toraca gyene, cane nuuja Israela biname ne apu ätrunga cama lica ituge päpäna.

¹¹ Cane weebibine jijenininine: bucurage cina cire saaclepi bimu acita gome ca piyyepu bimu äpula gome ca, siige cire ladnatärepi Abrahamo, Isacako, Yakobu cama cabucewe je Acejiyame me soriyomu cabu.

¹² Yepä lui cina miiji cirege pui soriyomu cabu äbäcna, teebibine cire yiisabemepesi krokeciye cabu me. Teepi puma ele cire yaangenetnemepi, giricu cire yaatebecmepesi."

¹³ Siige puma cita ca Yeesu pui cubu mope biname ne jejige egä, "Äte, acnenuti mete me. Maane ngena ne jitrungenite, peei te läbitege." Siige teeme kaakesea bägrä te puirage padare cabu miiji äbitige.

Yeesu Bucurage Biname bine Miiji me Jewenimige
(Mareko 1:29-34; Luuka 4:38-41)

¹⁴ Yeesu ädige, Peteru me mete me abacitige. Tabe teeme gite ne puma jopänige gebale cama ätwitäneji.

¹⁵ Yeesu teebine ime gome jwoomlige, siige gebale te obmalige. Tabe puma cita ca arpinantige, Yeesu ne mogobi jewenige.

¹⁶ Liba mämleteca ge, piba biname cina bucurage biname bine sewadanemisi Yeesu bau me, lui bime trupa cabu niyaniya cable puga ge. Yeesu iyeta cable bine mene ca iyecräjemige piyepu iyeta pita biname bine miiji me jewenanemige.

¹⁷ Tabe ai ne naace popi jewenige mename biname Isaya me mene te toraca me äbitame egä, "Taba cime pita bine teeme cabu icranige, tabe cime tääpe mäpu bine ewadimige."

Mene Yeesu ne Ingwe Äcwi poto cidi me

(Luuka 9:57-62)

¹⁸ Yeesu liba bucurage biname bine jepänimige teebine awaclomta je, tabe teeme abiberäja bägrä bine jejemige teepi sawa nuuja poto doro me uuraname.

¹⁹ Teepi ingwe yuurisi, niinäce yepä cotre abiberäja biname te tädige Yeesu bau me, jejige egä, "Abiberäja biname, ngänu gyene, maane liiyeme ädenite, cane mäame ingwe ädenine."

²⁰ Yeesu jejige egä, "Poks bime bora piti nemi lenaja täापume piyepu ele bime mete piti nemi, yepä cane lui te Acejiyame bau ca tädujine biname me äbitujine, cäme täापume puupu lica gyene cäme mope acitame."

²¹ Puma cita ca lui biname cina Yeesu ne jitrungisi, teeme yepä te jejige egä, "Babo biname, cane singi gäne meebine ingwe äcwime, yepä cane lipu gäne niinäce otni cäme babe ne gape acitame?"

²² Yeesu jejige egä, "Laati bemi seemo ireclota cabu budre, teepi te teeme budre biname bine gape cabu me yaacranimusi. Maane cebine ingwe näcwi."

Yeesu Sawa cabu Buuwe ne Jiibige

(Mareko 4:35-41; Luuka 8:22-25)

²³ Yeesu poo cabu me acenutige, teeme abiberäja bägrä cina teta cama acetnäriige.

²⁴ Teepi liba eclige, baborage buuwe te tipwäjige sawa cabu, siige uule kuu cina poo ne itrugärisi. Yepä Yeesu ute ge.

²⁵ Abiberäja bägrä cina eclige, teebine elotnantisi, jejisi egä, "Yageyame, nityärini! Mine labumitninago!"

²⁶ Yeesu jejemige egä, "Weene wälu ngeno memi? Weeme ätrunga matikolärage gyene." Tabe abujängtige, kokre cama buuwe piyepu uule kuu bine mene jejemige, siige piba bulubulu mataru te enajige.

²⁷ Abiberäja bägrä cina mutäcäco äbitinisi, jüicisi egä, "Ai biname Laasi nyene? Buuwe piyepu uule cina teeme mene jitecijisi."

Yeesu Miiji Jaawenige Neeneni Biname bine Niya Cable cama

(Mareko 5:1-20; Luuka 8:26-39)

²⁸ Yeesu sawa nuuja poto doro me yuurige, atyaramtige Gadara gawe cabu me, siige neeneni rooriye cina tewacletnäjäsi teebine puma. Kula waja cabu lui gape gemi, teepi pui cabu ca tasatäsi. Teeme trupa ngalebora puga ge niyarage cable. Teepi mage girigale ge, peei name pi nuuja biname te singi lica ge pui gaabe cabu otnime, teepi luma aanajenanige.

²⁹ Siige teepi liba Yeesu ne jepänäsi, ala abayäsi egä, "Acejiyame me Bägrä, maane singi ngena wawename cime täापume? Maane watranga je tädite cibibine sabe wawename."

³⁰ Seeji cudecewe padare puga ge baborage ngeerangera blome tomi, deedei täापume yuunguretnäjimisi.

³¹ Puma cita ca cable cina Yeesu ne jejisi egä, "Maane liba singi gäte cibibine äyecrejame, nityepini blome bime trupa cabu me."

³² Yeesu jejemige egä, "Yoo, naaclege!" Siige teepi aabmalisi pui neeneni biname bine, eclige, blome bime trupa cabu me ebäcnisi. Iyeta blome tomi te podu cabu ca uuwamitnige gawe me, sawa cabu me uupletnäriige, siige abumitnige.

³³ Blome ire atwi biname cina uucratnige, eclige babo cewe me. Puma teepi biname bine jebaitnemisi iyeta, ngena cina bäbitinisi niya cable cama lui neeneni biname bime täापume.

³⁴ Puma cita ca iyeta biname pui babo cewe cabu ca eclige Yeesu ne päpäname, siige liba jepänisi, jejisi teeme gawe ne abmalame.

9

Yeesu Miiji me Jewenige Tääpe Nuuja poto Budre Biname ne

(Mareko 2:1-12; Luuka 5:17-26)

¹ Yeesu poo cabu acenutige, sawa ne yuurige, atyaramtige teeme cewe me.

² Biname cina waaku cabu secanisi tääpe nuuja poto budre biname ne. Yeesu liba jepänimige, egä teepi baborage ätrunga cama gemi, tabe pui pita biname ne jejige egä, “Cäme biname, wälu gone! Maane kälyä gäte mäáme niiya mule cabu ca!”

³ Yeesu gome puga ge cotre abiberäja biname. Teepi teemämu jitranisi egä, “Ai biname te Acejiyame me ngii ne sabe jewenige, ingle tabe taatu gyene biname ne kälyä wawename teeme niiya mule cabu ca.”

⁴ Yepä Yeesu umle äbitige teeme ngene atwanena, siige tabe jejemige egä, “Weene ngeno memi niiya ngene atwanena cama?”

⁵ Lui gyene plowa iicana ai pita biname ne jajime egä, ‘Maane kälyä gäte mäáme niiya mule cabu ca,’ coo ‘Arpinanti, abujängti, siige ädi.’

⁶ Yoo siige, cane lui Acejiyame bau ca tädujine biname me äbitujine, cane lui gwidape jewenenine, weene pui cabu ca opo nawatniniye, egä cäme conocäco pisi nyene biname ne kälyä wawename teeme niiya mule cabu ca.” Siige puma cita ca tabe pui tääpe nuuja poto budre biname ne jejige egä, “Arpinanti, abujängti, mäáme waaku ne ecati, mete me ädi!”

⁷ Puma cita ca pita biname te arpinantige, mete me ädige.

⁸ Lui biname cina jepänisi, teepi cälu te jitemige, Acejiyame ne eso ecärisi, tabe biname bine lipu kokre ituge ceera.

*Yeesu Matayo ne Ala Tesoglicige
(Mareko 2:13-17; Luuka 5:27-32)*

⁹ Yeesu pui cewe ne sebmilige. Tabe liba ädige, tabe täks rarekaake uutecrena biname ngii Matayo ne jepänige. Tabe adnatäneji enajige teeme kaakesea mete cabu, siige Yeesu teebine jejige egä, “Tädi cane cama otnime.” Matayo abujängtige, teta cama ädige.

¹⁰ Ingwe ca Yeesu liba deedei äbitige Matayo me mete cabu, bucurage täks rarekaake uutecrena biname piyepu cotre atropengäja biname teepi seclige deedei äbitame Yeesu piyepu teeme abiberäja bägrä cama.

¹¹ Parisea sigu biname cina liba jepänisi Yeesu teta cama deedei äbita je, teepi teeme abiberäja bägrä bine jejemisi egä, “Weeme abiberäja biname te lipulipu deedei äbitenige täks rarekaake uutecrena biname piyepu cotre atropengäja biname cama?”

¹² Yeesu jitecijemige, jejemige egä, “Lui biname cina miiji birige, teepi dokta täापume singi lica, yepä lui cina pita cama birige, teepi singi dokta täापume.

¹³ Weene miiji umle äbitineye, ai mene ngena täापume myene egä, ‘Cane singi lica gäne biname cina cebine iiwärejame, yepä cane singi gäne teepi nuuja biname bine owecu wawenecame.’ Cane lica tädujine ala asoglecame lui cina apu jaangemuge, egä teepi conocäco biname gemi, yepä cane conocono biname bine ala asoglecame tädujine.”

*Ätemleja Deedei Ärwäja cäco Lenaja poto cidi me
(Mareko 2:18-20; Luuka 5:33-35)*

¹⁴ Yoane niye ca äciseja biname me abiberäja bägrä cina seclige Yeesu bau me, itemlisi egä, “Ai lipu gyene, egä cine piyepu Parisea sigu biname jäje deedei ärwäja cäco ninajin- inuge Acejiyame ne awejename, yepä mäáme abiberäja bägrä cina umle cäco gemi pipu äbita?”

¹⁵ Yeesu jejemige egä, “Atejäclmuta soriyomu ne liba yaacilusi, biname cina owecumete opo lica birige, mamye rooriye te liba teta cama pisi nyene. Yepä, padare te cire tädepi liba mamye rooriye ne cire yaacatepesi, teepi piba cire yaacrajemepi deedei ärwäja cäco.”

*Ngene ca Agli Mene Kirece piyepu Sasa Mule Aweceja poto cidi me
(Mareko 2:21-22; Luuka 5:36-39)*

¹⁶ “Nuuja te kirece äciseja cäco cäbletääpe pläsu ne sasa cäbletääpe bora cabu lica yääswäruge. Tabe liba pepu jaawenuge, siige cäbletääpe ne liba jääcisäjuge, pui kirece cäbletääpe pläsu te lacialmuge, siige sasa cäbletääpe ne jääsegläruge. Puma cita ca kirece pläsu te läwälutuge sasa cäbletääpe cabu ca, siige bora te babo läbituge.

¹⁷ Piyepu nuuja te kirece waina niye ne lica yaapaduruge gouti tääpe ca wawenäneji sasa ängära gwidape cabu. Tabe liba yaapaduruge, kirece waina niye te pui sasa ängära gwidape ne yääpluge, ingle tuutecuge. Siige waina niye te lapaduruge gawe me piyepu ängära gwidape te sabe läbituge. Kirece waina niye ne miiji kirece gwidape cabu ängära, piba teepi ibibi laanajuge.”

*Babo Biname me Ngulebägrä piyepu Pita cama Magebi
(Mareko 5:21-43; Luuka 8:40-56)*

¹⁸ Yeesu liba camu mene iicema cabu jage, piba yepä Israela babo biname te teeme bau me tädige. Tabe kokorare ca ääpednutige teeme opo gaabe, jejige egä, “Cäme ngulebägrä

budre bäbitige page ai padare cabu. Maane tädi ime acitame teeme papa cabu, tabe piba budre cabu ca arpinantenige.”

¹⁹ Yeesu abujängtige, teebine ingwe icwige teeme abiberäja bägrä cama.

²⁰ Teepi liba eclige, Yeesu me kaake poto ca yepä magebi te piba toclige, lui twelb kämäge ngalebora uudi apira pita cama tonajenäjumi. Tabe Yeesu me cäbletääpe pepyämu ne joomlige ogä,

²¹ ingle tabe ngene jotwananige egä, “Cane liba Yeesu me cäbletääpe pepyämu taatu joomlenine, cäme ai pita te piba nabma-lenige cebine.”

²² Yoo siige, tabe liba joomlige, Yeesu piba tatatrongtige, teebine jopänige, jojige egä, “Bägrä, wälu gone! Määme ätrunga te meebine müiji bii naawenige.” Siige peeirage padare cabu magebi te müiji äbitige.

²³ Puma cita ca Yeesu liba pui babo biname me mete cabu me atyaramtige, lui me bägrä te budre äbitige, tabe jepänige, biname cina dobidobi bine jecnäjimisi piyepu papa me äbitinisi bägrä me budre name pi.

²⁴ Tabe jejemige egä, “Pääye, äyebengäjineye ama cita ca. Bägrä te budre lica gwene, tabe ute gwene.” Teepi teebine ngange ecwänisi.

²⁵ Puma cita ca biname bine liba iyecräjemisi mete cabu ca, Yeesu piba abacitige bägrä me ute puupu cabu me, ime jwoomlige, siige bägrä budre cabu ca arpinantige.

²⁶ Teepi idre ecananisi iyeta pui gawe cabu, egä Yeesu ngena mule ne jewenige.

Yeesu Müiji Jaawenige Neeneni Ireçu Määsumäsu Biname bine

²⁷ Yeesu pui cewe ne sebmalige. Tabe liba ädige, neeneni ireçu määsumäsu biname cina teebine ingwe icwäsi. Teepi ala abayäsi egä, “Daawida me kaakesaare, maane owecu cime tääpume!”

²⁸ Yeesu liba mete bora me abacitige, pui neeneni ireçu määsumäsu biname cina piba taacliche teeme bau me. Yeesu äätemlige egä, “Weene nää toraca nätrungeniye, egä cane müiji gäne weebibine ireçu müiji wawenime?” Teepi jejäsi egä, “Yoo, babo biname.”

²⁹ Puma cita ca Yeesu teeme ireçu papa cabu ime bine aacitige, jaajige egä, “Weeme ätrunga te ibibi läbitege.”

³⁰ Siige teeme ireçu cina aasatäsi. Puma cita ca Yeesu kokre cama mene jaajige egä, “Gone biname bine ai poto cidi me umle jaawenimuye.”

³¹ Yepä teepi mete ne sebmäläsi, aacliche, Yeesu ne idre jecanenäsi iyeta pui gawe cabu ta.

Yeesu Müiji Jewenige Mene Licema cäco Biname ne

³² Pui neeneni biname cina liba baacliche, piba biname cina Yeesu bau me secanisi mene iicema cäco biname ne, lui me trupa cabu puga ge nüiya cable.

³³ Yepä Yeesu liba nüiya cable ne iyecräjige, pui biname te piba taatu gije abacitige mene iicemame. Biname cina mutäcäco äbitinisi, jüicisi egä, “Cine niinäce lica ituge Israela gawe cabu apu mule ne päpäna.”

³⁴ Yepä Parisea sigu biname cina jüicisi egä, “Nüiya cable bime mopeyame te Yeesu ne kokre yäacärüge tabe nüiya cable bine äyecrejame.”

Yeesu Owecu Ge Biname bime tääpume

³⁵ Yeesu puma cita ca otnetnäjige iyeta modamoda piyepu matimati cewe cabu ta. Tabe biname bine ebiberäjimige teeme abasecretna mete cabu ta piyepu Müiji Mene jejananemige egä, “Acejiyame te pagege biname bine waadena.” Tabe cuta biname bine müiji jewanemige iyeta maramara pita cabu ca.

³⁶ Tabe liba bucurage biname tomi bine jepänimige, tabe owecu äbitige, ingle teepi mage ngenecu mäpu cama ge piyepu ätityera tääpume singi ge epu pana maamoi, lui bime ire atwi biname lica ge.

³⁷ Yeesu puma cita ca teeme abiberäja bägrä bine jejemige egä, “Ärucna lui baborage gyene, yepä nesae taatu kaakesea bägrä gemi atomle-came,

³⁸ peei name pi weene müiji ireçu ätumutame ärucna Yageyame bau me tabe poto kaakesea bägrä bine ätyepame teeme ärucna tääpume.”

10

Yeesu me Twelb Ätyepäneji Biname bime Ngii

(Mareko 3:13-19; Luuka 6:12-16)

¹ Yeesu teeme twelb abiberäja bägrä bine ala tesoglicimige, ecärimige kokre nüiyarage cable bine äyecrejame piyepu iyeta maramara pita bine äyebengäjame.

² Age tema pui twelb ätyepäneji biname bime ngii: niinäceyame lui Simona, lui ne enenisi Peteru ca, piyepu teeme igane Andrea; cuta Yakobu teeme igane Yoane lui Jebedayo me bägrä gegi;

³ cuta Pilipo naabi Bartoloma; Tooma piyepu täks rarekaake uutecra biname ngii Matayo; cuta Yakobu Alaba me bägrä piyepu Tadeus;

⁴ cuta Simona lui Kanana sigu biname gyene piyepu Yuuda Isakariyota lui Yeesu ne budre tääpume awaba biname gyene.

*Yeesu Teeme Twelb Abiberäja Bägrä bine Jityepäjemige
(Mareko 6:7-13; Luuka 9:1-6)*

⁵ Yeesu ai twelb biname bine apu umle mene cama jityepimige kaakesea wawename egä, "Gone biname bime bau me naacluge lui Israela biname lica gemi. Cuta gone naacluge nuuja cewe cabu me Samariya gawe cabu je.

⁶ Yepä weene Israela biname bime bau me naacluge, lui cina epu pana gemi apeseräjäneji maamoi cina liyepu.

⁷ Weene teebibine jejananemepeye egä, 'Acejiyame te mameta gyene biname bine waadena.'

⁸ Weene pita biname bine miiji jewenemepeye, budre biname bine erpineräjemepeye, lepera pita biname bine miiji jewenemepeye piyepu niyaniya cable bine iyecräjemepeye. Weene kokre ne daremu cäco ituge acata ai mule bine wawenecame, peei name pi weene miiji daremu cäco cuta biname bine itityeräjemepeye.

⁹ Weene gone gol, silba piyepu rarekaake bine yaawadimuye weene cama.

¹⁰ Gone diiba yaawadimuye, coo tuwängle cäbletääpe piyepu ernge gwidape coo piyepu otnetneja suru, ingle kaakesea bägrä ne miiji teeme singi gwidape ceera.

¹¹ Weene liba lui babo cewe cabu me coo piyepu matkolä cewe cabu me latyarininuye, weene miiji ärngi, egä laati te singi weebibine teeme mete cabu me äbäcname, siige weene teta cama inajininuge, ngälu weene peei cewe ne saabmaluye.

¹² Weene liba mete cabu me yääbäcnuye, jüicuye egä, 'Poode!'

¹³ Pui mete cabu biname cina liba weebibine jiwablininusi, weeme poode te miiji yaanajuge puma. Yepä teepi liba lica jiwablininusi, weeme poode te lacnenutuge weeme bau me.

¹⁴ Poto mete coo piyepu cewe cabu ta liba weebibine lica jiwablininusi coo weeme mene lica jitecjinusi, weeme ernge cabu ca teeme tuuwe bine jääglubäjemuye, siige saabmaluye pui mete ne coo cewe ne.

¹⁵ Cane toraca jijenininine, Acejiyame me atrana bimü cabu Sodoma piyepu Gomora cewe biname cina lui niyarage daremu ne cirege päpäna, matikäli cirege. Lui cewe biname cina lica pa jiwablipesi weebibine, teeme niya daremu lui baborage cirege."

*Mäpu te Tädenige
(Mareko 13:9-13; Luuka 21:12-17)*

¹⁶ "Cane weebibine jityepininine biname bime bau me, epu pana maamoi cina lipu yaacluge wulp bime sigu cabu me. Weene miiji cobyame bime pana umleumle inajipi piyepu gimäe bime pana niya wawena cäco inajipi.

¹⁷ Weene ireire inajipi, ingle biname peeci nemi, lui cina weebibine joomlinininusi ablaweja mete me waadename. Piyepu teepi teeme abasecretna mete bora ta weebibine itemeläjininusi.

¹⁸ Teepi cämiji pi iwadininusi modamoda biname bime piyepu gawe mope biname bime opo gaabe me weene teebibine piyepu gawe maramara biname bine Miiji Mene jajanename.

¹⁹ Yoo, weebibine liba ablaweja tääpume iwadininusi, ngenecu niya gone, egä weene ngena jüicuye coo lipulipu jüicuye. Liba padare te tatyaramtuge weene mene iicemame, weebibine piba mene birige ceera iicema tääpume.

²⁰ Weene lui mene cire jüicemepeye, peei lui weeme mene lica cirege, yepä weeme Babe me Seemo te ngena atwanena cire icäripi weene ngena iicaname.

²¹ Poto biname cina teeme naniganewale bine budre me cirege äyemela. Babe cina peeirage mule cire jaawenepesi teeme bägrä bime tääpume. Cuta bägrä cina cire lata-trongäripesi teeme mage babe bine budre me äyemelame.

²² Iyeta biname cina weebibine jimugitininusi cäme singi pi, yepä laati te kokre cama cire jaaclajutepi ngälu ngälu gaabe me, tabe iyeteta ireclota ne cirege päpäna.

²³ Teepi liba yepä cewe cabu weeme tääpume claabe läbitininusi, weene miiji nuuja cewe me uucratna. Cane toraca jijenininine, weene cäro camu Miiji Mene jajanena ne cire epirepeye Israela modamoda cewe cabu ta, cane Acejiyame bau ca lui te tädujine biname me äbitujine, niinäce cire tacnenutepene.

²⁴ Abiberäja bägrä te baborage lica birige teeme abiberäja biname bau ca, coo piyepu aletnäneji biname te baborage lica birige teeme babo biname bau ca.

²⁵ Pipu pi abiberäja bägrä te bojä jaaguge, tabe liba teeme abiberäja biname cama ibibi läbituge. Cuta aletnäneji biname te bojä jaaguge, tabe liba teeme babo biname cama ibibi läbituge. Yoo, biname cina liba cebine, lui weeme mope biname gäne, nainusi Beelsebul ca, siige piba teepi weebibine, lui cina căme ingle biname gemi, cuta mage niyaniya ngii ca iyinininusi.”

*Laati täápume Miiji Wälu
(Luuka 12:2-7)*

²⁶ “Yoo, weene biname bime täápume wälu gone! Ngena gyene ämlitäneji, pagege pajecu me äbita. Ngena gemi ogä, pagege awabudnäja.

²⁷ Cane krokeciye cabu ngena täápume jijenininine, weene miiji bimubabu cääri jajana; weene siiya mene ca ngena itecijenininige, weene miiji cabucabu pagege jajanena, epu pana mete toro cabu ca lipu mene tiicemusi.

²⁸ Wälu gone eei bime täápume, tääpe ne lui cina budre me yaaglusi, yepä teepi äblicäco seemo ne budre me agli. Pätä miiji weene Acejiyame täápume wälu, ingle tabe miiji gyene tääpe piyepu seemo bine niya puupu cabu me acraname.

²⁹ Puu matimati ele cina papa gemi: yepä rarekaake ca neeneneni bine jaaletnusi, yepä teeme yepä te lica gawe cabu me saatramuge weeme Babe me umle cäco.

³⁰ Cuta weene piyepu, Acejiyame iyeta umle gyene weeme poto cidi me. Tabe umle gyene, egä weeme lija matimati edingäli gemi.

³¹ Peei name pi weene gone wälu! Weene modamoda gemi, ele cina matimati gemi.”

*Yeesu ne Jaaitnusi piyepu Jaainusi
(Luuka 12:8-9)*

³² “Laati te biname bime sobe cabu naitnuge, egä tabe umle gyene cane, cane cuta teebine cabucewe je căme Babe me opo gaabe je cire jaaitnepene.

³³ Yepä laati te biname bime sobe cabu nainuge, egä tabe umle lica gyene cane, cane cuta teebine cabucewe je căme Babe me opo gaabe je cire jaaitnepene.”

*Gawe cabu je Poode Lica Gyene yepä Cubu
(Luuka 12:51-53, 14:26-27)*

³⁴ “Weene gone apu angä, egä cane itu tädujine ai gawecewe cabu me poode ne acaname. Cane lica itu tädujine poode ne acaname yepä cubuturikä ne secanujine.

³⁵ Imäbägrä te teeme babe bau me claabe läbituge cämiji pi piyepu ngulebägrä te teeme mage bau me, cuta naatete cina teemeteme claabe läbitininusi cämiji pi.

³⁶ Biname me binamewale cina cirege teeme cubuyame me äbita cämiji pi.

³⁷ Lui te baborage singi birige teeme mage babe täápume, yepä matikäli singi căme täápume, tabe ibibi lica gyene căme abiberäja bägrä me lenajame. Coo lui te teeme bägrä bime täápume baborage singi birige, yepä căme täápume matikäli singi, pipu biname te cuta ibibi lica gyene căme abiberäja bägrä me lenajame.

³⁸ Laati te liba teeme baarge uli ne palace cabu lica yaacanuge căme pana, siige cebine ingwe näcwuge, tabe ibibi lica gyene căme abiberäja bägrä me lenajame.

³⁹ Laati te singi lica gyene teeme ireclota ne mäpu cabu acitame cämiji pi, tabe toraca ireclota ne cire yaapesarepi. Yepä lui te singi gyene cämiji pi teeme ireclota ne mäpu cabu acitame, tabe toraca ireclota ne cire jääpänepi.”

*Yeesu me Mene Daremu poto cidi me
(Mareko 9:41)*

⁴⁰ “Laati te liba weebibine jiwablininuge, tabe cebine nawabluge. Piyepu laati te liba cebine nawabluge, tabe cuta jaawabluge teebine, cebine lui te nätyepuji.

⁴¹ Laati te liba Acejiyame me mename biname ne jaawabluge teeme peei ngii name pi, tabe mename biname bime pana daremu ne cire jääpänepi. Laati te liba conocäco biname ne jaawabluge teeme peei ngii name pi, tabe teeme pana daremu ne cire jääpänepi.

⁴² Piyepu laati te liba ai ngii cäco biname yepä ne gwidape yääcäruge, ngänu gyene puu gäbu niye, ingle tabe căme ingwe äcwi biname gyene, Acejiyame te teebine daremu cire yääcärepi.”

11

*Mename Biname cina Seclige Yoane Niye ca Äciseja Biname bau ca
(Luuka 7:18-35)*

¹ Yeesu liba teeme twelb abiberäja bägrä bine umle mene jajanena ne epirige, tabe pui cewe ne piba sebmilige, ädige poto mametamameta cewe me biname bine puma abiberäjame piyepu mene jajanename.

² Yoane niye ca äciseja biname lui krokeciye mete cabu jage, tabe puga iteciye, egä Keriso ngena jevenige. Puma cita ca Yoane teeme abiberäja bägrä bine jityepimige Yeesu bau me.

³ Teepi Yeesu ne itemlisi egä, “Nää, maane säte pui biname, iyeta biname cina lui ne jawagrijenisi otnime, coo cine miiji nuuja ne awagrija?”

⁴ Yeesu jejemige egä, “Weene Yoane bau me acnenuweye, teebine jejepeye, weene ngena jepänanemeniye piyepu ngena itecijaninige:

⁵ naace irecu määsumäsu biname cina cängena jääpänanemusi, ernge niiyaniya biname cina miiji waatninusi, lepera pita biname cina miiji läbitininusi, tablame budubuduma biname cina cängena yäätacijanimuge, budre biname cina larpineräjininusi, cuta owecumete biname bine Miiji Mene jaajanenemusi.

⁶ Ngenecu miiji eei gemi, laati bemi ätrunga ne lica yaapesarusi cäme bau.”

⁷ Puma cita ca Yoane me abiberäja bägrä cina liba äcnäriye, Yeesu piba gije abacitige biname bine jajanename Yoane poto cidi me egä, “Weene liba Yoane bau me läsipeye daapo taatu cewe cabu me, weene teebine lipu jääpänepeye? Weene baace ingle pana biname ne lica jääpänepeye, buuwe te lui ne yaajodnäjepi.

⁸ Cuta piyepu weene cängena abasogäräneji biname ne lica jääpänepeye, teeme bau me liba läsipeye, ingle abasogäräneji biname cina gawe mope biname bime mete cabu yaacrajuge.

⁹ Najeye, weene Yoane ne lipu jääpänepeye, weene liba teeme bau me läsipeye? Weene nää Acejiyame me mename biname ne jääpänepeye? Toraca gyene, yepä Yoane lui baborage gyene iyeta poto Acejiyame me mename biname bime bau ca.

¹⁰ Yoane pui gyene, Oogäräneji mene te lui poto cidi me jiceniye egä, ‘Cane Acejiyame cäme mename biname ne määme niinäce gaabe me cire jättyepene. Tabe te gaabe cire yaamacetnäjepi määme otni tääpume.’

¹¹ Cane toraca jijenininine, egä Yoane lui baborage gyene iyeta biname bime cabu ca, lui cina ituge ai gawecewe cabu lenaja ngälu Yoane me padare oomlaname. Yepä page ai kirece padare cabu eei cabu ca lui te matikäli gyene, Acejiyame te lui bine ewadenemige, tabe baborage gyene Yoane cabu ca.

¹² Pui padare cabu ca, Yoane niye ca äciseja biname te liba bäärmi jaagednemepi, ngälu airage bimubabu Acejiyame me waadena mule te kokre cama ituge otni. Piyepu biname piti nemi lui cina kokre läbitininusi Acejiyame me waadena mule cabu me äbäcname.

¹³ Moose teeme Cotre cabu piyepu iyeta Acejiyame me mename biname cina ngälu Yoane me padare oomlaname, teepi niinäce gaabe me jicemujisi, egä Acejiyame te biname bine cire yaawademepi.

¹⁴ Weene liba singi teeme mene ätrungame, weene miiji umle äbita, egä Yoane lui Eliya sine, lui me otni poto cidi me teepi niinäce gaabe me jicemujisi.

¹⁵ Weene liba tablame piti nemi ätecijame, itecijinege umle äbitame.

¹⁶ Cane ngena cabu yaatonäremene biname bine, page lui cina ireclota gemi? Teepi epu pana gemi matimati bägrä, lui cina adnatäreji yaacrajuge aletna puupu cabu, siige teemeteme ala labayaninusi egä,

¹⁷ ‘Cine dobidobi jääcnäjimusi,

yepä weene giire lica jääwäjuye.

Cine owecumete uupera yaatangusi,

yepä weene singi lica ele me.’

¹⁸ Yoo, Yoane te tädepi. Tabe deedei cäco yaanajepi piyepu waina niye lica yäänäjemepi. Yepä biname cina singi lica teeme mule tääpume, siige jicusi egä, ‘Yoane me niya cable pisi nyene.’

¹⁹ Cane lui Acejiyame bau ca tädujine biname me äbitujine, cane yäärwäjune, yäänäjune, yepä biname cina cuta singi lica ge cäme mule tääpume, siige teepi jicusi egä, ‘Jepäneye ai biname ne, mage looloyame gyene piyepu waina niye änäjayame gyene. Tabe täks rarekaake uutecrena biname piyepu cotre atropengäja biname bime biname gyene.’ Mine liba jääpänusi, egä Acejiyame bau ca lui mule te ngena jaawenuge, mine peei cabu ca oyo yaawatnusi, egä Acejiyame me umle toraca gyene.”

Ätrunga cäco Cewe poto cidi me

(Luuka 10:13-15)

²⁰ Yeesu gije abacitige cewe biname bine ablawejame, lui cina lica ituge atatröngära teeme niija mule cabu ca, ngänuge tabe bucurage ciitaca mule bine itu jaawenanemepi puma.

²¹ Tabe jejemige egä, “Oo Korasine piyepu Betesaida cewe biname, lipu babo niyarage cirege weeme tääpume! Cane lui ciitaca mule bine ituge weeme cabu wawena, liga cire

jaawenemejine Turo piyepu Sidona cewe cabu, biname cina puma ragre cire lasigrärinejisi piyepu mriibe ca cire lapyacinejisi awabame, egä teepi teeme niyaniya mule bine ituge abmaläcema Acejiyame bau me atatrongärame.

²² Korasine piyepu Betesaida cewe biname, cane weebibine jijenininine, egä Acejiyame me atrana bimu cabu Turo piyepu Sidona cewe biname cina teepi plowa cire jääpänesi weeme cabu ca.

²³ Cuta weene Kaprenauma cewe biname! Weene nää apu jingenininige, egä weebibine awepenta cabu me Acejiyame bau me? Eewe, weebibine niyarage puupu cabu me cire iyäripesi. Sodoma cewe biname cina liga cire jääpänejemisi ciitaca mule bine, weene lui bine ituge päpäna, pui cewe te page cerämu cire yaanajeji.

²⁴ Kaprenauma cewe biname, cane jijenininine weebibine, egä Acejiyame me atrana bimu cabu Sodoma cewe biname plowa cire jääpänesi weeme cabu ca.”

*“Ayo Naaclege Cäme bau me Diibe Oocaname.”
(Luuka 10:21-22)*

²⁵ Peei padare cabu Yeesu jüicige egä, “Babe, maane lui Yageyame gäte gawecewe piyepu cabucewe täápume, cane meebine eso nääcärenine, egä maane ai gwidape bine ituge ämletna umle biname piyepu miijimiji mopemuli biname bime bau ca, siige abiberäja cäco biname bime bau me ituge aboclomäja.

²⁶ Babe, ai lui määme miijirage singi gyene.

²⁷ Cäme Babe te iyeta gwidape bine itu saabmaleme pi cäme ime cabu. Nuuja te umle lica gyene Bägrä, yepä Babe taatu umle gyene; cuta nuuja te umle lica gyene Babe, yepä Bägrä taatu umle gyene piyepu eei biname cina umle gemi Babe, Bägrä te lui bime täápume singi aboclomta teebine.

²⁸ Naaclepi cäme bau me, lui cina gloose gemi mäpu biijabija bine waadename. Cane weebibine diibe oocana pa icäripene.

²⁹ Gone jäägyemuye lui mäpu bine jääpänimuye cämiji pi piyepu cäme bau ca labiberäjininuye, ingle cane owelaamelame biname gäne piyepu cane awepyeräja umle cäco gäne, siige weene piba poode ne pa jepänepeye.

³⁰ Cämiji pi lui mäpu bine jääpänimuye, plowa birige, piyepu cane ngena bine liba yaacranimune weeme cabu, mäpu lica birige.”

12

*Ätemleja Sabade Cotre poto cidi me
(Mareko 2:23-28; Luuka 6:1-5)*

¹ Pui padare yepä Sabade bimu cabu Yeesu teeme abiberäja bägrä cama wiiti calwacupi ngalebora lui gaabe cabu ädige. Abiberäja bägrä loolomecewe te joomlemige. Teepi puma cita ca wiiti mope bine ecrecimisi, kuu bine erwäjimisi.

² Parisea sigu biname cina jepänimisi, teepi ngena jebenisi, siige Yeesu ne jejisi egä, “Jepänimi! Määme abiberäja bägrä cina mime Sabade cotre ne bii jetropangtisi, teepi lui mule becnisi.”

³ Yeesu jejemige egä, “Egäsu weene ituge acnema, mope biname Daawida lui mule ne jewenuji, tabe piyepu teta cama lui biname teepi liba loolo me icrajuji, yepä teeme deedei lica.

⁴ Tabe iiwäreja mete cabu me abacituji, buluduu ne sisatuji, buluduu lui Acejiyame täápume acitäneji ge, siige ecäranemuji teta cama lui biname bine, siige teepi erwäjujisi. Teepi pui lui cotre ne jetropangtjisi, ingle iiwäreja biname taatu cina miiji gemi pui buluduu ne loolo.

⁵ Egäsu weene cuta Moose me Cotre mene cabu ituge acnema, egä iiwäreja biname cina Sabade bimu cabu miiji yaacluge iiwäreja mete me kaakesea wawename. Teepi cuta pui lui Sabade* cotre ne jaatropangtusi, yepä teepi kälyä birige.

⁶ Cane jijenininine weebibine: cane säne baborage, iiwäreja mete matikäli gyene.

⁷ Oogäräneji mene te jüicenige egä, ‘Cane singi lica gäne biname cina cebine iiwärejame, yepä cane singi gäne teepi biname bine owecu wawename.’ Weene liga toraca umle cirege, egä ai mene ngeno myene, weene piba lica cire jaatranemejiye, lui biname cina niya mule bine lica jaawenimusi.

⁸ Acejiyame bau ca lui te täduji biname me äbituji, teeme conocäco pisi nyene jajime Sabade bimu cabu ngena wawename.”

* **12:5:** Sabade cotre: Sabade cotre te jüicenige, egä biname te gone lecaleca padare otni Sabade bimu cabu.

*Duudemu Ime cama Biname**(Mareko 3:1-6; Luuka 6:6-11)*

⁹ Yeesu pui cewe ne sebmalige, ädige, yepä abasecretna mete cabu me abacitige.

¹⁰ Biname puga ge, lui me ime duudemu ge. Poto itemale puga ge, lui cina singi ge ingle ne päpäname Yeesu ne aitnejame, siige teepi teebine itemlisi egä, "Nää Cotre ibi mule gyene Sabade bimu cabu pita biname ne miiji wawename?"

¹¹ Yeesu jejemige egä, "Weeme yepä me liba maamoi pisi nyene, siige Sabade bimu cabu cupicu hora me yaatramuge, egäsu weene saarpatuye?"

¹² Maamoi matikäli gyene, biname baborage gyene, peei name pi nuuja cotre lica gyene biname tääpume miiji mule wawena Sabade bimu cabu."

¹³ Piba Yeesu pui pita biname ne jejige egä, "Määme ime tuuti!" Tabe ime uutige Yeesu bau me, piba siige teeme ime te miiji äbitige epu pana nuuja ime liiyepu.

¹⁴ Yepä Parisea sigu biname cina puma cita ca eclige, siige mene jitransisi Yeesu ne budre me acitame.

Acejijame me Kaakesea Bägrä Lipu Gemi?

¹⁵ Yeesu itecijige, egä Parisea sigu biname cina mene jitransisi teebine aglime, siige tabe pui cewe ne sebmalige, nuuja gome me äyeblyngtige. Bucurage biname cina teebine ingwe icwisi. Laati bemi pita cama, tabe iyeta teebibine miiji jewenanemige.

¹⁶ Puma cita ca tabe teebibine giri jicranimige, egä teebine gone awabudni-ta.

¹⁷ Yeesu lui mule jewenige, ibibi äbitige mename biname Isaya me mene cama egä,

¹⁸ "Age sena, cane lui kaakesea bägrä ne ituge jaji.

Tabe căme singi biname gyene, cane teeme tääpume ngenecu miiji gäne.

Cane căme Seemo ne teeme cabu me cire yaacitepene.

Tabe te biname bine umle cire jaawenemepi căme atrana poto cidi me.

¹⁹ Tabe lica cirege mene abaja coo claabe cama ala abayena.

Teeme tagepogogo ne lica cirege gaabe cabu ta ätecijana.

²⁰ Tabe ajodnäneji sogo ne lica cirege ägäbuta, cuta ätuma mameta lampa ne lica cirege ätuma.

Tabe apu cire läbitanepi, ngälu biname cina Acejijame me cotre bine cire jaawenemepesi.

²¹ Iyeta maramara gawe biname cina teeme ngenec atwanena bine cire yaacranemepesi teeme bau me."

*Yeesu piyepu Beelsebul, Satani ca Lui ne Cuta Einenisi**(Mareko 3:20-30; Luuka 11:14-23)*

²² Biname cina yepä biname ne secanisi Yeesu bau me, lui te irecu määsumäsu piyepu mene iccema căco ge, ingle teeme niija cable puga ge. Yeesu teebine miiji jewenige, siige tabe mene jicemige piyepu tabe irecu aasatige.

²³ Biname tomi cina mutäcäco äbitininisi. Teepi ätemläjinisi egä, "Nää, tabe pama mope biname Daawida me kaakesaare gyene?"

²⁴ Parisea sigu biname cina liba ai mene itecijemige, teepi jicisi egä, "Tabe naace popi niija cable bine yääyecräjemuge, ingle Beelsebul lui niija cable bime mopeyame gyene, tabe te teebine kokre ecäranenige niija cable bine äyecrejame."

²⁵ Yeesu umle äbitige teeme ngenec atwana poto cidi me, siige jejemige egä, "Nuuja gawe biname cina liba labelaninusi teemeteme cubu me, teepi watata lapirininusi. Cuta piyepu babo cewe biname coo ingle biname cina liba labelaninusi teemeteme cubu me, teepi lica birige lenaja.

²⁶ Siige Satani lui bine yaawadimuge, teeme yepä tomi te liba nuuja tomi cama cubu jicäsi, teepi siige uja maramara me läbitininusi, cije Satani me waadena mule te piba lipulipu kokre lenaja?

²⁷ Yoo, weene jiceniye egä Beelsebul, lui ne Satani ca cuta einenisi, tabe te cebine kokre näcärüge cane teeme niija cable bine äyecrejame. Peei toraca lica gyene, ingle Beelsebul singi lica gyene teeme niija cable bine biname cabu ca äyecrejame. Yoo, poto weeme abiberäja bägrä cina niija cable bine cuta yääyecräjemusi. Luma cita ca teeme kokre peei mule ne wawename? Lica Beelsebul bau ca. Peei name pi weemerage abiberäja bägrä cina jaawabudnitusi weeme conocono mene, egä căme kokre cable bine äyecrejame lui Beelsebul bau ca gyene.

²⁸ Eewe, căme kokre lui teeme bau ca lica gyene, yepä Acejijame me Seemo te kokre näcärüge cane niija cable bine äyecrejame, siige weene peei name pi umle gemi, egä Acejijame me waadena mule te weeme cabu me ituge atyaramta.

²⁹ Nuuja te äblicäco abacita kokre biname me mete cabu me teeme gwidape bine waadename, tabe liba teebine niinäce lica jätäyuge. Yepä tabe liba teebine niinäce jätäyuge, tabe piba labacituge teeme mete me gwidape waadename.

³⁰ Laati te căme biname lica gyene, tabe cebine năcisărmutuge. Laati te căme bau me lica taabasecretnimuge, tabe yaaplidnăremuge.

³¹ Peei name pi cane jijenininine, egă laati te liba ngena niyaniya mene jicemuge coo ngena nuuja niya mule bine jaawenimuge, tabe miiji gyene kălyă ăbitame pui niya cabu ca. Yepă laati te liba niyarage mene jicemuge Aceji Seemo poto cidi me, teeme peei niya te iyeteta yaanajuge.

³² Laati te liba năcisărmutuge cebine, Acejiyame bau ca lui te tădujine biname me ăbitujine, tabe miiji gyene kălyă ăbitame teeme peei niya mule cabu ca. Yepă laati te Aceji Seemo ne yăăcisărmutuge, teeme peei niya te iyeteta yaanajuge.”

*Uli piyepu Teeme Kuu
(Luuka 6:43-45)*

³³ “Uli liba miiji birige, teeme kuu cuta piyepu miiji birige. Yepă, uli liba niya birige, teeme kuu cuta niya birige. Weene uli ne opo yaawatnuye teeme kuu cabu ca.

³⁴ Weene cobyame pana gemi! Biname me ngenecu liiyepu, teeme mene cuta piyepu. Weene lipulipu miijirage mene iicema, ingle weene niyarage gemi?

³⁵ Miiji biname te teeme miiji ngenecu cabu ca miiji mule bine saaboclomăjimuge, niya biname te teeme niya ngenecu cabu ca niya mule bine saaboclomăjimuge.

³⁶ Cane jijenininine weebibine, egă Acejiyame me atrana bimu cabu biname cina miiji cire yaaboclomăjemepesi, egă ngena ingle cabu teepi papa kuu căco mene ituge iicema.

³⁷ Weeme mene cabu ca weebibine atrana cirege, egă weene miiji biname gemi coo niya biname gemi.”

*Biname cina Singi Ge Yeesu Ciitaca Mule Wawename
(Mareko 8:11-12; Luuka 11:29-32)*

³⁸ Poto cotre abiberăja biname piyepu Parisea sigu biname cina Yeesu ne jejisi egă, “Abiberăja biname, cine singi gemi maane ciitaca mule ne wawename cime păpăname.”

³⁹ Yeesu jejemige egă, “Weene lipu niyarage ătrunga căco biname gemi, page ai padare cabu lui cina ireclota gemi! Weene singi gemi căme bau ca ciitaca mule ne păpăname, yepă weene nuuja ciitaca mule ne lica pa jepănepeye, yepă Acejiyame me mename biname Yoona me ciitaca mule ne taatu pa jepănepeye.

⁴⁰ Yoona lipu babo cibu me camuge bora enajuji nesae bimu nesae ciye cama, cane lui Acejiyame bau ca tădujine biname me ăbitujine, cane cuta piyepu gawe bora pagege lenaja nesae bimu nesae ciye cama.

⁴¹ Atrana bimu cabu Ninewa cewe biname cina cire talotnăripesi budre cabu ca weene cama gigri atrana tăăpume. Teepi weebibine cirege aitneja, ingle teepi teeme niya mule bine itu ebmalimujisi Yoona me băărmi mene name pi. Siige cane age săne baborage Yoona bau ca, yepă weene cebine lica ituge ătrunga.

⁴² Cuta Siiba gawe mope magebi te atrana bimu cabu weene cama gigri cire tarpinantepi siige tabe weebibine cirege aitneja, ingle tabe cudecewe cewe ca tocluji Solomona me umle mene ăteciame. Siige cane age săne baborage Solomona bau ca, yepă weene singi lica gemi cebine ăteciame.”

*Yeesu me Mene Niya Cable Acnenuta poto cidi me
(Luuka 11:24-26)*

⁴³ “Niya cable te liba biname me trupa ne yaabmaluge, tabe waatnetnăjuge niye căco cewe cabu ta, puupu ne jăărnguge ngene oocaname.

⁴⁴ Liba lica jăăpănuge, tabe jicuge egă, ‘Cane acnenine piyeme, cane lui mete ne sebmalumene.’ Tabe siige lacnuge, jăăpănuge mete ne apretnăjeji piyepu miijirage acranăneji.

⁴⁵ Tabe piba lăduge poto seben mage niyarage cable bine arwojame, siige teepi iyeta saacluge pui biname me trupa cabu lenajame. Niinăce pui biname miiji lica birige, yepă page tabe siige iyeta mage niyarage me lăbituge. Pui yepă mule te cirege ăbita ai niyarage biname bime tăăpume, lui cina ireclota gemi page.”

*Yeesu me Ingle Biname Laati Bemi?
(Mareko 3:31-35; Luuka 8:19-21)*

⁴⁶ Yeesu liba camu biname bine mene jajanena cabu jage, teeme mage piyepu iganewale cina piba tatarige. Teepi puutucu je imyemutăjimige, biname bine itemlimisi Yeesu cama mene me.

⁴⁷ Puma cita ca yepă biname te Yeesu ne jejige egă, “Măăme mage piyepu iganewale puutucu je ete nemă. Teepi singi gemi maane cama mene iicemame.”

⁴⁸ Yeesu pui biname ne itemlige egă, “Maane lipu ngene jotwa-nenite, laatu nvene căme mage cuta laati bemi căme naane igane?”

⁴⁹ Puma cita ca tabe teeme abiberäja bägrä bine teeme ime ca jewabimige, jüicige egä, "Ire, cäme mage piyepu cäme naane igane äge tema.

⁵⁰ Laati te liba jaawenuge cäme Babe cabucewe je teeme singi ne, tabe lui cäme naane, cäme igane, cäme ngule, cäme mage."

13

*Ngene ca Agli Mene Kuu Gije Iisabeja poto cidi me
(Mareko 4:1-9; Luuka 8:4-8)*

¹ Peeirage bimu cabu Yeesu mete ne sebmalige, ädige, sawa ligi cabu adnatige.

² Bucurage biname cina tabasecretnige teeme bau me, teebine jewaclomtisi, siige tabe poo cabu acenutige, adnatige. Biname cina sawa ligi cabu imyemutäjimige.

³ Yeesu ngene ca agli mene ca jejemige bucurage mule poto cidi me. Tabe jüicige egä, "Yepä biname te ädige calwacupi me kuu gije bine iisabejame.

⁴ Egäcäro tabe kuu gije bine yiisabäjemige, poto cina gaabe cabu itrametnemige, siige ele cina seclige, erwäjimisi pui kuu gije bine.

⁵ Poto kuu gije cina itrametnemige kula gawe cabu. Gawe puma paple ge. Gije cina watata äpletnärinisi, ingle gawe poone lica gyene.

⁶ Bimu te liba tacitige, nuunu te iplatnimige mamye gije bine, siige teepi piba iglumetnemige, ingle teeme braju cina sungabe me lica ebäcnisi.

⁷ Poto kuu gije cina itrametnemige pägöpäge mete cabu, siige pägöpäge cina uutinisi, gije bine jetäyimis.

⁸ Yepä poto kuu gije cina itrametnemige miijirage gawe cabu, siige miijirage uutinisi. Teepi jeciretnemige, kuu jepänimisi: poto lui yepä hanred, poto lui siksti, poto lui teeti.

⁹ Weeme liba tablame piti nemi ätecijame, itecijinege umle äbitame."

*Agesa Ingle Yeesu Biname bine Yaabiberäjemuge Ngene ca Agli Mene ca
(Mareko 4:10-12; Luuka 8:9-10)*

¹⁰ Abiberäja bägrä cina seclige Yeesu bau me, itemlisi egä, "Ngena name pi maane biname bine jejananemite ngene ca agli mene ca?"

¹¹ Yeesu jejemige egä, "Weebibine umle ituge wawena, egä Acejiyame lipulipu biname bine waadena, yepä teebibine lica ituge umle wawena pui poto cidi me, pui name pi cane ngene ca agli mene ca jejananemine teebibine.

¹² Lui biname me umle pisi nyene, teebine cerämu umle ceera, siige teeme umle te babo pa läbitepi. Yepä lui biname te singi lica gyene umle täöpume, Acejiyame teeme bau ca pa yaacatepi teeme lui matikäli umle pisi nyene.

¹³ Cane naace name pi biname bine ngene ca agli mene jaajanemune, ingle teepi ngene jwaatwananinusi, yepä ngene ca lica yaaglusi; teepi yäätcejemuge, yepä teepi äblicäco ätecija piyepu opo awatna.

¹⁴ Teeme cabu ibibi äbitenige Acejiyame me mename biname Isaya lui niinäce gaabe mene jüicemuji egä,

"Weene itecijinuge cuta itecijinuge, yepä weene lica umle läbitininuye.

Weene ire lacitaninuye, ire lacitaninuye, yepä weene lica jääpänuye.

¹⁵ Ai biname bime ngene atwanena krokeciye gemi,

teepi tablame budubuduma gemi,

teepi irecu ätumuteji gemi.

Teepi apu liga lica cire läbitininejis,

teepi piba teeme irecu ca jääpänimusi,

tablame ca yäätcejemuge,

ngene atwana ca opo yaawatnusi,

siige tatatrongärininusi cäme bau me cane Acejiyame te teebibine miiji wawename.'

¹⁶ Weene gege gemi, ingle weene weeme irecu ca jääpänuye, tablame ca itecijinuge, siige opo egäcäro yaawatnuye cäme mene ingle ne.

¹⁷ Cane jijenininine weebibine, egä bucurage Acejiyame me mename biname piyepu conocäco biname, teepi baborage singi ituge ire me, weene lui gwidape bine jääpänanemepewe, yepä teepi lica ituge päpäna. Teepi singi ituge ätecijame, weene lui itecijanipi, yepä teepi lica ituge ätecija."

*Yeesu Ngene ca Agli Mene ne Eboclomtige Kuu Gije Iisabeja poto cidi me
(Mareko 4:13-20; Luuka 8:11-15)*

¹⁸ Yeesu abiberäja bägrä bine jejemige egä, "Weene itecijinege, ngena tääpu myene ngene ca agli mene kuu gije iisabeja poto cidi me.

¹⁹ Lui kuu gije cina yaatrametnemuge gaabe cabu, pui lui eei biname bime pana gemi, lui cina mene yäätcejemuge Acejiyame te biname bine waadena poto cidi me, yepä teepi opo

lica yaawa-tnusi pui mene ne. Puma cita ca Satani te täduge, pui mene bine yääsecräremuge epu pana, ele cina lipu kuu gije bine yäärwäjimusi.

²⁰ Lui kuu gije cina yaatrametnemuge kula gawe cabu, pui lui eei biname bime pana gemi, lui cina Miiji Mene liba yäätecijemuge, gege cama watawata joomlusi.

²¹ Yepä teepi matikolä padare taatu jäätrungusi, ingle teepi epu pana braju cäco gije liiyepu. Teepi liba mäpu ne jääpänusi coo teeme poto cidi me liba jüicetnäjemusi, ingle teepi pui Miiji Mene ne jäätrungusi, teepi piba taatu teeme ätrunga bine yaabmalimusi.

²² Lui kuu gije cina yaatrametnemuge pägepäge mete cabu, pui lui eei biname bime pana gemi, lui cina Miiji Mene yäätecijemuge, yepä mäpu ngene atwanena cina ai gawe ireclota poto cidi me, cuta singi rarekaake piyepu poto gwidape täapume, teepi peei Mene ne jäätäyusi pägepäge mete pana, siige kuu cäco läbituge.

²³ Lui kuu gije cina yaatrametnemuge miiji gawe cabu me, pui lui eei biname bime pana gemi, lui cina Miiji Mene yäätecijemuge, opo yaawatnusi, siige teeme cabu kuu jaawenimuge, poto bime cabu yepä hanred kuu, poto bime cabu siksti kuu, poto bime cabu teeti kuu.”

Ngene ca Agli Mene Gäli poto cidi me

²⁴ Yeesu nuuja ngene ca agli mene jejemige egä, “Apu gyene, Acejiyame te liba biname bine yaawadimuge. Calwacupi yageyame te puga ge. Tabe läduge, miiji gije bine yäätemuge teeme calwacupi cabu.

²⁵ Biname cina ute liba waagraruge, calwacupi yageyame me cubu biname te täduge, baace popo bine yiisabäjemuge calwacupi cabu me, siige luucruge.

²⁶ Gije cina luutinusi, teeme mope cabu ca läsinusi kuu. Teepi gäli cina cuta luutinusi.

²⁷ Puma cita ca calwacupi yageyame me kaakesea bägrä cina saacluge teeme bau me, jaajusi egä, ‘Babo biname, nää peei miiji gije lica gemi, maane lui sitemumete mäame calwacupi cabu? Luma cita ca gäli cina saacluge?’

²⁸ Tabe jaajemuge egä, ‘Peei lui cubu biname gyene, lui te baace popo bine sewadimumi, siige seyäräjemumi cäme calwa-cupi cabu.’ Teepi yäätemlusi egä, ‘Nää, maane singi gäte cine ontime gäli amingejame?’

²⁹ Tabe calwacupi yageyame te jaajemuge egä, ‘Gone naacluge, ingle weene liba gäli jaamingäjemuye, poto gije bine cuta yuutemuye.

³⁰ Ebmalemepeye, luutipesi gigri ngälu ire acita padare, piba cane ärucna biname bine cire täätäyepemepene gäli bine ninäce uutemame, sigu wawenname, siige iisabame uliobo cabu me. Piba teepi kuu bine cire yaatomlecmepepi cäme mete cabu me waadename acrana täapume.’ ”

*Ngene ca Agli Mene Mastad Kuu Gije poto cidi me
(Mareko 4:30-32; Luuka 13:18-19)*

³¹ Yeesu nuuja ngene ca agli mene jejemige egä, “Apu gyene, Acejiyame te liba biname bine yaawadimuge. Yepä biname te mastad kuu gije ne ecatige, siige jecnige teeme calwacupi cabu.

³² Pui kuu gije lui matikäli birige iyeta kuu gije cabu ca, yepä liba luutuge, babo läbituge iyeta calwacupi gije cabu ca. Tabe uli pana jaaguge, piba ele cina saacluge teeme mete bine arangejame teeme ciipe cabu.”

*Ngene ca Agli Mene Uutneca Gwidape poto cidi me
(Mareko 4:32-34; Luuka 13:20-21)*

³³ Yeesu nuuja ngene ca agli mene jejemige egä, “Apu gyene, Acejiyame te liba biname bine yaawadimuge. Yepä magebi te nesae diiba bine saawaduge bulu cama, jaaglemeläjimuge yepä kuke bora, uutneca gwidape ne saacatuge, yaacranimuge, siige jaama-nguge. Puma cita ca iyeta pui buluduu te tuutnecuge.”

³⁴ Iyeta ai maramara mene Yeesu ngene ca agli mene ca biname bine jejejanemige. Tabe nuuja mene ca teebibine lica yaaberäjimuge yepä ngene ca agli mene ca.

³⁵ Apu lbibi äbitige Acejiyame me mename biname me mene egä,
“Cane cirege ngene ca agli mene iicema.

Cane cirege jajanena mule poto cidi me,
lui cina ämletnäreji gemi agedna cabu ca.”

Yeesu Eboclomtige Ngene ca Agli Mene ne Gäli poto cidi me

³⁶ Yeesu biname bine sebmalmimige, mete bora me abacitige. Teeme abiberäja bägrä cina seclige teeme bau me, jejisi egä, “Maane sebclomti cime täapume ngene ca agli mene lui jüicite gäli poto cidi me calwacupi je.”

³⁷ Yeesu puma cita ca gije abacitige pui mene ne aboclomtame. Tabe jejemige egä, “Biname lui te miijirage gije bine itemige, peei lui tabe sine, Acejiyame bau ca lui te täduji biname me äbituji.

³⁸ Calwacupi lui ai gawecewe gyene. Miijirage gije eei biname gemi, Acejiyame te lui bine ewadenemige; gäli eei biname gemi, Satani te lui bine ewadenemige.

³⁹ Cubu biname lui te gäli uutana täápume baace popo bine calwacupi cabu me yis-abäjemige, tabe lui Satani sine. Ire acita lui gawecewe me ngälugaabe padare gyene. Ärucna biname lui Acejiyame me mename seemo gemi.

⁴⁰ Gäli bine lipu tomi jewenimisi ayime, pepu pana cirege ai padare me ngälugaabe je äbita.

⁴¹ Piba Acejiyame bau ca lui te täduji biname me äbituji, tabe teeme mename seemo bine cire täätjepemepi teeme binamewale bime cabu ca eei bine waadename, lui cina biname bine opo jaawenimusi niijaniya mule bine wawenecame, piyepu nuuja niijaniya mule waweneca biname bine.

⁴² Teepi teebibine cire yisabäjemepesi baborage uliobo wädräji cabu me. Puma teepi ele cire yaangenetnemepi, giricu cire yaatebecmepesi.

⁴³ Piba conocäco biname cina bimu apaclyera pana cirege, teeme Babe te liba cire yaawademepi teebibine. Weeme liba tablame piti nemi ätecijame, itecijinege umle äbitame.”

Nesae Ngene ca Agli Mene Acejiyame te Biname bine Waadana poto cidi me

⁴⁴ “Apu gyene, Acejiyame te biname bine liba yaawadimuge. Yepä biname te babo daremuyame miijirage gwidape ne jääpänuge, lui te gawe ca äclidnäneji ge. Tabe siige cääri cuta jääclidnuge, gege cama läduge, iyeta teeme gwidape bine yaawadimuge aletname. Rarekaake bine liba jääpänimuge, ingwe ca piba läduge, peei gawe ne jaaletnuge.

⁴⁵ Cuta apu gyene Acejiyame te liba biname bine yaawadimuge. Yepä biname te kusa bine jäärngemuge.

⁴⁶ Tabe liba yepä jamyacurage ne jääpänuge, tabe läduge, iyeta teeme gwidape bine yaawadimuge aletname. Pui rarekaake ca siige pui jamyacu kusa ne jaaletnuge.

⁴⁷ Cuta apu birige, Acejiyame te liba biname bine yaawadimuge. Cibubade biname cina net sigu ne jaadadnäjusi malu cabu, siige tabe maramara cibu bine joomläjicmuge.

⁴⁸ Liba tapanuge, cibubade biname cina yäälädnsusi doro me, ladnatäruge, cibu bine jaatranimusi maramara acraname. Miijiyame bine diiba bora me yääbäcnimusi, niijaniya bine yisabimusi.

⁴⁹ Apu mule te ai padare me ngälugaabe je cirege äbita. Acejiyame me mename seemo cina cire saaclepi niija mule biname bine waadename miiji mule biname bime cabu ca,

⁵⁰ siige cire yisabemepesi baborage uliobo wädräji cabu me. Teepi puma ele cire yaangenetnemepi, giricu cire yaatebecmepesi.”

⁵¹ Siige Yeesu teeme abiberäja bägrä bine itemlimige egä, “Nää, weene opo bewatnimiye iyeta ai ngene ca agli mene bine?” Teepi ‘yoo’ mene jejisi.

⁵² Yeesu puma cita ca jejemige egä, “Cotre abiberäja biname, laati te umle gyene mime cotre bine, tabe liba Acejiyame ne conocäco yääcäruge teebine acaname, tabe mete yageyame pana birige, lui te kirece piyepu sasa gwidape bine säasemuge teeme cumä cabu ca.”

*Yeesu ne Nasareta Cewe je Jigyisi
(Mareko 6:1-6; Luuka 4:16-30)*

⁵³ Yeesu liba iyeta ai ngene ca agli mene jajanena bine epirimige, tabe pui cewe ne sebmilige,

⁵⁴ acnenutige teemerage cewe me. Tabe puma biname bine ebiberäjimige abasecretna mete cabu. Lui cina jitecijisi, teepi mage mutäcäco äbitininisi, siige ätemläjinisi egä, “Tabe luma cita ca ituge ai umle ne acata? Cuta luma cita ca kokre ne itu jääpänanepi ciitaca mule bine wawenecame.

⁵⁵ Tabe pui mete raranga biname me bägrä gyene. Mariya teeme mage gwene piyepu Yakobu, Yoosepa, Simona, Yuuda naabi teeme iganewale gemi.

⁵⁶ Teeme ngulewale cuta ama piti nemi. Cije tabe luma cita ca umle äbitanenige iyeta ai mule bine wawenecame?”

⁵⁷ Siige teepi Yeesu ne jigiyisi.

Yeesu puma cita ca jejemige egä, “Acejiyame me mename biname ne yaacatusi iyeta poto ta, yepä lica teemerage cewe cabu piyepu teemerage binamewale cina.”

⁵⁸ Tabe puma bucurage ciitaca mule bine lica jewenimige, inge teepi ätrunga lica ge teeme täápume.

14

*Yoane Niiye ca Āciseja Biname me Budre
(Mareko 6:14-29; Luuka 9:7-9)*

¹ Pui padare cabu Galilaya probins mope biname ngii Heroda te Yeesu poto cidi me itecijige.

² Tabe puma cita ca teeme ingwe gaabe biname bine jejemige egä, “Taba lui Yoane niiye ca āciseja biname gyene. Taba budre cabu ca itu tarpinantumi, peei name pi teeme kokre pisi nyene ciitaca mule bine wawanecame.”

³ Heroda ai mene jiiçige, ingle tabe sine biname, laati te tejemimumi Yoane ne oomlaname, seea ca ātäyame, krokeciyye mete bora me āsinglentame. Taba ai mule ne tewenumi ingle Herodiyas name pi, lui teeme igane Pilipo me coga ge, yepä Heroda te juutecrepi, siige teeme coga me jwaawenepi.

⁴ Puma cita ca Yoane te Heroda ne jaajananepegi egä, “Peei lui miiji mule lica gyene maane mäame igane me coga ne acatame.”

⁵ Heroda tabe peei name pi singi ge Yoane ne budre me aglime, yepä tabe wälu ge biname name pi, ingle teepi ngene totwanimesi, egä Yoane lui Acejiyame me mename biname gyene. Peei name pi tabe wata lica seglumi, yepä krokeciyye mete bora me secitumi.

⁶ Yoo, Yoane niiye ca āciseja biname me budre gaabe apu gyene: liba Heroda me ārngi bimtu te tatyaramtigi, tabe soriyomu ne jebenige. Pui padare cabu puga ge Herodiyas me beecma bāgrä. Taba giire jewājige soriyomu biname bime opo gaabe. Heroda mage gege ābitige teeme giire name pi,

⁷ siige joiige egä, “Cane Acejiyame me opo gaabe je naajenine, egä maane ngena täapume liba nätinärenite, cane nääcärenine.”

⁸ Ngulebāgrä me mage te joiige tabe Heroda ne apu jajime egä, “Cane singi gāne Yoane niiye ca āciseja biname ne aglime, piba teeme mope ne pleito cabu acaname cāme bau me päpäna täapume, egä tabe budre gyene.” Siige tabe ngulebāgrä te ai mene jejige Heroda ne.

⁹ Heroda ngenecu māpu me ābitige, yepä tabe lui Acejiyame me ngii cabu mene joiige teeme soriyomu biname bime opo gaabe je, peei name pi tabe teeme kaakesea bāgrä ne jejige ngulebāgrä me singi waweneme.

¹⁰ Kaakesea bāgrä te ādige, Yoane me mope ne telācnutige krokeciyye mete cabu,

¹¹ mope ne secanige pleito cabu, siige ngulebāgrä ne ocārige. Taba teeme mage ne ocārige.

¹² Yoane me abiberāja bāgrä cina seclige, teeme budrekaake ne isatisi mete cabu ca, gape cabu ecitisi. Puma cita ca teepi ācnārige, Yeesu ne jejisi, egä ngena mule cina bābitinisi Yoane poto cidi me.

*Yeesu Faib Tausen Biname bine Engärimige
(Mareko 6:30-44; Luuka 9:10-17; Yoane 6:1-14)*

¹³ Yeesu liba Yoane me budre poto cidi me itecijige, tabe pui cewe ne sebmaliige, poo gaabe ādige biname cāco cewe me ten taatu. Biname cina liba itecijemige, egä Yeesu bādige, teepi siige teeme cewe bine sebmālācemisi, ernge ta eclige pui puupu cabu me Yeesu liiyeme ādige.

¹⁴ Teepi niinäce atyarige, Yeesu me poo te ingwe sipyige. Yeesu liba poo cabu ca arpatige, tabe bucurage biname bine jepānimige. Taba owecu ābitige teeme täapume, siige pita biname bine miiji jewanemige.

¹⁵ Pui māmleteca cabu je abiberāja bāgrä cina seclige Yeesu bau me, jejisi egä, “Bimtu me mage bādige. Biname cāco cewe gyene ai, peei name pi biname bine jityepimi mameta lui cewe gemi, teepi puma cita ca deedei aletname teeme täapume.”

¹⁶ Yepä Yeesu teeme abiberāja bāgrä bine jejemige egä, “Teepi nuuja singi lica gemi otinime, ingle weene te teehibine deedei ecāremeye.”

¹⁷ Teepi jejisi egä, “Cime nata nuujarage deedei ama lica gemi, yepä faib buluduu gemi piyyepu neeneni cibu bumate gegi.”

¹⁸ Yeesu jejemige egä, “Sewademeye aima cāme bau me.”

¹⁹ Puma cita ca Yeesu biname bine jejemige baace papa cabu adnaterame. Taba piba faib buluduu neeneni cibu cama sewadimige, cabu me ire acitige, Acejiyame ne eso ecārige. Piba tabe buluduu bine itrecimige cibu cama, abiberāja bāgrä bine ecārimige, teepi siige biname bine ecāranemisi.

²⁰ Iyeta biname cina ibibi erwājimisi. Abiberāja bāgrä cina buluduu pacupacu bine etomlicmisi, jengārimisi, twelb diiba cina tapanininisi.

²¹ Lui rooriye cina erwājisi pui deedei, teepi faib tausent ge. Coga bāgrä bine lica ecnemisi.

*Yeesu Niiye papa cabu Otnige
(Mareko 6:45-52; Yoane 6:15-21)*

²² Yeesu teeme abiberäja bägrä bine jejemige poo cabu acetne-rame, niinäce gaabe me äwäcame sawa nuuja poto doro me, tabe liba biname bine jityepäjemige.

²³ Siige tabe biname bine liba niinäce jityepäjemige, tabe piba jegelige podo cabu me irecu ätmutame. Mämletca me liba, Yeesu ten taatu puga ge podo cabu.

²⁴ Poo te sawa kuukälu cabu jage. Uule kuu cina poo ne eboclomäjisi, ingle buuwe te magerage opopo tipwäjige.

²⁵ Paulo ala me Yeesu piba täinige podo cabu ca, niye papa cabu ta ädige teeme bau me.

²⁶ Abiberäja bägrä cina teebine liba tepänisi niye papa cabu otni je, teepi siige mage wälu ge. Teepi apu jüicisi egä, "Tabe lui dadränge gyene," siige wälu ala abayininisi.

²⁷ Yepä Yeesu jejemige egä, "Wälu gone, cane sänel!"

²⁸ Puma cita ca Peteru Yeesu ne jejige egä, "Yageyame, liba toracarage maane säte, maane naji cane uuplaname niye papa cabu mäame bau me otnime."

²⁹ Yeesu jejige egä, "Tädi!" Peteru puma cita ca tuuplige poo cabu ca, gije abacitige niye papa cabu Yeesu bau me otnime.

³⁰ Yepä tabe liba jepänige, buuwe te kokre cama titwige, tabe wälu äbitige, siige abumame äbitige. Tabe ala abayige egä, "Yageyame, nätiyäri!"

³¹ Piba taatu Yeesu ime uutige, joomlige teebine, jejige egä, "Mäame ätrunga matikäli gyene. Maane ngeni me neeneni ngene atwana cama gäte?"

³² Teepi liba acenutäsi poo cabu me, buuwe te piba ärputige, siige mataru te enajige.

³³ Abiberäja bägrä cina poo cabu kokorare ca ipednäremisi Yeesu täapume, jejisi egä, "Toraca, maane Acejiyame me Bägrä gäte."

*Yeesu Pita Biname bine Miiji Jewenemige Genesareta Gawe cabu
(Mareko 6:53-56)*

³⁴ Yeesu teeme abiberäja bägrä cama liba sawa ne yuurisi, teepi atyarige Genesareta gawe cabu me, siige poo te puma ipyige.

³⁵ Puma cita ca pui gawe biname cina liba Yeesu ne opo ewatnisi, teepi idre jecananisi cewe gaabegabe ta, siige biname cina iyeta pita biname bine sewadanemisi Yeesu bau me.

³⁶ Teepi teebine itemlisi egä, "Pita biname cina lipu gemi mäame cäbletääpe pepyämu taatu oomlaname?" Siige iyeta lui cina joomläjisi, teepi miiji äbitaninisi.

15

*Saarewale bime Abiberäja
(Mareko 7:1-13)*

¹ Poto Parisea sigu biname piyepu cotre abiberäja biname cina seclige Yeesu bau me Yerusalema ca.

² Teepi itemlisi egä, "Lipu pi mäame abiberäja bägrä cina mime saarewale bime mule bine lica jaawenimusi? Teepi deedei loolo niinäce gaabe me ime lica läcisäjinusi cude gwidape cabu ca kälyä äbitame."

³ Yeesu teebibine jejemige egä, "Weene weemämu ngeni me Acejiyame me mene ne kaake me jaawenuye saarewale bime mule wawena ca?"

⁴ Acejiyame te itu tiicuji egä, 'Weene miiji mage babe bine opo gaabe me acita' cuta piyepu egä, 'Laati te liba teeme mage babe bime poto cidi me niyarage mene jüicemuge, teebine miiji budre me acita.'

⁵ Yepä weene jüicuye, egä biname me liba gwidape pisi nyene mage babe bine ätityerame, yepä tabe liba jüicuge egä, 'Ai gwidape lui Acejiyame täapume myene.'

⁶ siige tabe teeme pei mene name pi kälyä bäbitige teeme mage babe bine ätityerame pui gwidape ca. Apu pi weene Acejiyame me mene ne kaake me jaawenuye naace täapume weene saarewale bime abiberäja ne äcwetname.

⁷ Weene walya biname gemi! Toraca gyene Acejiyame me mename biname Isaya lui niinäce gaabe mene jüicuji weeme poto cidi me egä,

⁸ 'Ai biname cina cebine nawepyeräjusi teeme tage miipe ca,

yepä teeme ngeni atwanena cudecewera ge gyene căme bau ca.

⁹ Teepi nuuja miiji lica gemi cebine awepyeräjame,

ingle teepi biname bine yaabiberäjimusi cotre bine äcwetname, lui căme cotre lica gemi.'

*Lui Gwidape cina Biname ne Niiya me Jaawenusi
(Mareko 7:14-23)*

¹⁰ Yeesu biname bine ala tesoglicmige, jejemige egä, "Cängena itecijinege, umle äbitinineye ai mene!

¹¹ Biname te ngena ne yaacituge teeme tage cabu, pui te niiya me lica jaawenuge, yepä teeme tage cabu ca ngena te tasatuge, pui te teebine niiya me jaawenuge."

12 Abiberäja bägrä cina seclige Yeesu bau me, jejisi egä, "Nää, maane umle gäte, egä Parisea sigu biname cina niyarage basicnantinisi mäame mene name pi?"

13 Yeesu jejemige egä, "Iyeta gije, căme Babe cabu je lui bine lica sitemimumi, miiji uutema braju cama.

14 Weene ngenecu mäpu gone Parisea biname bime name pi. Teepi epu pana gemi irecu määsumäsu biname, lui cina otnime opo jaawenimusi poto irecu määsumäsu biname bine. Liba irecu määsumäsu biname te otnime opo jaawenuge nuuja teeme pana ne, teepi iyeta cupicu bora me laastramuge."

15 Puma cita ca Peteru Yeesu ne itemlige teeme mene ne aboclomtame.

16 Yeesu abiberäja bägrä bine jejemige egä, "Nää, weene cuta buduma camu gemi?"

17 Weene nää umle lica bäbitininiye, egä biname te ngena ne yaacituge teeme tage cabu, camuge bora me labacituge, siige puma cita ca tasatuge.

18 Yepä ngena cina täsuge tage cabu ca, peei lui ngenecu bora ca saacluge. Peei cina biname ne niya me jaawenusi.

19 Teeme ngenecu bora ca täsuge niyarage ngena atwanena cina, lui cina teebine jaawenusi tabe nuuja biname ne budre me aglime, sargi mule wawename, gwidape ero me, walya mene otramame, niyaniya mene iicetnejame.

20 Ai cina biname ne niya me jaawenusi, yepä tabe liba ime äciseja căco deedei yäärwäjimuge, pui te teebine niya me lica jaawenuge."

*Yepä Magebi me Ätrunga
(Mareko 7:24-30)*

21 Yeesu pui cewe ne sebmalige, ädige Turo piyepu Sidona gawe cabu me.

22 Yepä Kanana cewe magebi, lui te pui gawe cabu tonajenäjumi, tabe Yeesu bau me toclige, ala abayige egä, "Babo biname Daawida me kaakesaare, maane cebine owecu naweni! Căme bägrä niyarage gwene. Teeme trupa cabu pisi nyene niyarage cable."

23 Yepä Yeesu nuuja mene lica ge.

Puma cita ca abiberäja bägrä cina seclige Yeesu bau me, jejisi egä, "Peei magebi ne uyecräji, ingle tabe ala tabayanenige mime kaake poto ca!"

24 Yeesu jejemige egä, "Cebine ituge ätyepa Israela biname bime bau me taatu, lui cina epu pana gemi apeseräjäneji maamoi liiyepu."

25 Yepä pui magebi liba utecjige, tabe toclige, Yeesu me ernge gome utramige, jejige egä, "Babo biname, nätityäri!"

26 Yeesu ngena ca agli mene ca teebine jojige egä, "Peei lui miiji lica gyene cane bägrä bime deedei iisabejame drego plongo bime bau me."

27 Magebi te Yeesu me ngena ca agli mene jewe-cnistige, jejige egä, "Toraca babo biname, yepä drego plongo cina nata yäärwäjimusi lui pläpupläpu cina saatrametnemuge bägrä bime dade cabu ca gawe me."

28 Yeesu jojige egä, "Magebi, mäame ätrunga lui baborage gyene! Mäame singi te ibibi läbitege." Peeirage padare cabu teeme bägrä te miiji äbitige.

Yeesu Bucurage Biname bine Miiji Jewenimige

29 Yeesu pui cewe ne sebmalige, Galilaya sawa ligi me ädige. Tabe puga podo ne jegelige, siige adnatige.

30 Bucurage biname cina seclige teeme bau me, sewadimisi otnetneja căco biname bine, irecu määsumäsu biname bine, ernge ime niyaniya biname bine, mene căco biname bine cuta bucurage poto maramara pita biname bine. Teebibine icranimisi Yeesu me opo gaabe, tabe siige miiji jewenanemige.

31 Biname cina mutäcäco äbitininiye, teepi liba jepänimisi mene căco biname cina lui mene jicemisi, ernge ime niyaniya biname cina lui iyeta miiji äbitaninisi, otnetneja căco biname cina lui cängena otninisi, irecu määsumäsu biname cina lui irecu aasataninisi. Teepi puma cita ca eso ecärisi Israela biname bime Acejiyame ne.

*Yeesu Fooa Tausen Biname bine Engärimige
(Mareko 8:1-10)*

32 Yeesu teeme abiberäja bägrä bine ala tesoglicmige, jejemige egä, "Cane owecu gäne ai biname bime täapume, ingle teepi nesae bimu cama cane cama sicrajimumi, siige page teeme nuuja deedei lica gemi ärwäjame. Cane singi lica gäne teebibine deedei căco ätyepame, ingle teepi gaabe je cable jaalocnimuge."

33 Abiberäja bägrä cina itemlisi egä, "Mine luma jepänenemisi ibibi deedei ai daapo taatu cewe cabu teebibine ngeerame?"

34 Yeesu itemlimige egä, "Weeme lija buluduu gemi?" Teepi jejisi egä, "Cime seben buluduu gemi piyepu nesae matimati cibi."

³⁵ Puma cita ca Yeesu biname bine jejemige gawe cabu adna-terame.

³⁶ Tabe seben buluduu piyepu cibi bine sewadimige, Acejiyame ne eso ecäriige, itrecimige, abiberäja bägrä bine ecärimige, siige teepi biname bine ecäranemisi.

³⁷ Teepi iyeta erwäjisi, ngälu ibibi äbitininisi. Puma cita ca abiberäja bägrä cina deedei pacupacu bine etomlicmisi, seben diiba bine jengärimisi.

³⁸ Lui rooriye cina erwäjimisi, teepi fooa tausen ge. Coga bägrä bine lica ecnemisi.

³⁹ Puma cita ca Yeesu biname bine jityepimige, poo cabu acenutige, Magadan gawe cabu me ädige.

16

*Parisea piyepu Sadukea Biname cina Singi Ciitaca Mule Pöpäname
(Mareko 8:11-13; Luuka 12:54-56)*

¹ Parisea sigu biname piyepu Sadukea sigu biname cina seclige Yeesu bau me teebine apicetnärame. Teepi jejisi egä, “Maane ciitaca mule jeweni cine pöpäname, egä Acejiyame me kokre mäame cabu pisi nyene.”

² Yepä Yeesu jejemige egä, “Bimu te liba läpulyärüge, weene liba jääpänimuye carbe uudi, weene piba apu jicuye egä, ‘Ciyeceye mage bimu te ebenige, ingle carbe lui uudi gemi.’

³ Krokerage weene liba jääpänimuye, egä carbe uudi gemi piyepu cäsä gemi, piba weene jicuye egä, ‘Page ngupe te secirenige, ingle carbe uudi piyepu cäsä gemi.’ Weene carbe cabu ca bimu ne opo yaawatnuye, yepä weene äblicäco gemi opo awatna page ai padare cabu lui mule cina äbitininisi, teepi ngena tääpu memi.

⁴ Weene ätrunga cäco niyarage biname gemi page. Weene cebine nätemliye ciitaca mule wawename. Weene nuuja ciitaca mule ne lica pa jepänepeye, yepä lui ciitaca mule te Yoona tääpume äbituji.” Puma cita ca Yeesu teebibine sebmalmige, nuuja gome me äyeblingtige.

*Parisea piyepu Sadukea Biname bime Uutneca Gwidape
(Mareko 8:14-21)*

⁵ Yeesu piyepu abiberäja bägrä cina liba yurisi sawa nuuja potu doro me, abiberäja bägrä cina ngene jitrimalemige buluduu bine waadename.

⁶ Puma cita ca Yeesu teebibine ngene ca agli mene ca jejemige egä, “Weene ireire inajipi Parisea sigu biname piyepu Sadukea sigu biname bime uutneca gwidape tääpume.”

⁷ Abiberäja bägrä cina teemeteme jitransi egä, “Taba naace popi ai mene ninjige, ingle mine buluduu bine lica sewadimisi.”

⁸ Yeesu umle äbitige, egä teepi ngena tääpume jitransi, siige tabe itemlimige egä, “Weene ngena name pi jitraniye, egä weeme buluduu lica gyene? Weeme ätrunga lipu matikolä gwene.

⁹ Weene nää camu gemi umle äbita? Weene nää uja ngene ituge ätrimela, cane lipu faib buluduu bine sitrecimumene faib tausen rooriye bime tääpume. Weene nää lija diiba bine tengärimumeye pacupacu deedei ca?

¹⁰ Coo piyepu weene nää uja ngene ituge ätrimela seben buluduu lipu ibibi ge fooa tausen rooriye bime tääpume. Lija modamoda diiba bine weene tengärimumeye deedei pacupacu ca?

¹¹ Äi, lipu pi weene umle lica bäbitiniye, egä cane buluduu tääpume lica bii jijinine. Yoo, cane cääri jijenininine, egä weene ireire inajipi Parisea piyepu Sadukea biname bime uutneca gwidape tääpume.”

¹² Abiberäja bägrä cina teepi siige opo ewatni-si, egä tabe teebibine lica jejemige ireire lenajame uutneca gwidape tääpume, yepä Parisea piyepu Sadukea biname bime abiberäja mene tääpume.

*Peteru Yeesu ne Jewabudnitige egä Taba Keriso Sine
(Mareko 8:27-30; Luuka 9:18-21)*

¹³ Yeesu ädige Kesarea Pilipo babo cewe mameta lui gawe cabu me. Taba puma abiberäja bägrä bine itemlimige egä, “Biname cina lipu jicusi, egä cane laasi näne, Acejiyame bau ca lui te biname me äbitujine?”

¹⁴ Teepi jejisi egä, “Potu cina jicenisisi, egä maane Yoane niye ca äciseja biname gäte. Potu cina jicenisisi, egä maane Eliya säte; potu cina egä maane Yeremiya säte coo nuuja Acejiyame me mename biname gäte.”

¹⁵ Yeesu itemlimige egä, “Cije weene, weene lipu jiceniye egä cane laasi näne?”

¹⁶ Simona Peteru te Yeesu ne jejige egä, “Maane lui Keriso säte, biname bine lui te niya cabu ca pagege äsecrea. Maane ireclota Acejiyame me Bägrä gäte!”

¹⁷ Yeesu Peteru ne jejige egä, “Simona, Yoona me bägrä, maane gege gäte. Nuuja biname te peei ngene atwana lica nääcäriige meebine, yepä peei lui cäme Babe bau ca gyene, cabucewe je lui te enajenige.

¹⁸ Cane naajenine meebine Peteru, egä määme ngii lui 'Kula' gyene. Piiepu maane lui mene bii jiicite căme poto cidi me cuta kula pana gyene, siige ai kula cabu cane căme ătrunga ingle ne pa yaacitepene. Tabu epu kokre pa yaanajepi, egä budre te ăblicăco apremela teebine.

¹⁹ Cane meebine kii pa năăcărepene Acejiyame bau lui gaabe ne iitnane piiepu armime. Maane ngena mule tăăpume gaabe ne jiitnute, Acejiyame te yaacatuge, cuta maane ngena mule tăăpume gaabe ne yaarmute, Acejiyame te yaacatuge."

²⁰ Puma cita ca Yeesu abiberăja băgră bine jejemige egă, "Gone biname bine umle jaawenimuye, egä cane Keriso săne, lui te biname bine niia cabu ca pa yăăsecrăremepene."

*Yeesu Jiicemige Teeme Cewe Oocanena piiepu Budre poto cidi me
(Mareko 8:31-9:1; Luuka 9:22-27)*

²¹ Pui padare cabu Yeesu giie abacitige abiberăja băgră bime tăăpume pajecu me wawename, egä tabe miiji Yerusalema me pa lădepi. Tabu puma pagege măpurage gwidape bine păpăna modamoda iiwăreja biname, cote abiberăja biname piiepu nuuja Israela modamoda biname bime bau ca. Teebine pagege budre cabu acita, yepă nesae me lui bimu tabe pibe pagege arpinenta.

²² Puma cita ca Peteru Yeesu ne ecanige taatu cewe me, kokre cama mene jejige egă, "Eewe, babo biname! Acejiyame te owecu naawenepi! Peei mule te gone lăbituge määme tăăpume!"

²³ Yeesu tatatrongtuge, Peteru ne jejige egă, "Satani, ăyebingti căme opo gaabe ca! Maane cebine liga iirbutame nawenite. Maane biname bime pana ngeni jotwananenite, lica Acejiyame pana."

²⁴ Siige Yeesu abiberăja băgră bine jejemige egă, "Biname te liba singi gyene cane cama yepă ottime, tabe miiji teemerage singi bine gawe me acrana, teeme baarge uli ne palace cabu acana siige cebine ingwe ăcwi.

²⁵ Laati te liba singi lica teemerage singi bine abmalăcemame, tabe teeme ireclota ne cirege apesera, yepă laati te singi teemerage singi bine abmalăcemame cămiji pi, tabe iyeteta ireclota ne cire jăăpănepi.

²⁶ Biname te nuuja miiji ne lica cire jăăpănepi, ngănu gyene tabe puu iyeta ai gawecewe ne yaacatuge, yepă teeme ireclota ne yaapesaruge. Nuuja gwidape lica gyene biname te teeme ireclota daremu me ceerame.

²⁷ Acejiyame bau ca lui te tăduji biname me ăbituji, tabe teeme Babe me jamyacu apacyera cabu teeme mename seemo cama cire tădepi. Siige tabe biname bine piba daremu cire yăăcărănemepi teeme mule ibi.

²⁸ Cane toraca mene jijenininine, egă ama poto lui cina jeclajutăjenemige, teepi lica cirege budre ăbita, ngălu teepi teebine cire jăăpănepesi mope biname tăăpume otni."

17

*Yeesu Mara Opo me ăbitige
(Mareko 9:2-13; Luuka 9:28-36)*

¹ Siks bimu ingwe gaabe ca Yeesu aacanănge Peteru piiepu nanigane wăsi Yakubu naabi Yoane, siige opo jaawenănge podo caburage me ten taatu.

² Podo cabu je Yeesu mara opo me ăbitige abiberăja băgră bime irewale je. Teeme opo te epu oplacmelăjige bimu iredări pana, piiepu teeme căbletăăpe cina ăbitininisi bulu taatu me, apacyera pana.

³ Piba Moose naabi Eliya taboclomtăsi teeme cabu me, siige Yeesu cama mene jiicemăsi.

⁴ Puma cita ca Peteru Yeesu ne jejige egă, "Yageyame, cine miijirage gămi ama. Maane liba singi găte, cane aarangenănine nesae matimatı mete bine, yepă määme, yepă Moose me, yepă Eliya me."

⁵ Peteru liba camu mene iicema cabu je, piba carbe te apacyera cama tădige, iyeta teebibine aacwabănge. Puma cita ca tagepogogo te tasatige carbe bora ca egă, "Ai lui căme ngenecurage Băgră gyene. Cane teeme tăăpume babo ngenecu miiji găne. Weene teebine jitecijeyel!"

⁶ Abiberăja băgră cina liba itecijemige tagepogogo, teepi mage wălu ăbitininisi, oweowe itrametnemige gawe cabu me.

⁷ Yeesu teeme bau me tădige, joomlănge, jăăjănge egă, "Abujengăneye, wălu gone!"

⁸ Teepi puma cita ca mope ewejengănisi, yepă Yeesu taatu ne jepănisi.

⁹ Siige teepi liba tăinetnănge podo cabu ca, Yeesu abiberăja băgră bine jăăjănge egă, "Gone biname bine umle jaawenanemuye, weene lui mule ne bii jepăniye, ngălu cane, Acejiyame bau ca lui te tădujine biname me ăbitujine, pagege budre cabu ca arpinenta."

¹⁰ Puma cita ca abiberäja bāgrä cina Yeesu ne itemlänisi egä, “Ngeno me cotre abiberäja biname cina jüicenis, egä Eliya te miiji niinäce gaabe me otni, piba ingwe ca Keriso, biname bine niija cabu ca äsecrera biname te cire tädepi?”

¹¹ Yeesu teebibine jääjänige egä, “Toraca gyene, egä Eliya te miiji niinäce otni iyeta gwidape bine teeme puupu cabu acraname.

¹² Cane toraca mene jijenänine, egä Eliya uja ituge otni, yepä biname cina opo lica yaawatnepesi, pui name pi teepi teebine jaawenepesi, teepi lipu ituge singi. Cuta piyepu cane lui te Acejiyame bau ca tädujine biname me äbitujine, cane pagege biname bime bau ca mäpu ne päpäna.”

¹³ Siige abiberäja bāgrä cina umle äbitänisi, egä Yeesu lui Yoane niije ca äciseja biname poto cidi me bii jääjänige.

*Yeesu Miiji Jewenige Niija Cable cama Bāgrä ne
(Mareko 9:14-29; Luuka 9:37-43)*

¹⁴ Yeesu teeme nesae abiberäja bāgrä cama liba podo cabu ca täinetnänige biname bime cabu me, piba yepä biname te Yeesu bau me tädige, kokorare ääpednutige,

¹⁵ jejige egä, “Babo biname, maane cäme bāgrä ne owecu jeweni. Tabe naabe äbitanenige oonina pita cabu ca, siige yaatramanuge uliobo cabu piyepu niije cabu.

¹⁶ Cane mäame abiberäja bāgrä bime bau me secanine, yepä teepi äblicäco ge teebine miiji me wawena.”

¹⁷ Yeesu jüicige egä, “Weene lipu ätrunga cäco gemi, niyarage biname gemi! Luma ngine padare cama cane miiji weene cama lenaja? Luma ngine padare cama cane miiji weeme ätrunga cäco mule päpäna? Secaneye bāgrä ne cäme bau me.”

¹⁸ Puma cita ca Yeesu niija cable ne jejige asatame, siige tabe asatige. Puirage padare cabu bāgrä te miiji äbitige.

¹⁹ Abiberäja bāgrä cina Yeesu bau me seclige, ogä jejisi egä, “Cine lipu pi niija cable äyecreja cäco äbitininago?”

²⁰ Tabe jejemige egä, “Weeme ätrunga matikäli gyene. Cane toraca mene jijenininine, weeme ätrunga liba pisi nyene, ngänu gyene epu pana duuwe baace kuu matikolärage, weene miiji gemi ai podo ne jaji egä, ‘Awetänti ama cita ca piyeme!’ siige tabe lawetäntuge. Weeme liba ätrunga pisi nyene, iyeta gwidape ibibi gemi weeme täapume.

²¹ Yepä apuyame ne weene äblicäco nuuja mule ca äyecreja yepä irecu ätumuta ca piyepu pui irecu ätumuta padare cabu weene miiji deedei cäco lenaja.”

*Yeesu Cääri Mene Jüicemige Teeme Budre poto cidi me
(Mareko 9:30-32; Luuka 9:43-45)*

²² Abiberäja bāgrä cina liba iyeta abasecretnige Galilaya me, Yeesu teebibine jejemige egä, “Cane lui Acejiyame bau ca tädujine biname me äbitujine, cebine mameta gyene biname bime ime cabu acita.

²³ Teepi cebine pa naglepesi budre me, yepä nesae me lui bimu cabu cane piba page larpinatenpene budre cabu ca.” Abiberäja bāgrä cina mage ngenecu mäpu me äbitininisi.

Täks Rarekaake Atomleca Acejiyame me Iiwäreja Mete täapume

²⁴ Yeesu liba atyaramtuge Kaprenauma me teeme abiberäja bāgrä cama, biname lui cina yaatomlicmusi Acejiyame me iiwäreja mete täapume täks rarekaake, teepi piba seclige Peteru ne ätemla-me egä, “Nää, mäame abiberäja biname te täks rarekaake yaacranuge iiwäreja mete täapume?”

²⁵ Peteru jejemige teebibine egä, “Ngenä pi, yaacranuge.” Tabe liba mete bora me abacitige, Yeesu niinäce me puma mene jüicige, Peteru ne itemlige egä, “Simona, maane lipu ngene jotwanenite, ai gawe cabu lui mope biname teepi nää luma cita ca täks rarekaake bine yaatomlicmusi teeme täapume, teeme bāgrä bime bau ca coo nuuja biname bime bau ca?”

²⁶ Peteru jejige egä, “Nuuja biname bime bau ca, lica teeme bāgrä bime bau ca.” Yeesu jejige egä, “Yoo siige, cane cuta kälyä gäne Acejiyame me mete täapume täks rarekaake acrana cabu ca, ingle cane teeme Bāgrä gäne.

²⁷ Yepä mine gone teebibine ngenecu mäpu me jaawenemago. Äte ädi, edigiricu jepetäji sawa cabu. Maane niinäce lui cibu ne irpatenite, tage jipälutepe, siige maane yepä rarekaake ne jepänenite puma. Maane pui ne ecatepe, ecärepepi mime täks täapume.”

18

*Laasi Nyene Baborage?
(Mareko 9:33-37; Luuka 9:46-48)*

¹ Pui padare cabu abiberäja bägrä cina seclige Yeesu ne ätemla-me egä, “Acejiyame te lui biname bine yaawadimuge, laasi nyene baborage?”

² Yeesu yepä matikolä bägrä ne tesoglicige, jejige teeme cole je aclajutame,

³ piba abiberäja bägrä bine jejemige egä, “Cane toraca mene jijenininine weebibine, egä weene liba lica weeme ngene atwanena bine yaatatröngärimuye bägrä pana ätrungame, piba weene miiji lica gemi Acejiyame me waadena mule cabu me äbäcname.

⁴ Acejiyame te lui biname bine yaawadimuge, teeme cabu ca eei te baborage yaanajuge, lui te teemämu matikolä läbituge ai bägrä pana.

⁵ Laati te cäme ngii cabu jaawabluge yepä apu pana bägrä ne, tabe cuta nawabluge cebine.”

*Owe Äswana Niyya Mule tääpume
(Mareko 9:42-48; Luuka 17:1-2)*

⁶ “Ai matimati bägrä lui cina cebine nätrungusi, laati te liba teeme yepä ne jaawenuge niyya mule wawename, pui biname te mäpu ne cire jääpänepi Acejiyame bau ca. Teeme singicace gome liba jaaglotusi baborage kula ne, siige malu cabu yaajarusi budre me, peei mäpu lui plowa birige pui mäpu cabu ca tabe lui ne cire jääpänepi.

⁷ Mage niyyarage gyene, egä ai gawecewe cabu piti nemi gwidape, lui cina biname bine jaawenimusi niyya mule wawenecame. Iyeta padare pipu gwidape cina saacluge, yepä babo niyyarage gyene biname tääpume, lui te biname bime cabu me pui gwidape bine saawadimuge.”

⁸ Siige Yeesu puma cita ca teeme abiberäja bägrä bine jejemige egä, “Määme ime te coo ernge te liba naawenuge maane singi ädrime niyya mule wawename, maane miiji pui ngene atwana ne watatarage iyeblingtepi, epu pana ime ne coo ernge ne lipu jääläcnutute, yaajarute. Miiji gyene maane yepä ernge coo ime cama iyeteta ireclota cabu me otni, yepä niyya gyene maane iyeta piicwa cama otni iyeteta uliobo cabu me.

⁹ Cuta määme irecu te liba naawenuge maane singi ädrime niyya mule wawename, maane miiji watatarage peei ngene atwana ne iyeblingtepi, irecu ne lipu juungyatute. Miiji gyene maane yepä irecu cama iyeteta ireclota cabu me otni, yepä niyya gyene maane neeneni irecu cama uliobo puupu cabu me otni.”

*Ngene ca Agli Mene Gyene Apesera Maamoi poto cidi me
(Luuka 15:3-7)*

¹⁰ “Jepäneye, egä weene ai matimati bägrä bime yepä ne gone äseblecäja. Cane jijenininine weebibine, egä teeme mename seemo cina cabucewe je iyeta padare cabu cäme Babe me opo ne jepänanenis.

¹¹ Cane lui Acejiyame bau ca tädujine biname me äbitujine, cane naace tääpume tädujine, egä lui cina apesareji gemi teebibine niyya cabu ca äsecrerame.

¹² Weene lipu ngene jotwanininiye, biname te ngena jaawenuge teeme liba yepä hanred maamoi piti nemi, siige yepä te liba lapesaruge? Tabe yaabmalimuge naintinain bine podocabu, siige läduge ärngime, lui te lapesaruge.

¹³ Tabe gege birige naintinain maamoi tääpume, lui cina apesareji lica gemi. Yepä cane toraca jijenininine, egä tabe mage gege birige apesareji maamoi ne liba jääpänuge.

¹⁴ Cuta pepu gyene, weeme Babe cabucewe je tabe singi lica gyene apu matimati bägrä yepä te cäme bau ca apeserame.”

Mene Ätrunga Biname poto cidi me Lui te Niyya Mule Jaawenuge

¹⁵ “Määme nuuja ätrunga biname te liba niyya mule yaacnuge määme tääpume, maane ädepi, egä eblawäjepi. Tabe liba näätəcijuge, maane teebine bii sewecnistite.

¹⁶ Yepä tabe liba lica näätəcijuge, maane piba yepä coo neeneni biname cama ädepi teeme bau me. Maane miiji ai ne naace popi wawena, ingle Oogäräneji mene te jiićenige, egä maane biname ne liba jaaitnäjute, neeneni coo nesae biname cina miiji peema aitneja tääpume.

¹⁷ Tabe liba teebibine cuta lica jäätecijemuge, siige piba ätrunga ingle biname bine umle jewenemepi. Yepä tabe liba cuta teebibine ätecija cäco, siige maane teebine epu jewenepi Acejiyame umle cäco biname ne liiyepu coo täks rarekaake uutecrena biname ne liiyepu.

¹⁸ Cane toraca mene jijenininine weebibine, egä weene ngena mule tääpume gaabe ne yaarmuye, Acejiyame te yaacutuge, cuta weene ngena mule tääpume gaabe ne jiiñnuye, Acejiyame te yaacutuge.

¹⁹ Cane cerämu poto jijenininine, egä weene neeneni cina liba gawecewe cabu yepä ngene atwana ne yaacituye weene ngena tääpume irecu ätumutame, cäme Babe cabucewe je tabe pa icärepi.

²⁰ Ingle naace popi neeneneni coo nesae cina liba căme ngii cabu labasecretnănsi, cane pisi năne teta cama.”

Ngene ca Agli Mene Owecu căco Kaakesea Băgră poto cidi me

²¹ Peteru tădige, Yeesu ne itemlige egă, “Yageyame, căme biname te niiya mule liba nawenanuge, lija găăbu cane miiji teeme niiya mule ngene ātrimelame? Năă, seben găăbu?”

²² Yeesu jejige egă, “Lica seben găăbu, yepă sebhenti găăbu seben!”

²³ Acejiyame te liba biname bine yaawadimuge, tabe epu lăbituge gawe mope biname pana, laati te singi ire me teeme kaakesea băgră cina lipu ire jaatwemusi teeme rarekaake bine.

²⁴ Tabe liba gije abacitige ai kaakesea wawename, piba yepă kaakesea băgră ne teeme bau me secanisi, lui te yepă milyon rarekaake itu yaawademepi teeme bau ca.

²⁵ Ingle pui kaakesea băgră me rarekaake lica ge daremu aglime, peei name pi babo biname te jejemige teeme coga băgră, iyeta teeme gwidape piyepu tabe, teebibine waadename aletname piba pui rarekaake ca daremu aglime.

²⁶ Siige pui kaakesea băgră te teeme babo biname me opo gaabe kokorare āăpednutige, ewejanige egă, ‘Maane owecu nawenepi. Padare năcărepi, cane iyeta rarekaake piba daremu pa naawecnemepene.’

²⁷ Babo biname te teebine owecu jewenige, jejige egă, ‘Daremu gone saawecnimute,’ siige tabe teebine jityepige.

²⁸ Yepă pui kaakesea băgră te liba asatige, tabe teeme keege kaakesea băgră ne jepănige, lui te yepă hanred rarekaake bine itu sewadimumi teeme bau ca, siige singicace gome teebine jejecltnăjige claabe cama, jejige egă, ‘Maane rarekaake daremu nawecnisti.’

²⁹ Teeme keege te kokorare āăpednutige, ewejanige egă, ‘Maane owecu nawenepi! Padare năcărepi, cane iyeta rarekaake piba daremu pa naawecnemepene.’

³⁰ Yepă tabe owecu lica ge, siige teebine ijarige krokeciye mete bora me, ngălu tabe cirege daremu awecnema.

³¹ Babo biname me poto kaakesea băgră lui cina jepănisi, teepi călu te jitemige piyepu teepi mage ngenecu măpu ge. Teepi babo biname bau me eclige, iyeta jejananisi ai poto cidi me.

³² Puma cita ca babo biname te ala tesoglicige teeme niinăce kaakesea băgră ne, jejige egă, ‘Maane niyarage kaakesea băgră găte. Ingle maane nawejanite, cane ngene nătrimalige măăme daremu bine awecneme.’

³³ Maane cuta miiji owecu jaawenejite măăme keege ne, cane lipu meebine owecu naawenine.’

³⁴ Tabe babo biname te mage claabe me ābitige, siige jityepige teebine krokeciye mete me, ngălu tabe cirege iyeta pui daremu bine awecneme.

³⁵ Apu cirege căme Babe cabu je iyeta weebibine wawena, weene liba weeme ngenecu ca lica ngene jitrimalinuge, weeme nuuja ātrunga biname te ngena niiya mule jaawenuge.”

19

*Mene Coga Ăgyi poto cidi me
(Mareko 10:1-12)*

¹ Yeesu liba mene iicema siigesige ābitige, tabe Galilaya gawe ne sebmaliige, Yoridana baduge ne yuurige nuuja poto doro me Yuudea gawe cabu me.

² Bucurage biname cina teebine ingwe icwisi, siige tabe pita biname bine miiji jewenane-mige puma.

³ Poto Parisea sigu biname cina seclige Yeesu ne apicetnărame. Teepi itemlisi egă, “Năă Cotre ibi mule gyene rooriye te teeme coga ne liba Ăgyi papa ingle cabu ca?”

⁴ Yeesu jejemige egă, “Egăsu weene ituge acnema Oogărăneji mene te lipu jiicenige, egă aqedna cabu ca Acejiyame te biname bine jaawenuji rooriye me piyepu magebi me,

⁵ siige jiicuji egă, ‘Peei name pi rooriye te miiji teeme mage babe bine gomala coga cama atejăclmutame, siige teepi yepă me lăbităsi.’

⁶ Teepi siige piba neeneneni lica gegi, yepă teepi yepă taatu gegi. Peei name pi biname te gone maramara me wawena, Acejiyame te laati bine laatejăclmutuge.”

⁷ Puma cita ca Parisea sigu biname cina itemlisi egă, “Cije ngena name pi piba Moose me Cotre cabu apu oogărăneji gyene, egă rooriye te liba singi birige coga ne Ăgyime, tabe miiji peba ne oogăra Ăgyi ingle poto cidi me, siige pui peba cama jwăătyepuge teebine?”

⁸ Yeesu jejemige egă, “Moose naace name pi weebibine conocăco icărininuji weene coga ne Ăgyime, ingle weene ātecija căco biname gemi. Yepă aqedna cabu ca pepu lica ituge.

⁹ Cane toraca mene jijenininine weebibine, egä rooriye lui te teeme coga ne jwäägyuge, yepä tabe teeme coga te nuuja ero lica ituge wawena, siige tabe liba nuuja coga ne waacatuge, tabe ero mule ne jaawenuge.”

¹⁰ Abiberäja bägrä cina puma cita ca Yeesu ne jejisi egä, “Ai liba gaabe gyene coga rooriye bime täápume, atejäclmuta cabu ca miiji gyene coga rooriye cäco lenajame.”

¹¹ Yeesu jejemige egä, “Ai abiberäja lui iyeta biname bime täápume lica gyene, yepä eei bime täápume taatu Acejiyame lui bime täápume singi teepi pepu lenajame.

¹² Maramara inge piti nemi biname cina atejäclmuta cäco lenajame. Poto cina teeme ärngi cabu ca epu gemi egä teepi äblicäco atejäclmuta; poto bine biname cina pepu me ituge wawena; poto cina teemämu pepu me ituge äbita, inge teepi singi gemi Acejiyame taatu te teebibine waadename. Laati te miiji gyene ai abiberäja ne acatame, tabe jaawenepi.”

*Yeesu Ime Aacitige Bägrä bime papa cabu me Teeme Miiji täápume
(Mareko 10:13-16; Luuka 18:15-17)*

¹³ Biname cina bägrä bine sewadimisi Yeesu bau me naace me tabe ime acitame teeme papa cabu me piyepu irecu ätumutame teeme täápume. Yepä abiberäja bägrä cina jicnecimisi teebibine.

¹⁴ Yeesu abiberäja bägrä bine jejemige egä, “Bägrä cina saaclege cäme bau me. Gone jübe-muye, inge ai bägrä pana ätrunga cama lui biname teebibine Acejiyame te yaawadimuge.”

¹⁵ Puma cita ca Yeesu teeme ime aacitanige bägrä bime papa cabu me teeme miiji täápume, siige ai ingwe gaabe ca tabe piba ädige.

*Mamy Dogwe Biname te Yeesu ne Edärige
(Mareko 10:17-31; Luuka 18:18-30)*

¹⁶ Yepä biname te tädige Yeesu bau me, itemlige egä, “Abiberäja biname, cane ngena miiji mule ne miiji wawena iyeteta ireclota ne päpäname?”

¹⁷ Yeesu jejige egä, “Maane ngeno me nätemlite, egä ngena gyene miiji? Nuuja gwidape te miiji lica gyene, yepä Acejiyame taatu gyene miiji. Maane liba singi gäte iyeteta ireclota ne päpäname, maane miiji cotre bine äcwetna.”

¹⁸ Pui biname te Yeesu ne itemlige egä, “Lui cotre bine?” Yeesu jejige egä, “Biname ne gone budre me agli; sargi mule gone; gwidape ero gone; walya aitneja gone;

¹⁹ mage babe bine miiji opo gaabe me acitena; maane miiji nuuja biname täápume epu singi äbitena, maane lipu mäame täápume singi läbitanute.”

²⁰ Puma cita ca mamy biname te jejige egä, “Cane ituge iyeta ai cotre bine waweneträja. Cerämu cane miiji ngena ne wawena?”

²¹ Yeesu jejige egä, “Maane liba singi gäte epucäco lenajame, maane ädi, iyeta mäame gwidape bine aletname ewademepi, rarekaake owecumete biname bine ecäranemepi, siige tädepi cane cama yepä otnime, piba maane miijimiji gwidape bine cabucewe je cire jepänemepi.”

²² Mamy biname te liba itecijige, tabe ngenecu mäpu cama äyebingitige, inge tabe babo dogwe biname ge.

²³ Puma cita ca Yeesu teeme abiberäja bägrä bine jejemige egä, “Toraca gyene, dogwe biname täápume mäpurage birige Acejiyame me cabucewe waadena cabu äbäcname!”

²⁴ Cane cerämu jijenininine, egä peei lui mäpu birige kamela te nilo bora cabu me abacitame siige asatame, yepä baborage mäpu birige dogwe biname te Acejiyame me waadena cabu abacitame.”

²⁵ Abiberäja bägrä cina liba itecijemige, teepi siige iyeta mutäcäco äbitininisi, itemlisi egä, “Laati te piba miiji gyene iyeteta ireclota ne päpäname?”

²⁶ Yeesu ire acitige teeme bau me, jejemige egä, “Biname te ibibi lica gyene pui ne wawename, yepä Acejiyame te miiji gyene iyeta gwidape bine wawenecame.”

²⁷ Puma cita ca Peteru Yeesu ne jejige egä, “Cije cine lipu gemi? Cine iyeta gwidape bine itu saabmalemepesi maane cama yepä otnime, cine siige ngena miiji ne cirege päpäna?”

²⁸ Yeesu jejemige egä, “Cane toraca mene jijenininine: ai padare te liba cirege apira, kirece padare te liba cirege atyaramta, cane lui Acejiyame bau ca tädujine biname me äbitujine, cane piba jamyacu apacyera cama cäme babo adnata puupu cabu ca biname bine cire yaawademepene. Weene, cäme ingwe äcwiyame biname, cuta piba cire adnatäripeye twelb babo adnata puupu cabu twelb Israela inge bine atraname.

²⁹ Iyeta lui cina ituge abmala teeme mete bine, teeme naane igane bine, teeme ngule bine, teeme mage babe coo bägrä bine coo piyepu teeme gawe bine cäme name pi, teepi cirege päpäna tuwängle yepä hanred gäabu cuta piyepu teebibine iyeteta ireclota cirege ceera.

³⁰ Yepä bucurage biname page lui cina niinäce gaabe biname gemi, teepi ciige ireclota cabu ingwe gaabe me cire täcnäripesi. Cuta piyepu laati bemi page ingwe gaabe biname gemi, teepi ciige ireclota cabu niinäce gaabe me cire läbitipesi.”

20

Waina Calwacupi cabu Kaakesea Bägri Gemi

¹ “Acejiyame te liba biname bine yaawadimuge, peei lui epu pana ge, calwacupi yageyame te lipu ädige krokerage biname bine jajaneneme daremu cama kaakesea waweneme teeme waina calwacupi cabu.

² Teepi mene conocäco jewenisi tabe kaakesea bägrä bine yepä bimu me camlecamle daremu ceerame, siige tabe jityepäjemige teeme waina calwacupi cabu kaakesea waweneme.

³ Yageyame te cääri asatige krokebimu me, ädige, jepänimige poto biname cina papa ämyemuteji icrajige aletna puupu gome.

⁴ Tabe jejemige egä, ‘Weene cuta naaclege cäme waina calwacupi cabu kaakesea waweneme, cane piba weebibine icärininine, ngena daremu gyene miiji.’

⁵ Siige teepi eclige. Puma cita ca bimu duusa cabu yageyame te cääri kaakesea bägrä bine jityepimige teeme calwacupi me, cuta cääri mämlebimu me.

⁶ Mämleteca me yageyame te liba cuta ädige aletna puupu me, tabe puma jepänimige poto biname papa ämyemuteji icrajige. Puma cita ca tabe itemlimige egä, ‘Weene ama bimu lecaleca ngeno me inaji-ninige, padare te papa ädenige?’

⁷ Teepi jejisi egä, ‘Ingle nuuja biname te cibibine lica biiri nijinige kaakesea täápume.’ Yageyame te jejemige egä, ‘Weene cuta naaclege cäme waina calwacupi cabu kaakesea waweneme.’

⁸ Mämlerage me kaakesea te liba apirige, yageyame te teeme kaakesea ire atwi biname ne jejige egä, ‘Kaakesea bägrä bine ala tesogliciml, teebibine daremu ecäranemi. Niinäce eei bine ecäranemi, lui cina ceräcerägääburage kaakesea me eclige, piyepu lui cina niinäcerage eclige kaakesea täápume, pui bine ingwerage ecäranemepi.’

⁹ Biname lui cina kaakesea jegednimisi mämleteca me, teepi camlecamle bimu me daremu ne ecatisi.

¹⁰ Puma cita ca biname lui cina niinäcerage me eclige kaakesea me, teepi apu jengenetnemige, egä teepi baborage daremu ne ecatenisi, yepä teebibine yepä ibi daremu ecäranemisi.

¹¹ Teepi teeme daremu bine ewademisi, siige calwacupi yageyame ne jiyingäjisi.

¹² Teepi teebine jejisi egä, ‘Lui biname bine ingwerage ca jejemite, teepi matikäli padare cabu taatu kaakesea jewenisi; cine te magerage kaakesea jewenisi bimu nuunu cabu, yepä maane teebibine cine cama yepä ibi daremu becäranemite!’

¹³ Yageyame te teeme yepä ne jejige egä, ‘Cäme biname, maane näätectijegel! Cane lica naangletnäjine meebine, ingle cane nääcärine, mine lipu täápume mene conocäco bii jewenisi.

¹⁴ Määme daremu ne ecati, acnenuti cewe me. Lui biname ne ingwerage jejine kaakesea me otnime, cane singi gäne teebine maane cama yepä ibi daremu ceerame.

¹⁵ Egäsu cäme conocäco pisi nyene cäme rarekaake ca waweneme cane ngena täápume singi. Maane nää ire patre eglenenemite, lui cina matikäli padare cabu kaakesea jewenisi, yepä cane camle-camle daremu bii becäranemine.’

¹⁶ Apu pi ingwe gaabe je lui cina, teepi niinäce gaabe me cire läbitipesi; niinäce gaabe je lui cina, teepi ingwe gaabe me cire täcnäripesi.”

Yeesu Cääri Mene Jiicemige Teeme Budre poto cidi me

(Mareko 10:32-34; Luuka 18:31-34)

¹⁷ Yeesu liba Yerusalema me ädige, tabe biname sobe cabu ca mara me äbitige teeme twelb abiberäja bägrä cama teebibine gaabe cabu mene jajaneneme.

¹⁸ Tabe jejemige egä, “Iteciijinege, mine aga naclenige Yerusalema me. Puma pagege cebine ceera, Acejiyame bau ca lui te tädujine biname me äbitujine, modamoda iiwäreja biname piyepu cotre abiberäja biname bime ime cabu me. Teepi mene pa jaatranepesi cebine budre me aglime,

¹⁹ siige pa näcärepesi nuuja gawe cabu ca biname bime cabu me. Teepi cebine ätutena pana pa nawenepesi, pa nadnanepesi, baarge uli cabu pa näbyecrepesi. Yepä nesae me lui bimu liba pa joomlepi, cane piba cuta budre cabu ca pa larpinantepene ireclota me.”

Yakobu Yoane naabime Ätemla

(Mareko 10:35-45)

²⁰ Jebedayo me coga te teeme neeneni bāgrā cama toclige Yeesu bau me, kokorare ca ipednemaalige teeme opo gaabe, itinārige teeme singi ne wawename.

²¹ Yeesu utemlige egā, “Maane ngena tāāpu māte singi?” Magebi te jejige egā, “Maane toraca tiicepi, egā cāme ai neeneni bāgrā cina cirege adnata määme camu pota ca piyepu sāvāci pota ca, maane liba biname bine cire ewademepi.”

²² Yeesu Yakobu naabine Yoane jaajige egā, “Weene umle lica gegi, weene ngena tāāpume najiye. Weene nāā ibibi gegi epu māpu cabu lenajame, cane lui māpu ne mameta gāne pāpāna?” Teepei jejāsi egā, “Cine ibibi gegi.”

²³ Yeesu jaajige, “Weene cire inajepi māpu cabu cāme pana, yepā cāme conocāco lica gyene jajime, egā laati te cire ladnatepi cāme camu pota ca piyepu sāvāci pota ca. Cāme Babe te pui puupu bine ituge amacetnāja, tabe lui bime tāāpume singi teepei puma adnaterame.”

²⁴ Nuuja ten abiberāja bāgrā cina liba itecijemige, teepei claabe me ābitininisi pui nanigane wāsi bime tāāpume.

²⁵ Puma cita ca Yeesu iyeta teebibine ala tesoglicmige, jejemige egā, “Weene umle gemi, egā laatibi Acejiyame umle cāco biname bine yaawadimusi, teeme conocāco pisi nyene jajime teepei ngena wawename. Teeme ingwe gaabe lui modamoda biname teeme cuta kokre pisi nyene biname bine mene jajanename.

²⁶ Yepā weene apu gone lābitininuye. Weeme yepā te liba singi baborage me ābitame, tabe miiji nuuja bime tāāpume kaakesea wawena;

²⁷ cuta weeme yepā te liba singi niināce me ābitame, tabe miiji weeme tāāpume epu matikāli me ābita aletnāneji biname te lipu lābituge teeme yageyame tāāpume.

²⁸ Cane lui Acejiyame bau ca tādujine biname me ābitujine, cane cuta lica tādujine biname cina cāme tāāpume kaakesea wawename, yepā cane te teeme tāāpume kaakesea wawename piyepu cāme ireclota ne ceerame daremu tāāpume teebibine kālyā wawename.”

Yeesu Miiji Jaawenige Neeneni Ireku Määsumāsu Biname bine

(Mareko 10:46-52; Luuka 18:35-43)

²⁹ Teepei liba Yeriko ne sebmālisi, baborage biname sange te tādige Yeesu me ingwe pota ca.

³⁰ Gaabe wajwa je puga ge adnatāneji neeneni ireku määsumāsu biname. Teepei āateciijige egā, “Yeesu cibibine nisuplingtenige.” Teepei puma cita ca gije abacitāsi ala abayename egā, “Babo biname, mope biname Daawida me kaakesaare, maane owecu cibibine niwenepi!”

³¹ Biname cina liga jībananisi teebibine, teepei babo tage ca cuta ala abayenāsi egā, “Mope biname Daawida me kaakesaare, maane cibibine owecu niwenepi!”

³² Yeesu imyemutige, siige teebibine ala taasoglicige, āatemlige egā, “Weene singi cane ngena wawename weeme tāāpume?”

³³ Teepei jejāsi egā, “Babo biname, cine singi gegi maane cime ireku asatame.”

³⁴ Yeesu owecu jaaglige, teeme ime bine arpenutige teeme irecu cabu me. Piba taatu teepei irecu asatāsi, siige Yeesu ne ingwe icwāsi.

21

Yeesu Dongki papa cabu Yeruselema me Abacitige

(Mareko 11:1-11; Luuka 19:28-40; Yoane 12:12-19)

¹ Yeesu teeme abiberāja bāgrā cama ādige Yeruselema ne oomlaname. Teepei liba Yeruselema ne mameta me jebenisi oomla-name, teepei atyarecanige cewe ngii Betepage me lui Olibi Uli podo cabu jage. Puma cita ca Yeesu teeme neeneni abiberāja bāgrā bine niināce gaabe me jāātyepige

² apu mene cama egā, “Weene iclege weeme niināce gaabe me lui cewe peese nyene. Weene puma jepāneniye yepā dongki ne seea ca āgrārāneji gyene, teeme cuta bāgrā pisi nyene teeme gome. Jiitnepeye, taacanepeye cāme bau me.

³ Biname te liba nuuja mene jaji je, weene apu jejepeye egā, ‘Yageyame te singi gyene ai dongki tāāpume teeme bāgrā cama, cuta tabe watawata pa taawecnistepi.’ ”

⁴ Ai mule te ābitige Acejiyame me mename biname me mene te ibibi ābitame egā,

⁵ “Weene jejemepeye Siiyona podo cabu lui babo cewe cabu biname cina icrajenige egā, ‘Ire, weeme mope biname te peega tādenige weeme bau me!

Tabe awamla cāco tādenige mamye

dongki papa cabu, dongki me bāgrā papa cabu.’ ”

⁶ Puma cita ca abiberāja bāgrā cina aacliche, jebenāsi, Yeesu ngena tāāpume jaajige.

⁷ Teepei dongki ne teeme bāgrā cama taacanisi Yeesu bau me, cābletāāpe bine teeme papa cabu seretne-māsi, siige Yeesu acenutige.

⁸ Bucurage biname cina teeme cābletāāpe bine gaabe cabu eretnimisi. Pota cina uli ciipe bine icnapimisi gaabe cabu aretname.

⁹ Yeesu me niinäce gaabe, ingwe gaabe lui biname cina teepi ala abayaninisi egä, "Daawida me kaakesaare ne yaawepyeräjesi!

Acejiyame te miiji meebine naawenege lui te Yageyame me ngii cabu tädenitel! Mine yaawepyeräjesi Acejiyame ne, cabucewe je lui te enajenige!"

¹⁰ Yeesu liba Yerusalema me atyaramtige, biname cina câlu te jitemige. Teepi teemeteme ätemläjiniisi egä, "Baa, laasi nyene ai biname?"

¹¹ Yeesu cama lui biname cina seclige, teepi jejemisi egä, "Tabe Acejiyame me mename biname Yeesu sine, Nasareta ceweyame gyene Galilaya probins cabu ca."

Yeesu Ädige Iiwäreja Mete me

(Mareko 11:15-19; Luuka 19:45-48; Yoane 2:13-22)

¹² Yeesu iiwäreja mete caale bora me abacitige, siige teebibine iyecräjemige, lui cina saawadanemusi gwidape bine aletname piyepu lui cina jaaletnimusi. Tabe rarekaake äbäsuwäja biname bime dade bine eboclomäjimige cuta eei bime adnatera dade bine, gimäe ele bine lui cina saawadanemusi aletname.

¹³ Tabe jejemige egä, "Acejiyame te jiceniige Oogäräneji mene cabu egä, 'Cäme mete ne irecu ätumuta mete ca yaainusi,' yepä weene te itu setatrongärumeye epu puupu me, eromaame cina luma lämletne-räjininusi."

¹⁴ Ireclu määsümüsu biname, ernge niyaniya biname cina seclige Yeesu bau me iiwäreja mete caale bora je, siige tabe teebibine miiji jewenanemige.

¹⁵ Modamoda iiwäreja biname piyepu cotre abiberäja biname cina claabe me äbitininisi, liba jepänisi, Yeesu lipu miijirage mule bine jewenemige piyepu teepi liba itecijemige, bägrä cina iiwäreja mete cabu lipu ala abayaninisi egä, "Mope biname Daawida me kaakesaare ne ewepyeräjeje!"

¹⁶ Siige teepi Yeesu ne jejisi egä, "Maane nää lica näätjecijenige teepi ngena jicenenemisi? Maane ngena name pi lica jüibenemite teebibine?" Yeesu jejemige egä, "Yoo, cane nätecijenige. Egäsu weene ituge acnema Oogäräneji mene egä, 'Maane bägrä piyepu ngame meeramera bägrä bine ituge wawena meebine epucäco awepyeräjame.'"

¹⁷ Puma cita ca Yeesu teebibine sebmalmige, siige Yerusalema ca asatige, Betaniya cewe me ädige. Tabe ciye puga enajige.

Yeesu Piigi Uli ne Mene ca Eglige

(Mareko 11:12-14, 20-24)

¹⁸ Krokerage Yeesu liba acnenutige babo cewe Yerusalema me, gaabe cabu cubrowe te joomlige.

¹⁹ Tabe piigi uli ne jepänige gaabe wajwa je, ädige, teeme gome jeclajutige, yepä laame taatu jepänimige, kuu lica. Tabe puma cita ca uli ne jejige egä, "Maane ingwe ca lica page nääyepi kuu päpäname." Yeesu ai mene liba jejige, uli te piba taatu laame jedacromtige, siige budre äbitige.

²⁰ Abiberäja bägrä cina liba jepänisi, teepi câlu te jitemige, jejisi egä, "Lipu pi ai piigi uli te jedacromtige watatarage?"

²¹ Yeesu jejemige egä, "Cane toraca jijenininine weebibine, egä weene liba yepä ngena atwana cama ätrunga birige, weene ibibi gemi apu wawena, cane ai piigi uli ne lipu jewenine. Cuta ai taatu lica, yepä weene cuta ibibi gemi ai podo ne jajime egä, 'Awetänti, malu cabu me ajari,' siige pui mule te pa läbitepi.

²² Weene liba Acejiyame ne ngena täapume yäätinäruye tabe icärininuge, weene liba jäätrunguye egä, 'Tabe nicärininige.'"

Ätemla Yeesu me Conocäco poto cidi me Tabe Mule bine Wawenecame

(Mareko 11:27-33; Luuka 20:1-8)

²³ Yeesu liba acnenutige iiwäreja mete caale bora me biname bine abiberäjame, piba modamoda iiwäreja biname piyepu nuuja modamoda biname cina seclige teeme bau me, itemlisi egä, "Mäame ngena conocäco pisi nyene ai mule bine wawenecame? Mäame conocäco laati bau ca gyene?"

²⁴ Yeesu jejemige egä, "Cane weebibine yepä taatu mene itemlininine, siige weene liba cäme mene nawecnisteniyee, cane piba weebibine jijenininine, cäme ngena conocäco gyene ai mule bine wawenecame.

²⁵ Yoo, weene najeye, laati te Yoane ne conocäco yääcärepi tabe biname bine niye ca äcisejame, Acejiyame te coo nää biname cina?"

Teepi siige teemeteme mene jitransisi apu egä, "Mine ngena daremu mene jewecnistenisi? Mine liba jjenisi egä, 'Acejiyame te Yoane ne conocäco yääcärepi tabe biname bine niye ca äcisejame,' tabe piba nijenininige egä, 'Cije weene ngena name pi piba teebine lica jäätrungepeye?'"

²⁶ Yepä mine liba apu jejenisi egä, 'Biname cina Yoane ne conocäco yääcärepeşi tabe niye ca biname bine äcisejame,' mine piba miji wälu biname bime täápume, ingle teepi iyeta jitrungenisi, egä Yoane lui Acejiyame me mename biname ge."

²⁷ Siige teepi Yeesu ne mene jewecnistisi egä, "Cine umle lica gemi, laati te Yoane ne conocäco yääcärepi tabe biname bine niye ca äcisejame." Yeesu jejemige egä, "Cane cuta weebibine lica jjenininine, egä cebine laati te conocäco näcärepi cane ai mule bine wawenecame."

Ngene ca Agli Mene Nanigane wäsi poto cidi me

²⁸ Yeesu ngene ca agli mene jejemige egä, "Weene lipu ngene jotwanininiye ai poto cidi me? Yepä biname puga ge teeme neenenenimäbägrä cama. Tabe niinäceyame ne jejige egä, 'Cäme bägrä, page ädi waina calwacupi cabu me kaakesea wawename.'

²⁹ Bägrä te jejige egä, 'Cane singi lica gäne,' yepä ingwe ca tabe ngenecu etatrongtige, siige ädige kaakesea wawename.

³⁰ Puma cita ca babe te ädige teeme nuuja bägrä bau me, cuta peei yepä mene jejige. Pui bägrä te jejige egä, 'You, cane ädenine,' yepä tabe lica ädige.

³¹ Siige lui bägrä te teeme babe me singi jecatige, jewenige?" Biname cina Yeesu ne jejisi egä, "Niinäceyame te teeme babe me singi jewenige!" Yeesu jejemige egä, "Cane toraca mene jjenininine: peei bägrä lipu niinäce beswa äbitige teeme babe me singi wawename, yepä ingwe ca ngenecu etatrongtige, cuta pepu pana gyene täks rarekaake uutecrena biname piyepu magebi lui bine daremu jaawenimusi sargi mule wawename, teepi weebibine itucäreninini Acejiyame ne acatame teeme mope biname me.

³² Yoane niye ca äciseja biname te tädepi, weebibine toraca gaabe jiwabipi, yepä weene lica jätürungepeye teebine, yepä täks rarekaake uutecrena biname piyepu magebi lui bine daremu jaawenimusi sargi mule wawename, teepi te jätürungepesi Yoane ne. Ngänuge puu weene ai mule ne jätüpänepeye, yepä weene ingwe lica ngenecu yaatatröngärepeye Yoane ne ätrungame."

Ngene ca Agli Mene Calwacupi Ire Atwi Biname bime poto cidi me
(Mareko 12:1-12; Luuka 20:9-19)

³³ Yeesu jiiçige egä, "Iteciçinege nuuja ngene ca agli mene. Puga ge gawe yageyame biname. Tabe cotäri ne erangige, waina gije itemige, cupicu ne juurige waina kuu ämulecame waina niye wawena täápume, siige cabucabu mete ne erangige calwacupi ne awamutame. Piba tabe biname bine calwacupi ecärimige daremu wawename, siige ädige cudecewe cewe me.

³⁴ Padare te liba tatyaramtige waina kuu ärucname, tabe teeme kaakesea bägrä bine jityepimige teemanu kupae ne acatame.

³⁵ Daremu wawenena biname cina yageyame me kaakesea bägrä bine joomläjecnisi, siige yepä ne etemeläçisi, nuuja ne budre tama eglisi, cuta nuuja ne kula ca jibyecrisi.

³⁶ Cuta cääri yageyame te poto kaakesea bägrä bine jityepimige teeme bau me, buçurage bine niinäce cabu ca. Cuta teepi yepä mule ne jepänisi daremu wawenena biname bime bau ca.

³⁷ Ceräcerägääburage me tabe teemerage bägrä ne jityepige. Tabe jiiçige egä, 'Toraca, teepi pama cäme bägrä ne opo gaabe me ecitenisi.'

³⁸ Yepä lui biname cina daremu jewenanisi, teepi liba teeme bägrä ne jepänisi, teepi jiiçisi egä, 'Ai lui yageyamerage me bägrä gyene. Biiri naclege, yaaglesi, mine piba ai calwacupi ne ecatenisi!'

³⁹ Siige puma cita ca teepi teebine joomlisi, isatisi calwacupi kaake poto cidi me, puma budre me eglisi."

⁴⁰ Yeesu itemlimige egä, "Waina calwacupi yageyame te liba cire tacnenutepi, tabe ngena cire jaawenepi pui calwacupi daremu wawenena biname bime täápume?"

⁴¹ Lui biname cina iteciçemige, jejisi egä, "Tabe pui niyarage biname bine budre me cire yaaglecemepi, siige epu biname bine calwacupi cire yääcäremepi, lui cina yageyame ne teemanu kupae cire yääcärepeşi ärucna padare cabu."

⁴² Yeesu teebibine jejemige egä, "Egäsü weene ituge acnema Oogäräneji mene te ngena jiiçenige cäme poto cidi me egä,

'Lui kula ne raranga biname cina jigyisi,
baborage bäbitige iyeta nuuja cabu ca.

Ai lui Acejiyame miji wawenäneji gyene;
cuta lipu miijirage gyene mime täápume.'

⁴³ Cane weebibine jjenininine, egä Acejiyame te cire lätecitepi weebibine waadename, siige eei bine pa yaawademepi, lui cina miijirage mule bine cire jaawenemepesi.

⁴⁴ Laati te liba ai kula cabu yaatramuge, tabe laglemaluge. Yepä ai kula te liba biname cabu saatramuge, iyeta yäämulicuge.”

⁴⁵ Modamoda iiwäreja biname piyepu Parisea sigu biname cina lui itecijemige ai ngene ca agli mene, teepi opo ewatnisi, egä Yeesu teeme poto cidi me biiri jüicemige.

⁴⁶ Teepi singi ge teebine oomlaname, yepä teepi wälu ge biname bime name pi, ingle teepi apu ngene jotwaninisi, egä Yeesu Acejiyame me mename biname gyene.

22

*Ngene ca Agli Mene Atejäclmuta Soriyomu poto cidi me
(Luuka 14:15-24)*

¹ Yeesu biname bine cerämu ebiberäjimige ngene ca agli mene ca.

² Tabe apu jüicige egä, “Acejiyame te liba biname bine yaawadimuge, pui lui epu pana ge mope biname, lui te teeme bägerä täápume atejäclmuta soriyomu ne jewenige.

³ Tabe teeme kaakesea bägerä bine jityepimige ala asogläcneji biname bine jajanename soriyomu täápume otnime, yepä teepi äbwäricinisi otnime.

⁴ Puma cita ca tabe nuuja kaakesea bägerä bine cuta jityepimige teeme bau me apu mene cama egä, ‘Cane soriyomu ne biiri jewenine. Kau piyepu teeme plongo bine betweclimisi, iyeta gwidape siige amacetnäjäneji gemi. Naaclege atejäclmuta soriyomu täápume!’

⁵ Yepä ala asogläcneji biname cina singi lica ge, siige teeme gaabe cabu otninisi. Yepä te teeme calwacupi me ädige, nuuja te teeme aletna mete me ädige.

⁶ Poto cina kaakesea bägerä bine joomläjemisi, etemeläjimisi, budre me eglecimisi.

⁷ Mope biname te claabe me äbitige. Tabe teeme cubu biname bine jityepimige budre me aglecame pui biname bine, lui cina teeme kaakesea bägerä bine budre tama eglecimisi, piyepu teeme babo cewe ne uubuderame.

⁸ Puma cita ca tabe teeme kaakesea bägerä bine ala tesoglicmige, jejemige egä, ‘Cäme bägerä me atejäclmuta soriyomu amacetnäjäneji gyene, yepä ala asogläcneji biname müiji lica gemi ai soriyomu täápume.

⁹ Peei name pi weene naaclege gaabe cube gome me, laati bine opopa jewenenemiye, ala tesogle-cmeyer soriyomu täápume.’

¹⁰ Siige kaakesea bägerä cina eclige gaabe cube gome me, jebasecretnimisi, lui bine opopa jewenanemisi, niyaniya biname coo mijimiji biname, iyeta. Teepi eclige, siige soriyomu puupu te iyeta tapanige.

¹¹ Mope biname te tabacitige, biname bine ire jetwananemige, siige yepä biname ne jepänige, lui te soriyomu cäbletääpe cäco tädige.

¹² Tabe teebine jejiige egä, ‘Cäme biname, maane lipulipu soriyomu cäbletääpe cäco tabacitite?’ Yepä tabe pui biname te nuuja mene lica.

¹³ Siige tabe mope biname te teeme kaakesea bägerä bine jejemige egä, ‘Teeme ernge ime jetäyemeye, puutucu me ijareye krokeciye cabu me. Tabe puma ele pa yaangenanege, giricu pa yaatebecmege.’”

¹⁴ Puma cita ca Yeesu jejemige egä, “Bucurage biname bine ala asogläcneji gemi, nesae bine äjäcräneji gemi.”

*Ätemla Täks Rarekaake Cera poto cidi me
(Mareko 12:13-17; Luuka 20:20-26)*

¹⁵ Parisea sigu biname cina eclige teemämu mene atraname egä, “Mine Yeesu ne lipu itemläjenisi teebine teeme mene cabu ca oomlaname?”

¹⁶ Puma cita ca teepi poto teeme abiberäja bägerä bine jityepimisi Heroda me sigu biname cama Yeesu bau me. Teepi Yeesu ne jejisi egä, “Abiberäja biname, cine umle gemi, egä maane toraca biname gäte piyepu cängena ebiberäjenemite Acejiyame me gaabe poto cidi me. Maane nuuja ngenecu lica gäte, biname cina lipu ngene jwaatwaninusi määme poto cidi me, ingle maane teebibine opo gaabe je lica yaacranimute teeme ngii name pi.

¹⁷ Yoo siige, maane nijini, maane lipu ngene jotwanenite, nää mime Cotre te lica niibenininige mine täks rarekaake ceerame Rooma gawe mope biname Siisa ne?”

¹⁸ Yepä Yeesu uja umle äbitige, egä teepi singi gemi teebine teeme mene cabu ca oomlaname, siige tabe jejemige egä, “Weene walya biname gemi! Weene ngena name pi cebine cäme mene cabu ca oomlaname naweniniye?”

¹⁹ Baa rarekaake nawabeye täks täápume.” Teepi rarekaake ne secanisi.

²⁰ Tabe puma cita ca itemlimige egä, “Laati me opo piyepu ngii gemi ai rarekaake cabu?”

²¹ Teepi jejisi egä, “Siisa me opo gyene piyepu teeme ngii gyene.” Yeesu jejemige egä, “Lui gwidape gemi Siisa me, teebine ecäreye pui; piyepu lui gwidape gemi Acejiyame me, teebine ecäreye pui.

²² Teepi liba itecijemige, mutäcäco äbitininisi teeme mene name pi, siige teepi Yeesu ne ebmalisi, eclige.

*Ätemla Mene Budre cabu ca Arpinera poto cidi me
(Mareko 12:18-27; Luuka 20:27-40)*

²³ Puirage bimu cabu poto Sadukea sigu biname cina seclige Yeesu bau me. Teepi eei biname gemi, lui cina ätrunga lica, egä budre cabu ca arpinenta pisi nyene.

²⁴ Teepi Yeesu ne itemlisi egä, “Abiberäja biname, Moose itu ebiberäjemuji, egä biname te liba bägrä cäco budre läbituge, teeme igane te müiji cuubla ne acata siige bägrä wawena teeme naane me ngii täápume.

²⁵ Siige nuuja taje puga ge seben naniganewaleyame. Teepi aga yaacrajanemepi. Uuge te coga ne waacatepi, bägrä cäco budre läbitepi, siige teeme cuubla ne twaabmalepi teeme gomecayame igane täápume.

²⁶ Cuta peeirage mule te läbitepi teeme täápume, cuta teeme gome ca lui igane täápume, cuta iyeta pui seben naniganewaleyame bime täápume.

²⁷ Ceräcerägäabu cuubla te budre läbitepi.

²⁸ Tabe laati me coga cire waanajepi, budre biname cina liba cire larpinäripesi, ingle tabe iyeta pui seben naniganewaleyame bime coga gwene?”

²⁹ Yeesu jejemige egä, “Ingle weene umle lica gemi Oogäräneji mene piiyepu Acejiyame me kokre, weene peei name pi betäjiye.

³⁰ Biname cina liba budre cabu ca cire larpinäripesi, teepi epu pana cire yaacrajemepi Acejiyame me mename seemo cina cabucewe je liiyepu. Teepi atejälmuta lica cirege.

³¹ Egäsu weene ituge acnema Acejiyame te ngena itu jijinuji budre biname bime arpinera poto cidi me. Tabe apu jiuuji egä,

³² ‘Cane lui Abrahamo, Isacako, Yakobu naabibime Acejiyame gäne.’ Siige tabe nata budre biname bime Acejiyame lica gyene yepä eei bime, lui cina ireclota gemi.”

³³ Lui biname cina itecijemige, teepi mutäcäco äbitininisi Yeesu me abiberäja mene name pi.

Lui Cotre Gyene Baborage

(Mareko 12:28-34; Luuka 10:25-28)

³⁴ Parisea sigu biname cina liba itecijemige, egä Yeesu Sadukea sigu biname bine mene cäco me jwenimige, teepi tomi yootisi.

³⁵ Puma cita ca teeme yepä te, lui cotre abiberäja biname ge, tabe singi Yeesu ne mene cabu ca oomlaname. Tabe itemlige egä,

³⁶ “Abiberäja biname, Moose lui Cotre nicärininuji, lui gyene baborage?”

³⁷ Yeesu jejige egä, “Weene müiji singi äbitena Yageyame, weeme Acejiyame täápume, siige ai ne aboclomta iyeta weeme owecu mule ca, iyeta weeme ireclota ca, iyeta weeme ngenne atwanena ca.’

³⁸ Ai cotre lui niinäcegaabe cotre gyene, piiyepu baborage gyene.

³⁹ Pui gomecayame baborage cotre lui age sena: ‘Weene müiji biname bime täápume singi lenaja, weene lipu weeme täápume singi birige.’

⁴⁰ Ai neeneni cotre cabu peete nemi iyeta Moose me Cotre mene piiyepu Acejiyame me mename biname bime abiberäja mene.”

Keriso Laasi Nyene?

(Mareko 12:35-37; Luuka 20:41-44)

⁴¹ Poto Parisea sigu biname cina liba yepä cewe me tabasecre-tnige, Yeesu teebibine itemlimige egä,

⁴² “Weene lipu ngenne jotwaniniyiye, egä Keriso biname bine lui te niiya cabu ca cire yääsecräremepi, tabe laati me kaakesaare gyene?”

⁴³ Teepi jejisi egä, “Tabe mope biname Daawida me kaakesaare gyene.” Yeesu puma cita ca itemlimige egä, “Cije piba ngena name pi Aceji Seemo te Daawida ne ngenne atwana ecäruji tabe Keriso ne Yageyame ca ainame? Tabe Daawida apu jiuuji egä,

⁴⁴ ‘Yageyame te cäme Yageyame ne jejuji:

Ama adnati cäme camu poto cidi ca

ngälu cane mäame cubuyame bine

mäame ernge gawe me cire yaacranemepene.’

⁴⁵ Cije piba Keriso lipu gyene Daawida me kaakesaare, Daawida liba teebine Yageyame ca einuji?”

⁴⁶ Nuuja biname te äblicäco Yeesu ne daremu mene awecnistame, siige pui padare cabu ca niinäce gaabe me teepi wälu icrajimige Yeesu ne ätemlejame.

23

Yeesu Umlle Mene Jejananemige Cotre Abiberäja piyepu Parisea Sigu Biname bime Mule poto cidi me

(Mareko 12:38-39; Luuka 11:43, 46, 20:45-46)

- 1 Puma cita ca Yeesu biname bine piyepu abiberäja bägrä bine jejemige egä,
- 2 “Cotre abi-beräja biname piyepu Parisea sigu biname bime conocäco pisi nyene Moose me Cotre mene bine aboclomäjame.
- 3 Peei name pi weene miiji ätrunga piyepu äcwetna, teepi ngena täápume jijinusi wawename, yepä weene gone teebibine jäätutanemuye, ingle teepi teeme abiberäja mene ibi lica läbitininusi.
- 4 Piti nemi bucurage mäpurage cotre. Teepi singi gemi biname cina pui bine äcwetname, yepä teepi nuuja gwidape ne lica jaawenusi biname bine ätityerame pui cotre bine äcwetname.
- 5 Teepi iyeta gwidape bine jaawenimusi biname cina päpäna taatu name pi. Teeme puga ge matimati boks Moose me Cotre mene äbäcname, siige mangace piyepu ime cabu sea ca jäätäyimusi. Teepi peei boks bine daamledamle jaawenimusi biname cina päpäname. Teepi cuta teeme cäbletääpe fooa mutre cabu lecaleca wul sea sigu bine yaaterutäjimusi.
- 6 Soriyomu ne liba yaaclitusi, teepi miijimiji puupu cabu ladnatärüge, cuta abasecretna mete cabu piyepu teepi niinäce gaabe me ladna-tärüge.
- 7 Teepi baborage singi birige aletna puupu cabu biname cina teebibine cängengarage awablame piyepu abiberäja biname ca ainame.
- 8 Yepä weebibine gone abiberäja biname ca aina, ingle weeme yepä taatu abiberäja biname gyene, piyepu weene iyeta naniganewaleyame gemi.
- 9 Weene gone ai gawecewe cabu weemeweme babe ca lainininuye, ingle weeme yepä taatu Babe peei nyene cabucewe je.
- 10 Cuta weene gone weeme nuuja ne babo biname ca yaainuye, ingle cane Keriso lui weeme yepä taatu babo biname gäne.
- 11 Laasi nyene weeme baborage, tabe miiji birige weeme kaakesea bägrä lenaja.
- 12 Laati te teemämu babo me läbituge, teebine matikolä me birige wawena; laati te teemämu matikäli me läbituge, teebine babo me birige wawena.”

Yeesu Umlle Mene Jejananemige Walya Biname bime poto cidi me

(Mareko 12:40; Luuka 11:39-42, 44, 52, 20:47)

- 13 “Lipu mäpu cirege weeme täápume weene cotre abiberäja biname piyepu Parisea sigu biname! Weene lui walya biname gemi! Weene gaabe ne yaarmuye biname cina Acejiyame bau me otnime. Weene lica yäbäcnuye piyepu cuta jüibemuye lui cina singi gemi äbäcname.
- 14 Lipu mäpu cirege weeme täápume weene cotre abiberäja biname piyepu Parisea biname! Weene lui walya biname gemi! Weene niinäce cuublacubla bime gwidape bine angletneja mule ca yaawadimuye, piba sinäme lecaleca irecu lämututinuye, ingle weene singi gemi weeme peei angletneja mule ne acwabame. Peei name pi weeme daremu niyarage gyene poto biname bime daremu cabu ca.
- 15 Lipu mäpu cirege weeme täápume weene cotre abiberäja biname piyepu Parisea biname! Weene walya biname gemi! Weene iyeta poto ta waatnetnäjinuye, malu cabu ta piyepu doru cabu ta, naace täápume biname ngänu gyene tabe puu yepä, teebine atatrongtame weeme mule cabu me. Tabe liba weeme mule cabu me labacituge, weene teebine weeme cabu ca neenenä gäabu niyarage me jaawenuye, siige tabe uliobo puupu cabu me cirege otni weene liiyepu.
- 16 Lipu mäpu cirege weeme täápume weene irecu mäasumasu gaabe awabeja biname! Weene yaabiberäjimuye, egä laati te liba iiwäreja mete me ngii cama mene jüicemuge, papa gyene tabe peei mene ne atropengta. Yepä laati te liba iiwäreja mete cabu lui gol, pui me ngii cama mene jüicemuge, pui mene ne tabe äblicäco atropengta.
- 17 Weene irecu mäasumasu buduma biname gemi! Egäsu gol matikäli birige, yepä iiwäreja mete lui te pui gol ne Acejiyame täápume mara me jaawenuge, tabe baborage birige.
- 18 Cuta weene yaabiberäjimuye, egä laati te liba mene jüicemuge iiwäreja mete cabu lui iiwäreja dade, teeme ngii cama, papa gyene tabe pui mene ne atropengta. Yepä laati te liba mene jüicemuge owecu gwidape me ngii cama, lui pui iiwäreja dade papa cabu, pui mene ne tabe äblicäco atropengta.
- 19 Weene irecu mäasumasu biname gemi! Egäsu owecu gwidape matikäli gyene, yepä dade lui te pui owecu gwidape ne Acejiyame me täápume mara me jaawenuge, tabe baborage gyene.

²⁰ Yoo, laati te liba mene jii cemuge iiwäreja dade me ngii cama, tabe cuta iyeta owecu gwidape bime ngii cama jii cemuge, lui pui dade papa cabu.

²¹ Cuta laati te liba mene jii cemuge iiwäreja mete me ngii cama, tabe cuta Acejiyame me ngii cama jii cemuge, puma lui te enajenige.

²² Coo laati te liba mene jii cemuge cabucewe me ngii cama, tabe cuta Acejiyame me adnata puupu me ngii cama jii cemuge cuta piyepu teeme ngii cama, lui te enajenige puma.

²³ Lipu mäpu cirege weeme täapume weene cotre abiberäja biname piyepu Parisea sigu biname! Weene lui walya biname gemi! Weene Acejiyame ne yepä yääcärüye weeme iyeta ten deedei mite wawena gwidape ngii minti, dili, kumina cabu ca, ngänu gyene Cotre cabu pui mule lui baborage lica gyene. Yepä weene lica jaawenimuye conocäco mule, owecu mule piyepu toraca mule, Cotre cabu lui cina modamoda mule gemi. Weene miiji ai modamoda mule bine wawenetnäja, cuta gone ngene ätrimela pototo matimati mule bine wawenetnäjame.

²⁴ Weene irecu mäasumäsu gaabe awabeja biname gemi! Weene matimati cotre bine cängena yääcwetnimuye, yepä modamoda cotre bine jaatropengäjimuye. Weeme peei mule lui epu pana gyene, egä iidreba lui matikäli jugi gwidape gyene, weene weeme nani niyye ne sobläbi cabu yaapaduruye pui te ätyepurame, yepä weene kamela ne yäärmitye, lui baborage jugi gwidape gyene.

²⁵ Lipu mäpu cirege weeme täapume weene cotre abiberäja biname piyepu Parisea sigu biname! Weene lui walya biname gemi! Weene kaapo piyepu pleito bine kaakepoto ca taatu jääcisäjemuye, yepä ngalebora ca weene jäängärimuye angletneja mule ca piyepu ceera cäco mule ca.

²⁶ Ireku mäasumäsu Parisea biname, weene niinäce miiji jicisäjemuye kaapo bora ngena jugi piti nemi, piba cuta kaakepoto ca jugi cäco yaanajuge.

²⁷ Lipu mäpu cirege weeme täapume weene cotre abiberäja biname piyepu Parisea sigu biname! Weene lui walya biname gemi! Weene epu pana gemi, kula bora gape lui owe pototo bulu ca yaaganusi, siige kaake pototo ca opo lacityge, yepä ngalebora apanäneji gyene budre biname bime kaake ca piyepu pototo jugijugi gwidape ca.

²⁸ Cuta pepu gyene, biname cina weebibine jipänininusi, egä weene miiji biname gemi, yepä weeme ngalebora pisi nyene walya piyepu niyya mule.”

Yeesu Niinäce Gaabe Mene Jii cemuge Pui Biname bime Niyya Daremu pototo cidi me (Luuka 11:47-51)

²⁹ “Lipu mäpu cirege weeme täapume weene cotre abiberäja biname piyepu Parisea sigu biname! Weene lui walya biname gemi! Weene kula gape bine yaarangimuye Acejiyame me mename biname bime täapume piyepu conocäco biname bime ngena ape-cna kula bine yaabasogärimuye.

³⁰ Weene jii cemuye egä, ‘Sasa cine liba cire ninajineji cime saarewale cama, cine lica cire yaaglecemejisi budre me Acejiyame me mename biname bine teepi liiyepu.’

³¹ Yepä apu pi weene awabudnäjininiye, egä weene teeme kaakesaare gemi, lui cina Acejiyame me mename biname bime budre me eglecimujisi.

³² Yoo, weene jimlitäjepeye weeme saarewale cina lui gije itu jebacitujisi mename biname bine aglecame!

³³ Weene cobyame gemi, cobyame bime bägrä gemi! Weene äblicäco uucratna atrana cabu ca, yepä weebibine cirege atrana uliobo puupu cabu me otnime!

³⁴ Cane mename biname bine, umleumle biname bine piyepu cotre abiberäja biname bine cire jäätyepemepene weeme bau me. Weene pototo bine budre me cire eglecemepeye, pototo bine baarge uli cabu cire jibyecremepeye, pototo bine cire etemeläjemepewe weeme abasecretna mete cabu ta piyepu cire iyecräjemepewe yepä cewe ca nuuja cewe me.

³⁵ Pipu pi iyeta niyya daremu cina conocäco biname bime agleca name pi weeme bau me cire saaclepi, conocäco biname Abela me agli cabu ca ngälu Baraki me bägrä Sakariya teeme agli cabu me, weeme kaakesaare cina lui ne budre me eglijisi iiwäreja mete puutucu cabu iiwäreja dade gome.

³⁶ Cane toraca mene jijenininine, page lui biname cina icrajinige, teepi te iyeta agleca daremu ne cire jääpänepesi!”

Yeesu Yerusalema ne Owecu Jewenige (Luuka 13:34-35)

³⁷ “Yerusalema biname, Yerusalema biname, weene te Acejiyame me mename biname bine budre me yaaglecimuye piyepu cuta Acejiyame me ätyepäneji biname bine kula ca jääbyecrimuye. Bucurage gääbu cane singi ituge weebibine cäme bau me abasecretna, epu pana paulo te teeme plongo bine lipu taabasecretnimuge teeme taame ca ätrugerame, yepä weene singi lica ituge.

³⁸ Ingle weene cebine nägyuye, peei name pi weeme cewe piyepu Acejiyame me mete cirege kaake lenaja.

³⁹ Cane jijenininine weebibine, egä weene ingwe ca cebine cääri lica cire näpänepeye, ngälu weene liba cire najepeye egä, 'Maane lui te tädenite Yageyame me ngii cabu, Acejiyame te meebine müiji mule naawenege!'

24

*Yeesu me Mene Iiwäreja Mete Iigareca poto cidi me
(Mareko 13:1-2; Luuka 21:5-6)*

¹ Yeesu liba iiwäreja mete ne ebmalige, siige ädige, abiberäja bägrä cina piba seclige teebine awabeträrame poto kula ca rarangäneji mete, lui iiwäreja mete caale bora jage.

² Yeesu teebibine jejemige egä, "Weene ire iyeta ai nema! Cane weebibine toraca jijenininine, egä lica yepä kula ne cirege abmala teeme puupu cabu ai mete cabu. Iyeta bine cirege äyära gawe me."

*Mäpu cina Lipu Cirege Otni
(Mareko 13:3-13; Luuka 21:7-19)*

³ Yeesu liba adnatäneji enajige Olibi Uli podo cabu je ten taatu, abiberäja bägrä cina seclige, itemlisi egä, "Nijini cibibine, egä maane lui gwidape täapume nijinite, liba cire läbitipesi. Ngena cina cirege äbitena awabame, egä maane tacnenite piyepu ai padare me ngälugaabe te joomlenige?"

⁴ Yeesu jejemige egä, "Weene ireire inajipi! Gone ire taatu acrana weebibine angletnejame.

⁵ Bucurage biname cina cire saaclepi cäme ngii cabu, siige cire jücemepesi egä, 'Cane age säne Keriso, biname bine lui te nüya cabu ca pa yäasecräremepene, siige bucurage biname bine cire yaangletnäjemepesi.

⁶ Weene mameta cubu ala cirege ätecijana piyepu weene idre cire itecijanipi cubu poto cidi me cudecewe je, yepä wälu gone läbitininuye. Pepu gwidape cina müiji cire läpletnicipesi, yepä cäro padare me ngälugaabe camu gyene.

⁷ Yepä gawe biname cina cubu cire jücepesi nuuja gawe biname cama. Yepä babo mope biname te nuuja cama cubu cire jücepi. Iyeta poto ta gane piyepu ocneja cirege.

⁸ Yepä ai iyeta lui mäpu padare me agedna taatu gyene, epu mäpumäpu magebi te lipu cupace laplongamtuge bägrä ärngi täapume.

⁹ Pui mäpu padare cabu weebibine cire joomläjipesi, siige cire icäripesi mäpu cabu lenajame piyepu budre me aglecame. Iyeta biname cina cämiji pi cire jimugetnipesi weebibine.

¹⁰ Bucurage biname cina piba teeme ätrunga bine cire yaabmalecmepesi. Teepi teemeteeme cire laitnäjipesi, cire lämugetnäjipesi.

¹¹ Bucurage walya mename biname cina cire saaclepi, teepi siige bucurage biname bine cire yaangletnäjemepesi.

¹² Ingle naace popi conocono mule te daamledamle cire läbitepi, peei name pi biname cina singi cäco cire läbitipesi cäme täapume.

¹³ Yepä laati te ngenecu kokre cire yaanajepi ngälu ngälugaabe, tabe iyeteta ireclota ne cirege päpäna.

¹⁴ Iyeta poto ta ai gawecewe cabu biname bine cirege jajanena Müiji Mene Acejiyame te biname bine waadena poto cidi me. Pipu pi iyeta maramara gawe biname cirege ätecija, piba ai padare me ngälugaabe cire tädepi."

*Baborage Mäpu
(Mareko 13:14-23; Luuka 21:20-24)*

¹⁵ "Acejiyame me mename biname Daniyela lui niyarage wälumeteyame poto cidi me jücuji, weene liba cire jepänepeye aclajuteji puupu cabu, Acejiyame täapume lui puupu ne mara me ituge wawena," (acnema biname tabe müiji umle ai ngena täapume myene),

¹⁶ "piba lui biname cina cire yaacrajepi Yuudea probins cabu, teepi müiji podo cabu me uucratna.

¹⁷ Lui biname te mete toro cabu lui puupu cabu cire yaanajepi, tabe müiji lica cirege mete bora me abacita gwidape waadename.

¹⁸ Lui biname te calwacupi je, tabe müiji lica cirege acnenuta teeme cäbletääpe acatame.

¹⁹ Ogi nemi pui padare cabu lui mäpumäpu magebi piyepu bägrä ngame meeramera magebi.

²⁰ Ireçu ätumutipeye, egä weene gäbu padare cabu coo Sabade bimu cabu lica cirege uucratna,

²¹ Ingle pui padare cabu lui mäpu cirege, epu baborage cirege, egä niinäce pepu mäpu ne lica ituge päpäna ai gawecewe me agedna cabu ca ngälu page ai taje piyepu ingwe ca cääri lica cirege päpäna.

²² Yoo, Acejiyame te teeme ngene atwanena cabu pui mäpu padare ne uja tuube me itu jewenuji. Tabe liga pepu lica cire jaaweneji, biname cina ireclota lica cire yaacrajemepi. Yepä tabe pui padare ne tuube me cire jaawenepi teeme äjäcräneji biname bime name pi.

²³ Siige pui padare cabu laati te liba cire jijipi egä, 'Keriso age sena,' coo egä 'Tabe peese nyene,' weene gone ätrunga.

²⁴ Walya Keriso piyepu walya mename biname cina cire saaclepi. Teepi ciitaca mule bine piyepu cälu te äti mule bine cire jaawenanemepesi Acejiyame me äjäcräneji biname bine angletne-jame, teepi liba ibibi cirege peei ne wawename.

²⁵ Weene ngene gone jitrimalinuge, egä cane ai mule poto cidi me niinäce gaabe me ituge jajanena.

²⁶ Biname cina liba weebibine cirege jaji egä, 'Keriso lui daapo taatu cewe cabu sine,' gone naacluge piyeme. Coo teepi liba cirege jaji egä, 'Tabe mete cabu ämlitäneji enajenige,' gone jäätrunguye.

²⁷ Cane, Acejiyame bau ca lui te tädujine biname me äbitujine, paamlepamle pana cire tacnepene, lui te twaaplacmeläjuge carbe cabu bimu acita gome ca bimu äpula gome me.

²⁸ Budrekaake luma, sändäyame cina piyeme labasecretnuge."

Yeesu me Acnenua poto cidi me

(Mareko 13:24-27; Luuka 21:25-28)

²⁹ "Pui mäpu padare ingwe gaabe ca piba taatu bimu te krokeciye me cire läbitepi, mabye te lica cire saapacyärepi, wale cina cabu ca cire saatrametnemepi piyepu dume cabu lijaliya nuuja gwidape gemi, teepi teeme otnetneja gaabe cabu ca cire läyebengäjipesi.

³⁰ Piba cane lui te Acejiyame bau ca tädujine biname me äbitujine, cäme cewecu te cire taboclomtepi carbe cabu, siige iyeta maramara gawe biname cina ele cire yaangenetnemepi, teepi liba cebine, Acejiyame bau ca lui te tädujine biname me äbitujine, cire näpänesipi carbe cabu äina baborage kokre piyepu jamyacu apacyera cama.

³¹ Baborage moole te liba cire saange-nepi, cane cäme mename seemo bine cire jäätyepemepene Acejiyame me äjäcräneji biname bine abasecretname iyeta poto ca ai gawecewe cabu."

Ngene ca Agli Mene Piigi Uli poto cidi me

(Mareko 13:28-31; Luuka 21:29-33)

³² "Weene abiberäjineye piigi uli cabu ca. Teeme ciipe cina liba migi ca tapanininusi, ngänglä laame liba taawenimuge, weene piba umle gemi, egä kämäge mameta gyene.

³³ Pepu gyene, weene liba ai gwidape bine cire jepänanemepewe, weene umle gemi, egä cäme otni lui mameta gyene. Cane grana gome säne.

³⁴ Cane toraca mene jijenininine, egä biname lui cina ireclota page ai taje, teepi iyeta budre lica cirege äbita, ngälu iyeta ai mule cina liba cire läbitipesi.

³⁵ Dume piyepu gawe cirege apira, yepä cäme mene te lica cirege apira."

Nuuja te Umle Lica Bimu coo Padare Yeesu me Äina tääpume

(Mareko 13:32-37; Luuka 17:26-30, 34-36)

³⁶ "Nuuja biname te umle lica gyene lui bimu coo padare cabu cane cire täinepene. Acejiyame me mename seemo cina cabucewe je umle lica gemi, cane Bägrä te umle lica gäne, yepä tabe Babe taatu umle gyene.

³⁷ Cane lui Acejiyame bau ca tädujine biname me äbitujine, cane liba cire täinepene, pui padare lui epu pana cirege Nooa me padare liiyepu.

³⁸ Igi me niinäce gaabe biname cina piba yäärwäjimusi, yäänäjimusi, lawadricninusi ngälu puirage bimu, Nooa liba acenutuji baborage buto cabu me.

³⁹ Teepi nuuja umle lica ge, egä ngena te äbitinige, ngälu igi te liba tädige, iyeta teebibine yiisibreemige. Pepu cirege äbita, cane lui te Acejiyame bau ca tädujine biname me äbitujine, liba cire tacne-nutepene.

⁴⁰ Pui padare cabu neenenen rooriye cina kaakesea cire jaawenepäsi calwacupi cabu; nuuja ne cire yaacatepesi, nuuja ne cire yaabmalepesi.

⁴¹ Neenenen magebi cina wiiti kuu bine kula ca cire jäämulecemepäsi; nuuja ne cire waacatepesi, nuuja ne cire waabmalepesi.

⁴² Weene amacetnäjäneji inajipi, ingwe weene umle lica gemi, lui bimu cabu weeme Yageyame te cire tädepi.

⁴³ Mete yageyame te liba umle je, egä eromaame te liba tädenige, tabe piba ireclota yaanajuge. Tabe ire taatu lica jaacituge eromaame te teeme mete me abacita.

⁴⁴ Mete yageyame te lipu ireclota yaanajuge inge eromaame te abacita wälu, weene miiji cuta pepu amacetnäjäneji lenaja, inge cane lui te Acejiyame bau ca tädujine biname me äbitujine, cane weeme umle cäco padare cabu cire tädepene.”

*Miiji Kaakesea Bägrä piyepu Niiya Kaakesea Bägrä
(Luuka 12:41-48)*

⁴⁵ “Laasi nyene toraca ngenecu piyepu umle cama kaakesea bägrä? Tabe peese nyene, teeme babo biname te lui ne ituge acita teeme nuuja kaakesea bägrä bine ire atwime, egä teepi toraca padare cabu deedei yaawadanemusi.

⁴⁶ Pui kaakesea bägrä te lipu gege birige, teeme babo biname te liba tacnenutuge, siige jääpänuge, egä tabe cängena kaakesea jaawenuge.

⁴⁷ Cane toraca jijenininine, egä teeme babo biname te jaajuge tabe iyeta gwidape bine ire atwemame.

⁴⁸ Yepä tabe liba niiyarage kaakesea bägrä birige, tabe lajuge egä, ‘Cäme babo biname te wata lica tacnenutenige.’

⁴⁹ siige puma cita ca gije jaacranimuge poto kaakesea bägrä bine aglecame piyepu ärwäjame, änäjame poto nänäja biname cama.

⁵⁰ Puma cita ca teeme babo biname te tacnenutuge tabe lui padare cabu lica jaawagrijuge,

⁵¹ siige teebine mage yaagluge. Tabe nuuja walya biname bime cama yepä ibi daremu ne yaacatuge: tabe teta cama läduge uliobo puupu cabu me, ele puma yaangenanenuge piyepu giricu yaatebicmuge.”

25

Ngene ca Agli Mene Ten Ngulebägrä poto cidi me

¹ “Pui padare cabu cane liba cire tacnenutepene, Acejiyame te lui biname bine yaawadimuge, teepi lui ten ngulebägrä pana cirege, lui cina lampa cama eclige teeme ciweloologyame ne awacletnäjame.

² Poto faib lui buduma ge, poto faib lui umleumle ge.

³ Buduma ngulebägrä cina teeme lampa bine ewadimisi, yepä teepi tuwängle niye bine lica ewadimisi.

⁴ Umleumle ngulebägrä cina, teepi teeme lampa bine ewadimisi cuta tuwängle niye.

⁵ Ciweloologyame te däägurage täbitige, peei name pi ngulebägrä cina ute me jicriranemige, siige ograrige.

⁶ Ciye duusa liba joomlige, teepi ala itecijemige egä, ‘Ciweloologyame te tädenige! Naaclege teebine awacletnäjame!’

⁷ Puma cita ca iyeta ngulebägrä cina arpineräjininisi, lampa bine emacetnäjimisi, jebotanemisi.

⁸ Buduma ngulebägrä cina jejemisi umleumleyame bine egä, ‘Cime niye nicärineye, inge cime lampa cina siige ätümetnenige.’

⁹ Umleumle ngulebägrä cina jejemisi egä, ‘Cine äblicäco gemi weebibine ceera, inge ibibi lica gemi weene piyepu cine. Äte aletna mete me naaclege weeme täöpume aletna-me.’

¹⁰ Siige buduma ngulebägrä cina eclige aletname. Teepi liba puga ge, piba ciweloologyame te tatyaramtuge. Siige lui cina amacetnäjäneji ge, teepi teta cama eclige, ebäcnisi atejäclmuta soriyomu täöpume, siige grana te tarmige.

¹¹ Ingwe ca buduma ngulebägrä cina tatarige, jicisi egä, ‘Babo biname, babo biname, cine yääbäcnesi!’

¹² Ciweloologyame te puma cita ca teebibine tejemige egä, ‘Cane toraca jijenininine, egä cane umle lica gäne weene.’ ”

¹³ Puma cita ca Yeesu jejemige egä, “Peei name pi weene ireire inajipi, inge weene umle lica gemi padare coo bimu cäme acnenuta täöpume.”

*Ngene ca Agli Mene Nesae Kaakesea Bägrä poto cidi me
(Luuka 19:11-27)*

¹⁴ “Pui padare cabu cane liba cire tacnenutepene, Acejiyame te lui biname bine yaawadimuge, teepi yepä babo biname me nesae kaakesea bägrä pana gemi. Yoo, pui babo biname te otnime äbitige cudecewe cewe me. Tabe teeme kaakesea bägrä bine ala tesoglicmi-ge, jejemige teeme gawe piyepu gwidape bine ire atwemame.

¹⁵ Tabe rarekaake yepäyepä ecäranemige teeme ngene atwanena ibi teepi pui ca kaakesea wawename ingwe ca awecna täöpume. Tabe yepä ne faib tausen rarekaake ecäriige, cuta nuuja ne neenenä tausen rarekaake ecäriige, cuta nuuja ne yepä tausen rarekaake ecäriige, siige tabe abyemäriige otnime.

¹⁶ Lui kaakesea bāgrā te faib tausen rarekaake ewadimige, tabe piba taatu kaakesea jewenimige pui rarekaake ca, siige nuuja faib tausen jepānimige.

¹⁷ Pipu pana mule te ābitige neeneni tausen rarekaake bine lui kaakesea bāgrā te ewadimige, tabe cuta jepānimige nuuja neeneni tausen.

¹⁸ Yepā lui kaakesea bāgrā te yepā tausen rarekaake bine ewadimige, tabe ādige, gawe ne juurige, imletnige teeme babo biname me rarekaake bine.

¹⁹ Lecaleca padare ingwe ca babo biname te piba tacnenutige, ala taasogläcnige teeme kaakesea bāgrā bine teebine awabame, egā teepi luma ngālu kaakesea ituge wawena teeme rarekaake ca.

²⁰ Lui kaakesea bāgrā te yaawademepi faib tausen rarekaake, tādige, nuuja faib tausen sewadimige, jejige egā, 'Babo biname, maane faib tausen rarekaake nācārepete. Age sena nuuja faib tausen, cane lui bine ituge pāpāna.'

²¹ Babo biname te jejige egā, 'Babo miijirage! Maane miijirage kaakesea bāgrā gāte, cāngena lipu ire tetwumete matikāli rarekaake ne, siige cane naacitenine bucurage bine ire atwemame. Tādi cāme soriyomu cabu me cane cama gege me!'

²² Puma cita ca lui kaakesea bāgrā te neeneni tausen rarekaake bine yaawademepi, tādige, babo biname ne jejige egā, 'Babo biname, maane cebine neeneni tausen rarekaake nācārepete. Age sena nuuja neeneni tausen, cane lui bine ituge pāpāna.'

²³ Teeme babo biname te jejige egā, 'Babo miijirage! Maane miijirage kaakesea bāgrā gāte, cāngena lipu ire tetwumete matikāli rarekaake ne, siige cane meebine naacitenine bucurage bine ire atwemame. Tādi cāme soriyomu cabu me cane cama gege me!'

²⁴ Cuta lui kaakesea bāgrā te yaawademepi yepā tausen rarekaake bine, tādige babo biname bau me, jejige egā, 'Babo biname, cane umle gāne, egā maane owelale biname lica gāte. Maane emā yāārucnimute, maane luma lica yāātemimute; maane emā taabasecret-nimute, kuu gije bine luma lica yiisabājemute.'

²⁵ Cane wālu ge, peei name pi lādepene, määme rarekaake gawe bora yāāmletnepene. Siige age sena, maane lui nācārepete.'

²⁶ Tabe babo biname te jejige egā, 'Maane niiyarage durau kaakesea bāgrā gāte. Maane umle ge, egā cane emā yāārucnimune, luma lica yāātemimune piyepu emā taabasecret-nimune, luma kuu gije bine lica yiisabājemune.'

²⁷ Maane cāme rarekaake cire yaacranejite rarekaake ire atwi mete cabu, siige cāme acnenuta padare cabu cane cerāmu cire jāāpānemejine niināce rarekaake me kaakesea cabu ca.

²⁸ Ewademeye peei rarekaake bine teeme bau ca, ecāreye laati me ten tausen rarekaake piti nemi.

²⁹ Lui biname me umle pisi nyene, teebine cerāmu ceera, siige teeme umle te babo lābituge. Yepā lui biname me umle lica gyene, piyepu tabe singi lica abiberājame, teeme tääpume nuuja gaabe lica gyene tabe umle ne pāpāname.

³⁰ Ai niiyarage kaakesea bāgrā ne puutucu me jiareye krokeciye cabu me. Tabe puma ele cire yaangenanepe, giricu cire yaatebecmepi.' "

Cerācerāgābu Atrana Bimu

³¹ "Cane lui Acejiyame bau ca tādujine biname me ābitujine, cane liba cabucewe cabu ca cire tāinepene cāme jamyacu apacyera cama piyepu cāme mename seemo cama, cane piba cāme babo adnata puupu cabu cire ladnatepene biname bine atraname.

³² Iyeta gawe maramara biname bine cirege abasecretna cāme opo gaabe me. Cane teebibine cire jaabelanemepene neeneni sigu wawename, maamoi ire atwi biname te lipu maamoi piyepu gouti bine jaabelanemuge maramara sigu me.

³³ Cane piba maamoi bine cāme camu poto cidi me cire yaacranemepene piyepu gouti bine cāme sāvāci poto cidi me.

³⁴ Piba cane mope biname te cire jaajemepene cāme camu poto cidi ca biname bine egā, 'Cāme Babe te weebibine miiji itu jiwenaninuji, siige naaclege iyeteta ireclota cabu me. Tabe peei ne weeme tääpume ituge amacetnāja, tabe lui padare cabu gawecewe ne yootonutuji.

³⁵ Cane loolomecewe ge, weene deedei nācārujiye; niiyemecewe ge, weene niye nācārujiye. Cane ciitaca biname ge, weeme cewe me tatyaramtujine, weene nawabluijiye, weeme mete me nacanujiye.

³⁶ Cane cuutacuta ge, weene cābletāape nasigrujiye; cane pita cama ge, weene nāngrārujiye. Cane krokeciye mete cabu liba, weene nādārujiye.'

³⁷ Cāme camu poto cidi ca conocāco biname cina teepi piba cebine cire najepesi egā, 'Yageyame, cine liba meebine nāāpānujisi loolomecewe, siige deedei nācārujisi; coo pi-iyepu niyemecewe, siige niye nācārujisi?'

³⁸ Cine liba nääpänujisi ciitaca biname, siige naawablujisi, cime mete me naacanujsi, coo cuutacuta je cäbletääpe naasigrujisi?

³⁹ Cine liba nääpänujisi pita jajwi je, siige näängrärüjisi, coo piiyepu krokeciye mete cabu liba, siige cine meebine näädürüjisi?

⁴⁰ Puma cita ca cane babo mope biname te teebibine cire jaajemepene egä, 'Cane toraca mene jijenininine weebibine, egä weene ngena jewenujiye cäme ai papa biname yepä täápume, peei lui weene cäme täápume jewenujiye.'

⁴¹ Puma cita ca cane cire jaajemepene cäme säwäci poto cidi biname bine egä, 'Acejiyame te weebibine niyya daremu cire icäripi. Äyebengäjinineye cäme bau ca ngälu cäco uliobo cabu me, lui amacelnäjäneji gyene Diyabolo piiyepu teeme mename seemo bime täápume.'

⁴² Cane loolomecewe ge, yepä weene deedei lica näängrärüjije. Cane niyemecewe ge, weene niyye lica nääcärüjije.

⁴³ Cane ciitaca biname ge, weene lica nawablujije, weeme mete me lica nacanujije. Cane cuutacuta ge, weene cäbletääpe lica nasigrujije. Cane pita cama ge piiyepu krokeciye mete cabu jage, yepä weene lica näängrärüjije.'

⁴⁴ Piba teepi cebine cire najepesi egä, 'Yageyame, liba cine meebine loolomecewe nääpänujisi coo piiyepu niyemecewe coo ciitaca biname, cuutacuta biname, piiyepu pita cama biname, krokeciye mete cabu biname, siige cine piba meebine lica näätityärüjisi?'

⁴⁵ Cane teebibine cire jaajemepene egä, 'Weene liba cäme ai papa biname yepä ne ätityera cäco ituge, peei lui weene cebine ätityera cäco ituge.'

⁴⁶ Teepi siige niyyarage daremu ne cire jääpänepesi, lui iyeteta gyene; yepä conocäco biname, teepi cire jääpänepesi iyeteta ireclota ne."

26

Gläämu Jecijemige Yeesu ne Aglime

(Mareko 14:1-2; Luuka 22:1-2; Yoane 11:45-53)

¹ Yeesu liba teeme abiberäja mene bine epirimige, tabe teeme abiberäja bägrä bine jememige egä,

² "Weene umle gemi, egä neeneni bimu niinäce gaabe äsuplengta trii te liba pa yaanajepi, cane lui te Acejiyame bau ca tädujine biname me äbitujine, cebine piba pa nacitepesi biname bime ime cabu teepi cebine baarge uli cabu äbyecrame."

³ Puma cita ca modamoda iiwäreja biname piiyepu poto modamoda biname cina abasecretnige iiwäreja mope biname ngii Kayapa me mete cabu me.

⁴ Teepi mene jewenisi Yeesu ne ogä oomlaname siige budre me acitame.

⁵ Teepi jiiicisi egä, "Mine trii padare cabu gone jaawenusi, cije biname cina mibibine cubu me niwenininusi."

Magebi te Yeesu ne Oil ca Eganige Betaniya Cewe je

(Mareko 14:3-9; Yoane 12:1-8)

⁶ Yeesu Betaniya cewe jage yepä biname ngii Simona me mete cabu, lui te niinäce lepera pita cama ge.

⁷ Yeesu liba deedei cabu jage, yepä magebi te piba toclige mararage lengo oil cama, lui ne baborage daremu ca jaaletnusi. Tabe pui oil ne secanige karpu cabu, lui alabasta kula ca wawenäneji ge, siige epadurige Yeesu me mope cabu.

⁸ Abiberäja bägrä cina liba ai mule ne jepänisi, teepi claabe me äbitininisi, jiiicisi egä, "Ngeno me ai oil ne papa bepadurige?"

⁹ Miiji cire yaacanejsi babo daremu ca aletname, siige pui rarekaake owecumete biname bine cire yääcäranemejsil!"

¹⁰ Yeesu umle äbitige, teepi ngena täápume jiiicemisi, siige tabe jememige egä, "Weene ngeno me ai magebi ne jwiicetniniye, ngenecu mäpu me joweniniye? Tabe ai lui babo müjirage mule ne biiri jewenige cäme täápume."

¹¹ Owecumete biname cina iyeteta pa yaacrajepi weene cama, yepä cane weene cama iyeteta lica pagege lenaja.

¹² Tabe liba ai oil ca naganige cebine, tabe cäme tääpe ne beganige gape cabu me acitame.

¹³ Cane toraca mene jijenininine, egä Miiji Mene luma cirege iicema ai gawecewe cabu, teeme ngene apecname cirege iicema, tabe lui mule ne bii jewenige cäme täápume."

Yuuda Mene Jewenige Yeesu ne Awabame Budre täápume

(Mareko 14:10-11; Luuka 22:3-6)

¹⁴ Puma cita ca twelb abiberäja bägrä bime yepä te ngii Yuuda Isakariyota ädige modamoda iiwäreja biname bime bau me,

¹⁵ jejemige egä, “Weene cebine ngena näcäreniye, cane liba Yeesu jiwabininine weebibine?” Teepi teeti silba rarekaake ecnemisi, teebine ecärisi.

¹⁶ Puma cita ca Yuuda miijirage padare ne jirngige Yeesu ne teeme ime cabu acitame.

*Yeesu Teeme Abiberäja Bägrä cama Äsuplengta Deedei Erwige
(Mareko 14:12-21; Luuka 22:7-14, 21-23; Yoane 13:21-30)*

¹⁷ Trii padare puga ge Israela biname cina liba uutneca cäco buluduu bine yäärwäjimusi. Pui padare me niinäce bimu cabu abiberäja bägrä cina seclige Yeesu ne ätemlame egä, “Maane singi luma mäte cine äsuplengta deedei ne amacetnäjame mäame tääpume?”

¹⁸ Yeesu jejemige egä, “Äte naaclege pui yepä biname bau me babo cewe je, teebine jejepeye egä, ‘Abiberäja biname te jüicenige egä cäme budre padare mameta gyene atyaramta. Cane cäme abiberäja bägrä cama tädenine mäame mete me äsuplengta deedei äbitame.’”

¹⁹ Abiberäja bägrä cina jewenisi, Yeesu lipu jejemige. Teepi äsuplengta deedei ne emacetnäjisi.

²⁰ Liba mämleteca ge, Yeesu teeme twelb abiberäja bägrä cama adnatige deedei loolo me.

²¹ Teepi liba deedei äbitininisi, Yeesu jejemige egä, “Cane toraca mene jijenininine, weeme yepä te cebine pa nawabepi budre me aglime.”

²² Abiberäja bägrä cina ngenecu mäpu me äbitininisi, siige teepi yepäyepä teebine jegananisi egä, “Yageyame, cane lica.”

²³ Yeesu jejemige egä, “Laati te buluduu ne yiiglenutenige disi cabu cane cama, tabe sine pui biname.

²⁴ Cane lui te Acejiyame bau ca tädujine biname me äbitujine, Oogäräneji mene te lipu jüicenige, cane pepu budre äbitenine. Yepä lipu niiyarage gyene, lui te cebine nawabenige budre me, Acejiyame bau ca lui te tädujine biname me äbitujine. Pui biname tääpume müji cirege, tabe liba lica cire laplimleji.”

²⁵ Puma cita ca Yuuda Yeesu ne budre me awaba biname te jejige egä, “Abiberäja biname, cane lica.” Yeesu jejige egä, “Maane peese näte lui te jüicite egä, ‘Cane lica.’”

*Yeesu Teeme Abiberäja Bägrä cama Aareto ne Erwige
(Mareko 14:22-26; Luuka 22:15-20; 1 Korinito 11:23-25)*

²⁶ Teepi liba erwäjisi, Yeesu buluduu ne ecatige, Acejiyame ne eso ecärige, itrecige, abiberäja bägrä bine ecärimige, siige jejemige egä, “Ecateye, erweye. Ai lui cäme tääpe gyene.”

²⁷ Puma cita ca tabe kwäye ne ecatige waina niye cama, Acejiyame ne eso ecärige, siige teebibine ecärimige, jejemige egä, “Weene iyeta eneye.

²⁸ Ai lui cäme uudi gyene; klaje jecnenige Acejiyame lui kirece mene ituge jaji biname bine niyya cabu ca äsecrera; bucurage biname bime tääpume tapirenige teeme niyya mule bine iisibrecame.

²⁹ Cane toraca jijenininine weebibine, egä cane ingwe ca lica cirege waina niye ne nani, ngälu pui bimu cabu liba kirece waina niye ne weene cama cire yaanepene, mine liba cirege abasecrerna cäme Babe me puupu cabu cabucewe je.”

³⁰ Puma cita ca teepi uupera ne etangisi, siige äsige, eclige Olibi Uli podo cabu me.

*Yeesu piyepu Peteru
(Mareko 14:27-31; Luuka 22:31-34; Yoane 13:36-38)*

³¹ Yeesu abiberäja bägrä bine jejemige egä, “Page ai ciye cabu weene uucratnininie, cebine nabmaliniye, inge Oogäräneji mene te jüicenige egä, ‘Acejiyame te maamoi ire atwi biname ne eglenige budre me, siige maamoi tomi te maramara äbitenige.’”

³² Yepä cane liba budre cabu ca pa larpinantepene, cane piba weeme niinäce gaabe me Galilaya me pa lädepene.”

³³ Puma cita ca Peteru Yeesu ne jejige egä, “Ngänu gyene liba iyeta poto cina meebine abmala, yepä cane licarage naabmalenine meebine.”

³⁴ Yeesu jejige egä, “Cane toraca naajenine, egä ai ciye cabu paulo te ingwe ca ala sengenenige, maane niinäce nesae gääbu cebine nainenite.”

³⁵ Peteru jejige egä, “Ngänu gyene teepi cebine maane cama budre me agli, yepä cane meebine licarage naajenine.” Iyeta abiberäja bägrä cina cuta yepä mene jejanisi.

*Yeesu Irecu Ätumutige Getesemane je
(Mareko 14:32-42; Luuka 22:39-46)*

³⁶ Yeesu teeme abiberäja bägrä cama ädige cewe ngii Getesemane me. Puma tabe teebibine jejemige egä, “Ama adnatärineye, cane liba ädenine eeyeme irecu ätumutame.”

³⁷ Tabe teta cama aacanänige Peteru piyepu Jebedayo me neeneni bägrä bine. Yeesu babo ngenecu mäpu me äbitige.

³⁸ Tabe teebibine jääjänige egä, “Cane budre pana ngenecu mäpu gäne. Weene cane cama ireclota sinajänege.”

³⁹ Puma cita ca tabe matikäli padare abotäntige, oweowe ajarige gawe cabu me, irecu ätumutige egä, “Cäme Babe, liba miiji gyene, maane ai mäpu ne cäme bau ca iyebingti. Yepä maane cäme singi ne gone jaawenute, mäame singi ne jewenepi.”

⁴⁰ Puma cita ca tabe tacnenutige, abiberäja bägrä bine ute cabu äädäränige. Tabe Peteru ne jejige egä, “Nää, weene kokre lica gämi matikäli padare ireclota lenajame cane cama?”

⁴¹ Ireclota sinajänege irecu ätumutame, weene piba lica pagege atrametna apicetnära padare cabu. Weeme seemo cina singi gämi cäme singi ne wawename, yepä weeme tääpe cina kokre cäco gämi.”

⁴² Yeesu cuta cääri acnige irecu ätumutame. Tabe jüicige egä, “Cäme Babe, maane liba toraca singi gäte cane ai mäpu cabu lenajame, yoo siige mäame singi te läbitege.”

⁴³ Tabe liba tacne-nutige, tabe cääri teebibine ute cabu äädäränige. Teepi äblicäco ge irecu aasatäneji lenaja.

⁴⁴ Puma cita ca Yeesu teebibine cääri taabmalänige, nesae me ädige irecu ätumutame yepä mene iicemame.

⁴⁵ Tabe liba tacnenutige abiberäja bägrä bime bau me, tabe jääjänige egä, “Weene ute camu gämi. Diibe oocenäniye. Padare te biiri tatyaramtige, cane lui te Acejiyame bau ca tädujine biname me äbitujine, cebine ceerame conocono biname bime ime cabu me.

⁴⁶ Abujengäneye, biiri wääjene! Ire, lui biname te cebine nawabenige budre me aglime, tabe mameta gyene!”

Yeesu ne Joomlisi

(Mareko 14:43-50; Luuka 22:47-53; Yoane 18:3-12)

⁴⁷ Yeesu liba camu mene iicema cabu jage, Yuuda twelb abiberäja bägrä bime yepä te piba tatyaramtige. Modamoda iiwäreja biname piyepu poto Israela modamoda biname cina teta cama tityepimisi bucurage biname bine cubu turikä piyepu gabagaba cama.

⁴⁸ Yeesu ne budre me awabayame biname te cewecu ne bii bectige pui biname bime täापume egä, “Cane lui biname ne jetcnenine, peese nyene weene lui täापume singi. Joomlepeye!”

⁴⁹ Yoo siige, Yuuda liba tatyaramtige, tabe conocäco ädige Yeesu bau me, jejige egä, “Abiberäja biname, poode!” siige jetcni-ge teebine.

⁵⁰ Yeesu jejige egä, “Cäme biname, maane wata jeweni, maane ngena täापume tädite!” Puma cita ca lui biname cina Yuuda cama seclige, teepi Yeesu ne jewaclomtisi, kokrerage joomli-si.

⁵¹ Yeesu cama lui biname cina, teeme yepä te teeme cubu turikä ne suusuratige, iiwäreja mope biname me kaakesea bägrä me tablame ne iyeta jeläcnutige.

⁵² Yeesu jejige egä, “Isinglanti mäame turikä ne siiti bora, ingle laatibi cubu turikä ca larnginusi, teebibine cubu turikä te budre me yaaglecimuge.

⁵³ Nää, maane apu naangeninige, egä cane äblicäco gäne cäme Babe ne ätinera cebine ätityerame? Cane liba ätinera je, tabe piba taatu mage twelb mename seemo sange bine ätyepa cäme ätityera täापume.

⁵⁴ Yepä pepu liba äbita je, piba lipu toraca me page läbitepi, lui mene oogäräneji gyene, egä ai mule te miiji äbita.”

⁵⁵ Puma cita ca Yeesu biname bine jejemige egä, “Weene cubu turikä piyepu gabagaba cama naaclige cebine oomlaname epu pana, egä cane cubucubu biname gäne. Bimu gaabegabe cane iiwäreja mete cabu ladnatune, puga yaabiberäjimune, weene ngena name pi piba cebine lica noomlepeye.

⁵⁶ Yepä iyeta ai cina bäpletnäriige Acejiyame me mename biname bime oogäräneji mene cina toraca me äbitame.”

Piba taatu iyeta abiberäja bägrä cina teebine ebmalisi, siige uucratnige.

Yeesu Israela Mutre Biname bime Opo Gaabe je

(Mareko 14:53-65; Luuka 22:54-55, 63-71; Yoane 18:13-14, 19-24)

⁵⁷ Lui cina Yeesu ne joomlisi, teepi teebine ecanisi iiwäreja mope biname ngii Kayapa me mete me. Cotre abiberäja biname piyepu nuuja Israela modamoda biname cina uja piyeme biiri tabasecretnege.

⁵⁸ Peteru Yeesu ne cudecewe ca ingwe icwige iiwäreja mope biname me mete puutucu cabu me. Tabe puga kaakesea bägrä cama adnatige ireme, egä baa lipu äbitininisi iyeta ai mule cina Yeesu täापume.

⁵⁹ Modamoda iiwäreja biname piyepu iyeta mutre biname cina, teepi liga walya aitneja ne jirngisi Yeesu ne atraname budre täापume,

⁶⁰ yepä teepi äblicäco nuuja ne päpäna, ngänuge puu bucurage biname cina seclige teebine walya aitnejame. Ceräcerägääburage neeneni biname cina taaclige,

⁶¹ siige jiiçäsi egä, “Ai biname te itu jiiçepi egä, ‘Cane müüji gäne Acejiyame me iiwäreja mete ne iigarecame cuta nesae bimu cama cääri raranga-me.’”

⁶² Iiwäreja mope biname te abujängtige, Yeesu ne jejige egä, “Teepi meebine bii naitnisi. Määme nuuja daremü mene lica gyene?”

⁶³ Yepä Yeesu bojäcu enajige. Puma cita ca iiwäreja mope biname te cääri teebine jejige egä, “Ireclota Acejiyame me ngii cabu maane nijini, maane liba Keriso säte, Acejiyame me Bägrä.”

⁶⁴ Yeesu jejige egä, “Yoo, maane peega bii jiiçite. Yepä cane jijenininine weebibine, egä cane lui Acejiyame bau ca tädujine biname me äbitujine, ai padare cabu ca niinäce gaabe me weene cebine pa näpänepeye babo kokrerage Acejiyame me camu poto cidi ca adnatäneji piiyepu cuta cire näpänepeye, cane carbe cabu liba cire täinepene.”

⁶⁵ Puma cita ca iiwäreja mope biname te teemanu cäbletääpe ne idericige awabame, egä tabe Yeesu ne panyamete jepänige, siige jiiçige egä, “Tabe Acejiyame me ngii ne sabe bii jewenige. Mine nuuja singi lica gemi nuuja aitneja täapume. Weene siige peega biteciinjine, tabe lipu Acejiyame me ngii ne sabe jewenige.

⁶⁶ Weene lipu ngene jotwanininie teeme poto cidi me?” Teepi jejisi egä, “Tabe conocono biname gyene. Tabe müüji budre.”

⁶⁷ Puma cita ca teepi gije jecitisi teebine mote ca ätywame opo cabu piiyepu oororename. Poto cina teebine lakace cabu jidnanisi,

⁶⁸ jiiçisi egä, “See Keriso, baa maane nijini, egä laati te noororige meebine.”

Peteru Yeesu ne Jeinige

(Mareko 14:66-72; Luuka 22:56-62; Yoane 18:15-18, 25-27)

⁶⁹ Peteru Kayapa me mete puutucu je adnatäneji enajige. Puma cita ca yepä kaakesea ngulebägrä te toclige, teebine jejige egä, “Maane cuta peese näte nuuja, Yeesu Galilaya biname cama lui te waatnute.”

⁷⁰ Yepä Peteru biname bime sobe cabu jeinige, joiçige pui ngulebägrä ne egä, “Cane umle lica gäne maane ngena täapume jiiçenite.”

⁷¹ Puma cita ca tabe asatige caale grana gome me. Piba nuuja kaakesea ngulebägrä te Peteru ne jepänige, biname bine puma jejemige egä, “Ai biname te Yeesu Nasareta biname cama waatnuge.”

⁷² Peteru cääri jeinige, jiiçige egä, “Cane Acejiyame me ngii cabu jiiçenine, egä cane umle lica gäne peei biname.”

⁷³ Matikäli padare ingwe gaabe ca lui biname cina puga aclajuteji icrajige, seclige Peteru bau me, jejisi egä, “Toraca, maane peese näte teeme yepä. Määme tagepogogo te niwabininige, egä maane ten cama yepä ceweyame gäte.”

⁷⁴ Puma cita ca Peteru mene kokre cama jiiçige egä, “Acejiyame me ngii cabu cane jijenininine, egä cane umle lica gäne peei biname. Acejiyame niiya daremu näcärüge, cäme mene liba toraca lica.” Piba taatu paulo te ala sengenige.

⁷⁵ Peteru ngene jotwige, Yeesu lipu jejige egä, “Paulo te ingwe ca ala sengenenige, maane niinäce nesae gääbu cebine nainenite.” Peteru asatige, agli pana ele engenige.

27

Yeesu ne Pilato bau me Ecanisi

(Mareko 15:1; Luuka 23:1-2; Yoane 18:28-32)

¹ Krokerage iyeta modamoda iiwäreja biname piiyepu nuuja Israela modamoda biname cina mene jitransisi Yeesu ne budre me aglime.

² Teepi sea ca teebine jetäyisi, siige ecanisi Pilato bau me, lui Rooma gabmani babo biname ge pui gawe ne ire atwime.

Yuuda me Budre

(Apostolo 1:18-19)

³ Yuuda Yeesu ne budre me awabayame biname te liba iteciçige, egä Yeesu ne budre me bii jitransisi, tabe niiyarage asicnantige, peei teeti silba rarekaake bine ewecnimige, modamoda iiwäreja biname piiyepu nuuja modamoda biname bine ecärimige.

⁴ Tabe jejemige egä, “Cane niiya mule ne bii becnine, conocäco biname lipu bicärimininine budre me agli täapume.” Yepä teepi jejisi egä, “Cine ngeno me pa yaaratepesi. Määme mule gyene peei.”

⁵ Puma cita ca Yuuda rarekaake bine eyärimige iiwäreja mete cabu, ädige, ete aglotige.

⁶ Modamoda iiwäreja biname cina rarekaake bine etomlecmisi, jicisi egä, “Ingle naace popi ai rarekaake uudi me daremu gyene, peei name pi cotre gyene acraname, iiwäreja mete täöpume luma rarekaake yaacranimusi.”

⁷ Teepi mene jitrani, egä lui biname te disi bine gawe ca jaawenimuge, pui rarekaake ca teeme bau ca gawe ne jeletnisi idne biname bime gapecewe täöpume.

⁸ Ingle naace popi pui gawe ne lui uudi daremu rarekaake ca jeletnisi, peei name pi einenisi Uudi Gawe ca ngälu page ai taje.

⁹ Ai te ibibi äbitige Acejiyame me mename biname Yeremiya me mene cama egä, “Teepi teeti silba rarekaake bine ewadimisi, Israela biname cina luma ngälu me singi äbitinisi teebine daremu wawename,

¹⁰ siige pui rarekaake ca eei biname bau ca gawe ne jeletnisi, lui biname te disi bine jaawenimuge gawe ca, Yageyame te lipu cebine ituge jaji wawename.”

Pilato Yeesu ne Itemläjige

(Mareko 15:2-5; Luuka 23:3-5; Yoane 18:33-38)

¹¹ Yeesu Rooma gabmani babo biname Pilato me opo gaabe jeclajutige. Pilato Yeesu ne itemlige egä, “Nää, maane Israela biname bime mope biname gäte?” Yeesu jejige egä, “Maane peega bii jüicite.”

¹² Modamoda iiwäreja biname piyepu nuuja Israela modamoda biname cina liba teebine jeitnäjisi, tabe nuuja mene lica.

¹³ Puma cita ca Pilato jejige egä, “Nää, maane lica näätēcijenige, meebine lui naaitnäjenisi?”

¹⁴ Yepä Yeesu daremu mene lica jewecnistige, peei name pi Pilato mage călu te jitige.

Pilato Yeesu ne Budre me Jitrani

(Mareko 15:6-15; Luuka 23:13-25; Yoane 18:39-19:16)

¹⁵ Israela biname cina liba kāmäge gaabegabe äsuplengta trii ne jaawenusi, piba Rooma gabmani babo biname te krokeciye mete cabu ca yaasatuge yepä biname ne, teepi lui täöpume birige singi.

¹⁶ Peeirage padare cabu krokeciye mete bora biname puga ge ngii Baraba, lui täöpume biname cina baborage umle.

¹⁷ Biname cina liba tomi yootisi, Pilato itemlimige egä, “Weene singi cane lui ne asatame krokeciye mete cabu ca, Baraba ne coo nää Yeesu ne, Keriso ca lui ne einenisi.”

¹⁸ Pilato apu naace popi itemlimige, ingle tabe umle ge, egä modamoda iiwäreja biname cina naace popi Yeesu ne secanisi teeme bau me, ingle teepi teebine ire patre eglisi.

¹⁹ Pilato liba adnatäneji enajige atrana puupu cabu, teeme coga te piba mene jityepige egä, “Gone nuuja gwidape ne jaawenute peei conocăco biname täöpume, ingle cane wama cabu mage cewe boocanane temiji pi.”

²⁰ Modamoda iiwäreja biname piyepu nuuja Israela modamoda biname cina biname bine tii jewenanemisi Pilato ne jajime tabe Baraba ne asatame Yeesu ne budre me aglime.

²¹ Siige Pilato itemlimige egä, “Ai neeneni cabu ca weene singi gemi cane laati ne isatinine?” Teepi jejisi egä, “Baraba ne!”

²² Pilato teebibine itemlimige egä, “Cane piba ngena jewenenine Yeesu täöpume, Keriso ca lui ne einenisi?” Teepi iyeta jicisi egä, “Teebine baarge uli cabu jibyecreye!”

²³ Pilato jejemige egä, “Ngena name pi? Tabe ngena niya ne ituge wawena?” Yepä biname cina mage ala abayaninisi egä, “Baarge uli cabu jibyecreye!”

²⁴ Pilato jepänige, egä ai lui niyarage me äbitenige, cije cubu te läpletnutuge, siige tabe niye siitige, ime äcisäjiige biname bime opo gaabe, jüicige egä, “Cane yageyame lica gäne ai biname me budre täöpume. Peei lui weeme bau sine.”

²⁵ Iyeta biname cina gigri ala tabayaninisi egä, “Cine piyepu cime bägrăwale cama, cine temi yageyame teeme budre täöpume. Cine te cirege daremu acata teeme budre name pi!”

²⁶ Puma cita ca Pilato Baraba ne sisatige, cubu biname bine jejemige Yeesu ne adnane, siige jityepige baarge uli cabu äbyecrame.

Rooma Cubu Biname cina Yeesu ne Ätutena pana Jewenanisi

(Mareko 15:16-20; Yoane 19:2-3)

²⁷ Pilato me cubu biname cina Yeesu ne ecanisi Pilato me mete opo gome me. Teepi ala tesoglicmisi teta cama lui yepä sange cubu biname bine, siige teepi Yeesu ne jewaclomtisi.

²⁸ Teepi teeme căbletăäpe bine jürecimisi, ududi căbletăäpe ca esigrisi ätutename, egä tabe mope biname gyene.

²⁹ Teepi pägepäge seeasea ne jemle-maltisi krauni täöpume, siige teeme mope cabu ecitisi. Teeme camu potu ime cabu suru ecărisi, siige kokorare ca ipednanemisi teeme opo gaabe

je. Teepi ai ne ätutena pana jewenisi, egä tabe babo mope biname gyene. Puma cita ca teepi jewablisi teebine, jejisi egä, “Sebore Israela biname bime mopeyame!”

³⁰ Teepi teebine mote ca ityewäjisi, lui suru ne ecitisi teeme ime cabu, pui ca eglisi mope gome.

³¹ Teepi liba ätecitinisi teebine apu ätutena pana wawename, ududi cäbletääpe jüremutisi, teemerage cäbletääpe ca esigrisi, siige ecanisi baarge uli cabu äbyecrame.

Yeesu ne Baarge Uli cabu Jibyecrisi

(Mareko 15:21-32; Luuka 23:26-43; Yoane 19:17-27)

³² Teepi liba äsige, gaabegabe je Simona Kurene cewe biname ne jepänisi, jejisi Yeesu me baarge uli ne acaname, siige tabe ecanige.

³³ Teepi atyarige cewe ngii Gologota me, lui me aboclomta egä ‘Mopekaake Cewe’.

³⁴ Puga teepi Yeesu ne caapocapo waina niye ecärisi nanime, lui traci gwidape cama alengläciteji teeme pita diibe ceerame, yepä mite agli ingwe gaabe ca tabe singi lica nanime.

³⁵ Teepi teebine baarge uli cabu jibyecrisi. Puma cita ca teepi matimati kula cabu teeme ngii bine yoogärimisi, piba yiisabäjemisi pui kula bine umle äbitame, egä teepi lipulipu Yeesu me cäbletääpe bine abelename.

³⁶ Peei ingwe ca teepi puga adnatäriige, Yeesu ne ire jetwisi.

³⁷ Teeme mope gome me mene ne ecitisi teeme budre inge poto cidi me egä, AI LUI YEEU SINE, ISRAELA BINAME BIME MOPE BINAME.

³⁸ Piba teepi neeneni cubucubu biname bine baarge uli cabu jääbyecrisi Yeesu me wajwa je, nuuja te camu poto ca, nuuja te säwäci poto ca.

³⁹ Laatibi teebibine ääsuplengäjänisi, teepi mope akocnäjinisi, Yeesu ne jisädanisi.

⁴⁰ Teepi jüicisi egä, “Maane peese näte, iiwäreja mete ne lui te yügarecenite, cuta cääri nesae bimu cama erange-nite. Maane miiji äbiti, maane liba Acejiyame me Bägrä gäte. Täini baarge uli cabu ca!”

⁴¹ Modamoda iiwäreja biname, cotre abiberäja biname piyepu nuuja modamoda biname cina teebine cuta pipu jisädanisi,

⁴² jüicisi egä, “Tabe nuuja biname bine miiji tewenanemumi, yepä tabe äblicäco teemämu miiji äbita. Cije tabe Israela mope biname lica gyene? Tabe liba baarge uli cabu ca täinenige, cine piba teebine jitrungenisi.

⁴³ Tabe teeme ngene atwanena bicranige Acejiyame bau me, piyepu teeme Bägrä ca ainenige. Yoo siige mine jääpänesi, egä Acejiyame liba singi teebine miiji wawename.”

⁴⁴ Piyepu peei neeneni cubucubu biname, lui bine teeme gome jääbyecrisi, teepi cuta pepu jejananisi teebine.

Yeesu me Budre

(Mareko 15:33-41; Luuka 23:44-49; Yoane 19:28-30)

⁴⁵ Bimu duusa me krokeciye te cewe ne iyeta icwabige, siige nesae awa pepu enajige.

⁴⁶ Piba mämle bim u cabu Yeesu mage ala abayige egä, “Eeli, Eeli lama sabatani.” Peei lui egä, “Cäme Acejiyame, cäme Acejiyame, maane ngeni me cebine nägyite?”

⁴⁷ Poto biname lui cina aclajuteji puga ge, jitecijisi, jüicisi egä, “Tabe Eliya ne ala tesoglecenige.”

⁴⁸ Teeme yepä te piba taatu tuuwamige, waarpopale pana gwidape ne yüglenutige caapocapo waina niye cabu, suru ca jigadige, siige cabu me ewepäntige tabe nanime.

⁴⁹ Poto cina jüicisi egä, “Cäro, mine jääpänesi, egä Eliya liba tädenige teebine miiji wawename.”

⁵⁰ Yeesu cääri mage ala abayige, ceräcerägäabu buuwe mope bine yiisabimige, siige teeme ireclota ecäriige.

⁵¹ Iiwäreja mete cabu Acejiyame me puupu ne lui cäbletääpe te jilyengenige biname bime puupu cabu ca, pui cäbletääpe te äderäriige cabu ca ngälu gawe me. Ocneja puga ge, modamoda kula cina äplegicininisi,

⁵² gape cina iitnetnäjinisi, siige bucurage Acejiyame me biname laatibi budre, teepi tarpineräjininisi ireclota me.

⁵³ Teepi teeme gape bine sebmalmisi. Yeesu liba budre cabu ca tarpinantige, teepi piba Yerusalemä me eclige, puga aboclomäjininisi bucurage biname bime bau me.

⁵⁴ Cubu mope biname piyepu teeme ingwe gaabe biname laatibi Yeesu ne ire jetwisi, liba jepänisi ocneja ne piyepu iyeta ngena cina äbitininisi, teepi mage wälu äbitininisi, jüicisi egä, “Tabe toracarage Acejiyame me Bägrä gyene.”

⁵⁵ Puga ge bucurage magebi cudecewe ca ire. Teepi Yeesu cama Galilaya probins cabu ca seclumi teebine ätityerame.

⁵⁶ Teeme sigu cabu Mariya Magadala cewe magebi piyepu Yakobu Yoosepa naabime mage ngii Mariya cuta Jebedayo me coga.

*Yeesu ne Gape cabu Ecitisi**(Mareko 15:42-47; Luuka 23:50-56; Yoane 19:38-42)*

⁵⁷ Liba mämeteca ge, yepä dogwe biname ngii Yoosepa te Arimatea cewe cabu ca piba tatyaramtige. Tabe cuta nuuja Yeesu me abiberäja bägrä ge.

⁵⁸ Tabe Pilato bau me ädige Yeesu me budrekaake tääpume ätinerame. Pilato jejemige budrekaake Yoosepa ne ceerame,

⁵⁹ siige tabe budrekaake ne baarge uli cabu ca sitrungamtige, kirece bulubulu cäbletääpe ca tope etnige,

⁶⁰ ecanige, teeme Yoosepa me tääpume lui gape ne cemacema tuurumesi baborage kula bora, pui ngalebora me ecitige. Tabe baborage kula ne epetrenjäjige gape grana armi tääpume, siige acnenutige.

⁶¹ Mariya Magadala cewe magebi piyepu nuuja Mariya, teepi puga adnatäneji aanajige, opire gape cabu mage.

Awamuta Biname cina Gape Gome

⁶² Nuuja bimu cabu lui Sabade bimu ge, modamoda iiwäreja biname piyepu Parisea sigu biname cina Pilato bau me eclige,

⁶³ jejisi egä, “Babo biname, cine ngene jotwinago, egä pui walya biname liba ireclota senajumi, tabe tiicumigä, ‘Cane nesae bimu ingwe gaabe ca budre cabu ca pa larpinantepene.’

⁶⁴ Jejemi gape ne cängena awamutame nesae bimu ngalebora, piba teeme abiberäja bägrä cina äblicäco otni teebine ero ca acatame, puma cita ca jajanename egä, ‘Tabe budre cabu ca tarpinantige.’ Apu liba äbita je, teeme ai ingwe ca walya te niyarage cirege teeme niinäce walya cabu ca.”

⁶⁵ Pilato jejemige egä, “Awamuta biname bine ewademeye, naaclege, gape ne jewamut-eye, weene lipu müji gemi.”

⁶⁶ Siige, teepi Pilato ne ebmalisi, eclige gape gome me. Teepi gape grana cabu lui kula ne etengäcitis, awamuta biname bine puga sebmalmisi.

28*Yeesu Budre cabu ca Arpinantige**(Mareko 16:1-10; Luuka 24:1-12; Yoane 20:1-10)*

¹ Sabade bimu me ingwe ca Sande baani te liba seclitige, Mariya Magadala cewe magebi piyepu nuuja Mariya teepi aacliche gape ängrärame.

² Puma cita ca babo kokre ocneja te tädige. Yageyame me mename seemo te cabucewe ca täinige, kula ne epetrenjäjige Yeesu me gape grana cabu ca, siige pui kula papa cabu adnatige.

³ Teeme opo paamlepamle pana ge, cäbletääpe lui toraca bulurage ge.

⁴ Awamuta biname cina babo wälu äbitininisi, jelonecmige, siige gawe cabu itrametnemege budre biname pana.

⁵ Mename seemo te magebi bine jaajige egä, “Wälu gone läbituye. Cane umle gäne, egä weene Yeesu ne jirngeniye, baarge uli cabu lui ne tibyecrumesi.

⁶ Tabe ama lica gyene. Tabe harpi-nantige, tabe lipu itu tiicumigä. Siclege, jepäneye tabe luma ätwitänegi senajumi.

⁷ Äte watata iclege, teeme abiberäja bägrä bine jejemepeye, egä tabe budre cabu ca barpinantige, siige Galilaya me pa lädepi teeme niinäce gaabe me; teepi teebine puma pa jääpänepesi. Ngene gone jitrimaluge, cane lipu bii jijine.”

⁸ Magebi cina watatarage gape ne sebmäläsi. Teepi nuuja poto wälu nuuja poto gege ge, siige uuwamäsi Yeesu me abiberäja bägrä bine jajime, ngena te bäbitige.

⁹ Puma cita ca Yeesu teebibine opopa jaawenige, jaajige egä, “Poode weeme bau me!” Teepi teeme bau me taacliche, ernge gome joomläsi, siige ngenecu müji cama teebine jepänäsi.

¹⁰ Yeesu jaajige egä, “Wälu gone läbituye! Iclege, cäme naane igane bine jejemeye teepi Galilaya me otnime. Teepi cebine puma pa näpänepesi.”

Awamuta Biname bine Aitneja Mene

¹¹ Magebi cina liba gaabe cabu jage, lui cubu biname cina gape ne jewamutisi, teeme poto cina äcnäridge babo cewe me, modamoda iiwäreja biname bine jejemisi, ngena te bii bäbitige.

¹² Modamoda iiwäreja biname cina nuuja modamoda biname bine cama yepä cewe me abasecretninige mene atraname. Teepi baborage rarekaake cubu biname bine ecäremisi,

¹³ jejemisi egä, “Weene müiji biname bine jajanenname egä, ‘Teeme abiberäja bägrä cina ciiye seclige, teeme budrekaake ne ero ca becatisi, cine liba ute ge.’

¹⁴ Siige Pilato liba ai poto cidi me ätecija je, cine te teebine müiji ngenecu me pa jaawenepesi. Weene nuuja singi lica gemi ngenecu mäpu äbitame.”

¹⁵ Awamuta biname cina rarekaake ewadimisi, jebenisi, teepi lipu jejemisi. Ai mene ne Israela biname cina ecenanenisi ngälu page pisi nyene.

*Yeesu Aboclomtige Teeme Abiberäja Bägrä bime bau me
(Mareko 16:14-18; Luuka 24:36-49; Yoane 20:19-23; Apostolo 1:6-8)*

¹⁶ Lebin abiberäja bägrä cina eclige podo cabu me Galilaya je, Yeesu liiyeme tejemumi teepi otnime.

¹⁷ Teepi liba teebine jepänisi, siige ngenecu müiji me äbitininisi, yepä poto cina toracarage lica jitrungisi, egä Yeesu sine.

¹⁸ Yeesu teeme gome tädige, jejemige egä, “Cebine iyeta kokre ituge ceera cabucewe je piiyepu gawecewe cabu.

¹⁹ Naaclege, iyeta maramara gawe biname bine jewenemepeye cäme abiberäja bägrä tääpume. Niye ca jicisäjemepeye Babe, Bägrä, Aceji Seemo teeme ngii cabu,

²⁰ piiyepu ebiberäjemepeye teepi ätecijame iyeta cane lui tääpume itu jijananipene. Cane weene cama pagege iyeta padare ngälu ai padare me ngälugaabe me.” Mene ngälu peese.

MAREKO ME MIIJI MENE

Yoane Niiye ca Āciseja Biname

(Matayo 3:1-12; Luuka 3:1-18; Yoane 1:19-28)

- ¹ Ai lui Miiji Mene me agedna gyene Yeesu Keriso, Acejiyame me Bāgrā poto cidi me.
- ² Acejiyame me mename biname ngii Isaya yoogāruji, Acejiyame te teeme Bāgrā ne lipu jejuji egā,
“Cane cāme mename biname ne cire täätyepene määme niināce gaabe me määme tääpume gaabe amacetnājame.
- ³ Tabe daapo taatu cewe cabu babo tagepogogo ca cire jiičepi egā, ‘Gaabe ne emacetnājeye Yageyame tääpume, weeme mule bine conocāco jewenemeye teeme otni tääpume.’”
- ⁴ Isaya lui mene soogāruji, toraca me ābitige Yoane liba taboclomtige daapo taatu cewe cabu, biname bine niiye ca jicisājemige piyepu mene jejananemige egā, “Weene weeme niiya mule cabu ca atatrōngārineye, cane piba weebibine niiye ca jicisājeninine, siige Acejiyame te weeme niiya mule bine piba pa yisibrecnepi.”
- ⁵ Bucurage biname babo cewe Yerusalema ca piyepu nuuja maramara cewe Yuudea probins ngalebora ca totni-nisi Yoane ne āteciyame. Teepi teeme niiya mule bine liba jewabudnājimisi, piba Yoane te teebibine niiye ca jicisājemige Yoridana baduge cabu.
- ⁶ Yoane me cābletāape lui kamela me ngāli ca wawenāneji ge piyepu tabe kamela tääpe ca wawenāneji baagi ca asigrāneji ge ibi cabu. Tabe sesi pana gwidape bine yārngājimuge piyepu uri niiye bine yānājimuge.
- ⁷ Tabe biname bine jejananemige egā, “Cāme ingwe ca lui biname te pa tādepi, tabe baborage gyene, cane matikāli gāne. Cane ibibi lica gāne teeme ernge gwidape seea iibirame.
- ⁸ Cane weebibine niiye ca jicisājeninine, yepā tabe te weebibine pagege Aceji Seemo ca āciseja.”

Yeesu me Niiye ca Āciseja piyepu Apicetnāra

(Matayo 3:13-4:11; Luuka 3:21-22; 4:1-13)

- ⁹ Yoane lui padare cabu biname bine mene jejananemige, Yeesu piba tādige babo cewe Nasareta cabu ca lui Galilaya probins ngalebora, siige Yoane te teebine niiye ca jicisājige Yoridana baduge cabu je.
- ¹⁰ Tabe liba niiye cabu ca tarpatige, tabe piba taatu jepānige, cabucewe te iitnige, cuta jepānige Aceji Seemo te lipu tainige gimāe ele pana teeme papa cabu me.
- ¹¹ Puma cita ca tagepogogo te cabucewe ca tādige egā, “Maane lui cāme ngenecurage Bāgrā gāte. Cane baborage ngenecu miiji gāne määme tääpume.”
- ¹² Piba watata Acejiyame me Seemo te Yeesu ne jityepige daapo taatu cewe me.
- ¹³ Tabe puma enajige footi bimu cama, siige Satani te teebine puga epicetnerājige. Glunubora girigale gwidape cuta puga ge, yepā Acejiyame me mename seemo cina seclige teebine ātityerame.

Yeesu Poto Cibubade Biname bine Ala Tesoglecmige

(Matayo 4:12-22; Luuka 4:14-15; 5:1-11)

- ¹⁴ Yoane ne liba niināce krokeciye mete bora me ecitisi, pui ingwe gaabe ca Yeesu piba ādige Galilaya probins cabu me, siige Acejiyame bau ca lui Miiji Mene, tabe puma jejananemige.
- ¹⁵ Tabe apu jiičige egā, “Ingle Acejiyame te lui padare ne secituji, bii tatyaramtige, siige mameta gyene tabe biname bine waadena, pei name pi atatrōngārineye weeme niiya mule cabu ca, Miiji Mene ne jitrungeye.”
- ¹⁶ Yeesu liba otnetnājige Galilaya sawa ligi ta, tabe jāpānige nanigane wāsi bine ngii Simona piyepu Andrea. Teepi net bine yisabājemāsi sawa cabu je, ingle teepi cibubade biname ge.
- ¹⁷ Puma cita ca Yeesu jaajige egā, “Ayo, siclege cane cama otnime. Cane jiwenenine weebibine biname bine waadename cāme bau me, epu pana weene lipu niināce cibū bine toomlājenanemumeye.”
- ¹⁸ Piba taatu teepi sebmalemāsi teeme net bine, siige Yeesu cama aalige.
- ¹⁹ Teepi liba matikāli padare ujige, Yeesu cuta piba nuuja nanigane wāsi bine jāpānige. Teepi lui Jebedayo me bāgrā ge, ngii Yakobu piyepu teeme igane Yoane. Teepi teeme poo cabu net bine iswārenemujāsi.
- ²⁰ Piba taatu Yeesu teebibine cuta ala taasoglicige. Teepi teeme babe Jebedayo piyepu teeme kaakesea bāgrā bine poo cabu sebmalemāsi, siige Yeesu cama aalige.

Yeesu Niiya Cable ne Iyecräjige
(Luuka 4:31-37)

²¹ Yeesu teeme abiberäja bägrä cama Kaprenauma cewe me atyaramtige. Nuuja Sabade cabu Yeesu abasecretna mete cabu me ädige, siige giye abacitige biname bine abiberäjame.

²² Teepi mutäcäco äbitininisi teeme abiberäja mene name pi, ingle tabe epu ebiberäjimige, lui me conocäco pisi nyene abiberäjame lica cotre abiberäja biname bime pana, lui cina nuuja biname bime ngene atwanena bine yaawadäjemusii.

²³ Puma cita ca biname te tabacitige, lui me trupa ngalebora puga ge niiya cable. Tabe niiya ala abayige, jüicige egä,

²⁴ “Yeesu Nasareta ceweyame, maane nää singi ngena wawename cime täápume? Maane nää tädite cibibine sabe wawename? Cane umle gäne maane laasi näte, maane Acejiyame me conocäcorage Bägrä gäte.”

²⁵ Puma cita ca Yeesu niiya cable ne kokre cama jejige egä, “Maane bojä naagege. Tasati teeme trupa cabu ca!”

²⁶ Cable te teebine kokre cama itretnutige, niiya ala isatige, siige tasatige teeme trupa cabu ca.

²⁷ Iyeta biname cina mutäcäco äbitininisi, siige ätemläjinisi egä, “Ai lui baa ngena gyene? Nää kirece abiberäja gyene? Teeme conocäco pisi nyene niiyaniya cable bine mene jajanename, siige teepi jätēcijusi teebine.”

²⁸ Teepi piba taatu Yeesu ne idre watata jecananisi Galilaya probins cabu iyeta poto ta.

Yeesu Bucurage Biname bine Miiji me Jewenimige
(Matayo 8:14-17; Luuka 4:38-41)

²⁹ Yeesu teeme abiberäja bägrä cama abasecretna mete ne ebmalisi. Cuta Yakobu naabi Yoane teta cama ge. Teepi eclige, ebäcnisi Simona Andrea naabime mete cabu me.

³⁰ Puga Simona me gite molyege gebale cama ätwitäneji ge, siige teepi piba taatu Yeesu ne umle jwenisi teeme poto cidi me.

³¹ Tabe teeme bau me ädige, ime gome jwoomlige, owejängtige. Gebale te teebine obmalige, siige tabe teebibine mogobi jwenimige.

³² Pui mämleteca, bimu me äpula ingwe gaabe ca Yeesu bau me sewadimisi iyeta pita biname bine piiyepu laati bage niiyaniya cable cama,

³³ pui name pi bucurage biname cina pui babo cewe cabu ca tabasecretnige pui mete gaabe gome me, Yeesu luma enajige.

³⁴ Yeesu miiji me jwenimige bucurage maramara pita cama biname bine piiyepu bucurage niiyaniya cable bine iyecräjemige teeme trupa cabu ca. Tabe padare lica ecärimige niiyaniya cable cina mene iicemame teeme poto cidi me, ingle teepi umle ge, egä tabe laasi nyene.

Yeesu Mene Jejananemige Galilaya Probins cabu je
(Luuka 4:42-44)

³⁵ Nuuja bimu krokerage baani te liba camu ge äpli, Yeesu Simona naabibime mete ne ebmalige, taatu cewe me ädige, puma irecu ätumutige.

³⁶ Simona piiyepu teta cama lui biname, teepi teebine jirngisi ngälu jepänisi,

³⁷ siige jejisi egä, “Iyeta biname cina meebine näärngenisii.”

³⁸ Yepä Yeesu jejemige egä, “Biiri naclege poto mametamameta cewe me cane cuta puma mene jajanename, ingle cane bucurage biname bime täápume tädujine ai gawecewe cabu me.”

³⁹ Puma cita ca tabe otnetnäjige iyeta Galilaya gawe cabu ta. Tabe lui cewe me läduge, tabe puma abasecretna mete cabu mene jaajemuge piiyepu niiyaniya cable bine yääyecräjemuge.

Yeesu Miiji me Jewenige Lepera Pita Biname ne
(Matayo 8:1-14; Luuka 5:12-16)

⁴⁰ Yepä lepera pita biname te tädige Yeesu bau me, kokorare ca ääpednutige teeme opo gaabe je, ewejanige egä, “Maane liba singi gäte, maane miiji gäte cebine pita cäco me wawena.”

⁴¹ Yeesu babo owecu äbitige teeme täápume, siige ime uutige, joomlige, jejige egä, “Cane singi gäne. Maane pita cäco äbitil!”

⁴² Piba taatu lepera pita te teebine ebmalige, siige tabe miiji me äbitige.

⁴³ Yeesu teebine kokre cama umle mene jejige, piba ingwe ca jityepige teeme mete me.

⁴⁴ Tabe apu jejige egä, “Näätēcijege, gone nuuja biname ne umle jaawenute ai poto cidi me, yepä maane conocäco ädēpi iiwäreja biname bau me tabe mäame tääpe ne awatnejame.

Cuta Moose me Cotre ibi maane ecanepi teeme bau me cibi ne tabe pui ca Acejiyame ne iivärejame biname cina piba umle äbitame, egä maane siige miiji gäte.”

⁴⁵ Yepä tabe liba ädige, tabe gije abacitige ai mule poto cidi me idre acenename iyeta poto ta, peei name pi Yeesu äblicäco ge otni nuuja cewe me biname bime irewale je. Miiji päta tabe biname cäco cewe cabu yaanajuge, siige biname cina iyeta poto ca twaatninsi teeme bau me.

2

*Yeesu Miiji me Jewenige Tääpe Nuuja Poto Budre Biname ne
(Matayo 9:1-8; Luuka 5:17-26)*

¹ Nesae bimu ingwe gaabe ca Yeesu acnenutige Kaprenauma cewe me, siige biname cina itecijemige, egä tabe mete cabu jage.

² Puma cita ca epu bucurage biname cina tabasecretnige teeme bau me, egä mete te tapanige, cuta nuuja puupu lica ge gaabe gome. Yeesu liba teebibine Acejiyame me mene jejemige,

³ piba fooa biname cina tatyarige, waaku cabu pita biname ne secanisi, lui me nuuja poto tääpe budre ge.

⁴ Teepi äblicäco ge Yeesu mameta me otni bucurage biname name pi, peei name pi mete toro cabu me jegelisi, toro cabu bora ne jewenisi Yeesu me tuumeji, siige pui bora cabu ca waaku ne siyini, pita biname te lui cabu ätwtäneji ge.

⁵ Yeesu liba jepänimige, egä teepi babo ätrunga cama gemi, tabe jejige pita biname ne egä, “Cäme biname, maane kälyä gäte määme niija mule cabu ca.”

⁶ Poto cotre abiberäja biname cina puga adnatäreji icrajige. Teepi ngene jotwaninisi egä,

⁷ “Ai biname te baa ngena name pi ai mene jüicenige? Tabe Acejiyame me ngii ne sabe jewenenige, ingle nuuja te äblicäco gyene biname ne kälyä wawena teeme niija mule cabu ca yepä Acejiyame taatu.”

⁸ Piba taatu Yeesu teeme ngenecu bora umle äbitige, teepi lipu ngene jotwaninisi, siige tabe jejemige egä, “Weene ngena name pi peei ngene jotwaniniye?”

⁹ Lui gyene plowa iicana ai pita biname ne jajime egä, ‘Maane kälyä gäte määme niija mule cabu ca’ coo ‘Arpinanti, abujängti, määme waaku ne ecati, siige äte ädi.’

¹⁰ Yoo siige, cane lui Acejiyame bau ca tädujine biname me äbitujine, cane lui gwidape ne ama jewenenine, weene pui cabu ca opo nawatniniye, egä cäme conocäco pisi nyene biname ne kälyä wawename teeme niija mule cabu ca.” Puma cita ca tabe pui pita biname ne jejige egä,

¹¹ “Cane meebine naajenine, arpinanti, abujängti, waaku ne ecati, määme mete me ädi.”

¹² Piba taatu tabe arpinantige, teeme waaku ne ecatige, asatige biname bime irewale je. Teepi mutäcäco äbitinini, Acejiyame ne eso ecärisi, jüicisi egä, “Cine apu mule ne niinäce lica ituge päpäna.”

*Yeesu Leebi ne Ala Tesoglicige
(Matayo 9:9-13; Luuka 5:27-32)*

¹³ Yeesu cääri acnenutige Galilaya sawa ligi me. Bucurage biname cina teeme bau me seclige, siige tabe teebibine ebiberäjimige.

¹⁴ Puma cita ca tabe liba ädige, yepä täks rarekaake uutecrena biname ne jepänige ngii Leebi Alaba me bägrä. Tabe adnatäneji enajige täks rarekaake uutecrena mete cabu. Yeesu teebine jejige egä, “Maane tädi cane cama otnime.” Leebi abujängtige, teta cama ädige.

¹⁵ Ai mule ingwe gaabe ca Yeesu deedei äbitige Leebi me mete cabu. Puga ge cuta bucurage täks rarekaake uutecrena biname piyepu cotre atropengäja biname. Teepi Yeesu piyepu teeme abiberäja bägrä cama deedei erwäjisi. Ai lui cälu te äti lica gyene, ingle bucurage biname cina iyeta padare cabu Yeesu cama waatni-nusi.

¹⁶ Puma cita ca cotre abiberäja biname, lui cina Parisea sigu biname gemi, teepi liba jepänisi, egä Yeesu deedei äbitige täks rarekaake uutecrena biname cama piyepu cotre atropengäja biname cama, teepi teeme abiberäja bägrä bine jejemisi egä, “Tabe baa ngena name pi pepu biname cama deedei erwäjimige?”

¹⁷ Yeesu liba ai mene itecijige, tabe jejemige egä, “Lui biname cina miiji birige, teepi singi lica dokta täapume. Yepä lui cina pita cama birige, teepi singi dokta täapume. Cane lica tädujine ala asoglecame lui biname cina apu jaangemuge, egä teepi conocäco gemi; yepä cane conocono biname bine ala asoglecame tädujine.”

*Ätemleja Deedei Ärwäja cäco Lenaja poto cidi me
(Matayo 9:14-17; Luuka 5:33-39)*

¹⁸ Yepä padare cabu Yoane niije ca äciseja biname me abiberäja bägrä piyepu Parisea sigu biname cina deedei ärwäja cäco icrajige Acejiyame ne awejename. Puma cita ca poto

biname seclige Yeesu bau me, itemlisi egä, “Ngena name pi Yoane me abiberäja bägrä piyepu Parisea biname bime abiberäja bägrä cina deedei ärwäja cäco yaacrajuge, yepä mäame abiberäja bägrä cina deedei yäärwäjimusi?”

¹⁹ Yeesu jejemige egä, “Atejäclmuta soriyomu ne liba yaaclitusi, mamye rooriye me binamewale cina deedei ärwäja cäco lica yaacrajuge, tabe liba pisi nyene teta cama.

²⁰ Yepä padare te pa tädepi, liba mamye rooriye ne pa yaacatepesi, piba teepi deedei cäco pagege lenaja teeme owecu name pi.”

²¹ Yeesu cuta jejemige egä, “Nuuja te kirece äciseja cäco cäbletääpe pläsu ne sasa cäbletääpe bora cabu lica yääswäruge. Tabe liba pepu jaawenuge, siige cäbletääpe ne liba jääcisäjuge, pui kirece pläsu te lacalomluge, siige sasa cäbletääpe ne jääsegläruge. Puma cita ca kirece pläsu te läwälutuge sasa cäbletääpe cabu ca, siige bora te babo läbituge.

²² Piiyepu nuuja te lica kirece waina niye ne yaapaduruge gouti tääpe ca wawenäneji sasa ängära gwidape cabu. Tabe liba yaapaduruge, kirece waina niye te pui sasa ängära gwidape ne yääpluge, ingle tuutnecuge, siige waina niye te gawe me lapaduruge piiyepu ängära gwidape te sabe läbituge. Pätä kirece waina niye miiji apadura kirece ängära gwidape cabu.” Ai neeneneni ngene ca agli mene Yeesu naace popi jejemige, tabe singi biname cina umle äbitame, egä teepi liba singi Acejiyame me mule ne oomlaname, teepi piba äblicäco sasa saarewale bime mule bine äcwetna.

Ätemleja Sabade Cotre poto cidi me

(Matayo 12:1-8; Luuka 6:1-5)

²³ Sabade bimu cabu Yeesu teeme abiberäja bägrä cama wiiti calwacupi ngalebora lui gaabe, pui cabu ädige. Teepi liba eclige, abiberäja bägrä cina wiiti mope bine ecrecimisi, ime cabu mälwä bine jimlecäjemisi, kuu bine erwäjemisi.

²⁴ Puma cita ca Parisea sigu biname cina Yeesu ne jejisi egä, “Maane ire, mäame abiberäja bägrä cina baa ngena name pi jewenenisi lui cotrerage gyene Sabade bimu cabu wawename?”

²⁵ Yeesu teebibine jejemige egä, “Egäsu weene ituge acnema, Daawida ngena jewenuji, tabe piiyepu teta cama lui biname teepi liba cubrowe icrajuji deedei cäco.

²⁶ Tabe abacituji iiwäreja mete cabu. Puga ge Acejiyame täापume ceereji deedei. Puma cita ca iiwäreja mope biname ngii Abita pui deedei Daawida ne ecäruji. Tabe erwuji cuta ecärimuji teta cama lui biname bine. Ai lui Daawida te cotre ne jetropangtuji, ingle pui deedei loolo lui cotre ge iyeta biname bime täापume yepä lica iiwäreja biname bime täापume.”

²⁷ Puma cita ca Yeesu jejemige egä, “Acejiyame te biname bine niinäce jewenimuji, piba ecituji Sabade bimu ne teeme diibe oocaname. Tabe lica niinäce ecituji Sabade bimu ne, piba jewenimuji biname bine Sabade cotre bine äcwetname.

²⁸ Cane lui te Acejiyame bau ca tädujine biname me äbitujine, cane cuta Yageyame gäne Sabade bimu täापume. Cäme conocäco pisi nyene iicaname, ngena ne miiji wawena ai bimu cabu.”

3

Biname Lui me Nuuja Poto Ime Duudemu Ge

(Matayo 12:9-14; Luuka 6:6-11)

¹ Yeesu cääri abacitige abasecretna mete cabu me. Yepä biname puga ge, lui me nuuja poto ime duudemu ge.

² Poto biname cina puma iregalerage icrajige päpäname, egä Yeesu liba ai biname ne miiji jewenenige Sabade bimu cabu, ingle teepi singi ge ingle ne päpäname teebine aitname, egä tabe cotre ne bii jetropangtuge.

³ Yeesu pita biname ne jejige abujengtame niinäce gaabe me otnime,

⁴ piba biname bine itemlimige egä, “Mime cotre te lipu njenininige Sabade bimu cabu ngena wawename, miiji mule wawename coo niija mule wawename; biname ne ätityerame ireclota me coo teeme ireclota ne sabe wawename?”

Yepä teepi nuuja mene lica ge.

⁵ Yeesu claabe cama teeme bau me ire acitige piiyepu tabe ngenecu mäpu ge, ingle teepi owecu cäco ge pui biname täापume. Puma cita ca tabe teebine jejige egä, “Mäame ime tuuti.” Tabe teeme ime uutige, siige cääri miiji me äbitige pui ime te.

⁶ Puma cita ca Parisea sigu biname cina äsecrärige, piba taatu abasecretnige Heroda me sigu biname cama, siige teepi mene jitranisi Yeesu ne budre me aglime.

Bucurage Biname Sawa Ligi je

⁷⁻⁸ Yeesu abiberäja bägrä cama ädige Galilaya sawa ligi me. Bucurage biname cina Galilaya probins cabu ca teebine ingwe icwisi. Bucurage biname cina cuta seclige babo

cewe Yerusalema ca piyepu nuuja cewe cabu ca Yuudea probins ngalebora piyepu Idumea probins cabu ca cuta Yoridana baduge nuuja poto doro ca piyepu cewe maramara cabu ca, lui gemi Turo piyepu Sidona modamoda cewe mameta. Teepi naace name pi totninisi, ingle teepi ituge ätecija, Yeesu ngena mule bine tewenimumi.

⁹ Biname bucurage name pi Yeesu abiberäja bägrä bine jejemige poo te amacetnäjäneji lenajame teeme tääpume tabe acenutame piba teepi teebine lica äjwejeräja.

¹⁰ Ingle tabe bucurage biname bine miiji me tewenanemumi, peei name pi iyeta pita biname cina lätyepəcäjininusi Yeesu bau me teeme tääpe ne oomlaname.

¹¹ Lui biname bime trupa cabu niyaniya cable puga ge, teepi liba Yeesu ne jääpänusi, teepi teeme opo gaabe je yaatrametnemuge, ala labayaninusi egä, “Maane lui Acejiyame me Bägrä gäte.”

¹² Yepä Yeesu cable bine kokre cama jaajemuge egä, “Aitneja gone, egä cane laasi näne.”

*Yeesu Twelb Ätyepäneji Biname bine Jejäcrimige
(Matayo 10:1-4; Luuka 6:12-16)*

¹³ Yeesu puma cita ca podo cabu me jegelige, ala tesoglicmige, tabe lui biname tääpume singi ge, teepi siige eclige teeme bau me.

¹⁴ Tabe twelb bine jejäcrimige teta cama otnetnejame piyepu tabe teebibine ingwe ca ätyepame Miiji Mene jajanename

¹⁵ cuta niyaniya cable bine äyecrejame.

¹⁶ Age tema pui biname: Simona, Yeesu lui ne einige Peteru ca;

¹⁷ Yakobu piyepu teeme igane Yoane, Jebedayo me bägrä, Yeesu lui bine aainige Boargenes ca, peei lui egä, ‘Maadubi me bägrä’;

¹⁸ poto lui Andrea, Pilipo, Bartoloma, Matayo, Tooma, Yakobu Alapeus me bägrä, Tadeus, Simona Kanana sigu biname

¹⁹ piyepu Yuuda Isakariyota, lui te Yeesu ne budre me jewabuji.

*Yeesu piyepu Beelsebul, Satani ca Cuta Lui ne Einenisi
(Matayo 12:22-32; Luuka 11:14-23; 12:10)*

²⁰ Yeesu teeme mete me acenutige. Cääri bucurage biname cina abasecretmige teeme bau me, peei name pi tabe teeme abiberäja bägrä cama padare lica ge deedei äbitame.

²¹ Yeesu me inglewale cina liba itecijemige ai poto cidi me, teepi eclige teebine oomlaname, ingle biname cina jiiçisi egä, “Tabe buduma te bii joomlige.”

²² Poto cotre abiberäja biname lui cina Yerusalema ca itu seclumi, teepi apu jiiçisi egä, “Yeesu me trupa cabu pisi nyene niya cable bime mopeyame ngii Beelsebul. Tabe teeme kokre ca niya cable bine yääyecräjemuge.”

²³ Puma cita ca Yeesu teebibine tesoglicmige, ngena ca agli mene ca jejemige egä, “Satani te baa lipu yääyecräjemuge niya cable bine?”

²⁴ Nuuja gawe biname cina liba labelaninusi teemeteme cubu me, teepi watawata lapirininusi.

²⁵ Cuta yepä ingle te liba labelanuge teemeteme cubu me, pui ingle te lica birige lenaja.

²⁶ Yepä pana gyene, Satani piyepu tabe lui bine yaawadimuge teepi liba labelaninusi teemeteme cubu me, teeme Satani me kokre te peega lapiruge, siige tabe yaatramuge.

²⁷ Pätä laati te liba singi birige kokre biname me mete me abacita teeme gwidape bine waadename, tabe miiji niinäce teebine ätäya. Piba tabe labacituge teeme mete me, yaawadimuge teeme ngena yaacrajuge puma.

²⁸ Cane toraca mene jijenininine: biname cina liba lijaliya niya mule bine jaawenimusi coo lipu bucurage niyaniya mene jiiçemusi, teepi miiji gemi kälyä äbitame pui niya cabu ca.

²⁹ Yepä laati te liba Aceji Seemo poto cidi me niyaniya mene jiiçemuge, pui niya cabu ca tabe kälyä lica läbituge, ingle pui lui iyeteta niya gyene.”

³⁰ Yeesu ai mene naace popi jiiçige, ingle poto biname cina lipu jiiçisi egä, “Teeme trupa ngalebora pisi nyene niyarage cable. Pui te kokre yäacäruge tabe niya cable bine äyecrejame.” Teepi opo lica ewatnisi, egä Aceji Seemo name kokre gyene ai.

*Yeesu me Ingle Biname poto cidi me
(Matayo 12:46-50; Luuka 8:19-21)*

³¹ Yeesu me mage piyepu iganewale cina tatarige mete gome, Yeesu luma enajige. Teepi puutucu je jeclajutemige, mene jityepisi teeme bau me, egä teepi singi teebine päpäname.

³² Bucurage biname cina adnatäreji puga ge, Yeesu ne jewaclomtisi, siige teepi jejis egä, “Eei, mäame mage piyepu iganewale ete nemä puutucu je. Teepi singi mäame tääpume.”

³³ Yeesu jejemige egä, “Laatu nwene cäme mage piyepu laati bemi cäme naane igane?”

³⁴ Tabe piba ire acitanige biname bime cabu me, lui cina adnatäreji icrajige, teebine jewaclomtisi, siige jejemige egä, “Ire, age tema căme mage piyepu căme naane igane.

³⁵ Laati te liba Acejiyame me singi ne jaawenuge, tabe lui căme naane, căme igane, căme ngule, căme mage.”

4

*Ngene ca Agli Mene Kuu Gije Iisabeja poto cidi me
(Matayo 13:1-9; Luuka 8:4-8)*

¹ Yeesu căări gije abacitige abiberäjame Galilaya sawa ligi je. Bucurage biname cina abasacetrnige, teebine jewaclomtisi, tabe peei name pi poo cabu acenutige, adnatige, siige poo ne jityepántisi. Biname cina sawa ligi je icrajimige.

² Yeesu teebibine ngene ca agli mene ca ebiberäjimige bucurage mule poto cidi me. Tabe apu jiičige egä,

³ “Iteciјinege! Yepä biname te ädige calwacupi me kuu gije bine iisabejame.

⁴ Egäcäro tabe kuu gije bine yisabäjemige, poto cina gaabe cabu itrametnemige, siige ele cina seclige, erwäjimisi.

⁵ Poto kuu gije cina itrametnemige kula gawe cabu. Gawe puma pape gyene. Ingle gawe poone lica gyene, peei name pi gije cina watata tuupletnärige.

⁶ Yepä, bimu te liba nuunu täbitige, gije bine ebemimige, siige jedacromtemige, ingle teeme braju gawe ngalebora me lica ebäcnisi.

⁷ Cuta poto kuu gije cina itrametnemige pägepäge mete bora. Pägepäge cina uutinisi, gije bine jetäyemisi, siige kuu lica jepänimisi.

⁸ Yepä poto kuu gije cina itrametnemige miiјirage gawe cabu, tuupletnärige, uutinisi, jeciretnemige, siige kuu jepänimisi. Poto cina lui jepänimisi teeti kuu, poto cina lui siksti kuu, poto cina lui yepä hanred kuu.

⁹ Weeme liba tablame piti nemi ätecijame, weene iteciјinege umle äbitame.”

*Agesa Ingle Yeesu Biname bine Yaabiberäjemuge Ngene ca Agli Mene ca
(Matayo 13:10-17; Luuka 8:9-10)*

¹⁰ Yeesu taatu liba enajige, poto lui cina teta cama waatne-tnäјinusi, teepi abiberäja bägrä cama seclige teeme bau me, siige itemlisi ngene ca agli mene ne aboclomtame.

¹¹ Yeesu jejemige egä, “Weeme bau me ituge aboclomta, Acejiyame te lipu biname bine waadena, yepä lui cina camu ge teeme mule oomlana, teeme bau me ngene ca agli mene taatu ituge iicema.

¹² Peei name pi toraca gyene, Acejiyame me mename biname lipu ituge iicana teeme poto cidi me egä,

“Teepi puu jääpänusi cane ngena jaawenune,
yepä teepi umle lica ngena tääpu myene.

Cuta teepi puu yäateciјemuge cane lui mene jiičune,
yepä teepi opo lica yaawatnusi.

Peei name pi teepi lica tatatrongärininusi

Acejiyame te teebibine kälyä wawename teeme niya mule cabu ca.”

*Yeesu Ngene ca Agli Mene ne Eboclomtige Kuu Gije Iisabeja poto cidi me
(Matayo 13:18-23; Luuka 8:11-15)*

¹³ Puma cita ca Yeesu teebibine jejemige egä, “Weene liba lica ngene ca begliye căme mene kuu gije iisabeja poto cidi me, weene cuta piba ngene ca lica peglemepeye poto ngene ca agli mene bine? Yoo siige, cane eboclomtenine.

¹⁴ Lui biname te kuu gije bine yisabäjemuge, tabe Acejiyame me Mene jaajanemuge.

¹⁵ Lui kuu gije cina yaatrametnemuge gaabe cabu, pui lui eei biname bime pana gemi, lui cina mene liba yäateciјemuge, piba Satani te täduge, yäasecräremuge pui mene bine.

¹⁶ Lui kuu gije cina yaatrametnemuge kula gawe cabu, pui lui eei biname bime pana gemi, lui cina liba Miiјi Mene yäateciјemuge, siige gege cama watata joomlusi.

¹⁷ Yepä teepi matikäli padare taatu jäätrungusi, ingle teepi epu pana braju căco gije liiyepu. Teepi liba mäpu ne jääpänusi coo teeme poto cidi me liba jiičetrnäјemusi, ingle teepi pui Miiјi Mene ne jäätrungusi, teepi piba taatu teeme ätrunga bine yaabmalicmusi.

¹⁸ Lui kuu gije cina yaatrametnemuge pägepäge mete cabu, pui lui eei biname bime pana gemi, lui cina Miiјi Mene yäateciјemuge,

¹⁹ yepä mäpu ngene atwanena cina ai gawe ireclota poto cidi me cuta singi rarekaake piyepu poto gwidape tääpume, teepi peei Mene ne jätäyusi pägepäge seeasea pana, siige kuu căco läbituge pui mene te.

²⁰ Lui kuu gije cina yaatrametnemuge miiјirage gawe cabu, pui lui eei biname bime pana gemi, lui cina Miiјi Mene yäateciјemuge, opo yaawatnusi, siige teeme cabu kuu

jaawenimuge, poto bime cabu teeti kuu, poto bime cabu siksti kuu, poto bime cabu yepä hanred kuu.”

*Ngene ca Agli Mene Lampa poto cidi me
(Luuka 8:16-18)*

²¹ Yeesu cuta nuuja ngene ca agli mene jejemige egä, “Biname te liba lampa ne jaabotuge, tabe diiba ca lica yäätrugäruge coo lica yaacituge dade lolebora me, yepä cabu je yaatecwantuge mete ne apaclerame.

²² Cuta pepu gyene, page biname bime bau ca ngena ämlitäneji gyene, pajecu me pagege äbita teeme täापume, piyepu page teepi lui mule umle lica gemi, teepi pagege umle äbita.

²³ Weeme liba tablame piti nemi ätecijame, weene itecijinege umle äbitame.”

²⁴ Yeesu cuta jejemige egä, “Weene ngena itecijinuge, weeme mope cabu eciteye. Weene luma ngälu yääcärımıye biname bine, weebibine cuta puma ngälu birige ceera, cuta poto cerämu weebibine birige ceera.

²⁵ Lui biname me umle pisi nyene, teebine cerämu ceera. Yepä lui biname umle cäco gyene, inge tabe singi lica gyene umle täापume, Acejiyame te teeme bau ca pa yaacatepi, teeme lui matikäli umle pisi nyene.

Ngene ca Agli Mene Gije Uutana poto cidi me

²⁶ Yeesu jejemige egä, “Apu gyene, Acejiyame te liba biname bine yaawadimuge. Yepä biname te kuu gije bine yiisabäjemuge teeme calwacupi cabu.

²⁷ Tabe ciye cabu ute waagruge, bimu cabu ireclota yaanajuge, cuta ciye je waagruge. Peei padare cabu gije cina täpletnäruge, siige luutinusi, yepä tabe umle lica birige, egä ai mule te lipu läbituge.

²⁸ Gawe te teemämu jaawenimuge gije bine uutaname, kuu wawename. Niinäce inge cina luutinusi, puma cita ca mope, siige ingwe ca kuu cina täsuge mope cabu ca.

²⁹ Kuu cina liba ngade läbitininusi, tabe inge bine jaacanimuge, inge ärucna padare te bii tatyaramtige.”

*Ngene ca Agli Mene Mastad Kuu Gije poto cidi me
(Matayo 13:31-32, 34; Luuka 13:18-19)*

³⁰ Yeesu jejemige egä, “Mine ngena mule ca yaatonärusi Acejiyame te biname bine lipu waadena? Mine pui mule ne lipu ngene ca agli mene ca yaaboclomtusi?”

³¹ Peei lui epu pana gyene mastad kuu gije, lui te matikälrage iyeta poto kuu gije bau ca. Liba jaacnuge gawe ngalebora me,

³² täpletnutuge, luutuge, siige baborage läbituge iyeta calwacupi gije cabu ca. Tabe uli pana jaaguge, modamoda ciipe bine jaawenimuge, siige ele cina saacuge, mete bine pui uuwa cabu yaaranängjemusi.”

³³ Bucurage apu pana ngene ca agli mene ca Yeesu biname bine ebiberäjemige. Teepi luma ngälu ibi ge umle äbitame, tabe pui ibi jejananemige.

³⁴ Tabe biname bine ngene ca agli mene taatu ca jejananemige, yepä tabe liba teeme abiberäja bägrä cama taatu enajige, tabe piba iyeta pui ngene ca agli mene bine eboclomäjimige teeme bau me.

*Yeesu Sawa cabu Buuwe ne Jiibige
(Matayo 8:23-27; Luuka 8:22-25)*

³⁵ Pui bimu mämleteca Yeesu abiberäja bägrä bine jejemige egä, “Biiri naclege, yuuresi sawa nuuja poto doro me.”

³⁶ Puma cita ca abiberäja bägrä cina biname bine sebmalmisi, acetnäriige poo cabu me, Yeesu luma enajige, siige teepi teta cama abyemärinisi. Nuuja poo cina teebibine ingwe icwemimisi.

³⁷ Puma cita ca kokre buuwe te titwige, uule kuu cina tacetneräjininisi poo cabu me, siige poo te mameta ge niye ca apana.

³⁸ Yeesu lui waapo jage ute, mope pila papa cabu jage. Puma cita ca abiberäja bägrä cina teebine elotnantisi, jejisi egä, “Abiberäja biname, maane nää owecu lica gäte, egä mine mameta gemi abumetna?”

³⁹ Siige tabe abujängtuge, kokre cama buuwe ne jejiige piyepu uule kuu bine jejemige egä, “Siige! Bojä jiginege!” Puma cita ca buuwe te äjutige, siige bulubulu mataru te enajige.

⁴⁰ Tabe jejemige egä, “Miiji lica gyene weene wälu äbita. Nää, weene cäro camu gemi cebine ätrunga?”

⁴¹ Teepi mage wälu me äbitininisi, ätemläjinisi egä, “Baa laasi nyene ai biname? Buuwe piyepu uule cina teeme mene jitecijisi.”

5

*Yeesu Miiji Jewenige Niiya Cable cama Biname ne
(Matayo 8:28-34; Luuka 8:26-39)*

¹ Yeesu teeme abiberäja bägrä cama yuurige Galilaya sawa nuuja poto doro me Gerasene gawe cabu me.

² Tabe liba poo cabu ca arpatige, tabe opopa eyige biname cama, lui tasatige kula waja cabu ca, budre biname bine luma gape yaacranimusi. Pui biname me trupa ngalebora puga ge niyarage cable,

³ siige tabe kula waja cabu lui gape gemi, pui cabu yaanajuge. Nuuja te äblicäco ge teebine seea ca ätäya.

⁴ Bucurage gääbu teeme ernge piiyepu ime ituge ätäya ayana ca piiyepu seea ca, yepä iyeta padare cabu tabe seea bine jijweclimuge, ayana bine yaagabicmuge. Nuuja te kokre lica ge teebine iibaname.

⁵ Tabe iyeta padare, ciye bimu, kula waja gape cabu ta piiyepu podo cabu ta diibe cäco waatnetnäjuge. Tabe niiya ala yaasatuge, kula ca däcu läcäranuge.

⁶ Tabe cudecewe pana ge, Yeesu ne liba jepänige, siige uuwamige teeme bau me, teeme opo gaabe je kokorare ca ääpednu-tige.

⁷⁻⁸ Yeesu jejige egä, "Niiya cable, ai biname cabu ca tasati!" Tabe babo ala abayige egä, "Yeesu, caburage Acejiyame me Bägrä, maane singi ngeno mäte cäme täápume? Cane Acejiyame me ngii cabu naawenanenine, gone sabe nawenute cebine."

⁹ Yeesu itemlige egä, "Maane ngii laasi näte?" Tabe jejige egä, "Cane ngii lui Sange gäne, ingle cine bucurage gemi."

¹⁰ Tabe Yeesu ne ewejanige egä, tabe teebibine lica yääyecräjemuge peei gawe cabu ca.

¹¹ Baborage ngeerangera blome tomi puga ge teeme mameta, podo wajwa cabu deedei täápume yuunguretnäjemi.

¹² Siige niiya cable cina Yeesu ne ewejanisi egä, "Cibibine nityepini blome bime trupa bora äbäcname,"

¹³ siige Yeesu jejemige teepi otnime. Puma cita ca niiya cable cina täsecrärige pui biname me trupa cabu ca, siige blome bime trupa cabu me ebäcnisi. Pui blome tomi lui neenenen tausen pana ge, podo wajwa ta uuwamitnige, sawa cabu me uupletnärige, siige abumetnige.

¹⁴ Blome ire atwi biname cina uucratnige, idre ecenanisi babo cewe cabu me piiyepu teeme gome lui poto cewe piti nemi. Biname cina eclige päpäname, egä ngena te bäpletnutige.

¹⁵ Teepi liba atyarige Yeesu bau me, teepi jepänisi biname ne, lui te niinäce niiya cable bine sewadenanemumi. Tabe puga ge adnatäneji, cäbletääpe asigräneji ge, müjirage ngena atwanena cama ge, siige teepi wälu me äbitininisi.

¹⁶ Lui cina jepänisi ai mule ne, teepi biname bine jejananemisi, ngena te bäpletnutige niiya cable cama biname täápume piiyepu blome bime täápume.

¹⁷ Siige teepi Yeesu ne jejisi teeme gawe ne abmalame.

¹⁸ Yeesu liba biiri poo cabu me acenutige, niiya cable cina lui biname ne secenenanumesi, tabe Yeesu ne jejige teta cama otnime.

¹⁹ Yepä Yeesu äbwäricige, jejige egä, "Acnenuti mäame binamewale bime bau me, jejemepi, mäame Yageyame te ngena miiji bii naawenige piiyepu tabe lipu owecu ge mäame täápume."

²⁰ Pui biname te siige abyemäricige, Ten Modamoda Cewe gawe cabu ta otnetnäjige, jejananemige, Yeesu ngena ituge wawena teeme täápume. Iyeta biname cina mutäcäco äbitininisi.

*Yairus me Ngulebägrä piiyepu Pita cama Magebi
(Matayo 9:18-26; Luuka 8:40-56)*

²¹ Yeesu sawa ne yuurige, poo cabu ca arpatige, siige bucurage biname cina teeme bau me tabasecretnige, teebine jewaclomtisi sawa ligi je.

²² Yepä rooriye te cuta tädige ngii Yairus, lui yepä babo biname gyene pui cewe me abasecretna mete täápume. Tabe Yeesu ne liba jepänige, ajarige teeme opo gaabe ernge gome,

²³ ewejanige egä, "Cäme matikäli bägrä budre mameta gwene. Tädi mäame ime acitame teeme papa cabu me teebine miiji wawename, siige tabe piba ireclota ne jepäninige."

²⁴ Puma cita ca Yeesu teta cama ädige. Bucurage biname cina teebine ingwe icwisi, siige jidudnecäjisi iyeta poto ta.

²⁵ Puga ge cuta yepä magebi, lui te uudi apira pita cama ge twelb kämäge ngalebora.

²⁶ Tabe magerage mäpu cabu waanajenanepi, liba maramara dokta bime bau me waatnanepi. Tabe puu iyeta teeme rarekaake bine yaaswemepi dokta bime bau me, yepä teepi äblicäco ge teebine ätityera, yepä teeme pita te baborage me läbitepi.

²⁷⁻²⁸ Tabe Yeesu potu cidi me ituge ätecija, siige ngeni jotwanige egä, "Cane liba teeme cäbletääpe taatu joomlenine, cane pama miiji äbitenine." Puma cita ca tabe biname bime sobe cabu oclige Yeesu me kaake potu cidi ca,

²⁹ teeme cäbletääpe ne joomlige, siige pita te piba taatu apirige. Tabe asicnantige egä, "Cane miiji bäbitine!"

³⁰ Yepä Yeesu piba taatu umle äbitige, egä kokre te basatige teeme cabu ca. Tabe biname bime sobe cabu atatrongtige, jejemige egä, "Cäme cäbletääpe ne laati te bii noomli-ge?"

³¹ Teeme abiberäja bägrä cina jejisi egä, "Maane jepänenemite biname cina lipu näädudnecäjini, peei name pi maane ngeni me pepu nijinige, egä laati te cäme cäbletääpe noomlige."

³² Yepä Yeesu ire acitanige biname bime bau me umle äbitame, egä laati te cebine bii noomlige.

³³ Siige pui magebi, lui te umle ge Yeesu ngena jebenige teeme täapume, tabe wälu piyepu alonca cama toclige Yeesu bau me. Tabe teeme opo gaabe je ernge gawe me ajarige, jejige iyeta ngena cina bäbitinini teeme täapume.

³⁴ Yeesu jojige egä, "Bägrä, mäame ätrunga te meebine miiji bii naawenige. Äte, maane ocli ngenecu poode cama. Mäame pita te ingwe ca meebine lica pa noomlepi."

³⁵ Yeesu liba magebi cama camu mene iicema cabu, Yairus me mete cabu ca mene secanisi teeme bau me egä, "Mäame bägrä siige budre gwene. Maane ngeni me cerämu jewagrijenite abiberäja biname ne maane cama otnime."

³⁶ Yeesu liba itecijige, tabe Yairus ne jejige egä, "Wälu gone, miiji ätrunga taatu."

³⁷ Siige puma cita ca tabe ädige teeme mete me. Tabe nuuja biname ne padare lica ecärige teta cama otnime yepä Peteru piyepu Yakobu teeme igane Yoane cama.

³⁸ Teepi liba atyarige, Yeesu jepänige, biname cina lipu papa me äbitinini, ele jolwisi.

³⁹ Tabe mete cabu abacitige, biname bine jejemige egä, "Weene ngena guugla gemi? Weene ngena ele gemi? Bägrä budre lica gwene, tabe ute gwene."

⁴⁰ Yepä teepi Yeesu ne ngange ecwänisi, siige tabe teebibine puutucu me isemige. Piba tabe abacitige bägrä me mage, babe piyepu teeme nesae abiberäja bägrä cama puupu cabu me, bägrä luma ätwitäneji ge.

⁴¹ Tabe ime gome jwoomlige, jojige egä, "Talita kuum," lui egä, "Matikäli ngulebägrä, arpinanti!"

⁴² Tabe piba taatu arpinantige, siige gije abacitige otnetnejame. Tabe lui twelb kämage ge. Lui cina ai mule ne jepänisi, teepi mutäcäco äbitinini.

⁴³ Yeesu kokre cama mene jejemige egä, "Gone biname bine jaajanemuye ai potu cidi me," yepä tabe jejemige bägrä ne deedei ceerame.

6

Yeesu ne Nasareta Cewe je Jigyisi

(Matayo 13:53-58; Luuka 4:16-30)

¹ Yeesu teeme abiberäja bägrä cama pui cewe ne sebmalige, teemerge cewe me tac-nenutige.

² Sabade bimu cabu tabe gije abacitige abiberäjame abasecretna mete cabu. Bucurage biname puga ge teeme mene itecijemige. Teepi mutäcäco äbitinini, jicisi egä, "Ai biname te luga tabiberäjumi iyeta ai? Tabe luma cita ca ai mule ne secatumi? Tabe lipulipu kokre cama mule bine jewenenemige?"

³ Egäsu tabe pui mete raranga biname gyene, Mariya me bägrä, Yakobu Yoose Yuuda Simona naabibime naane gyene. Teeme ngulewale aga icrajenanemige mine cama." Puma cita ca teepi teebine jigysi.

⁴ Yeesu teebibine jejemige egä, 'Acejiyame me mename biname ne yaacatusi iyeta potu ta, yepä lica teemerge cewe cabu je, teemerge inglewale cina piyepu teeme mete biname cina."

⁵ Tabe puu teeme ime aacitige nesae biname bime papa cabu me, siige teebibine miiji me jewenimige, yepä tabe bucurage ciitaca mule äblicäco ge wawena puma, inge biname cina ätrunga cäco ge.

⁶ Tabe mutäcäco ge teeme ätrunga cäco mule name pi.

Yeesu Teeme Twelb Abiberäja Bägrä bine Jityepäjemige

(Matayo 10:5-15; Luuka 9:1-6)

Puma cita ca Yeesu otnetnäjige mameta cewe gaabegabe ta, biname bine ebiberäjimige.

⁷ Tabe pui twelb abiberäja bägrä bine tesoglicmige, neeneni neeneni jityepäjemige kaakesea wawename. Tabe kokre ecärimige niija cable bine äyecrejame,

⁸ piyepu jejemige egä, “Weeme otnetneja cabu je weene nuuja gwidape bine gone yaawadimuye yepä otnetneja suru taatu bine. Gone yaawadimuye deedei coo diiba coo rarekaake.

⁹ Weene ernge gwidape asigräripeye, yepä gone yaawadimuye tuwängle cäbletääpe.”

¹⁰ Tabe cuta jejemige egä, “Weene liba lui cewe me naacluge, inajininuge biname cama, lui cina iwadininusi teeme mete me, ngälu weene pui cewe ne liba saabmaluye.

¹¹ Yepä lui cewe cabu biname cina liba weebibine lica jiwablininusi coo lica jitecijnusi, teeme tuuwe bine jääglubäjemuye weeme ernge cabu ca, siige saabmaluye pui cewe ne. Teepei ai cabu ca umle läbitininusi, egä teepi pagege niija daremu ne päpäna.”

¹² Siige puma cita ca abiberäja bägrä cina otnetnäjinisi, biname bine jejananemisi, egä teepi miiji teeme niija mule cabu ca atatrongärame.

¹³ Teepei bucurage niija cable bine iyecräjemisi biname bime trupa cabu ca piyepu pita biname bine oil ca eganimisi, siige teepi miiji äbitininisi.

*Yoane Niije ca Äciseja Biname me Budre
(Matayo 14:1-12; Luuka 9:7-9)*

¹⁴ Galilaya probins mope biname Heroda te itecijige Yeesu poto cidi me, ingle teeme ngii babo äbitige. Poto biname cina jicisi egä, “Yeesu lui Yoane niije ca äciseja biname sine. Acejiyame te teebine budre cabu ca yaarpinantepi, pui name pi teeme kokre pisi nyene ciitaca mule bine wawenecame.”

¹⁵ Poto cina jicisi egä, “Taba lui Elija sine,” poto cina egä, “Taba lui Acejiyame me yepä mename biname gyene, epu pana teeme sasa mename biname cina liiyepu.”

¹⁶ Yepä Heroda liba itecijige Yeesu poto cidi me, tabe jüicige egä, “Taba Yoane sine, cane lui tääpume jaajemepene mope äläcnutame. Taba te tacnenutumi ireclota me.”

¹⁷⁻¹⁸ Heroda apu jüicige, ingle tabe teeme igane Pilipo me coga Herodiyas ne itu waacatepi. Yoane Heroda ne itu jaajananepe egä, “Peei lui conocono gyene maane mäame igane me coga uutecra.” Puma cita ca Herodiyas te Heroda ne jaajepi Yoane ne oomlaname, seea ca ätäyame, krokeciye mete cabu me acitame, siige Heroda te teeme singi ibi jaawenepi.

¹⁹ Herodiyas Yoane ne jäämugetnepi teeme mene name pi. Taba singi ge teebine budre me acitame, yepä tabe äblicäco ge Heroda name pi.

²⁰ Heroda lui wälu ge Yoane tääpume, ingle tabe opo yaawatnepi, egä Yoane lui miijirage conocäco biname gyene, tabe siige cängenarage ire jaatwepi. Taba singi ge teeme mene ätecijame, ngänuge tabe puu ngenecu mäpu me läbitanuge, tabe liba jäätecijanuge.

²¹ Siige Herodiyas te miiji padare ne jääpänepi, Heroda liba soriyomu ne jaawenepi teeme ärngi bimü tääpume. Taba ala taasoglecmepi teeme ingwe gaabe ca lui modamoda biname bine, cubu mope biname bine piyepu nuuja Galilaya ngii biname bine.

²² Teepei liba deedei cabu jage, Herodiyas me beecma bägrä te piba tabacitige, giire jewäjige, siige Heroda piyepu soriyomu biname bime ngenecu gege jewenimige. Heroda ngulebägrä ne jojige egä, “Naji, maane singi ngeno mäte? Cane nääcärenine.

²³ Cane Acejiyame me ngii cabu naajenine, egä maane liba ngena tääpume nätinärenite, cane nääcärenine, ngänu gyene puu cäme gawe cebocebo.”

²⁴ Puma cita ca ngulebägrä te oclige mage ne ätemlame egä, “Cane ngena tääpume itinärenine?” Mage te jojige egä, “Jejepi Yoane niije ca äciseja biname me mope tääpume.”

²⁵ Ngulebägrä te piba taatu acnenutige Heroda bau me, jejige egä, “Cane singi gäne maane cebine watata ceerame Yoane niije ca äciseja biname me mope. Pleito cabu secanepi cäme bau me päpäna tääpume egä tabe budre.”

²⁶ Ai mene te puu Heroda ne ngenecu mäpu me jewenige, yepä tabe äblicäco ge ngulebägrä me singi ne kaake me wawename, ingle tabe lui mene jojige soriyomu biname bime opo gaabe je.

²⁷ Siige tabe piba taatu yepä awamuta biname ne jityepige Yoane me mope ne äläcnutame, acaname. Awamuta biname te ädige krokeciye mete me, Yoane me mope ne jeläcnutige,

²⁸ pleito cabu secanige soriyomu puupu cabu me, siige ngulebägrä ne ocärige. Ngulebägrä te ocärige teeme mage ne.

²⁹ Yoane me abiberäja bägrä cina liba itecijemige ai poto cidi me, teepi seclige, teeme budrekaake ne ecatisi, siige gape cabu me ecitisi.

*Yeesu Faib Tausen Biname bine Engärimige
(Matayo 14:13-21; Luuka 9:10-17; Yoane 6:1-14)*

³⁰ Yeesu me ätyepäneji biname cina täcnärige teeme bau me, jejisi, iyeta teepi ngena ituge wawena piyepu abiberäja.

³¹ Puma cita ca Yeesu teebibine jejemige egä, "Mine min taatu naclege taatu cewe me. Weene puma matikolä padare ngene poccineye." Tabe apu naace popi jejemige, ingle bucurage biname cina iyeta padare cabu teeme bau me twaatninusi, peei name pi tabe teeme abiberäja bägrä cama padare lica ge deedei äbitame.

³² Siige teepi taatu eclige poo gaabe biname cäco cewe me.

³³ Yepä bucurage biname cina jepänimisi, teepi liba abymärinisi, siige teepi opo ewatnimisi teebibine. Puma cita ca teepi iyeta maramara cewe cabu ca ernge ta uuwamitnige, niinäce puupu ne joomlisi, Yeesu lui puupu cabu me teeme abiberäja bägrä cama ädige.

³⁴ Teepi liba atyarige, Yeesu poo cabu ca arpatige, siige baborage biname tomi ne edäriige. Tabe baborage owecu jeglemige teebibine, ingle teepi epu pana icrajige maamoi liiyepu, lui bime ire atwi biname lica gyene. Siige tabe gije abacitige teebibine abiberäjame bucurage mule poto cidi me.

³⁵ Liba mämle bimu me äbitige, abiberäja bägrä cina seclige Yeesu bau me, jejisi egä, "Siige mämle gyene, cuta ai lui biname cäco cewe gyene,

³⁶ peei name pi ai biname bine jityepimi mameta calwacupi cewe me piyepu maramara cewe me teepi deedei aletname."

³⁷ Yepä Yeesu jejemige egä, "Weene te deedei ecäremeye teeme loolo me." Teepi itemlisi egä, "Cije cine lipulipu teebibine engärenemisi? Mine liba singi gemi teebibine ngeerame, mine miiji neeneneni hanred silba rarekaake ca deedei aletna."

³⁸ Yeesu itemlimige egä, "Weeme lija buluduu gemi? Äte, naaclege päpäname!" Teepi jepänimisi, jejisi egä, "Cime faib buluduu gemi piyepu neeneneni cibi bumate gegi."

³⁹ Yeesu puma cita ca abiberäja bägrä bine jejemige biname bine abelename maramara tomi wawename siige adnaterame baace cabu,

⁴⁰ siige teepi maramara tomi cabu adnatäriige. Poto tomi lui fifti biname ge, poto cerämu ngälu yepä hanred oomlaname.

⁴¹ Puma cita ca Yeesu pui faib buluduu bine sewadimige neeneneni cibi cama, cabu me ire acitige, Acejiyame ne eso ecäriige, itrecimige, siige abiberäja bägrä bine ecärimige biname bine ceeraname. Tabe cuta pui neeneneni cibi bine jaabelanige biname bine ceeraname.

⁴² Teepi erwäjimisi, ngene jeglemige.

⁴³ Abiberäja bägrä cina etomlicmisi lui deedei cibi cina cebo abamutinisi, jengärimisi, siige twelb diiba cina tapanininisi.

⁴⁴ Lui rooriye cina erwäjimisi, teepi faib tausen ge.

*Yeesu Niye papa cabu Otnige
(Matayo 14:22-33; Yoane 6:15-21)*

⁴⁵ Piba taatu Yeesu abiberäja bägrä bine jejemige poo cabu acetnerame teeme niinäce gaabe otnime sawa nuuja poto doro me uuraname Betesaida cewe me, piba tabe pui padare cabu biname bine jityepijemige.

⁴⁶ Yeesu liba biname bine yewo jewenanemige, pui ingwe gaabe ca tabe ädige podo cabu me irecu ätumutame.

⁴⁷ Liba ciye tumlige, poo lui sawa cunäcäpu jage, Yeesu teeme taatu doro cabu jage.

⁴⁸ Tabe liba jepänige, egä teeme abiberäja bägrä cina niyya ne bii jepänisi poo äwäca cabu, ingle buuwe te opoporage tipwäjige, tabe sewali mameta me teeme bau me ädige niyye papa cabu ta. Tabe singi ge teebibine äsuplengame,

⁴⁹ yepä abiberäja bägrä cina teebine jepänisi niyye papa cabu otni je. Teepi apu jengemige, egä dadrange ge, siige teepi niyya ala abayininisi.

⁵⁰ Teepi iyeta teebine jepänisi, siige babo wälu me äbitininisi.

Puma cita ca Yeesu teebibine jejemige egä, "Wälu gone läbitininuye. Cane säne."

⁵¹ Puma cita ca tabe poo cabu acenutige, siige buuwe te äjutige. Abiberäja bägrä cina mutäcäco äbitininisi temiji pi.

⁵² Teepi puu jepänisi, Yeesu buluduu piyepu cibi bine bucurage me lipu jewenimige, yepä teepi opo lica ewatnisi teeme kokre ne, ingle teeme ngene atwanena tuuberage ge.

*Yeesu Pita Biname bine Miiji Jewenimige Genesareta Gawe cabu
(Matayo 14:34-36)*

⁵³ Yeesu teeme abiberäja bägrä cama sawa ne yuurige, atyaramtige Genesareta gawe cabu me, siige poo te puma ipyige.

⁵⁴ Teepi liba poo cabu ca ärpige, biname cina Yeesu ne piba taatu opo ewatnisi,

⁵⁵ siige uuwamitnige, cewe gaabegabe ta idre ecenanisi. Biname cina liba itecijemige, egä Yeesu luci yene, teepi siige pita biname bine piyyeme waaku cabu ewadanemisi.

⁵⁶ Iyeta poto ta Yeesu luma waatnetnäjuge: modamoda cewe, matimati cewe piyepu calwacupi cewe cabu ta, puupu luma pajecu ge, piyeme pita biname bine yaawadane-musi. Teepi Yeesu ne yaawejanusi pita biname cina teeme cäbletääpe pepyämu taatu oomlaname. Iyeta lui cina joomläjusi, miiji läbitininusi.

7

Saarewale bime Abiberäja (Matayo 15:1-9)

¹ Parisea sigu biname piyepu Yerusalemä ca lui poto cotre abiberäja biname cina seclumi, teepi abasecretnige Yeesu bau me.

²⁻³ Teepi jepänisi, egä teeme abiberäja bägrä cina ime äciseja cäco deedei erwäjemisi. Teepi peei lui saarewale bime mule ne lica jaawenusi Parisea biname piyepu nuuja Israela biname bime pana, lui cina deedei lica loolo, teepi liba conocäcorage mule ca niinäce ime lica lääcisäjimusu cude gwidape cabu ca kälyä äbitame.

⁴ Cuta teepi liba täcnärüge aletna puupu cabu ca deedei cama, teepi pui deedei lica yäärwäjimusi, liba niinäce lica jääcisäjemusi. Piti nemi cuta bucurage poto saarewale bime mule, teepi lui bine jaawenimusi, naace teepi lipu conocäcorage mule ca jääcisäjemusi kaapo, pani, piyepu ljalija ängära gwidape bine cuta piyepu ute gwidape bine.

⁵ Siige pui Parisea biname piyepu cotre abiberäja biname cina Yeesu ne itemlisi egä, “Ngena name pi määme abiberäja bägrä cina saarewale bime mule bine lica yääcwetnimusi, yepä teepi äciseja cäco ime ca deedei loolo?”

⁶ Yeesu jejemige egä, “Toraca gyene, mename biname Isaya lui niinäce gaabe mene jicuji weeme poto cidi me. Weene walya biname gemi, tabe lipu soogäruji egä,

‘Ai biname cina cebine, lui Acejiyame gäne, teeme tage miipe ca nawepyeräjusi, yepä teeme ngenä atwanena cudecewerage gyene cäme bau ca.

⁷ Nuuja miiji lica gyene teepi cebine opo gaabe me acitame,

ingle teepi biname bine yaabiberäjimusu cotre bine äcwetname, lui cäme cotre lica gemi.’”

⁸ Yeesu cuta jejemige egä, “Weene läbwäricinuye wawenecame, Acejiyame te ngena jijnuge, yepä weene saarewale bime mule bine jaawenimuye.

⁹ Weene mage umle gemi Acejiyame me Mene ägyi saarewale bime mule bine cängenarage äcwetname.

¹⁰ Moose te jicuji egä, ‘Weene miiji mage babe bine opo gaabe me acita,’ piyepu egä, ‘Laati te liba teeme mage babe poto cidi me niiyarage mene jicemuge, teebine miiji budre me acita.’

¹¹ Yepä weene te yaabiberäjimuye, egä laati te liba teeme mage babe bine jaajuge egä, ‘Cane äblicäco gäne weebibine ätityera, ingle cane lui gwidape ca ätityerame weebibine, cane itu secitumene Acejiyame tääpume,’

¹² siige tabe kälyä läbituge teeme mage babe bine ätityera cabu ca.

¹³ Weene Acejiyame me Mene ne kaake me jaawenuye saarewale bime mule ca, weene lui yaabiberäjimuye. Piti nemi bucurage apu pana mule, weene lui bine jaawenimuye.”

Lui Gwidape cina Biname ne Niija me Jaawenusi (Matayo 15:10-20)

¹⁴ Yeesu biname bine cääri tesoglicmige teeme bau me, jejemige egä, “Weene iyeta cebine nätecijeje, umle äbitinineye.

¹⁵ Lui gwidape te labacituge biname me trupa ngalebora me, pui te äblicäco gyene teebine niija me wawename. Yepä lui te tasatuge teeme ngenecu cabu ca, pui te teebine niija me jaawenuge.

¹⁶ Weeme liba tablame piti nemi äteciijame, weene itecijinege.”

¹⁷ Puma cita ca Yeesu biname bine sebmalmimige, mete me abacituge. Puma teeme abiberäja bägrä cina teebine itemlisi pui ngenä ca agli mene ne aboclomtame.

¹⁸ Yeesu jejemige egä, “Baa weene cuta umle lica gemi! Weene nää lica jepäneniye, egä ngenä te labacituge biname me trupa cabu me, peei te äblicäco teebine niija me wawename,

¹⁹ ingle lica labacituge teeme ngenecu bora me yepä teeme came cabu me, siige ingwe ca tasatuge teeme cabu ca.” Ai iicema cabu Yeesu jicige, egä nuuja deedei cibi cude lica gemi.

²⁰ Puma cita ca tabe jicige egä, “Lui te tasatuge biname me ngalebora ca, peei te teebine niija me jaawenuge.

²¹ Ngalebora ca, biname me ngenecu bora ca saacluge niyarage ngene atwanena cina. Puma cita ca cuta saacluge singi sargi ero mule wawename, singi gwidape ero me, budre me aglime,

²² mule wawename biname cama lui te teeme coga coo rooriye lica birige. Ngenecu bora ca cuta saacluge gwidape singisingi cina, piyepu singi nuuja maramara niya mule bine wawenetnjame, angletnejame, ajiri cama mule wawename, ire patre aglime, niyaniya mene icetnejame, teemämu awepyeräjame, budubuduma mule wawenecame.

²³ Iyeta ai niya singisingi cina, lui ngalebora ca saacluge, biname ne niya me jaawenusi."

*Yepä Magebi me Ätrunga
(Matayo 15:21-28)*

²⁴ Puma cita ca Yeosu abyemäriige, ädige babo cewe Turo gawe cabu me. Tabe yepä mete cabu me abacitige, siige tabe singi lica ge nuuja biname te umle äbitame, egä tabe pisi nyene mete cabu, yepä tabe äblicäco ge ämlitäneji lenaja.

²⁵ Yepä magebi, lui me ngulebägrä niya cable cama ge, liba utecijige Yeosu poto cidi me, tabe piba taatu teeme bau me toclige, siige ajarige teeme opo gaabe je ernge gome.

²⁶ Ai magebi lui Israela biname lica gwene, tabe Griik menyame magebi gwene. Tabe Poenikiya babo cewe je aplimluji Suriya gawe cabu je. Siige tabe Yeosu ne ewejanige niya cable ne asatame teeme bägrä me trupa cabu ca.

²⁷ Yepä Yeosu ngene ca agli mene ca jorige egä, "Miiji niinäce bägrä bine deedei ceera. Niya gyene teeme deedei acata, drego plongo bime täápume iisaba."

²⁸ Magebi te Yeosu ne teeme ngene ca agli mene jewecnistige, jejige egä, "Toraca babo biname, yepä dade gawe me lui drego plongo cina läwtitaninusi, teepi yäärwäjimusi pläpupläpu bine, bägrä bime bau ca lui cina saatrametnemuge."

²⁹ Yeosu jorige egä, "Maane miijirage mene ca nawecnistite. Äte ocli mete me. Niya cable te bii tasatige mäame bägrä me trupa cabu ca."

³⁰ Magebi te acenutige teeme mete me, puma bägrä ne jopänige ätwitäneji ge ute puupu cabu, siige umle äbitige, egä cable te bii basatige.

Yeesu Mene Iicema cäco Tablame Buduma Biname ne Miiji Jewenige

³¹ Yeosu ebmaliige babo cewe Turo gawe ne, Sidona babo cewe ta ädige piyepu Ten Modamoda Cewe gawe cabu ta, ngälu Galilaya sawa ne joomlige.

³² Puma teeme bau me ecanisi tablame buduma biname ne, lui te mene cängena lica jüicemuge. Teepi Yeosu ne ewejanisi teeme tääpe ne oomlaname.

³³ Yeosu teebine ecatige biname bime sobe cabu ca, taatu cewe me ecanige. Puma tabe teeme ime kukluta acitige teeme tablame bora me, piba mote eclemutige teeme ime kukluta cabu me, siige joomlige teeme wätä ne.

³⁴ Piba tabe ire acitige cabu me, ngenecu mäpu äbitige owecu name pi, siige jejige Aramea mene ca egä, "Epata" lui egä, "Iitneye".

³⁵ Piba taatu teeme tablame cina iitnäsi, siige tabe cängenarage mene itecijige piyepu teeme wätä te apinicige, tabe siige piba mene cängena jüicemige.

³⁶ Puma cita ca Yeosu biname bine jejemige, egä teepi gone ai poto cidi me mene jajanena. Ngänuge, tabe puu jiibanemige, yepä teepi jejananemisi.

³⁷ Siige iyeta biname cina mutäcäco äbitininisi, jüicisi egä, "Iyeta mule tabe lui itu tewenetnäjimumi, babo miijirage gemi. Tabe cuta tablame buduma biname bine jaawenimuge mene ätecijame piyepu mene iicema cäco biname bine jaawenimuge mene iicemame."

8

*Yeesu Fooa Tausen Biname bine Engärimige
(Matayo 15:32-39)*

¹ Pui padare cabu bucurage biname cina cääri tabasecretlige Yeosu bau me. Teeme liba nuuja deedei lica abmalige loolo me, Yeosu abiberäja bägrä bine tesoglicmige, jejemige egä,

² "Cane baborage owecu gäne ai biname bime täápume, ingle teepi cane cama ituge lenaja nesae bimü cama, siige teeme deedei bämlige.

³ Cane liba loolomecewe jityepenemine teeme cewe me, teepi gaabegabe cije irecu laboclomäjininusi, ingle poto cina cudecewe cewe ca seclumi."

⁴ Abiberäja bägrä cina Yeosu ne mene jewecnistisi egä, "Mine äblicäco gemi ama ai daapo taatu cewe cabu ai biname bine ängära."

⁵ Yeosu itemlimige egä, "Weeme lija buluduu gemi?" Teepi jejisi egä, "Cime seben gemi."

⁶ Puma cita ca Yeesu biname bine jejemige gawe cabu adna-terame. Piba tabe pui seben buluduu bine sewadimige, Acejiyame ne eso ecäriige, itrecimige, ecärimige abiberäja bägrä bine teepi biname bine ceeraname, siige teepi ecäranemisi.

⁷ Teeme cuta puga ge nesae matimati cibi bumate. Yeesu eso ecäriige cibi täápume, jejemige abiberäja bägrä cina biname bine ceeraname.

⁸⁻⁹ Iyeta biname cina erwäjimisi, siige ngene jeglemige. Teepi lui fooa tausen biname ge. Abiberäja bägrä cina deedei pacupacu bine etomlicmisi, seben modamoda diiba bine jengärimisi, siige teepi tapanininisi. Puma cita Yeesu biname bine jityepimige teeme cewe me.

¹⁰ Pui ingwe gaabe ca tabe piba taatu acenutige poo cabu teeme abiberäja bägrä cama, siige teepi eclige Dalmanuta gawe cabu me.

*Parisea Sigu Biname cina Itemlisi Ciitaca Mule täápume
(Matayo 16:1-4)*

¹¹ Poto Parisea sigu biname cina seclige, gije abacitinisi Yeesu cama äcelame. Teepi singi teebine apicetnärame, siige jejisi ciitaca mule wawename pui ca awabame, egä Acejiyame te teebine ituge ätyepa.

¹² Yeesu ngenecu mäpu me äbitige, jejemige egä, “Weene puu tepänanemimuye cane lui ciitaca mule bine tewenanemumene, yepä weene nätemläjeniyee cane cerämu wawename. Cane toraca jijenininine: cane licarage nuuja ciitaca mule ne wawena weene päpäname.”

¹³ Puma cita ca tabe teebibine sebmalmige, acenutige poo cabu teeme abiberäja bägrä cama, siige teepi sawa ne yuurisi nuuja poto doro me.

*Parisea Sigu Biname bime piyepu Heroda me Uutneca Gwidape
(Matayo 16:5-12)*

¹⁴ Abiberäja bägrä cina ngene jitrimalemige buluduu waadename, peei name pi teeme yepä taatu buluduu puga ge poo cabu.

¹⁵ Yeesu teebibine umle mene jejemige Heroda piyepu Parisea sigu biname bime potoci me. Tabe ngene ca agli mene ca apu jicige egä, “Weene cängena ire Parisea biname bime piyepu Heroda me uutneca gwidape täápume.”

¹⁶ Teepi mene opo lica ewatnisi, siige teemeteme jitransi egä, “Tabe pama apu njenininige, ingle mime buluduu lica gemi.”

¹⁷ Yeesu umle äbitige, teepi ngena täápume jicemisi, siige tabe jejemige egä, “Weene ngena name pi jitraniyiye, egä weeme buluduu lica gemi? Weene nää camu gemi cäro opo awatna coo umle äbita? Weeme ngene atwanena nää tuuberage gemi?”

¹⁸ Weeme puu tablame piti nemi, yepä weene lica itecijinuge, piyepu weeme puu irecu piti nemi, yepä weene lica jääpänimuye. Weene nää ngene lica jotwiniye,

¹⁹ cane liba faib buluduu bine yätrecemepene faib tausen biname bime täápume, weene lija diiba apanäneji jäängärepeye deedei pacupacu ca?” Teepi jejisi egä, “Twelb diiba.”

²⁰ Tabe cuta itemlimige egä, “Cane liba seben buluduu bine sitrecimumene fooa tausen biname bime täápume, lija modamoda diiba apanäneji weene tengärimumeye deedei pacupacu ca?” Teepi jejisi egä, “Seben diiba.”

²¹ Puma cita ca Yeesu jejemige egä, “Weene cäro camu gemi umle äbita cäme potoci me.”

Yeesu Ireku Määsumäsu Biname ne Miiji Jewenige Betesaida je

²² Teepi atyarige cewe ngii Betesaida me. Puma biname cina irecu määsumäsu biname ne secanisi Yeesu bau me, siige ewejanisi teeme tääpe oomlaname.

²³ Yeesu teebine ime gome joomlige, ecanige taatu cewe me. Tabe teeme irecu bine mote ca äatyewäriige, ime aacitige teeme papa cabu me, itemlige egä, “Nää, maane gwidape bine jepänenemite?”

²⁴ Tabe ire acitanige, jicige egä, “Yoo, cane biname bine jepänenemine, yepä teepi epu pana gemi uli, lui cina otneninisi.”

²⁵ Yeesu cääri ime aacitige teeme irecu cabu me. Puma cita ca pui biname te kokre cama ire acitanige, siige teeme irecu cina aasatäsi, piba tabe iyeta gwidape bine cängena jepänenemige.

²⁶ Yeesu teebine jityepige cewe me apu mene cama egä, “Gone loclomute cewe me biname bine jajanenname ai potoci me, yepä gaabe ta ädepi määme mete me.”

*Peteru Yeesu ne Jewabudnitige, egä Tabe Keriso Sine
(Matayo 16:13-20; Luuka 9:18-21)*

²⁷ Yeesu teeme abiberäja bägrä cama ädige Kesarea Pilipo gawe cabu lui cewe gemi, pui cewe cabu ta otnetnejame. Gaabegabe Yeesu teebibine itemlimige egä, “Biname cina lipu jicusi, egä cane laasi näne?”

²⁸ Teepi jejisi egä, “Poto cina lui jiiucusi, egä maane Yoane niiye ca äciseja biname säte. Poto cina jiiucusi, egä maane Acejiyame me mename biname Eliya säte; poto cina egä, maane teeme nuuja mename biname gäte.”

²⁹ Yeesu teebibine itemlimige egä, “Cije weene, weene lipu jiiuceniye, egä cane laasi näne?” Peteru jejige egä, “Maane Keriso säte, biname bine lui te niiya cabu ca pa yäasecrärempi.”

³⁰ Yeesu kokre cama jejemige, egä teepi nuuja biname bine gone jajanena teeme poto cidi me.

*Yeesu Jiicemige Teeme Mäpu Ngalebora Lenaja piyepu Budre poto cidi me
(Matayo 16:21-28; Luuka 9:22-27)*

³¹ Yeesu gije abacitige abiberäja bägrä bine abiberäjame. Tabe jejemige egä, “Cane lui Acejiyame bau ca tädujine biname me äbitujine, cane müji mäpurage gwidape bine pagege päpäna piyepu Israela modamoda biname, modamoda iiwäreja biname piyepu cotre abiberäja biname cina pagege cebine ägyi. Cebine budre me pagege acita, yepä nesae me lui bimu cabu cane piba pa larpinantepene ireclota me.”

³² Tabe pajecurage jiiuce ai poto cidi me. Puma cita ca Peteru Yeesu ne taatu cewe me ecanige, gije jebacitige teeme mene name pi ablawejaame.

³³ Yepä Yeesu atatröngtige, teeme abiberäja bägrä bime cabu me ire acitige, siige Peteru ne kokre cama mene jejige egä, “Satani, cäme opo gaabe ca äyebingti. Määme ngene atwanena lui Acejiyame bau ca lica gyene, yepä biname bime cabu ca gyene.”

³⁴ Puma cita ca Yeesu biname bine piyepu teeme abiberäja bägrä bine tesoglicmige, jejemige egä, “Biname te liba singi cane cama otnime, tabe müji teemerage singi bine gawe me acrana, teeme baarge uli ne palace cabu acana siige cebine ingwe äcwi.

³⁵ Laati te liba singi lica teemerage singi bine abmaläcemame, tabe teeme ireclota ne cirege apesera. Yepä, laati te singi ge teemerage singi bine abmaläcemame ingle cane piyepu Müji Mene name pi, tabe toraca ireclota ne cirege päpäna.

³⁶ Biname te nuuja müji ne lica cire jääpänepi, ngänu gyene tabe puu iyeta ai gawecewe ne yaacatuge, yepä teeme ireclota ne yaapasaruge.

³⁷ Nuuja gwidape lica gyene ceerame teeme ireclota awecnista daremu me.

³⁸ Laati te liba cebine nägyenige piyepu cäme mene ibi lica äbitenige ai padare cabu, biname cina liba niiya mule bine jaawenimusi piyepu sargi mule yaacnemusi, cane lui te Acejiyame bau ca tädujine biname me äbitujine, cane cuta teebine cirege ägyi, cane liba Babe me jamyacu apacyera cama piyepu teeme mename seemo cama cire tacnepene ai gawecewe cabu me.”

9

¹ Tabe cuta jejemige egä, “Cane toraca mene jijenininine: ama poto lui cina jeclajutäjenemige, budre lica cire läbitipesi, ngälu teepi niinäce cire jääpänepesi Acejiyame te biname bine waadena kokre cama.”

*Yeesu Mara Opo me Äbitige
(Matayo 17:1-13; Luuka 9:28-36)*

² Siks bimu ingwe gaabe ca Yeesu aacanänige Peteru, Yakobu piyepu Yoane teta cama, teebibine opo jaawenänige baborage podo cabu me, siige teepi puma taatu ge. Podo cabu abiberäja bägrä bime opo gaabe je Yeesu mara opo me äbitige,

³ piyepu teeme cäbletäape äbitininisi aiyai me, epu bulu me, egä nuuja te äblicäco gyene äciseja pepu bulu me.

⁴ Puma cita ca Eliya naabi Moose taboclomtäsi iyeta teeme bau me, siige teepi mene jiiicemäsi Yeesu cama.

⁵ Peteru Yeesu ne jejige, “Abiberäja biname, cine miijirage gämi ama. Cine nesae matimati mete bine aarange-nänogo: yepä mäame, yepä Moose me, yepä Eliya me.”

⁶ Peteru umle lica ge, ngena nuuja mene iicana, ingle teepi iyeta pipu wälu ge.

⁷ Piba carbe te tädige, teebibine aacwabänige. Carbe cabu ca tagepogogo te tädige egä, “Ai lui cäme ngenecurage Bägrä gyene. Weene teebine jitecijeye.”

⁸ Abiberäja bägrä cina liba wata ire acranänisi, teepi yepä Yeesu ne jepänisi.

⁹ Teepi liba podo cabu ca täinetnänisi, Yeesu jääjänige egä, “Weene lui mule ne bii jepäniye, gone biname bine jajanena, ngälu cane lui Acejiyame bau ca tädujine biname me äbitujine, budre cabu ca pagege arpinenta.”

¹⁰ Teepi puu teeme mene jitecijänisi, yepä teemeteme jitranänisi, egä teeme budre cabu ca arpinenta baa ngena gyene?

¹¹ Puma cita ca teepi Yeesu ne itemlänisi egä, “Ngena name pi cotre abiberäja biname cina jiiucusi, egä Eliya cirege otni Keriso me niinäce gaabe me?”

12-13 Yeesu Yoane niye ca äciseja biname poto cidi me jääjänige egä, “Peei toraca gyene, egä Eliya miiji niinäce otni iyeta gwidape amacetnäjame. Cuta cane jijenininine, egä tabe uja itu tädepi, yepä biname cina teebine epu jaawenepesi, teepi lipu singi ituge, Oogäräneji mene te teeme poto cidi me lipu jüicenige. Yepä Oogäräneji mene te ngena name pi jüicenige căme poto cidi me, Acejiyame bau ca lui te tädujine biname me äbitujine, egä cane miiji mäpu cabu lenaja piyepu biname cina cebine pagege ägyi?”

*Yeesu Miiji Jewenige Niya Cable cama Băgră ne
(Matayo 17:14-21; Luuka 9:37-43a)*

14 Teepi liba nuuja abiberäja băgră bime bau me täcnărănisi, teepi jepänimisi bucurage biname cina teebibine jewaclomtemisi piyepu poto cotre abiberäja biname cina jicelisi teta cama.

15 Egăcäro biname cina Yeesu ne jepänisi, teepi călu te jitemige, piba taatu uuwamitnige teebine awablame.

16 Yeesu abiberäja băgră bine itemlimige egä, “Weene teta cama ngeno me jiceliniye?”

17 Siige biname bime sobe cabu ca yepä te jejige egä, “Abiberäja biname, cane căme băgră ne secanine mäme bau me, ingle niya cable te teebine mene iicema căco me jaawenuge.

18 Liba teebine joomluge, gawe me yaajaruge, siige tage cabu ca bulubulu mote cina täsuge, tabe giricu bine yaatebicumuge cuta duudemu te yaagluge. Cane puu mäme abiberäja băgră bine jejemine cable ne äyecrejame, yepä teepi äblicăco ge wawena.”

19 Yeesu teebibine jejemige egä, “Oo weene ätrunga căco biname gemi! Luma ngälu padare cane miiji weene cama lenaja? Luma ngälu padare cane miiji weeme ätrunga căco mule päpäna? Peei băgră ne secaneye.”

20 Puma cita ca teepi teebine Yeesu bau me ecanisi. Cable te liba Yeesu ne jepänige, tabe băgră ne came jedenütäjige, siige băgră te itramige gawe me, adimlicige, bulubulu mote cina täsige teeme tage cabu ca.

21 Yeesu babe ne itemlige egä, “Tabe luma ngälu padare ituge apu lenaja?” Tabe jewecnistige egä, “Matikäli băgră cabu ca.

22 Cable te cuta teebine yaajaräjuge uliobo cabu me piyepu niye cabu me teebine budre me acitame. Maane cibibine owecu niweni, nitityäri, liba ibibi gäte.”

23 Yeesu jejige egä, “Maane ngeno me najite, egä cane liba ibibi gäne. Lui me ätrunga pisi nyene, tabe miiji gyene iyeta gwidape wawenetnäja.”

24 Piba babe te babo tage ca jüicige egä, “Căme ätrunga pisi nyene, yepä näityäri cane cerämu ätrungame!”

25 Yeesu liba jepänige, egä biname cina tuuwamitnige teeme bau me, tabe cable ne kokre cama mene jejige egä, “Niya cable, lui te ai băgră ne jewenenite tablame buduma me piyepu mene iicema căco me, cane naajenine, maane tasati teeme trupa cabu ca piyepu ingwe ca gone labacitute.”

26 Cable te babo ala isatige, băgră me came kokre cama jedenütäjige, siige ebmalige teebine. Băgră te apineca căco enajige budre pana, siige bucurage biname cina jüicisi egä, “Tabe budre gyene.”

27 Yepä Yeesu teebine ime gome joomluge, erpinantige, siige tabe jeclajutige.

28 Yeesu liba mete bora me abacitige, abiberäja băgră cina ogä itemlisi egä, “Cine ngena name pi äblicăco ge niya cable ne äyecreja?”

29 Tabe jejemige egä, “Apuyame ne weene äblicăco nuuja mule ca äyecreja yepä irecu ätumuta ca.”

*Yeesu Căäri Mene Jüicemige Teeme Budre poto cidi me
(Matayo 17:22-23; Luuka 9:43b-45)*

30 Teepi puu gawe ne sebmalisi, otnetnäjinisi Galilaya gawe cabu ta. Yeesu singi lica ge nuuja biname te umle äbitame, egä teepi puga ge,

31 ingle tabe abiberäja băgră bine ebiberäjimige. Tabe jejemige egä, “Lui te Acejiyame bau ca täduji biname me äbituji pagege acita biname bime ime cabu, siige teepi pa yaacitepesi budre me, yepä nesae me lui bimubabu tabe piba pagege arpinenta budre cabu ca ireclota me.”

32 Teepi ai mene ne opo lica ewatnisi, yepä teepi wälu ge Yeesu ne ätemlame.

*Laasi Nyene Baborage
(Matayo 18:1-5; Luuka 9:46-48)*

33 Teepi atyarige Kaprenauma cewe me, siige mete me ebäcnisi. Puma Yeesu abiberäja băgră bine itemlimige egä, “Weene gaabegabe ngena tääpume titraniye?”

34 Yepä teepi bojă ge, ingle teepi gaabegabe je titranisi, egä teeme cabu ca laasi nyene baborage.

³⁵ Yeesu adnatige, twelb abiberäja bāgrā bine tesoglicmi-ge, jejemige egā, “Laati te liba singi niināce gaabe me äbitame, tabe miiji teemāmu cerācerāgāabu me äbita piyepu iyeta biname bime ätityera biname lenajame.”

³⁶ Puma cita ca tabe bāgrā ne ecatige, abiberäja bāgrā bime cole je ecitige, jejecletnājige, jejemige egā,

³⁷ “Laati te apu bāgrā yepā ne jaawabluge cāme ngii cabu, tabe cebine nawabluge; piyepu laati te cebine nawabluge, tabe cebine taatu lica nawabluge, yepā pui ne jaawabluge, lui te cebine nätyepuji.”

*Laati te Mibibine Lica Nicisārmutininuge, Tabe Mime tääpu Myene
(Matayo 10:42; Luuka 9:49-50)*

³⁸ Yoane te Yeesu ne jejige egā, “Abiberäja biname, cine biname ne jepānisi, lui te niija cable bine yāäyecrājemuge määme ngii cabu. Cine jejisi tabe pui mule ne abmalame, ingle tabe mime yepā lica gyene.”

³⁹ Yeesu abiberäja bāgrā bine jejemige egā, “Weene teebine gone iibana, ingle lui biname te kokre mule ne jaawenuge cāme ngii cabu, tabe äblicāco watata cāme poto cidi me niija mene iicana.

⁴⁰ Laati te liba lica nicisārmutininuge, tabe lui mime tääpu myene.

⁴¹ Cane toraca mene jijenininine, laati te liba icārininuge niije nanime cāme ngii cabu, ingle weene Keriso me abiberäja bāgrā gemi, tabe cirege teeme miiji daremu ne päpāna.”

*Yeesu Mene Jiicige Angletneja poto cidi me
(Matayo 18:6-9; Luuka 17:1-2)*

⁴² “Ai matimati bāgrā lui cina cebine nätrungusi, laati te liba teeme yepā ne jaawenuge niija mule wawename, pui biname te mäpu ne cirege päpāna Acejiyame bau ca. Teeme singicace cabu liba jaaglotusi mäpu kula ne siige malu cabu yaajarusi budre me, peei mäpu lui plowa birige pui mäpu cabu ca, tabe lui ne cirege päpāna.

⁴³ Peei name pi määme ime te liba naawenuge maane singi ädrime niija mule wawename, maane watatarage yāäyeblyngtute pui ngene atwana ne, epu pana ime ne lipu jäälācnutute. Miiji gyene, maane yepā ime cama otni iyeteta ireclota cabu me, yepā niija gyene maane neeneni ime cama otni niija puupu cabu me, uliobo luma ätuma cāco gyene.

⁴⁴ Puma lui cuple cina teebibine yāärngājimusi, teepi budre lica cirege, piyepu lui uliobo te teebibine yaabemuge, ätuma cāco cirege.

⁴⁵ Piyepu määme ernge te liba naawenuge maane singi ädrime niija mule wawename, maane watatarage pui ngene atwana ne yāäyeblyngtute, epu pana ernge ne lipu jäälācnutute. Miiji gyene maane yepā ernge cama iyeteta ireclota cabu me otni, yepā niija gyene maane neeneni ernge cama uliobo puupu cabu me otni.

⁴⁶ Puma lui cuple cina teebibine yāärngājimusi, teepi budre lica cirege, piyepu lui uliobo te teebibine yaabemuge, ätuma cāco cirege.

⁴⁷ Cuta piyepu määme irecu te liba naawenuge maane singi ädrime niija mule wawename, maane watatarage pui ngene atwana ne yāäyeblyngtute, epu pana irecu ne lipu juungyatute. Miiji gyene maane yepā irecu cama iyeteta ireclota cabu me otni, yepā niija gyene maane neeneni irecu cama uliobo puupu cabu me otni.

⁴⁸ Puma lui cuple cina teebibine yāärngājimusi, teepi budre lica cirege, piyepu lui uliobo te teebibine yaabemuge, ätuma cāco cirege.

⁴⁹ Mäpu cabu lenaja lui weebibine jugi cāco me jiwenininusi Acejiyame tääpume, epu pana uliobo te lipu domāji bine yaabemuge piyepu iiwāreja cibi bine lipu caapere niije ca yaamacetnājimusi Acejiyame me tääpume.

⁵⁰ Caapereniije me kaakesea pisi nyene, yepā liba teeme mite ne apesera, weene ingwe ca äblicāco wawena caapereniije mite me. Weene cuta miiji caapereniije pana mitemite lenaja. Cuta weene miiji weemeweme poode cama lenaja.” 9 0 9 0

10

*Yeesu Ebiberājimige Coga Rooriye Ägyi poto cidi me
(Matayo 19:1-12; Luuka 16:18)*

¹ Yeesu pui cewe ne sebmaliige, Yuudea probins cabu me ädige, siige Yoridana baduge ne yuurige. Bucurage biname cina cääri tabasecretinige teeme bau me, teebine jewaclomtisi, siige tabe teebibine ebiberājimige teeme mule liiyepu.

² Puma cita ca poto Parisea sigu biname cina seclige teebine apicetnārame. Teepi itemlisi egā, “Nää, Cotre ibi gyene rooriye te teeme coga ne ägyi?”

³ Yeesu teebibine itemlimige egā, “Moose lipu itu jijinuji weene wawename?”

⁴ Teepi jejisi egā, “Moose te rooriye ne conocāco ecāruji peba ne oogārame ägyi ingle poto cidi me, siige piba pui peba cama coga ne jwäätyepute.”

⁵ Yeesu jejemige egä, “Ingle weene ätecija cäco gemi, peei name pi Moose pui mene yoogäruji weeme täápume.

⁶ Yepä agedna padare cabu Acejiyame te liba biname bine jewenimuji, tabe magebi me piiyepu rooriye me jewenimuji.

⁷ Pui name pi rooriye te miiji teeme mage babe bine gomala teeme coga cama atejäclmutame,

⁸ siige teepi neeneni cina yepä me läbitäsi. Teepi page neeneni lica gegi, teepi yepä gegi.

⁹ PEEI name pi lui coga cama Acejiyame te rooriye ne yaatejäclmutuge, nuuja biname te gone teebibine mara me wawena.”

¹⁰ Ingwe ca Yeesu liba teeme abiberäja bägrä cama mete cabu jage, teepi cääri itemlisi ai poto cidi me.

¹¹ Tabe jejemige egä, “Rooriye te liba teeme coga ne jwäägyuge, nuuja ne waacatuge, tabe ero mule ne jaawenuge.

¹² Cuta coga te liba teeme rooriye ne jäägyuge, nuuja ne yaacatuge, tabe cuta ero mule ne jaawenuge.”

Yeesu piiyepu Bägrä Matimati

(Matayo 19:13-15; Luuka 18:15-17)

¹³ Biname cina bägrä bine sewadimisi Yeesu bau me tabe ime acitame teeme papa cabu me, yepä abiberäja bägrä cina teebibine jicnemisi.

¹⁴ Yeesu liba jepänige, abiberäja bägrä cina ngena jewenisi, tabe claabe ge, siige jejemige egä, “Bägrä cina saaclege cäme bau me. Gone jiihemuye, ingle bägrä pana ätrunga cama biname bine Acejiyame te yaawadimuge.

¹⁵ Cane toraca jijenininine: laati te bägrä pana lica yaacatuge Acejiyame ne teeme mopeyame me lenajame, pui biname ne Acejiyame te äblicäco acana.”

¹⁶ Puma cita ca tabe bägrä bine jejecletnäjimige, teeme ime aacitanige teeme papa cabu me teeme miiji täápume.

Dogwe Biname te Yeesu ne Edärige

(Matayo 19:16-30; Luuka 18:18-30)

¹⁷ Yeesu liba asatige gaabe cabu me, abyemäriige, yepä biname te piba uuwamige teeme bau me, kokorare ca äapednutige teeme opo gaabe je, itemlige egä, “Miijirage abiberäja biname, cane ngena ne miiji wawena iyeteta ireclota ne päpäname?”

¹⁸ Yeesu jejige egä, “Maane ngena name pi miijirage ca bii nainite cebine? Acejiyame taatu gyene miijirage, nuuja cina miijirage lica gemi.

¹⁹ Yoo siige, maane umle gäte Moose me ten cotre poto cidi me: ‘Gone biname ne budre me agli; sargi mule gone wawena; gone gwidape ero; walya aitneja gone; angletnēja gone; mage babe bine miiji opo gaabe me acita.’ ”

²⁰ Pui biname te Yeesu ne jejige egä, “Abiberäja biname, cane bägrä cabu ca iyeta peei cotre bine itu sicwetnanemumene.”

²¹ Yeesu ire acitige teeme bau me ngenecu miiji cama, siige jejige egä, “Yepä gwidape pisi nyene, maane lui ne lica ituge wawena. Äte ädi, mäáme iyeta gwidape bine ewademepi aletname, rarekaake ecäranemepi owecumete biname bine, siige maane cabucewe je miijimiji gwidape bine cire jepänemepi. Piba tädepi cane cama otnime.”

²² Tabe liba ai mene itecijige, teeme opo te mara opo me äbitige, siige tabe ngenecu mäpu cama ädige, ingle tabe babo dogwe biname ge.

²³ Puma cita ca Yeesu ingwe gaabe me ire jetwige, teeme abiberäja bägrä bine jejemige egä, “Dogwe biname bime täápume mäpu gyene Acejiyame me biname bine waadena cabu äbäcname.”

²⁴ Abiberäja bägrä cina mutäcäco äbitininisi teeme mene name pi. Yepä Yeesu cerämu jejemige egä, “Cäme binamewale, mäpu gyene biname bime täápume Acejiyame me biname bine waadena cabu äbäcname.

²⁵ Kamela täápume mäpu birige nilo bora cabu me abacitame siige asatame, yepä baborage mäpu birige dogweyame biname te Acejiyame me waadena cabu abacita.”

²⁶ Abiberäja bägrä cina mutäcäco ge, teepi ätemläjimisi egä, “Baa laati te piba miiji gyene iyeteta ireclota ne päpäname?”

²⁷ Yeesu ire acitige teeme bau me, jejemige egä, “Biname cina äblicäco teemämu peei ne wawena, yepä Acejiyame te miiji gyene iyeta gwidape bine waweneca.”

²⁸ Puma cita ca Peteru Yeesu ne jejige egä, “Cije cine lipu gemi, ingle cine iyeta gwidape bine itu saabmalempesi maane cama otnetneja name pi.”

²⁹ Yeesu jejemige egä, “Cane toraca mene jijenininine; laati te liba saabmaluge teeme mete ne, saabma-limuge teeme naane igane bine, ngule bine, mage babe bine, bägrä bine coo gawe bine cäme name pi piiyepu Miiji Mene name pi,

³⁰ tabe yepä hanred gääbu tuwängle jääpänimuge mete bine, naane igane bine, ngule bine, mage bine, bāgrā bine, cuta gawe bine, piyepu peei cama biname cina teebine jäägyusi, yepä tabe ciige padare cabu cirege iyeteta ireclota ne pāpāna.

³¹ Yepä bucurage biname lui cina page niināce gaabe biname gemi, teepi ciige padare cabu ingwe gaabe me cire täcnāripesi; piyepu bucurage biname lui cina page ingwe gaabe biname gemi, teepi ciige padare cabu niināce gaabe me cire täbitipesi.”

*Yeesu Cääri Mene Jiicemige Teeme Budre poto cidi me
(Matayo 20:17-19; Luuka 18:31-34)*

³² Yeesu teeme abiberāja bāgrā cama ädige Yerusalema me. Tabe teeme niināce gaabe me ädige. Abiberāja bāgrā cina mutācō ge piyepu lui cina ingwe icwemisi, teepi wālu ge. Yeesu abiberāja bāgrā bine biname bime sobe cabu ca mara me ewadimige, cääri jejemige, ngena te pa läpletnutepi teeme täápume.

³³ Tabe jejemige egä, “Siige mine biiri naclenige Yerusalema me. Cane lui Acejiyame bau ca tädujine biname me äbitujine, cebine puma pagege ceera modamoda iiwäreja biname piyepu cōtre abiberāja biname bime ime cabu me. Teepi budre me pa natranepesi, siige pa näcārepesi nuuja gawe cabu ca biname bime cabu me.

³⁴ Teepi cebine ätutena pana pa nawenepesi, mote ca pa nätyewepesi, pa nadnanepesi, budre me pa naglepesi. Yepä nesae me lui bimu cabu cane piba pa larpinantepene ireclota me.”

*Yakobu Yoane naabime Ätemla
(Matayo 20:20-28)*

³⁵ Puma cita ca Yakobu naabi Yoane, Jebedayo me bāgrā cina Yeesu bau me taacliche, jejäsi egä, “Abiberāja biname, cine singi gegi maane wawename, cine ngena tääpu megī singi.”

³⁶ Yeesu äätelmege egä, “Weene singi cane ngena ne wawename weeme täápume?”

³⁷ Teepi jejäsi egä, “Maane liba biname bine cirege waadena, maane conocāco nicārepi cine babo äbitame siige nuuja te adnatame mäame camu poto me, nuuja te mäame säwāci poto me.”

³⁸ Yepä Yeesu jaajige egä, “Weene umle lica gegi, weene ngena täápume nätemleniye. Nää, weene miiji gegi cāme pana mäpu cabu lenajame piyepu cāme pana budre äbitame?”

³⁹ Teepi jejäsi egä, “Cine miiji gegi.” Yeesu jaajige egä, “Toraca gyene, weene cāme pana mäpu cabu pagege lenaja piyepu cāme pana budre cirege äbita.

⁴⁰ Yepä peei lui cāme bau lica gyene jajime, lui te cirege cāme camu poto ca piyepu säwāci poto ca adnata. Pui puupu lui teeme tääpu memi, Acejiyame lui bime täápume ituge amacetnäja.”

⁴¹ Nuuja ten abiberāja bāgrā cina liba itecijemige Yakobu Yoane naabime mene, teepi claabe me äbitininisi.

⁴² Puma cita ca Yeesu iyeta abiberāja bāgrā bine tesoglicmige, jejemige egä, “Weene umle gemi, egä lui cina mope biname me yaacrajuge Acejiyame umle cāco biname bime täápume, teepi teebibine jaawenimusi teeme singi gaabe cabu otnetnejame. Piyepu teeme modamoda biname bime conocāco pisi nyene biname bine jajime teepi ngena wawename.

⁴³ Yepä weene apu gone läbitininuye. Weeme yepä te liba singi baborage me äbitame, tabe miiji nuuja biname bime ätityera biname me lenajame;

⁴⁴ piyepu weeme yepä te liba singi niināce gaabe me äbita, tabe miiji weeme täápume epu matikāli me äbita, aletnäneji biname te lipu läbituge teeme yageyame täápume.

⁴⁵ Cane lui te Acejiyame bau ca tädujine biname me äbitujine, cane cuta lica itu tädujine biname cina cāme täápume kaakesea wawename, ceewe, yepä cane te teeme täápume kaakesea wawename piyepu cāme ireclota ne ceerame daremu täápume teebibine käljā wawename.

*Yeesu Miiji Jewenige Ireclu Määsumäsu Biname ne Ngii Bartima
(Matayo 20:29-34; Luuka 18:35-43)*

⁴⁶ Yeesu piyepu teeme abiberāja bāgrā cina seclige Yeriko ceewe me. Teepi liba puma cita ca abyemārinisi, bucurage biname cina teebibine ingwe icwemisi. Gaabe wajwa je yepä ireclu määsumäsu biname ngii Bartima, Tiima me bāgrā, te adnatāneji enajige, gwidape täápume yäätinerājimuge.

⁴⁷ Tabe liba itecijige, egä Yeesu Nasaretayame te näsuplingtenige, tabe piba gije abacitige ala abayame egä, “Yeesu Daawida me kaakesaare, maane cebine owecu naweni!”

⁴⁸ Biname cina liga teebine jüibisi tabe bojā agime, yepä tabe cerāmu baborage ala abayige egä, “Daawida me kaakesaare, maane cebine owecu naweni!”

⁴⁹ Puma cita ca Yeesu gaabe cabu imyemutige, jejemige egä, “Tesogleceye teebine.” Siige teepi teebine tesoglicisi, jejisi egä, “Wālu gone! Abujängti, tabe meebine ala naasoglicige.”

⁵⁰ Tabe teeme acwaba cäbletääpe ne ijarige, ädige Yeesu bau me.

⁵¹ Yeesu itemlige egä, "Maane singi cane ngena wawename mäame tääpume?" Tabe jejige egä, "Babo biname, cane singi cääri irecu asatame."

⁵² Yeesu jejige egä, "Äte ädi! Mäame ätrunga te müji bii naawenige meebine." Piba taatu teeme irecu cina aasatäsi, siige tabe Yeesu ne ingwe icwige gaabe cabu.

11

Yeesu Yerusalema me Abacitige

(Matayo 21:1-11; Luuka 19:28-40; Yoane 12:12-19)

¹ Yeesu teeme abiberäja bägrä cama liba Yerusalema ne mameta me jebenisi oomlaname, teepi piba atyarige Olibi Uli Podo cabu me. Pui podo cabu puga ge cewe ngii Betepage piiyepu cewe ngii Betaniya. Yeesu teeme neeneni abiberäja bägrä bine jäätyepige

² apu mene cama egä, "Weene iclege weeme niinäce gaabe ca lui cewe peese nyene, siige liba atyaranteniye, weene jepäneniye mamye dongki ne seea ca ägräräneji gyene. Nuuja biname te camu ge teeme papa cabu adnata. Jiibirepeye teebine, secanepeye aima.

³ Laati te liba itemlenige weebibine egä, 'Ngena tääpume peei ne jeweneniye,' jejepeye egä, 'Yageyame te singi gyene teeme tääpume, yepä tabe watata pa saawecnistepi.'

⁴ Puma cita ca teepi aalige, jepänäsi mamye dongki ne babo gaabe cabu seea ca ägräräneji ge yepä mete grana gome, siige jiibiräsi.

⁵ Poto biname lui cina puga icrajige, teebibine äätemlisi egä, "Weene ngena name pi peei dongki ne jiibireniye?"

⁶ Teepi jejemäsi, Yeesu lipu bii jaajige teepi jajime, siige pui biname cina ire taatu jaatwisi teepi dongki ne acaname.

⁷ Abiberäja bägrä cina dongki ne ecanäsi Yeesu bau me, teeme cäbletääpe bine eretnemäsi teeme papa cabu, siige Yeesu acenutige, ädige.

⁸ Bucurage biname cina cäbletääpe bine eretnimisi gaabe cabu. Poto cina uli ciipe bine icnapimisi, gaabe cabu eretnimisi.

⁹ Lui biname cina teeme niinäce gaabe eclige piiyepu lui cina ingwe ca sicwisi, teepi ala abayaninisi egä,

"Acejiyame ne yaawepyeräjesi!

Maane lui tädenite Yageyame me ngii cabu, tabe müji naawenege meebine!

¹⁰ Lui te tädenite mime kaakesaare Daawida pana biname bine waadename, Acejiyame te müji naawenege meebine!

Mine yaawepyeräjesi Acejiyame ne, cabucewe je lui te enajenige."

¹¹ Puma cita ca Yeesu atyarantige babo cewe Yerusalema me, siige abacitige iiwäreja mete cabu me. Tabe ire ecananemige gwidape bine, yepä mämlé bimu name pi tabe acnenutige teeme twelb abiberäja bägrä cama Betaniya me.

Yeesu Kokre Mene Jejige Piigi Uli ne

(Matayo 21:18-19)

¹² Nuuja bimu cabu Yeesu liba abiberäja bägrä cama Betaniya ne sebmalige, tabe loolomecewe te joomlige.

¹³ Tabe cudecewe ca piigi uli ne jepänige laame cama, ädige uli gome me kuu ireme. Yepä tabe liba atyarantige, laame taatu jepänimige, inglé kuu padare cäro camu ge.

¹⁴ Tabe uli ne jejige egä, "Nuuja biname te mäame cabu ca lica pagege kuu loolo." Teeme abiberäja bägrä cina itecijemige, tabe ngena jiicige.

Yeesu Ädige Iiwäreja Mete me

(Matayo 21:12-17; Luuka 19:45-48; Yoane 2:13-22)

¹⁵ Teepi atyarige Yerusalema me, siige Yeesu ädige iiwäreja mete caale bora me. Puma tabe gije abacitige biname bine äyecrejame, lui cina piyeme gwidape bine yaawadanemusi aletna-me piyepu lui cina jaaletnimusi. Tabe rarekaake äbäsuwäja biname bime dade bine eboclomäjimige. Lui biname cina gimäe ele bine yaawadanemusi aletname, tabe cuta teeme adnatera dade bine eboclomäjimige.

¹⁶ Piyyepu lui cina gwidape bine yaawadanemusi, tabe padare lica ecärimige teepi Acejiyame me mete caale cabu argemelame.

¹⁷ Tabe piba biname bine ebiberäjimige, jiicige egä, "Acejiyame te jiicenige Oogäräneji mene cabu egä, 'Cäme mete ne irecu ätumuta mete ca cirege aina, luma iyeta maramara gawe biname cina cirege irecu ätumuta,' yepä weene itu setatrongärumeye epu puupu me, eromaame cina luma lämletneräjininusi."

¹⁸ Modamoda iiwäreja biname piiyepu cotre abiberäja biname cina teeme mene liba jitecijiisi, teepi siige gaabe ne jirngisi Yeesu ne budre me acitame. Teepi wälu ge teeme täápume, inge iyeta biname cina mutäcäco ge teeme abiberäja name pi.

¹⁹ Liba tumlige mämeteca me, Yeesu abiberäja bägrä cama Yerusalema ne sebma-lisi.

Pügi Uli me Abiberäja

(Matayo 21:20-22)

²⁰ Nuuja bimu krokerage Yeesu liba abiberäja bägrä cama gaabe cabu ädige, egäcäro pui piigi uli ne jepänisi, tabe lui cabu ca nuuja kuu ne lica tepänumi. Teeme laame jedacromtige piiyepu braju cina iyeta acalomlinisi, siige budre ge.

²¹ Peteru ngena jotwige, ngena te täpletnutumi, siige tabe Yeesu ne jejige egä, "Ire abiberäja biname, maane lui uli ne mene ca seglumete, siige budre gyene."

²² Yeesu teehibine jejemige, "Weene miiji Acejiyame bau ca ätrunga ne joomleye.

²³ Cane toraca mene jijenininine, laati te liba jaajuge ai podo ne egä, 'Awetänti, malu cabu me ajari,' piiyepu tabe liba lica neenenen ngena atwana cama, yepä jäätrunguge, egä tabe ngena täápume jaajuge, pa läbitepi, siige peei te pagege äbita teeme täápume.

²⁴ Peei name pi cane jijenininine, egä weene irecu ätumuta cabu liba ngena täápume yäätinäruiye, siige jäätrunguye, egä weene uja ituge päpäna, siige weene piba jääpänuye.

²⁵ Weene liba labujengäjininuyeye irecu ätumutame, weene miiji ngena ätrimela weeme täápume lui niya mule jiweninini, piba weeme Babe cabucewe je weeme niya mule ngena jäätrimaluge.

²⁶ Yepä weene liba lica birige ngena ätrimela poto biname bime niya mule bine, piba weeme Babe cabucewe je cuta lica birige ngena ätrimela weeme niya mule bine."

Ätemla Yeesu me Conocäco poto cidi me Tabe Mule bine Wawenecame

(Matayo 21:23-27; Luuka 20:1-8)

²⁷ Yeesu teeme abiberäja bägrä cama cääri acnenutige babo cewe Yerusalema me. Egäcäro Yeesu otnetnäjige iiwäreja mete caale bora modamoda iiwäreja biname, cotre abiberäja biname piiyepu nuuja modamoda biname cina seclige teeme bau me,

²⁸ itemlisi egä, "Määme ngena conocäco pisi nyene ai mule bine wawenecame? Laati bau ca gyene määme conocäco?"

²⁹ Yeesu jejemige egä, "Cane yepä gwidape poto cidi me itemlininine. Weene liba nawecnisteniyeye, cane piba jijenininine, laati te conocäco näcärepi cane ai mule bine wawenecame.

³⁰ Weene najeye, laati te Yoane ne conocäco yääcärepi tabe biname bine niye ca äcisejame, Acejiyame te coo biname cina?"

³¹ Teepi teemeteme jitraniisi egä, "Mine liba jewecnistenisi egä, 'Acejiyame te Yoane ne conocäco yääcärepi,' tabe piba apu njenininige egä, 'Cije weene piba ngena name pi teebine lica jäätrungepeye?"

³² Cuta mine äbücäco gemi iicana egä, 'Biname cina Yoane ne conocäco yääcärepi.' Teepi apu naace popi jiiçisi, inge teepi biname bime täápume wälu ge, inge iyeta biname cina ngena jotwaneninini, egä Yoane lui Acejiyame me mename biname ge.

³³ Siige teepi Yeesu ne jejisi egä, "Cine umle lica gemi, laati te Yoane ne conocäco yääcärepi biname bine niye ca äcisejame." Yeesu jejemige egä, "Cane cuta piba lica jijenininine, laati te cebine conocäco näcärepi ai mule bine wawenecame." 11

12

Ngene ca Agli Mene Calwacupi Ire Atwi Biname bime poto cidi me

(Matayo 21:33-46; Luuka 20:9-19)

¹ Yeesu biname bine ngena ca agli mene ca jejemige, teepi ngena ituge wawena Acejiyame me mename biname bime täápume. Tabe apu jiiçige egä, "Yepä biname te waina gije bine itemige. Tabe cotäri ne erangige, cupicu ne juurige waina kuu ämulecame, piiyepu cabucabu mete ne erangige calwacupi ne awamutame. Piba tabe calwacupi ecärimige biname bine ire atwime siige kuu padare cabu teepi yageyame ne poto kuu ceerame daremu täápume. Puma cita ca tabe cewe ne sebmaliige, ädige cudecewe cewe me.

² Kuu padare cabu tabe teeme kaakesea bägrä ne jityepige calwacupi ire atwi biname bime bau me poto kuu bine waadename.

³ Teepi teebine joomlisi, etemeläjisi, jityepisi ime ta.

⁴ Yageyame te cuta nuuja kaakesea bägrä ne jityepige. Teepi dupe ecärisi mope cabu, ajiri me jewenisi.

⁵ Ingwe ca tabe cuta cääri jityepige nuuja ne, yepä teepi budre me eglisi. Teepi bucurage bine pepu jewanemisi, poto bine etemeläjimisi, poto bine eglecimisi budre me.

⁶ Siige Yageyame me bāgrā taatu te abmalige, teeme ngenecurage bāgrā. Cerācerāgāabu tabe teebine jityepige teeme bau me, ingle tabe apu jengige, egā teepi pama cāme bāgrā ne opo gaabe me ecitenisi.

⁷ Yepā calwacupi ire atwi biname cina liba yageyame me bāgrā ne jepānisi, teepi teemeteme jitrānisi egā, 'Ai yageyame me bāgrā gyene. Tabe te ai calwacupi ne cire yaacatepi. Biiri naclege, yaaglesi, siige calwacupi mime yene.'

⁸ Teepi teebine ecātisi, eglisi, budrekaake ne ijarisi cotāri sici me.

⁹ Cane jijenininine weebibine, calwacupi yageyame te ngena cirege wawena. Tabe cirege otni budre me aglecame pui calwacupi ire atwi biname bine piyepu calwacupi cire yāacāremepi nuuja biname bine ire atwime.

¹⁰ Weene ituge acnema Oogārāneji mene egā,
'Lui kula ne raranga biname cina jigyisi,
baborage bābitige iyeta nuuja cabu ca.

¹¹ Yageyame te ai ne bii jewenige
piyepu babo miijirage gyene mine pāpāname.'

¹² Siige Israela modamoda biname cina Yeesu ne oomlaname ābitininisi, ingle teepi opo ewatnisi, egā tabe teeme poto cidi me bii jiičige. Yepā teepi wālu ge bucurage biname name pi, siige teepi teebine ebmalisi, eclige.

*Ātemla Tāks Rarekaake Cera poto cidi me
(Matayo 22:15-22; Luuka 20:20-26)*

¹³ Modamoda biname cina jityepimisi poto Parisea sigu biname piyepu Heroda me sigu biname bine Yeesu bau me teebine mene cabu ca oomlaname.

¹⁴ Teepi seclige, jejisi egā, "Abiberāja biname, cine umle gemi, egā maane toraca mene jiičenemite piyepu maane nuuja ngenecu lica gāte, biname cina lipu ngene jwaat-wananinisi määme poto cidi me, ingle maane nuuja ne lica yaacatute teeme ngii name pi, yepā maane toracarage yaabiberājimute Acejiyame me gaabe poto cidi me. Siige maane toraca nijini, nāā mime cotre te lica niibenininge mine tāks rarekaake ceerame Rooma mope biname Siisa ne?"

¹⁵ Yepā Yeesu opo ewatnige, egā teepi singi teebine mene cabu ca oomlaname, siige tabe jejemige egā, "Weene ingle ne jirngeniye cebine oomlaname. Rarekaake ne secāneye, cane jāāpānene."

¹⁶ Teepi secānisi, siige tabe itemlimige egā, "Laati me opo gyene piyepu ngii gyene ai rarekaake cabu?" Teepi jejisi egā, "Siisa me opo gyene piyepu teeme ngii gyene."

¹⁷ Yeesu jejemige egā, "Lui gwidape gemi Siisa me, teebine ecāreye pui; piyepu lui gwidape gemi Acejiyame me, teebine ecāreye pui." Teepi mutācāco ābitininisi teeme mene name pi.

*Ātemla Mene Budre cabu ca Arpinera poto cidi me
(Matayo 22:23-33; Luuka 20:27-40)*

¹⁸ Poto Sadukea sigu biname cina seclige Yeesu bau me. Teepi eei gemi, lui cina jiičusi, egā biname cina budre cabu ca lica arpinera. Teepi Yeesu ne jejisi egā,

¹⁹ "Abiberāja biname, Moose te cotre ne soogāruji mime tāāpume, egā biname te liba budre lābituge, coga ne bāgrā cāco twaabmaluge, teeme igane te miiji cuubla ne acata bāgrā wawename teeme naane me ngii tāāpume.

²⁰ Yoo, nuuja taje puga ge seben naniganewaleyame. Uuge te coga ne ocatige, siige bāgrā cāco budre ābitige.

²¹ Teeme gomecayame igane te cuubla ne ocatige. Tabe cuta budre ābitige bāgrā cāco. Cuta pepu ābitige puma cita ca gomeyame tāāpume

²² piyepu iyeta teeme igānewale bime tāāpume. Iyeta seben naniganewaleyame peei yepā magebi ne ocanānisi, siige budre ābitininisi bāgrā cāco. Ingwe ca magebi te cuta budre ābitige.

²³ Siige liba pui seben naniganewaleyame budre cabu ca cirege arpinera, tabe piba laati me coga cirege?"

²⁴ Yeesu teebibine jejemige egā, "Weene betājiye, ingle weene umle lica gemi Oogārāneji mene piyepu weene umle lica gemi Acejiyame me kokre.

²⁵ Budre biname cina liba cirege arpinera, teepi coga rooriye lica awadrecā, yepā teepi epu pana cire yaacrajemepi Acejiyame me mename seemo cina cabucewe je liiyepu.

²⁶ Egāsu weene Moose miiji Oogārāneji mene cabu ituge acnema, Acejiyame Moose ne ngena jejuji budre cabu ca arpinera poto cidi me. Moose liba aclajuteji enajuji ayeji uli gome, Acejiyame te jejuji egā, 'Cane Abrahamo, Isacako, Yakobu naabibime Acejiyame gāne.'

²⁷ Tabe nata budre biname bime Acejiyame lica gyene yepä eei bime, lui cina ireclota gemi. Weene mage betäjiye, egä budre biname cina lica cirege ireclota me arpinera.”

Lui Cotre Gyene Baborage

(Matayo 22:34-40; Luuka 10:25-28)

²⁸ Yepä cotre abiberäja biname te liba itecijige Yeesu piiyepu Sadukea sigu biname cina lipu jicelisi, piiyepu tabe liba jepänige, egä Yeesu teebibine lipu miiji mene ca jewecnimige, tabe piba ädige Yeesu bau me, itemlige egä, “Lui cotre gyene baborage?”

²⁹ Yeesu jejige egä, “Age sena lui baborage cotre: ‘Israela biname weene itecijinege! Yageyame, lui sine mime Acejiyame, tabe yepä taatu Yageyame gyene.

³⁰ Weene miiji singi äbita Yageyame, weeme Acejiyame täöpume, siige pui ne aboclomta iyeta weeme owecu mule ca, iyeta weeme ireclota ca, iyeta weeme ngene atwanena ca piiyepu iyeta weeme kokre ca.’

³¹ Pui gomecayame babo cotre lui age sena: ‘Maane miiji biname bime täöpume singi lenaja, maane lipu mäáme täöpume singi birige.’ Nuuja apu baborage cotre lica gyene ai neenenä cina liiyepu.”

³² Piba pui cotre abiberäja biname te Yeesu ne jejige egä, “Abiberäja biname, maane miiji jüicite. Maane toraca jüicite, egä Acejiyame lui yepä taatu gyene, nuuja Acejiyame lica gyene.

³³ Cuta biname te miiji singi Acejiyame täöpume, siige pui ne yaaboclomtuge teeme iyeta owecu mule ca, teeme iyeta ngene atwanena ca piiyepu teeme iyeta kokre ca, cuta tabe miiji singi biname bime täöpume, tabe lipu singi teeme täöpume. Ai lui baborage gyene iyeta iiwäreja cibi cabu ca, lui bine juubudäremusi Acejiyame täöpume, piiyepu nuuja iiwäreja gwidape cabu ca.”

³⁴ Yeesu lui opo ewatnige, egä tabe umle mene ca jewecnistige, siige tabe jejige egä, “Maane mameta gäte biname me äbita, Acejiyame lui ne yaacanuge.” Ai ingwe gaabe ca biname cina wälu ge Yeesu ne cerämu ätemlejame.

Keriso Laasi Nyene

(Matayo 22:41-46; Luuka 20:41-44)

³⁵ Yeesu liba iiwäreja mete caale bora je ebiberäjimige, tabe jüicige egä, “Peei lipu gyene, egä cotre abiberäja biname cina jüicenis, egä Keriso lui Daawida me kaakesaare gyene.

³⁶ Aceji Seemo te Daawida ne ngene atwana ecäruji Keriso poto cidi me iicaname egä,

‘Yageyame te cäme Yageyame ne jejuji:

Maane adnati cäme camu poto cidi ca,

ngälu cane mäáme cubuyame bine

mäáme ernge gawe me cire yaacranemepene.’

³⁷ Siige tabe Daawida te liba Keriso ne einuji teeme Yageyame ca, cije tabe piba lipu gyene Daawida me kaakesaare?” Biname cina jiteciji gege cama Yeesu me mene.

Yeesu Umle Mene Jejananemige Cotre Abiberäja Biname bime Mule poto cidi me

(Matayo 23:1-36; Luuka 20:45-47)

³⁸ Yeesu teeme abiberäja mene cabu apu jüicige egä, “Weene ire cängena cotre abiberäja biname bime täöpume, lui cina singi gemi lecaleca cäbletääpe cama otnetnejame naace me awabame, egä teepi umlerage biname gemi, piiyepu lui cina singi gemi biname cina teebibine aletna puupu cabu cängena awablame.

³⁹ Abasecretna mete cabu teepi singi ngii biname bime puupu cabu adnaterame, piiyepu soriyomu ne liba yaaclitisi, teepi ladna-tärüge miijirage puupu cabu.

⁴⁰ Teepi cuublacubla bime gwidape bine yaawadimusi piiyepu sinäme lecaleca padare irecu lätumutaninini. Peei name pi teepi Acejiyame bau ca mäpurage daremu ne cirege päpäna.”

Cuubla me Owecu Gwidape

(Luuka 21:1-4)

⁴¹ Yeesu liba adnatäneji enajige iiwäreja mete caale bora rarekaake acrana gwidape gome, tabe ire ca ewadanemige biname cina lipu rarekaake ebäcnisi. Bucurage dogwe biname cina ebäcnisi mage rarekaake bine.

⁴² Puma cita ca yepä owecumete cuubla te toclige, neenenä matimati rarekaake aacitige.

⁴³ Yeesu abiberäja bägrä bine ala tesoglicmige, jejemige egä, “Cane toraca mene jijenini-nine, ai owecumete cuubla te magerage becitiige, poto cina matimati bicranimisi.

⁴⁴ Naace, teepi matimati rarekaake bine bicranimisi teeme bucurage cabu ca, yepä cuubla te iyeta becitiige, teeme lui pisi nyene lenaja täöpume.”

13

*Yeesu me Mene Iiwäreja Mete Iigareca poto cidi me
(Matayo 24:1-2; Luuka 21:5-6)*

¹ Yeesu liba iiwäreja mete ne sebmaliige, teeme yepä abiberäja bägrä te jejige egä, “Abiberäja biname, maane ire lipu modamoda kula gemi piyepu lipu modamoda mete gemi!”

² Yeesu jejige egä, “Maane jepänenemite ai modamoda mete bine. Ai iyeta iigareca cirege, siige lica yepä kula ne abmala nuuja kula me tumeca.”

*Mäpu cina Lipu Cirege Otni
(Matayo 24:3-14; Luuka 21:7-19)*

³ Pui ingwe gaabe ca Yeesu liba adnatänejiji enajige Olibi Uli Podo cabu, iiwäreja mete cabu opire enajige, piba Peteru Yakobu Yoane Andrea naabi tujige teeme bau me, siige ogä itemlänsisi egä,

⁴ “Niijini ai mule cina liba cire läbitipesi. Ngena cewecu cina cirege awaba, egä padare te bii tatyaramtigi ai mule cina äpletnecame?”

⁵ Yeesu jääjänige egä, “Weene miiji cängena ire, cije nuuja te weebibine ingletnäjinuge.

⁶ Bucurage biname cina cire saaclepi căme ngii cabu, cire jii cemepesi egä, ‘Cane Keriso säne’, siige teepi bucurage biname bine cire yaangletnäjemepesi.

⁷ Cuta weene liba cire itecijanipi cubu ala mameta piyepu liba idre cire itecijanipi cubu poto cidi me cudecewe je, weene călu te gone jitinuge, ingle ai te miiji cire läbitepi. Yepä ai padare me ngälugaabe căro camu gyene.

⁸ Yepä gawe biname cina cirege cubu iicana nuuja gawe biname cama, cuta yepä gawe mope biname te nuuja gawe mope biname cama. Cuta ocneja cina cirege maramara cewe cabu ta, piyepu gane cirege. Ai iyeta lui mäpu padare me agedna taatu gyene, epu pana mäpumäpu magebi te lipu cupace laplongamtuge bägrä ärngime.

⁹ Pui padare cabu weene ire cängena biname bime täápume. Teepi weebibine cirege oomlana ablaweja puupu cabu waadename piyepu weebibine abasecretna mete cabu ta cirege atemeläja. Weene cirege aclajuta gawe mope biname bime opo gaabe je cămiji pi naace täápume teebibine Miiji Mene jajaneneme.

¹⁰ Miiji Mene miiji niinäce acenena iyeta cewe gaabegabe ta, ingwe ca piba ai padare me ngälugaabe te cire tädepi.

¹¹ Weebibine liba cire iwadipesi ablaweja puupu me, weene niinäce gaabe me ngenecu gone, egä weene ngena cire jii cemepewe, yepä weene eei mene jii cuye Acejiyame te ngena mene icärininuge peei padare cabu. Peei lui weeme mene lica cirege, yepä Aceji Seemo te ngena atwana cire icäranipi.

¹² Cuta piyepu biname cina cirege teeme naane igane bine budre me ceera piyepu babe cina teeme bägrä bine. Bägrä cina teeme mage babe bine cirege äingeja piyepu budre me ceera.

¹³ Iyeta biname cina weebibine cire jimugitnipesi cămiji pi. Yepä laati te ngenecu kokre cire yaanajepi ngälu ngälugaabe, tabe iyeteta ireclota ne cire jääpänepi.”

*Baborage Mäpu
(Matayo 24:15-28; Luuka 21:20-24)*

¹⁴ Yeesu abiberäja bägrä bine cerämu jejemige egä, “Weene liba niiyarage wälumeteyame ne cire jepänepeye aclajuteji puupu cabu, lui teeme täápume cude gyene,” (acnema biname tabe miiji umle ai ngena tääpu myene) “piba Yuudea gawe cabu lui biname cina miiji uocratna podo cabu me.

¹⁵ Lui cina mete toro cabu lui puupu cabu diibe loocinusi, mete me gone äbäcna gwidape waadename,

¹⁶ piyepu lui cina calwacupi cabu, teepi gone äcnära cewe me căbletääpe waadename, yepä teepi iyeta miiji watata uocratna.

¹⁷ Ogi nemi eei magebi, lui cina mäpumäpu cirege pui padare cabu piyepu lui cina ngame meeramera bägrä cama.

¹⁸ Ireçu ätumutipeye, egä pui mule te gone läpletnutuge gäbu padare cabu,

¹⁹ ingle pui padare cabu lui mäpu baborage gyene iyeta poto mäpu cabu ca, lui cina ituge äpletnuta ai gawecewe me agedna cabu ca ngälu ai taje, cuta ingwe ca lica cirege äpletnuta.

²⁰ Yepä Acejiyame te teeme ngena atwanena cabu pui mäpu padare ne uja tuube me itu jewenuji. Tabe liga pepu lica cire jaaweneji, nuuja te ireclota lica cire yaanajepi, pui mule cina liba cire läpletneräjipesi. Yepä teeme äjäcräneji biname bime name pi tabe ngena itu jotwananuji pui padare ne tuube me waweneme.

²¹ Pui padare cabu liba nuuja te cire jijipi egä, 'Ire, age sena Keriso,' coo egä, 'Tabe isino,' gone jäätrunguye.

²² Walya Keriso piyepu walya mename biname cina cire saaclepi. Teepi ciitaca mule bine piyepu calu te äti mule bine cire jaawenanemepesi Acejiyame me äjäcräneji biname bine angletnejame, teepi liba ibibi cirege peei ne wawename.

²³ Weene ireire inajipi, ingle cane niinäce gaabe me weebibine ituge umle mene jajana.

*Yeesu me Acnenuta poto cidi me
(Matayo 24:29-31; Luuka 21:25-28)*

²⁴ Yeesu cuta jejemige egä, "Pui mäpu padare me ingwe gaabe ca bimu te krokeciye me cire läbitepi, piyepu mabye te lica cire saapacyärepi.

²⁵ Wale cina cabu ca cire saatrametnemepi, piyepu ljalija nuuja gwidape gemi puma, teepi teeme otnetneja gaabe cabu ca cirege äyebhengäja.

²⁶ Piba biname cina cire näpänepesi cebine, Acejiyame bau ca lui te tädujine biname me äbitujine, carbe cabu cirege äina baborage kokre piyepu jamyacu apaclyera cama.

²⁷ Puma cita ca cane mename seemo bine cire jäätyepemepene Acejiyame me äjäcräneji biname bine abasecretname iyeta poto ca ai gawecewe cabu."

*Ngene ca Agli Mene Piigi Uli poto cidi me
(Matayo 24:32-35; Luuka 21:29-33)*

²⁸ "Weene labiberäjininuye piigi uli cabu ca. Teeme ciipe liba migi ca tapanininusi, ngänglä laame tucu taawenimuge, siige weene umle gemi, egä kämäge mameta gyene.

²⁹ Cuta weene liba cirege päpäna, cane lui mule poto cidi me bii jijininine, weene piba umle cire äbitipeye, egä cäme acnenuta padare mameta gyene. Cane grana gome säne.

³⁰ Cane toraca mene jijenininine, biname lui cina ireclota page ai taje, teepi iyeta budre lica cirege äbita, ngälu iyeta ai mule cina liba cire läbitipesi.

³¹ Dume piyepu gawe cirege apira, yepä cäme mene te lica cirege apira."

*Nuuja Biname te Umle Lica Bimu coo Padare
(Matayo 24:36-44)*

³² "Yepä nuuja biname te umle lica gyene bimu coo padare, cane lui te Acejiyame bau ca tädujine biname me äbitujine, cäme acnenuta tääpume. Cabucewe je lui Acejiyame me mename seemo teepi umle lica gemi, cuta cane Acejiyame me Bägrä cane cuta umle lica gäne, yepä Babe taatu umle gyene.

³³ Peei name pi weene müiji cängena ire, ireclota inajipi, ingle weene umle lica gemi ai mule cina liba cire läbitipesi.

³⁴ Ai lui epu pana gyene, lui biname te cewe ne saabmaluge, läduge cudecewe cewe me. Tabe teeme mete piyepu iyeta gwidape bine saabmalimuge teeme kaakesea bägrä bime ime cabu. Tabe teeme yepäyepä bine maramara kaakesea yääcäranemuge. Grana ire atwi biname ne tabe jaajuge ireire lenajame.

³⁵ Yepä pana weene cuta müiji ireire inajipi, ingle weene umle lica gemi mete yageyame te liba tacnenige. Ai lui pama mämletca me, coo ciye duusa me, coo sewali mameta me, coo bimu acitame.

³⁶ Weene ireire inajipi! Tabe liba bojäcu tädenige, nüya gyene tabe weebibine ute cabu ädära.

³⁷ Cane aga ngena bii jijenininine weebibine, ai lui iyeta biname bime tääpu myene. Weene ireire inajipi!"

14

*Gläamu Jecijemige Yeesu ne Aglime
(Matayo 26:1-5; Luuka 22:1-2; Yoane 11:45-53)*

¹ Neeneni bimu ingwe gaabe ca biname cina äsuplengta trii ne jewenisi piyepu uutneca cäco buluduu bine erwäjanemisi seben bimu ngalebora ngene apecname, teeme saarewale bine liba sisemujisi Aikupito ca. Pui padare cabu modamoda iiwäreja biname piyepu cotre abiberäja biname cina gläamu jecijemige Yeesu ne lipulipu ogä oomlaname siige budre me aglime.

² Teepi jüicisi egä, "Mine äblicäco teebine oomlana trii biname bime irewale, cije teepi cubu jaagednusi mine cama."

*Magebi te Yeesu ne Oil ca Eganige Betaniya Cewe je
(Matayo 26:6-13; Yoane 12:1-8)*

³ Pui padare cabu Yeesu Simona me mete cabu jage Betaniya je. Simona lui lepera pita cama ge niinäce. Yeesu deedei liba äbitige, yepä magebi te tabacitige alabasta kula karpu

cama. Karpu ngalebora puga ge miijirage lengo nardus oil, lui ne baborage daremu ca jaaletnusi. Tabe karpu ne etebicige, oil ne epadurige Yeesu me mope cabu.

⁴ Poto biname cina claabe me äbitininisi, ajanininisi egä, “Niivarage gyene ai oil ne pepu papa apadura.

⁵ Miiji cire yaacanejisi aletname trii hanred rarekaake ca, siige pui rarekaake owecumete biname bine cire yääcäremejisi.” Siige teepi teebine ujäclisi.

⁶ Yepä Yeesu jejemige egä, “Obmaleye teebine. Weene ngeno me ngenecu mäpu me joweneneye? Tabe miijirage mule ne bii jewenige căme täápume.

⁷ Iyeta padare cabu owecumete biname cina weene cama yaacrajimuge, siige weene miiji gemi teebibine ätityerame weene lui padare cabu singi, yepä cane weene cama lica pagege iyeta padare cabu lenaja.

⁸ Peei name pi miiji gyene, egä tabe jewenige, tabe lui mule ne ibibi ge wawena. Tabe căme tääpe ne niinäce gaabe me bii beganige gape me acitame.

⁹ Cane toraca mene jijenininine, biname cina luma Miiji Mene ne yaacenanusi ai gawecewe cabu ta, teepi cirege jajanena ai magebi me ngene apecna täápume, tabe ngena ne bii jewenige căme täápume.”

*Yuuda Mene Jewenige Yeesu ne Awabame Budre täápume
(Matayo 26:14-16; Luuka 22:3-6)*

¹⁰ Yeesu me twelb abiberäja bägrä bime yepä te ngii Yuuda Isakariyota ädige modamoda iiwäreja biname bime bau me, jejemige tabe Yeesu ne awabame agli täápume.

¹¹ Teepi liba itecijemige, teepi gege ecisi, siige jejisi Yuuda ne teebine daremu ceerame. Puma cita ca tabe miiji gaabe ne jirngige Yeesu ne awabame teeme budre täápume.

*Yeesu Teeme Abiberäja Bägrä cama Äsuplengta Deedei Erwige
(Matayo 26:17-25; Luuka 22:7-14, 21-23; Yoane 13:21-30)*

¹² Trii padare puga ge Israela biname cina liba uutneca căco buluduu bine yäärwäjimusi. Pui padare me niinäce bimu cabu, teepi liba maamoi bine yaaglecimusii äsuplengta deedei täápume, Yeesu me abiberäja bägrä cina teebine itemlisi egä, “Maane singi luma mäte cine äsuplengta deedei ne amacetnäjame mäame täápume?”

¹³ Tabe teeme neeneni abiberäja bägrä bine apu mene cama jäätyepige egä, “Weene iclege babo cewe me. Weene puma opopa eyeniye rooriye cama, lui te niuye karpu ne secanenige,

¹⁴ siige teebine ingwe icwepeye tabe lui mete cabu abacitenige. Jejepeye mete yageyame ne egä, ‘Abiberäja biname te singi umle äbitame, egä lese nyene puupu, tabe luma teeme abiberäja bägrä cama äsuplengta deedei äbitenige?’

¹⁵ Tabe weebibine jiwabenige baborage cabu puupu ne. Pui puupu cabu piti nemi iyeta gwidape, siige puma emacetnäjepeye deedei mime täápume.”

¹⁶ Abiberäja bägrä cina abyemeräsi, aalige babo cewe me, jepänemäsi iyeta gwidape Yeesu me mene ibi. Teepi äsuplengta deedei puma emacetnäjäsi.

¹⁷ Liba mämleteca ge, Yeesu atyaramtäge teeme twelb abiberäja bägrä cama pui mete cabu me.

¹⁸ Teepi liba deedei äbitininisi, Yeesu jejemige egä, “Cane toraca mene jijenininine, weeme yepä lui te deedei äbitenige cane cama, cebine budre me pa nawabepi.”

¹⁹ Teepi ngenecu mäpu me äbitininisi, siige yepäyepä jejananisi egä, “Yageyame, cane lica.”

²⁰ Yeesu jejemige egä, “Ai lui weene twelb bime yepä gyene, lui te buluduu ne yiglenutenige cane cama disi cabu.

²¹ Cane lui te Acejiyame bau ca tädujine biname me äbitujine, budre pa läbitepene, Oogäräneji mene te lipu jicenige căme poto cidi me. Yepä oge yene pui biname, cebine lui te nawabenige budre täápume. Teeme täápume miiji cirege tabe liba lica cire laplimleji.”

*Yeesu Teeme Abiberäja Bägrä cama Aareto ne Erwige
(Matayo 26:26-30; Luuka 22:15-20; 1 Korinto 1:23-25)*

²² Teepi liba deedei erwäjisi, Yeesu piba buluduu ne ecatige, Acejiyame ne eso ecärige, itrecige, abiberäja bägrä bine ecärimige, jejemige egä, “Ecateye. Ai lui căme tääpe gyene.”

²³ Tabe cuta kwäye ne waina niuye cama ecatige, Acejiyame ne eso ecärige, ecärimige teebibine, siige teepi iyeta pui kwäye cabu ca enisi.

²⁴ Yeesu jejemige egä, “Ai lui căme uudi gyene, lui te mameta gyene apira bucurage biname bime täápume piyepu lui te klaje jecnenige Acejiyame lui kirece mene ituge jaji biname bine niuya cabu ca äsecrerame.

²⁵ Cane toraca mene jijenininine, cane cääri waina niuye lica cirege nani ngälu pui padare cabu, cane liba kirece waina niuye cire yaanepene Acejiyame me puupu cabu cabucewe je.”

²⁶ Puma cita ca teepi uupera ne etangisi, siige äsige, eclige Olibi Uli Podo cabu me.

*Yeesu piyepu Peteru**(Matayo 26:31-35; Luuka 22:31-34; Yoane 13:36-38)*

²⁷ Yeesu abiberäja bägrä bine jejemige egä, “Weene page iyeta cebine nabmaleniye, uu-cratnininiye, ingle mene oogäräneji gyene căme poto cidi me egä, ‘Acejiyame te maamoi ire atwi biname ne budre me cire yaaglepi, siige maamoi cina maramara cire yaaplidnärepesi.’

²⁸ Yepä cane liba budre cabu ca pa larpinantepene, cane piba weeme niinäce gaabe me Galilaya me pa lädepene.”

²⁹ Peteru Yeesu ne jejiige egä, “Ngänu gyene liba iyeta poto cina meebine abmala, cane licarage naabmalenine meebine.”

³⁰ Yeesu jejiige egä, “Cane toraca naajenine, airage ciyye cabu maane cebine niinäce nesae gääbu nainenite, piba paulo te neenenite manu ala sengenenige.”

³¹ Peteru kokre cama jejiige egä, “Ngänu gyene teepi cebine maane cama budre me agli, yepä cane licarage naajenine meebine.” Iyeta abiberäja bägrä cina cuta yepä mene jejanisi.

*Yeesu Ireçu Ätumutige Getesemane je**(Matayo 26:36-46; Luuka 22:39-46)*

³² Teepi eclige cewe ngii Getesemane me. Yeesu abiberäja bägrä bine jejemige egä, “Weene ama adnatärineye, cane lädene ireçu ätumutame.

³³ Tabe Peteru Yakobu Yoane naabibine aacanänige teta cama. Yeesu babo ngenecu mäpu me äbitige piyepu wälu te joomlige,

³⁴ siige tabe jääjänige egä, “Ai baborage ngenecu mäpu te cebine budre pana nawenenige. Weene ama ireclota sinäjänege, cebine nawagrijeje.”

³⁵ Puma cita ca tabe matikäli padare abotäntige, oweowe ajarige gawe cabu me, ireçu ätumutige, egä liba miiji gyene ai mäpu padare te teebine äsuplengtame.

³⁶ Tabe apu jiicige egä, “Căme Babe, maane miiji gäte iyeta gwidape bine wawenecame. Maane ai mäpu ne căme bau ca iyeblingti. Yepä gone căme singi ne jaawenute, määme singi ne jewenepi.”

³⁷ Puma cita ca tabe tacnenutige, abiberäja bägrä bine ute cabu täädäränige. Tabe Peteru ne jejiige egä, “Simona, maane nää ute gäte? Maane nää äblicăco gäte ireclota lenaja matikäli padare?”

³⁸ Weene ireclota inajänege piyepu ireçu ätumutäneye, piba apicetnära padare cabu weene lica itrametnenänige. Weeme seemo cina singi gemi căme singi ne wawename, yepä weeme tääpe cina kokre căco gemi.”

³⁹ Tabe cuta căäri acnenutige, pepu pana mene ca ireçu ätumutige niinäce liiyepu.

⁴⁰ Tabe liba tacnenutige, cuta ute cabu căäri teebibine täädäränige, ingle teeme ireçu mäpurage ge. Teepi liba alotneränisi, teepi umle lica ge teebine ngena mene jajime.

⁴¹ Yeesu nesae me abotäntige ireçu ätumutame, siige tabe liba tacnenutige, abiberäja bägrä bine jääjänige egä, “Weene ute camu gämi, ngene oocenäniye. Siige, padare te bii tatyaramtige. Cane lui te Acejiyame bau ca tädujine biname me äbitujine, cebine mameta gyene ceera conocono biname bime ime cabu me.

⁴² Arpineräneye, biiri wääjene. Lui biname te cebine nawabenige budre me aglime, tabe mameta gyene.”

*Yeesu ne Joomlisi**(Matayo 26:47-56; Luuka 22:47-53; Yoane 18:3-12)*

⁴³ Yeesu liba camu mene iicema cabu jage, Yuuda teeme twelb abiberäja bägrä bime yepä te piba tatyaramtige. Teta cama biname cina seclige cubu turikä piyepu gabagaba cama. Modamoda iiwäreja biname, cotre abiberäja biname piyepu poto Israela modamoda biname cina jityepimisi teebibine.

⁴⁴ Yeesu ne budre me awabayame biname te cewecu ne bii becitige pui biname bime tääpume egä, “Cane lui biname ne jetecnenine, peese nyene weene lui tääpume singi gemi. Joomlepeye, weeme ire atwi ngalebora ecanepeye.”

⁴⁵ Yuuda liba tatyaramtige, tabe piba conocăco ädige Yeesu bau me, jejiige egä, “Abiberäja biname,” siige jetecnige teebine.

⁴⁶ Biname cina piba Yeesu ne kokre cama joomlisi.

⁴⁷ Lui cina aclajuteji puga icrajige, teeme yepä te cubu turikä ne sisatige, yoororige, siige yepä biname me tablame ne iyeta jelăcnutige. Pui lui iiwäreja mope biname me kaakesea bägrä ge.

⁴⁸ Yeesu biname bine jejemige egä, “Weene naaclige cubu turikä piyepu gabagaba cama cebine oomlaname epu pana, egä cane cubucubu biname gäne.

⁴⁹ Iyeta bimu gaabegabe cane weene cama ge, iiwäreja mete cabu yaabiberäjimune, weene piba cebine lica noomluye. Apu gyene, ingle lui mene oogäraneji gyene căme poto cidi me, miiji toraca me äbita.”

⁵⁰ Puma cita ca iyeta abiberäja bägrä cina teebine ebmalisi, siige uucratnige.

⁵¹ Yepä mamye biname te Yeesu ne ingwe icwige. Tabe yepä taatu căbletääpe ca asigräneji ge. Biname cina liga teebine joomli-si,

⁵² tabe căbletääpe ne sebmalige, siige cuutacuta uucrige.

Yeesu Israela Mutre Biname bime Opo Gaabe je

(Matayo 26:57-68; Luuka 22:54-55, 63-71; Yoane 18:13-14, 19-24)

⁵³ Yeesu ne ecanisi iiwäreja mope biname me mete me, liiyeme iyeta modamoda iiwäreja biname, cotre abiberäja biname piyepu nuuja Israela modamoda biname cina abasecret-nuji.

⁵⁴ Peteru seeji cude padare ca Yeesu ne ingwe icwige, siige abacitige iiwäreja mope biname me mete caale bora me. Tabe puga adnatige awamuta biname bime cama, gäbu jemajige uliobo gome.

⁵⁵ Modamoda iiwäreja biname piyepu iyeta mutre biname teepi biname bine jirngemisi Yeesu ne aitnejame budre me agli tääpume, yepä teepi nuuja ne lica jepänisi.

⁵⁶ Bucurage biname cina puu Yeesu ne walya jeitnäjis, yepä teeme mene yepä lica ge.

⁵⁷ Piba poto biname cina abujengäjige, walya jeitnäjis egä,

⁵⁸ “Cine jitecijisi tabe iicana je egä, ‘Cane ai iiwäreja mete ne yiigarecenine, biname cina lui ne erangujisi, piba nesae bimu cama căäri cuta pa yaarangepene nuuja ne, lui biname biji arangäneji mete lica ge.’ ”

⁵⁹ Yepä ai biname bime mene cuta yepä ibi lica gemi.

⁶⁰ Iiwäreja mope biname te biname bime opo gaabe abujängtige, Yeesu ne itemlige egä, “Baa, määme nuuja daremu mene lica gyene, teepi lipu meebine naitnäjenisi.”

⁶¹ Yepä tabe bojäcu enajige. Iiwäreja mope biname te căäri itemlige egä, “Nää, maane Keriso säte, biname bine niya cabu ca lui te isecrärenemite, cine lui me ngii ne yaawepy-eräjusi, teeme Bägrä?”

⁶² Yeesu jejige egä, “Yoo, cane säne. Cuta weene cebine pagege päpäna, Acejiyame bau ca lui te tädujine biname me äbitujine, kokre Acejiyame me camu poto ca adnatäneji piyepu carbe cabu äina gawe me.”

⁶³ Iiwäreja mope biname te teeme căbletääpe ne idericige awabame, egä tabe Yeesu ne panyamete jepänige, siige jiicige egä, “Mine nuuja singi lica gemi cerämu poto biname cina teebine aitnejame,

⁶⁴ ingle weene bii bitecijinige, tabe lipu Acejiyame me ngii ne sabe bii jewenige, teeme bägrä ca lipu bainige. Weene lipu ngene jotwanininiye teeme poto cidi me?” Teepi iyeta jiicisi egä, “Teeme niya pisi nyene, pui name pi teebine miiji budre me agli.”

⁶⁵ Piba teeme poto cina giye abacitinisi teebine mote ca ätywame. Teepi căbletääpe ca teeme opo icwabisi, yoororisi, jejisi egä, “Nijini, laati te noororige?” Awamuta biname cina cuta teebine yoororisi.

Peteru Yeesu ne Jeinige

(Matayo 26:69-75; Luuka 22:56-62; Yoane 18:15-18, 25-27)

⁶⁶ Peteru liba puga ge pui mete puutucu je, iiwäreja mope biname me kaakesea ngulebägrä te toclige,

⁶⁷ teebine jepänige gäbu amaja je uliobo gome. Tabe cängena ire acitige teeme bau me, jejige egä, “Maane cuta totnetnäjumete Yeesu Nasareta biname cama.”

⁶⁸ Yepä tabe ainige, jojige egä, “Cane umle lica gäne maane ngena poto cidi me jiicenite.” Tabe puma cita ca awetäntige, ädige caale grana wajwa me, siige paulo te ala sengenige.

⁶⁹ Pui kaakesea ngulebägrä te cuta căäri jepänige teebine, jejemige lui biname cina puga aclajuteji icrajige egä, “Ai biname lui teeme yepä gyene.”

⁷⁰ Yepä Peteru căäri ainige. Matikäli padare ingwe ca lui cina aclajuteji puga ge Peteru ne jejisi egä, “Toraca gyene, maane teeme yepä gäte, ingle maane Galilaya biname gäte.”

⁷¹ Peteru jejemige, “Cane Acejiyame me ngii cabu jijenininine, egä cane umle lica gäne pui biname, weene lui poto cidi me jiicenemeye.”

⁷² Piba taatu paulo te neeneneni me ala sengenige. Peteru ngene jotwige, Yeesu lipu teebine jejige egä, “Maane cebine niinäce nesae gäabu nainenite, piba paulo te neeneneni manu ala sengenenige.” Siige tabe ele jiplecmalige.

15

Yeesu Pilato me Opo Gaabe je

(Matayo 27:1-2, 11-14; Luuka 23:1-5; Yoane 18:28-38)

¹ Liba kroke sewalige, piba taatu modamoda iiwäreja biname, cotre abiberäja biname, piyepu nuuja modamoda Israela biname, iyeta lui mutre biname, cina mene jitransisi Yeesu täapume ngena wawename. Teepi teebine seea ca jetäyisi, Pilato bau me ecanisi.

² Siige, tabe Yeesu ne itemlige egä, “Maane nää Israela biname bime mope biname gäte?” Tabe jejige egä, “Yoo, maane peega bii jiiците.”

³ Modamoda iiwäreja biname cina Yeesu ne bucurage gwidape poto cidi me jeitnäjisi,

⁴ siige Pilato Yeesu ne cääri itemlige egä, “Nää, mäame nuuja daremu mene lica gyene? Egäsu maane näatecijenige, teepi lipu meebine bucurage gwidape poto cidi me naaitnäjenisi.”

⁵ Yepä Yeesu bojäcu enajige, daremu mene lica jewecnistige, siige Pilato cälu te jitage.

Pilato Yeesu ne Budre me Jitraniige

(Matayo 27:15-26, Luuka 23:13-25; Yoane 18:39-19:16)

⁶ Israela biname cina liba kämäge gaabegabe äsuplengta soriyomu ne jaawenusi, Pilato piba krokeciye mete cabu ca yaasatuge teepi lui biname täapume birige singi.

⁷ Pui padare cabu puga ge krokeciye mete cabu biname ngii Baraba. Tabe poto biname cama cubu itu jiičananepe Rooma modamoda biname bime täapume. Teepi biname ne itu yaaglepesi budre me teeme cubu ngalebora, siige krokeciye mete bora yaacranemepesi.

⁸ Siige, biname cina eclige, Pilato ne itemlisi yepä biname ne krokeciye mete cabu ca asatame, tabe lipu jaawenuge pui padare cabu iyeta kämäge gaabegabe.

⁹ Pilato itemlige egä, “Nää, weene singi gemi cane Israela mope biname ne asatame weeme täapume?”

¹⁰ Pilato umle ge, egä modamoda iiwäreja biname cina teebine Yeesu bii becärisi, ingle teepi teebine ire patre jeglisi.

¹¹ Puma cita ca modamoda iiwäreja biname cina biname bine giri jicranimige teepi Pilato ne jajime tabe Baraba ne asatame lica Yeesu ne.

¹² Siige Pilato biname bine cääri itemlimige egä, “Cije cane piba ngena jewenenine teeme täapume weene lui ne yaainuye Israela biname bime moyeyame ca?”

¹³ Teepi ala abayaninisi egä, “Baarge uli cabu jääbyecresil!”

¹⁴ Pilato itemlimige egä, “Ngena name pi? Tabe ngena niyya ne itu tewenumi?” Yepä teepi baborage ala abayaninisi egä, “Baarge uli cabu jääbyecresil!”

¹⁵ Pilato singi ge biname bime ngenecu miiji me wawename, siige tabe Baraba ne sisatige krokeciye mete cabu ca teeme täapume. Puma cita ca tabe jejemige Yeesu ne adnaname, siige biname bine ecärimige teepi baarge uli cabu äbyecrame.

Rooma Cubu Biname cina Yeesu ne Ätutena pana Jewenanisi

(Matayo 27:27-31; Yoane 19:2-3)

¹⁶ Puma cita ca Rooma cubu biname cina Yeesu ne ecanisi Pilato me mete opo gome me, siige ala tesoglicmisi lui cina yepä sange teta cama.

¹⁷ Teepi Yeesu ne ciriyäciriyä cäbletääpe esigrisi, pägepäge seeasea ne jemlemaltisi, teeme mope cabu ecitisi krauni täapume. Teepi ai ne ätutena pana jewanisi, egä tabe babo mope biname gyene.

¹⁸ Puma cita ca teepi jewablisi teebine, jejisi egä, “Sebore Israela biname bime moyeyame!”

¹⁹ Teepi teebine suru ca yoororanisi mope gome, mote ca ityewäjisi, siige sinäme kokorare ca ipednanemisi teebine opo gaabe me acitame.

²⁰ Teepi teebine apu ätutena pana jewanisi, piba ciriyäciriyä cäbletääpe ne jiiiremutisi, teemerage cäbletääpe esigrärisi. Puma cita ca teepi teebine ecanisi baarge uli cabu äbyecrame.

Yeesu ne Baarge Uli cabu jibyecrisi

(Matayo 27:32-44; Luuka 23:26-43; Yoane 19:17-27)

²¹ Puga ge yepä rooriye ngii Simona. Tabe lui Kurene cewe biname gyene, Aleksanda Ropus naabime babe. Tabe calwacupi cewe ca tacnige, siige cubu biname cina giri jecitisi Yeesu me baarge uli ne acaname.

²² Puma cita ca teepi Yeesu ne ecanisi cewe ngii Gologota me, lui me aboclomta egä, ‘Mopekaake Cewe’.

²³ Teepi teebine liga ecärisi miira traci cama alengläciteji waina niyye, yepä tabe lica enige.

²⁴ Piba teepi teebine toto ca jibyecrisi baarge uli cabu. Siige puma cita ca teepi matimati kula cabu teeme ngii bine yoogärimisi, piba yiisabäjemisi pui kula bine umle äbitame, egä teepi lipulipu Yeesu me cäbletääpe bine abelename.

²⁵ Peei lui krokebimu ge, teepi liba teebine baarge uli cabu jibyecrisi.

²⁶ Yeesu me mope gome oogäräneji ge teeme budre ingle poto cidi me egä, ISRAELA BINAME BIME MOPE BINAME.

²⁷ Teepei cuta neeneneni cubucubu biname bine jääbyecrisi baarge uli cabu. Yepä lui Yeesu me camu poto ca, nuuja lui teeme säwäci poto ca.

²⁸ Apu mule ca ai Oogäräneji mene te toraca me äbitige egä, "Teebine cubucubu biname pana jewenisi."

²⁹ Lui biname cina Yeesu ne isuplengäjisi, teepi jisädanisi, mope akocnäjini, jejisi egä, "Baa, maane age säte, iiwäreja mete ne lui te yiigarecenite, siige nesae bimu ngalebora cääri erangenite.

³⁰ Maane määmämu müjji äbiti, baarge uli cabu ca täini."

³¹ Cuta modamoda iiwäreja biname piiyepu cotre abiberäja biname cina Yeesu ne pepu jisädanisi. Teepei ajaninini egä, "Tabe poto bine müjji jaawenanemuge, yepä tabe äblicäco teemämu müjji äbita.

³² Tabe Keriso ca lainuge, biname bine lui te niija cabu ca birige äsecreta, piiyepu Israela biname bime mope biname ca, siige tabe täinege baarge uli cabu ca cine päpäname, cine piba jitrunge-nisi teebine." Lui bine jääbyecrisi teeme gome, teepi cuta teebine jisädenäsi.

Yeesu me Budre

(Matayo 27:45-56; Luuka 23:44-49; Yoane 19:28-30)

³³ Liba bimu duusa ge, krokeciye te cewe ne iyeta icwabige nesae awa cama.

³⁴ Mämle bimu me Yeesu babo tagepogogo ca ala abayige egä, "Eeli, Eeli lama sabatani," peei lui egä, "Cäme Acejiyame, cäme Acejiyame, maane ngeno me cebine nägyite?"

³⁵ Poto lui cina aclajuteji icrajige teeme gome, jitecijisi, jicisi egä, "Itecijinege, tabe Eliya ne ala tesoglecenege."

³⁶ Puma cita ca yepä te tuuwamige, waarpopale pana gwidape ne caapocapo waina niije cabu yiglenutige, suru ca jigadige, isinglantige Yeesu me tage cabu me, jiiige egä, "Mine jääpänesi, Eliya liba tädenige teebine ätrungentame."

³⁷ Piba Yeesu baborage tagepogogo ca ala abayige, siige budre äbitige.

³⁸ Iiwäreja mete cabu lui baborage cäbletääpe adadnäneji ge, äderäriige cabu ca ngälu gawe me.

³⁹ Cubu biname bime mope biname, lui te aclajuteji enajige Yeesu me opo gaabe, liba jepänige tabe lipu budre äbitige, tabe jiiige egä, "Toraca, ai biname lui Acejiyame me Bägrä gyene."

⁴⁰ Magebi puga ge cudecewe ca ire. Teeme yepä lui Mariya Magadala cewe magebi tage, nuuja lui Mariya tage lui iganerage Yakobu piiyepu Yoose naabime mage, yepä lui Salome tage.

⁴¹ Teepei Yeesu cama jage, tabe liba Galilaya je waatnetnäjuge, teebine yäätityeräjusi. Cuta poto cerämu magebi puga ge, lui cina saaclepi Yeesu cama Yerusalema me.

Yeesu ne Gape cabu Ecitisi

(Matayo 27:57-61; Luuka 23:50-56; Yoane 19:38-42)

⁴²⁻⁴³ Mämleteca liba mameta ge, Yoosepa Arimatea cewe biname te tatyaramtige. Tabe yepä müjjiirage mutre biname ge, lui te padare ne jewagrijiige Acejiyame te biname bine waadename. Ingle peei lui Fraide ge, Sabade bimu me amacetnäja bimu ge, tabe tii ecanige, Pilato bau me ädige Yeesu me budrekaake tääpume.

⁴⁴ Pilato cälu te jitiige ätecijame, egä Yeesu uja budre bäbitige. Tabe jejige ala asoglecame cubu mope biname ne, siige itemlige egä, "Yeesu nää uja budre bäbitige."

⁴⁵ Tabe liba umle äbitige cubu mope biname bau ca, egä Yeesu budre ge, tabe Yoosepa ne jejige teeme budrekaake ne acatame.

⁴⁶ Puma cita ca Yoosepa ädige, bulubulu cäbletääpe ne jeletnige, Yeesu ne sitru-ngamtige, cäbletääpe ca tope etnige, siige gape cabu me ecitige, lui gape ne ituge uurana baborage kula ngalebora. Piba tabe baborage kula ne epetregäjige gape grana armime.

⁴⁷ Mariya Magadala cewe magebi piiyepu Mariya Yoose me mage teepi jepänäsi, tabe Yeesu ne luma ecitige.

16

Yeesu Budre cabu ca Arpinantige

(Matayo 28:1-8; Luuka 24:1-12; Yoane 20:1-10)

¹ Sabade bimu liba apirige, Mariya Magadala cewe magebi, Mariya Yakobu me mage, piiyepu Salome, teepi müjjiirage lengo ngängye bine jeletnemänisi Yeesu me budrekaake ne aganame.

² Sande krokerage, bimu te liba tacitige, teepi ujige gape gome me.

³ Gaabe cabu teepi ajanänisi egä, “Laati te pui kula ne epeträngtenige gape grana cabu ca mime tääpume?”

⁴ Teepi apu ajanänisi, ingle kula lui baborage ge. Siige teepi liba atyaräninisi, ire acranänisi, siige jepänänisi, egä kula lui apeträngteji ge.

⁵ Teepi gape cabu me ebäcnänisi, mamye biname ne jepänänisi bulubulu lecaleca cäbletääpe ca asigräneji ge, camu poto cidi ca adnatäneji ge, siige magebi cina cälu te jäätänige.

⁶ Tabe teebibine jääjänige egä, “Gone cälu te jitätuge. Weene Yeesu Nasareta cewe biname ne jirngenäneniye, lui ne baarge uli cabu tibyecrumesi. Tabe ama lica gyene. Acejiyame te teebine budre cabu ca berpinantige. Weene ire! Agesa lui puupu cabu teebine sitwitumesi.

⁷ Äte ujeje! Peteru naabibine jejemeye, egä tabe teeme niinäce gaabe me ädenige Galilaya me. Puma teepi opopa eyenisi teta cama, tabe lipu itu jaajemepi teebibine.”

⁸ Magebi cina äsänisi gape cabu ca, siige uucratnänisi, ingle teepi mage cälu te jäätänige piyepu jaalocnänige wälu name pi. Teepi nuuja biname ne lica jejisi ai poto cidi me, ingle teepi wälu ge.

Yeesu Aboclomtige Teeme Abiberäja Bägrä bime bau me

(Matayo 28:9-10, 16-20; Luuka 24:13-53; Yoane 20:11-18; 20:19-23; Apostolo 1:6-11)

⁹ Sande himu krokerage Yeesu budre cabu ca liba arpinantige, tabe aboclomtige niinäce Mariya Magadala cewe magebi bau me, lui me trupa cabu ca tabe itu yäasecräremepi seben niyya cable bine.

¹⁰ Tabe oclige abiberäja bägrä bime bau me, lui cina Yeesu ne ele jelwisi, jejemige ai poto cidi me.

¹¹ Yepä teepi liba itecijemige, egä Yeesu barpinantige piyepu tabe teebine bii jepänige, teepi lica jitrungisi.

¹² Ai ingwe gaabe ca Yeesu aboclomtige mara opo ca neeneni abiberäja bägrä bime bau me, teepi liba gaabe cabu aalige babo cewe kaake poto cidi ca.

¹³ Siige teepi babo cewe me acnenutäsi poto abiberäja bägrä bime bau me, jejemäsi, egä teepi Yeesu ne bii jepänäsi, yepä teepi lica jäätrungisi teebibine.

¹⁴ Ingwe ca Yeesu aboclomtige lebin abiberäja bägrä bime bau me, teepi liba deedei cabu jage. Tabe teebibine jicnecimige teeme ätrunga cäco piyepu ätecija cäco mule name pi, ingle teepi lica pui biname bine titrungimumesi, lui cina teebine tepänanumesi, egä tabe budre cabu ca itu tarpinantumi.

¹⁵ Tabe teebibine jejemige egä, “Äte naaclepi, iyeta cewe gaabegabe ta Miiji Mene ne ecananepeye iyeta biname bime bau me ai gawecewe cabu.

¹⁶ Laati te liba Miiji Mene ne jäätrunguge piyepu teebine liba niyye ca cuta jääcisäjuye, tabe cirege iyeteta ireclota ne päpäna. Laati te liba lica jäätrunguge, teeme niyya mule cina yaacrajuge, siige teebine cirege atrana.

¹⁷ Lui biname cina Miiji Mene jäätru-ngusi, teepi ai ciitaca mule bine pagege waweneca: teepi cäme ngii cabu niyya cable bine pagege äyecreja biname bime trupa cabu ca, piyepu teepi teeme umle cäco mene ca pagege iicema.

¹⁸ Teepi liba cobyame bine joomlemusi coo piyepu budre niyye liba yaanusi, pui cina äblicäco teebibine sabe wawena. Teepi pagege teeme ime acrana pita biname bime papa cabu me, siige teepi miiji läbitininusi.”

¹⁹ Yeesu Yageyame te liba ai mene teebibine jejananemige, pui kaake poto cidi ca Acejiyame te teebine ecanige cabucewe me, siige tabe Acejiyame me camu poto cidi ca adnatige.

²⁰ Abiberäja bägrä cina ecluji, Miiji Mene ne ecananujisi iyeta poto ta. Yageyame te kokre ecärimuji teepi ciitaca mule bine wawenecame naace tääpume awabame, egä Miiji Mene toraca gyene.

LUUKA ME MIIJI MENE

Niinäce Mene

¹ Yoo, Babo biname Teopilo, maane umle gäte egä bucurage biname cina ituge gije abacita mene oogärame pui modamoda mule poto cidi me lui cina cime gome täbitenäjimesi.

² Cine peei poto cidi me mene ituge ätecija biname bau ca lui cina teemämu ituge päpäna iyeta peei mule teeme agedna cabu ca, piba peei poto cidi me jaajanemepesi.

³ Yoo, ai name pi cane iyeta pui mule poto cidi me cängenarage itu yaabiberäjemepene, cane jitranine cängena mene oogärame mäame täápume,

⁴ maane ai cabu ca toraca umle äbitame pui mule poto cidi me teepi meebine lui itu naabiberäjepesi.

Umlé Mene Yoane Niye ca Äciseja Biname me Aplimla poto cidi me

⁵ Ai mene ne gije jebacitenine Heroda liba Mopeyame täápume enajuji Israela gawe cabu. Puga ge yepä Acejiyame me iiwäreja biname teeme ngii Sakariya. Tabe yepä iiwäreja babo biname ngii Abija me sange cabu kaakesea jaawenuge. Teeme coga ngii Elisabeta cama teepi neeneni lui Aarona me kaakesaare gegi.

⁶ Teepi müjirage laanajuge Acejiyame me opo gaabe je, iyeta mime Yageyame me singi piipepu cotre conocäco jaawenäsi.

⁷ Yepä teepi bägrä cäco ge, ingle Elisabeta äblicäco bägrä päpäna, cuta piipepu teepi moda molyege ge.

⁸ Nuuja taje teeme padare cabu Sakariya teeme iiwäreja kaakesea jewanajuji Acejiyame täápume.

⁹ Yoo, pui iiwäreja biname bime mule apu ge: teepi matimati kula bine teeme ngii cama yiisabäjemusii teeme maramara kaakesea peema cita ca päpäname. Pui bimu cabu Sakariya lui kaakesea jepänige pui kula yiisabeja cabu ca müjimiji lengo gwidape Acejiyame täápume uubuderame. Uubudera padare te tatyaramtuge, tabe piba Acejiyame me iiwäreja mete ngalebora me abacituge,

¹⁰ bucurage biname cina liba tabasecretnige pui mete caale bora me irecu ätumutame.

¹¹ Piba Acejiyame me mename seemo te Sakariya bau me taboclomtuge, pui müji lengo gwidape uubudera dade camu poto ca jeclajutuge.

¹² Sakariya liba jepänige teebine, cälu te jitige, wälu te joomlige.

¹³ Yepä, mename seemo te jejige egä, "Sakariya, wälu gone! Acejiyame te mäame awejena ne secatumii; mäame coga Elisabeta imäbägrä ne pa jääpänepi. Maane teebine ngii ecärepi Yoane ca.

¹⁴ Maane ngenecu müji piipepu gege pa äbitepi, piipepu bucurage biname cina babo gege pa läbitipesi teeme aplimla name pi.

¹⁵ Tabe babo cirege äbita Acejiyame me opo gaabe je. Tabe gone waina niye, coo nuuja sice pana niye nänäja. Teeme aplimla cabu ca Aceji Seemo teeme trupa cabu babo pa läbitepi.

¹⁶ Tabe bucurage Israela biname bine pa yaatrongäremepi Acejiyame mime Yageyame bau me.

¹⁷ Teeme otni lui mime Yageyame me niinäce gaabe myene. Teeme seemo ireclota piipepu kokre mename biname Eliya pana pagege äbita. Yoo, tabe te babe bime ngenecu pa jaatrongäremepi teeme bägrä bime bau me, piipepu ätecija cäco biname bime ngene atwanena pa jaatrongäremepi toraca conocäco mule wawename. Tabe Yageyame me biname bine pa yaamacetnäjemepi teeme otni täápume."

¹⁸ Siige, Sakariya piba mename seemo ne mene jejige egä, "Cane lipu ai mene toraca umle äbita? Cane moda gäne; cäme coga cuta molyege gwene."

¹⁹ Mename seemo te jejige egä, "Cane Gabriyela säne, Acejiyame me opo gaabe naclajutuge. Tabe te cebine nätyepige ai müjirage mene meebine jajime.

²⁰ Yepä, maane cäme mene lica nacatite, peei name pi maane buduma pana äbitenite mene iicemame. Maane bojäcu naanajepi, ngälu pui bimu cabu cäme mene te liba toraca me pa läbitepi. Yoo, peei te teeme padare cabu toraca me pa läbitepi."

²¹ Siige, iiwäreja mete caale bora je biname cina Sakariya ne jewagrijsi egä, "Ngena te bäbitige mete ngalebora je? Mage leca padare, tabe ngena name pi enajenige, lica tasatenige?"

²² Siige, tabe liba tasatige, äblicäco teebibine mene jaji. Teepi puma cita ca umle äbitinisi egä tabe pama apaclyera gwidape ne bii jepänige puma. Mene cäco tabe ime ca teebibine umle jewanemige.

²³ Siige teeme pui kaakesea padare liba apirige, Sakariya acnenutige cewe me.

²⁴ Pui ingwe ca teeme coga Elisabeta mämpumäpu äbitige. Tabe mete gome waanajuge faib mabye cama, jiicige egä,

²⁵ "Yageyame te cebine näityärumi apu äbitame. Ingwe ca cane lica nuuja biname cama ajiri pana lenaja bägrä cäco."

Umle Mene Yeesu me Aplimla poto cidi me

²⁶ Elisabeta liba siks mabye mämpumäpu cama onajige, pui padare cabu Acejiyame teeme mename seemo Gabriyela ne jityepige Nasareta cewe Galilaya probins cabu me.

²⁷ Teeme mene puga ge yepä ngulebägrä täöpume, ngii Mariya. Teeme ciwelooloyame ngii Yoosepa, tabe sasa Mopeyame Daawida me ingle biname ge.

²⁸ Yoo, Gabriyela Mariya bau me ädige, jojige egä, "Sebore Mariya! Acejiyame maane cama gyene. Tabe babo singi gyene mäame täöpume meebine miiji ceerame."

²⁹ Mariya liba peei mene utecijige, tabe ngenecu joclönige, mage ngene jotwananige pui mene ngena täöpume.

³⁰ Puma cita ca mename seemo teebine jojige egä, "Mariya, wälu gone, ingle Acejiyame te babo ngenecu miiji gyene mäame täöpume."

³¹ Maane mämpumäpu pa äbitepi, imäbägrä ne pa jepänepi. Teebine ngii ecärepi Yeesu.

³² Tabe lui baborage cirege; Caburage Acejiyame me bägrä ca pa yaainepesi. Yageyame Acejiyame teebine mopeyame me cire jaawenepi epu pana teeme kaakesaare Daawida lipu mopeyame itu enajuji.

³³ Tabe te Yakobu me kaakesaare bine iyeteta cire yaawademepi, ingle teeme waadena lui ngälu cäco gyene.

³⁴ Mariya mename seemo ne itemlige egä, "Cane mämpumäpu lipu äbita, ingle camu gäne rooriye cama atejäclmüta?"

³⁵ Mename seemo te jojige egä, "Aceji Seemo te mäame bau me pa tädepi, piba Caburage Acejiyame me kokre mäame cabu pa yaanajepi, peei name pi peei bägrä maane lui ne pa eplimlepi tabe Acejiyame täöpume myene, piyepu Acejiyame me bägrä ca pa yaainepesi.

³⁶ Yoo, mäame ingle biname Elisabeta cuta imäbägrä pa jääpänepi. Teebine lui täöpume biname cina jwaajusi egä "äblicäco bägrä päpäna," ngänu gwene page molyege, tabe siks mabye cama mämpumäpu gwene.

³⁷ Iyeta gwidape Acejiyame täöpume ibibi gemi wawena."

³⁸ Siige, Mariya piba jejige egä, "Cane Acejiyame me biname gäne teeme singi wawename. Iyeta miiji gyene cäme täöpume äbita maane lui mene bii najite." Siige, mename seemo piba teebine obmalige.

Mariya Elisabeta ne Ongrärige

³⁹ Yoo, pui mene ingwe ca, Mariya gwidape emaceträjige, wata oclige yepä cewe Yuudea doro gawe cabu me.

⁴⁰ Tabe Sakariya me mete me puga abacitige, Elisabeta ne sebore jowenige.

⁴¹ Yoo, Elisabeta liba Mariya me mene utecijige, teeme bägrä te piba apinyarige came bora ätni diiba cabu, piyepu Aceji Seemo Elisabeta me trupa cabu babo äbitige.

⁴² Tabe babo tage ca Mariya ne jojige egä, "Acejiyame te meebine babo miiji naawenige iyeta magebi cabu ca, piyepu maane lui bägrä ne pa eplimlepi, tabe Acejiyame me babo miiji cama gyene.

⁴³ Cane ngeno me ai miiji ne päpäna, cäme Yageyame me mage te cebine nädärenige!

⁴⁴ Cane liba mäame sebore mene nätecijige, piba taatu bägrä te gege cama apinyarige cäme came bora ätni diiba cabu.

⁴⁵ Maane ngenecu gege gäte, ingle mime Yageyame me mene maane jaatrungepete egä mäame poto cidi me pagege äbita." Siige.

Ai Lui Mariya me Uupera Mene Acejiyame täöpume

⁴⁶ Mariya jiicige egä,

"Cane Acejiyame ne ewepyeräjene iyeta cäme ngenecu cama.

⁴⁷ Cäme seemo te gege äbitenige Acejiyame täöpume, lui te cebine niija cabu ca cirege asata.

⁴⁸ Tabe owecu cama cebine näpänumi, cane lui teeme matikolä kaakesea bägrä gäne.

Ama cita ca iyeta biname cina cebine pa nainepesi "gege gwene,"

⁴⁹ peei modamoda gwidape name pi Acejiyame lui bine teeme kokre ca itu tewenemumi cäme täöpume.

Teeme ngii lui jamyacu conocäco gyene.

⁵⁰ Bägrä bime padare cabu ca piyepu maramara kaakesaare bime padare cabu ca, tabe biname bine owecu jaawenemuge, lui cina teebine ope gaabe me yaacitisi.

- 51 Tabe kokre mule bine ime ca itu jaawenemepi;
biname lui cina ngenecu bora teemeteme babo me läbituge, teebibine jaawenemepi maramara me aplidnerame.
- 52 Tabe modamoda mope biname bine gawe me itu yaajaremepe teeme miijimiji puupu cabu ca,
yepä matimati biname bine ituge awepenta.
- 53 Deedei cäco biname bine tabe yäängäremepi miijimiji deedei ca,
yepä dogwe biname bine deedei cäco yääyecräjemepi.
- 54-55 Tabe cängena jaawenemepi lui mene mime kaakesaare bine ituge jaji;
mibibine itu nitityäripi lui gemi teeme kaakesea bägrä ngii Israela cabu ca.
Tabe teeme mene lica ngene jäätrimalepi, owecu wawename Abrahamo piyepu teeme kaakesaare bine iyeteta.”
- 56 Siige, Mariya Elisabeta cama onajige nesae mabye cama, piba acnenutige teeme cewe me.

Yoane Niiye ca Äciseja Biname me Aplimla poto cidi me

- 57 Yoo, Elisabeta me padare liba tatyaramtuge, tabe imäbägrä ne eplimlige.
- 58 Siige, teeme inglewale piyepu cewe mameta lui biname cina liba mene itecijemige Yageyame te lipu Elisabeta ne babo owecu jowenige, teepi ten cama gege äbitininisi.
- 59 Imäbägrä te liba eit bimu joomlige, teeme binamewale cina seclige Acejiyame me cewecu acita mule wawename tääpe matikolä iirputa ca. Teepi singi bägrä ne babe me ngii ceerame, Sakariya,
60 yepä teeme mage te jejemige egä, “Eewe! Teeme ngii lui Yoane.”
61 Teepi mage me mene jowecnistisi egä, “Peei ngii weeme ingle cabu lica gyene.”
62 Teepi puma cita ca babe ne ime ca jowenisi teebine ätemlame egä, “Maane ngena ngii täापume singi bägrä ceerame?”
63 Sakariya oogära gwidape täापume jejige, peei cabu yoogäridge egä, “Teeme ngii lui Yoane.” Biname cina cälu te jitemige.
64 Piba taatu Sakariya me wätä te miiji me äbitige, piyepu teeme tagepogogo te tasatige. Tabe mene me gjje abacitige Acejiyame ne awepyeräjame.
65 Cewe mameta biname cina wälu äbitininisi; peema cita ca idre ecenanisi Yuudea podu gawe cabu iyeta poto ta.
66 Iyeta lui cina peei mene itecijemige, mage ngene jotwa-naninisi, ätemläjinisi egä, “Ai bägrä täापume lipu äbitenige?” Yoo, Biname bime täापume pajecu ge egä Acejiyame me kokre ime puga ge pui bägrä cama.

Sakariya te Acejiyame me Tagepogogo Mene Jiicige

- 67 Aceji Seemo te Yoane me babe Sakariya me trupa cabu me babo äbitige; tabe Acejiyame me tagepogogo mene jiicemige egä,
- 68 “Acejiyame mime Israela biname bime Yageyame ne mine pa yaawepyeräjesi,
ingle tabe mibibine bii ningrärininige piyepu mime niyya cabu ca äsecrera gaabe bii nicärininige.
- 69 Tabe mime täापume kokre äsecrera biname ne bii tityepige,
lui teeme kaakesea bägrä Daawida me kaakesaare gyene.
- 70 Ujarage, tabe teeme conocäco mename biname bime tagepogogo ca jiicuji egä,
71 tabe mibibine cire niyebingipi mime cubuyame bau ca,
piyepu teeme ime cabu ca lui cina mibibine nimugetnininisi.
- 72 Tabe te jiicuji egä tabe mime kaakesaare bine owecu wawename,
piyepu teeme conocäco jajeji mene tabe lica ngene ätrimelame.
- 73 Tabe mime kaakesaare Abrahamo ne teeme kokre ngii cabu jejuji
- 74 egä mibibine cirege äsecrera cubuyame me ime cabu ca,
mine piba teeme täापume kaakesea wälu cäco wawenecame,
75 piyepu ngenecu epucäco conocäco lenajame teeme opo gaabe je iyeta mime ireclota ngalebora.
- 76 Yoo, cäme bägrä, biname cina meebine pa naainepesi mename biname ca mime Caburage Acejiyame täापume,
Ingle maane niinäce pa ädepi gaabe amacetnäjame Yageyame täापume,
77 teeme biname bine umle wawename egä äsecrera gaabe pisi nyene,
teepi liba kälyä jääpänemusi Acejiyame bau ca teeme niyya mule täापume.
- 78 Mime Acejiyame lui baborage owecu piyepu owelaamelame cama;
teeme äsecrera biname te bimu me ajara pana, cabucewe ca mime bau me pa tädepi,
- 79 saapacyärepi biname cabu lui cina krokeciye mule cabu icrajinige,
piyepu teeme budre mule name pi wälu gemi.

Tabe cuta mibibine pa niwadipi poode ireclota gaabe cabu otnime.”

⁸⁰ Yoo siige, pui bāgrā te uutige, babo me äbitige, cuta teeme seemo kokre me äbitige. Tabe daapo taatu cewe cabu enajige, ngälu pui bimū tabe liba teeme kaakesea gije jebacitige Israela biname bime täápume.

2

*Yeesu me Aplimla poto cidi me
(Matayo 1:18-25)*

¹ Pui padare cabu, Rooma Babo Mopeyame Siisa Augusto te mene jityepäjemige iyeta cewe cabu ta egä iyeta biname cina miiji otni teeme ngii acranecame biname acnema täápume.

² Yoo, biname ngii Kwairiniyus tabe Suriya probins Mopeyame ge pui mule te liba äbitige.

³ Iyeta biname cina otninisi teeme saare bime cewe me teeme ngii acranecame.

⁴ Yoo, biname ngii Yoosepa tabe ädige Nasareta cewe cabu ca, piba Galilaya probins ne sebmalige, Yuudea probins abacitige, ädige Betelehema cewe me, sasa Israela Mopeyame Daawida luma aplimluji, ingle tabe Daawida me kaakesaare ge.

⁵ Yoo, teeme ciweloologyame Mariya ten cama oclige ngii acitame. Mariya mämpumäpu gwene.

⁶ Egäcäro teepi liba Betelehema cewe cabu puga ge, piba teeme padare te tatyaramtige iigyärame.

⁷ Tabe teeme niinäce bāgrā ne jepänige, imäbāgrā, teebine cäbletääpe ca etnige, kau bime deedei acrana puupu cabu ecwanige, ingle teepi kau mete cabu aanajige. Teeme täápume puupu lica ge otnetneja biname bime ute mete cabu.

Mename Seemo piijepu Maamoi Ire Atwi Biname

⁸ Yoo, pui cewe mameta puga ge maamoi ire atwi biname lui cina baace cewe cabu uta cama icrajige teeme maamoi bine cängena ire atwime.

⁹ Mime Yageyame me mename seemo te teeme bau aboclomtige, piba taatu mime Yageyame me jamyacu apaclyera te teeme gome tuungepmalige. Babo wälu te teebibine joomlemige,

¹⁰ piba pui mename seemo te jejemige egä, “Wälu gone! Cäme babo miijirage mene agesa weeme täápume. Peei mene te iyeta biname bine baborage ngenecu gege me pa jaawenemeipi.

¹¹ Page ai ciije imäbāgrā te aplimlige Daawida me cewe cabu je. Tabe weeme niiya cabu ca äsecrera biname pagege äbita; tabe Keriso sine weeme Yageyame.

¹² Yoo, weene ai cabu ca umle pa äbitineye cäme mene toraca gyene: weene bāgrā ne jepäneniye cäbletääpe ca tope atneji gyene, siige kau bime deedei acrana puupu cabu acwanäneji gyene.”

¹³ Piba taatu bucurage mename seemo cina aboclomäjininisi pui niinäce mename seemo gome. Teepi Acejiyame ne uupera ca ewepyeräjisi egä,

¹⁴ “Jamyacu apaclyera lui mime caburage Acejiyame tääpu myene.

Gawe cabu biname cina ngenecu poode pa läbitipesi, tabe lui bime täápume ngenecu miiji gyene.”

¹⁵ Siige, pui mename seemo cina liba teeme bau ca cabucewe me äcnäridge, piba maamoi ire atwi biname cina teemeteme ajananinisi egä, “Biiri naclege Betelehema me ai mule ne päpäname Yageyame te lui poto cidi me mibibine nijinige.”

¹⁶ Siige, puma cita ca teepi watawata eclige, Mariya Yoosepa naabibine jääpänisi piijepu teeme bāgrā ne jepänisi pui kau bime deedei acrana puupu cabu.

¹⁷ Liba bāgrā ne jepänisi, piba biname bine pui mene jejananemisi, mename seemo te lipu jejemige teebibine ai bāgrā poto cidi me.

¹⁸ Iyeta lui cina itecijemige, cälu te jitemige pui maamoi ire atwi biname bime mene poto cidi me,

¹⁹ yepä Mariya teeme ngenecu bora icranemige iyeta pui mene bine. Tabe baborage ngene jotwananige peei poto cidi me.

²⁰ Pui maamoi ire atwi biname cina piba äcnäridge teeme cewe me. Teepi Acejiyame ne uupera ca ewepyeräjisi iyeta gwidape täápume teepi lui itecijemige piijepu jepänemisi. Yoo, iyeta pepu äbitige mename seemo te lipu itu tejemumi. Siige.

Teepi Ngii Einäsi Yeesu

²¹ Eit bimū ingwe ca padare te tatyaramtige bāgrā täápume Acejiyame me cewecu mule waweneme tääpe matikolä iirputa ca. Teepi teebine ngii einäsi Yeesu. Peese nyene pui ngii mename seemo te lui Mariya ne jwaajepi tabe mämpumäpu piba lica ge pui padare cabu.

Yeesu ne Ecanäsi Babo Iiwäreja Mete me

²² Yoo, padare te piba tatyaramtigit Yoosepa naabi Mariya Acejiyame me cotre mule cängena wawename, Moose lui ne itu soogäruji marnga äyebingta poto cidi me. Teepei pui yepä padare cabu bägrä ne ecanäsi Yerusalema me teebine Yageyame täápume mara me wawename.

²³ Yoo, mime Yageyame me Oogäräneji Mene pisi nyene egä iyeta niinäce aplimläneji imäbägrä bine miiji Acejiyame täápume mara me wawename, cuta piyepu niinäce aplimläneji rooriye ngeerangera cibi plongo bine miiji Acejiyame Yageyame täápume mara me wawename.

²⁴ Siige, puga Yeesu me mage babe cina teeme owecu gwidape Acejiyame ne ecäräsi iiwärejame marnga äyebingta mule apirame, inge mime Yageyame me Cotre Mene jiićenige egä miiji neenenen giiwi ele, coo neenenen gimäe plongo ca iiwäreja pui mule me apira täápume.

²⁵ Yoo, puga ge Yerusalema babo cewe cabu yepä biname ngii Simeona. Tabe miijirage biname ge; Acejiyame bau irecu lätmutanuge. Tabe Acejiyame me padare ne jewagrijenige Israela biname bine teeme niija cabu ca äsecerame. Aceji Seemo lui teeme cabu yaanajuge,

²⁶ teebine ituge jaji egä, “Maane lica budre päpäna ngälu maane Yageyame me biname ne cire jepänepi, Israela biname cina lui ne jewagrijenisi teebibine niija cabu ca äsecerame.”

²⁷ Yoo, pui bimu cabu tabe iiwäreja mete caale bora abacitige. Piba Yeesu me mage babe cina bägrä ne ecanäsi pui mete puupu cabu me, Cotre Mene teeme poto cidi me cängena wawename.

²⁸ Simeona bägrä ne teeme ime ca ecatige, Acejiyame ne piba eso ecärige egä,

²⁹ “Oo, Yageyame, cane määme kaakesea bägrä ngenecu poode cama budre pagege, inge maane lui mene cebine itu najujite page toraca me bäbitige.

³⁰ Cane irecu ca bii jepänine määme biname, cibibine lui te cirege niija cabu ca äsecerame,

³¹ maane lui poto cidi me ituge jaji tabe aboclomtenige iyeta biname bime opo gaabe.

³² Tabe ngale pana pagege äbita gaabe ceerame maramara gawe biname bine niija cabu ca äsecerame,

piyepu janyacu apacyera ne acaname määme Israela biname bime bau me.”

³³ Siige, bägrä me mage babe cina cälu te jätige Simeona me mene täápume.

³⁴⁻³⁵ Simeona teebibine miiji jaawenänige teeme mene ca, piba bägrä me mage Mariya ne umle mene jojige egä, “Maane ngenecu mäpu cirege päpäna, epu pana turikä te määme ngenecu lipu cire naatrapepi, inge bucurage Israela biname cina ai bägrä ne cire jäägyepesi piba peei cabu ca teeme mäpu daremu päpäname. Yepä, nuuja cina babo miiji teeme bau ca cirege päpäna. Yoo, Acejiyame teebine pa yaaboclomtepi Israela biname bime täápume, piyepu lui cina teebine jäsädusi, teepei teeme niija ngene atwanena pepu yaaboclomjäjemusi.”

³⁶ Siige, cuta puga ge yepä Acejiyame me mename biname, magebi gwene, teeme ngii Ana tune. Teeme babe me ngii Panuela, Asera me inge cabu ca. Tabe molyege gwene, lui te teeme mamye cabu rooriye ne ecatige, ten cama seben kämäge taatu onajige,

³⁷ piba tabe cuubla waanajepi ngälu pui padare eitifooa kämäge oomlaname. Tabe lica nuuja gome waacluge, yepä iiwäreja mete caale bora waanajuge ciye bimu, Acejiyame me ngii ne yaawepäntuge irecu ätumuta ca cuta piyepu deedei cäco lenaja ca.

³⁸ Tabe mameta me toclige, pui padare Simeona mene jiićenige. Tabe Acejiyame ne eso ecärige teeme Bägrä täápume, piba mene pui bägrä poto cidi me jejananemige iyeta biname bine, Yerusalema ngalebora lui cina Acejiyame me padare ne jewagrijenisi teebibine niija cabu ca äsecerame.

Teepi Äcnäränisi Nasareta Cewe me

³⁹ Teepi liba iyeta pui cotre mule epiremäsi, lui Yageyame me Oogäräneji Mene cabu, piba Gallilaya gawe cabu teeme cewe Nasareta me äcnäränisi.

⁴⁰ Bägrä te uutige, kokre äbitige. Tabe babo umle cama äbitige, piyepu Acejiyame te teebine babo miiji me jewananige.

Yeesu Liba Imäbägrä Jage, Tabe Iiwäreja Mete me Ädige

⁴¹ Yoo, iyeta kämäge gaabegabe Yeesu me mage babe cina Yerusalema me waatnetnejäsi Äsuplengta trii täápume, Israela biname bime äsecerame Aikupito cabu ca ngene apename.

⁴² Yeesu liba twelb kämäge joomlige, tabe teeme mage babe cama pui trii täápume ädige, teeme mule lipu ge.

⁴³ Yoo, iyeta pui trii mule liba apirininisi, teeme mage babe liba gaabe cabu aaclige cewe me acnenutame, teeme bägrä Yeesu lui Yerusalema je puma enajige, yepä mage babe nuuja umle lica ge peei poto cidi me.

⁴⁴ Teepi apu jaangige egä tabe niinäce gaabe me biname cama bädige, peei name pi pui bimu teepi papa aaclige ngälu mämeteca me, piba gije jecitäsi teebine ärngime teeme

binamewale bau ca, piyepu gaabe cabu lui nuuja teeme biname cina otninisi teeme bau ca.

⁴⁵ Yepä, teepi teebine lica jepänäsi, peei name pi acnenutäsi Yerusalemä me teebine puma ärngime.

⁴⁶ Neeneni bimü ingwe ca teepi teebine iiwäreja mete caale bora je jepänäsi, poto abiberäja biname cama adnatäneji ge. Tabe teebibine itemläjemige piyepu teeme mene cängena jitecijemige.

⁴⁷ Iyeta biname lui cina teeme mene jitecijisi, cälu te jitemige teeme miiji daremu mene piyepu teeme umle poto cidi me.

⁴⁸ Teeme mage babe cina cälu te jätige liba teebine puma jepänäsi. Mage te jejige egä, “Cäme bägrä, maane ngenö me cibibine pepu niwenite? Määme babe cama cine mage ngenecu mäpu cama meebine näärngenago.”

⁴⁹ Tabe teebibine mene jaajige egä, “Weene ngena täápume cebine närngeniye? Baa, weene umle lica gegi egä cane miiji cäme Babe me mete cabu nanajenige?”

⁵⁰ Yepä, teepi teeme mene ne opo lica ewatnäsi.

⁵¹ Yoo, Yeesu ten cama acnenutige Nasareta cewe me. Tabe teeme mene iyeta padare cängena yäätəcijanuge. Teeme mage te iyeta pui mule bine ngenecu bora icranemige.

⁵² Siige, Yeesu babo äbitige, piyepu toraca umle cama äbitige. Biname cina teeme täápume ngenecu miiji me äbitininiisi; Acejiyame cuta piyepu ngenecu miiji ge teeme täápume.

3

Yoane Niiye ca Äciseja Biname te Mene Jejananemige

(Matayo 3:1-12; Mareko 1:1-8; Yoane 1:19-28)

¹ Yoo, padare apu ge: Fiftin kämäge cama Babo Mopeyame Tiberiyu pui gawe ire jetwige Rooma cewe cabu ca. Poto teeme mameta biname ai fooa cina ai gawe maramara ire jetwemisi. Pontiyo Pilato te Yuudea gawe ne ire jetwige, Heroda te Galilaya gawe ne ire jetwige, teeme naane Pilipo te Iturea piyepu Trakoniti gawe bine ire jaatwige, piyepu Lusaniya te Abilene gawe ne ire jetwige.

² Pui padare cabu Anas piyepu Kayapa lui iiwäreja mope biname ge. Yoo, pui padare cabu Acejiyame me mene te tatyaramtige Sakariya me bägrä Yoane bau me. Tabe lui puga ge daapo taatu cewe cabu je.

³ Tabe piba otnetnäjige iyeta cewe maramara Yoridana baduge wajwa ta, biname bine jejananemige egä, “Weene weeme niiya mule cabu ca atatröngärineye Acejiyame bau me, niiye ca äciseja ne ecateye weeme kirece mule ne awabudnitame, siige Acejiyame te weeme niiyaniya mule bine pa yääyeblegemepi.”

⁴ Yoo, mename biname Isaya te mene itu soogäremuji Yoane poto cidi me egä,

“Daapo taatu cewe cabu biname te babo tagepogogo ca cire jiiicepi egä,

‘Yageyame me gaabe emacetnäjeye,

weeme mule bine conocäco jewenemeye teeme otni täápume.

⁵ Iyeta payapaya bine miiji äclidna,

piyepu iyeta dorodoro gawe bine miiji ämuleca.

Cubecube gaabe bine miiji conocäco waweneca,

piyepu dräcudräcu gaabe bine miiji lale wawena.

⁶ Piba iyeta biname cina pa jääpänepesi Acejiyame me niiya cabu ca äsecrera teeme täápume!”

⁷ Siige, bucurage biname cina Yoane bau totninisi niiye ca äciseja täápume. Tabe teebibine jejemige egä, “Weeme angletneja lui cobyame pana gyene! Weene ai äciseja mule ca singi uucraname niiya mule cabu ca, piba muye puupu cabu me lica otni, yepä weene lica toraca Acejiyame bau me latatröngärininuye.

⁸ Weene miiji pui mule bine waweneca lui cina yaaboclömäjininusi egä weene niiya mule cabu ca ituge atatröngära. Gone weemeweme lajananinuye egä, ‘Cine Abrahamo me kaakesaare gemi, peei name pi miiji gemi. Cane jijenininine egä Acejiyame ibibi gyene nuuja bägrä Abrahamo täápume wawena ai kula cabu ca, tabe liba singi gyene.

⁹ Weene epu pana gemi uli liiyepu. Yäpä acitäneji gyene uli maape je. Iyeta uli lui cina miijirage kuu lica, yääyemepesi, pa yaargawemepesi, muye cabu me pa yiisabepesi ayime.”

¹⁰ Siige, biname cina teebine itemlisi egä, “Cine ngena ne miiji wawena?”

¹¹ Tabe teebibine jejemige egä, “Laati te neeneni cäbletääpe cama, miiji gyene yepä ceera biname ne lui teeme cäbletääpe lica gyene, piyepu lui cina deedei cama yaacrajuge, miiji gyene pacupacu ätreca.”

¹² Poto täks rarekaake atomleca biname cina cuta teeme bau otninisi niiye ca äciseja täápume, siige itemlisi egä, “Abiberäja biname, cine te cuta ngena miiji wawena?”

¹³ Tabe teebibine jejemige egä, “Gone rarekaake papa uutecrena, yepä weene biname bime toraca täks rarekaake taatu yaawadanemuye.”

¹⁴ Piba poto cubu biname cina teebine itemlisi egä, “Cine cuta lipu? Cine ngena ne miiji wawena?”

Tabe cuta teebibine jejemige egä, “Gone nuuja biname bime rarekaake juutecranemuye, coo rarekaake walya aitneja cabu ca gone yaacatuwe, yepä weeme kaakesea daremu pui rarekaake ibibi yaawadanemuye. Gone cerämu poto tääpume singi.”

¹⁵ Yoo, iyeta Israela biname cina niija cabu ca äsecrera biname ne jewagrijenisi. Teepi liba Yoane me umle mene itecijemige, piba ngena jotwananinisi egä pama tabe sine.

¹⁶ Piba Yoane teebi-bine jejemige egä, “Cane weebibine niije ca jicisäjenininine Acejiyame me ngii cabu, yepä lui biname te tädenige, tabe cäme bau ca epu baborage gyene egä cane ibibi lica gäne teeme ernge gwidape sea bine iibirame. Tabe weebibine Aceji Seemo ca piyepu muye ca pa jicisäjiipi.

¹⁷ Teeme padare cudewe lica gyene miiji mule biname piyepu niija mule biname bine abelename. Tabe epu pana gyene calwacupi biname liyepu lui teeme wiiti kuu ämleceja gwidape pisi nyene ime cabu. Tabe miiji kuu bine pa jaabalodnemepi, piba pa yaawademepi mete me, yepä mälwä pa juubudäremepi ätuma cäco muye cabu.”

¹⁸ Yoo, bucurage mene ca Yoane te biname bine cängena yaablawäjemuge, teebibine miiji mene jaajanemuge.

¹⁹ Tabe cuta Mopeyame Heroda ne eblawäjige, ingle Heroda teeme naane me coga Herodiyas juutecrige, teeme coga me jowenige, piyepu bucurage nuuja niija mule bine jaawenemuge.

²⁰ Piba Heroda nuuja niiyarage mule ne jewenige, tabe liba Yoane ne krokeciije mete bora ecitige.

Yeesu Niije ca Äciseja Mule ne Ecatige Yoane bau ca

(Matayo 3:13-17; Mareko 1:9-11)

²¹ Iyeta biname liba Yoane bau me seclige, tabe te teebibine niije ca äcisejame Acejiyame me ngii cabu, cuta Yeesu äciseja ne becatige Yoane bau ca. Egäcäro Yeesu Acejiyame bau irecu ätumutige, cabucewe te äplige,

²² piyepu Aceji Seemo te täinige teeme papa cabu me gimäe ele pana opo cama. Siige, tagepogogo te cabucewe ca tiicige egä, “Maane cäme ngenecurage bägrä gäte. Cane baborage ngenecu miiji gäne määme tääpume.”

Yeesu me Kaakesaare poto cidi me

(Matayo 1:1-17)

²³ Yeesu liba gije jebacitige teeme abiberäja kaakesea wawename, tabe piba teeti kämäge cama ge. Biname cina apu jengemige tabe Yoosepa me bägrä ge. Yoosepa me babe lui Heli sine; Heli me babe lui Matat sine;

²⁴ Matat me babe lui Leebi sine; Leebi me babe lui Melki sine; Melki me babe lui Yanai sine; Yanai me babe lui Yoosepa sine;

²⁵ Yoosepa me babe lui Matatiya sine; Matatiya me babe lui Aamos sine; Aamos me babe lui Nahuma sine; Nahuma me babe lui Cesili sine; Cesili me babe lui Nagai sine; Nagai me babe lui Maati sine;

²⁶ Maati me babe lui Matatiya sine; Matatiya me babe lui Semei sine; Semei me babe lui Yoseka sine; Yoseka me babe lui Yooda sine;

²⁷ Yooda me babe lui Yoanan sine; Yoanan me babe lui Reesa sine; Reesa me babe lui Serubabelu sine; Serubabelu me babe lui Salatiyelu sine; Salatiyelu me babe lui Neeri sine;

²⁸ Neeri me babe lui Melki sine; Melki me babe lui Aadi sine; Aadi me babe lui Kosam sine; Kosam me babe lui Elmada sine; Elmada me babe lui Cera sine;

²⁹ Cera me babe lui Yosuwä sine; Yosuwä me babe lui Eliyasa sine; Eliyasa me babe lui Yorim sine; Yorim me babe lui Matat sine; Matat me babe lui Leebi sine;

³⁰ Leebi me babe lui Simeona sine; Simeona me babe lui Yuuda sine; Yuuda me babe lui Yoosepa sine; Yoosepa me babe lui Yoonam sine; Yoonam me babe lui Eliyakima sine;

³¹ Eliyakima me babe lui Melea sine; Melea me babe lui Mena sine; Mena me babe lui Matata sine; Matata me babe lui Natana sine; Natana me babe lui Daawida sine;

³² Daawida me babe lui Yese sine; Yese me babe lui Obeda sine; Obeda me babe lui Boasa sine; Boasa me babe lui Salamona sine; Salamona me babe lui Naasona sine;

³³ Naasona me babe lui Aminadaba sine; Aminadaba me babe lui Arama sine; Arama me babe lui Hesoroma sine; Hesoroma me babe lui Perese sine; Perese me babe lui Yuuda sine; Yuuda me babe lui Yakobu sine;

³⁴ Yakobu me babe lui Isacako sine; Isacako me babe lui Abrahamo sine; Abrahamo me babe lui Teera sine; Teera me babe lui Nahora sine; Nahora me babe lui Seruge sine;

³⁵ Seruge me babe lui Reeu sine; Reeu me babe lui Pelege sine; Pelege me babe lui Ebere sine; Ebere me babe lui Seela sine;

³⁶ Seela me babe lui Kainan sine; Kainan me babe lui Arpasada sine; Arpasada me babe lui Seem sine; Seem me babe lui Nooa sine; Nooa me babe lui Laameke sine;

³⁷ Laameke me babe lui Metusela sine; Metusela me babe lui Eenoka sine; Eenoka me babe lui Yaarede sine; Yaarede me babe lui Mahalalel sine; Mahalalel me babe lui Kainan sine;

³⁸ Kainan me babe lui Enosa sine; Enosa me babe lui Seeta sine; Seeta me babe lui Adamu sine; piyepu Adamu me babe lui Acejiyame sine.

4

Satani te Yeesu ne Epicetnärige
(Matayo 4:1-11; Mareko 1:12-13)

¹ Yeesu liba acnenutige Yoridana Baduge gome ca, Aceji Seemo te babo äbitige ten cabu, teebine ecanige daapo taatu cewe me.

² Puga Satani te teebine mage epicetneräjige footi bimu cama. Iyeta pui padare tabe nuuja deedei lica erwige, peei name pi pui footi bimu liba apirinini, tabe baborage loolomecewe ge.

³ Piba Satani teebine jejige egä, "Maane liba Acejiyame me Bägrä gäte, ai kula ne jeji buluduu me atepengtame."

⁴ Yepä, Yeesu jejige egä, "Oogäräneji Mene te apu jüicenige egä, 'Deedei taatu te ireclota lica yäcärimuge biname bine'."

⁵ Piba Satani teebine caburage me ecanige, wata jewabäjige iyeta maramara mope biname bime gawe,

⁶ jejige egä, "Cane meebine yageyame pa naawenepene iyeta ai gawecewe täapume, piyepu iyeta teeme biname piyepu iyeta teeme jamyacu gwidape bine mäame ime cabu pa yaacranemepene, inge cane te iyeta ituge waadena, peei name pi cane laati ne singi ceera, cane miiji gäne teebine ceerame.

⁷ Maane liba kokorare ca ääpednutenite cäme täapume cebine awejename, piba ai gwidape iyeta lui mäami nemi."

⁸ Siige, Yeesu jejige egä, "Oogäräneji Mene te jüicenige, 'Yageyame mäame Acejiyame ne yaawejanuye, cuta teeme taatu singi ne jewenepi.'"

⁹ Puma cita ca Satani teebine Yerusalema me ecanige, iiwäreja mete caburage toro cabu etecwamtige, puma jejige egä, "Maane liba Acejiyame me bägrä gäte, maane ama cita ca uuplacanti gawe me,

¹⁰ inge Oogäräneji Mene te jüicenige egä, 'Acejiyame te teeme mename seemo bine pa jaajemepi meebine cängena ire atwime.

¹¹ Teepi meebine teeme ime cabu pa naacanepesi, piba maane mäame ernge ne kula cabu lica pa jimudnärepi."

¹² Yepä, Yeesu jejige egä, "Oogäräneji Mene te jüicenige egä, 'Maane gone läbitute Yageyame mäame Acejiyame ne apicetnärime.'"

¹³ Siige, Satani liba iyeta epirige Yeesu ne apicetnära, tabe piba teebine ebmalige, ingwe padare ne jewagrijenige.

Yeesu Teeme Kaakesea ne Jegednige Galilaya Probins cabu
(Matayo 4:12-17; Mareko 1:14-15)

¹⁴ Puma cita ca Yeesu acnenutige Galilaya probins me; Aceji Seemo me kokre lui ten cama ge. Teeme poto cidi me idre mene ecanisi pui gawe iyeta poto ta.

¹⁵ Tabe biname bine ehiberäjemige teeme maramara abasecretna mete cabu, piyepu iyeta biname cina teebine ewepyeräjisi.

Nasareta Cewe Biname cina Yeesu ne Jigyisi
(Matayo 13:53-58; Mareko 6:1-6)

¹⁶ Yeesu ädige Nasareta cewe me, tabe luma babo me äbituji. Israela biname bime Sabade bimu cabu, tabe abasecretna mete me ädige, teeme mule liiyepu. Tabe puma abujängtige Oogäräneji Mene acnename.

¹⁷ Teepi peba ecärisi Isaya lui ne soogäruji. Tabe peba ne jüitnige, jepänige ai mene luma oogäräneji ge, siige ecnemige egä,

¹⁸ "Yageyame me Seemo pisi nyene cäme cabu.

Tabe peei name pi cebine itu najepi teeme Miiji Mene owecu mete biname bine jajanename.

Tabe cebine itu nätyepipi krokeciiye mete biname bine mene jajanena teeme äsecrera poto cidi me,

piiyepu irecu määsumäsu biname bine jajanena egä teepi teeme irecu ca cängena cirege päpänena.

Tabe cebine itu nätyepipi biname bine ätityerame teeme mäpu ireclota cabu ca äsecerame, ¹⁹ piiyepu iicemame egä, 'Yageyame me ätityera padare lui age sena.' "

²⁰ Siige, Yeesu piba peba ne iclubicige, kaakesea biname bau me ewecnistige, adnatige. Iyeta biname pui abasecretna cabu teebine ire jetwisi.

²¹ Tabe teebibine jejemige egä, "Page ai Oogäräneji Mene te toraca me äbitenige weeme ätecija cabu."

²² Siige, teepi iyeta singi ge teeme mule täápume, cälu te jitemige, ingle babo müjirage mene täsige teeme tage cabu ca. Piba teemeteme ätemläjinisi egä, "Nää, ai lui Yoosepa me bāgrā gyene?"

²³ Yeesu piba teebibine jejemige egä, "Cane umle gāne weene singi cebine mime sasa mene jajime egä, 'Dokta maane määmämu müiji me äbiti!' Weene cuta singi cebine jajime egä, 'Cine mene nitecijinige egä maane ciitaca mule ne Kaprenauma cewe cabu tewenemumete. Maane peei bine ama jebenemi määmerage cewe cabu!'"

²⁴ Cane weebibine jijenininine egä ngānu gyene nuuja cewe biname cina mename biname täápume singi, teemerage cewe biname cina teeme mene lica jaacatusi.

²⁵ Yoo, weene mename biname Eliya me padare poto cidi me ngene jotwananineye. Puga ngupe te lica seciruji nesae kāmāge cebo cama, piiyepu gane te täduji iyeta poto ta. Cane weebibine jijenininine egä cuubla bucurage ge pui padare Israela gawe cabu,

²⁶ yepä Acejiyame te lica Eliya ne jityepuji teeme yepä ne ätityerame. Eewe, Acejiyame teebine jityepuji Sidona gawe cabu, Sarepata cewe me, puga tabe yepä cuubla ne utityäruji.

²⁷ Yoo, weene ngene jotwananineye cuta nuuja mename biname Elisa me padare poto cidi me. Piba puga ge Israela gawe cabu bucurage biname niyarage tääpe pita cama, yepä lica teeme yepä te müiji ne jepānuji, yepä Nacamano lui Suriya gawe biname ge, tabe taatu müiji ne jepānuji. Yoo, pui sasa mename biname cina ätrunga ne jepānāsi nuuja gawe cabu, yepä lica teeme Israela biname bime bau ca."

²⁸ Pui abasecretna biname cina liba Yeesu me mene itecijemige, baborage claabe te teebibine joomlemige.

²⁹ Teepi abujānginisi, teebine iyecräjisi cewe cabu ca, ecanisi pui podo papa cabu, teeme cewe lui podo wajwa cabu jage, siige teepi singi teebine puma cita ca ajarame,

³⁰ yepä Yeesu teeme ngalebora ädige, siige ebmalemige teebibine.

Yeesu Niiya Cable ne Iyecräjige

(Mareko 1:21-28)

³¹ Yeesu puma cita ca Kaprenauma cewe me ädige, lui gyene Galilaya Probins ngalebora. Tabe biname bine ebiberäjemige Sabade bimu cabu.

³² Teepi iyeta mutäcäco äbitininisi teeme abiberāja mene name pi, ingle teeme mene kokre piiyepu conocäco cama ge.

³³ Abasecretna mete cabu puga ge yepä biname niiya cable te lui ne yaacananuge. Tabe babo tage ca jejige egä,

³⁴ "Yeesu Nasareta ceweyame, maane singi ngena wawename cime täápume? Maane cibibine sabe wawename? Cane umle gāne maane laasi näte: maane lui Acejiyame me conocäcorage Bāgrā gätel!"

³⁵ Yeesu niiya cable ne kokre cama jejige egä, "Maane bojā naagege. Tasati teeme trupa cabu ca!" Niiya cable te pui biname ne gawe cabu ijarige, iyeta biname bime opo gaabe piba tasatige teeme cabu ca, yepä teebine lica nuuja niiya jebenige.

³⁶ Iyeta peei biname mutäcäco äbitininisi, siige teemeteme ätemläjinisi egä, "Ai lipu mene gyene? Teeme conocäco piiyepu kokre pisi nyene niiya cable bine mene jajime, siige teepi täsige!"

³⁷ Siige, teeme poto cidi me idre ecanisi pui gawe iyeta poto ta.

Yeesu Bucurage Biname bine Müiji me Jebenemige

(Matayo 8:14-17; Mareko 1:29-34)

³⁸ Yeesu piba abasecretna mete ne sebmalige, Simona me mete me ädige. Simona me gite molyege puga ge gebale cama ge. Pita name pi teepi Yeesu ne jejisi teebine ätityerame.

³⁹ Tabe ädige teeme ute puupu gome jeclajutige, teeme gebale pita ne jejige teeme bau ca äyebtingtame. Siige, pita te obmalige teebine, tabe piba taatu abujāngtige, teebibine mogobi jebenemige.

⁴⁰ Yoo, bimu äpula ingwe ca, iyeta biname cina teeme pita biname bine sewademisi Yeesu bau me. Tabe ime ecitanige teeme papa cabu, iyeta müiji me jebenemige.

⁴¹ Niiya cable cina poto pui biname bine sebmalemisi. Teepi babo tage ca jüicemisi egä, "Maane Acejiyame me Bāgrā gätel!"

Yeesu teebibine bojä jewenemige, ingle teepi umle ge egä tabe Keriso sine, Israela biname cina lui ne jewagrijenisi teebibine niija cabu ca äsecrerame.

*Yeesu Mene Jejananemige Maramara Abasecretna Mete cabu je
(Mareko 1:35-39)*

⁴² Baani liba siplige, Yeesu pui cewe ne sebmalige, ädige biname cäco cewe me. Siige, biname cina gije abacitinisi teebine ärngime, siige liba jepänisi, jejisi egä, “Gone cibibine nibmalininute!”

⁴³ Yepä, tabe jejemige egä, “Ai Miiji Mene Acejiyame te biname bine Waadena poto cidi me, cane miiji cuta nuuja cewe maramara cabu jajanena, ingle Acejiyame peei tääpume cebine itu nätyepuji.”

⁴⁴ Piba Yeesu biname bine mene jejananemige teeme maramara abasecretna mete cabu Yuudea gawe iyeta poto ta.

5

*Yeesu Poto Cibubade Biname bine Ala Tesoglecmige
(Matayo 4:18-22; Mareko 1:16-20)*

¹ Nuuja taje Yeesu liba Genesareta * Sawa ligi je jeclajutige, biname cina seclige, teebine jewaclomtisi, teeme mameta me ätyepedäjininisi Acejiyame me mene teeme bau ca ätecijame.

² Tabe piba neeneni poo bine jääpäninge doro cabu, cibi bade biname lui bine aabmalisi net äcisejame.

³ Yeesu piba acenutige yepä pui poo cabu, pui lui Simona me poo ge, siige teebine itemlige poo ne matikolä atyepaitame niije cabu me. Yeesu poo cabu adnatige, piiyepu puma cita ca biname bine cängena ebiberäjemige.

⁴ Tabe liba mene jajanena siige, Simona ne jejige egä, “Piiyeme ai poo ne jewetänti uugle niije cabu me. Weeme net bine niije bora icranemeye cibi oomläjecame.”

⁵ Simona piba teebine jejige egä, “Babo biname, cine ciye baborage kaakesea jewenisi ngälu sewalige, piiyepu nuuja cibi bine lica joomlemisi, yepä mäame mene name pi, cane net bine icranenenine.”

⁶ Teepi peei jewenisi, piba bucurage cibi bine joomläjemisi, net te mameta ädereca cibi mäpu name pi.

⁷ Teepi teeme cibubade binamewale nuuja poo cabu ca ime ca tewenemisi, teebibine ätityerame. Teepi aaclige, piba neeneni poo bine cibi ca gigri jäängärisi ngälu poo cina mameta abuma.

⁸ Yoo, Simona Peteru liba peei mule ne jepänige, kokorare äapednutige Yeesu gome, teebine jejige egä, “Yageyame, cäme bau ca äyeblyngti, ingle cane conocono mule biname gäne!”

⁹ Tabe peei mene jiiçige, ingle tabe teeme biname cama iyeta mutäcäco äbitininisi cibi lipu bucurage jepänemisi.

¹⁰ Cuta teeme nuuja cibubade binamewale Yakobu piiyepu Yoane, Jebedayo me bägrä, teepi cuta mutäcäco äbitäsi. Yeesu piba Simona ne jejige egä, “Wälu gone! Weene ingwe ca lica cibi bine joomlemuye, yepä biname bine pa joomlemepeye cäme bau waadename.”

¹¹ Teepi poo neeneni aatecwamtisi doro cabu, piba iyeta gwidape sebmalemisi Yeesu cama otnime.

*Yeesu Lepera Pita Biname ne Miiji me Jewenige
(Matayo 8:1-4; Mareko 1:40-45)*

¹² Nuuja taje Yeesu liba yepä cewe cabu jage, biname puga ge lepera pita cama. Tabe liba Yeesu ne jepänige, teemämu gawe cabu ajarige Yeesu gome, teebine itinärige egä, “Babo biname, maane liba singi gäte, maane miiji gäte cebine pita cäco me wawena!”

¹³ Yeesu ime uutige, teebine joomlige, jejige egä, “Yoo, cane singi gäne. Maane pita cäco äbiti!” Piba taatu pui lepera pita te teebine ebmalige.

¹⁴ Yeesu piba teebine kokre cama jejige egä, “Gone nuuja biname bine ai poto cidi me jaajanemute, yepä maane conocäco ädi iiwäreja biname bau me, tabe meebine ire pa naatwanäjepi egä maane miiji gäte. Piba mäame owecu gwidape teebine ecäri tabe Acejiyame ne iiwärejame, Moose lipu mule ne ebiberäjemuji. Peei ne jewenepi, piba biname cina umle pa läbitipesi egä mäame pita siige.”

¹⁵ Yepä, Yeesu poto cidi me idre ecananisi iyeta poto ta. Bucurage biname cina piba teeme bau me saacluge teeme mene ätecijame piiyepu teeme maramara pita cabu ca miiji me äbitame.

* 5:1: Genesareta: Genesareta lui nuuja ngii gyene Galilaya sawa tääpume.

¹⁶ Yepä, tabe liba padare bine jääpānanemuge, piba biname cāco cewe me waatnetnājuge Acejiyame ne puma awejename.

*Yeesu Miiji me Jewenige Tääpe Nuuja Poto Budre Biname ne
(Matayo 9:1-8; Mareko 2:1-12)*

¹⁷ Nuuja bimu Yeesu liba biname bine ebiberājemige, poto Parisea sigu biname piyepu poto cotre abiberāja biname puga adnatāreji ge. Teepi ituge abasecretna iyeta cewe Galilaya Probins cabu ca piyepu Yuudea Probins cabu ca cuta poto lui babo cewe Yerusalema ca. Siige, mime Yageyame me kokre puga ge pita biname bine miiji me wawenecame.

¹⁸ Yoo, poto biname cina piba waaku cabu secanisi biname ne lui me tääpe nuuja poto budre ge. Teepi liga teebine ecanisi mete ngalebora Yeesu me opo gaabe je acitame,

¹⁹ biname ca mete tapanige, peei name pi äblicāco teebine äsinglenta piyeme. Yoo, teepi piba teebine ecanisi mete toro cabu me, puma bora cāngena jewenisi, teebine waaku cabu puma cita ca siyiniisi mete bora biname tomi ngalebora me, Yeesu me opo gaabe je ecitisi.

²⁰ Yoo, Yeesu liba jepānemige egā teepi baborage ātrunga cama gemi, piba tääpe nuuja poto budre biname ne jejige egā, “Cāme biname, maane kālyā gāte määme niyiāniya mule cabu ca.”

²¹ Siige, pui Parisea sigu biname piyepu cotre abiberāja biname cina teemeteme ätemlājiniisi egā, “Luma cita ca gyene ai biname, lui te Acejiyame me ngii pepu jiseblecājenige? Nuuja biname te ibibi lica ge biname bime niyiā mule äyebļengame, yepā Acejiyame taatu ibibi gyene peei ne wawename.”

²² Yeesu teeme ngenē atwanena umle äbitige, teebibine jejemige egā, “Weene ngenō me pepu ngenē jotwananiyiē weeme ngenecu bora je?”

²³ Lui gyene plowa iicana ai pita biname ne jajime egā, ‘Maane kālyā gāte määme niyiā mule cabu ca,’ coo ‘Arpinanti, abujāngti, siige ädi!’

²⁴ Cane weeme tääpume aboclomtenine egā cane lui Acejiyame bau ca tädujine biname me äbitujine, cāme conocāco pisi nyene ai gawecewe cabu biname bime niyiā mule äyebļengame.” Tabe piba pui tääpe nuuja poto budre biname ne jejige egā, “Cane meebine naajeniine, abujāngti, määme waaku ne ecati, mete me ädi!”

²⁵ Piba taatu peei biname te iyeta biname bime opo gaabe abujāngtīge, teeme waaku ne ecātege, gege cama mete me ädige. Tabe Acejiyame ne ewepyerājenige.

²⁶ Biname iyeta mutācāco äbitiniisi. Wālu cama teepi Acejiyame ne ewepyerājisi egā, “Mararage ciitaca mule ne cine page bii jepāniisi.”

*Yeesu Leebi ne Ala Tesoglicige
(Matayo 9:9-13; Mareko 2:13-17)*

²⁷ Peei mule ingwe ca Yeesu asatige sawa ligi me, puga babo gaabe gome yepā tāks rarekaake uutecrena biname ne jepānige, ngii Leebi. Tabe adnatāneji ge kaakesea puupu cabu. Yeesu teebine jejige egā, “Tādi cane cama otnime.”

²⁸ Piba Leebi abujāngtīge, teeme kaakesea iyeta gwidape cama ebmalemige Yeesu cama otnime.

²⁹ Siige, Leebi babo soriyomu jewenige Yeesu tääpume. Bucurage tāks rarekaake uutecrena biname piyepu nuuja biname cina puga ten cama deedei äbitiniisi.

³⁰ Puma cita ca poto Parisea sigu biname piyepu cotre abiberāja biname lui cina teeme yepā siigu cabu, teepi Yeesu me abiberāja bāgrā bine jejemisi egā, “Weene ngenō me deedei äbitiniisiye tāks rarekaake uutecrena biname piyepu cotre atropengāja biname cama?”

³¹ Yeesu pui mene iteciige, teebibine jejemige egā, “Biname lui cina miiji birige, teepi singi lica dokta tääpume, yepā biname lui cina pita cama birige, teepi singi dokta tääpume.

³² Yoo, cane lica tädujine biname bine ala asoglecame lui cina apu jaangemuge, egā teepi conocāco biname gemi, yepā cane conocono biname bine ala asoglecame tädujine teeme ngenecu atatrongārame Acejiyame bau me.

*Ätemleja Deedei Ärwāja cāco Lenaja poto cidi me
(Matayo 9:14-17; Mareko 2:18-22)*

³³ Poto biname cina Yeesu ne mene jejisi egā, “Yoane niye ca äciseja biname me abiberāja bāgrā cina deedei ärwāja cāco yaacrajuge poto bimu cabu Acejiyame ne awejename, piyepu Parisea sigu biname bime abiberāja bāgrā cina cuta peei mule ne jaawenusi, yepā määme abiberāja bāgrā cina deedei yāärwājimusi iyeta bimu gaabegabe.”

³⁴ Yeesu teebibine jejemige egā, “Yoo, Atejāclmūta soriyomu ne liba yaacilitusi, mamye rooriye me binamewale cina deedei ärwāja cāco lica yaacrajuge.

³⁵ Yepā, padare te pa tatyaramtepi liba mamye rooriye ne pa yaacatepesi. Teepi piba pa yaacrajemepi deedei ärwāja cāco.

³⁶ Yeesu ngene ca agli mene jejemige, neeneni mule bine aaboclomtige. Tabe jejemige egä, "Biname te licarage pläsu ne yääderärüge kirece cäbletääpe cabu ca sasa cäbletääpe bora cabu acitame, ingle peei mule te neeneni cäbletääpe bine sabe jaawenuge: kirece cäbletääpe piba äderera birige, piyepu sasa cäbletääpe miiji opo lica birige kirecerage pläsu cama." Yeesu pepu jejemige, naace popi tabe singi biname cina umle äbitame egä teepi liba singi Acejiyame me kirece mule ne oomlaname, teepi piba äblicäco sasa saarewale bime mule bine äcwetna.

³⁷ Tabe piba jejemige egä, "Piyepu nuuja te kirece waina niije ne lica yaapaduruge gouti tääpe ca wawenäneji sasa ängära gwidape cabu. Tabe liba yaapaduruge, kirece waina niije teeme kokre te sasa tääpe ca wawenäneji gwidape ne yääpluge, ingle tuutnecuge. Siige, waina niije te lapaduruge gawe me piyepu ängära gwidape te sabe läbituge.

³⁸ Ewe! Umle biname te kirece waina niije kirece tääpe cabu jäängärüge.

³⁹ Yoo, nuuja biname te lica kirece waina niije tääpume singi, tabe liba sasa ne yaapicnantuge, yepä jicuge egä, 'Sasa lui miijirage gyene.' " Siige, Yeesu peei mene biname bine jejemige aboclomtame egä biname cina singi lica sasa mule ne abmalame kirece mule tääpume.

6

Ätemleja Sabade Cotre poto cidi me

(Matayo 12:1-8; Mareko 2:23-28)

¹ Israela biname bime Sabade bimu cabu Yeesu teeme abiberäja bägrä cama wiiti calwacupi ngalebora gaabe cabu ädige. Teeme otni cabu abiberäja bägrä cina wiiti mope bine ecrecimisi, ime ca mälwä bine jimlecäjemisi, kuu taatu bine erwäjemisi, gaabe cabu otnetneja biname bime mule lipu ge.

² Poto Parisea biname cina piba abiberäja bägrä bine jejemisi egä, "Weene ngena ne jeweniye? Mime cotre pisi nyene pepu kaakesea wawena Sabade bimu cabu!"

³ Yeesu teebibine jejemige egä, "Nää, weene lica mene ituge acnema Daawida teeme biname cama ngena itu jewenuji, teepi liba loolomecewe icrajuji?"

⁴ Tabe Acejiyame me iiwäreja mete me abacituji, buluduu ne ecatuji, lui Acejiyame tääpume iiwäräneji ge, peei ne erwuji, piyepu lui biname ten cama teebibine ecäremuji teeme deedei tääpume. Yoo, mime tääpume cotre gyene buluduu puma cita ca acata loolo me, yepä iiwäreja biname taatu peei bine yäärwäjimusi."

⁵ Siige, Yeesu piba jejemige egä, "Yoo, cane lui Acejiyame bau ca tädujine biname me äbitujine, cane Yageyame gäne Sabade bimu tääpume. Cäme conocäco pisi nyene jajime ai bimu cabu ngena wawename."

Biname Lui me Camu Poto Ime Duudemu Ge

(Matayo 12:9-14; Mareko 3:1-6)

⁶ Cuta nuuja taje Sabade bimu cabu, Yeesu abasecretna mete me abacitige biname bine ebiberäjemige. Biname puga ge lui me camu poto ime duudemu ge.

⁷ Poto cotre abiberäja biname piyepu Parisea sigu biname cina singi ingle ne päpäname Yeesu ne aitnejame. Teepi peei name pi Yeesu ne cängena ire jetwisi egä tabe pama pui biname ne miiji me jewenige Sabade bimu cabu.

⁸ Yepä, Yeesu teeme ngene atwanena umle ge, pui biname lui me ime duudemu ge, teebine jejige egä, "Abujängti, tädi aina niinäce gaabe me." Puma cita ca pui biname te abujängtuge, Yeesu gome jeclajutige.

⁹ Yeesu piba teebibine jejemige egä, "Yoo, cäme ätemla pisi nyene weeme tääpume. Cotre mene te lipu jicenige, mine ngena miiji ge wawena Sabade bimu cabu: biname ne miiji wawena, coo biname ne niija wawena? Biname ne ätityera ireclotame, coo biname me ireclota ne sabe wawena?"

¹⁰ Tabe iyeta biname bine cängena ire jetwemige, piba peei ime duudemu ge ne jejige egä, "Määme ime tuuti." Tabe pepu jewenige, siige teeme ime te miiji me äbitige.

¹¹ Yepä, pui cotre abiberäja biname piyepu Parisea sigu biname teepi iyeta mage claabe te joomlemige, teemeteme ätemläjinisi egä, "Mine ngena jewenenisi ai biname tääpume?"

Yeesu Twelb Ätyepäneji Biname bine Jejäcremige

(Matayo 10:1-4; Mareko 3:13-19)

¹² Nuuja taje Yeesu podo cabu me jegelige irecu ätumutame.

¹³ Tabe iyeta pui ciije puma enajige Acejiyame bau irecu ätumutanige. Bimu te liba tacitige, tabe teeme abiberäja bägrä bine ala tesoglecmige teeme bau otnime, piba twelb bine jejäcremige pui tomi cabu ca teeme ätyepäneji biname tääpume äbitame.

¹⁴ Age tema pui twelb biname: Simona tabe lui ne einige Peteru ca, piyepu teeme igane Andrea; Yakobu piyepu Yoane; Pilipo piyepu Bartoloma;

¹⁵ Matayo piyepu Tooma; Yakobu Alapeus me bāgrā piyepu Simona, lui Kanana sigu biname ge;

¹⁶ Yuuda, lui nuuja Yakobu me bāgrā ge, piyepu Yuuda Isakariyota, lui te Yeesu ne budre tääpume awaba biname äbitige.

Yeesu Biname bine Ebiberājemige piyepu Pita cabu ca Miiji me Jewenemige
(Matayo 4:23-25)

¹⁷ Yeesu pui biname cama täinige podo cabu ca, jeclajutige gawe miiji cabu. Bucurage teeme abiberāja bāgrā puga ge ten cama, piyepu bucurage biname lui cina teeme bau me seclige iyeta Yuudea gawe cabu ca, piyepu babo cewe Yerusalema cabu ca, cuta piyepu neneneni malu cewe Turo piyepu Sidona cabu ca.

¹⁸ Teepi seclige teeme mene äteçijame piyepu teeme maramara pita cabu ca miiji me äbitame. Lui bine niyaniya cable cina niyarage ngene atwanena cama yaawadanemusi, teepi cuta miiji me äbitinini.

¹⁹ Yoo, iyeta biname cina singi teebine oomlaname, ingle kokre te teeme cabu ca tasatenige teebine iyeta miiji me wawename.

Ngenecu Miiji piyepu Ngenecu Mäpu
(Matayo 5:1-12)

²⁰ Yeesu teeme abiberāja bāgrā bine ire jetwemige, jejemige egā,
“Weene lui owecumete pana inajininige, ngenecu miiji äbitineye,
ingle weene Acejiyame me waadena cabu itu yāābācnepeye.

²¹ Weene lui loolomecewe gemi page, ngenecu miiji äbitineye,
ingle weene camuge cirege pāpāna.

Weene page lui cina ele ingenininige, ngenecu miiji äbitineye,
ingle weene ngange gege cama cirege.

²² Ngenecu miiji äbitineye biname cina liba weebibine jimugetninusi, jigynusi, jicnecinusi,
coo piyepu weeme ngii sabe jiwenininusi, ai name pi ingle weene cebine nätrunguye,
cane lui te Acejiyame bau ca tädujine biname me äbitujine.

²³ Yoo, piba ngenecu miiji me äbitineye piyepu gege cama uuplatājineye, ingle miijirage daremu pisi nyene weeme tääpume cabucewe je. Yoo, teepi lui cina weebibine niya jiwenininusi, teeme kaakesaare cina pepu mule itu tewenenanemumesi Acejiyame me mename biname bime tääpume.

²⁴ Yepā, weene lui cina dogwe biname pana inajininige page, weene ngenecu mäpu äbitineye,
ingle weeme lui plowa pana ireclota ituge pāpāna, siige cirege apira.

²⁵ Weene lui cina camuge apanininiye page, ngenecu mäpu äbitipeye,
ingle weene loolomecewe cirege lenaja.

Piyepu weene lui cina ngange cama inajininige page, weene ngenecu mäpu äbitipeye,
ingle weene ele cire ingenitnipi.

²⁶ Ngenecu mäpu me äbitipeye, weene lui bine iyeta biname cina jāje iwepyerājininusi. Yoo, teeme kaakesaare cina pepu mule itu tewenenanemumesi walya mename biname bime tääpume.”

Abiberāja Mene Cubuyame poto cidi me
(Matayo 5:38-48; 7:12a)

²⁷ Yeesu cāari biname bine mene jejemige egā, “Cāme mene piti nemi weeme tääpume lui cina cebine näteçijeniye egā weeme cubuyame bime tääpume singi inajipi. Lui biname cina weebibine jimugetninusi, weene teebibine cuta yāätityerājemuye.

²⁸ Lui biname cina weebibine mene ca niya me jiwenininusi, weene Acejiyame ne yaawejanuye teeme miiji tääpume. Cuta teeme tääpume irecu lätumutinuye lui cina weeme ireclota mäpu me jiwenininusi.

²⁹ Yoo, biname te liba weeme nuuja ne yoororuge lakace cabu, tabe miiji cuta atamongta nuuja poto lakace ne ceerame. Biname te liba weeme nuuja me ätrugera gwidape ne yaacatuge, gone teebine iibana cuta soto ne acata.

³⁰ Lui biname te weebibine liba itinārinuge, weene teeme singi gwidape yāācāruye, piyepu biname te liba weeme gwidape ne yaacatuge, gone teebine jaajuye peei ne awecnistame.

³¹ Yoo, weene singi biname cina ngena wawename weeme tääpume, weene miiji pepu wawena teeme tääpume.

³² Weene gone Acejiyame bau ca miiji daremu ne awagrija, weene liba eei biname bime taatu cabu me singi, lui cina weeme tääpume singi, ingle cuta niiya mule biname cina pepu jaawenemusi.

³³ Piiyepu gone Acejiyame bau ca miiji daremu ne awagrija, weene liba eei biname bine taatu miiji jaawenemuye lui cina weebibine miiji niwenininuge. Cuta niiya mule biname cina pepu jaawenemusi.

³⁴ Piiyepu gone Acejiyame bau ca miiji daremu ne awagrija, weene liba eei biname bine taatu gwidape watawata yääcäremuye lui cina weebibine gwidape pagege awecnista. Cuta niiya mule biname cina teeme gwidape nuuja niiya mule biname bine yääcäremusi, teepi liba yepä pana gwidape teeme bau ca pagege päpäna.

³⁵ Pepu mule lica ge ibibi, yepä weene weeme cubuyame bime tääpume singi inajipi, teebibine miiji jaawenemuye, piiyepu gwidape liba watawata yääcäremuye biname bine, gone awagrija peei awecnista tääpume. Acejiyame te piba weebibine babo daremu cire icäripi, piiyepu Caburage Acejiyame me bägrä pagege weene lenaja. Ingle tabe cuta niiya mule biname bine owecu jaawenemuge, piiyepu eei bine lui cina eso mene umle cäco iicana.

³⁶ Yoo, weene iyeta biname bine epu pana owecu jaawenemuye, mime Babe Cabu je biname bine owecu lipu jewenininige.”

*Abiberäja Mene Biname bine Atrana poto cidi me
(Matayo 7:1-5)*

³⁷ “Weene gone biname bine jaatranemuye, piba Acejiyame weebibine lica cirege atrana; gone singi nuuja biname te mäpu daremu ne päpäname, piba Acejiyame weebibine lica mäpu daremu cirege ceera. Nuuja biname bime niiya mule bine weene ngene atwanena cabu ca yääyecräjemuye, piba Acejiyame weeme niiya mule bine cirege äyecreja.

³⁸ Nuuja biname bine gwidape yääcäremuye, piba Acejiyame weebibine gwidape pa icäripi. Yoo, tabe bucurage ätityera weebibine pa icäripi. Epu pana diiba te deedei ca lipu tapanuge, weeme ime ibibi lica birige iyeta teeme miiji oomlana, weeme ireclota cuta pa tapanepi teeme miiji ca. Yoo, weene liba nuuja biname ne matimati yäätityäruye coo baborage yäätityäruye, Acejiyame te yepä ibi weebibine pagege ätityera.”

³⁹ Yeesu cuta ngene ca agli mene jiiçige egä, “Yepä, irecu määsumäsu biname te äblicäco nuuja irecu määsumäsu biname ne gaabe cabu awecluja. Tabe liba peei ne jaawenuge, siige teepi iyeta cäsu cabu me lastramuge.

⁴⁰ Yoo, abiberäja bägrä te lica ge baborage teeme abiberäja biname cabu ca, yepä iyeta abiberäja bägrä lui cina iyeta cängena labiberäjininusi, piba teepi teeme abiberäja biname pana pagege äbita.

⁴¹ Weene ngeno me singi matikolä conocono weeme nuuja biname me ireclota cabu päpäname, yepä baborage conocono weeme ireclota cabu weene lica päpäna?

⁴² Peei lui epu pana mäame irecu cabu baborage uli pargi liba pisi nyene piiyepu maane liba mäame biname ne jaji egä, ‘Cäme biname, cane mäame irecu cabu ca pläpu ne jaacatene!’ Weene walya biname gemi! Weene miiji niinäce uli pargi ne weeme irecu cabu ca acata, piba weene cängenarage jepäneniye weeme biname me irecu cabu ca pläpu ne acatame.”

*Abiberäja Mene Uli piiyepu Teeme Kuu poto cidi me
(Matayo 7:16-20; 12:33-35)*

⁴³ Yeesu piba jiiçige egä, “Miijirage uli te lica yääyuge niiyarage kuu cama; cuta piiyepu niiyarage uli te lica miijirage kuu cama yääyuge.

⁴⁴ Yoo, weene iyeta uli bine opo yaawatnemuye teeme kuu cabu ca: weene äblicäco miijirage kuu epu piigi kuu bine äwäcuta gaalegale seea cabu ca, coo waina kuu bine äwäcuta käkäco mete cabu ca.

⁴⁵ Yoo pepu pana gemi, biname lui me miijimiji ngene atwanena teeme ngenecu bora piti nemi, teeme mule piiyepu teeme mene cuta miijirage gemi. Yepä, biname lui me niyaniya ngene atwanena teeme ngenecu bora piti nemi, teeme mule piiyepu teeme mene cuta niiyarage gemi. Ingle biname bime tage cabu ca lui mene cina täsuge, peei lui teeme ngenecu bora cabu ca saacluge.”

*Abiberäja Mene Neeneni Mete Raranga Biname poto cidi me
(Matayo 7:24-27)*

⁴⁶ Yeesu cuta jejemige egä, “Weene ngenome cebine nainuye ‘Yageyame’ ca, yepä cäme singi mene lica jaawenuye?

⁴⁷ Yoo, iyeta biname lui cina cäme bau me saacluge, cäme mene yäätecijemuge, piba cuta yaacatusi ibi wawename,

⁴⁸ teepi lui epu pana biname liiyepu lui te miijirage mete ne erangige. Tabe gawe ngalebora me juurige kula luma birige, piba cängena caage bine jermecimige, mete ne peei cabu erangige. Siige, igi te tädige, pui mete ne irmitige, yepä lica apinicege, ingle kokrerage caage cabu rarangäneji ge.

⁴⁹ Yepä, lui biname te căme mene papa yäätacijuge, yepä lica jaawenuge, tabe lui epu pana biname liiyepu lui te caage bine tumerage je jermecimige, cuta peei cabu mete ne erangige. Igi liba tädige, pui mete ne ijarige, mete te itramige, siige iyeta sabe äbitige.”

7

Yeesu Cubu Mope Biname me Kaakesea Băgră ne Miiji me Jewenige (Matayo 8:5-13)

¹ Yeesu liba iyeta peei mene epiremige biname bine jajanenime, piba tabe Kaprenauma cewe me abacitige.

² Pui cewe cabu puga ge yepä Rooma cabu ca cubu mope biname. Teeme ngenecurage kaakesea băgră baborage pita cama ge budre mameta.

³ Pui Rooma cubu mope biname te liba mene itecijige Yeesu poto cidi me, tabe poto Israela modamoda biname bine Yeesu bau me jityepemige teebine ätemlame teeme kaakesea băgră ne miiji wawenime.

⁴ Pui Israela modamoda biname cina seclige, Yeesu ne owecu cama itineräjisi egä, “Maane miiji teebine ätityerame, ingle tabe miiji biname gyene.

⁵ Tabe babo owecu mime biname bime täapume, piyepu cime abasecretna mete ne eranguji teeme rarekaake ca.”

⁶ Yoo, Yeesu piba ten cama ädige. Tabe teeme mete mameta me liba atyaramtige, piba pui Rooma cubu mope biname te poto teeme binamewale bine tityepemige Yeesu bau me mene cama egä, “Babo Biname, gone mäpu me läbitute căme täapume. Cane ibibi lica gäne maane abacitame căme mete me,

⁷ peei name pi cane lica otni mäame opo gaabe me. Maane mene taatu jiici, piba căme kaakesea băgră te miiji pa läbitege.

⁸ Yoo, cane umle gäne mene lipu kokre gyene. Cane miiji căme babo biname bime mene ätecija, piyepu căme ire atwi cabu piti nemi cubu biname. Cane yepä ne jaajune, ‘Ädi,’ siige tabe läduge; cane nuuja ne jaajune, ‘Tädi,’ siige tabe täduge. Cane căme kaakesea băgră ne jaajune, ‘Ai jeweni,’ siige tabe peei ne jaawenuge. Peei name pi cane umle gäne egä mäame mene cabu kokre pisi nyene.”

⁹ Yeesu mutăcăo äbitige, pui mene liba itecijige. Tabe ingwe gaabe me tatadrongtige, ten cama lui biname cina seclige, teebibine jejemige egä, “Cane weebibine jijenininine egä apu baborage ätrunga ne cane lica ituge păpăna Israela biname bime cabu ca, yepä ai biname cabu taatu jepänine.”

¹⁰ Pui mename biname cina liba äcnäriige Rooma cubu mope biname me mete me, siige teepi pui kaakesea băgră ne miiji jepänisi.

Yeesu Budre Biname ne Erpinantige

¹¹ Peei ingwe ca Yeesu ädige yepä matikolä cewe me, ngii Naina. Teeme abiberäja băgră piyepu bucurage nuuja biname cina ten cama eclige.

¹² Tabe liba pui cewe grana gome atyaramtige, biname cina yepä budre biname ne secanisi cewe cabu ca. Tabe mamye biname ge, teeme mage me japurage imăbăgră; cuta mage lui cuubla ge. Bucurage pui cewe biname cina ten cama seclige.

¹³ Yageyame liba teebine jopänige, tabe baborage owecu äbitige teeme täapume, jojige egä, “Ele gone!”

¹⁴ Tabe piba awetântige, budre biname me keeso kaake ne joomlige. Pui keeso acana biname cina piba imyemutemige, siige Yeesu pui budre biname ne jejige egä, “Mamye biname, cane meebine naajenine arpinanti!”

¹⁵ Siige, pui budre biname te arpinantige, piba gije abacitige mene me. Yeesu teeme mage ne ocäriige.

¹⁶ Iyeta biname cina wălu me äbitininisi, Acejiyame ne ewepyeräjisi egä, “Acejiyame me baborage mename biname te mime bau me tädige!” Teepi cuta jiicisi egä, “Acejiyame bii tädige teeme biname bine ätityerame.”

¹⁷ Yeesu ne idre jecenanisi Yuudea gawe iyeta poto ta piyepu cuta poto gawe mameta cabu ta.

Mename Biname cina Seclige Yoane Niiye ca Āciseja Biname bau ca (Matayo 11:2-19)

¹⁸ Yoane iyeta peei mule poto cidi me itecijige teeme äbiberäja bāgrā bime bau ca. Tabe piba ala taasoglicige teeme neeneni abiberäja bāgrā,

¹⁹ teebibine Yageyame bau me jäätyepige, teebine ätemlame egä, “Nää, maane säte pui biname, iyeta biname cina lui ne jewagrijenisi otnime, coo cine miiji nuuja ne awagrija?”

²⁰ Pui neeneni biname cina Yeesu bau me liba atyaramtäsi, jäjäsi egä, “Yoane niije ca äciseja biname te cibibine mäame bau me nityepige meebine ätemlame egä, ‘Nää, maane säte pui biname, iyeta biname cina lui ne jewagrijenisi otnime, coo cine pama miiji nuuja ne awagrija?’”

²¹ Puirage padare cabu Yeesu bucurage biname bine miiji me jewenemige maramara pita cabu ca, piyepu niija cable bine iyecräjemige, piyepu bucurage irecu määsumäsu biname bine miiji me jewenemige.

²² Pui neeneni biname lui Yoane bau ca tabe teebibine mene jaawecnistige egä, “Weene Yoane bau me acne-nuteye, teebine jejepeye weene ngena ituge päpäna piyepu ätecija naace irecu määsumäsu biname cina cāngena jääpänanemusi; ernge niijaniya biname cina miiji waatninusi; lepera pita biname cina miiji me läbitininusi; tablame buduma biname cina cāngena yäätacijanemuge; budre biname cina larpineräjininusi ireclota me; cuta piyepu owecumete biname bine Miiji Mene jaajanemusi.

²³ Yoo, ngenecu miiji eei gemi laati bemi ätrunga ne lica yaapesarusi cāme bau.”

²⁴ Pui biname Yoane bau ca liba acnenutäsi teeme bau me, Yeesu gije abacitige biname bine mene Yoane poto cidi me jajanename. Tabe teebibine itemlemige egä, “Weene liba daapo taatu cewe me läsipeye, weene singi puma ngena päpäname? Weene lica otni duuwe baace päpäname buuwe te papa yaacenanuge.

²⁵ Liba peei lica, weene ngena päpäname läsipeye peeyeme? Weene lica otni biname ne päpäname, lui te labasogäruge miijimiiji cäbletäape cama, ingle pepu pana biname cina modamoda biname bime mete cabu yaacrajuge luma miijimiiji gwidape birige.

²⁶ Cebine najeye, weene ngena päpäname läsipeye peeyeme? Weene nää Acejiyame me mename biname ne singi päpäname? Yoo, cane weebibine jijenininine egä weene baborage mename biname ne puga ituge päpäna.

²⁷ Oogäräneji Mene cabu Acejiyame te Yoane poto cidi me jiccenige egä, ‘Cane cāme mename biname ne mäame niinäce gaabe me cire jäätyepene. Tabe te gaabe cire yaamacetnäjepi mäame otni täapume.’”

²⁸ Yeesu piba jejemige, “Cane weebibine jijenininine egä Yoane lui baborage gyene iyeta ai gawecewe biname bime cabu ca lui cina ituge ai gawecewe cabu lenaja ngälu Yoane me padare oomlaname, yepä page ai kirece padare cabu, eei cabu ca lui te matikäli gyene Acejiyame te lui bine ewadenemige, tabe baborage gyene Yoane cabu ca.”

²⁹ Yoo, iyeta biname piyepu cuta täks rarekaake uutecrena biname cina liba Yeesu me mene yäätacijemepi, piba jiccepesi egä, “Acejiyame me gaabe toraca conocāco gyene,” siige teepi peei name pi äciseja mule ne ituge acatena Yoane bau ca.

³⁰ Yepä, Parisea sigu biname piyepu cotre abiberäja biname cina Yoane me äciseja mule ne jäägyusi, pepu pi teepi cuta Acejiyame me teeme täapume singi gaabe ne jäägyusi.

³¹ Siige, Yeesu jicige egä, “Cane ngena cabu yaatonäremene biname bine page lui cina ireclota gemi?”

³² Teepi epu pana gemi matimati bāgrā liyepu, lui cina adnatäreji yaacrajuge aletnaletna puupu cabu, siige teemeteme ala abayaninusi egä, ‘Cine dobidobi bine jääcnäjemusi, yepä weene giire lica jääwäjuye. Cine owecumete uupera yaatangusi, yepä weene singi lica ele me.’

³³ Yoo, Yoane niije ca äciseja biname te tädepi piyepu poto bimu deedei cāco yaanajuge piyepu waina niije lica yäänäjuge. Weene singi lica teeme mule täapume, teeme poto cidi me jiccemuye egä, ‘Niija cable te teebine ecanenige.’

³⁴ Cane lui Acejiyame bau ca tädujine biname me äbitujine, cane piba tädepene. Cane deedei läbitune piyepu niije yäänäjune, yepä weene cuta singi lica cāme mule täapume, cāme poto cidi me jiccemuye egä, ‘Jepāneye ai biname ne! Tabe mage looloyame gyene piyepu waina niije änäjāyame! Täks rarekaake uutecrena biname piyepu cotre atropengāja biname teepi lui teeme biname gemi!’

³⁵ Yoo, weene pepu jiccemuye, yepä lui biname cina yaacatusi Acejiyame me singi mule bine, teeme ireclota cabu ca mine opo yaawatnusi egä Acejiyame lui umlerage gyene.”

Parisea Sigu Biname te Yeesu ne Tesoglicige Teeme Mete me

³⁶ Yepä Parisea sigu biname ngii Simona tabe Yeesu ne ala tesoglicige ten cama deedei äbitame. Yeesu ädige teeme mete me, puga adnatige deedei me.

³⁷ Puga ge pui cewe cabu yepä eroero magebi. Tabe liba mene utecijige egä Yeesu deedei äbitenige pui Parisea biname me mete cabu, tabe piba matikolä karpu ne miiji lengo ngedo cama ecatige, peei cama oclige Simona me mete me.

³⁸ Puga tabe Yeesu me kaake poto ca joclajutige teeme ernge gome. Tabe ele ongenige piyepu teeme ele mäcu cina sitrametnemige Yeesu me ernge cabu. Tabe pui ele mäcu bine jicisäjemige, teeme lecaleca edingäli ca, teeme ernge jetcnige, piba pui miiji lengo cama ngedo ne ernge cabu epadurige.

³⁹ Yoo, pui Parisea biname lui te Yeesu ne ala tesoglicige, tabe liba peei mule ne jepänige, teeme ngenecu bora jüicige Yeesu poto cidi me egä, "Ai biname liba toraca mename biname gyene, tabe piba umle cama gyene ai magebi poto cidi me, lui te teebine joomlemige, egä teeme ireclota lui magerage conocono gyene!"

⁴⁰ Piba Yeesu pui Parisea biname ne jejige egä, "Simona, cane singi gäne meebine matikolä mene jajime."

Simona jejige egä, "Abiberäja biname, ngena mene gyene?"

⁴¹ Yeesu ngene ca agli mene teebine jejige egä, "Neeneni biname cina rarekaake ituge waadena yepä rarekaake ire atwi biname bau ca. Pui yepä biname te faib hanred rarekaake yaawademepi piyepu nuuja te fifti taatu rarekaake yaawademepi. Yoo, yepä pui rarekaake me ibi lui daremu gyene yepä bimu me kaakesea täápume.

⁴² Siige, ingwe ca pui neeneni äblicäco ge pui rarekaake awecnistame, peei name pi rarekaake ire atwi biname te teebibine jaajige egä, 'Ngänu gyene peei bine awecnista. Cane weeme ngii ituge äyeblyngta daremu oogäräneji peba cabu ca.' Yoo, Simona cane meebine näätmenline egä pui neeneni cabu ca laasi nyene baborage singi pui rarekaake ire atwi biname täápume?"

⁴³ Simona teebine jejige egä, "Pama pui biname lui me baborage daremu ne ituge äyeblyngta."

Yeesu jejige, "Yoo, mäame mene toraca gyene."

⁴⁴ Tabe piba pui magebi bau me atamongärige, Simona ne jejige egä, "Jopäni ai magebi? Cane liba mäame mete me abacitine, maane cebine niye lica näcärite ernge äciseja täápume, mime mule lipu gyene, yepä ai magebi cäme ernge teeme ele mäcu ca näcisäjige, piba nebo jicisäjige teeme edingäli ca.

⁴⁵ Maane cebine lica natecnite awablame, mime mule liiyepu, yepä cäme abacita cabu ca ai magebi te cäme ernge jäje natecnanige.

⁴⁶ Maane cäme mope olibi migi ca lica napyacite, mime mule liiyepu, yepä tabe te cäme ernge miijimiji ngedo ca bii napyacige.

⁴⁷ Cane meebine naajenine egä teeme bucurage conocono mule bine ituge äyeblynga, peei name pi teeme owecu baborage gyene cäme täápume. Yepä, lui biname me nesae taatu niya mule ituge äyeblynga, teeme matikolä singi taatu pisi nyene."

⁴⁸ Yeesu puma cita ca magebi ne jojige egä, "Mäame niyaniya mule bine ituge äyeblynga."

⁴⁹ Piba pui nuuja biname lui cina pui dade gome adnatäreji gemi, teepi teemämu ätemläjinisi egä, "Laasi nyene ai biname lui te cuta biname bime niyaniya mule bine yääyeblyngemuge?"

⁵⁰ Yeesu piba magebi ne jojige egä, "Acejyame te meebine näätityärige mäame niya mule cabu ca asatame, ingle maane cebine nätrungite. Äte, ngenecu poode cama oculi."

8

Poto Magebi cina Yeesu ne Yäätityärusi

¹ Peei padare ingwe ca Yeesu modamoda cewe piyepu matimati cewe cabu ta ot-netnäjige, puga Miiji Mene biname bine jejananemige Acejyame te biname bine waadena poto cidi me. Teeme twelb abiberäja bägrä cina ten cama otninisi.

² Cuta ten cama puga ge poto magebi, Yeesu lui bine pita cabu ca miiji me itu jaawenemepi piyepu niya cable bine itu yääyecräjemepi teeme poto cabu ca. Teeme poto ngii age temi: Yepä lui Mariya, teeme nuuja ngii Magadala tage, Yeesu lui me trupa cabu ca seben niya cable bine itu yääyecräjemepi.

³ Nuuja teeme ngii Yoana tage. Tabe lui Kusa me coga gwene, Kusa lui te Mopeyame Heroda me mete piyepu gwidape bine ire jaatwemuge. Cuta nuuja teeme ngii Susana tage, cuta piyepu bucurage nuuja magebi cina ten cama puga ge. Teepi Yeesu piyepu teeme abiberäja bägrä bine yäätityäremusi teemerage rarekaake piyepu gwidape cabu ca.

Ngene ca Agli Mene Kuu Gije Iisabeja poto cidi me

(Matayo 13:1-9; Mareko 4:1-9)

⁴ Biname cina Yeesu bau me totninisi maramara cewe cabu ca. Liba bucurage biname cina abasecretnege, tabe ai ngene ca agli mene jebaitnemige egä:

⁵ “Yepä biname te äduji calwacupi me kuu gije bine iisabejame. Egäcäro tabe kuu bine gweeti cabu yiisabäjemige, poto cina gaabe cabu itrametnemige. Puga biname cina kuu bine jibrecäjemisi piyepu ele cina erwäjemisi.

⁶ Poto kuu cina itrametnemige kula gawe cabu. Kuu cabu ca gije liba tuupletnärige, teepi maaje me äbitininisi, ingle pui kula gawe cabu niye lica ge.

⁷ Poto kuu cina itrametnemige pägepäge mete bora me. Pägepäge cina gije cama uutinisi, siige gije bine jetäyemisi.

⁸ Poto kuu cina itrametnemige miijirage gawe cabu. Pui cabu ca gije cina tuupletnärige, uutinisi, kuu jepänemisi, nuuja cina yepä hanred kuu jepänemisi.”

Yeesu pei mene jejemige, piba babo tage ca jicige egä, “Weeme liba tablame piti nemi ätecijame, itecijinege umle äbitame!”

*Agesa Ingle Yeesu Biname bine Yaabiberäjemuge Ngene ca Agli Mene ca
(Matayo 13:10-17; Mareko 4:10-12)*

⁹ Ingwe ca Yeesu me abiberäja bāgrā cina teebine itemlisi pui ngene ca agli mene me aboclomta poto cidi me.

¹⁰ Yeesu teebibine jejemige egä, “Lui umle niinäce aboclomtāneji lica ge, egä Acejiyame te lipu biname bine waadena, weebibine umle ituge ceera. Yepä nuuja biname bime bau me cane ngene ca agli mene ca jicune, ai name pi ‘puu ire acita cabu, teepi lica jääpānusi, piyepu puu ätecija cabu, teepi lica umle läbitininusi.”

*Yeesu Ngene ca Agli Mene ne Eboclomtige Kuu Gije Iisabeja poto cidi me
(Matayo 13:18-23; Mareko 4:13-20)*

¹¹ Yeesu abiberäja bāgrā bine jejemige egä, “Cane kuu gije iisabeja poto cidi me mene ne eboclomteneine: Pui kuu lui epu pana Acejiyame me mene liyepu.

¹² Lui kuu cina gaabe cabu itrametnemige, pui gawe epu pana biname lui cina Miiji Mene yäätcejemuge, yepä Satani te läduge, pui mene ne wata yääyeblingtuge teeme ngenecu bora ca, ingle tabe singi lica ge teepi pui mene ätrungame, piba teeme niya cabu ca äsecerame.

¹³ Lui kuu cina kula gawe cabu itrametnemige, pui gawe lui epu pana biname liyepu lui cina Miiji Mene yäätcejemuge, gege cama yaacatusi, yepä epu pana gije me braju te äblicāco kula gawe bora abacitame, pui mene te äblicāco teeme ngenecu bora me abacitame. Matikolā padare teepi jäätrungusi, yepä apicetnāra te liba täduge, teepi piba teeme ätrunga ne yaabmalusi.

¹⁴ Lui kuu cina pägepäge mete cabu itrametnemige, pui gawe lui epu pana biname liyepu lui cina Miiji Mene yäätcejemuge, yepä teeme ngenecu māpu, coo teeme bucurage gwidape, coo piyepu teeme singi ai ireclota me gege mule täapume, pei cina pägepäge seeasea pana Miiji Mene ne jäätäyusi. Pei name pi teeme ireclota cabu pui mene te äblicāco nuuja kuu wawename.

¹⁵ Lui kuu cina miiji gawe cabu itrametnemige, pui gawe lui epu pana biname liyepu lui cina miijirage piyepu toraca ngenecu cama Miiji Mene yäätcejemuge, ngenecu cabu cāngena joomlusi, piyepu durau cāco miijimiji mule bine jaawenemusi kuu täapume.”

*Ngene ca Agli Mene Lampa poto cidi me
(Mareko 4:21-25)*

¹⁶ “Nuuja biname te lampa ne lica jaabotuge, piba diiba ca yäät rugärige coo yaacituge dade lolehora me. Yepä, tabe lampa ne cabu je yaatecwantuge, piba biname lui cina mete me yääbācnusi, teepi lampa apacyera ne jääpānusi.

¹⁷ Pepu pana ge page biname bime bau ca ngena ämlitāneji gyene, pajecu me pagege äbita teeme täapume, piyepu lui mule biname cina umle lica gemi page, teepi pagege umle äbita.

¹⁸ Pei name pi weene cāngena ngene jotwananineye lipulipu ätecijame, ingle lui biname me umle pisi nyene, Acejiyame teebine cerāmu pa yäacārepi; piyepu lui biname me umle lica gyene, Acejiyame teeme bau ca pa yaacatepi lui matikāli umle tabe apu angi egä pisi nyene.”

*Mene Yeesu me Ingle Biname poto cidi me
(Matayo 12:46-50; Mareko 3:31-35)*

¹⁹ Yeesu me mage piyepu iganewale cina teeme bau seclige, yepä teepi äblicāco teeme mameta me otni biname tomi name pi.

²⁰ Yepä biname te Yeesu ne piba jejige egä, “Määme mage piyepu iganewale mete kaake poto je jeclajutemige. Teepi singi määme täapume.”

²¹ Yeesu piba iyeta biname bine jejemige egä, “Lui cina Acejiyame me mene jäätcejusi piyepu yaacatusi wawename, teepi cāme täapume epu pana mage piyepu iganewale liyepu.”

*Yeesu Sawa cabu Buuwe ne Jiibige
(Matayo 8:23-27; Mareko 4:35-41)*

²² Nuuja bimu Yeesu teeme abiberäja bägrä cama acetnärige poo cabu me, teebibine jejemige egä, "Mine sawa ne yuuresi nuuja poto doro me," siige teepi abyemärinisi.

²³ Poo te liba niye cabu ädige, Yeesu ute ogrige. Piba baborage buuwe te tipwäjige sawa cabu. Pui poo cabu uule kuu cina taticweräjenisi, poo te mameta abuma.

²⁴ Puma cita ca Yeesu me abiberäja bägrä cina awetenäjininisi teeme mameta me, teebine elotnantisi ute cabu ca, jejisi egä, "Abiberäja biname, mine labumetninago!"

Yeesu abujängtige, buuwe piyepu uule kuu bine kokre mene ca jiibemige, siige sawa te bulubulu mataru enajige.

²⁵ Tabe piba teeme abiberäja bägrä bine jejemige egä, "Lese nyene weeme ätrunga?"

Teepi wälu piyepu mutäcäco äbitininisi, siige teemeteme ätemläjinisi egä, "Ai biname tabe laasi nyene? Tabe mene jejemige buuwe piyepu uule bine, siige teepi jitecijiisi teeme mene!"

*Yeesu Niya Cable cama Biname ne Itityäriga
(Matayo 8:28-34; Mareko 5:1-20)*

²⁶ Teepi poo cabu eclige ngälu atyarininisi Gerasene* biname bime gawe cabu. Pui gawe lui Galilaya sawa nuuja poto doro ca.

²⁷ Yeesu liba poo cabu ca arpatige doro me, yepä pui cewe biname te opopa eyige ten cama, lui biname ne niya cable cina yaacananusi. Leca padare cama tabe cäbletääpe cäco waatnetnäjuge, singi lica ge mete cabu lenajame, yepä kula waja cabu yaanajuge, cewe biname cina luma teeme budre biname bine gape yaacranemusi.

²⁸ Pui biname te Yeesu ne liba jepänige, ala abayige, teeme bau me piba itramige, babo tage ca jejige egä, "Yeesu, maane lui Caburage Acejiyame me Bägrä gäte, maane singi gäte cäme täapume ngena waweneme? Cane meebine naawejanenine, maane cebine gone sabe nawenute!"

²⁹ Yoo, tabe peei mene jejige, ingle Yeesu niya cable ne bii jejige asatame peei biname ne abmalame. Yoo, bucurage padare pui niya cable te pui biname ne joomlananuge, ngänuge tabe ätäyäneji yaanajuge ayana sea teeme ime piyepu ernge cama, pepu padare cabu tabe ayana sea bine yaagabicmuge, siige cable te piba teebine yaacanuge daapo taatu cewe cabu me.

³⁰ Yoo, Yeesu teebine itemlige egä, "Maane ngii laasi näte?"

Tabe jejige egä, "Cane ngii lui Sange," ingle bucurage niya cable teeme trupa cabu yaacrajuge.

³¹ Pui cable cina Yeesu ne jejisi egä, "Gone cibibine nityepinminute piyemrage cupicu cabu me.

³² Puga ge teeme mameta je baborage ngeerangera blome tomi lui cina podo wajwa cabu deedei täapume yuunguretnäjemisi. Pui niya cable cina Yeesu ne jejisi teebibine ätyepame blome bime trupa ngalebora me; siige tabe teebibine piyeme jityepemige.

³³ Yoo, cable cina pui biname ne ebmalisi, blome cabu me ebäcnisi, siige iyeta pui blome cina podo cabu ca uuwametnige, sawa niye bora uupletnärige, puga abumitnige, siige.

³⁴ Pui blome ire atwi biname cina liba peei ne jepänisi, teepi cewe me uuwametnige, idre ne ecanenisi matimati cewe cabu ta piyepu pui babo cewe cabu me.

³⁵ Cewe biname cina äsecrärige pui mule ne päpäname. Teepi liba Yeesu bau me eclige, piba pui niya cable cama biname ne jepänisi Yeesu gome adnatäneji ge, cäbletääpe asigräneji ge, piyepu miiji ngene atwanena cama ge. Teepi piba iyeta wälu äbitininisi.

³⁶ Lui biname cina peei mule ne jepänisi, teepi nuuja biname bine jejemisi Yeesu lipu peei biname ne miiji me jewenige.

³⁷ Puma cita ca iyeta pui Gerasene gawe biname cina Yeesu ne jejisi teeme bau ca äyebingtame, ingle teepi mage wälu gemi. Peei name pi Yeesu poo cabu ca acenutige otnime.

³⁸ Piba pui biname, cable cina lui ne ebmalisi, tabe Yeesu ne jejige egä, "Nää, lipu gäne cane maane cama otnime?"

Yepä, Yeesu teebine jityepige apu mene cama egä,

³⁹ "Maane ama. Cewe me acenuti biname bine jajaneneme Acejiyame te ngena miiji mäame täapume bii naawenige."

Pui biname te puma cita ca iyeta pui cewe cabu otnetnäjige, biname bine jejananemige Yeesu ngena ne teeme täapume jewenige.

*Yairus me Ngulebägrä piyepu Pita cama Magebi
(Matayo 9:18-26; Mareko 5:21-43)*

* **8:26:** Gerasene: Gerasene piyepu Gadara biname lui yepä biname gemi.

⁴⁰ Yeesu liba atyaramtige sawa nuuja poto doro me, biname tomi puga ge teebine jewablisi, ingle teepi iyeta teeme acnenuta täápume jewagrijenisi.

⁴¹ Piba biname ngii Yairus te teeme bau me atyaramtige. Tabe lui yepä babo biname gyene pui cewe me abasecretna mete täápume. Tabe teemämu gawe me ajarige Yeesu me ernge gome, teebine ewejanige teeme mete otnime,

⁴² Ingle teeme bägrä mameta ge budre. Teeme lui yepä taatu bägrä, twelb kāmäge cama gwe, ngulebägrä gwe.

Yoo, Yeesu liba abyemäriige Yairus me mete otnime, biname bucurage ge tomi cabu, teepi teebine gaabe cabu jityepəcäjisi.

⁴³ Puga ge biname tomi cabu yepä magebi lui te uudi apira pita cama ge twelb kāmäge ngalebora. Tabe iyeta teeme rarekaake ituge apira dokta bime bau otnetnejame, yepä teepi äblicäco teebine müiji me wawena.

⁴⁴ Tabe Yeesu me kaake poto ca toclige, teeme cäbletääpe pepyämu ne joomlige, siige piba taatu ätecitige teeme uudi pita te.

⁴⁵ Yeesu biname bine itemlemige egä, “Laati te cebine noomlige?”

Iyeta biname cina liba aininisi, Peteru piba jejige egä, “Abiberäja biname, biname piti nemi iyeta poto ta, meebine naawaclomtisi, teepi te iyeta näädudnecäjisi.”

⁴⁶ Yepä, Yeesu jiicige egä, “Yepä biname te cebine bii noomlige. Cane asicnantine egä cäme kokre te basatige.”

⁴⁷ Pui magebi liba ngena ca beglige egä tabe äblicäco ge ämlita, ngena te teeme täápume bäbitige, tabe piba alonge cama oclige, Yeesu me opo gaabe utramige. Tabe piba biname bime sobe cabu teebine jejige ngena name pi teeme cäbletääpe ne joomlige, piyepu tabe lipu wata müiji me bäbitige.

⁴⁸ Yeesu teebine piba jojige egä, “Bägrä, mäáme ätrunga te meebine müiji bii naawenige. Äte, ngenecu poode cama ocli.”

⁴⁹ Egäcäro Yeesu peei mene jiicige, biname te mene cama tädige pui babo biname me mete cabu ca. Tabe Yairus ne jejige egä, “Mäáme ngulebägrä te budre gwene. Gone Abiberäja Biname ne papa yaacanute.”

⁵⁰ Yepä, Yeesu liba peei mene itecijige, Yairus ne jejige egä, “Wälu gone, yepä cebine nätrungi. Mäáme ngulebägrä te müiji pa läbitepi.”

⁵¹ Yeesu liba Yairus me mete me atyaramtige, tabe biname bine jüibemige puutucu je, yepä Peteru, Yoane, Yakobu, piyepu pui ngulebägrä me mage babe taatu ten cama abacitige.

⁵² Iyeta biname cina ele engenetnemige pui ngulebägrä täápume. Yeesu teebibine ele jüibemige, jejemige egä, “Ele gone! Bägrä te budre lica, yepä ute gwene.”

⁵³ Teepi teebine ngange ewäcnisi, ingle teepi umle gemi egä peei ngulebägrä toraca budre gwene.

⁵⁴ Yeesu piba ngulebägrä ne ime gome jwoomlige, babo tage ca jojige egä, “Bägrä, arpinanti!”

⁵⁵ Tabe ireclota jepänige, ingle seemo te tacnenutige, siige wata abujängtige. Siige, Yeesu piba teebibine jejemige egä, “Ngulebägrä ne deedei ocäreye!”

⁵⁶ Teeme mage babe cina mutäcäco äbitäsi. Yeesu teebibine jaajige egä, “Gone nuuja biname bine jaajananemuye ai poto cidi me.”

9

*Yeesu Teeme Twelb Abiberäja Bägrä bine Jityepäjemige
(Matayo 10:5-15; Mareko 6:7-13)*

¹ Yeesu teeme twelb abiberäja bägrä bine teeme gome tebasecretnemige, teebibine kokre piyepu conocäco ecäranemige iyeta niyya cable bine äyecrejame piyepu maramara pita bine äyebलगंजame.

² Tabe piba teebibine jityepäjemige Acejiyame te biname bine waadena poto cidi me mene jajanename piyepu pita biname bine müiji me wawenecame.

³ Tabe teebibine jejemige egä, “Weene gone nuuja gwidape bine yaawademuye weeme otni täápume. Gone yaawademuye otnetneja suru piyepu diiba. Rarekaake piyepu deedei gone yaawademuye, cuta tuwängle cäbletääpe gone yaawademuye.

⁴ Lui biname cina weebibine jiwablininusi, teeme mete cabu inajininuge ngälu weene pui cewe ne saabmaluye.

⁵ Cewe biname cina liba weebibine lica awabla, pui cewe ne liba saabmaluye, tuuwe bine jääglubäjemuye weeme ernge cabu ca. Teepi ai mule cabu ca umle läbitininusi egä teepi pagege niyya daremu ne päpäna.”

⁶ Siige, abiberäja bāgrā cina Yeesu ne puga ebmalisi, teepi otnininisi iyeta pui cewe cabu ta, biname bine Miiji Mene jejananemisi piyepu pita biname bine miiji me jewenanemisi iyeta poto ta.

*Mopeyame Heroda te Ngenecu Wālu pana Äbitige
(Matayo 14:1-12; Mareko 6:14-29)*

⁷ Yoo, Galilaya probins mope biname Heroda te mene iteciijige iyeta Yeesu me waweneca poto cidi me. Pajecu lica ge teeme tääpume ngena cina äbiteninini, ingle biname bime mene maramara ge. Poto biname cina jiiusi egä, “Pama Yoane pui niye ca äciseja biname te budre cabu ca tarpinantige!”

⁸ Nuuja cina jiiusi egä, “Pama Eliya te taboclomtige.” Piiyepu nuuja cina jiiusi egä, “Pama yepä sasa mename biname te budre cabu ca tarpinantige.”

⁹ Heroda piba jiiuige egä, “Peei lui lica ge Yoane, ingle cane te itu jaajemepene teeme mope ne äläcnutame; tabe budre ge. Peei biname tabe baa laasi nyene, cane lui poto cidi me mene näteciijige?” Tabe peei name pi äbitenige Yeesu ne pāpāname.

*Yeesu Faib Tausen Biname bine Engäremige
(Matayo 14:13-21; Mareko 6:30-44; Yoane 6:1-14)*

¹⁰ Yoo, ätyepāneji biname cina täcnärininisi, Yeesu ne jejisi iyeta teepi ngena ituge wawena. Tabe piba teebibine ewademige, siige teepi taatu eclige yepä cewe me, ngii Betesaida,

¹¹ yepä biname cina liba umle äbitininisi, teepi Yeesu ne ingwe icwisi. Tabe iyeta teebibine jewablimige, mene jejananemige Acejiyame te lipu biname bine yaawademuge, piyepu pita biname bine miiji me jewenemige.

¹² Mämle bimü me liba, teeme twelb abiberäja bāgrā cina Yeesu bau me seclige, teebine jejisi egä, “Maane biname bine jityepemi mameta calwacupi cewe me piyepu maramara cewe me teeme deedei piyepu ute puupu bine pāpāname, ingle biname cāco cewe gyene ai.”

¹³ Yepä, Yeesu teebibine jejemige egä, “Weene te teebibine deedei ecāremeye.”

Teepi puma cita ca jejisi egä, “Cime nuuja deedei lica gyene, yepä ai faib buluduu piyepu neeneni bumate cibi taatu gemi. Baa, maane singi cine otni deedei aletname ai bucurage biname tääpume?”

¹⁴ Yoo, puga ge pama faib tausen rooriye, magebi bāgrā cama.

Yeesu teeme abiberäja bāgrā bine piba jejemige egä, “Weene biname bine jejemeye adnaterame maramara tomi cabu, fifti pana biname yepäyepä tomi cabu.”

¹⁵ Abiberäja bāgrā cina pepu jewenemisi Yeesu me singi liiyepu. Iyeta biname cina liba adnatärininisi,

¹⁶ Yeesu piba ewademige pui faib buluduu piyepu neeneni bumate cibi bine. Tabe cabu me ire acitige, Acejiyame ne eso ecārige, pui deedei cibi bine itrecimige, abiberäja bāgrā bine piba ecāremige biname bime bau awadename.

¹⁷ Iyeta biname cina teeme ibi jepānisi liba erwājisi. Piba abiberäja bāgrā cina deedei pacupacu diiba bora ebācnemisi, siige twelb diiba cina tapanininisi.

*Peteru Yeesu ne Jewabudnitige egä Tabe Keriso Sine
(Matayo 16:13-20; Mareko 8:27-30)*

¹⁸ Nuuja taje Yeesu liba ten taatu Acejiyame bau irecu ätumutige, piyepu teeme abiberäja bāgrā puga ge teeme gome, tabe piba teebibine itemlemige egä, “Nää, biname cina lipu jiiusi egä cane laasi näne?”

¹⁹ Teepi jejisi egä, “Poto cina jiiusi egä maane niye ca äciseja biname Yoane säte. Nuuja cina jiiusi egä maane Eliya säte. Piiyepu nuuja cina jiiusi egä maane yepä sasa mename biname gāte lui te budre cabu ca tarpinantumete.”

²⁰ Tabe itemlemige egä, “Cije weene, weene lipu jiiiceniye egä cane laasi näne?”

Peteru jejige teebine egä, “Maane Keriso säte, Acejiyame lui ne ituge ätyepa biname bine niyya cabu ca äsecrerame.

*Yeesu Mene Jiicemige Teeme Māpu Padare piyepu Budre poto cidi me
(Matayo 16:20-28; Mareko 8:30-9:1)*

²¹ Piba Yeesu teeme abiberäja bāgrā bine kokre cama jejemige egä, “Ai poto cidi me gonerage nuuja biname ne jaji.

²² Tabe cuta jejemige egä, “Cane lui Acejiyame bau ca tädujine, biname me äbitujine, cane miiji māpurage gwidape bine pagege pāpāna. Yoo, Israela modamoda biname, piyepu modamoda iiwāreja biname, piyepu cotre abiberäja biname, teepi cebine pa nägyepesi, budre me pa nawenepesi, yepä cane ireclota me pa larpinantepene nesae bimü ingwe ca.”

²³ Yeesu puma cita ca iyeta biname bine jejemige egä, “Biname te liba singi cane cama otnime, tabe miiji teemerage singi bine gawe me acrana, teeme baarge uli ne palace cabu bimu gaabegabe acanena, siige cebine ingwe äcwi.

²⁴ Ingle lui biname te ai gawecewe ireclota căme täápume yaapesaruge, tabe toraca ireclota ne cire jääpänepi, yepä lui te ai gawecewe ireclota täápume wälu cama ire jaatwuge piyepu singi lica căme ime cabu acitame, tabe toraca ireclota ne cire yaapesarepi.

²⁵ Yoo, biname te nuuja miiji ne lica cire jääpänepi, ngänu gyene tabe pui iyeta ai gawecewe ne yaacatuge, yepä peei cabu ca teeme ireclota ne yaapesaruge.

²⁶ Yoo, biname te liba ajiri birige căme täápume piyepu căme mene täápume, piba cane lui Acejiyame bau ca tädujine biname me äbitujine, cane teebine cire jäägyepene pui padare cane liba jamyacu apaclyera cama cire tacnenutepene ai gawecewe me. Yoo, pui padare cabu Aceji Babe me jamyacu apaclyera piyepu iyeta mename seemo bime jamyacu apaclyera cane cama cirege lenaja.

²⁷ Cane toraca mene weebibine jijenininine egä ama potu lui cina jeclajutäjenemige, teepi lica pagege budre äbita, ngälu teepi pa jääpänepesi Acejiyame te lipu biname bine yaawademusi.”

*Yeesu Mara Opo me Äbitige
(Matayo 17:1-8; Mareko 9:2-8)*

²⁸ Yoo, pama eit bimu ingwe ca Yeesu liba peei mene jaajemepi, tabe Peteru, Yoane, Yakobu naabibine aacanänige podo cabu me irecu ätumutame.

²⁹ Egäcäro tabe irecu ätumutige, teeme opo te piba mara me äbitige piyepu teeme cäbletäape bulubulurage äbitige, paamlepamle pana.

³⁰⁻³¹ Piba taatu neeneni biname cina cabucewe apaclyera cama puga teeme gome taboclomtäsi. Teepi sasa mename biname Moose naabi Eliya tage. Teepi Yeesu cama mene jüicemäsi egä teeme padare mameta ge budre päpäname Yerusalema babo cewe cabu je, tabe lipu Acejiyame me singi pa jaawenepi biname bine ätityerame.

³² Yoo, Peteru piyepu ten cama lui biname teepi ute opo pana aanäjänige. Liba peei cabu ca cängena alotneränänisi, piba Yeesu ne jamyacu apaclyera cama jepänänisi, piyepu peei neeneni biname bine jääpänanisi lui ten cama jeclajutäsi.

³³ Pui neeneni liba mameta gegi Yeesu ne abmala, Peteru te piba Yeesu ne jejige egä, “Abiberäja biname, cine miijirage gämi cama. Cine nesae matimati mete bine pa yaarangemesi: yepä mäáme täápume, yepä Moose täápume, piyepu yepä Eliya täápume.” Yoo, Peteru cängena umle lica ge tabe ngena mene jüicemige.

³⁴ Tabe liba mene cabu jage, carbe te piba tädige, teebibine aacwabänige. Abiberäja bägrä cina wälu me äbitininisi carbe te liba icwabemige teebibine.

³⁵ Piba carbe cabu ca tagepogogo te tädige egä, “Ai lui căme bägrä gyene, cane teebine jejujine căme kaakesea wawena täápume. Weene teebine jitecijeyel!”

³⁶ Liba apirige pui tagepogogo te, teepi Yeesu ne taatu jepänänisi. Yoo, abiberäja bägrä cina peei potu cidi me bojä me äbitininisi. Pui padare cabu teepi lica nuuja biname ne jaji ngena ne bii jepänisi.

*Yeesu Miiji Jewenige Niiya Cable cama Bägrä ne
(Matayo 17:14-18; Mareko 9:14-27)*

³⁷ Nuuja bimu teepi liba podo cabu ca täinetnänige, bucurage biname cina ten cama opopa eyisi.

³⁸ Biname tomi cabu ca yepä biname te babo tage cama Yeesu ne jejige egä, “Abiberäja biname, căme bägrä ne jepäni. Tabe lui căme yepä taatu imäbägrä gyene.

³⁹ Niiya cable te teebine liba joomluge ala abayename jaawenuge, piba tabe uumanu-mana me läbituge, teeme tage cabu ca mote acwe cina täsuge. Cable te teebine jaje joomlanuge, teeme täape ne iyeta sabe jaawenuge.

⁴⁰ Cane mäáme abiberäja bägrä bine liga jaajemune pui cable ne äyeblyngtame, siige teepi äblicäco ge.”

⁴¹ Yeesu biname bine jejemige egä, “Weene ätrunga cäco biname gemi, weeme mule lui niyyarage gyene! Luma ngälu padare cane miiji weene cama lenaja? Luma ngälu padare cane miiji weeme ätrunga cäco mule päpäna?” Tabe piba pui biname ne jejige egä, “Bägrä ne secani!”

⁴² Egäcäro bägrä te tädige, cable te teebine jjarige gawe cabu, tabe juumemige. Yeesu piba niiya cable ne jejige äyeblyngtame, imäbägrä ne miiji me jewenige, piba teeme babe bau me weecnistige.

⁴³ Siige, iyeta biname cina mutäcäco äbitininisi Acejiyame me babo kokre name pi.

*Yeesu Cääri Mene Jüicemige Teeme Budre poto cidi me
(Matayo 17:22-23; Mareko 9:30-32)*

Yoo, biname cina mage ngene jotwananinisi Yeesu me mara mule poto cidi me,
44 piba Yeesu teeme abiberäja bägrä bine jejemige egä, “Weene cängena ngene jotwananiniye ai mene poto cidi me: Cane lui Acejiyame bau ca tädujine, biname me äbitujine, teepi cebine biname bime ime cabu pa nacitepesi.”

45 Yepä, abiberäja bägrä cina teeme mene ne opo lica ewatnisi, inge teeme täápume ämlitänjeji pana ge pui mene, peei name pi teepi cängena umle lica ge, piiyepu teepi wälu ge teebine ätemlame.

*Laasi Nyene Baborage
(Matayo 18:1-5; Mareko 9:33-37)*

46 Abiberäja bägrä cina gije jebacitisi atraname egä laati te teeme cabu ca baborage pagege äbita.

47 Yeesu teeme ngene atwanena umle ge, peei name pi bägrä matikolä ne ala tosoglicige teeme opo gaabe je aclajutame.

48 Tabe piba abiberäja bägrä bine jejemige egä, “Biname lui te apu matikolä bägrä ne jaawabluge căme ngii cabu, tabe cuta nawabluge cebine; piiyepu biname lui te cebine nawabluge, tabe Acejiyame ne cuta jaawabluge lui te cebine nätyepuji. Yoo, weeme cabu ca lui te matikolä gyene biname bime opo gaabe, tabe sine baborage Acejiyame me opo gaabe.”

*Lui te Mibibine Lica Nicisärmutininuge, Tabu Lui Mime tääpu Myene
(Mareko 9:38-40)*

49 Yoane te piba jejige egä, “Abiberäja biname, cine biname ne jepänisi lui te niia cable bine yäyecräjemuge mäame ngii cabu. Cine teebine jejisi peei mule ne abmalame, inge tabe lica mine cama labasutuge.”

50 Yeesu piba Yoane piiyepu nuuja abiberäja bägrä bine jejemige egä, “Teebine gone jiiyube, inge biname lui te mibibine lica nicisärmutininuge, tabe lui mime tääpu myene.”

Yepä Cewe Samariya Gawe cabu, Puma Biname cina Yeesu ne Jigyisi

51 Yoo, Yeesu me acnenuta padare cabucewe me seeji mameta me täbitige, tabe ngene piba jotwige Yerusalema me otnime, siige abyemäriige.

52 Tabu biname bine niinäce gaabe me jityepemige Samariya gawe cabu yepä cewe me teeme lenaja puupu ne amaceträjame.

53 Yepä, pui cewe biname cina singi lica ge teebibine puupu ceerame, inge teepi umle ge egä tabe mara iiwäreja mule täápume Yerusalema me ädenige.

54 Yoo, abiberäja bägrä Yakobu naabi Yoane liba peei ägyi mule ne jepänäsi, teepi claabe cama jejäsi egä, “Yageyame, nää maane singi gäte cine Acejiyame ne awejename muye ne ätyepame ai biname bine aglecame?”

55 Yepä, Yeesu atadrentgige, teeme abiberäja bägrä bine jejemige pepu mene gone iicemame.

56 Puma cita ca teepi iyeta abyemärinisi nuuja cewe otnime.

*Mene Yeesu ne Ingwe Äcwi poto cidi me
(Matayo 8:19-22)*

57 Teepi liba teeme gaabe cabu otninisi, yepä biname te Yeesu ne jejige egä, “Ngänu gyene maane liiyeme ädenite, cane mäame ingwe ädenine!”

58 Yeesu teebine jejige egä, “Poks bime bora piti nemi lenaja täápume, piiyepu ele bime mete uli cabu piti nemi, yepä cane lui Acejiyame bau ca tädujine, biname me äbitujine, căme täápume puupu lica gyene căme mope acitame. Nää, maane singi gäte pepu otnetnejame cane cama ireclota täápume?”

59 Yeesu piba nuuja biname ne jejige egä, “Tädi, cane cama otnime,”

Yepä, pui biname te jejige egä, “Babo biname, cane singi gäne meebine ingwe äcwime, yepä cane lipu gäne niinäce otni căme babe ne gape acitame?”

60 Yeesu teebine jejige egä, “Laati bemi seemo ireclota cabu budre, teeme täápume ebmalepi budre biname bine gape cabu acraname; yepä maane ädi, biname bine jajaname Acejiyame te lipu biname bine yaawademuge.”

61 Nuuja biname te jejige, “Babo biname, cane maane cama ädenine, yepä cane niinäce căme binamewale bine yewo tawenemene.”

62 Yeesu teebine jejige egä, “Lui biname te gije labacituge gawe ängwädname cooso piiyepu ängwädna gwidape cama, piba latadrentgige ingwe gaabe ireme, tabe miiji biname lica birige Acejiyame me biname bine waadena kaakesea täápume.”

10

Yeesu Sebentituu Biname bine Jityepäjemige

¹ Yoo, peei ingwe ca Yeesu sebentituu biname bine jejäcremige, neeneni neeneni jityepäjemige niinäce otnime iyeta cewe tabe liiyeme singi ingwe ca otnime.

² Tabe teebibine jejemige egä, "Ai padare lui epu pana calwacupi gyene liiyepu, deedei luma bucurage, yepä kaakesea biname nesae gemi pui deedei waadename. Miiji Yageyame ne awejena egä tabe kaakesea biname bine pa jäatyepemepi biname bine teeme bau me waadename.

³ Äte naaclege! Cane weebibine maamoi plongo pana jityepininine, girigale drego pana biname cina luma icrajenige.

⁴ Gone rarekaake waadena, cuta diiba piyepu ernge gwidape gone waadena. Awabla je gone aclajutame gaabe cabu.

⁵ Weene lui mete me labacitinuye, niinäce jiicuye egä, 'Poode yaanajege iyeta ai mete biname cabu.'

⁶ Yoo, biname liba pisi nyene lui te singi poode cama lenajame, pui poode te piba teeme bau yaanajuge, yepä liba puma pepu biname lica gyene, peei poode te piba pa tacnenutepi weeme cabu me.

⁷ Weene pui yepä mete cabu pa inajipi, gone mete maramara cabu waatninuye. Lipu deedei piyepu niye bine teepi icärininusi, weene miiji gemi peei bine ärwäja piyepu änäja, ingle biname miiji gemi daremu ne päpäna teeme kaakesea cabu ca.

⁸ Yoo, weene liba nuuja cewe me labacitinuye, piyepu pui cewe biname cina liba lica jiwablininusi, teepi lipu deedei icärininusi, peei bine yäärwäjuye.

⁹ Pita biname bine miiji me jaawenemuye pui cewe cabu, piyepu biname bine jaajemuye egä, 'Acejiyame mameta gyene weebibine waadename.'

¹⁰ Yepä, weene liba cewe me labacitinuye, piyepu cewe biname cina liba lica jiwablininusi, piba cewe gaabe cabu jicajutinuge, piba jaajemuye egä,

¹¹ 'Cine weeme cewe tuuwe bine jiglubäjenemisi cime ernge cabu ca awabame egä pepu ätecija cäco mule lui miiji lica gyene. Yepä, weene ngene gone ätrimela egä Acejiyame mameta ge weebibine waadename, yepä weene peei ne bii jigyiye.'

¹² Siige, cane weebibine umle jiwenininine egä atrana bimu cabu Acejiyame me daremu pui cewe täapume mäpurage cirege äbita Sodoma cewe me daremu cabu ca."

Ätrunga cäco Cewe poto cidid me

(Matayo 11:20-24)

¹³ "Korasine cewe biname, babo niyarage cirege weeme täapume! Betesaida cewe biname cuta piyepu, babo niyarage cirege weeme täapume! Cane lui ciitaca mule bine ituge wawena weeme bau me, liba peei bine Turo piyepu Sidona cewe biname bime bau me cire jaawenemejine, teepi teeme niya mule bine cire yaabmalecmejisi, cäme bau cire tatatrongärinejisi. Teepi ragre cire lasigrärinejisi, piyepu mriibe ca cire lapyacinejisi awabudnitame egä teepi ituge abmaläcema teeme niya mule bine. Puu weene te ciitaca mule bine ituge päpäna, yepä weene licarage cäme bau me tatatrongäripeye.

¹⁴ Yoo, atrana bimu cabu Acejiyame me owecu Turo piyepu Sidona cewe biname bime täapume baborage cirege äbita, teeme owecu cabu ca Korasine piyepu Betesaida cewe biname bime täapume.

¹⁵ Cuta weene Kaprenauma cewe biname, nää weene toraca apu jingenininige egä Acejiyame te weebibine cabu me jiwenininine? Eewe, weene gawerage me cirege otni, niya puupu cabu me, weeme ätrunga cäco mule name pi."

¹⁶ Yeesu piba teeme abiberäja bägrä bine jejemige egä, "Yoo, lui cina weeme mene jitecjinusi, teepi cuta cebine nätecijusi, piyepu weebibine lui cina jigyunusi, teepi cuta cebine nägyusi, cuta piyepu lui cina cebine nägyusi, teepi cuta teebine jäägyusi lui te cebine itu nätyepuji."

Sebentituu Biname cina Täcnärininisi

¹⁷ Siige, pui sebentituu biname Yeesu lui bine jäatyepemepi, teepi ngenecu gege cama täcnärininisi, Yeesu ne jejisi egä, "Niya cable cina biname bime cabu ca läyebblinginusi, cine liba teebibine mäame ngii cama jaajemusi!"

¹⁸ Yeesu teebibine jejemige egä, "Yoo, cane Satani ne jääpänepene, tabe paamlepamle pana saatramepi cabucewe cabu ca.

¹⁹ Nätecijeye, cane weebibine kokre ituge ceera uutrutame mime cubuyame Satani cabu ca. Weene ibibi gemi cobyame piyepu potetagetage cabu otni; nuuja gwidape te äblicäco weebibine niya wawena.

²⁰ Yoo, weene gege gemi, ingle weeme mene te niya cable bine yääyblengemuge, yepä nuuja gwidape baborage gyene peei cabu ca. Weene miiji baborage ngenecu gege läbitininuye, ingle naace gyene weeme ngii oogäräneji piti nemi cabucewe je Acejiyame bau.”

*Yeesu Eso Ecärige Teeme Cabucewe Babe ne
(Matayo 11:25-27; 13:16-17)*

²¹ Yoo, pui padare cabu Aceji Seemo te babo ngenecu gege me jebenige Yeesu ne. Yeesu jejige egä, “Cäme Babe, maane lui Yageyame gäte cabucewe piyepu gawecewe täápume. Cane meebine babo eso nääcärenine naace täápume egä maane ai gwidape bine ituge ämletna umle biname piyepu mijimiji mopemuli biname bime bau ca, siige abiberäja cäco biname bime bau me ituge aboclomäja. Yoo, Babe, peei lui mäame miijirage singi gyene.”

²² Yeesu puma cita ca biname bine jejemige egä, “Cäme Babe te iyeta gwidape itu saabmalemepi cäme ime cabu me. Nuuja biname te umle lica gyene cäme täápume, cane lui Aceji Bägrä gäne, yepä Babe taatu umle gyene. Piyepu nuuja biname te umle lica gyene Aceji Babe täápume, yepä cane teeme Bägrä taatu umle gäne, cuta piyepu lui biname täápume cane singi teebine aboclom-ta, teepi taatu umle gemi.”

²³ Yeesu piba atatröngtige teeme abiberäja bägrä bime bau me, teebibine taatu jejemige egä, “Babo ngenecu miiji weeme täápume lui cina ai gwidape bine irecu ca jepänenemiye.

²⁴ Cane weebibine jijenininine egä sasa cabu ca bucurage mename biname piyepu mope biname cina babo singi ge päpäname, weene page lui mule bine jepänenemiye, yepä teepi lica itu jepänemujisi, piyepu teepi babo singi ge ätecijame weene page lui mene itecijenenge, yepä lica itu itecijinuji.”

Ngene ca Agli Mene Samariya Biname me Miiji Mule poto cidi me

²⁵ Yepä cötre abiberäja biname te Yeesu gome jeclajutige. Tabe singi Yeesu me abiberäja ne apicetnerame, peei name pi itemlige egä, “Abiberäja biname, cane miiji ngena ne wawena iyeteta ireclota ne päpäname?”

²⁶ Yeesu teebine jejige egä, “Oogäräneji Mene te lipu jücenige? Maane ngena mene bine peei cabu yaacnemute?”

²⁷ Pui biname te jejige egä, “‘Biname te miiji Acejiyame teeme Yageyame täápume singi iyeta teeme ngenecu cama, iyeta teeme seemo cama, iyeta teeme kokre cama, piyepu iyeta teeme ngena atwanena cama,’ piyepu, ‘biname te miiji teeme nuuja biname ne yepä pana singi cama jaawenuge tabe lipu singi cama teemämu lasicnantuge.’”

²⁸ Yeesu jejige egä, “Mäame mene conocäco gyene. Peei ne liba jaawenute, maane piba iyeteta ireclota cire jepänepi.”

²⁹ Yepä, pui cötre abiberäja biname te singi teeme mene conocäco me wawename biname bime opo gaabe, peei name pi tabe Yeesu ne cääri itemlige egä, “Cane miiji lui biname täápume pepu wawena?”

³⁰ Yeesu teebine ngene ca agli mene ca umle jebenige apu egä, “Yoo, yepä biname te äduji Yerusalemä ca Yeriko me. Gaabe cabu ero biname cina teebine joomlisi, iyeta teeme gwidape bine jürecimisi, teebine eglisi, gaabe gome ebmalisi ejiijija.

³¹ Yepä iiwäreja biname te pui gaabe cabu ädige, liba biname ne jepänige ätwtänäjeji, gaabe nuuja poto ca ädige.

³² Cuta yepä iiwäreja biname me ätitye-rayame te ädige, pui biname ne liba jepä-nige, mameta me ädige ireme, piba gaabe ne jeclänu-tige, nuuja poto ca ädige.

³³ Puma cita ca yepä Samariya gawe biname te pui gaabe cabu cuta ädige, liba pui biname ne dupe cama jepänige, siige babo owecu me äbitige.

³⁴ Tabe teeme bau me ädige, olibi migi piyepu waina niye dupe cabu icranemige, piba cäbletääpe pläsu ca jetäyemige dupe bine. Tabe piba pui dupe biname ne teeme dongki cabu etecwamtige, otnetneja biname bime mete me ecanige. Tabe puga teebine ire jetwige.

³⁵ Nuuja bimä tabe neenenä silba rarekaake bine aasatige, pui otnetneja mete ire atwi biname ne ecärige, jejige, ‘Peei biname ne cängena ire jetwepi! Ai rarekaake liba ibibi lica gyene, cane cerämu meebine pa nääcärepenä, cane liba ai gaabe cabu pagege acnenuta.’”

³⁶ Siige, Yeesu puma cita ca cötre abiberäja biname ne itemlige egä, “Lipu gyene mäame ngena atwanena? Pui nesae biname cabu ca laati te dupe biname ne toraca biname me jebenige?”

³⁷ Cötre abiberäja biname te jejige egä, “Pui biname lui te teebine owecu cama itityäriige.”
Yeesu jejige egä, “Maane ädi, pepu pana mule bine jaawenemute!”

Yeesu Maareta Mariya naabibine Äädäriige

³⁸ Yoo, Yeesu teeme abiberäja bägrä cama gaabe cabu liba eclige, yepä cewe me atyarige. Puga yepä magebi ngii Maareta teebine teeme mete cabu jewablige.

³⁹ Teeme maade Mariya puga ge. Tabe Yeesu gome adnatige, iyeta teeme abiberäja mene cängena utecijige.

⁴⁰ Yepä, Maareta iyeta teeme maramara mete kaakesea name pi ngenecu mäpu me äbitige, puma cita ca Yeesu bau me oclige, jejige egä, “Yageyame, maane lica jepänite egä căme maade te iyeta kaakesea căme bau me sebmalemige? Teebine joji cebine ätityerame!”

⁴¹ Siige, Yageyame teebine jojige egä, “Maareta, Maareta, bucurage gwidape cina meebine ngenecu mäpu me naawenenisi,

⁴² yepä pisi nyene yepä taatu haborage gwidape. Mariya peei miiji gwidape bii jepänige, siige peei ne lica gyene teeme bau ca uutecra.”

11

*Yeesu me Abiberäja Ireçu Ätumuta poto cidi me
(Matayo 6:9-13; 7:7-11)*

¹ Nuuja taje Yeesu Acejiyame bau me ireçu ätumutige yepä cewe cabu. Teeme ireçu ätumuta liba siige, yepä teeme abiberäja bğrä te teebine jejige egä, “Yageyame, nibiberäjinini cibibine ireçu ätumutame, Yoane teeme abiberäja bğrä bine lipu itu se-biberäjemumi.”

² Yeesu piba teebibine jejemige egä, “Weene liba ireçu lätimutinuye, apu jüicemuye egä: ‘Babe,

Määme miijirage ngii ne opo gaabe me naacitesi.

Maane tädepi biname bine waadename.

³ Cime bimu gaabegabe deedei nicăranipi.

⁴ Cime niija mule bine yäăyblengemute.

Iyeta nuuja biname bime niija mule cime täápume cine cuta iyebhengemepi cime ngene atwanena cabu ca.

Cuta gone cibibine niwadininute mäpurage apicetnära cabu me.’ ”

⁵ Siige, Yeesu piba teeme abiberäja bğrä bine ngene ca agli mene jejemige egä, “Pama weeme yepä te teeme biname bau me läduge ciye duusa, teebine jaajuge egä, ‘Căme biname, maane nesae buluduu watata năcări.

⁶ Căme yepä biname te teeme gaabe cabu ca bii tatyaramtige. Căme nuuja deedei lica gemi teebine ceerame.’

⁷ Yoo, määme biname te mete cabu ca piba meebine naajuge egä, ‘Gone cebine sabe nawenute, ingle cime grana armeji gyene; cine iyeta bğrä cama ute puupu cabu temi. Cane äblicăco gâne arpinenta määme singi gwidape ceerame.’

⁸ Yoo, ngănu gyene tabe teeme biname ge, tabe singi lica ciye duusa arpinentame buluduu ceerame, yepä cane weebibine jijenininine egä, tabe pa larpinantete iyeta teeme singi gwidape ceerame, pui nuuja te liba ajiri lica teebine jăje ätinerăja.

⁹ Yoo, peei name pi cane weebibine jijenininine: Acejiyame ne itinäreye, tabe pa icăripi; jirngeye, weene pa jepănepeye; eyăjeje, piba Acejiyame te gaabe pa jüitnepi weeme täápume.

¹⁰ Ingle iyeta lui cina yăătinărusi, teebibine yăăcăremusi; lui cina jăărngusi, teepi jăăpănusi; piijepu lui cina yăăyăjusi, gaabe teeme täápume jüitnusi.

¹¹ Yoo, weene lui babe gemi, weeme bğrä cina liba cibü täápume jaji, weeme nuuja te licarage teeme bğrä ne niijarage cobyame ne ceera.

¹² Coo, tabe liba paulo kuu täápume jaji, weeme nuuja te licarage potetagetage ne ceera.

¹³ Toraca gyene, weene miiji biname lica gemi, yepä weene umle gemi miiji gwidape taatu bğrä bine ceera. Siige, mime Babe cabucewe je lui miijirage gyene iyeta biname cabu ca, tabe Aceji Seemo toraca pa täătyepipi teeme bau me lui cina teebine yăătinerăjusi.

*Yeesu piijepu Beelsebul, Satani ca Lui ne Cuta Einenisi
(Matayo 12:22-30; Mareko 3:20-27)*

¹⁴ Yeesu te yepä niija cable ne biname cabu ca iyecräjige. Pui cable te äblicăco mene iicana, peei name pi liba asatige, tabe pui biname te piba giije abacitige mene iicaname. Tomi cabu lui biname cina mutăcăco äbitininisi,

¹⁵ yepä poto cina walya mene jüicisi egä, “Beelsebul lui niija cable bime mopeyame gyene, tabe te teebine kokre ecăranenige niija cable bine äyecrejame.”

¹⁶ Yoo, nuuja biname cina singi Yeesu me kokre ne apicetne-rame, peei name pi teebine jejisi mara ciitaca mule wawename, awabame teeme kokre liba Acejiyame bau ca täduge.

¹⁷ Yepä, Yeesu teeme ngene atwanena umle äbitige, teebibine jejemige egä, “Nuuja gawe biname cina liba labelaninusi teemeteme cubu me, teepi wata lapirininusi, cuta piijepu ingle biname cina liba teemeteme labelaninusi cubu me, peei ingle te wata lapiruge.

¹⁸ Peei name pi Satani me niija cable cina liba maramara tomi cabu läbitininusi, teeme-teme laglinusi, Satani me waadena mule te piba lipulipu kokre lenaja? Yoo, weene apu

jiicemuye egä Beelsebul, lui ne Satani ca yaainusi, tabe te cebine kokre näcärüge teeme niija cable bine äyecrejame. Peei toraca lica gyene, ingle Satani singi lica gyene teeme niija cable bine biname cabu ca äyecrejame.

¹⁹ Yoo, poto weeme abiberäja bägrä cina niija cable bine cuta yääyecräjemusi. Luma cita ca teeme kokre peei mule ne wawename? Licarage Beelsebul bau ca. Peei name pi weemerage abiberäja bägrä cina jaawabudnitusi egä weeme mene cäme poto cidi me lui conocono gyene.

²⁰ Ewee, cäme kokre lui Beelsebul, coo Satani, bau ca lica gyene. Cäme kokre niija cable bine äyecrejame lui Acejiyame me ime cabu ca gyene. Peei kokre te jaawabudnituge egä Acejiyame me biname bine waadena mule te ituge atyaramta weeme bau me.

²¹ "Yoo, Satani te apu pana gyene kokre biname, lui te teeme cubu gwidape cama teeme mete gome ire cama yaanajuge, siige iyeta teeme gwidape cängena yaacrajuge,

²² yepä cane lui te teeme cabu ca kokre gyene, cane liba teebine joomlune, cubu cama yuutrutune, iyeta teeme cubu gwidape bine piba juutecrone, tabe lui bine jäätrungemuge, siige teeme ero ca awadäneji gwidape bine piba jaabelanemune.

²³ "Yoo, laati te cäme biname lica gyene, tabe cebine näcisärmütuge; piyepu laati te cäme bau me lica taabasecretni-muge, tabe yaaplidnäremuge.

Yeesu me Mene Niija Cable me Acnenua poto cidi me

(Matayo 12:43-45)

²⁴ "Yoo, niija cable te liba biname cabu ca lasatuge, tabe niije cäco cewe cabu ta waatnetnäjuge, puupu ne jäärnguge ngene oocaname. Liba lica jääpänuge, tabe jüicuge egä, 'Cane acnenine piyeme, cane lui mete ne sebmalumene.'

²⁵ Tabe siige läcnuge, mete ne jääpänuge lui apretnäneji piyepu cängena acranäneji ge.

²⁶ Tabe piba lädüge seben mage niiyarage cable bine arwojame, siige teepi iyeta saacluge pui biname cabu lenajame. Niinäce pui biname miiji lica birige, yepä page tabe siige mage niiyarage me läbituge."

Toraca Gege

²⁷ Yeesu liba pui mene bine jiicemige, biname tomi cabu ca yepä magebi te babo tage ca jezige egä, "Gege gwene pui magebi lui te meebine itu naplimluji, ngame näcäranuji!"

²⁸ Yeesu teebine jöjige egä, "Teepi toracagege gemi lui cina Acejiyame me mene cängena yäätecijemuge piyepu jaawenusi."

Biname cina Singi Ge Yeesu Ciitaca Mule Wawename

(Matayo 12:38-42)

²⁹ Biname cina Yeesu gome liba tomi yootisi, tabe piba teebibine jejemige egä, "Weene lipu niiyarage biname gemi page ai padare cabu lui cina ireclota gemi! Weene singi gemi cäme bau ca ciitaca mule ne päpäname, yepä weene nuuja ciitaca mule ne lica pa jepänepeye, yepä taatu Acejiyame me mename biname Yoona täapume lipu mule te äbituji, peei ne pa jääpänepesi.

³⁰ Yoo, Yoona täapume lipu ituge äbita, peei te Ninewa biname bime täapume itu jewabudnituji egä teeme mene lui Acejiyame bau ca ge. Cane lui Acejiyame bau ca tädujine, biname me äbitujine, cäme täapume lipu pagege äbita, peei te pa jaawabudnitepi egä cäme mene ai padare cabu lui Acejiyame bau ca gyene.

³¹ Yoo, atrana bimu cabu Siiba gawe mope magebi lui sasa padare cabu onajuji, teebine liba weene cama cire twaarpinantepi atrana täapume, tabe weebibine cire jiwabipi egä weene ätecija cäco biname gemi, ingle tabe mage cudecewe ca tocluji uule poto ca Solomona me umle mene ätecijame. Yoo, cane weebibine jijenininine egä cane age säne baborage Solomona cabu ca.

³² Yoo, atrana bimu cabu Ninewa cewe biname cina cirege abujenga, weebibine cire jiwabipesi egä weene ätecija cäco gemi, ingle teepi te niija mule cabu ca itu tata-trongärininuujisi, liba Yoona me mene itecijemuji. Yoo, cane age säne baborage Yoona cabu ca, yepä weene singi lica gemi cäme mene ätecijame!"

Irecu Lui Tääpe me Lampa Gegi

(Matayo 5:15; 6:22-23)

³³ Nuuja biname te lica lampa ne jaabotuge piba yäämlituge, coo diiba ca yäätrugärüge, yepä tabe cabu me yaatecwantuge. Piba biname cina apaclyera ne jääpänusi mete cabu me, liba yääbächnusi.

³⁴ Yoo, irecu lui lampa pana gegi tääpe täapume. Määme irecu liba miiji birige, määme tääpe te, iyeta apaclyera taatu birige, yepä määme irecu liba niija birige, määme tääpe te cuta krokeciije cabu yaanajuge.

³⁵ Yoo, cängena ire egä määme cabu lui apaclyera te lica krokeciije gyene.

³⁶ Siige, määme cabu apaclyera te liba babo läbituge, piyepu määme cabu nuuja krokeci- iye liba lica birige, piba määme ireclota iyeta lui apaclyera cabu birige, epu pana apaclyera te lampa cabu ca meebine lipu naapaclyärüge.

Parisea Sigu Biname piyepu Cotre Abiberäja Biname bime Mule poto cidi me (Matayo 23:1-36; Mareko 12:38-40)

³⁷ Yeesu pui mene bine liba epiremige, yepä Parisea sigu biname te teebine ala tesoglicige ten cama matikolä deedei äbitame. Siige, Yeesu teeme mete me abacitige, deedei tääpume adnatige.

³⁸ Pui Parisea sigu biname älu te jitige, liba jepänige egä Yeesu lica bäcisäjige ingwe ca piba deedei äbitame, Parisea biname bime mule liyepu.

³⁹ Peei name pi Yageyame teebine jejige egä, “Yoo, weene Parisea biname cina weeme tääpe cängena jääcisäjemuye, piyepu weeme nüye kwäye piyepu deedei kwäye liyepu kaakepoto bine jääcisäjemuye, yepä weeme trupa ngalebora nüya singisingi piyepu cono- cono piti nemi.

⁴⁰ Weene buduma gemi! Acejiyame lui te weeme tääpe bine ituge wawena, tabe cuta weeme trupa bine ituge wawena.

⁴¹ Yepä, weeme kwäye ngalebora ngena piti nemi, ecäremepeye owecumete biname bine, siige iyeta jugi cäco pa läbitepi weeme tääpume.

⁴² Yoo, Parisea biname, mage mäpu cirege weeme tääpume! Weene Acejiyame ne yepä yääcäruye weeme iyeta ten deedei mite wawena laame ngii minti, ruu, piyepu lija nuuja laame cabu ca, ngänu gyene Cotre cabu pui mule lui baborage lica gyene. Yepä, weene lica jaawenemuye lui Cotre mule modamoda gemi apu egä iyeta biname bine yepä pana ire jaatwemuye, piyepu toraca singi läbitininuye Acejiyame tääpume. Weene müji ai modamoda mule bine wawenetnäja, cuta gone ngene ätrimela poto matimati mule bine wawenetnäjame.

⁴³ Parisea biname, mage mäpu cirege weeme tääpume! Weene singi modamoda biname bime puupu cabu adnaterame abasecre-tna mete cabu, piyepu weene singi gemi biname cina weebibine awablame aletna puupu cabu.

⁴⁴ Weene mäpu cirege päpäna, ingle weene epu pana gemi gape liyepu lui gawe cabu ämlitänegi yaanajuge. Lui biname cina peei cabu waatninusi, teepi nuuja umle lica gemi egä ocwäwänegi gwidape pisi nyene gawe bora. Pepu pana, biname lui cina weeme mameta me otni, teepi nuuja umle lica gemi egä ngalebora weene nüya gemi.”

⁴⁵ Puma cita ca yepä cotre abiberäja biname te jejige egä, “Abiberäja biname, määme mene te cuta cibibine ngeneu mäpu me niwenininige!”

⁴⁶ Yeesu jejemige teebibine egä, “Yoo, cotre abiberäja biname, weene cuta piyepu mage mäpu cirege päpäna. Weene biname bine mäpu me jaawenemuye weeme bucurage cotre liba teebibine owecu cäco yääcäremuye, yepä weene singi lica teebibine ätityerame peei cotre bine cängena wawenecame.

⁴⁷ Yoo, mage mäpu cirege weeme tääpume! Weene mijimiji kula caale bine yaarange- muye Acejiyame me sasa mename biname bine ngene apecname, puirage mename biname weeme kaakesaare cina lui bine itu eglecimujisi.

⁴⁸ Page weeme mule mara lica gyene weeme kaakesaare bime cabu ca. Teepi mename biname itu eglecimujisi, cuta page weene pui mename biname bime ngene apecna kula bine jaawenemuye.

⁴⁹ Yoo, Acejiyame umle cama itu jicemuji egä, ‘Cane maramara mename biname bine teeme bau pa jäätyepemepene. Poto bine teepi nüya pa jaawenemepesi; poto bine budre me pa yaaglecemepesi.’

⁵⁰ Yoo, weene lui gemi ireclota cama page, weene pui mäpu daremu cirege päpäna iyeta mename biname bime agleca tääpume piyepu teeme uudi apira tääpume agedna padare cabu ca ngälu page.

⁵¹ Abela lui niinäce biname ge lui ne budre egluji, siige puma cita ca agleca mule te enajuji ngälu Sakariya ne budre me eglujisi iiwäreja mete piyepu iiwäreja dade cole puupu cabu je. Yoo, cane weebibine jijenininine egä page lui biname cina icrajinige, teepi te iyeta ai agleca tääpume daremu ne cire jääpänepesi!

⁵² Yoo, cotre abiberäja biname, mage mäpu cirege weeme tääpume! Weene gaabe ne ituge armi biname cina Acejiyame me singi toraca umle äbitame. Weene weemämu lica umle äbita, piyepu weene biname bine jübemuye lui cina singi gemi umle äbitame!”

⁵³ Siige, teeme mene liba epiremige, Yeesu pui mete ne sebma-lige. Cotre abiberäja biname piyepu Parisea sigu biname cina teebine jimugetnisi. Pui padare cabu ca teepi bucurage maramara gwidape poto cidi me itemläjisi,

⁵⁴ Ingle teepi singi teebine giri acita yepä conocono mene iicaname, piba pui cabu ca teebine oomlaname.

12

*Yeesu Mene Jejemige Walya Biname poto cidi me
(Matayo 10:26-27)*

¹ Pui padare cabu bucurage tausen biname cina abasecretnige; teepi tomi cabu ädudnecäjininisi. Siige, Yeesu niinäce teeme abiberäja bägrä bine jejemige egä, “Weene walya mule gone, ai Parisea sigu biname liiyepu. Uutneca gwidape te buluduu ne lipu joomluge, siige iyeta poto ta juutnecuge, pepu pana walya mule te biname me ireclota ne iyeta joomluge.

² Weene äblicäco walya mule cabu iyeteta lenaja. Ngena gyene ämlitäneji, pagege pajecu me äbita; ngena gemi ogä, pagege awabudnäja.

³ Yoo, lui mene bine weene krokeciye cabu jücemuye, biname cina bimu cabu pa yäätecijemepi, piyepu mete bora weene siiyä mene ca biname me tablame cabu ngena ituge jaji, mete toro cabu ca pagege jajanena.”

*Laati täápume Müji Wälu
(Matayo 10:28-31)*

⁴ “Cäme binamewale, cane weebibine jijenininine egä, “Wälu gone biname täápume. Biname te nuuja biname ne yaagluge, yepä budre ingwe ca tabe äblicäco pui biname ne nuuja niya wawena.

⁵ Pätä, weene müji Acejiyame täápume wälu, inge teeme kokre pisi nyene biname me budre ingwe gaabe ca teeme seemo ne cuta niya puupu cabu me ajarama. Yoo, peei name pi cane weebibine jijenininine egä weene müji Acejiyame täápume wälu.

⁶ Yoo, faib matimati ele bine biname cina jaaletnemusi neeneni cäsäcäsä rarekaake ca, yepä Acejiyame te lica yepä pui ele poto cidi me ngene jäätrimaluge.

⁷ Yoo, tabe cuta weeme poto cidi me iyeta umle gyene; tabe umle weeme edingäli lija gemi. PEEI name pi weene wälu gone, inge Acejiyame me singi weeme täápume lui baborage gyene teeme ele täápume singi cabu ca.”

*Wälu Gone Keriso poto cidi me Mene Jajanename
(Matayo 10:32-33; 12:32; 10:19-20)*

⁸ “Cane lui Acejiyame bau ca tädujine, biname me äbitujine, cane weebibine jijenininine egä lui biname te biname bime sobe cabu jaajemuge egä, ‘Cane Yeesu Keriso me biname gäne,’ cane te Acejiyame me mename seemo bine pa jaajemepene pui biname poto cidi me egä, ‘Tabe cäme biname gyene.’

⁹ Yepä, lui biname te cebine biname bime sobe cabu nainuge, cane cuta teebine pa jaainepene Acejiyame me mename seemo bime opo gaabe je.

¹⁰ Yoo, lui biname te cebine näcisechräjuge, cane lui Acejiyame bau ca tädujine, biname me äbitujine, Acejiyame pui niya ne cirege äyeblyngta, yepä lui biname te niyarage mene jücemuge Aceji Seemo poto cidi me, peei niya ne lica cirege äyeblyngta.

¹¹ Yoo, weebibine liba ablaweja täápume iwadininusi abasecre-tna mete cabu me, coo nuuja mope biname bime opo gaabe je, piba bucurage ngena atwanena gone egä, ‘Cane ngena mene pa jaajemepene?’ coo, ‘Cane lipu gäne daremu mene awecnistame?’

¹² Ingle naace gyene Aceji Seemo pui padare cabu meebine mene pa icäripi iicemame.”

Ngene ca Agli Mene Yepä Buduma Mule Dogwe Biname poto cidi me

¹³ Tomi cabu ca yepä biname te piba jejige egä, “Abiberäja biname, cäme naane ne jeji cäme täápume abelename cime babe te lui gwidape bine itu saabmalemepi!”

¹⁴ Yeesu teebine jejige egä, “Nuuja biname te lica cebine najepi weeme ablaweja biname coo atrana biname me äbitame. Gone cebine najute gwidape bine abelename weeme täápume.”

¹⁵ Tabe puma cita ca iyeta biname bine jejemige egä, “Cängena ire, gone singisingi läbitininuye bucurage maramara gwidape täápume, inge biname me ireclota baborage gyene gwidape cabu ca, ngänu gemi teeme peei gwidape lipu bucurage.”

¹⁶ Tabe piba teebibine jejemige ai ngene ca agli mene egä, “Yepä gwidape dogwe biname te yaanajepi. Teeme gawe cabu bucurage deedei cina luutipesi.

¹⁷ Tabe ngena jwaatwananepi egä, ‘Cane ngena pa jaawenepene, inge cäme cumä täápume mete ibibi lica gemi iyeta ai deedei bine äbäcname?’

¹⁸ Tabe piba jüicige egä, ‘Cane apu pa jaawenene! Cane cumä täápume mete bine pa jüitnemepene, piba cuta modamoda bine pa yaarangemepene. Iyeta cäme calwa-cupi deedei piyepu cäme nuuja gwidape bine peei cabu pa yääbäcnemepene cumä täápume.’

¹⁹ Piba cane cämämu pa jiicepene egä, “Cäme gwidape bucurage gemi, ibibi gemi potu kämäge tääpume. Cane ngene pa loocepene, deedei äbitame, niye nanime, gege taatu lenajame.”

²⁰ Yepä, Acejiyame teebine jejige, ‘Maane buduma gäte! Ai ciye cabu mäame ireclota te apirenige. Iyeta gwidape maane lui mäame tääpume tomitomi tewenemumete, baa laati te pa yaawademepi?’ ”

²¹ Yeesu pui mene ne epirige egä, “Pepu pana pa läbitepi teeme tääpume lui cina gwidape tomitomi äbitininisi, yepä gwidape singisingi name pi, teeme padare lica gyene Acejiyame tääpume.

Acejiyame ne Jäärunguye Weeme Bimu Gaabegabe Deedei piyepu Gwidape tääpume (Matayo 6:25-34)

²² Yeesu piba teeme abiberäja bägrä bine jejemige egä, “Yoo, peei name pi ngenecu mäpu gone läbitininuye weeme ireclota tääpume ngena jaarwuye, coo weeme tääpe tääpume ngena lasigrärinuye.

²³ Ingle naace gyene weeme ireclota lui baborage gyene deedei cabu ca, piyepu weeme tääpe baborage gyene cäbletääpe cabu ca.

²⁴ Yoo, sändäyame bine jepänemeye teepi gije lica yäatemusi, lica yäärucnemusi, teeme nuuja puupu lica ge deedei cumä tääpume acraname, yepä Acejiyame te teebibine cängena ire jetwenemige. Yoo, ele cabu ca weene modamoda gemi Acejiyame me ngene atwanena cabu!

²⁵ Nää, weene ibibi gemi weeme ireclota yepä bimu cerämu leca me wawena weeme bucurage ngene atwanena cabu ca? Weene äblicäco!

²⁶ Yoo, weeme bucurage ngene atwanena liba ibibi lica ai matikolä gwidape wawename, piba ngeno me bucurage ngene atwanena iyeta nuuja gwidape potu cidi me?

²⁷ Baace popo bine jepänemeye teepi lipu uutenininiisii jejige. Teepi kaakesea lica jaawenemusi, coo piyepu cäbletääpe lica yaaterutäjemusii. Yepä, cane weebibine jijeninini-nine egä ngänu gyene mope biname Solomona puu jamyacurage cäbletääpe ca abasogäruji, yepä tabe epu miiji opo lica äbituji ai baace popo bime yepä te liyepu.

²⁸ Acejiyame te liba apu yaabasogäremuge baace bine, lui cina page luutiniisii, ciyeciye siige muye cabu me yisabemusii, egäsu tabe cuta weebibine isigräräjininuge cäbletääpe ca. Weeme ätrunga lipu matimati gemi!

²⁹ Weeme ngenecu gone deedei piyepu niye cabu me yaacranemuye; gonerage ngenecu mäpu me äbita.

³⁰ Acejiyame umle cäco biname teepi te jäärngemusii iyeta ai gwidape bine, yepä weeme Cabucewe je Babe te umle gyene egä weeme singi piti nemi ai gwidape tääpume.

³¹ Pätä weene miiji äbitipeye tabe te weebibine waadename, siige tabe cuta weeme singi gwidape bine pa icäraniipi.”

Gone Gwidape bine Yaatomlicmuye Ai Gawecewe cabu (Matayo 6:19-21)

³² Yeesu jejemige egä, “Weene lui epu pana matikolä maamoi tomi, yepä wälu gone, ingle weeme Babe gege gyene weebibine piyeme waadename.

³³ Weene gwidape bine yaacranemuye aletna tääpume, siige pui cabu ca lui rarekaake owecumete biname bine yäacäremuye. Yoo, rarekaake äbäcna diiba cina sasa me läbitininusi; ai gawecewe gwidape cina lämletrininiisii. Peeperi name pi miijimiji gwidape cabucewe je puupu cabu yaacranimuye. Weene liba miiji mule jaawenemuye, peei lui apu gyene weene miijimiji gwidape bine cabucewe je cumä tääpume acraname. Puma teepi lica lämletrininiisii, ingle ero biname te äblicäco gyene waadena, piyepu potäte cina lica jaate-cimusi.

³⁴ Yoo, mäame miijimiji gwidape luma, mäame ngenecu cuta puma birige.”

Amacetnäjäneji Inajininuge Mime Yageyame me Acnenuta tääpume

³⁵ Yeesu jejemige egä, “Amacetnäjäneji inajininuge, cäbletääpe labasogärininuye, piyepu weeme lampa bine abotäneji yaacranemuye.

³⁶ Weene epu pana läbitininuye kaakesea bägrä liyepu, lui cina teeme babo biname ne jaawagrijiisii soriyomu cabu ca liba acnenutame. Tabe liba tädige, grana cabu soororäjuge, siige teepi grana ne wata jiitnusi teeme tääpume.

³⁷ Babo miijirage teeme tääpume lui bine teeme babo biname te ireclota cama amacetnäjäneji jääpänemuge teeme acnenuta padare cabu. Cane weebibine toraca jijenininine egä, tabe cäbletääpe pa lasigrepi kaakesea me, teebibine deedei tääpume pa yaawednetäjemeppi, teebibine cängena ire pa jaatwemeppi.

³⁸ Yoo, babo miijirage pui kaakesea biname bime tääpume, teeme babo biname liba ciyedeusa täduga, coo sewali mameta liba täduge, yepä teebibine cuta ireclota cama jääpänemuge.

³⁹ Cuta ai poto cidi me ngene jwaatwa-naninuye. Mete yageyame liba ero biname me otni padare poto cidi me umle ge, tabe piba ero biname ne jiiBUGE teeme mete cabu abacitame.

⁴⁰ Yoo, weene miiji amacetnäjäneji lenaja, ingle cane lui Acejiyame bau ca tädujine, biname me äbitujine, cane lica weeme singi padare cabu acnenuta, yepä weene nuuja umle lica gemi căme otni padare.”

*Miiji Kaakesea Băgră piyepu Niya Kaakesea Băgră
(Matayo 24:45-51)*

⁴¹ Peteru Yeesu ne itemlige egä, “Yageyame, maane peei ngene ca agli mene, nää cime tääpume taatu jücemite, coo iyeta biname bime tääpume jücemite?”

⁴² Yageyame teebine jejige egä, “Căme mene lui iyeta toraca ngenecu piyepu umle cama biname bime tääpume. Teepi lui epu pana gemi kaakesea băgră liiyepu, teeme babo biname te lui ne mete ire atwi kaakesea pa yääcärepi teeme nuuja kaakesea băgră bine teeme deedei kupae toracarage padare cabu ceerame.

⁴³ Tabe babo biname te piba nuuja cewe me pa lädepi. Yoo, babo miiji, babo gege pui kaakesea băgră tääpume, teeme babo biname lui ne cāngenarage kaakesea cabu pa jääpānepi teeme acnenuta padare cabu.

⁴⁴ Yoo, cane weebibine jijenininine egä pui babo biname te piba teebine pa jaajepi iyeta teeme gwidape bine ire atwemame.

⁴⁵ Yepä, pui kaakesea băgră te liba lajuge egä, ‘Căme babo biname te pama lica wata pa tacnenutepi,’ piba nuuja kaakesea ngulebăgră imăbăgră bine pa yaatemeläjemeji, bucurage deedei pa läbitepi, sice pa yäänäjemeji, siige sice buduma pa läbitepi.

⁴⁶ Yoo, pui babo biname te liba pa tatyaramtepi, kaakesea băgră piba călu te pa jäätepi, ingle tabe teeme acnenuta padare umle lica ge. Babo biname te piba teebine pa yaaglepi, pa yaajarepi muye puupu cabu me, mene ätecija căco biname cina luma cirege lenaja.

⁴⁷ Yoo, lui kaakesea băgră te umle ge teeme babo biname ngena kaakesea tääpume singi tabe wawename, yepä tabe lica amacetnäjige pui kaakesea wawename, babo biname te teebine măpu cmecme ca pa yaatemeläjepi.

⁴⁸ Yepä, kaakesea băgră lui te umle lica ge teeme babo biname ngena kaakesea tääpume singi tabe pui ne wawename, piba teeme umle căco name pi tabe buduma mule jaawenuge, lui tääpume teebine miiji ge atemelāja, piba teeme babo biname teebine däägu pa yaatemeläjepi. Yoo, lui biname ne bucurage gwidape ituge ceera, bucurage gwidape cuta teeme bau ca pa saacwetnemepi, piyepu lui biname ne ire atwi kaakesea tääpume itu jaajepi, tabe miiji teeme kaakesea mage cāngenarage wawename.”

*Poode Lica Gyene Ai Gawecewe tääpume
(Matayo 10:34-36)*

⁴⁹ Yeesu cuta jejemige egä, “Cane tädujine ai gawecewe ne muye ca abotame. Cane baborage singi egä pui muye te gije tabacitumi ayime.

⁵⁰ Yepä, niinäce gaabe cane miiji măpurage padare cabu abacitame, epu pana abacita biname liiyepu lui te niye bora liiglenutuge äcisejame, peei name pi cane ngenecu măpu cama nanajenige page, ngălu peei măpu cabu ca pa lasatepene.

⁵¹ Nää, weene apu jingenininige egä cane tädujine poode ne ai gawecewe cabu acaname? Eewe, cane weebibine jijenininine egä cane lica poode ne secanujine, yepä biname cina maramara me pagege äbita căme name pi.

⁵² Yoo, ai padare cabu ca, biname lui cina cebine nătrungenisi piyepu teeme ätrunga căco binamewale, teepi maramara pa läbitipesi. Faib biname yepä mete cabu ca teepi neeneni tomi pa jaawenemepesi: nesae cina mara me pagege äbita nuuja neeneni cabu ca, piyepu neeneni cina mara me pagege äbita pui nesae cabu ca.

⁵³ Babe cina mara me pa läbitipesi teeme imăbăgră cabu ca, piyepu mage cina mara me pa läbitipesi teeme ngulebăgră cabu ca, cuta piyepu cnaatete cina teepi maramara me pa läbitipesi.”

*Ai Padare me Aboclomta poto cidi me
(Matayo 16:2-3)*

⁵⁴ Yeesu biname bine jejemige egä, “Weene liba căsăcăsă carbe ne jääpānuye ciye poto ca tädenige, weene piba jüicuye egä, ‘Ngupe te tädenige aimopo,’ siige pepu läbituge.

⁵⁵ Piyepu weene liba uule buuwe jääpānuye, weene piba jüicuye egä, ‘Bimu nuunu me pa läbitege,’ siige pepu läbituge.

⁵⁶ Weene walya umleumle biname gemi! Weene umle gemi gawe piyepu dume cabu ca bimu ne opo awatname, yepä weene äblicäco gemi opo awatna page ai padare cabu lui mule cina äbitininisi, teepi ngena tääpu memi.”

Weeme Conocono bine Weemämu Yaablawäjuy
(Matayo 5:25-26)

⁵⁷ “Weene ngenome lica weemämu atranineye ngena mule gemi conocäco wawename?

⁵⁸ Yoo, nuuja biname te liba singi weeme yepä ne ablaweja puupu cabu me acaname, pui neeneni liba gaabe cabu otni, tabe miiji apicetnera pui nuuja ne puma gaabe cabu je poode wawename. Piba pui biname te lica teebine yaacanuge ablaweja biname me opo gaabe me, cuta piba ablaweja biname te teebine teeme ätityera biname me ime cabu lica yaacituge krokeciye mete bora äsinglentame.

⁵⁹ Cane weebibine jijenininine egä tabe liba krokeciye mete me labacituge, tabe peema cita ca lica tasatuge, ngälu iyeta pui rarekaake yäcärüge lui teeme conocono mule me daremu.”

13

Weene Niiya Mule cabu ca Latatrongäriininuye

¹ Pui padare cabu puga ge poto biname lui cina Yeesu ne umle jewenisi yepä mäpu mule poto cidi me. Teepi jėjisi egä Mopeyame Pilato te poto Israella biname bine Galilaya probins cabu ca eglecimige iiwäreja mete caale bora je, teepi liba yiwäräjisi Acejiyame ne.

² Yeesu piba teebibine itemlemige egä, “Weene lipu ngene jotwananiniye, nää peei Galilaya biname cina baborage niiya itu tewenumesi nuuja Galilaya biname bime cabu ca, ingle teepi pepu budre ne tepänumesi? Eewe pepu lica ge.

³ Cane weebibine jijenininine egä weene liba lica atatrongäripeye weeme niiya mule cabu ca, piba weene iyeta niiya budre ne pa jepänepeye.

⁴ Piiyepu, weene pui eitn Siloama cewe biname bime poto cidi me ngene jotwananiniye, lui cina budre ne itu jääpänesi cabu me lecarage mete te teeme cabu liba itu saatramepi. Nää, weene apu jingenininige egä teepi niyarage biname gemi iyeta nuuja biname cabu ca lui cina Yerusalema babo cewe cabu icrajenige?

⁵ Eewe, teeme niiya baborage lica ge weeme cabu ca. Cane weebibine jijenininine egä weene liba lica atatrongäripeye weeme niiya mule cabu ca, piba weene iyeta niiya budre ne pa jepänepeye.”

Ngene ca Agli Mene Yepä Uli poto cidi me

⁶ Yeesu piba jicemige ai ngene ca agli mene biname bine umle wawename egä Acejiyame te matikolä padare taatu ecärenemige teepi teeme ireclota cängena amacetnäjame. Teeme mene apu ge, “Yepä biname teeme piigi uli puga ge teeme calwacupi cabu je. Yoo, nuuja taje tabe piigi kuu täapume ädige, yepä kuu lica jepänige.

⁷ Tabe puma cita ca teeme calwacupi kaakesea biname ne jejige egä, ‘Ai uli jepäni! Cane liba aima twaatnepene nesae kämäge cama, kuu bine jäärngemepene, yepä lica jääpänemepene. Ai uli ne irgi! Miiji lica ai gawe cabu papa kuu cäco lenajame!’

⁸ Yepä, calwacupi kaakesea biname te jejige egä, ‘Babo biname, ai yepä kämäge täapume ebmalı. Cane ai gome gawe calwacalwa pa jaawenepene, piyepu kau bime liiya ca pa jääsicnepene uli ingle ne.

⁹ Ai liba kuu bine pa jääpänemepi nuuja kämäge, piba babo miiji gyene, yepä liba kuu cäco pa yaanajepi, piba pagege ärgi.”

Sabade Bimu cabu Yeesu Magebi ne Miiji me Jowenige

¹⁰ Yepä Sabade bimu cabu, Yeesu biname bine ebiberäjemige teeme abasecretna mete cabu je.

¹¹ Puga ge yepä magebi lui te niiya cable cama waanajenanepi eitn kämäge cama. Tabe äpednu-teji uuwe kukuku totnäjumi, ingle tabe äblicäco conocäco aclajuta.

¹² Yeesu liba teebine jopänige, tosgoligige teeme bau otnime, piba jojige egä, “Magebi, maane pita cabu ca miiji häbitite!”

¹³ Tabe ime bine teeme papa cabu aacitige, siige magebi te piba taatu conocäco joclajutige, Acejiyame ne piba ewepyeräjige.

¹⁴ Yepä, pui abasecretna mete babo biname te claabe me äbitige, ingle Yeesu lipu magebi ne omacetnäjige Sabade bimu cabu. Tabe abasecretna biname bine jejemige egä, “Mime siks bimupiti nemi kaakesea täapume; weene miiji pui bimucabu weeme tääpe amacetnāja täapume otnime, yepä Sabade bimu cabu gone!”

¹⁵ Yageyame teebine jejige egä, “Maane walya biname gäte! Weene umle gemi weeme kau piyepu dongki bine iibira piyepu waadena niye nänäjame Sabade bimu cabu.

¹⁶ Yoo, age tuna weeme biname, Abrahamo me kaakesaare gwene, Satani te lui ne eitn kāmāge cama tocenenājumi. Nāā, cane miiji gāne Sabade bimu cabu peei pita cabu ca teebine miiji me wawename?”

¹⁷ Iyeta Yeesu me cubuyame cina ajiri me äbitininisi, teeme mene liba jitecijsi, yepā bucurage biname cina gege äbitininisi iyeta miijirage gwidape name pi tabe lui bine jewenanemige.

*Ngene ca Agli Mene Mastad Kuu Gije poto cidi me
(Matayo 13:31-32; Mareko 4:30-32)*

¹⁸ Yeesu itemlemige egā, “Acejiyame me mule biname bine waadena täapume lipu pana gyene? Cane lipu peei mule ne etonärenine weeme täapume?”

¹⁹ Peei lui epu pana gyene mastad kuu gije liiyepu, biname te lui ne ecatige teeme calwacupi cabu jecnige. Pui gije uutige, uli pana äbitige, siige ele cina ciipe cabu teeme mete bine yaarangemusi. Pepu pana gyene Acejiyame me waadena mule, lui mastad kuu pana matikolärage, peei cabu ca uli pana babo me läbituge.”

*Ngene ca Agli Mene Uutneca Gwidape poto cidi me
(Matayo 13:33)*

²⁰ Yeesu cääri itemlemige egā, “Yoo, cane lipu Acejiyame me biname bine waadena mule weeme täapume etonärenine?”

²¹ Peei lui epu pana gyene uutneca gwidape liiyepu, magebi te lui ne ecatige, baborage bulu cama elenglecäjige, ngälu siige peei iyeta te tuutnecuge.”

*Grana Susu Gyene Iyeta Ireclota cabu Abacitame
(Matayo 7:13-14, 21-23)*

²² Yeesu liba gaabe cabu ädige Yerusalema me, tabe cewe yepäyepä cabu biname bine ebiberäjemige.

²³ Nuuja taje gaabe cabu yepä biname te teebine itemlige egā, “Babo biname, nää Acejiyame te nesae taatu biname bine niiya cabu ca pa yääsecräremepi?”

Yeesu biname bine piba jejemige egā,

²⁴ “Weene kokre äbitipeye susurage grana cabu me äbäcname, inge cane weebibine jijenininine egā bucurage biname cina naabe äbitininisi äbäcname.

²⁵ Padare te cire tädepi, mete yageyame te grana ne liba cire saarmepi. Piba weene liba mete kaakepoto ca cire inajipi, grana ne cire seyäjepeye, cire jejepeye egā, ‘Babo biname, grana ne tiitni cime täapume!’ Yepä, tabe weebibine cire jiwecnistipi egā, ‘Cane umle lica gāne weene. Weene luma cita ca gemi?’

²⁶ Weene piba cire jejepeye egā, ‘Cine ituge deedei äbita piyyepu niiye nänāja maane cama. Maane cime cewe cole puupu cabu itu nibiberäjipete.’

²⁷ Tabe puma cita ca cire jijiipi egā, ‘Cane umle lica gāne weeme täapume, weene luma cita ca gemi! Weene niiya mule biname, iyeta äyebingineye cāme bau ca!’

²⁸ Weene piba ele cire ingenitnipi piyyepu giricu cire etebecmepeye, liba Abrahamo, Isacako, Jakobu, piyyepu iyeta sasa mename biname bine cire jepänemepeye Acejiyame me waadena cabu ge, yepä weene äyeblingeji gemi.

²⁹ Yoo, biname cina cire saaclepi bimu acita gome ca piyyepu bimu äpula gome ca, piyyepu kāmāge poto ca piyyepu uule poto ca. Teepi cire ladnatärepi soriyomu täapume Acejiyame me waadena padare cabu je.

³⁰ Yoo, poto biname lui ingwe gaabe biname gemi page, teepi niināce gaabe me cire läbitipesi pui padare cabu, cuta piyyepu poto lui niināce gaabe biname gemi page, teepi ingwe gaabe me cire läbitipesi.”

*Yeesu Owecu Ge Yerusalema täapume
(Matayo 23:37-39)*

³¹ Puirage padare poto Parisea sigu biname cina Yeesu bau me seclige, jejisi egā, “Maane ama cita ca äyebingti, nuuja gome ädi, inge ai Probins Mopeyame Heroda singi meebine aglime.”

³² Yeesu teebibine jejemige egā, “Naclege, pui angletneja biname ne jejeye egā, ‘Cane cāme kaakesea jewenenine: niiya cable bine iyecräjenenemine piyyepu pita biname bine emacnäjenenemine page piyyepu ciyeciye, piba nesae bimu ingwe ca ai kaakesea ne pa yaapirepene.’

³³ Yoo, cane miiji cāme kaakesea gaabe cabu otni ai poto bimu cama, siige Yerusalema ne piba oomlaname, inge iyeta Acejiyame me mename biname cina Yerusalema je teepi budre jääpānanusi.”

³⁴ Yeesu piba ngenecu mäpu cama jüicige egā, “Yerusalema biname, Yerusalema biname, weene lui cina Acejiyame me mename biname bine yaaglecimuye, piyyepu kula ca

jääbyecremuye lui bine weeme bau me ätyepäneji gemi! Bucurage padare cama, cane singi ituge weeme biname bine yepä gome waadena, epu pana paulo te lipu teeme plongo bine yepä gome jaabasecretnimuge taame ca ätrugerame, yepä weene singi lica ge.

³⁵ Ire, weeme iiväreja mete lui abmaläneji gyene Acejiyame bau ca. Cane weebibine page jijenininine egä weene cebine ingwe ca lica päpäna ngälu pui padare weene liba pa jüicepeye egä, 'Miiji pa läbitege lui te Yageyame me ngii cabu tädenige.'

14

Yeesu Pita Biname ne Miiji me Jewenige

¹ Yepä Sabade bimu cabu, yepä Parisea sigu babo biname te Yeesu ne teeme mete me ala tesoglicige deedei tääpume. Puga iyeta biname cina teebine ire jetwanisi,

² ingle puga ge teeme opo gaabe yepä biname lui me ime piyepu ernge ädreji ge.

³ Yeesu puma cita ca cotre abiberäja biname piyepu Parisea sigu biname bine itemlemige egä, "Mime cotre mene te lipu jüicenige, nää miiji gyene pita biname ne miiji me wawena Sabade bimu cabu, coo liiyepu?"

⁴ Yepä, teepi nuuja mene lica jejisi. Yeesu piba pui pita biname ne ecatige, teebine miiji me jewenige, siige jityepige.

⁵ Tabe piba peei biname bine jejemige egä, "Sabade bimu cabu weeme yepä me bägrä te, coo kau te, uugle cupicu bora me liba yaatramuge, tabe pui bimu cabu wata cuta saarpatuge, nää toraca?"

⁶ Siige, teepi äblicäco nuuja mene teebine jaji.

Umle Mene Ädärena Biname bime poto cidi me

⁷ Yeesu biname bine jepänemige egä pui mete cabu lui cina deedei tääpume adnatäreji ge, teepi singi ge modamoda biname bime puupu cabu lenajame. Tabe peei name pi ai ngene ca agli mene teebibine jejemige egä,

⁸ "Yoo, biname te liba weebibine soriyomu tääpume ala tisoglicinuge, gone modamoda biname bime puupu cabu adnatera, ingle pama soriyomu ire atwi biname te nuuja biname ne cuta ala taasoglicige, lui ge baborage weeme cabu ca.

⁹ Tabe piba weeme yepä ne pa jaajepi egä, 'Agesa babo biname, teebine ai miijirage puupu ecäri.' Piba weeme yepä te ajiri cama puupu ne saabmaluge, läduge papa biname cina luma yaacrajuge.

¹⁰ Yepä, weebibine liba ala tisoglicinisi soriyomu tääpume, weene papa biname bime puupu cabu ladnatärinuye. Piba soriyomu ire atwi biname te weebibine pa jijipi egä, 'Ayo, cäme biname, ai miiji puupu cabu adnatame.' Piba weene miiji opo pa päbitipeye nuuja biname bime opo gaabe.

¹¹ Siige, lui biname te singi teeme ngii babo me wawename, tabe matikolä me pa läbitepi, piyepu lui biname te teeme ngii ne teemämu matikolä me jaawenuge, tabe babo ngii ne pagege päpäna."

¹² Piba Yeesu te pui mete yageyame ne jejige egä, "Maane liba biname bine ala tasoglecemute mäame mete me niye nänäjame, coo deedei äbitame, gone mäame binamewale, coo dogwe biname taatu ala tasoglecemute, ingle teepi piba meebine cuta pagege ala asogleca mäame mule ne awecnistame.

¹³ Yepä, maane liba biname bine babo deedei tääpume ala tasoglecemute, maane miiji owecumete biname piyepu tääpe niyaniya biname, irecu määsumäsu biname, cuta piyepu ernge niya biname ala tasoglecemute.

¹⁴ Pepu biname cina äblicäco mäame miiji mule ne daremu wawena. Piba maane Acejiyame bau ca miiji daremu ne cire jääpänepete, tabe liba conocäco biname bine budre cabu ca cire jaarpinärepi."

Ngene ca Agli Mene Babo Soriyomu poto cidi me

(Matayo 22:1-10)

¹⁵ Yepä te, pui biname cabu ca lui cina Yeesu cama deedei äbitininisi, Yeesu me ngene ca agli mene liba itecijige, teebine piba jejige egä, "Babo miijirage gyene teeme tääpume lui cina cabucewe je cire ladnatäripesi deedei tääpume Acejiyame luma biname bine yaawademuge."

¹⁶ Yeesu teebine ai nuuja ngene ca agli mene piba jejige egä, "Yepä, biname te babo soriyomu ne jewenige. Tabe bucurage biname bine ala tesoglecmige pui soriyomu cabu otnime.

¹⁷ Iyeta liba amacetnäjäneji ge soriyomu tääpume, tabe piba teeme kaakesea biname ne jityepige ala asogläcneji biname bine jajanenname egä, 'Weene iyeta naaclege, cane bamacetnäjine soriyomu tääpume'.

¹⁸ Yepä, iyeta lui bine ituge ala asogleca, teepi yepäyepä gije abacitinisi teeme singi gaabe bine aboclomäjame. Niinäce biname te mene jityepige pui kaakesea biname cama soriyomu yageyame bau me egä, 'Owecu, cane äblicäco gäne otni, ingle cane gawe ne bii jeletnime. Page cane miiji otni peei ne päpäname.'

¹⁹ Nuuja te mene jityepige egä, 'Owecu, cane äblicäco gäne otni, ingle cane ten kau bine bii jeletnime cäme kaakesea wawename. Cane page ädenine teeme kokre apicetnäráme!

²⁰ Cuta nuuja te mene jityepige egä, 'Owecu, cane äblicäco gäne otni, ingle cane coga ne bii bocatine.'

²¹ Yoo, pui kaakesea biname te tacne-nutige, iyeta pui mene teeme babo biname ne jejige. Puma cita ca pui mete yageyame te claabe me äbitige, teeme kaakesea biname ne piba jejige egä, 'Maane wata ädi ai babo cewe iyeta gaabe cabu ta, siige puma cita ca biname bine sewademepi aimopo: owecumete biname piyepu tääpe niija biname, ernge niija biname, irecu mäasumäsu biname iyeta sewademepi.'

²² Matikolä padare ingwe ca pui kaakesea biname te tacnenutige, jejige egä, 'Babo biname, cine määme singi ne bii jebenisi, yepä puupu cuta pisi nyene.'

²³ Soriyomu yageyame te piba teebine jejige egä, 'Maane cewe cabu ca asati iyeta gaabe cabu ta, biname bine jejemepi cewe äbäcname, siige cäme mete te piba tapanenige.'

²⁴ Cane meebine naajenime egä pui niinäce ala asogläcneji biname bime cabu ca, nuuja te lica cäme deedei pa läbitepi! "

*Yeesu me Ätrunga Binamewale Miiji Teebine Niinäce Gaabe me Acita
(Matayo 10:37-38)*

²⁵ Bucurage biname cina Yeesu cama otninisi. Tabeteeme bau me atatröngtuge, jejemige egä,

²⁶ "Biname te liba cäme bau otni, tabe miiji teeme mage babe, coga bägrä, nanigane, cuta piyepu teemämu, iyeta ingwe me acrana, tabe liba singi cäme biname me äbitame.

²⁷ Tabe miiji teeme nuuja singi bine abmalame. Yoo, cane baarge uli cabu budre lipu pagege päpäna, tabe cuta miiji amacetnäjäneji lenaja mäpu cämiji pi päpäname. Lui te singi lica cebine pepu pana ingwe äcwime, tabe äblicäco cäme abiberäja bägrä me lenajame.

²⁸ Yoo, niinäce cängena ngene jotwanani weeme yepä te, liba singi gyene cäme abiberäja bägrä me äbitame. Pui lui epu pana gyene biname liiyepu, lui te singi cabu me lecarage mete ne rarangame. Tabe niinäce ladnatuge, rarekaake poto cidi me mage ngene jwaatwananuge liba teeme rarekaake ibibi gyene pui mete ne ämlitame.

²⁹ Tabe umle ge egä teeme rarekaake liba ibibi lica ge, tabe miiji mete kaake ne abmalame. Piba iyeta biname lui cina päpäna, teepi teebine ngange pa yääcwäcnepesi egä,

³⁰ 'Ai biname te mete ne gije jebacitige rara-ngame, yepä tabe ibibi lica gyene ämlitame!'

³¹ Yoo, pepu pana gyene gawe mope biname te liba singi cubu iicaname nuuja gawe mope biname cama. Tabe niinäce ladnatuge, mage ngene jwaatwananuge egä teeme ten tausen cubu biname liba ibibi gemi cubu iicaname nuuja twenti tausen cubu biname cama lui cina saaclenuge.

³² Tabe liba ngene jwaatwananuge egä, 'Cine äblicäco gemi!' piba mename biname bine pa jäätyepemepi pui nuuja mope biname bau me, tabe liba cudecewe gyene, teebine ätemlame egä, 'Mine miiji conocäco ngene atwanena pa jääpänago, piba poode ne wawename.'

³³ Yoo, pepu pana gyene weeme täápume. Weene miiji cängena ngene atwanena niinäce gaabe me egä weene nää toraca singi gemi iyeta abmalame cäme täápume? Weene liba singi lica gemi, weene piba äblicäco cäme abiberäja bägrä me lenajame."

*Ätrunga Biname te Liba Gege cäco me Läbituge
(Matayo 5:13; Mareko 9:50)*

³⁴ "Yoo, ätrunga biname bime miijirage kaakesea pisi nyene ai gawecewe cabu, cuta caapereniye täápume miiji kaakesea pisi nyene, yepä teeme mite te liba lapiruge, siige ingwe ca äblicäco caapereniye ne wawena mite me.

³⁵ Piba mite cäco teeme nuuja kaakesea lica birige, cuta gawe täápume teeme kaakesea lica. Biname cina papa yaajarusi. Weeme liba tablame piti nemi ätecijame, itecijinege umle äbitame."

15

*Ngene ca Agli Mene Apesareji Maamoi poto cidi me
(Matayo 18:12-14)*

¹ Nuuja padare bucurage täks rarekaake uutecrena biname piyepu nuuja conocono mule biname cina abasecretnuge Yeesu me mene ätecijame.

² Piba Parisea sigu biname piyepu cotre abiberäja biname cina mudru mene jicemisi egä, "Ai biname te babo singi gyene conocono biname cama lenajame cuta piyepu deedei äbitame ten cama!"

³ Peei name pi Yeesu ai ngene ca agli mene teebibine jejemige egä,

⁴ "Weeme yepä me hanred maamoi liba piti nemi, piyepu yepä maamoi te liba lapesaruge, tabe ngena jaawenuge? Tabe teeme nuuja naintinain maamoi bine yaabmale-muge baace cewe cabu, piba waatnetnäjuge pui yepä ne ärngime ngälu päpäname.

⁵ Liba jääpänuge, baborage gege cama saatecwantuge teeme palace cabu,

⁶ saacanuge cewe me. Piba teeme binamewale bine ala tasoglecmuge, teebibine jaajemuge egä, 'Agesa căme maamoi lui te tapesarumi, siige bii jepänine teebine. Mine gege pa läbitipago.'

⁷ Yoo, yepä pana mule pisi nyene cabucewe je luma gege baborage birige yepä taatu conocono mule biname täöpume, lui teeme nüya mule cabu ca latatrongtuge. Cane weebibine jijenininine egä peei gege baborage birige nuuja gege cabu ca naintinain conocăco biname täöpume, lui bime singi lica gyene atatrongärame.'

Ngene ca Agli Mene Apesareji Rarekaake poto cidi me

⁸ "Yoo, magebi me liba ten silba rarekaake piti nemi, siige yepä ne liba pa yaapesarepi, tabe ngena jaawenuge? Tabe lampa ne jaabotuge, mete ne yaapretnäjuge, iyeta poto ta cängena jäärnguge, ngälu siige jääpänuge.

⁹ Liba jääpänuge, teeme binamewale bine gege cama ala taasoglecmuge, jaajemuge egä, 'Agesa căme rarekaake lui ne sepesarumene, bii jepänine!'

¹⁰ Yoo pepu pana, cane weebibine jijenininine egä cabucewe je Acejiyame me mename seemo babo gege me läbitusi, yepä conocono mule biname te liba nüya mule cabu ca latatrongtuge."

Ngene ca Agli Mene Apesareji Imäbägrä poto cidi me

¹¹ Yeesu cuta ai mene jejemige: "Yepä, biname teeme neeneni imäbägrä puga ge.

¹² Iganeyame te babe ne jejige egä, 'Căme babe, määme lui gwidape bine jebelanemi, căme poto năcări!' Puma cita ca teeme babe te gwidape jebelanemige teeme neeneni bägrä täöpume.

¹³ Nesae bimü ingwe ca, igane te teeme gwidape tomi iyeta aletna täöpume ewademige, pui rarekaake cama piba abyemäriige otnime cudecewe gawe cabu me. Tabe cudecewe me ädige, puma teeme rarekaake iyeta papapapa jimlemige.

¹⁴ Liba teeme rarekaake bine epiremige, mage gane padare te pui gawe cabu me tatyaramtuge. Tabe gwidape căco enajige,

¹⁵ peei name pi kaakesea jepänige yepä pui gawe biname bau ca. Tabe teebine blome bime lenaja puupu me jityepige, blome bine ire atwime.

¹⁶ Loolomecewe name pi tabe singi blome bime deedei ärwäjame; yepä, nuuja biname te teebine lica nuuja gwidape yäacäruje.

¹⁷ Piba taatu teeme ngene atwanena te tatyaramtuge, tabe jicige egä, 'Iyeta căme babe me kaakesea bägrä bime deedei bucurage gemi, yepä cane budre mameta gäne deedei căco!

¹⁸ Cane abyemärenine, căme babe bau ädenine, teebine pa jaajepene egä, 'Căme babe, cane conocono mule itu tewenumene Acejiyame täöpume piyepu määme täöpume.

¹⁹ Cane äblicăco gäne määme bägrä me cuta äbita, yepä määme kaakesea bägrä me cebine naweni.'

²⁰ Yoo, tabe piba abujängtige babe bau me acnenutame.

Cudecewe ca teeme babe te teebine gaabe cabu tepänige. Tabe baborage owecu äbitige, teeme bägrä bau me uuwamige, teebine jejeclenäjige, lakace cabu jetcnige.

²¹ Puma cita ca bägrä te babe ne jejige egä, 'Căme babe, cane conocono mule itu tewenumene Acejiyame täöpume piyepu määme täöpume. Cane äblicăco gäne määme bägrä me cuta äbita.'

²² Yepä, babe te kaakesea bägrä bine ala tesoglecmige, jejemige egä, 'Wata, kirece müjirage căbletääpe secaneye teeme asigrame. Oplacmeläja pana gwidape teeme ime kukluta cabu esigreye, cuta piyepu ernge gwidape esigreye.

²³ Piba mime ngeerangera kau plongo ne secaneye aglime. Mine soriyomu ne gege name pi pa jaawenesi!

²⁴ Ingle ai bägrä te budre pana itu läbitepi, yepä page ireclota gyene. Tabe mime bau ca lapesarepi, yepä page bii jepänisi.' Siige, teepi soriyomu jewenisi.

²⁵ Pui padare cabu naane te calwacupi cabu jage. Tabe liba tacnenutige, mete mameta liba tatyaramtuge, siige güire uupera itecijige puma.

²⁶ Tabe puma cita ca yepä kaakesea bägrä ne ala tesoglicige, itemlige egä, 'Teepi ngena ne jewenensi?'

²⁷ Pui kaakesea bāgrā te jejige egā, 'Määme igane te tatyaramtige page. Määme babe te nijinige ngeerangera kau plongo ne aglime, ingle teeme bāgrā cāngenarage bii tacnenutige.'

²⁸ Siige, naane te claabe me äbitige, lica mete cabu me abacitige. Piba babe te tasatige, teebine jejige abacitamē.

²⁹ Naane te babe ne jejige egā, 'Maane näätectjeje! Iyeta kāmāge gaabegabe cane baborage kaakesea määme täapume jaawenune, iyeta määme singi cabu waatnune. Maane cāme täapume ngena ituge wawena? Maane cebine gouti plongo licarage itu nācārepete cane soriyomu ne cāme cegecege cama wawename!

³⁰ Yepā, määme ai bāgrā lui te määme gwidape bine papa itu yaapeserājemepi eroero magebi cama, teeme rarekaake liba apirinini, piba tacnenutige. Siige, maane ngeerangera kau plongo ne cuta teeme täapume eglite!'

³¹ Babe te jejige egā, 'Cāme bāgrā, maane cane cama naanajenige, iyeta cāme gwidape lui määme nemi.

³² Yepā, mine miiji gemi ai soriyomu wawena gege äbitame, ingle määme igane te budre pana itu läbitepi, yepā page ireclota gyene. Tabē mime bau ca lämlitepi, page bii tacnenutige.' "

16

Ngene ca Agli Mene Angletnejayame Ire Atwi Biname poto cidi me

¹ Yeesu teeme abiberāja bāgrā bine ai ngene ca agli mene jejemige egā, "Yepā dogwe biname me kaakesea bāgrā puga ge teeme gwidape bine ire atwime. Tabē mene itecijige egā peei ire atwi kaakesea bāgrā te teeme gwidape bine papa yaajaremuge.

² Tabē pui kaakesea bāgrā ne tesoglicige, jejige egā, 'Cane ngena ne nätecijumi egā maane cāme gwidape bine papa me tewenemumete. Iyeta määme peba bine rarekaake piyepu gwidape poto cidi me emacētājemi cāme ire me, ingle cane singi lica gāne maane cāme gwidape bine ingwe ca ire atwime.'

³ Pui kaakesea biname teemāmu jejige egā, 'Cāme babo biname te cebine pa näyebingtepi; cane ngena pa jaawenene? Cāme kokre ibibi lica gyene kaakesea wawename cāsu bine äplegecame, piyepu cane ajiri gāne papa ätinerājame.

⁴ Yoo, cane umle gāne ngena ne wawename! Cane liba ai ne cāngena jewenenine, cebine liba näyebingtepi cāme ire atwi kaakesea cabu ca, piba cāme piti nemi binamewale cebine teeme mete cabu me nacanansi.'

⁵ Puma cita ca tabē iyeta biname bine tesoglecmige lui bime ngii piti nemi teeme peba cabu gwidape coo rarekaake awecna poto cidi me. Tabē niinäceyame ne itemlige egā, 'Maane lija gwidape bine ituge waadena, yepā daremu camu gāte ceera?'

⁶ Biname te jejige egā, 'Yepā hanred dram olibi migi cama itu yaawademepene.' Pui ire atwi biname te piba teebine jejige egā, 'Yoo, aģesa peba pui acnema cama. Maane adnati wata yoogāri fiifti taatu peei hanred me puupu cabu.'

⁷ Pui ire atwi biname te cuta nuuja ne itemlige egā, 'Maane cuta lija gwidape bine ituge waadena, yepā daremu camu gāte ceera?' Pui biname te jejige egā, 'Yepā tausen wiiti kuu baiko.' Ire atwi biname te jejige, 'Yoo, peba aģesa pui acnema cama, eit hanred yoogāri peei tausen me puupu cabu!'

⁸ Yoo, ingwe ca pui dogwe biname te teeme conocono kaakesea bāgrā poto cidi me jiičige egā, 'Mage umle gyene pui conocono biname te!' Siige, peei conocono biname me mule cabu ca mine opo ewatneye egā ai gawecewe biname cina umle ge lipu nuuja teeme pana biname bine binamewale me wawename, yepā biname lui cina Acejiyame me apacıyera cabu yaacrajuge, nuuja taje teepi umle lica gemi nuuja biname bine teeme binamewale me wawena."

⁹ Yeesu cuta jejemige egā, "Cane peei name pi weebibine jijenininine egā nuuja biname bine itityerājemeye ai gawecewe me gwidape piyepu rarekaake ca, teebibine binamewale me wawena weeme conocāco mule ca. Piba ai gawecewe iyeta teeme gwidape cama liba cirege apira, weeme puupu pisi nyene cabucewe je lenajame iyeteta ngālu cāco.

¹⁰ Yoo, biname lui te matimati gwidape cāngena ire jaatwemuge, tabē cuta modamoda gwidape cāngena ire jaatwemuge; cuta piyepu biname lui te angletneja umle ge matimati gwidape poto cidi me, tabē cuta angletneja umle ge modamoda gwidape poto cidi me.

¹¹ Peei name pi biname lui te ai gawecewe me gwidape bine cāngenarage conocāco lica ire jaatwemuge, tabē cuta lipu Acejiyame me toraca gwidape bine cāngenarage ire atwema.

¹² Cuta piyepu biname te liba nuuja biname me gwidape bine cāngena lica ire jaatwemuge, nuuja te lica teebine teemerage gwidape pa yācārepi.

¹³ Yoo, kaakesea biname te äblicāco neeneni babo biname täapume kaakesea wawena yepā padare cabu. Tabē yepā ne jāāgyuge; nuuja täapume singi läbituge. Tabē yepā ne opo

gaabe me yaacituge, nuuja ne kaake ca sääcelyäruge. Weene äblicäco neeneni bine acenena: Acejiyame piyepu rarekaake.”

Yeesu Poto Umlle Mene Jiicemige

(Matayo 11:12-13; 5:31-32; Mareko 10:11-12)

¹⁴ Parisea sigu biname cina Yeesu me mene itecijemige, siige teebine ngange ecwänisi, ingle teepi baborage singi rarekaake täöpume.

¹⁵ Yeesu teebibine jejemige egä, “Weene peete nemi lui babo singi gemi biname cina weebibine päpäname egä, ‘conocäco biname,’ yepä Acejiyame umle gyene weeme ngenecu lipu gemi. Weene awepyeräja ne biname bau ca jääpänuye sinäme miiji mule name pi, yepä Acejiyame pui mule ne jäägyuge.

¹⁶ Moose lui Cotre Mene itu soogäreumuji, piyepu mename biname cina lui mene ituge oogära, peei mene cina weebibine ituge waadena ngälu Yoane niye ca äciseja biname te tatyaramitige. Teeme padare cabu ca Miiji Mene jejananemisi egä Acejiyame te biname bine yaawademuge, siige iyeta biname cina kokre me äbiteninini teeme waadena mule cabu me äbäcname.

¹⁷ Yepä, Cotre Mene me kaakesea cuta pisi nyene page, lica ituge äyeblyngta; iyeta matimati cotre piti nemi page. Yoo, gawecewe piyepu cabucewe teeme lenaja lipu lecarage, Acejiyame me Cotre Mene me lenaja pepu lecarage gyene.

¹⁸ Page cuta pisi nyene cotre egä biname lui te coga ne jwäägyuge, piba nuuja coga ne waacatuge, tabe sargi ero mule ne jaawenuge; cuta pepu gyene biname lui te pui ägyeji magebi ne waacatuge, tabe cuta sargi ero mule ne jaawenuge.”

Ngene ca Agli Mene Yepä Dogwe Biname piyepu Lajaro poto cidi me

¹⁹ “Puga ge yepä dogwe biname lui te mararage ududi piyepu bulubulu cäbletääpe bine lasigreräjuge. Tabe iyeta teeme singi gwidape iyeta bimu gaabegabe yaawadanemuge.

²⁰ Cuta puga ge yepä owecumete biname, teeme ngii Lajaro, droobodrobo tääpe cama ge. Biname cina teebine yaacanusi pui dogwe biname me mete grana gome,

²¹ ingle tabe singi deedei pacupacu ärwäja, lui cina dogwe biname me dade cabu ca saatrametnemuge. Yoo, drego cina waatninsi teeme gome teeme tääpe droobo aclotejame.

²² Siige, pui owecumete biname te budre äbitige. Acejiyame me mename seemo cina piba teeme seemo ne ecanisi cabucewe me Abrahamo gome me. Pui dogwe biname te cuta budre äbitige, siige gape cabu ecitisi.

²³ Tabe muye puupu cabu yaanajuge baborage pita cama. Puma cita ca tabe ire cabu me acitige, Abrahamo ne jepänige cudecewe ca, piyepu Lajaro teeme gome puga ge.

²⁴ Tabe babo tage ca jejige egä, ‘Cäme Babe Abrahamo! Cebine owecu naweni! Lajaro ne tityepi teeme ime kukluta niye cabu iiglenutame cäme wätä ne gäbu wawename, ingle cane babo pita gäne ai muye puupu cabu!’

²⁵ Yepä, Abrahamo jejige egä, ‘Cäme bägrä, maane ngene jepecni määme gawecewe ireclota padare poto cidi me. Maane miijimiji gwidape cama naanajuge, yepä Lajaro me ireclota puga niyarage ge. Page teeme lenaja miijirage gyene, yepä maane niya cabu naanajenge.

²⁶ Cuta piyepu, pisi nyene mime cole je baborage cäsu, biname te peei name pi ama cita ca äblicäco peeyeme otni, cuta peema cita ca biname cuta piyepu äblicäco aimopo otni.’

²⁷ Piba pui dogwe biname te cuta jejige egä, ‘Yoo, cäme babe, cane naajenine, owecu, Lajaro ne gawecewe cabu me jityepi cäme babe me mete me.

²⁸ Cäme faib iganewale puma piti nemi. Lajaro ne jityepi teebibine umle mene jajime, teepi piba lica ai muye puupu cabu me otni.’

²⁹ Abrahamo jejige egä, ‘Oogäräneji Mene piti nemi määme iganewale täöpume, Moose piyepu sasa mename biname cina lui mene ituge oogära. Määme iganewale miiji gemi teeme peei mene ätecija.’

³⁰ Yepä, tabe jejige egä, ‘Cäme babe Abrahamo, peei mene taatu ibibi lica gyene, yepä biname te liba budre cabu ca teeme bau acnenutame, teepi piba teeme niya mule cabu ca pa latatrongäripesi.’

³¹ Yepä, Abrahamo jejige egä, ‘Teepi liba singi lica Moose piyepu mename biname bime oogäräneji mene ätecijame, teepi cuta piyepu biname ne lica ätecija tabe liba budre cabu ca acnenuta teebibine mene jajime.’”

17

Gone Biname ne Acana Niya Mule cabu me
(Matayo 18:6-7; Mareko 9:42)

¹ Yeesu teeme abiberäja bāgrā bine jejemige egā, “Yoo, maramara gwidape cina saacluge lui biname bine jaawenemusi niiya mule wawenecame, yepā babo niyarage gyene biname tääpume lui te pui gwidape bine saawademuge.

² Pepu biname mäpu kula ne liba teeme singicace cabu jaaglotusi, siige malu cabu yaajarusi budre me, peei mäpu lui plowa birige pui mäpu cabu ca tabe lui ne cirege pāpāna liba ai matimati bāgrā yepā ne niiya mule cabu yaacanuge.

³ Peei name pi cāngena inajininuge!”

*Weeme Binamewale bime Niya Mule poto cidi me
(Matayo 18:21-22)*

“Yoo, määme biname te liba niiya mule jaawenuge, maane teebine umle mene jaajute. Tabe liba tatatrongtuge pui niiya cabu ca, maane miiji teeme niya mule äyeblingta määme ngene atwanena cabu ca.

⁴ Yoo, tabe liba meebine niya naawenanuge cuta seben gääbu yepā bimu cabu, cuta seben gääbu määme bau me liba lacnenuatanuge, naajanauge egā, ‘Cāme ngenecu te batatrongtuge,’ piba maane miiji iyeta teeme niya äyebinga määme ngene atwanena cabu ca.”

Mene Kokre Ätrunga poto cidi me

⁵ Puma cita ca pui twelb ätyepāneji biname cina Yageyame Yeesu ne jejisi egā, “Cime ätrunga babo me jeweni!”

⁶ Tabe Yageyame te jejemige egā, “Weeme ätrunga liba epu pana baborage gyene ai matikolā mastad kuu gije liiyepu, weene piba ibibi gemi ai uli ne jaji egā, ‘Määmämu ai gawe cabu ca äpācuti iyeta braju cama, piba malu cabu acni määmämu!’ Siige, ai uli te weeme mene piba pa jaawenepi.”

Kaakesea Bāgrā bime Mule poto cidi me

⁷ “Weeme yepā me kaakesea bāgrā liba pisi nyene, teebine liba jäätyepuge calwa wawename, coo nuuja taje maamoi ire atwime, tabe liba kaakesea cabu ca mete me tiinuge, teeme babo biname te lica teebine piba jaajuge egā, ‘Määme deedei agha.’

⁸ Yepā, tabe teebine jaajuge egā, ‘Cāme deedei nawenemi, piba määmämu amacetnäji cāme deedei piyepu niye ceerame. Peei ingwe ca, maane määme deedei äbiti piyepu niye nani.’

⁹ Nää, pui babo biname teeme kaakesea bāgrā ne eso pa jaajepi liba teeme mene cāngena jaawenemuge? Eewe, pama lica!

¹⁰ Weene pepu pana kaakesea bāgrā gemi. Weene liba iyeta Acejiyame me singi kaakesea cāngena ituge wawena, piba gone singi awepyeräja teeme bau ca pāpāname, yepā apu jiiucye egā, ‘Cine kaakesea bāgrā gemi; cine cime kaakesea taatu bine jaawenemusi.’ ”

Yeesu Ten Tääpe Niyaniya Biname bine Miiji me Jewenemige

¹¹ Yeesu liba Yerusalem me ädige, tabe Galilaya piyepu Samariya gawe teeme ngälugaabe cabu ädige.

¹² Tabe liba yepā cewe me atyaramtuge, ten biname bine opopa jewenemige lui cina niyarage tääpe pita, lepera pita, cama ge. Teepi cudecewe ca imyemutenige,

¹³ puma cita ca babo tage ca jejisi egā, “Yeesu, Babo Biname, cibibine owecu niwenini!”

¹⁴ Yeesu teebibine jepānemige, jejemige egā, “Naaclege modamoda iiwäreja biname bime bau me teepi weeme tääpe awatnejame egā miiji.”

Siige, gaabe cabu teepi liba eclige, teeme tääpe iyeta miiji me äbitininisi.

¹⁵ Teeme yepā te liba jepānige egā teeme tääpe miiji ge, piba tacnenuituge Yeesu bau me, Acejiyame ne babo tage ca ewepyeräjige.

¹⁶ Tabe teemāmu gawe cabu ajarige Yeesu me ernge gome, teebine baborage eso ecäriige. Pui biname lica Israela biname, yepā Samariya gawe biname ge.

¹⁷ Yeesu biname bine itemlemige egā, “Cane ten biname bine miiji me jewenemine, cije nain cina lete nemi?”

¹⁸ Nää, nuuja biname te lica tacnige Acejiyame ne awepyeräjame, yepā ai catecewe biname taatu?”

¹⁹ Siige, Yeesu teebine jejige egā, “Abujāngti, ädi määme gaabe cabu. Määme ätrunga te meebine miiji me bii naawenige.”

*Acejiyame me Biname bine Waadena Padare te Lipulipu Tatyaramtuge
(Matayo 24:23-28, 37-41)*

²⁰ Yoo, poto Parisea sigu biname cina Yeesu ne itemlisi egā Acejiyame me biname bine waadena padare te liba pa tatyaramtepi? Tabe jejemige egā, “Yoo, biname cina äblicāco Acejiyame me biname bine waadena padare ne irecu ca pāpāna egā tatyaramtenige.

²¹ Biname cina äblicäco apu iicana egä, 'Ire, age sena!', coo 'Peese nyene!', ingle Acejiyame te weebibine iwadininige weeme ngenecu cabu."

²² Tabe piba teeme abiberäja bägrä bine jejemige egä, "Padare te pa tädepi weene piba babo singi cane cama lenajame yepä bimu taatu, yepä cane lui te Acejiyame bau ca tädujine, biname me äbitujine, cane ama lica pagege pui bimu cabu.

²³ Biname cina piba weebibine pa jiiipesi egä, 'Taba peese,' coo 'Taba age sena,' yepä teeme ingwe ca gone naacluge cebine ärngime,

²⁴ ingle cäme acnenuta te liba cire tatyaramtepi, weene piba cängena umle cire äbitipeye. Yoo, pamlepamle te dume cabu lipu tuungepmeläjuge, iyeta poto yaapaclyeräjuge, cane lui te Acejiyame bau ca tädujine, biname me äbitujine, cäme acnenuta te cuta pepu pana cire läbitepi.

²⁵ Yepä, peei te cäro camuge äbita; cane miiji niinäce babo mäpurage padare ne päpäna, piyepu ai padare me biname cina cebine pa nägyepesi.

²⁶ Yoo, ujarage Nooa me padare cabu lipu itu äbituji, pepu pana cäme acnenuta padare cabu cirege äbita.

²⁷ Pui padare iyeta biname cina deedei täbitenäjumesi, niije senäjenäjumemesi, piyepu biname cina tawadrecanimumesi, ngälu pui bimu cabu Nooa liba baborage buto cabu me acenutuji. Siige, babo igi te piba täduji iyeta biname bine eglecimuji.

²⁸ Yoo, Loota me padare cabu lipu itu äbituji, cuta pepu pana cäme acnenuta padare cabu cirege äbita. Iyeta biname cina deedei täbitenäjumesi, niije senäjenäjumemesi, gwidape teletne-mäjumemesi, gije sitememäjumesi, piyepu mete bine serangemäjumesi,

²⁹ ngälu pui bimu Loota te Sodoma cewe ne liba sebmaluji. Piba muye wiiryere piyepu matimati nuunurage kula cina cabucewe ca sitrametnemuji, siige iyeta biname bine eglecimujisi.

³⁰ Yoo, biname cina pepu pana mule cire jaawenemepesi cäme acnenuta bimu cabu, teepi liba iyeteta umle cire läbitipesi egä cane Acejiyame bau ca gäne.

³¹ Pui bimu cabu, lui biname te mete toro cabu, lui puupu cabu yaanajuge, tabe miiji lica mete me abacita teeme gwidape äsecerame, cuta piyepu biname lui te calwacupi cabu gyene, tabe miiji lica cewe me acenutame.

³² Loota me coga poto cidi me ngene jotwananineye, tabe lipu teeme ingwe gaabe me ire acituji. Yoo, pui bimu cabu gone pepu pana äbita!

³³ Lui biname te singi teeme ai gawecewe ireclota ne teemämu ire atwime, ingle tabe wälu ge teeme ireclota ne apeserame, tabe toraca ireclota ne cire yaapesarepi; yepä, lui biname te teeme ireclota ne cäme tääpume yaapesaruge, tabe toraca ireclota ne cire jääpänepi.

³⁴ Yoo, cane weebibine jiiininine egä cäme acnenuta padare cabu, ciye padare liba, neeneni biname cina piba yepä puupu cabu ute wagräsi: yepä ne cire yaacatepesi, nuuja ne cire yaabmalepesi.

³⁵ Bimu padare liba, neeneni magebi cina wiiti kuu bine kula ca cire jäämulecemepäsi, yepä ne cire waacatepesi, nuuja ne cire waabmalepesi.

³⁶ Neeneni rooriye cina babo calwacupi cabu kaakesea cire jaawenemepäsi: yepä ne cire yaacatepesi, nuuja ne cire yaabmalepesi."

³⁷ Siige, abiberäja bägrä cina piba teebine itemlisi egä, "Yagegame peei te luma cire läbitepi?"

Yeesu teebibine jejemige egä, "Budrekaake luma, sändäyame cina piyeme labasecret-nuge. Pepu pana pui padare te liba cire tatyaramtepi, weene piba umle cire äbitipeye."

18

Ngene ca Agli Mene Cuubla piyepu Ablaweja Biname poto cidi me

¹ Puma cita ca Yeesu teeme abiberäja bägrä bine jejemige ai ngene ca agli mene umle ceerame egä teepi durau gone äbita Acejiyame ne awejename.

² Taba apu jiiige egä, "Yepä cewe cabu puga ge ablaweja biname lui te nuuja singi lica ge Acejiyame tääpume, cuta piyepu nuuja singi lica ge biname bime tääpume.

³ Cuta puga ge cuubla, lui te ablaweja biname bau me jäje waatnuge jajanenime egä, 'Cebine nätiyari cäme cubuyame cabu ca uutrutame.'

⁴ Siige, leca padare cabu pui ablaweja biname te singi lica teebine ätiyterame, yepä ingwe ca tabe teemämu jiiige egä, 'Cane nuuja singi lica gäne biname bime tääpume, coo piyepu Acejiyame tääpume,

⁵ yepä ai magebi te cebine mage tii nawenenige, peei name pi cane teebine pa wäätiyärepenene. Cane liba lica utiärenine, tabe jäje pa twacnepi aima, ngälu siige gloose te cebine pa noomlepi.'"

⁶ Siige, Yageyame piba jejemige egä, “Yoo, weene pui conocono ablaweja biname me mene jiteciye. Weene lipu ngene jotwa-naniniye?”

⁷ Pui conocono biname te liba cuubla ne utityäriige teeme tii name pi, Acejiyame lui conocäco gyene, tabe piba teemerage binamewale bine pa yäätityäremepi lui cina teebine ciye bimu cama yaawewanusi? Nää, tabe weebibine wata lica pa itityäriipi?

⁸ Cane weebibine jijenininine egä tabe wata pa itityäripi conocäco päpäname. Yepä, cane lui te Acejiyame bau ca tädujine, biname me äbitujine, cane liba cire tacnenutepene, nää cane biname bine ätrunga cama cire jääpänemepene, coo lica?”

Parisea Sigu Biname piyepu Täks Rarekaake Uutecrena Biname

⁹ Yeesu cuta ngene ca agli mene biname bine jejemige lui cina apu jaangemuge egä teepi conocäco biname gemi, cuta peei name pi iyeta nuuja biname bine gawe me yaapremalemusi.

¹⁰ Tabe apu jiiçige egä, “Neeneni biname cina iiwäreja mete me aaluji irecu ätumutame. Yepä lui Parisea sigu biname ge, cuta nuuja lui täks rarekaake uutecrena biname ge.

¹¹ Parisea sigu biname te jeclajutige, teeme poto cidi me irecu ätumutige egä, ‘Acejiyame, cane meebine eso nääcärenine egä cane lica nuuja biname bime pana gäne, lui cina biname bime gwidape juutecranemusi, nuuja conocono mule jaawenemusi, coo piyepu sargi mule jaawenemusi. Yoo, cane meebine eso nääcärenine egä cane lica gäne ai täks rarekaake uutecrena biname pana.

¹² Iyeta wiik ngalebora cane neeneni bimu cama deedei cäco nanajuge; piyepu iyeta cäme ten rarekaake cabu ca cane yepä nääcärune, siige.’

¹³ Yepä, pui täks rarekaake uutecrena biname te matikolä cudecewe padare cuta jeclajutige. Tabe cabu me lica ire äbitige, yepä ergo ecirige irecu ätumutame, cuta jejige egä, ‘Acejiyame, cebine owecu nawenepi, inge cane conocono biname gäne.’

¹⁴ Yoo siige, cane weebibine jijenininine egä pui täks rarekaake uutecrena biname te Acejiyame bau ca kälyä jepänige teeme niyaniya mule cabu ca, siige pui conocäco cama acnenutige mete me, yepä pui nuuja te kälyä ne lica jepänige. Ai inge naace gyene lui biname te teemämu babo me läbituge, tabe matikolä me pagege äbita, cuta piyepu lui biname te teemämu matikolä pana me läbituge, tabe babo me pagege äbita.”

*Yeesu Ime Acitige Bägrä bime papa cabu me Teeme Mijji tääpume
(Matayo 19:13-15; Mareko 10:13-16)*

¹⁵ Poto biname cina teeme matimati bägrä bine Yeesu bau me sewademisi tabe ime teeme papa cabu acitename bägrä bime mijji tääpume. Yepä, abiberäja bägrä cina peei mule ne liba jepänisi, teepi piba biname bine jicnecimisi.

¹⁶ Yepä, Yeesu te bägrä bine teeme bau me ala tesoglecmige, cuta abiberäja bägrä bine jejemige egä, “Bägrä cina saaclege cäme bau me. Gone jiihemuye, inge lui biname bime ätrunga ai matimati bägrä pana me, Acejiyame teebibine yaawademuge.

¹⁷ Cane weebibine toraca jijenininine egä lui biname te singi lica gyene Acejiyame me waadena ne matikolä bägrä pana yaacatuge, tabe licarage abacitame.”

*Dogwe Biname te Yeesu ne Edäriige
(Matayo 19:16-30; Mareko 10:17-31)*

¹⁸ Yepä Israela babo biname te Yeesu ne itemlige egä, “Mijjirage abiberäja biname, cane ngena ne mijji wawena iyeteta ireclota ne päpäname?”

¹⁹ Yeesu teebine jejige egä, “Maane ngenome cebine nainite mijjirage ca? Acejiyame taatu mijjirage gyene, nuuja cina mijjirage lica gemi.

²⁰ Maane cotre mene umle gäte egä: ‘Sargi mule gone; gone biname ne budre me agli; gone gwidape ero; walya aitneja gone; mage babe bine mijji opo gaabe me acita.’ ”

²¹ Siige, pui biname te jejige egä, “Cane bägrä cabu ca iyeta peei cotre bine itu sicwetnanemumene.”

²² Siige, Yeesu liba teeme mene iteciye, teebine piba jejige egä, “Yoo, mäame yepä gwidape pisi nyene wawename. Mäame gwidape iyeta ewademepi aletna tääpume, pui rarekaake owecumete biname bine ecäranemepi, maane peema cita ca mijjimiji gwidape bine cirege päpäna cabucewe je. Piba tädepi cane cama otnime.”

²³ Yepä, peei biname te liba Yeesu me mene iteciye, tabe babo ngenecu mäpu me äbitige, inge tabe babo dogwe biname ge. Tabe singi lica ge teeme gwidape bine abmaläcema Yeesu cama otnime.

²⁴ Yeesu jepänige egä tabe babo ngenecu mäpu ge, piba jiiçige egä, “Mage mäpu gyene dogwe biname cina Acejiyame me waadena cabu äbäcename!”

²⁵ Baborage gwidape kamela cibi pana, tabe äblicäco matikolä gaabe epu pana nilo bora me abacita, siige asata, yepä mäpurage gyene cuta peei cabu ca dogwe biname te Acejiyame me waadena cabu abacitame.”

²⁶ Biname lui cina peei mene itecijemige, teepi piba Yeesu ne itemlisi egä, “Piba laati te miiji gyene teeme niija cabu ca asata iyeteta ireclota ne päpäname?”

²⁷ Yeesu jejemige egä, “Biname cina äblicäco teemämu peei ne wawena, yepä Acejiyame te miiji gyene iyeta gwidape bine wawenecame.”

²⁸ Peteru piba jejige egä, “Cije cine lipu gemi? Cine iyeta ituge abmala maane cama otnime.”

²⁹ Yeesu teebibine jejemige egä, “Yoo, cane toraca mene jijenininine egä lui biname te cewe ne saabmaluge piyepu coga, bägrä, mage, babe, naane, iganewale saabmaläcemuge Acejiyame me biname bine waadena name pi,

³⁰ pui biname bucurage cerämu tuwängle pa jääpänemepi ai padare cabu, cuta piyepu ciige padare cabu iyeteta ireclota ne cire jääpänepi.”

*Yeesu Cääri Mene Jiicemige Teeme Budre poto cidi me
(Matayo 20:17-19; Mareko 10:32-34)*

³¹ Yeesu teeme twelb abiberäja bägrä bine biname bime sobe cabu ca mara me ewademige, jejemige egä, “Itecijinege, mine Yerusalema cewe me naclenige. Puma iyeta mene sasa mename biname cina lui ituge oogära cäme poto cidi me toraca me pa läbitepesi. Cane lui te Acejiyame bau ca tädujine, biname me äbitujine,

³² cebine nuuja gawe cabu ca biname bime ime cabu pa nacitepesi. Teepi cebine ätutena pana pa nawenepesi, pa näcnecepesi, piyepu mote ca pa nätyewepesi.

³³ Teepi cebine pa nadnanepesi, cuta budre me pa naglepesi, yepä nesae me lui bimu cabu cane pa larpinantepene cääri ireclota me.”

³⁴ Siige, abiberäja bägrä cina cängena lica opo ewatnisi iyeta peei mene bine, ingle teeme aboclomta lui ämlitäneji ge teerne bau ca, peei name pi teeme tääpume pajecu lica ge.

*Yeesu Ireçu Määsumäsu Biname ne Ireçu Asatame Jewenige
(Matayo 20:29-34; Mareko 10:46-52)*

³⁵ Yeesu liba Yeriko cewe mameta me atyaramtige, gaabe wajwa je yepä ireçu määsumäsu biname adnatäneji enajige, gwidape piyepu rarekaake tääpume yääätineräjemuge.

³⁶ Pui biname te liba biname guugla itecijige, itemlemige egä, “Ngena te äbitenige?”

³⁷ Biname cina teebine jejisi egä, “Yeesu Nasareta ceweyame te mime cewe ne isuplingtenige.”

³⁸ Tabe puma cita ca babo tage ca jejige egä, “Yeesu, Daawida me Kaakesaare, cebine owecu nawenepi!”

³⁹ Niinäce gaabe biname cina teebine eblawisi, jejisi bojä agime. Yepä, tabe cuta baborage tage ca jejige egä, “Daawida me Kaakesaare, cebine owecu nawenepi!”

⁴⁰ Yeesu imyemutige, mene jejemige ireçu määsumäsu biname ne teeme bau me acaname. Tabe liba teeme mameta me tädige, Yeesu teebine itemlige egä,

⁴¹ “Maane ngeno mäte singi cane mäame tääpume wawename?”

Tabe jejige egä, “Babo Biname, cane singi cääri ireçu asatame.”

⁴² Yeesu piba teebine jejige egä, “Ireçu aasati! Mäame ätrunga te miiji bii naawenige meebine.”

⁴³ Piba taatu tabe ireçu aasatige päpäname. Tabe piba Yeesu ne ingwe icwige, Acejiyame ne eso ecäranige. Siige, biname cina jepänisi, piba iyeta Acejiyame ne ewepyeräjisi.

19

Yeesu Sakaiyo ne Edäriige

¹ Yeesu peema cita ca Yeriko cewe me abacitige, piyepu gaabe ta isuplingtenige.

² Cewe cabu puga ge täks rarekaake uutecrena babo biname, ngii Sakaiyo, tabe lui mage dogwe biname ge.

³ Yoo, Sakaiyo baborage singi Yeesu ne ireçu ca päpäname, yepä äblicäco ge, biname tomi name pi, ingle tabe tuube biname ge, piyepu pui niinäce gaabe biname cina teebine jilyengisi.

⁴ Tabe peei name pi niinäce gaabe me uuwamige, sukumuro piigi uli ne jegelige Yeesu ne puma cita ca päpäname, tabe peei gaabe cabu liba tädige.

⁵ Yeesu liba teeme mameta me atyaramtige, cabu me ire acitige, jepänige, piba jejige egä, “Sakaiyo, wata täini! cane mäame mete cabu page nanajenige.”

⁶ Siige, Sakaiyo wata täinige, babo gege cama teebine teeme mete me ecanige.

⁷ Iyeta biname liba peei ne jepänisi, Yeesu ne jicetnisi egä, “Ai biname te singi conocono biname ne ädärame. Tabe teeme mete cabu me cuta abacitenige!”

⁸ Mete je Sakaiyo abujängtige, Yageyame ne jejige egä, “Babo biname, cebine näteciji. Cane cebo iyeta căme gwidape cabu ca pa yääcärempene owecumete biname bine, cuta piyepu cane liba nuuja biname bime rarekaake angletneja mule ca itu yaawadanemepene, cane fooa rarekaake bine pa yaawecnepene tuwängle me iyeta yepäyepä täápume.”

⁹ Piba Yeesu teebine jejige egä, “Yoo, Acejiyame te ai mete biname bine teeme niija cabu ca page bisecräremige, ingle Sakaiyo lui Abrahamo me kaakesaare lui ituge apesera, yepä page bii tacnenutige teeme ingle cabu me.

¹⁰ Yoo, cane lui Acejiyame bau ca ätyepäneji gäne biname me äbitame, cane ai täápume tädujine: apesäreji biname bine ärngemame teeme niija mule cabu ca äsecrerame, piba Acejiyame bau me waadename.”

*Ngene ca Agli Mene Gol Rarekaake poto cidi me
(Matayo 25:14-30)*

¹¹ Siige, gaabe cabu biname cina Yeesu me mene itecijemige. Tabu mameta ge atyaramta Yerusalemu cewe cabu me, piyepu biname cina apu jengemige egä Acejiyame me biname bine waadena padare mametarage gyene gije abacitame. Tabu singi biname bine umle wawename egä waadena padare te camurage gyene, yepä kaakesea pisi nyene ai awagrija padare cabu wawename.

¹² Tabu peei name pi ai ngene ca agli mene teebibine jejemige egä, “Yoo, yepä babo biname te enajuji. Tabu abyemäriige cudecewe gawe me otnime mope biname me ngii puma cita ca päpäname, piba teeme gawe me acnenutame.

¹³ Camuge abyemera, tabu ten kaakesea bägrä bine tesoglecemige, teebibine yepäyepä gol rarekaake ecäranemige, jejemige egä, ‘Cane liba biiri, căme looye cabu je weene kaakesea tewenepeye ai rarekaake babo me wawename.’

¹⁴ Yoo, teeme gawe biname cina teebine mage jimugetnisi, peei name pi poto teeme biname bine teeme ingwe jityepemisi mene cama egä, ‘Cine singi lica ai biname te cime mopeyame täápume lenajame.’

¹⁵ Peei mene ngänuge, tabu mopeyame ngii ne jepänige, piba tacnenutige. Teeme atyaramta ingwe ca tabu wata mene jejemige pui kaakesea bägrä bine, lui cina teeme ten gol rarekaake bine itu sewademumesi, teepi teeme bau otnime. Tabu singi teeme bau ca umle äbitame pui niinäce rarekaake ca teepi lija rarekaake bine bii tepänemumesi.

¹⁶ Yoo, niinäce kaakesea bägrä te tädige, jejige egä, ‘Babo biname, cane ten gol rarekaake bine cuta tepänemumene pui yepä cabu ca.’

¹⁷ Babo biname teebine jejige egä, ‘Maane miiji tewenumete. Maane miiji kaakesea bägrä gäte! Ai ingle naace gyene maane kaakesea cängena tewenumete matikolä gwidape ire atwime, peei name pi page cane ten cewe bine mäáme ire atwi cabu pa yaacranemepene.’

¹⁸ Piba nuuja pui kaakesea bägrä te tädige, jejige egä, ‘Babo biname, cane faib gol rarekaake bine cuta tepänemumene pui yepä rarekaake ca maane lui itu näcärepete.’

¹⁹ Babo biname pui kaakesea bägrä ne jejige egä, ‘Yoo miiji, cane piba faib cewe bine mäáme ire atwi cabu pa yaacranemepene.’

²⁰ Piba nuuja pui kaakesea bägrä te tädige, jejige egä, ‘Babo biname, agha mäáme gol rarekaake. Cane cumä täápume cäbletääpe cabu yäämlitune.

²¹ Cane wälu ge mäáme täápume, pui name pi cäbletääpe pläsu ngalebora simlitumene. Cane umle gäne maane mage kokre babo biname gäte. Maane ime kaakesea lica jaawenemute, yepä maane gwidape yaawadanemute nuuja biname bime kaakesea cabu ca, piyepu maane calwacupi deedei yaawademute maane te luma gije lica ätema.’

²² Babo biname te teebine jejige egä, ‘Maane niiyarage kaakesea bägrä gäte! Määmerage mene te meebine naaitnäjige! Maane umle gäte egä cane kokre cama babo biname gäne, lui te gwidape yaawadanemune nuuja biname bime kaakesea cabu ca, piyepu calwacupi deedei bine yaawademune cane te luma gije lica yäätemune.

²³ Yoo, maane piba ngena name pi căme rarekaake lica acita rarekaake ire atwi mete cabu? Piba cane cerämu rarekaake cire jääpänejine pui niinäce rarekaake me kaakesea cabu ca.’

²⁴ Babo biname te piba teeme gome kaakesea bägrä bine jejemige egä, ‘Peei gol rarekaake ne teeme bau ca juutecreye, teebine ecäreye lui te ten gol rarekaake cama gyene.’

²⁵ Kaakesea bägrä cina teebine jejisi egä, ‘Babo biname, pui biname me ten gol rarekaake piti nemi!’

²⁶ Babo biname te jejige egä, ‘Cane weebibine jijenininine egä biname lui teeme kaakesea cabu ca kuu piti nemi, teebine cuta gaabe pa yääcärempene cerämu kuu waadename, yepä biname lui me kaakesea kuu căco gyene, cuta teeme lui matimati gwidape piti nemi, peei bine teeme bau ca pa yääyblingemepene.’

²⁷ Yoo, căme cubuyame poto cidi me, lui cina singi lica cane teeme mope biname tăăpume lenaja, teebibine aima sewademeye, eglecemeye căme opo gaabe! ”

Yeesu Yerusalema me Abacitige

(Matayo 21:1-11; Mareko 11:1-11; Yoane 12:12-19)

²⁸ Yeesu peei mene jejemige, piba teeme niinăce gaabe me ädige Yerusalema gaabe cabu.

²⁹ Tabe liba mameta atyaramta neenenı matimati cewe cabu me, ngii Betepage piıyepu Betaniya, lui puga ge Olibi Uli podo cabu jage, teeme neenenı abiberăja băgră bine niinăce gaabe me jăätyepige.

³⁰ Camuge ätyepa tabe teebibine jaajige egă, “Äte, iclege niinăce gaabe me, lui cewe peese. Weene liba abaciteniye, piba jepăneniye mamye dongki ne ägrărăneji gyene, pui papa cabu biname te camu ge adnata. Peei ne tiıbirepeye, aima secanepeye.

³¹ Biname te liba weebibine itemlenige egă, ‘Ngenome jııbireniye?’ piba teebine jejepeye egă, ‘Yageyame te singi gyene teeme tăăpume.’ ”

³² Siıge, teepi aalige, iyeta gwıdape bine ibibi jepănemăsi Yeesu lipu jaajige.

³³ Egă căro teepi pui mamye dongki ne jııbirăsi, dongki yageyame cina teebibine äätemlisi egă, “Weene dongki ne ngeno me jııbireniye?”

³⁴ Teepi piba jejemăsi egă, “Yageyame te singi gyene teeme tăăpume.”

³⁵ Siıge, teepi mamye dongki ne Yeesu bau me ecanăsi, teeme căbletăäpe bine papa cabu eretnemăsi, Yeesu ne piba itıtyărăsi acenutame mamye dongki papa cabu.

³⁶ Yeesu liba ädenige, biname cina teeme căbletăäpe bine gaabe cabu eretnemisi teeme otni tăăpume.

³⁷ Tabe liba Yerusalema mameta me tatyaramtige Olibi Uli podo cabu ca, gaabe te luma tăinige Yerusalema abacıtame, puga teeme bucurage abiberăja băgră cina gije abacıtınisi Acejiyame ne eso ceerame gege cama, piıyepu teebine babo tage ca ewepyerăjisi iyeta miıjırage ciıtaca mule tăăpume, teepi lui bine ituge păpăna Yeesu bau ca.

³⁸ Teepi jııcemisi egă, “Acejiyame te cime mope biname miıji naawenege lui te Yageyame me ngii cabu tădenite! Mime poode pisi nyene cabucewe je. Acejiyame lui caburage gyene, jamyacu apacıyera te tăduge teeme cabu ca.”

³⁹ Piba poto Parısea sigu biname pui tomi cabu ca Yeesu ne jejisi egă, “Abiberăja Biname, määme băgră bine jejemi bojă agıme!”

⁴⁰ Yeesu teebibine jejemige egă, “Cane weebibine jııneninıne egă ai biname liba bojă äbitınınisi, piba gaabe wajwa lui kula cina ala pa labayıpesi!”

Yeesu Ele Engenige Yerusalema Cewe Biname bime tăăpume

⁴¹ Yeesu babo cewe Yerusalema mametarage me ädige, cewe ne liba jepănige, tabe owecu cama ele engenige pui cewe biname cina lipu măpu ne ciıge cirege păpăna.

⁴² Tabe jııcemige egă, “Yerusalema cewe biname, miıji page weene umle cama icrajeji lipu gyene poode ne păpăname, yepă page ämlităneji gyene weeme păpăna cabu ca!”

⁴³ Yoo, bimu cina cire saaclepi weeme cubuyame cina piba weebibine cire jiwa-clomtıpesi; teepi gawe ca caale cire jaawenepesi, iyeta poto ta pepu weeme bau me cire saaclenepi.

⁴⁴ Teepi weeme cewe ne pa jııbyagecepesi cuta piıyepu iyeta biname bine cewe caale ngalebora lui cina yaacrajuge; licarage yepă raranga kula ne teeme puupu cabu cire yaabmalepesi, ingle weene padare ne lica opo ewatneniye Acejiyame liba weeme bau me otni weebibine niıya cabu ca äsecrerame.”

Yeesu Ädige Iiwăreja Mete me

(Matayo 21:12-17; Mareko 11:15-19; Yoane 2:13-22)

⁴⁵ Yeesu ädige iıwăreja mete caale ngalebora me, puma gije abacıtige aletnaletna biname bine äyecrejame,

⁴⁶ teebibine jejemige egă, “Acejiyame te jııcenige Oogărăneji mene cabu egă, ‘Căme mete lui irecu ätumuta mete tăăpume cirege lenaja,’ yepă weene te itu setatrongărumeıye epu puupu me eromaame cina luma lämletnerăjıınınisi!”

⁴⁷ Yoo, piba iyeta bimu gaabegabe Yeesu biname bine yaabiberăjemuge iıwăreja mete caale bora puutucu je. Modamoda iıwăreja biname, cotre abiberăja biname, piıyepu nuıja mope biname cina singi ge teebine aglıme,

⁴⁸ yepă teepi padare ne lica jepănisi peei ne wawename, ingle iyeta biname cina baborage singi teeme mene ätecıjame.

20

Ätemla Yeesu me Conocăco poto cidi me Tabe Mule bine Wawenecame

(Matayo 21:23-27; Mareko 11:27-33)

¹ Nuuja bimu, Yeesu liba puga ge iiwäreja mete caale bora je biname bine ebiberäjemige piyepu Mijji Mene jejananemige, piba modamoda iiwäreja biname piyepu cotre abiberäja biname cina nuuja modamoda biname cama teeme bau me seclige,

² jejisi egä, “Cibibine nijini, mäame ngena conocäco pisi nyene ai mule bine wawenecame? Laati bau ca gyene mäame conocäco?”

³ Yeesu jejemige egä, “Yoo, căme ätemla cuta pisi nyene weeme täápume. Cebine najeye,

⁴ laati te Yoane ne conocäco yääcärepi tabe biname bine nüye ca äcisejame, Acejiyame te coo nää biname bine?”

⁵ Siige, teepi teemeteme mene jitranisi egä, “Mine lipu jejenisi? Mine liba jejenisi egä, ‘Yoane me conocäco lui Acejiyame bau ca gyene,’ tabe piba nijeninini egä, ‘Cije weene ngena name pi piba Yoane ne lica jäätrungepeye?’

⁶ Yepä, mine liba apu jejenisi egä, ‘Yoane me conocäco lui biname bime cabu ca gyene,’ piba ai biname tomi te mibibine kula ca nibyecrininisi, ingle teepi jitru-ngenisigi egä Yoane lui Acejiyame me mename biname ge.”

⁷ Siige, teepi Yeesu ne jejisi egä, “Cine umle lica gemi laati te Yoane ne conocäco yääcärepi biname bine nüye ca äcisejame.”

⁸ Yeesu teebibine jejemige egä, “Piba cane cuta weebibine lica jijenininine laati te cebine conocäco näcärepi ai mule bine wawenecame.”

*Ngene ca Agli Mene Calwacupi Ire Atwi Biname bime poto cidi me
(Matayo 21:33-46; Mareko 12:1-12)*

⁹ Yeesu piba biname bine ai ngene ca agli mene jejemige egä, “Yepä biname te waina gije bine itemige. Tabe kaakesea biname bime ime cabu ecitige ire atwime, kämäge gaabegabe teepi te poto kuu teebine ceeraname. Tabe piba teeme gawe ne sebmalige leca padare cama.

¹⁰ Yoo, padare liba tatyaramtigi waina kuu ngade awacame, tabe pui yageyame te kaakesea bägrä ne jityepige teeme poto kuu bine waadena calwacupi ire atwi biname cabu ca. Yepä, pui calwacupi ire atwi biname cina pui kaakesea bägrä ne etemeläjisi, piba ime taatu jityepisi teeme babo biname bau me.

¹¹ Calwacupi yageyame te piba nuuja kaakesea bägrä ne cuta jityepige, siige calwacupi ire atwi biname cina cuta teebine etemeläjisi, ajiri me jewenisi, piba cuta ime taatu jityepisi.

¹² Calwacupi yageyame cuta nuuja kaakesea bägrä ne jityepige; siige, pui calwacupi ire atwi biname cuta teebine nüya jewenisi, calwacupi cabu ca piba iyecräjisi.

¹³ Piba calwacupi yageyame te jüicige egä, ‘Cane ngena pa jaawenepene? Căme ngenecurage bägrä ne pama mijji cane ätyepa. Teepi pama teebine opo gaabe me ecitenisi.’

¹⁴ Yepä, calwacupi ire atwi biname cina yageyame me bägrä ne liba jepänisi, piba teemeteme ajananinisi egä, ‘Age sena yageyame me bägrä. Tabe te ai calwacupi ne cire yaacatepi. Mine pa yaaglesi, siige calwacupi mime yene.’

¹⁵ Siige, teepi puma cita ca pui bägrä ne calwacupi cabu ca iyeblyngtisi, piba budre me eglisi.”

Yeesu piba itemlemige egä, “Siige, Pui calwacupi yageyame te ngena ne pa jaawenepi calwacupi ire atwi biname bime täápume?”

¹⁶ Tabe pa tädepi, pui biname bine budre me pa yaaglecemepi, piba teeme calwacupi ne nuuja biname bine pa jaajemepi ire atwime.”

Siige, biname cina liba peei mene itecijemige, jüicisi egä, “Peei te pepu gone äbita!”

¹⁷ Yeesu piba teebibine ire jetwemige, itemlemige egä, “Piba ngena gyene ai Oogäräneji Mene me aboclomta? Mene egä:

‘Lui kula ne raranga biname cina jigiyisi,

baborage bäbitige iyeta nuuja cabu ca.’

¹⁸ Cane säne pui kula piyepu iyeta biname lui cina căme papa cabu pa yaatrametnemepesi, teepi cuta pa laglemeläjipesi. Căme kokre te liba yepä biname cabu kula pana pa saatramepi, pui biname te secre pana pa lapliweräjepi.”

*Ätemla Täks Rarekaake Cera poto cidi me
(Matayo 22:15-22; Mareko 12:13-17)*

¹⁹ Siige, cotre abiberäja biname piyepu modamoda iiwäreja biname cina singi Yeesu ne puirage padare cabu oomlaname, ingle teepi opo ewatnisi egä peei ngene ca agli mene lui teeme poto cidi me. Yepä teepi biname täápume wälu ge, ingle peei biname tomi te singi ge Yeesu täápume.

²⁰ Teepi peei name pi teebine ire ca ecananisi, piyepu teeme poto biname bine jityepemisi Yeesu bau me sinäme abiberäjame. Teepi singi Yeesu ne teeme mene cabu ca oomlaname, piba Rooma cabu ca mope biname me kokre ime cabu acitame.

²¹ Peei name pi pui sinäme abiberäja bāgrā cina Yeesu ne itemlisi egä, “Abiberäja biname, cine umle gemi mäāme mene piyepu abiberäja lui conocāco gyene. Cine umle gemi egä iyeta biname lui yepä pana gemi mäāme opo gaabe je, lica nuuja te baborage, yepä maane iyeta biname bine toraca mene yaabiberäjemute Acejiyame me gaabe poto cidi me.

²² Yoo, maane cibibine nijini, nää miiji gyene cine täks rarekaake Rooma Babo Mope Biname Siisa ne ceerame, coo miiji lica gyene ceera?”

²³ Yepä, Yeesu opo ewatnige egä teepi singi teebine mene cabu ca oomlaname, siige teebibine jejemige egä,

²⁴ “Yepä bulubulu rarekaake secani! Laati me opo piyepu laati me ngii, laati me cewecu pisi nyene ai rarekaake cabu?”

Teepi jejisi egä, “Siisa teemi yene.”

²⁵ Yeesu piba jejemige egä, “Yoo, lui gwidape gemi Siisa me, teebine ecäreye pui, piyepu lui gwidape gemi Acejiyame me, teebine ecäreye pui.”

²⁶ Siige, teepi äblicāco teebine teeme mene cabu ca oomlana puma biname bime sobe cabu. Siige, teepi mutäcāco äbitinini Yeesu me mene name pi, bojä jegemige.

Ätemla Mene Budre cabu ca Arpinera poto cidi me

(Matayo 22:23-33; Mareko 12:18-27)

²⁷ Piba poto Sadukea sigu biname cina Yeesu bau me seclige. Yoo, Sadukea biname cina apu jicusi egä, “Biname cina lica budre cabu ca cirege arpinera.” Yoo, teepi Yeesu ne itemlisi egä,

²⁸ “Abiberäja biname, Moose te cotre ne mime täापume soogäruji egä, ‘Biname te liba budre läbituge, coga ne bāgrā cāco twaabmaluge, teeme igane te miiji cuubla ne acata bāgrā wawename teeme naane me ngii täापume.’

²⁹ Yoo, seben naniganewale icrajuji. Naane te coga ne ocatige, siige bāgrā cāco budre äbitige.

³⁰ Piba teeme gomecayame igane te pui cuubla ne ocatige, siige bāgrā cāco cuta budre äbitige.

³¹ Pepu cuta äbitige puma cita ca gomeyame täापume, piyepu iyeta teeme iganewale bime täापume, iyeta seben teepi budre äbitinini bāgrā cāco.

³² Ingwe ca pui magebi te cuta budre äbitige.

³³ Yoo, pui bimū cabu budre biname cina liba cirege arpinera ireclotame, piba tabe laati me coga cirege lenaja, ingle iyeta pui seben nanigane cina teebine ocananisi teeme coga täापume?”

³⁴ Yeesu teebibine jejemige egä, “Yoo, ai gawecewe ireclota cabu magebi rooriye cama lawadrinusi.

³⁵ Yepä, pui magebi rooriye lui cina ibibi gemi cirege arpinera ciige ireclota cabu lenajame, teepi puma lica awadrecā,

³⁶ cuta puma biname cina lica budre cirege äbita. Teeme ireclota lui Acejiyame me mename seemo pana budre cāco. Teepi Acejiyame me bāgrā gemi, tabe lui bine ituge budre cabu ca arpinera ten cama iyeteta lenajame.

³⁷ Yoo, Oogärāneji Mene, Moose lui itu soogäruji, peei cabu mene cuta pisi nyene budre biname me arpinera poto cidi me. Pui padare cabu Moose te jeclajutuji ayeji uli gome, tabe mime Yageyame me mene itecijuji, ingwe ca yoogäruji egä, ‘Cane Abrahamo, Isacako, Yakobu naabibime Acejiyame gāne.’

³⁸ Yoo, Acejiyame lui ireclota cama biname bime Acejiyame gyene; tabe lica budre biname bime Acejiyame, ingle biname cina lica iyeteta budre, yepä iyeta biname täापume ireclota cuta pisi nyene.”

³⁹ Puma cita ca poto cotre abiberäja biname cina jejisi egä, “Abiberäja biname, maane miiji tiicite!”

⁴⁰ Yoo, pui padare cabu ca biname cina singi lica teebine cääri ätemlejame.

Keriso Laasi Nyene

(Matayo 22:41-46; Mareko 12:35-37)

⁴¹ Yeesu teebibine jejemige egä, “Biname cina lipu jicemusi egä, ‘Keriso biname bine lui te niija cabu ca cire yäāsecräremepi, tabe Daawida me ingle cabu ca pa tädepi?’

⁴² Yepä, Daawida teemāmu jicēnige Salamo uupera peba cabu egä, ‘Yageyame te cāme Yageyame ne jejuji:

Maane adnati cāme camu poto cidi ca,

⁴³ ngālu cane mäāme cubuyame bine

mäāme ernge gawe me cire yaacranemepene.’

⁴⁴ Yoo, Daawida teebine einuji teeme Yageyame ca. Cije Keriso te piba lipu Daawida me kaakesaare gyene?”

*Yeesu Umle Mene Jejananemige Cotre Abiberäja Biname bime Mule poto cidi me
(Matayo 23:1-36; Mareko 12:38-40)*

⁴⁵ Iyeta biname cina liba Yeesu me mene jitecijiisi, tabe teeme abiberäja bägrä bine jejemige egä,

⁴⁶ “Cängena ire cotre abiberäja biname bime täöpume. Teepi singi gemi teeme lecaleca cäbletääpe cama otnetnejame, piyepu biname bime bau ca awabla piyepu awepyeräja päpäna aletna puupu cabu. Teepi singi gemi modamoda biname bime puupu cabu adnaterame abasecretna mete cabu, cuta piyepu soriyomu ne liba yaaclitusi, teepi ladnatärüge miijirage puupu cabu.

⁴⁷ Teepi cuublacubla bine baborage rarekaake ngälu yääcäremusi, pepu pi teeme gwidape piyepu mete iyeta jäämlemusi, piba teepi lecaleca irecu ätumuta jaawenemusi biname bime sobe cabu. Yoo, teepi teeme mage mäpu daremu ne cirege päpäna!”

21

*Cuubla me Owecu Gwidape
(Mareko 12:41-44)*

¹ Yeesu ire acitige, jepänemige dogwe biname bine lui cina rarekaake ebäcnemisi iiwäreja mete rarekaake acrana gwidape cabu.

² Tabe piba yepä owecumete cuubla ne jopänige lui te neeneni matimati rarekaake ääsinglantige pui rarekaake acrana gwidape cabu.

³ Siige, tabe abiberäja bägrä bine jejemige egä, “Cane toraca mene jijenininine, ai owecumete cuubla te baborage becitige iyeta pui nuuja biname cabu ca.

⁴ Pui nuuja biname bime rarekaake lui bucurage gemi, piyepu peei cabu ca teepi poto bine ecärisi, yepä cuu-bla te becitige iyeta teeme lui pisi nyene lenaja täöpume.”

*Yeesu me Mene Iiwäreja Mete Iigareca poto cidi me
(Matayo 24:1-2; Mareko 13:1-2)*

⁵ Poto abiberäja bägrä cina mene abaitninisi iiwä-reja mete poto cidi me egä pui mete me opo jamyacu ge, oplacmeläja kula ca rarangä-neji ge, piyepu biname cina miijimiji gwidape Acejiyame ne ituge ceera peei mete cängena waweneme. Yeesu piba teebibine jejemige egä,

⁶ “Weene ire iyeta ai miiji-miji gwidape, padare te cirege atyaramta liba iyeta ai kula bine teeme puupu cabu ca cirege äyebenga. Yoo, iyeta cirege iisabeja.”

*Mäpu cina Lipu Cirege Otni
(Matayo 24:3-14; Mareko 13:3-13)*

⁷ Abiberäja bägrä cina teebine itemlisi egä, “Abiberäja biname, ai mule te liba pagege äbita? Mine lipu peei padare ne pagege opo awatna?”

⁸ Yeesu jejemige egä, “Cängena ire! Piba nuuja te lica weebibine ingletnäjinuge, ingle bucurage biname cina cäme ngii cabu pa twaatnipesi, mene pa jiiicemepesi egä, ‘Cane age säne tabe!’ coo piyepu, ‘Padare bii tatyaramtigi!’ Yepä, pepu biname bime mene gone jättecijemuye.

⁹ Cuta piyepu, weene liba idre pa itecijanipi egä, ‘Biname cina teeme mopeyame ne cubu cama iyebingitisi,’ coo, ‘Biname cina cubu jiiicenisi,’ piba wälu gone läbitininuye. Pepu mule pa läbitipesi, yepä ai padare me ngälugaabe cäro camu gyene.”

¹⁰ Tabe piba jejemige egä, “Yepä gawe biname cina nuuja gawe biname cama cubu cire jiiicemepesi, piyepu yepä mope biname te nuuja mope biname cama cubu cire jiiicemepesi.

¹¹ Modamoda ocneja piyepu gane padare cina cewe maramara cabu ta cire twaatnipesi. Niya pita cina cire twaatnipesi biname bine oomläjecame. Wälu cama cewecu gwidape dume cabu cirege aboclomäja.

¹² Yepä, ai mule cina liba camu ge äbitena, peei niinäce gaabe me, biname cina weebibine pa joomläjicipesi, mäpu cabu pa icranipesi. Teepi weebibine maramara abasecretna mete cabu pa iwadipesi atrana täöpume, piba krokeciye mete bora pa ibäcnipesi. Weene mope biname piyepu nuuja modamoda biname bime opo gaabe pa jicläjutipi cäme ngii name pi.

¹³ Piba peese nyene weeme padare Miiji Mene teebibine jajaneneme.

¹⁴ Yoo, weeme ngene atwanena yaacituye, piba bucurage maramara ngene atwanena gone pui padare cabu egä ngena mene teebibine awecnistame,

¹⁵ Ingle cane te umle piyepu mene pa icäripene. Piba iyeta weeme cubuyame cina äblicäco pui mene aina, coo äseblecäja.

¹⁶ Yoo, weeme ätrunga cäco inglewale piyepu binamewale cina weebibine weeme cubuyame bime ime cabu pa icäripesi, lui cina weeme poto bine cuta budre me pa yaaglecemepesi.

¹⁷ Iyeta biname weebibine pa jimugetnipesi weeme cäme bau ätrunga name pi.

¹⁸ Yepä, teepi äblicäco weeme ireclota papa acata Acejiyame liba singi lica weeme budre tääpume. Teeme kokre epu baborage gyene egä tabe ibibi cuta iyeta weeme edingäli cängena ire atwime.

¹⁹ Peei name pi weeme ätrunga cabu cängena jiclajutinuge ngälu weene iyeteta ireclota cabu äbäcname.”

Yeesu Cerämu Mene Jejemige Yerusalema ne Iigareca poto cidi me

(Matayo 24:15-21; Mareko 13:14-19)

²⁰ Yeesu jejemige egä, “Yoo, weene liba bucurage cubu biname bine cire jepänemepeye Yerusalema cewe ne jewaclomäjénisi, piba weene umle gemi egä padare te mameta me täbitenige pui cewe ne iigarecame.

²¹ Piba pui biname lui cina Yuudea gawe cabu icrajininige, teepi miiji podo cabu me uucratna; piyepu lui cina babo cewe cabu icrajininige, teepi miiji cewe abmala; piyepu lui cina babo cewe kaake poto je icrajininige, teepi miiji lica cewe me äbäcname, yepä cudecewe me miiji uucratna.

²² Ingle pui padare cabu Yerusalema cewe biname cina mäpu daremu cirege päpäna, piba Oogäräneji Mene te ibibi me cire läbitepi.

²³ Ogi nemi pui padare cabu lui mäpumäpu magebi piyepu bägrä ngame meeramera magebi. Mage mäpu padare cire tädepi ai gawecewe cabu me; ai biname cina mäpu daremu cire jääpänepesi.

²⁴ Cubuyame cina poto bine cubu turikä ca cire yaaglecemepesi, piyepu nuuja bine ätäyäneji cire jäätyepäjemepesi iyeta gawe maramara cabu me. Siige, nuuja gawe biname cina Yerusalema cewe ne cire yiiglicnäjepesi, piyepu pui gawe ire jaatwepesi, ngälu pui biname bime padare cire lapirepi.”

Yeesu me Acnenuta poto cidi me

(Matayo 24:29-31; Mareko 13:24-27)

²⁵ Yeesu piba jejemige egä, “Maramara cewecu cina cire tateplengäjipesi bimu cabu, piyepu mabye, wale cabu je. Ai gawecewe cabu, maramara gawe biname cina ngenecu niija cire läbitipesi. Teepi wälu name pi cuta mutäcäco cire läbitipesi, malu te liba uule munwämu cama cire tädepi, cuta piyepu gobe gotäte te babo uule kuu ne cire saacanepi.

²⁶ Yoo, poto biname cina irecu cire laboclomäjipesi wälu name pi, teepi liba cire jääpänanepesi lui niija cina totninisi gawecewe iyeta poto ta. Ingle dume cabu ljalija kokre gwidape piti nemi, pui bine teeme otnetneja gaabe cabu ca cire yääyecräjemepi.

²⁷ Piba cane säne lui te Acejiyame bau ca tädujine, biname me äbitujine, cane piba carbe cabu cire täinepene baborage kokre piyepu jamyacu apacıyera cama.

²⁸ Yoo, ai mule cina liba cire gije labacitipesi, piba weene abujängipeye, piyepu mope ewepengäjemepeye, ingle weeme äsecrera piba mameta gyene Acejiyame bau otnime.”

Ngene ca Agli Mene Piigi Uli poto cidi me

(Matayo 24:32-35; Mareko 13:28-31)

²⁹ Yeesu teebibine piba ai ngene ca agli mene jejemige egä, “Jepänemeye piigi uli piyepu iyeta nuuja uli bine.

³⁰ Kirece laame cina liba täsuge, weene piba umle egä kämäge mameta birige.

³¹ Pepu pana weene liba pui mäpu mule bine cire jääpänemepewe, weene piba umle cirege äbita egä Acejiyame me biname bine waadena padare te mameta gyene.

³² Cane weebibine toraca jijenininine egä biname lui cina ireclota page ai taje, teepi iyeta budre lica cirege äbita, ngälu iyeta ai mule cina liba cire läbitipesi.

³³ Yoo, dume piyepu gawe cirege apira, yepä cäme mene te lica cirege apira.”

Yeesu Jejemige egä Ireire Lenajame

³⁴ Yeesu cuta jejemige egä, “Weene ireire inajipi! Miiji lica cäme acnenuta bimu te weebibine buduma mule cabu oomlaname. Weeme ngene atwanena gone acrana singisingi mule cabu, coo sice nänäja cabu, coo piyepu ngenecu mäpu cabu ai gawecewe me gwidape poto cidi me. Piba pui bimu te weebibine lica buduma mule cabu ädära mage, cuta piba dici pana weebibine pa jibrecipi.

³⁵ Ingle pui bimu te cire tädepi iyeta biname bime bau me lui cina ai gawecewe cabu yaacrajuje.

³⁶ Peei name pi ire cama cängena inajipi, piyepu Acejiyame ne yaawejanuye kokre ceerame iyeta pui gwidape cabu ca cängena äsecrera, piba cäme opo gaabe je aclajutäjame, cane lui te Acejiyame bau ca tädujine, biname me äbitujine.”

³⁷ Siige, pui poto bimu gaabegabe Yeesu biname bine yaabiberäjemuge iiwäreja mete caale bora je. Ciye liba, tabe babo cewe cabu ca tasatuge Olibi Podo cabu lenajame.

³⁸ Kroke gaabegabe, iyeta biname cina iiwäreja mete me cuta yaacluge teeme mene ätecijame.

22

Gläamu Jecijemige Yeesu ne Aglime

(Matayo 26:1-5; Mareko 14:1-2; Yoane 11:45-53)

¹ Trii padare mameta ge Israela biname cina liba uutneca cäco buluduu bine yäärwäjemus, lui deedei teepi Äsuplengta Trii ca yaainusi.

² Yoo, iiwäreja babo biname piyepu cotre abiberäja biname cina singi gaabe ne päpäname Yeesu ne aglime, yepä biname bime name pi wälu, teepi singi ogä oomlaname.

Yuuda Mene Jewenige Yeesu ne Awabame Budre tääpume

(Matayo 26:14-16; Mareko 14:10-11)

³ Yuuda lui yepä ge Yeesu me twelb abiberäja bägrä cabu ca, teeme nuuja ngii Isakariyota. Satani te Yuuda me ngalebora me abacitige.

⁴ Tabe piba modamoda iiwäreja biname piyepu iiwäreja mete awamuta mope biname bime bau me ädige, ten cama mene jicemige lipulipu Yeesu ne teeme ime cabu acitame.

⁵ Siige, teepi gege ge teeme ätityera tääpume, mene jejisi rarekaake daremu teebine ceerame.

⁶ Yuuda teeme mene ecatige, miijirage padare ne jirngige Yeesu ne teeme ime cabu acitame, biname sobe liba lica ge.

Yeesu Teeme Neeneni Abiberäja Bägrä bine Jäätpepige Äsuplengta Trii Wawename

⁷ Teepi uutneca cäco buluduu bine yäärwäjimus seben bimu ngalebora, siige pui padare me niinäce bimu te tädige teepi liba maamoi plongo bine yaaglecimusi Äsuplengta Trii deedei wawename.

⁸ Yeesu te Peteru naabi Yoane jaajige egä, “Weene iclege mime deedei amacetnäjame Äsuplengta Trii tääpume.”

⁹ Teepi teebine itemläsi egä, “Maane singi cine ai deedei ne luma wawename?”

¹⁰ Tabe jaajige egä, “Cängena nätecijeye. Weene liba babo cewe me abaciteniye, piba weene biname ne jepäneniye niäye iitana cabu ca lui te tacnenige. Weene teebine ingwe icwepeye, tabe lui mete me abacitenige, weene peei mete me cuta abacitepeye,

¹¹ pui mete yageyame ne jejepeye egä, ‘Cime mene pisi nyene Abiberäja Biname bau ca egä: Puupu lese nyene cane cäme abiberäja bägrä cama Äsuplengta deedei äbitame?’

¹² Tabe piba baborage cabu puupu ne jiwabenige lui iyeta gwidape cama gyene. Weene puma deedei emacetnäjemepeye!”

¹³ Siige, teepi aaclige, iyeta gwidape ibibi jepänemäsi Yeesu lipu teebibine jaajige. Teepi puga äsuplengta deedei ne emacetnäjäsi.

Yeesu Teeme Abiberäja Bägrä cama Aareto ne Erwige

(Matayo 26:26-30; Mareko 14:22-26; 1 Korinito 11:23-25)

¹⁴ Yoo, padare liba tatyaramtige, Yeesu dade gome adnatige teeme twelb ätyepäneji biname cama.

¹⁵ Tabe teebibine jejemige egä, “Cane baborage singi ai Äsuplengta deedei weene cama äbitame. Cane ebä jepänenine mäpu padare ne, yepä niinäce cane weene cama deedei äbitenine.

¹⁶ Cane weebibine jijenininine egä cane ai äsuplengta deedei ne ingwe ca lica pa yaarwepene ngälu teeme aboclomta toraca me cire läbitepi, cane liba biname bine niäya cabu ca äsecerame, Acejiyame me waadena cabu äbäcname.

¹⁷ Yeesu kwäye ne ecatige, Acejiyame ne eso ecärige, piba jejemige egä, “Weene ecateye, iyeta eneye.

¹⁸ Yoo, cane weebibine jijenininine egä cane waina niäye ne cuta cääri lica pa yaanepene ngälu padare te cire tatyaramtepi Acejiyame te biname bine waadename.”

¹⁹ Tabe piba buluduu ne ecatige, Acejiyame ne eso ecärige, itrecige, teebibine ecäremige, jejemige egä, “Ai lui cäme tääpe gyene lui weeme tääpume budre äbitenine. Erweye, cebine ngene apecname.”

²⁰ Deedei ingwe ca, tabe yepä pana mule ca kwäye ne ecatige, jejemige egä, “Ai kwäye te klaje jecnenige weeme tääpume Acejiyame lui kirece mene ituge jaji biname bine niäya cabu ca äsecerame, cäme uudi liba tapirenige.

²¹ Yepä, ire! Biname lui te cebine cäme cubuyame bime bau me nawabenige, tabe age sena mine cama ai dade cabu.

²² Yoo, cane lui te Acejiyame bau ca tädujine, biname me äbitujine, cane budre me ädenine, ingle Acejiyame te singi gyene cane peei ne wawename. Yepä, mage mäpu gyene teeme tääpume lui te cebine cubuyame bime tääpume nawabenige!”

²³ Siige, abiberäja bāgrā cina teemeteme ätemlājinisi egā, “Mime tomi cabu ca laasi nyene, lui te peei ne jewenenige?”

Toraca Babo Biname Lipu Gyene

²⁴ Abiberäja bāgrā cina jicelisi egā teeme cabu ca lui te babo biname me pagege äbita.

²⁵ Yeesu peei name pi jeemige egā, “Ai gawecewe mope biname cina teeme biname bine babo kokre cama ire jaatwemusi, piyepu biname cina teebibine yaainemusi ‘Babo Ätityera Biname.’

²⁶ Yepä, gone teeme pana mule ne yaacatuye. Eewe, weeme cabu ca laasi nyene baborage, tabe miiji matikolā pana äbita, piyepu weeme babo biname tabe miiji kaakesea bāgrā pana lenajame.

²⁷ Yoo, laasi nyene baborage ai neeneni cabu ca, nāā biname lui te ladnatuge deedei äbitame, coo biname lui te deedei teeme bau me yaawaduge? Yoo, tabe sine baborage lui te ladnatuge, yepä cane lui weeme tääpume epu pana gāne weeme kaakesea bāgrā liiyepu.

²⁸ Yoo, weene cebine lica ituge abmala mine liba mäpu bine jääpānanemepesi,

²⁹ cuta epu pana cāme Babe te lipu cebine conocāco ituge ceera cane biname bine waadename, cane cuta pepu weebibine conocāco cirege ceera weene biname bine waadename.

³⁰ Weene piba cabucewe je cāme dade cabu deedei cirege äbita piyepu niye nānāja cāme waadena padare cabu. Weene babo puupu cabu cire adnatāripeye Israela biname bime twelb ingle biname bine atraname.”

Yeesu piyepu Peteru

(Matayo 26:31-35; Mareko 14:27-31; Yoane 13:36-38)

³¹ Yeesu jejige egā, “Simona, Simona, cebine näteciiji! Satani teeme singi bii jepānige weebibine iyeta apicetnerame, epu pana calwacupi biname te kuu bine mälwā lipu jäämlecājemuge miiji kuu taatu waadename.

³² Yepä, Simona, cane cuta määme tääpume ituge awejena egā maane lica määme ätrunga ne abma-lame. Maane liba pui apicetnera cabu ca pa tacnenutepete, piba maane määme binamewale bine cuta ngenecu kokre jewenemepi.”

³³ Peteru jejige egā, “Yageyame, cane amacetnājāneji gāne maane cama otnime krokeciije mete cabu me, coo budre äbitame.”

³⁴ Yeesu piba jejige egā, “Peteru, cane meebine naajenine egā maane cebine nesae gääbu nainenite, paulo te ingwe ca ala sengenenige.”

Yeesu Abiberäja Bāgrā bine Umle Mene Jejemige egā Äsädeca te Teeme bau me Pa Tädepi

³⁵ Yeesu piba teeme abiberäja bāgrā bine itemlemige egā, “Pui niinäce padare cabu, cane liba weebibine jityepäjiipene rarekaake cāco, bulu diiba cāco, cuta piyepu ernge gwidape cāco, nāā weeme singi puga ge nuuja gwidape tääpume?”

Teepi jejisi egā, “Cine singi lica ge nuuja gwidape tääpume.”

³⁶ Yeesu jejemige egā, “Yepä, page laati me bulu diiba piyepu rarekaake piti nemi, tabe miiji ten cama waadena. Piyepu cuta laati te cubu turikā cāco gyene, tabe miiji aletname teeme acwaba cābletääpe ca.

³⁷ Cane weebibine jijenininine egā Oogārāneji Mene te cāme poto cidi me miiji ibibi äbitame egā, ‘Teebine ecitenisi conoco biname cama yepä.’ Yoo, ngena mene cāme poto cidi me oogārāneji gyene, toraca me äbitenige.”

³⁸ Abiberäja bāgrā cina piba jejisi egā, “Yageyame, age tegi neeneni cubu turikā.”

Tabe jejemige egā, “Siige, ibibi gyene!”

Yeesu Olibi Uli Podo cabu Ireco Ätumutige

(Matayo 26:36-46; Mareko 14:32-42)

³⁹ Yeesu piba cewe ne sebmälige, Olibi Uli podo cabu me ädige, teeme bimu gaabegabe mule lipu ge. Teeme abiberäja bāgrā cina teeme ingwe ca eclige.

⁴⁰ Tabe liba teeme singi puupu ne joomlige, piba teebibine jejemige egā, “Acejiyame ne ewejaneye egā weene apicetnera cabu ca lica pagege atrametna.”

⁴¹ Tabe piba matikolā äyeblyngtige teeme bau ca, epu pana kula me ajara leca liiyepu. Tabe kokorare ääpednutige, Acejiyame ne ewejanige egā,

⁴² “Cāme babe, maane liba singi gāte, ai mäpu ne iyeblyngti cāme bau ca, yepä gone jaawenute cāme singi ne, määme singi ne jewenepi.”

⁴³ Piba mename seemo te cabucewe ca teeme bau me taboclomtige teebine kokre ceerame.

⁴⁴ Yeesu baborage ngenecu mäpu cama ewejanige. Teeme mlage cina uudi ipecu pana sitrametnemige gawe cabu.

⁴⁵ Tabe liba abujängtige teeme irecu ätumuta cabu ca, teeme abiberäja bägrä bime bau me liba ädige, teebibine ute cabu jepänemige, ingle teepi mage ngenecu mäpu ge.

⁴⁶ Tabe teebibine jejemige egä, "Weene ngena ute gemi? Arpinäreineye, Acejiyame ne ewejaneye egä weene apicetnera cabu ca lica pagege atrametna."

Yeesu ne Joomlisi

(Matayo 26:47-56; Mareko 14:43-50; Yoane 18:3-11)

⁴⁷ Yeesu liba peei mene cabu jage, piba taatu biname sange te tatyaramtige. Pui biname, ngii Yuuda, lui yepä ge twelb abiberäja bägrä cabu ca, tabe te opo jewenemige teebibine. Tabe Yeesu gome ädige teebine lakace cabu atecname, teeme awabla mule liiyepu ge.

⁴⁸ Yepä, Yeesu jejige egä, "Yuuda, cane lui te Acejiyame cabu ca tädujine, biname me äbitujine, nää maane cebine nawabenite budre me atecna cabu ca?"

⁴⁹ Yoo, Yeesu cama lui abiberäja bägrä cina liba jepänemisi ngena te pa läbitege, teepi jejisi egä, "Yageyame, nää cine müji agleca cubu turikä ca?"

⁵⁰ Puma cita ca teeme yepä te iiwäreja mope biname me kaakesea bägrä ne jemomängtige turikä ca, camu poto tablamne ne jeläcnutige.

⁵¹ Yepä, Yeesu jejemige egä, "Siige ai mule!" Tabe ime ne ecitige pui kaakesea bägrä me tablamne cabu, teebine müji me jewenige.

⁵² Piba pui modamoda iiwäreja biname piyepu poto iiwäreja mete awamuta mope biname, piyepu poto Israela modamoda biname bine, iyeta lui cina seclige Yeesu ne oomlaname, tabe teebibine jejemige egä, "Weene ngenome cubu turikä piyepu gabagaba cama naaclige, epu pana egä cane cubucubu biname gäne?"

⁵³ Yoo, cane weene cama liba nanajuge iiwäreja mete caale bora bimu gaabegabe, weene piba singi lica cebine oomlaname. Yepä, ai lui weeme padare gyene, krokeciye te liba weebibine joomlinige waadename."

Peteru Yeesu ne Jeinige

(Matayo 26:57-58, 69-75; Mareko 14:53-54, 66-72; Yoane 18:12-18, 25-27)

⁵⁴ Siige, teepi Yeesu ne joomlisi, teebine ecanisi iiwäreja Mope Biname me mete me. Peteru cudecewe pana teebine ingwe icwige.

⁵⁵ Poto biname cina muye yuungisi cole puupu cabu puutucu je, puga adnatäreji icrajige, cuta Peteru teeme gome adnatige.

⁵⁶ Yepä mete kaakesea ngulebägrä te teebine jepänige, muye apaclyera cabu adnatäreji ge. Tabe teebine cängena ewatnäjige, piba jüicige egä, "Ai biname te ten cama waatnuge!"

⁵⁷ Yepä, Peteru ainige, jojige egä, "Ngulebägrä, cane umle lica gäne tabe!"

⁵⁸ Matikolä ingwe ca, nuuja biname te teebine jepänige, jejige egä, "Maane cuta yepä teeme tomi cabu ca gäte!"

Yepä, Peteru jejige egä, "Eewe, cane lica!"

⁵⁹ Yepä awa ingwe ca cuta nuuja biname te kokre cama jüicige egä, "Toraca gyene, ai biname ten cama waatnetnäjuge, ingle tabe Galilaya biname gyene."

⁶⁰ Yepä, Peteru te jejige egä, "Maane lui täapume jüicenenite, cane umle lica gäne!"

Tabe liba camu peei mene iicema cabu jage, piba taatu paulo te ala sengenige.

⁶¹ Yageyame te tatatrongtige, Peteru ne conocäco ire jetwige, siige Peteru piba ngene jotwige Yageyame lui mene teebine bii jejige egä, "Page paulo te ingwe ca ala sengenenige, niinäce maane nesae gäabu cebine nainenite."

⁶² Siige, Peteru asatige, mage ele engenige.

Awamuta Biname cina Yeesu ne Niiya Bääclena me Jewenisi

(Matayo 26:67-68; Mareko 14:65)

⁶³ Lui biname cina Yeesu ne jewamutisi, teepi teebine niiya bääclena me jewenisi, piyepu jidnanenisi.

⁶⁴ Teepi teeme irecu icwabisi cäbletääpe ca, piba jejisi egä, "Nijini, laati te meebine noororige?"

⁶⁵ Teepi cuta bucurage nuuja niiya mene ca teebine jicnecisi.

Yeesu Israela Mutre Biname bime Opo Gaabe je

(Matayo 26:59-66; Mareko 14:55-64; Yoane 18:19-24)

⁶⁶ Bimu te liba tacitige, Israela mutre biname, epu egä modamoda iiwäreja biname piyepu cotre abiberäja biname, teepi abasecretnege, piba Yeesu ne ecanisi teeme opo gaabe je aclajutame,

⁶⁷ teebine jejisi egä, "Nijini, nää maane Acejiyame bau ca Keriso säte?"

Yeesu teebibine jejemige egä, “Cane liba weebibine jijenininine, weene lica căme mene ätrunga,

⁶⁸ cuta piyepu, cane liba weebibine itemläjinine, weene lica daremu mene awecnista.

⁶⁹ Yepä, ai padare cabu ca cane lui te Acejiyame cabu ca tädujine, biname me äbitujine, cane Kokre Acejiyame me camu poto ime cabu pa ladnatepene.”

⁷⁰ Teepi iyeta piba itemlisi egä, “Nää maane jüicite apu egä maane Acejiyame me Bägrä gäte?”

Tabeteebibine jejemige egä, “Yoo, weene toraca jüicemiye egä cane tabe säne.”

⁷¹ Teepi piba ajananinisi egä, “Ngänuge mime nuuja aitneja biname. Cine bii nitecijinige tabe lipu teemämu taitnige!” Siige.

23

Yeesu Pilato me Opo Gaabe je

(Matayo 27:1-2, 11-14; Mareko 15:1-5; Yoane 18:28-38)

¹ Siige, pui abasecrenäneji biname iyeta abujängige, Yeesu ne ecanisi Rooma ca Mope Biname Pilato bau me.

² Puga teepi teebine aitneja gije abacitinisi egä, “Cine ai biname ne jepänisi cime biname bine conocono abiberäja cabu ewademige. Tabeteebibine apu jejemige egä täks rarekaake gone ceera Babo Mope Biname Siisa ne, cuta piyepu jejemige egä tabe lui nuuja mope biname gyene, lui me ngii Keriso.”

³ Pilato teebine itemlige egä, “Nää, maane Israela biname bime mope biname säte?”

Yeesu jejige egä, “Yoo, maane peega bii jüicite.”

⁴ Puma cita ca Pilato te modamoda iiwäreja biname piyepu tomi cabu lui biname bine jejemige egä, “Cane lica nuuja ingle ne jepänine ai biname ne mäpu cabu acitame.”

⁵ Yepä, teepi kokre cama Pilato ne jejisi egä, “Teeme mara abiberäja cabu ca Yuudea gawe iyeta poto ta tabe biname bine giri jaacranimuge teeme singi acatame. Tabemene jajanename gije itu labacitepi Galilaya gawe cabu, cuta puma cita ca tädumi aimopo.”

Yeesu Mope Biname Heroda me Opo Gaabe je

⁶ Pilato liba peei mene itecijige, piba itemlemige egä, “Ai, nää Galilaya biname gyene?”

⁷ Tabeliba umle äbitige egä Yeesu lui Galilaya probins cabu ca ge, Heroda luma mope biname täapume enajenige, piba teebine Heroda bau me jityepige, ingle pui padare Heroda cuta Yerusalema cewe cabu enajige.

⁸ Yoo, Heroda te gege äbitige Yeesu ne päpänime, ingle tabemene ituge ätecija Yeesu poto cidi me, peei name pi leca padare cama tabe singi ge teebine päpänime. Tabebabo singi ciitaca mule päpänime Yeesu bau ca,

⁹ siige teebine bucurage mene ca itemläjige, yepä Yeesu nuuja daremu mene lica jewecnistige.

¹⁰ Yoo, modamoda iiwäreja biname piyepu cotre abiberäja biname cina abujängisi, teebine mage kokre mene ca jeitnäjisi.

¹¹ Heroda teeme cubu biname cama piba Yeesu ne niyarage bäaclena me jewenisi piyepu niyaniya mene jüicemisi teeme poto cidi me. Teepi mope biname me sasa cäbletääpe ca esigrisi, teebine pui cama sewecnistisi Pilato bau me.

¹² Yoo, pui bimu cabu Heroda naabi Pilato biname me äbitäsi. Peei niinäce gaabe me teepi cubuyame ge.

Pilato Yeesu ne Budre me Jitrangige

(Matayo 27:15-26; Mareko 15:6-15; Yoane 18:39-19:16)

¹³ Piba Pilato te modamoda iiwäreja biname, mope biname, piyepu iyeta biname bine ala tesoglecemige abasecrename,

¹⁴ teebibine jejemige egä, “Weene ai biname ne secaniye căme bau me, piyepu cebine najiye egä tabe biname bine niya mule bine yaabiberäjemuge lui gemi cotre kaake poto ca. Cane teeme ireclota bii jirngine weeme opo gaabe, yepä lica jepänine nuuja niya ne teeme bau ca iyeta weeme aitneja mene cabu ca.

¹⁵ Cuta Heroda piyepu, tabe nuuja niya ne lica jepänige teeme cabu, peei name pi teebine cuta sewecnistige. Ai biname te nuuja niya ne lica ituge wawena lui ibibi gyene teebine budre daremu ceerame.

¹⁶ Cane peei name pi căme cubu biname bine pa jaajemene teebine adnane, piba asatame.”

¹⁷ Yoo, Pilato iyeta kämäge gaabegabe apu läbitanuge, tabe yepä biname ne krokeciye mete cabu ca saasatuge äsuplengta trii padare cabu, Israela biname cina lui biname täapume singi.

¹⁸ Siige, iyeta biname cina pui tomi cabu ala abayaninisi egä, “Ai biname ne budre me eglepi! Baraba ne sisati cime täápume!”

¹⁹ Yoo, pui biname Baraba te cubu ituge iicana Yerusalema cewe ngalebora cewe mope biname me kaakesea biname cama, cuta piyepu tabe nuuja biname ne ituge agli, pei name pi krokeciye mete bora me itu yaacitepi.

²⁰ Siige, Pilato te singi ge Yeesu ne asatame, peei name pi biname bine cääri jejemige peei poto cidi me,

²¹ yepä teepi jäje ala abayanenisi egä, “Baarge uli cabu jibyecreye; baarge uli cabu jibyecreye!”

²² Yepä, Pilato teebibine nesae me jejemige egä, “Tabe ngena niija ne ituge wawena? Cane teeme cabu nuuja niija ne lica jepänine lui ibibi gyene teebine budre daremu ceerame! Cane cäme cubu biname bine pa jaajemene teebine adnaname, piba pa yaasatene.”

²³ Yepä, pui biname cina ala abayaninisi egä teebine baarge uli cabu toto ca äbyecrame. Siige, teeme kokre mene te ibibi äbitige,

²⁴ Pilato piba mene jejemige biname bime singi wawename Yeesu ne budre me acitame.

²⁵ Teepi lui biname täápume singi, tabe teebine isatige, lui ne cubu name pi piyepu biname agli name pi krokeciye mete bora me acitäneji ge. Tabe Yeesu ne piba teeme ime cabu ecitige teepi teeme singi ne wawename teeme täápume.

Yeesu ne Baarge Uli cabu Jibyecrisi

(Matayo 27:32-44; Mareko 15:21-32; Yoane 19:17-27)

²⁶ Siige, Rooma cubu biname cina Yeesu ne liba ecanisi cewe cabu ca, teepi piba opopa eyisi yepä biname cama, teeme ngii Simona. Tabe Kurene cewe biname ge, lui te babo cewe me tabacitenige calwacupi cewe cabu ca. Yoo, cubu biname cina Simona ne joomlisi, Yeesu me baarge uli ne teeme palace cabu ecitisi, teebine jejisi Yeesu me ingwe ca acaname.

²⁷ Bucurage biname cina Yeesu ne ingwe icwisi. Puga ge poto magebi pui biname tomi cabu lui cina mage ele engenetnemige teeme täápume.

²⁸ Yeesu teeme bau me tatatrongtige, jejemige egä, “Yerusalema magebi, ele gone cäme täápume, yepä weene miiji ele weeme täápume piyepu weeme bägrä bime täápume.

²⁹ Ingle naace gyene padare te cire tatyaramtepi, biname cina piba cire jücemepesi egä, ‘Lipu gege gemi peei magebi lui cina bägrä cäco gemi, lui cina bägrä bine lica jäärngecusi piyepu bägrä bine lica ngame meeramera, teepi page cuta lica teeme bägrä bime mäpu jepänanemisi.’

³⁰ Pui mäpu padare cabu biname cina podo bine cire jaajemepesi egä, ‘Cibibine ni-trugärineyel’ piyepu doro bine cire jaajemepesi egä, ‘Cibibine nicwabärineyel’

³¹ Yoo, teepi cebine liba apu nawenenisi, cate uli pana närgenisi, teepi piba weebibine lipu cire jiwenipesi, weene lui cina maaaje uli pana gemi?”

³² Rooma cubu biname cina cuta nuuja neeneni biname bine aacanisi Yeesu cama yepä padare cabu budre me wawename, yepä pui neeneni lui niiyarage mule biname ge.

³³ Teepi iyeta liba pui puupu cabu me atyarige, ngii Mopekaake, puga Yeesu ne baarge uli cabu toto ca jibyecrisi. Teepi pui neeneni niija mule biname bine cuta uli cabu jääbyecrisi, yepä biname Yeesu me camu poto ca, cuta nuuja teeme säwäci poto ca.

³⁴ Yeesu jejige egä, “Cäme Babe, ai niija mule ne iyeblingti määme ngene atwanena cabu ca, ingle teepi toraca umle lica gemi teepi ngena ne tewenenisi.”

Rooma cubu biname cina matimati kula cabu teeme ngii bine yoogäremisi, piba yiis-abäjemisi pui kula bine umle äbitame egä teepi lipulipu Yeesu me cäbletääpe bine abele-name.

³⁵ Yoo, biname cina ire täápume imyemutemige. Israela mope biname cina teebine niija bääclena me jewenanisi, jejisi egä, “Tabe nuuja biname bine niija cabu ca yääsecräremuge, tabe miiji cuta teemämu ai niija cabu ca asata, tabe liba toraca Acejiyame bau ca jajeji gyene Keriso täápume!”

³⁶ Rooma cubu biname cina teebine cuta niija bääclena me jewenanisi. Teepi teeme mameta me eclige, caapocapo waina niije singi ge ceerame,

³⁷ piba jejisi egä, “Maane määmämu ai niija cabu ca asati, maane liba nää toraca Israela biname bime mopeyame gäte!”

³⁸ Yoo, ai oogära mene teepi ecitisi Yeesu me baarge uli cabu mope gome egä, “Ai biname lui Israela biname bime mopeyame gyene.”

³⁹ Siige, yepä pui niija biname lui Yeesu me wajwa je acitäneji ge, tabe cuta teebine jicnecige egä, “Maane lui Acejiyame me Keriso gäte, nää? Piba ai niija cabu ca asati, cuta piyepu cibibine nisati!”

⁴⁰ Yepä, pui nuuja te niinäceyame ne eblawäjige egä, “Nää, maane wälu lica gäte Acejiyame täápume? Mine iyeta yepä pana daremu cabu temi.

⁴¹ Mime daremu lui conocăco gyene, mime niia mule ibibi gyene, yepă tabe, nuuja niia mule ne lica ituge wawena.

⁴² Tabe puma cita ca Yeesu ne jejige egă, “Maane căme tăăpume ngene totwepi, maane liba biname bine waadename cire twaatnepi!”

⁴³ Yeesu teebine jejige egă, “Cane meebine naajenine, maane page cane cama naana-jenige Acejiyame me jamyacu lenaja puupu cabu.”

Yeesu me Budre

(*Matayo 27:45-56; Mareko 15:33-41; Yoane 19:28-30*)

⁴⁴ Yoo, bimu duusa liba äbitige, bimu te gawe me lica sepa-clyärige, krokeciye te iyeta gawe ne sicwabige nesae awa cama.

⁴⁵ Pui padare cabu baborage cäbletääpe lui iiwäreja mete cabu atecwanteji ge, pui te äderärige, siige neeneni pargi äbitäsi.

⁴⁶ Yeesu piba babo ala abayige egă, “Căme Babe, căme seemo ne määme ime cabu ecitenine!” Tabe peei mene jiicige, siige budre äbitige.

⁴⁷ Yoo, Rooma cubu biname bime mope biname te liba peei mule ne jepänige, Acejiyame ne ewepyeräjige egă, “Toraca, ai lui conocăco biname ge!”

⁴⁸ Yoo, iyeta lui biname cina abasecretnige puma ireme, teepi liba peei mule ne jepänisi, iyeta piba dare adnaninisi, ngenecu mäpu cama äcnärige mete me.

⁴⁹ Yepă, iyeta lui cina umlerage gemi Yeesum tăăpume, cuta piyepu lui magebi cina ten cama seclumi Galilaya Probins cabu ca, teepi cudecewe pana amyemuteji icrajige peei mule bine päpäname.

Yeesu ne Gape cabu Ecitisi

(*Matayo 27:57-61; Mareko 15:42-47; Yoane 19:38-42*)

⁵⁰⁻⁵¹ Puga ge yepă biname ngii Yoosepa, lui Israela biname bime matikolä cewe cabu ca, ngii Arimatea. Tabe conocăco, miiji biname ge lui Acejiyame me biname bine waadena padare ne jewagrijenige. Tabe Israela mutre biname bime abasecretna cabu ge, yepă singi lica ge teeme atrana piyepu waweneca Yeesu poto cidi me.

⁵² Tabe Pilato bau ädige, Yeesu me budrekaake tăăpume itinärige.

⁵³ Tabe piba Yeesu me budrekaake baarge uli cabu ca sitrungamtige, lecaleca cäbletääpe ca tope etnige, piba gape cabu isinglantige, puupu cabu ecitige. Pui gape lui kula ureji ge, kirece wawenäjeji ge, piyepu lica ituge nuuja biname ne acita puma.

⁵⁴ Bimu lui Fraide ge, Sabade bimu me amaceträja bimu, piyepu teeme Sabade bimu mameta ge atyaramta.

⁵⁵ Pui magebi lui cina Yeesu cama seclumi Galilaya Probins cabu ca, teepi Yoosepa cama eclige, gape ne engrärisi, ewatnäjisii Yeesu me budrekaake lipu ge acitäneji puma.

⁵⁶ Teepi piba mete me äcnärige, miiji lengo ngängye bine emacetränjemisi teeme tăäpe ne ingwe ca piba apyacame.

Yepă, Israela biname bime Sabade bimu cabu teepi ngene oocinisi teeme cotre lipu jiicusi.

24

Yeesu Budre cabu ca Arpinantige

(*Matayo 28:1-10; Mareko 16:1-8; Yoane 20:1-10*)

¹ Sande krokerage, pui magebi cina lui miiji lengo gwidape bine tewenimumesi, teepi pui cama gape me eclige.

² Teepi puma jepänisi egă kula te apeträngteji ge gape gaabe cabu ca,

³ siige ebäcnisi, yepă Yageyame Yeesu me budrekaake ne lica jepänisi.

⁴ Teepi puga jeclajutemige maramara ngene atwanena cama, piba taatu neeneni biname cina apaclyäreji cäbletääpe cama teeme gome jaacclajutige.

⁵ Magebi cina wälu name pi ergo eciretnemige gawe me. Pui neeneni cina teebibine jejemäsi egă, “Weene ngenome gape cabu ireclota biname ne jirngeniye?”

⁶ Tabe ama lica gyene; tabe barpinantige ireclota me! Yoo, weene ngene jotwineye tabe lui mene weebibine ituge jaji weene liba Galilaya je egă,

⁷ ‘Cane lui te Acejiyame bau ca tädujine, biname me äbitujine, cane miiji niyaniya mule biname bime ime cabu lenajame. Teepi cebine baarge uli cabu pa näbyecrepesi budre me, yepă nesae me lui bimu cane pa larpinantepene ireclota cama.’”

⁸ Magebi cina pui mene piba ngene jotwinisi,

⁹ gape cabu ca täcnärininisi, peei mule ne jeitnäjisii pui lebin abiberäja bägrä bime bau me piyepu iyeta bime bau me lui cina ten cama ge.

¹⁰ Pui magebi lui Mariya Magadala, Yoana, naabi Mariya Yakobu me mage, cuta piyepu poto lui ten cama ge. Yoo, teepi peei mule poto cidi me ätyepäneji biname bine jejemisi,

¹¹ yepä pui magebi bime mene teepi lica jitrungemisi, inge apu jengemige egä walya mene ge.

¹² Yepä, Peteru te abujängtige, gape gome me uuwamige. Puga gape cabu me äcupige, apepmeläjige, cäbletääpe taatu bine jepänemige lui ca teeme tääpe ne tope setnumesi. Tabe piba mete me acnenutige, mage ngene jotwananige ngena te bii bäbitige.

*Yeesu Neeneni Biname cabu me Aboclomtige Emaus Gaabe cabu
(Mareko 16:12-13)*

¹³ Pui yepä bimu cabu, neeneni Yeesu me biname cina Emaus cewe me aaclige. Peei lui cebocebo bimu me otni ge Yerusalema cabu ca.

¹⁴ Teepi mene abaitnenäsi iyeta gwidape poto cidi me lui cina pui nesae bimu cabu täbitimesi.

¹⁵ Egäcäro teepi liba mene ajana piyepu ätemleja cabu ge, Yeesu piba mameta me tädige, piyepu ten cama gaabe cabu ädige.

¹⁶ Yepä, teepi biname taatu jepänäsi, äblicäco teebine opo awatna.

¹⁷ Yeesu teebibine ääte-mlige egä, "Weene ngena poto cidi me jiicenemiyegaabe cabu?" Teepi puma cita ca ngenecu mäpu cama äämyemutige.

¹⁸ Teeme yepä te, ngii Kleopa, teebine jejige egä, "Maane pama yepä taatu biname gäte Yerusalema cabu ca lui te umle lica ngena mule cina täbitimesi ai nesae bimu ngalebora!"

¹⁹ Tabe äätemlige egä, "Ngena mule?"

Teepi jejemige egä, "Pui mule cina Yeesu Nasareta ceweyame tääpume lui cina täbitimesi. Pui biname te Acejiyame me mename biname ge. Tabe kokre ciitaca mule bine jaawenemuge, piyepu kokre cama mene jaajanemuge. Iyeta biname cina teeme kokre ne opo sewatnumesi egä Acejiyame bau ca ge.

²⁰ Cime modamoda iiwäreja biname piyepu nuuja mope biname cina teebine Rooma ca mope biname me ime cabu secitumesi budre tääpume. Piba Rooma cabu biname cina teebine baarge uli cabu tibycrumesi.

²¹ Yoo, cine cime ngene atwana teeme cabu itu yaacitepesi egä tabe pama peese nyene biname Israela biname bine niyya cabu ca äsecrerame. Cuta peei taatu lica, page lui nesae me bimu gyene peei mule ingwe ca.

²² Page poto magebi cime tomi cabu ca teepi cibibine mutäcäco me niwenininisi. Teepi liba krokerage gape gome eclige,

²³ teeme budrekaake ne lica jepänisi puma. Siige, teepi täcnärige, cibibine nijininisi egä neeneni mename seemo bine jääpänsi lui cina teebibine jejemäsi egä Yeesu ireclota gyene.

²⁴ Yoo, piba poto cime tomi cabu ca gape ne engrärisi. Teepi iyeta gwidape bine pepu jepänemisi magebi cina lipu jiicemisi, yepä teepi Yeesu ne lica jepänisi."

²⁵ Yeesu piba teebibine jaajige egä, "Weene lipu pi umle cäco gegi? Weene däägudägurage joomleniye sasa mename biname bime mene!

²⁶ Weene cire umle läbetejiye egä biname bime niyya cabu ca äsecrera biname te miiji mäpurage padare ne päpäna, piba peei cabu ca jamyacu apaclyera padare cabu me abacitame."

²⁷ Puma cita ca Yeesu teeme tääpume eboclomäjige iyeta mene lui teeme poto cidi me oogäräneji gemi. Tabe gije abacitige mene cabu ca Moose lui bine ita soogäremuji, puma cita ca teeme mene te otnige iyeta sasa mename biname bime cabu ca.

²⁸ Siige, teepi lui cewe me singi otni, pui mameta me atyaränisi, piba Yeesu tabe otni taatu äbitige,

²⁹ yepä teepi teebine jiibecläsi, jejäsi egä, "Maane cine cama naanajegi! Bimu te mameta gyene äpula, krokeciye me äbitenige." Peei name pi tabe teeme mete me abacitige ten cama lenajame.

³⁰ Tabe ten cama dade cabu adnatige, buluduu ne ecatige, Acejiyame ne eso ecärige, piba itrecige, ääcärige teebibine.

³¹ Teeme irecu piba pajuce me äbitininisi, siige teebine opo ewatnäsi, yepä tabe puma cita ca teeme bau ca äyebtingige.

³² Teepi piba teemeteme ajanäsi egä, "Toraca, mime ngenecu cina niclonige gaabe cabu, tabe liba mene nijanige piyepu Oogäräneji Mene bine mime tääpume eboclomäjemigel!"

³³ Teepi dade gome ca wata abujengtäsi, Yerusalema cewe me acnenutäsi, puga edäremäsi pui lebin abiberäja bägrä bine piyepu ten cama lui biname cina abasecretinige.

³⁴ Puma iyeta jaajisi teebibine egä, "Yageyame te toraca barpinantige! Tabe Simona bau bii taboclomtige!"

³⁵ Piba pui neeneni cina teebibine jejemäsi teeme tääpume ngena te äbitige gaabe cabu, piyepu teepi lipu Yageyame ne opo ewatnäsi, tabe liba buluduu ne itremantige.

*Yeesu Aboclomtige Teeme Abiberäja Bägrä bime bau me**(Matayo 28:16-20; Mareko 16:14-18; Yoane 20:19-23; Apostolo 1:6-8)*

³⁶ Teepei liba peei mene cabu jage, piba taatu Yageyame Yeesu te teeme gome jeclajutige, teebibine jejemige egä, "Poodde weene cama yaanajegel!"

³⁷ Teepei calu te jitemige wälu name pi, ingle teepi apu jenge-mige egä, "Cable gyene ail!"

³⁸ Yepä, tabe teebibine jejemige egä, "Weene ngenome ngenecu jiclonininige? Ngenome neenenä ngene atwanena cama gemi?"

³⁹ Jepänemeye cäme ime piiyepu cäme ernge. Cane säne! Cebine noomleye, piba umle äbitininiye, ingle cable te lica mäju piiyepu kaake cama ge, weene cebine lipu näpäneniye tääpe cama."

⁴⁰ Tabe peei mene jejemige, teeme ime ernge jewabemige.

⁴¹ Siige, teepi camuge cängena ätrunga, ingle teepi mutäcäco äbitininisi gege name pi. Tabe peei name pi teebibine itinärige egä, "Nää, deedei pisi nyene?"

⁴² Teepei teebine toce cibi ecärisi,

⁴³ tabe ecatige, siige teeme opo gaabe je erngige.

⁴⁴ Tabe piba teebibine jejemige egä, "Age tema pui mule cane lui poto cidi me weebibine ituge jaji liba weene cama nanajepi. Yoo, cane apu jijipene egä iyeta Oogäräneji Mene cäme poto cidi me miiji ibibi me äbita; apu ge pui mene Moose lui itu soogäremuji, piiyepu mename biname lui mene soogäre mujisi, cuta piiyepu iyeta Salamo uupera cabu lui mene."

⁴⁵ Tabe piba teeme ngene atwanena jiiitemige Oogäräneji Mene cängena umle äbitame.

⁴⁶ Tabe teebibine jejemige egä, "Apu mene oogäräneji ge egä, Keriso, Israela biname bime niiya cabu ca äsecrera biname te miiji mäpu piiyepu budre päpäna, piba nesae bimu ingwe ca cirege arpinenta budre cabu ca.

⁴⁷ Cuta apu oogäräneji ge egä, biname cina miiji ai mene jajanena iyeta mene maramara biname bine. Pui kaakesea miiji Yerusalema cewe cabu gije abacitame, piba cuta jajanena iyeta poto ta. Teepei miiji biname bine jajanena egä biname lui cina niiya mule cabu ca latatrongärininusi piiyepu cebine nätrungusi, Acejiyame teeme niiya mule bine pa yääyebingemepi teebibine teeme biname me wawenecame.

⁴⁸ Weene lui ire arbi biname gemi iyeta ai mule poto cidi me.

⁴⁹ Yoo, cane weeme bau me pa tätyepepene cäme Babe te lui ne ituge jaji weebibine ceerame, peei lui Aceji Seemo gyene. Yepä, weene ama ai babo cewe cabu inajininige ngälu teeme kokre te cabucewe ca pa täinepi weeme cabu me."

*Yeesu ne Ecatige Cabu me**(Mareko 16:19-20; Apostolo 1:9-11)*

⁵⁰ Yeesu teeme abiberäja bägrä bine ewademige Yerusalema cabu ca Betaniya cewe mameta me. Puma tabe ime aawepäntige miiji ne acitame teeme cabu me.

⁵¹ Egäcäro teebibine miiji ecäremige, tabe teebibine sebmalemige. Acejiyame me kokre te teebine cabu me ewepäntige.

⁵² Abiberäja bägrä cina teebine ewepyeräjisi, piba babo gege piiyepu ngenecu miiji cama äcnärige Yerusalema cewe me.

⁵³ Teepei iiwäreja mete caale bora yaacrajuge, puga Acejiyame ne eso yäacäranusi.

Siige mene ngälu peese.

YOANE ME MIIJI MENE

Mene Lui Biname Gyene

¹ Gawecewe te cäro camu ge aci, Mene te uja ge. Mene te Acejiyame cama ge, tabe Acejiyame ge.

² Agedna me niinäce gaabe me tabe lui Acejiyame cama ge.

³ Iyeta gwidape bine Acejiyame teeme cabu ca jewenimuji; teeme cäco je nuuja gwidape te lica äbituji.

⁴ Teeme cabu ireclota puga ge; pui ireclota lui apaclyera ge biname bime täápume.

⁵ Pui apaclyera te krokeciye cabu me tuungepmalenige, yepä biname lui cina krokeciye cabu je, teepi opo lica ituge awatna pui apaclyera ne.

⁶ Acejiyame te tityepuji biname ngii Yoane ne

⁷ pui apaclyera ne aitejame naace täápume iyeta biname cina teebine ätecijame piyepu ätrungame.

⁸ Tabe te lica ge pui apaclyera, tabe yepä jeitnäjuji teebine.

⁹ Toraca apaclyera, lui te iyeta biname bine saapaclyäremuge, täduji gawecewe cabu me.

¹⁰ Tabe gawecewe cabu jage, Acejiyame lui ne teeme cabu ca jewenuji, yepä biname cina teebine opo lica ewatnujisi.

¹¹ Tabe teemerage gawe cabu me täduji, yepä teemerage biname cina teebine lica ecatuji.

¹² Yepä lui cina teebine ecatuji piyepu jitrunguji, tabe teebibine conocäco ecärimuji Acejiyame me bägräwale täápume.

¹³ Teepi Acejiyame me bägräwale me epu lica äbitininujisi, biname bime cabu ca lipu laplimlininusi binamerage babe me bägrä me, yepä tabe Acejiyamerage te jewenimuji teeme bägräwale me.

¹⁴ Yoo, Mene te äbituji biname me, mine cama senajenäjumi. Tabe lui Babe me japurage Bägrä ge. Mine jepänujisi kokre ne, Babe te lui secäruji teebine. Tabe lui toraca piyepu owecu biname ge.

¹⁵ Yoane te teebine jeitnäjuji, ala abyanuji egä, "Age sena, cane lui täápume jiiicepene egä: Cäme ingwe poto ca lui te pa tädepi, baborage gyene cäme bau ca, ingle cane liba camu ge aplimla, tabe piba Babe cama jage."

¹⁶ Tabe baborage owecu mime täápume, peei name pi tabe bucurage miijimiji mule bine tewenemäjumi mime täápume. Tabe iyeta padare cabu miiji niwenenanimi.

¹⁷ Acejiyame te Cotre mene secäruji Moose ne, yepä Yeesu Keriso te taacanuji owecu mule ne piyepu toraca mule ne.

¹⁸ Nuuja te lica ituge Acejiyame ne päpäna, yepä teeme japurage Bägrä, lui te Acejiyame cama yepä gyene, piyepu lui te Babe gome enajenige, tabe te teebine biname bime cabu me seboclomtuji.

Yoane Niiye ca Äciseja Biname te Yeesu ne Jeitnäjige (Matayo 3:1-12; Mareko 1:1-8; Luuka 3:1-18)

¹⁹ Israela biname cina Yerusalema ca jityepimisi iiwäreja biname bine piyepu Leebi me ingle cabu ca biname bine Yoane bau me teebine ätemlame egä, "Maane laasi näte?"

²⁰ Yoane lica ainige, yepä tabe cängenarage awabudnitige egä, "Cane Keriso lica gäne, Acejiyame te lui ne ätyepame tiucuji biname bine niiya cabu ca äsecrerase. Cane pui lica gäne."

²¹ Teepi piba itemlisi egä, "Cije maane laasi näte? Maane nää Acejiyame me mename biname Eliya säte?" Tabe jejemige egä, "Eewe, cane Eliya lica gäne." Teepi cuta itemlisi egä, "Näa, maane pui mename biname gäte, cine lui ne jewagrijenisi?" Tabe jejemige egä, "Eewe, cane tabe lica gäne."

²² Teepi puma cita ca jejisi egä, "Nijini toracarage, maane laasi näte, cine piba daremu mene jewecnistenemisi, lui cina cibibine nityepinisi. Maane lipu ngene jotwananenite, egä maane laasi näte?"

²³ Yoane jejemige teebibine mename biname Isaya me mene ca egä, "Cane age säne pui biname, lui te ala abayanenine daapo taatu cewe cabu ca egä, 'Gaabe ne conocäcorage emacetnäjeje Yageyame me otni täápume!'"

²⁴ Pui biname cina seclige Yoane bau me, ingle Parisea sigu biname cina tityepimisi.

²⁵ Yoo siige, teepi cuta teebine itemlisi egä, "Cije maane piba ngena täápume biname bine niiye ca jääcisäjemute, maane liba Keriso lica gäte, coo liba Eliya lica gäte coo piyepu pui Acejiyame me mename biname, cine lui ne jewagrijenisi?"

²⁶ Puma cita ca Yoane teebibine jejemige egä, “Cane niye ca biname bine jicisäjemenemine, yepä weene cama pisi nyene nuuja biname, weene lui tääpume umle lica gemi.

²⁷ Tabe căme ingwe gaabe ca teeme kaakesea ne tegednige, yepä tabe baborage gyene căme cabu ca. Cane ibibi lica gāne teeme ernge gwidape seea bine iibirame.”

²⁸ Ai mule te äpletnutige Betaniya cewe je Yoridana baduge me bimu acita gome ca, Yoane luma biname bine niye ca jicisäjemige.

Acejiyame me Maamoi

²⁹ Nuuja bimu cabu Yoane jepänige Yeesu ne otni je teeme bau me, siige tabe jicige egä, “Ire, Acejiyame me Maamoi peese nyene, gawecewe me niya ne lui te pa yaacatepi.

³⁰ Tabe sine pui biname, cane lui tääpume tiicumene egä, “Căme ingwe gaabe ca biname te pa tädepi, yepä tabe baborage gyene căme bau ca, ingle cane liba camu ge aplimla, tabe uja Babe cama jage.”

³¹ Cane cuta niinäce umle lica ge, tabe laati tage, yepä cane puu gije labacitepene Israela biname bine niye ca äcisejame teepi umle äbitame teeme poto cidi me.”

³² Puma cita ca Yoane Yeesu ne jeitnäjige egä, “Cane jepänine Aceji Seemo ne äina je cabucewe ca gimäe ele pana siige teeme papa cabu lenaja je.

³³ Cane umle lica ge tabe, yepä Acejiyame lui te cebine nätyepipi biname bine niye ca äcisejame, tabe najepi egä, ‘Maane lui me papa cabu pa jepänepi Aceji Seemo te äina je siige teeme papa cabu lenaja je, tabe peese nyene, lui te biname bine Aceji Seemo ca pagege äciseja.’

³⁴ Cane siige ai mule ne tepänumene, siige jeitnäjine, egä tabe peese nyene Acejiyame me Bägrä.”

Yeesu me Niinäce Abiberäja Bägrä

³⁵ Nuuja bimu cabu Yoane niye ca äciseja biname cääri cuta puga ge teeme neeneni abiberäja bägrä cama.

³⁶ Tabe liba Yeesu ne jepänige teebibine äsuplengta je, tabe jaajige egä, “Ire, Acejiyame me Maamoi peese nyene!”

³⁷ Teeme neeneni abiberäja bägrä cina liba äätəcijige tabe apu iicana je, teepi Yeesu me ingwe poto ca aaclige.

³⁸ Yeesu tatatrongtige, jääpäniige teeme bau me otni je, äätəmlice egä, “Baa, weene ngena ne jirngeniye?” Teepi jejäsi egä, “Raabi, maane luma naanajinige?” (Raabi me aboclomta mene lui ‘Abiberäja biname.’)

³⁹ Tabe jaajige egä, “Siclege päpäname.” Teepi aaclige, siige jepänäsi teeme lenaja puupu ne. Ai mule te äbitige mämle bimu me, siige teepi pui bimu ne epiräsi Yeesu cama lenaja je.

⁴⁰ Yoo, Yoane me mene lui neeneni biname cina äätəcijige, siige Yeesu cama aaclige, teeme yepä lui Andrea tage. Andrea lui Simona Peteru me igane ge.

⁴¹ Teeme otni ingwe ca ge, tabe niinäce teeme naane Simona ne jirngige, jejige egä, “Cine Mesaya ne bii jepänago. Tabe peese nyene biname, lui te biname bine niya cabu ca cirege äsecrera.” (Mesaya me aboclomta lui yepä gyene Keriso cama.)

⁴² Siige Andrea te Simona ne Yeesu bau me ecanige. Yeesu ire acitige teeme cabu me, jejige egä, “Maane lui Simona säte, Yoane me bägrä. Cane meebine ngii naainenine Keepa ca.” (Keepa Griik mene ca lui Peteru, lui me aboclomta mene egä ‘Kula’.)

Yeesu Ala Taasoglicige Pilipo naabine Natanaela

⁴³ Nuuja bimu Yeesu ngene jotwanige Galilaya probins me otnime. Puma cita ca tabe Pilipo ne jepänige, jejige egä, “Tädi cane cama otnime!”

⁴⁴ Pilipo lui Betesaida ceweyame ge, Andrea naabi Simona luma cita ca ge.

⁴⁵ Pilipo Natanaela ne jepänige, jejige egä, “Cine pui biname ne jepänisi, Moose lui poto cidi me ituge Cotre cabu mene iicana, piyepu cuta Acejiyame me mename biname cina lui poto cidi me ituge oogära. Tabe lui Yeesu sine, Yoosepa me bägrä Nasareta babo cewe cabu ca.”

⁴⁶ Natanaela Pilipo ne itemlige, “Nää, nuuja miiji gwidape miiji gyene pepu papa cewe ca otni Nasareta liiyepu?” Pilipo jejige egä, “Maane tädi aima päpäname!”

⁴⁷ Yeesu liba jepänige Natanaela ne teeme bau me otni je, tabe jicige teeme poto cidi me egä, “Ai biname lui toraca Israela biname gyene. Teeme cabu nuuja walya lica gyene.”

⁴⁸ Natanaela Yeesu ne itemlige egä, “Maane lipu umle gäte cane?” Yeesu jejige egä, “Cane niinäce meebine näpäpäniige piigi uli gawe je, Pilipo ingwe ca ala naasoglicige.”

⁴⁹ Puma cita ca Natanaela teebine jejige egä, “Abiberäja biname, maane Acejiyame me Bägrä gäte! Maane Israela biname bime mope biname gäte!”

⁵⁰ Yeesu Natanaela ne jejige, “Maane naace name pi cebine nätrungenite, ingle cane lipu naajine, egä cane meebine nääpäniine piigi uli gawe je. Ai puu matikáli mule gyene, yepä ebä pagege maane modamoda mule bine päpäna.

⁵¹ Cane toraca jijenine weebibine, egä weene cabucewe ne pagege päpäna iitneji, siige Acejiyame me mename seemo cina page yaaclepi cabu me cuta puma cita ca page täinetnepi biname cabu me, Acejiyame bau ca lui te täduji biname me äbituji.”

2

Atejäclmuta Soriyomu Kaana Cewe je

¹ Nesae bimu ingwe gaabe ca atejäclmuta soriyomu puga ge Kaana cewe je Galilaya probins ngalebora. Yeesu me mage puga ge,

² cuta Yeesu ne teeme abiberäja bägrä cama ituge ala asogleca.

³ Biname cina liba deedei loolo cabu jage, waina niye te piba apirige. Puma cita ca Yeesu me mage te teebine jejige egä, “Teeme waina niye lica gyene.”

⁴ Yeesu teeme mage ne jojige, “Magebi, maane cebine gone jaji cane ngena wawename. Cäme padare te lica bii tatyaramtige.”

⁵ Yepä mage te kaakesea bägrä bine jejemige egä, “Weene jeweneye, Yeesu ngena täapume jijenininige.”

⁶ Teeme Israela biname bime cotre puga ge teepi lipulipu äcisejame cude gwidape oomlana cabu ca. Ai ingle name pi pui mete cabu puga ge kula ca wawenäneji siks modamoda niye ängärena gwidape; teepi iyeta ibibi ge yepä hanred liita niye täapume.

⁷ Puma Yeesu kaakesea bägrä bine jejemige, “Weene ai bine niye jengäremeyel!” Teepi siige jengärimisi, ngälu tapananinisi.

⁸ Piba tabe teebibine jejemige, “Weene niye siiteye ängära gwidape cabu ca, ecaneye deedei ire atwi biname bau me.” Siige kaakesea bägrä cina ängära gwidape cabu ca niye siitisi, ecanisi deedei ire atwi biname bau me.

⁹ Tabe liba mite eglige, niye te uja waina niye me bäbitige. Laatibi siitisi niye ne, teepi umle ge, egä waina niye luma cita ca gyene, yepä deedei ire atwi biname te tabe umle lica ge. Peei name pi tabe ala tesoglicige mamye rooriye ne,

¹⁰ jejige egä, “Mime mule gyene soriyomu biname bine miiji waina niye niinäce ceera, siige teepi liba bucurage yäänäjimisi, ingwe ca piba yääcäranemusi papa waina niye. Maane lipulipu miijirage waina niye ne ewetnite ceräcerägäabu ceerame?”

¹¹ Yeesu ai teeme niinäcerage ciitaca mule ne jewenige Kaana cewe je Galilaya probins ngalebora. Apu pi tabe teeme kokre ne eboclomtigi, siige teeme abiberäja bägrä cina teebine jitrungisi.

¹² Ai ingwe gaabe ca Yeesu ädige Kaprenauma cewe me teeme mage, iganewale piyepu abiberäja bägrä cama. Teepi puga icrajige nesae bimu cama.

Yeesu Ädige Iiwäreja Mete me

(Matayo 21:12-13; Mareko 11:15-17; Luuka 19:45-46)

¹³ Israela biname bime äsuplengta soriyomu padare te liba mameta ge Yeesu piba ädige Yerusalemame.

¹⁴ Puma tabe abacitige iiwäreja mete caale bora me, siige jepänimige biname bine kau, maamoi piyepu gimäe ele bine aletnena je iiwäreja täapume. Tabe cuta jepänimige rarekaake äbäsuwäja biname adnatäreji ge teeme dade gome.

¹⁵ Puma cita ca tabe sea bine sigu jenenimige, siige teebibine teeme kau piyepu maamoi cama iyecräjemige iiwäreja mete caale bora ca. Piba tabe rarekaake äbäsuwäja biname bime rarekaake bine jeglemeläjimige gawe cabu me piyepu teeme dade bine eboclomäjimige.

¹⁶ Gimäe bine lui cina aletname saawadanemusi, tabe teebibine jejemige egä, “Gimäe bine isemeye! Weene cäme Babe me mete ne gone jeweneniye aletnaletna puupu mel!”

¹⁷ Abiberäja bägrä cina liba jepänisi, Yeesu ngena jewenige, teepi ngene jotwinisi mene lipu oogäräneji gyene egä, “Cäme ngenecu nabenige Acejiyame me mete täapume.”

¹⁸ Israela modamoda biname cina liba jepänisi Yeesu ngena jewenige, teepi itemlisi egä, “Maane ngena ciitaca mule ne jewenenite cine päpäname, egä mäame conocäco pisi nyene ai mule ne wawename?”

¹⁹ Yeesu jejemige egä, “Ai iiwäreja mete ne yiigarecepeye. Cane te nesae bimu cama cääri pa yaarangepene.”

²⁰ Teepi teeme mene ingle ne opo lica ewatnisi, siige jejisi egä, “Ai iiwäreja mete ne lui footisiks kämäge ngalebora erangujisi. Nää, maane te nesae bimu cama pa perangepi?”

²¹ Yepä Yeesu pui iiwäreja mete poto cidid me lica jiuuji, yepä tabe teeme täape poto cidid me jiuuji.

²² Ingwe gaabe ca tabe liba budre cabu ca arpinantuji, teeme abiberäja bägrä cina piba ngena jotwinujisi teeme ai mene, siige teepi jitrungujisi lui mene oogäräneji gyene, cuta teepi jitrungujisi Yeesu ngena ituge iicana.

Yeesu Umle Gyene Biname cina Lipu Gemi

²³ Yeesu liba Yerusalema je puga ge äsuplengta trii padare cabu, bucurage biname cina teebine jitrungisi, teepi lipu jepänisi tabe lui ciitaca mule bine jewenimige.

²⁴ Yepä Yeesu lica awabudni-tige biname bime bau me, ingle tabe umle ge, teepi iyeta lipu gemi.

²⁵ Yeesu singi lica ge nuuja te teebine umle wawename, egä biname lipu gemi, ingle tabe iyeta umle ge teeme poto cidi me.

3

Yeesu piyepu Nikodemo

¹ Puga ge yepä Parisea sigu biname ngii Nikodemo. Tabe Israela biname bime yepä mutre biname ge.

² Ciiye cabu tabe Yeesu bau me ädige, jejige egä, “Raabi, cine umle gemi, egä Acejiyame te meebine näätjepuji abiberäjame. Nuuja te äblicäco gyene apu ciitaca mule bine wawenena maane lui bine jewenenemite, liba Acejiyame lica gyene teta cama.”

³ Yeesu teebine jejige egä, “Cane toraca naajenine, biname te liba kirece lica laplimluge, tabe äblicäco äbita biname me, Acejiyame lui ne yaacanuge.”

⁴ Yepä Nikodemo Yeesu me mene opo lica ewatnige, siige itemlige egä, “Babo biname te lipulipu cääri laplimluge? Tabe äblicäco mage me came bora me abacita cuta cääri aplimla tääpumel!”

⁵ Yeesu jejige egä, “Cane toraca naajenine, biname te liba lica birige aplimla niye piyepu Aceji Seemo cabu ca, Acejiyame te lica teebine acana.

⁶ Biname me tääpe laplimluge mage cabu ca, yepä Acejiyame me Seemo te teeme seemo ne ireclota yääcäruge.

⁷ Peei name pi cälu te gone näätuge, cane lipu naajine, egä weene miiji kirece aplimla.

⁸ Buuwe te singi liye yene, tabe piyeme jääpwäjuge. Weene mumwämu iteciijnuge, yepä weene umle lica gemi, luma cita ca tädenige coo liiyeme ädenige. Pepu gyene biname bime tääpume, lui cina Aceji Seemo cabu ca laplimli-ninusi.”

⁹ Nikodemo Yeesu ne itemlige, “Peei lipu gyene?”

¹⁰ Yeesu jejige egä, “Maane Israela biname bime abiberäja biname gäte, maane lipulipu umle lica gäte ai poto cidi me!

¹¹ Cane toraca naajenine meebine, egä cine jicemusi, cine lui tääpume umle, cuta jaaitnimusi cine lui bine jääpänimusi, yepä weene lica yaacatu ye cime mene ne.

¹² Weene cebine lica nätrunguye, cane liba jijanininune ai gawecewe me mule poto cidi me; weene piba lipulipu cije ätrunga cebine, cane liba jijanininune cabucewe me mule poto cidi me.

¹³ Nuuja te lica ituge otni cabucewe me, yepä Acejiyame bau ca lui te täduji biname me äbituji, tabe taatu ge.

¹⁴ Moose te daapo taatu cewe cabu cobyame ne ewepäntuji cabu me. Lui cina pui cobyame cabu me ire acranininujisi, teepi ireclota icrajuji. Cuta pepu pana pagege baarge uli cabu awepenta teebine, Acejiyame bau ca lui te täduji biname me äbituji,

¹⁵ siige iyeta lui cina teebine jäätrungusi, teepi iyeteta ireclota ne birige päpäna.

¹⁶ Acejiyame te epu babo singi ge biname bime tääpume, egä tabe teeme japurage Bägrä ne tityepuji, siige laati te liba teebine jäätrunguge, tabe lica birige apesera yepä tabe iyeteta ireclota ne päpäna.

¹⁷ Acejiyame te lica teeme Bägrä ne tityepuji ai gawecewe cabu me biname bine atraname niya puupu cabu me otnime, yepä tabe naace tääpume tityepuji tabe teebibine niya cabu ca äsecerame.

¹⁸ Laati te teebine jäätrunguge, Acejiyame te lica pui biname ne jaatranuge. Yepä laati te lica jäätrunguge teebine, pui biname ne uja ituge atrana, ingle tabe lica ituge ätrunga acita Acejiyame me japurage Bägrä me ngii cabu me.

¹⁹ Teepi atranäneji gemi, ingle apacylera te itu täduji ai gawecewe cabu me, yepä teepi singi lica ge apacylera tääpume; teepi krokeciye tääpume singi, ingle teeme mule lui niyyarage gemi.

²⁰ Iyeta lui cina niyaniya mule bine jaawenimusi, teepi apacylera ne jäägyusi. Teepi lica saacluge apacylera cabu me, cije apacylera te teeme mule bine jaawabudnemuge.

²¹ Yepä laatibi toraca mule bine jaawenimusi, teepi apaclyera cabu me saacluge, siige apaclyera te jaawabudne-muge, egä teepi lui mule bine jaawenimusi, Acejiyame me singi ibi gemi.”

Yeesu piyepu Yoane Niye ca Äciseja Biname

²² Ai ingwe gaabe ca Yeesu teeme abiberäja bägrä cama ädige Yuudea probins cabu me. Tabe puga teta cama enajige matikolä padare cabu, biname bine niye ca jicisäjemige.

²³ Yoane cuta niye ca biname bine jicisäjemige cewe ngii Aenona je lui Salima cewe mameta ge, ingle baborage niye puga ge, siige biname cina totninisi Yoane bau me niye ca äciseja tääpume.

²⁴ Yoane ne camu ge pui padare cabu krokeciye mete cabu me äsinglenta.

²⁵ Puma cita ca Yoane me abiberäja bägrä cina gije abacitinisi yepä Israela biname cama äcelame teeme Israela biname bime äciseja mule poto cidi me, teepi lipulipu cude gwidape cabu ca kälyä läbitaninusi.

²⁶ Siige teepi seclige Yoane bau me, jejisi egä, “Abiberäja biname, maane cama lui biname tage Yoridana baduge nuuja poto doro ca, maane lui ne teitnäjumete, tabe cuta page biname bine niye ca jicisäjenenemige, siige bucurage cina piyeme otneninisi teeme bau me.”

²⁷ Yoane jejemige egä, “Nuuja biname te äblicäco pepu mule ne acata, Acejiyame te liba lica yääcärüge teebine.

²⁸ Weene weenämu ituge ätecija, cane lipu itu jiicepene, egä cane Keriso lica gäne, Acejiyame te lui ne ätyepa biname bine niya cabu ca äsecerame, yepä cebine teeme niinäce gaabe me ituge ätyepa.

²⁹ Mamye magebi lui mamye rooriye tääpu mwene. Yepä mamye rooriye me biname lui te jaacaljutuge teeme gome, teeme mene jätəcijuge, tabe gege birige teeme tagepogogo ätecijame. Yeesu lui mamye rooriye pana gyene, peei name pi cane babo gege gäne teeme tääpume.

³⁰ Tabe miiji baborage me äbita, cane matikolä me äbita.

³¹ Lui te cabucewe ca täduji, tabe sine baborage iyeta bime cabu ca. Lui te gawecewe cabu ca gyene, tabe gawecewe tääpu myene, siige gawecewe mule poto cidi me jiičemimuge. Yepä cabucewe ca lui te täduji, tabe baborage gyene iyeta poto bime bau ca.

³² Tabe eei bine jeitnäjenemige, tabe lui bine ituge päpänenä piyepu tabe lui poto cidi me ituge ätecijana, yepä biname cina lica ecatisi teeme aitneja ne.

³³ Yepä laati te liba yaacatuge teeme mene ne, tabe jaawabudnituge, egä Acejiyame lui toraca gyene.

³⁴ Acejiyame lui ne tityepuji, tabe Acejiyame me Mene jiičemimuge, ingle Acejiyame te teebine Aceji Seemo iyeta teeme kokre cama ituge ceera.

³⁵ Babe te singi gyene teeme Bägrä tääpume, siige iyeta gwidape ituge acrana teeme ime cabu.

³⁶ Laati te Bägrä ne jäätrunguge, tabe iyeteta ireclota ne jääpänuge. Yepä laati te Bägrä ne lica jäätrunguge, tabe pui ireclota ne lica jääpänuge, yepä Acejiyame me claabe te yaanajuge teeme cabu.”

4

Yeesu piyepu Samariya Magebi

¹ Parisea sigu biname cina itecijemige, egä Yeesu bucurage biname bine niye ca jicisäjemige, Yoane nesae bine; cuta teeme abiberäja bägrä bucurage ge, Yoane me nesae ge.

² Puu Yeesurage te biname bine lica jicisäjemige yepä teeme abiberäja bägrä cina.

³ Yeesu liba umle äbitige, egä Parisea sigu biname cina umle bäbitininisi ai poto cidi me, tabe Yuudea probins ne ebmalige, ädige Galilaya probins cabu me.

⁴ Tabe miiji ge Samariya probins cabu ta otni Galilaya probins ne oomlaname.

⁵ Tabe liba ädige, tabe atyaramtuge yepä Samariya cewe ngii Suuka me. Pui cewe lui calwacupi mameta gyene, Yakobu lui calwacupi teeme bägrä Yoosepa ne ecäruji.

⁶ Yakobu me niye cupicu cuta puga ge. Yeesu worämu te joomlige, ingle lecaleca padare lipu otnige, siige tabe adnatige cupicu gome. Pui lui bimu duusa ge.

⁷ Puma cita ca yepä Samariya magebi te toclige niye iitaname. Yeesu jojige egä, “Cäme niye niiti nanime!”

⁸ Abiberäja bägrä puga lica ge. Teepi cewe me beclige deedei aletname.

⁹ Siige magebi te Yeesu ne jijige egä, “Maane lui Israela biname gäte, maane lipulipu najite cane Samariya magebi te määme niye iitaname?” Tabe naace popi apu jejige, ingle Israela biname piyepu Samariya biname teepi cude padare ge. Teepi gigri deedei gwidape bine lica jääbämuyäjimusi.

¹⁰ Yeesu magebi ne jojige egä, “Maane liba umle cirege, egä Acejiyame te ngena bine müji gyene ceera piyepu cane laasi näne lui te meebine niye täápume näätinärine, maane näätinärejite, cane ireclota niye nääcärejine meebine.”

¹¹ Magebi te jejige, “Babo biname, cupicu lui uuglerage gyene, cuta mäame iitana gwidape lica gyene; luma cita ca pui ireclota niye ne siitenite?”

¹² Nää, maane baborage gäte mime kaakesaare Yakobu bau ca, ai cupicu ne lui te nicärinuji? Tabe ama cita ca niye ne senajenäjumi, cuta teeme bägrä cina piyepu cuta teeme ngeerangera cibi cina.”

¹³ Yeesu jojige egä, “Iyeta, lui cina ai niye ne enenisi, pagege cääri niyemecewe jajwi.

¹⁴ Yepä laati te yaanuge, cane lui niye yäacärune, tabe ingwe ca lica pagege niyemecewe jajwi. Cane lui niye yäacärune, teeme cabu waja me läbituge, siige tuudruge iyeteta ireclota täápume.”

¹⁵ Piba magebi te jejige, “Babo biname, näcäri pui niye! Piba ingwe ca cane lica pagege niyemecewe jajwi, cuta lica pa twaatnepene aima niye iitanenime.”

¹⁶ Yeesu jojige egä, “Äte, mäame rooriye ne serwojuti!”

¹⁷ Tabe jejige egä, “Eewe, cäme rooriye lica gyene.” Yeesu jojige egä, “Toraca gyene, maane lipu najite, egä mäame rooriye lica gyene.

¹⁸ Maane niinäce faib rooriye bine yaawadanemepete, page lui rooriye ne ecananenite, mäamerage rooriye lica gyene peei. Maane peei toraca najite.”

¹⁹ Magebi te Yeesu ne jejige egä, “Babo biname, cane ngene ca naagline, egä maane Acejiyame me menime biname gäte.

²⁰ Cine Samariya biname bime kaakesaare cina ai podo cabu irecu lämutanininusi Acejiyame bau me, yepä weene Israela biname cina jüicuye, egä Acejiyame ne müji Yerusalema taatu je awejena. Maane lipu ngene jotwanenite ai poto cidi me?”

²¹ Yeesu jowecnistige egä, “Cäme mene nacati, padare te pa tädepi, biname cina liba lica Acejiyame bau me pagege irecu ätumuta ai podo cabu coo Yerusalema je.

²² Weene Samariya biname toraca umle lica gemi, weene laati bau me irecu lämutanininuye, yepä cine Israela biname cina umle gemi, cine laati bau me irecu lämutanininago, inge Israela biname bime cabu ca gyene biname, lui te pagege biname bine niya cabu ca äsecrera.

²³ Padare te tädenige – siige uja bii tatyaramtige – liba toraca irecu ätumuta biname cina Acejiyame bau me pagege irecu ätumuta teeme seemo ca piyepu toraca ngene atwanena cama. Apu irecu ätumuta biname täápume Acejiyame singi gyene.

²⁴ Acejiyame lui Seemo gyene, siige laatibi teeme bau me irecu lämutanininusi, teepi müji irecu ätumuta teeme seemo ca piyepu toraca ngene atwana cama.”

²⁵ Puma cita ca magebi te Yeesu ne jejige egä, “Cane nata umle gäne, egä Mesaya, lui ne yaainusi Keriso ca, pagege otni, siige tabe te iyeta gwidape bine mime bau me pagege aboclomäja.”

²⁶ Yeesu jojige egä, “Cane age säne pui biname, lui te mene naajanenine.”

Abiberäja Bägrä cina Täcnärige

²⁷ Puirage padare cabu abiberäja bägrä cina tatyarige, cälu te jitemige, liba Yeesu ne jepänisi magebi cama mene iicema je. Yepä nuuja te lica itemlige, egä tabe ngena täápume singi, cuta magebi cama ngena täápume mene jüicemenige.

²⁸ Puma cita ca magebi te teeme niye iitana gwidape ne ebmalige cupicu gome, oclige babo cewe me, siige biname bine jejemige puma egä,

²⁹ “Naaclege biname ne päpänime, lui te umle gyene iyeta, cane ngena ituge wawenänäja. Nää pama Keriso sine, Acejiyame te lui ne ätyepame biname bine äsecrera niya cabu ca?”

³⁰ Siige teepi babo cewe ne sebmalisi, Yeesu bau me seclige.

³¹ Magebi te liba babo cewe jage, abiberäja bägrä cina piba Yeesu ne jejisi egä deedei äbitame.

³² Yepä tabe jejemige egä, “Cäme piti nemi deedei loolo me, weene lui täápume umle cäco gemi.”

³³ Abiberäja bägrä cina teemeteme jitransi, egä nuuja biname te pama bii tewadimige deedei teeme loolo me.

³⁴ Yeesu piba jejemige egä, “Cäme deedei lui eei gyene, cane teeme singi ne wawenime lui te cebine itu nätyepuji piyepu ämlitejame tabe lui kaakesea itu näcäruji cane wawenime.

³⁵ Weene jüiceniye egä, ‘Cerämu fooa mabye piti nemi piyeme ärucna padare oomlanime.’ Yepä cane jüiceniye, egä calwacupi bine jepänemeye! Iyeta gwidape kuu cama gemi ärucna täápume.

³⁶ Siige ärucna biname te page daremu ne jepänenige, kuu bine etomlecnemige iyeteta ireclota tääpume. Siige ätema biname piyepu ärucna biname teepi gigri gege äbitenäsi.

³⁷ Ai iicana lui toraca gyene egä, 'Nuuja te yäätémuge, nuuja te yäärucnimuge.'

³⁸ Cane weebibine itu jityepipene ärucname, weene luma kaakesea lica ituge wawena. Poto cina ituge puma kaakesea wawena, weene yepä ärucna taatu memi."

³⁹ Bucurage biname pui Samariya cewe cabu Yeesu ne jitrungisi, ingle pui magebi te lipu teebine jeitnäjige egä, "Tabe umle gyene iyeta cane lui bine ituge wawenetnäja."

⁴⁰ Puma cita ca Samariya biname cina liba eclige Yeesu bau me, teepi jejisi teta cama lenajame, siige tabe puma enajige neeneni bimu cama.

⁴¹ Cerämu bucurage biname cina Yeesu ne jitrungisi, teepi liba itecijemige teeme mene.

⁴² Teepi pui magebi ne jojisi egä, "Siige page cine cerämu mäame mene name pi taatu teebine lica jitrunge-nisi, ingle cine cinerage te bii nitecijinige teeme mene. Cine siige umle gemi, egä peese nyene biname, lui te biname bine pa yäasecrärempi niya cabu ca."

Yeesu Miiji Jewenige Babo Biname me Bägrä ne

⁴³ Neeneni bimu ingwe gaabe ca Yeesu Samariya probins ne sebmalige Galilaya probins cabu me ädige, teemerage cewe luma.

⁴⁴ Tabe apu ituge iicana egä, "Acejijame me mename biname ne yaacatusi iyeta poto ta, yepä lica teemerage cewe cabu je."

⁴⁵ Yepä ai taje tabe liba Galilaya probins cabu me ädige, biname cina miijirage jewablisi, ingle teepi niinäce itu yaaclepi Yerusalema babo cewe me äsuplengta bimu ne ngene apcename; siige teepi puga jääpänesipi, Yeesu ngena mule bine jaawenemepi.

⁴⁶ Puma cita ca Yeesu Kaana cewe me acnenutige lui Galilaya probins cabu jage. Peese nyene pui cewe, tabe luma niinäce niyerage ne waina niye tääpume yaateplingtepi. Galilaya probins cabu Kaprenauma cewe je yepä Rooma gabmani babo biname puga ge, lui me bägrä pita cama ge.

⁴⁷ Tabe liba itecijige, egä Yeesu Yuudea probins cabu ca tacnige Galilaya probins cabu me, tabe ädige, siige jejige tabe Kaprenauma cewe me otnime teeme bägrä, lui te budre mameta ge, teebine pita cabu ca miiji wawename.

⁴⁸ Yeesu teebine jejige, "Weene liba ciitaca mule piyepu kokre mule bine lica jääpänimuye, weene ätrunga lica birige."

⁴⁹ Yepä tabe Yeesu ne jejige egä, "Yageyame, tädi watata, cije căme bägrä te budre läbituge."

⁵⁰ Yeesu jejige egä, "Äte acnenuti, mäame bägrä te ireclota gyene!" Siige tabe Yeesu me mene jecatige, acnenutige teeme cewe me.

⁵¹ Tabe liba acnenutige, teeme kaakesea bägrä cina teebine potera jebenisi gaabe lamlecu je, jejisi egä, "Mäame bägrä ireclota gyene."

⁵² Siige tabe itemlimige, egä lui padare cabu tabe gije abacitige miiji äbitame. Teepi jejisi egä, "Birice bimu duusa kaake poto cidi ca gebale te piba sebmalmu teebine."

⁵³ Babe te ngene jotwige, egä puirage padare cabu Yeesu piba najumi egä, "Mäame bägrä ireclota gyene." Siige tabe teeme binamewale cama Yeesu ne jitrungige.

⁵⁴ Ai lui neeneni manu ciitaca mule gyene Yeesu wawename, tabe liba Yuudea probins cabu ca Galilaya probins cabu me tacnenutige.

5

Yeesu Yepä Biname ne Miiji Jewenige Beteseda Cupicu Gome

¹ Ai ingwe gaabe ca Yeesu Yerusalema babo cewe me ädige Israela biname bime yepä sorijomu tääpume.

² Yerusalema lui kula ca atreji ge. Teeme yepä grana ne yaainusi Maamoi grana ca. Pui grana gome cupicu puga ge, lui awaclomteji ge faib caagecage toro mete ca. Heberu mene ca pui cupicu me ngii lui Beteseda.

³ Mete gawe me bucurage pita biname ge ätwitäneji: irecu määsumäsu biname, ernge niyaniya biname, nuuja poto tääpe budre biname. Teepi jaawagrijsi niye apineca padare ne,

⁴ ingle nuuja taje Yageyame me mename seemo te täinuge niye ne ilbricname. Lui pita biname te niinäce läglentutige niye cabu me, niye te liba lapinicuge, tabe miiji läbituge teeme pita cabu ca.

⁵ Yepä biname puga ge, lui te pita cama senajenäjumi teetieit kämäge ngalebora.

⁶ Yeesu teebine jepänige ätwitäneji puma, siige tabe umle ge, egä tabe lecaleca padare pita cama itu senajenäjumi. Tabe puma cita ca itemlige egä, "Nää, maane singi gäte miiji äbitame?"

⁷ Pita biname te jejige egä, “Babo biname, nuuja biname lica gyene cebine ätityerame cupicu cabu me acaname, niye te liba tuudruge. Cane liga căme ca otnime läbitune, nuuja te uja luupluge.”

⁸ Yeesu jejige egä, “Arpinanti, mäame waaku ne ecati, siige ädi!”

⁹ Tabe piba taatu miiji äbitige, teeme waaku ne ecatige, siige ädige.

Yepä pui lui Sabade bimu ge.

¹⁰ Israela biname cina jejisi, lui te miiji äbitige egä, “Ai lui Sabade bimu ge. Egäsu cotre gyene maane waaku ne acaname.”

¹¹ Tabe jejemige egä, “Lui biname te miiji nawenige, tabe te najige cane waaku ne acatame siige otnime.”

¹² Teepi itemlisi egä, “Laasi nyene pui biname, lui te naajige maane waaku ne acatame siige otnime?”

¹³ Yepä lui te miiji äbitige, tabe umle lica ge, egä laati tage, ingle bucurage biname puga ge, piyepu Yeesu puma cita ca nuuja gome me uja äyebtingtugi.

¹⁴ Ingwe ca Yeesu liba teebine jepänige iiwäreja mete caale bora je, tabe jejige egä, “Maane siige miiji gäte page. Ingwe ca niija mule gone jaawenute, cije maane baborage niija ne jääpänute.”

¹⁵ Puma cita ca pui biname te ädige, Israela biname bine jejemige egä, “Pui lui Yeesu tage, lui te cebine miiji nawenige.”

¹⁶ Siige puma cita ca Israela biname cina gije abacitinisi Yeesu ne sabe wawenime, ingle tabe Sabade bimu cabu pita biname ne miiji jewenige.

¹⁷ Yepä Yeesu teebibine jejemige egä, “Căme Babe te iyeta padare cabu kaakesea jewenige, cane cuta piyepu miiji kaakesea wawena.”

¹⁸ Yeesu me ai mene name pi Israela biname cina magerage singi äbitininisi teebine budre me aglime, ingle tabe Sabade cotre taatu ne lica jetropangtuge, yepä tabe Acejiyame cama yepä me äbitige, teebine lipu Babe ca einige.

Acejiyame me Băgră me Conocăco Pisi Nyene Gwidape bine Wawenime

¹⁹ Yeesu Israela biname bine jejemige egä, “Cane toraca jijenininine weebibine, egä Băgră te nuuja gwidape teemerage singi ca lica jaawenuge, yepä tabe ngena ne jääpänuge Babe te wawena je, tabe cuta pui ne jaawenuge. Babe te ngena ne jaawenuge, cuta Băgră te pui ne jaawenuge.

²⁰ Babe te singi gyene Băgră täapume, siige jaawabuge iyeta gwidape, tabe lui bine jaawenimuge. Weene jepänime Băgră te pita biname ne lipu miiji jewenige, yepä Babe te teebine cerămu potu modamoda kaakesea pagege awaba tabe wawenecame, weene lui cabu ca călu te pa jitäjipi.

²¹ Babe te lipu biname bine budre cabu ca cirege arpinera siige ireclota ceera teebibine, Băgră te cuta piyepu biname bine pagege ireclota ceera, tabe lui bime täapume singi ceerame.

²² Babe te nuuja biname ne lica atrana, yepä tabe Băgră ne ituge conocăco ceera atrana täapume

²³ naace täapume biname cina teebine cuta opo gaabe me acitame, Babe ne lipu opo gaabe me yaacitusi. Laati te Băgră ne opo gaabe me lica yaacituge, cuta Babe ne piyepu opo gaabe me lica yaacituge, lui te Băgră ne tityepuji.

²⁴ Cane toraca mene jijenininine, egä laati te căme mene yäätacijuge, siige jättrunguge teebine, lui te nätyepuji cebine, tabe iyeteta ireclota ne jääpänuge. Pui biname ne lica pagege atrana, ingle tabe uja ituge budre gaabe ne abmala, siige ireclota gaabe cabu ädenige.

²⁵ Cane toraca jijenininine, egä padare te tädenige – siige uja biiri tatyaramtuge – budre biname cina liba Acejiyame me Băgră me tagepogogo ätecija. Laatibi yäätacijemuge, teepi ireclota ne pa jääpänepesi.

²⁶ Babe te Băgră ne yepä kokre ituge ceera, teeme lui pisi nyene biname bine ireclota ceerame.

²⁷ Cuta tabe Băgră ne conocăco ituge ceera atrana täapume, ingle tabe Acejiyame bau ca täduji biname me äbituji.

²⁸ Călu te gone jitinuge, egä padare te cire tädepi budre biname cina teeme tagepogogo ne ätecijame teeme gape bora ca,

²⁹ siige cire täsipesi puma cita ca. Laatibi miijimiji mule ituge waweneca, teepi ngălu căco ireclota cabu me cire tarpinärepi. Yepä laatibi niyaniya mule bine ituge waweneca, teepi atrana täapume cire tarpinärepi teeme mule ibi daremu ne päpänime.”

³⁰ “Cane căme singi ca äblicăco gâne nuuja mule ne wawena. Cane jaatranimune, Babe te lipu najuge. Căme atrana lui conocăco gyene, ingle cane căme singi ne lica jaawenune yepä teeme singi ne jaawenune, cebine lui te nätyepuji.

³¹ Cane liba cămămu laitnäjune, căme aitneja lui toraca lica birige.

³² Yepä pisi nyene nuuja biname, lui te cebine naitnäjenige. Cane umle gâne, egä teeme aitneja căme poto cidi me lui toraca gyene.

³³ Yoo, weene biname bine täätyepemepeye Yoane niye ca äciseja biname bau me teeme mene ätecijame. Lui toraca gyene, tabe peei ne jaaitnäjepi.

³⁴ Cane nuuja singi lica gâne biname me aitneja täápume, yepä cane ai ne naace name pi jiićenine, egä weene pagege ireclota ne päpăname.

³⁵ Yoane lui epu pana ge lampa liiyepu, lui te layenuge, siige yaapaclýaruge. Weene singi ge teeme apaclýera cabu matikolă padare lenajame.

³⁶ Tabe cebine naitnäjepi, yepä nuuja aitneja cuta pisi nyene, lui baborage gyene. Babe te lui kaakesea itu năcărui cane wawename, siige cane lui kaakesea jewenenimine, pui cina naitnăjenisi cebine, egä Babe te cebine itu nätyepuji.

³⁷ Cuta piyepu Babe lui te cebine nätyepuji, tabe cuta naitnăjenige. Weene teeme tagepogogo lica ituge ätecija piyepu teeme opo lica ituge päpăna.

³⁸ Teeme mene te weeme cabu lica yaanajuge, ingle weene lica jăătrunguye Babe te lui ne ituge ätyepa.

³⁹ Weene Oogărăneji mene cabu ca abiberăjininiye, siige apu jingeninige, egä weene iyeteta ireclota ne peema cita ca jăăpănuye. Yepä weene ngenecă lica egleniye, egä căme poto cidi me jiićenige.

⁴⁰ Weene äbwăricinininiye căme bau me otnime ireclota ne päpăname.

⁴¹ Cane nuuja singi lica gâne biname cina cebine awepyerăjame.

⁴² Yepä cane umle gâne weeme poto cidi me; cane umle gâne, weeme ngenecu bora nuuja singi lica gemi Acejiyame täápume.

⁴³ Cane itu tädepene căme Babe me ngii cabu, yepä weene lica itu nawablepeye cebine. Nuuja te liba täduge teemerage ngii cabu, teebine weene jaawabluye.

⁴⁴ Cuta weene lipulipu ätrungame, ingle weemeweme awepyerăja ne jăărnguye, yepä weene eei awepyerăja ne lica jăărnguye, yepä taatu Acejiyame bau ca lui te täduge.

⁴⁵ Weene gone apu jinginuge, egä cane te cirege weebibine Babe me opo gaabe je aitneja. Eewe, weeme aitneja biname lui Moose sine, weene lui cabu me weeme ngenecă atwanena singi bine ituge acrana.

⁴⁶ Weene liga toraca cire jăătrungejiye teebine, weene cuta cebine piba nătrungejiye, ingle tabe căme poto cidi me ituge oogăra.

⁴⁷ Yepä ingle weene teeme oogărăneji mene ne lica jitrungeniye, peei name pi weene lipulipu ätrungame căme mene ne.”

6

Yeesu Faib Tausen Biname bine Engărımıge

(Matayo 14:13-21; Mareko 6:30-44; Luuka 9:10-17)

¹ Ai ingwe gaabe ca Yeesu Galilaya sawa ne yuurige, Tiberiya sawa ca lui ne cuta einenisi.

² Bucurage biname cina teebine ingwe icwisi, ingle teepi itu jăăpănanepesi tabe teeme kokre ca pita biname bine miiji wawenena.

³ Yeesu podo cabu me teeme abiberăja băgră cama jegelige, siige puga adnatige.

⁴ Pui padare Israela biname bime äsuplengta trii padare mameta ge.

⁵ Yeesu ire acitige, jepănige bucurage biname cina teeme bau me otni je. Tabe puma cita ca Pilipo ne jejige egä, “Mine ai biname bime ibibi deedei luma jeletnenemisi?”

⁶ Tabe ai lui naace täápume jiićige Pilipo ne apicetnărame, yepä tabe umle ge, tabe ngena ne jewenenige.

⁷ Pilipo Yeesu ne jejige egä, “Mine puu neeneni hanred silba rarekaake ca buluduu bine liba aletna je, poto cina erwăjinisi, poto cina abamutenisi.”

⁸ Piba teeme nuuja abiberăja băgră, Simona Peteru me igane Andrea te Yeesu ne jejige egä,

⁹ “Ama pisi nyene yepä băgră, lui me piti nemi faib buluduu piyepu neeneni bumate cib, yepä puu ibibi lica gemi iyeta ai biname bime täápume.”

¹⁰ Pui cewe cabu puga ge babo baace. Yeesu teeme abiberăja băgră bine jejemige egä, “Biname bine jejemey adnaterăjame baace papa cabu,” siige teepi adnaterăjige. Teepi iyeta lui faib tausen rooriye ge.

¹¹ Yeesu buluduu bine ewadimige, Acejiyame ne eso ecäridge, siige biname bine ecäremige, lui cina adnatäreji icrajimige puma. Tabe cuta cibi ecäremige, siige teepi erwäjimisi, teepi luma ngälu singi ge.

¹² Teepi liba iyeta ngenegemige, Yeesu abiberäja bägrä bine jejemige egä, “Deedei, cibi pacupacu etomle-cmeyeyeta, nuuja ne gone yaabmaluye.”

¹³ Teepi siige etomlecmisi, lui deedei pacupacu abmalininisi pui faib buluduu cabu ca, biname cina liba erwäjimisi, siige twelb diiba bine jengärिमisi apaname.

¹⁴ Biname cina liba jepänisi ai ciitaca mule ne, Yeesu lui jewenige, teepi jicisi egä, “Toraca, ai lui Acejiyame me pui mename biname gyene, mine lui ne jewagrijenisi otnime.”

¹⁵ Yeesu umle ge egä, “Teepi teeme singi ca cebine acitame naweninisi mope biname tääpume, yepä cäme singi lica ge.” Siige tabe cääri taatu ädige podo cabu me.

*Yeesu Niiye papa cabu Otnige
(Matayo 14:22-33; Mareko 6:45-52)*

¹⁶ Liba mämleteca me, abiberäja bägrä cina piba podo cabu ca täinitnige, sawa ligi me eclige,

¹⁷ poo cabu me acetnäridge, siige sawa ne yuurisi Kaprenauma cewe me äcnärame. Teepi liba sawa cabu jage, ciye te piba tumlige, yepä Yeesu cäro camu ge teeme bau me atyaramta.

¹⁸ Buuwe te kokre cama tipwäjige, siige uule kuu cina modamoda me äbitininisi.

¹⁹ Abiberäja bägrä cina liba poo ne biiri ewäcisi faib kilomiita pana padare me doro cabu ca, teepi puma cita ca jepänisi Yeesu ne niiye papa cabu otni je poo gome me, siige teepi mage wälu ge.

²⁰ Yepä Yeesu teebibine jejemige egä, “Wälu gone, cane säne!”

²¹ Piba teepi singi ge teebine acenutame, siige piba taatu poo te doro ne joomlige, teepi liiyeme singi ge otnime.

Biname cina Yeesu ne Jirngisi

²² Nuuja bimubabu lui biname cina sawa nuuja poto doro cabu itu tabmalimesi, teepi umle äbitininisi egä, “Yepä taatu poo lui te birice aga ge, abiberäja bägrä cina pui gaabe suurumesi sawa nuuja poto doro me, cuta Yeesu teta cama lica tädumi.”

²³ Piba poto poo cina seclige Tiberiya cewe cabu ca eeyeme, teepi luma deedei bine serwäjimumesi, Yageyame te lui deedei tääpume Acejiyame ne eso secärumi.

²⁴ Lui cina puga ge piyepu lui cina seclige, teepi liba umle äbitininisi egä, “Yeesu ama lica gyene, cuta abiberäja bägrä lica gemi,” teepi poo cabu me acetneräjininisi, Kaprenauma cewe me yuurisi Yeesu ne ärngime.

Yeesu Lui Ireclota Deedei Gyene

²⁵ Lui biname cina Yeesu ne jirngisi, teepi teebine puma jepänisi sawa nuuja poto doro je, siige itemlisi egä, “Abiberäja biname, maane cuta liba tädite aima?”

²⁶ Yeesu jejemige egä, “Cane toraca jijenininine weebibine, egä weene cebine naace name pi lica närngeniye, ingle weene ciitaca mule bine itu tepänanemumeye cäme bau ca. Yepä weene naace popi närngeniye, ingle weene ibibi deedei bine serwäjimumeye.

²⁷ Weene gone watata deedei bine jäärngemuye, yepä eei deedei ne jirngepeye, lui te iyeteta ireclota biname bine yäacäranemuge. Lui te Acejiyame bau ca täduji biname me äbituji, tabe te pa icäripi weebibine pui deedei, ingle Aceji Babe te teebine ituge conocäco ceera pei ne wawename.”

²⁸ Teepi Yeesu ne itemlisi egä, “Cine miiji ngena wawena, egä cine Acejiyame me kaakesea bine jaawenimusi?”

²⁹ Yeesu jejemige egä, “Pei lui Acejiyame me kaakesea gyene weeme cabu, egä weene cebine nätrungeniye, tabe lui ne nätyepuji.”

³⁰ Teepi jejisi egä, “Maane ngena ciitaca mule ne jewenenite cine päpäname siige cine piba meebine ätrungame? Maane ngena jewenenite?”

³¹ Maane lipu gäte cibibine maana deedei ceerame, cime kaakesaare cina lui deedei bine serwäjenanemumesi daapo taatu cewe cabu je. Oogäräneji mene te jicenige ai poto cidi me egä, “Acejiyame te cabucewe ca teebibine deedei secäranemuji.”

³² Yeesu jejemige egä, “Cane toraca jijenininine, egä Moose cabucewe ca weebibine deedei lica icäranimuji, yepä cäme Babe te toracarage deedei cabucewe ca sicäraninuge.

³³ Acejiyame me deedei lui tabe sine, cabucewe ca lui te täduji biname bine ireclota ceerame.”

³⁴ Teepi puma cita ca Yeesu ne jejisi egä, “Babo biname, maane pui deedei iyeta padare cabu nicäranipi.”

³⁵ Yeesu jejemige egä, “Cane säne pui ireclota deedei. Lui te căme bau me tāduge, tabe lica pagege loolomecewe jajwi. Cuta lui te cebine nātrunguge, tabe lica pagege niyemecewe jajwi.

³⁶ Yepä cane weebibine ituge jaji, egä weene itu nāpānnumeye cebine, yepä weene ātrunga lica gemi.

³⁷ Iyeta lui căme Babe te nācāranuge, teepi căme bau me saacluge, piyepu laati te căme bau me tāduge, cane lica yāāyecrājune.

³⁸ Cane cabucewe ca lica tādujine căme singi ne wawename, yepä cane tādujine teeme singi ne wawename, lui te cebine nātyepuji.

³⁹ Piiyepu lui te cebine nātyepuji, tabe singi gyene, egä cane nuuja ne lica apesera tabe lui cebine ituge ceera, yepä cane teebibine ireclota cabu me cire yaarpināremepene cerācerāgāābu bimu cabu je.

⁴⁰ Căme Babe te singi gyene, egä iyeta lui cina nāpānusi cane teeme Bāgrā ne piyepu nātrungusi, teepi iyeteta ireclota ne cire jāāpānepesi piyepu cane teebibine cire yaarpināremepene cerācerāgāābu bimu cabu je.”

⁴¹ Israela biname cina gije abacitinisi Yeesu ne āingejame, ingle tabe lipu jiicige egä, “Cane säne deedei, lui te cabucewe ca tādujine.”

⁴² Teepi jiicisi egä, “Cije ai lui Yeesu lica gyene, Yoosepa me bāgrā. Cine umle gemi teeme mage babe. Cije tabe piba lipulipu jiicenige, egä tabe cabucewe ca itu tāduji.”

⁴³ Yeesu teebibine jejemige egä, “Weene peei āingeja mene ne ebmaleye!

⁴⁴ Nuuja te āblicāco căme bau me otni, liba Babe lui te cebine nātyepuji, teebine lica taawenuge căme bau me otnime, siige cane teebine ireclota cabu me cire yaarpinantepene cerācerāgāābu bimu cabu je.

⁴⁵ Acejiyame me mename biname cina itu yoogārūjisi egä, ‘Acejiyame te iyeta biname bine pagege abiberāja.’ Iyeta lui cina Babe ne jāātecijsi, teeme bau ca labiberājinijsi, teepi căme bau me saacluge.

⁴⁶ Ai lui naace tādūpume lica gyene, egä nuuja te ituge Babe ne pāpāna, yepä tabe taatu lui te Babe bau ca tādūji, tabe te teebine ituge pāpāna.

⁴⁷ Cane toraca jijenininine: laati te birige ātrunga, tabe ireclota ne jāāpānuge.

⁴⁸ Cane lui ireclota deedei gāne.

⁴⁹ Weeme kaakesaare cina daapo taatu cewe cabu puu maana deedei ne serwājenanemumesi, yepä teepi budre tābitenājimesi.

⁵⁰ Yepä laati te liba jaarwuge cabucewe ca lui deedei te tāduge, tabe budre ne lica jāāpānuge.

⁵¹ Cane age säne pui ireclota deedei, cabucewe ca lui te tādujine. Laati te liba ai deedei jaarwuge, tabe iyeteta yaanajuge. Cane lui deedei ceera, căme tādūpe gyene, cane lui ne pagege āyemela biname cina iyeteta ireclota ne pāpāname.”

⁵² Puma cita ca Israela biname cina gije abacitinisi teemeteme atraname egä, “Tabe lipulipu mibibine teeme tādūpe ceera mine arwime?”

⁵³ Yeesu jejemige egä, “Cane toraca jijenininine: weene liba căme tādūpe ne lica jaarwuge, Acejiyame bau ca lui te tādujine biname me ābitujine, piyepu liba lica căme uudi ne yaanuge, weeme cabu ireclota lica birige.

⁵⁴ Yepä laati te căme tādūpe ne jaarwuge piyepu căme uudi ne yaanuge, tabe iyeteta ireclota ne jāāpānuge, siige cane teebine ireclota cabu me cire yaarpinantepene cerācerāgāābu bimu cabu je.

⁵⁵ Căme tādūpe lui toraca deedei gyene, căme uudi lui toraca niye gyene.

⁵⁶ Laati te căme tādūpe ne jaarwuge, căme uudi ne yaanuge, tabe căme cabu yaanajuge, cane teeme cabu nanajuge.

⁵⁷ Ireclota Babe te cebine nātyepuji, siige cane teeme cabu ca ireclota ituge pāpāna. Pipu pi laati te căme tādūpe ne jaarwuge, tabe căme bau ca ireclota ne jāāpānuge.

⁵⁸ Ai pui deedei gyene, cabucewe ca lui ituge otni. Ai lui epu deedei lica gyene, weeme kaakesaare cina lui ne serwanenanumesi, yepä teepi āblicāco ge budre cabu ca uucratna. Yepä laati te ai deedei jaarwuge, tabe iyeteta yaanajuge.”

⁵⁹ Yeesu iyeta ai mene jiicemige Kaprenauma cewe je, tabe liba biname bine ebiberājimige teeme abascretna mete cabu.

Mene Iyeteta Ireclota tādūpume

⁶⁰ Yeesu ne lui cina ingwe icwisi, teepi liba itecijemige ai mene, teeme bucurage cina jiicisi egä, “Ai abiberāja lui mage māpurage gyene. Laati te miiji gyene ai ne acatame?”

⁶¹ Nuuja te Yeesu ne lica jejige, yepä tabe umle ābitige, teepi ngena poto cidī me jitranisi, siige tabe itemlimige egä, “Nāā, căme abiberāja te weebibine niija opo me jiwenininige?”

⁶² Cije piba lipu gyene, weene liba äpäna je Acejiyame bau ca lui te täduji biname me äbituji acnenuta cabucewe me, tabe luma niinäce ituge.

⁶³ Aceji Seemo te biname bine ireclota me jaawenimuge, teepi teeme ca äblicäco nuuja gwidape wawena. Cane lui mene bii jijananinine, Aceji Seemo piyepu ireclota cama.

⁶⁴ Yepä weene poto cina cebine lica nätrungeniye.” Yeesu ai mene naace name pi jüicige, ingle tabe ujarage umle äbituji, laati bemi lica teebine ätrunga piyepu laati te teebine budre me pa jaawabepi.

⁶⁵ Puma cita ca tabe cääri jüicige egä, “Ai ingle name pi cane bii jijinine weebibine, egä nuuja te äblicäco gyene căme bau me otni, Babe te liba lica teebine jaawenuge otnime.”

⁶⁶ Yeesu me ai mene name pi bucurage teeme ingwe ca äcwi biname cina teebine ebmalisi, siige teta cama lica otninisi.

⁶⁷ Piba Yeesu teeme twelb abiberäja bägrä bine itemlimige egä, “Weene nää cuta singi gemi cebine abmalame?”

⁶⁸ Simona Peteru te jecwecstige teeme mene egä, “Yageyame, cije cine ingwe ca laati bau me otni? Määme piti nemi mene iyeteta ireclota tääpume!

⁶⁹ Cine siige näätungenisi piyepu umle gemi, egä maane peese näte, Acejiyame te lui ne mara me ituge wawena teeme tääpume.”

⁷⁰ Yeesu teebibine jejemige egä, “Cane weene twelb bine puu iyeta itu jijäcripene, yepä weeme yepä cabu pisi nyene Satani.”

⁷¹ Yeesu Yuuda, Simona Isakariyota me bägrä tääpume jüicige. Ngänuge, tabe puu teeme twelb abiberäja bägrä cabu ca yepä ge, tabe te teebine budre me pa jaawabepi.

7

Yeesu piyepu Teeme Iganewale

¹ Ai ingwe gaabe ca Yeesu Galilaya probins cabu ta otnetnäjige. Tabe singi lica ge cääri cuta Yuudea probins me otnime, ingle Israela biname cina puma padare ne jirngisi teebine budre me acitame.

² Padare te mameta me äbitige Israela biname bime Wäbuyaga mete trii tääpume.

³ Siige iganewale cina Yeesu ne jejisi egä, “Ai cewe ne ebmalı, Yuudea me ädi, piba määme ingwe äcwiyame biname cina jepänenemisi maane lui mule bine jewenenemite,

⁴ ingle laati te singi birige biname cina teeme poto cidi me umle äbitame, tabe nuuja mule ne ogä lica jaawenuge. Yoo, ingle maane apu mule bine jaawenanemute, maane müiji pajecu me äbita biname cina määme poto cidi me umle äbitame.”

⁵ Teeme iganewale cina naace popi ai mene jüicisi, ingle cuta teepi teebine lica jitrungisi.

⁶ Yeesu jejemige egä, “Iyeta padare cabu weeme tääpume papa gyene otni, yepä căme padare te camu gyene atyaramta.

⁷ Ai gawecewe biname bime nuuja ingle lica gyene weebibine ämugetname, yepä teepi cebine nämugetnusi, ingle cane jeitnäjenenemine, egä teeme mule lui niiyarage gemi.

⁸ Äte naaclege weene ai trii tääpume. Cane lica ädenine, ingle căme tääpume müiji padare lica gyene otnime.”

⁹ Tabe apu jüicige, siige Galilaya je enajige.

Yeesu Wäbuyaga Mete Trii cabu

¹⁰ Yepä iganewale cina liba beclige trii tääpume, Yeesu teeme ingwe ca piba ogä ädige, ingle tabe singi lica ge biname cina umle äbitame teeme otni poto cidi me.

¹¹ Yerusalema je puma Israela biname cina teebine trii biname bime sobe cabu jirngisi. Teepi biname bine itemläjemisi egä, “Lese nyene pui biname?”

¹² Biname cina siiyä mene ca ajananinisi teeme poto cidi me. Poto cina jüicisi egä, “Tabe lui müiji biname gyene.” Poto cina jüicisi egä, “Eewe, tabe müiji biname lica gyene. Tabe biname bine yaangletnäjemuge.”

¹³ Yepä teepi cabucabu lica jüicemisi teeme poto cidi me, ingle teepi wälu ge Israela biname bime tääpume.

¹⁴ Trii padare lamlecu je Yeesu iiwäreja mete me abacitige biname bine abiberäjame.

¹⁵ Israela biname cina călu te jitemige, jüicisi egä, “Tabe lipulipu baborage umle gyene. Tabe nuuja abiberäja cabu me lica ituge otni.”

¹⁶ Yeesu jejemige egä, “Căme abiberäja lui căme lica gyene, yepä Acejiyame myene, lui te cebine itu nätyepuji.

¹⁷ Laasi nyene liba singi Acejiyame me singi ne wawename, tabe umle pa läbitepi, egä căme abiberäja lui Acejiyame te itu näcäruji coo cane nää cămerage mene jüicemenine.

¹⁸ Laati te liba teemerage ngene atwanena mene jüicemuge, tabe teeme tääpume awepyeräja ne jäärnguge. Yepä laati te teeme tääpume awepyeräja ne jäärnguge, teebine lui te itu tityepuji, tabe lui conocăco gyene piyepu teeme cabu nuuja walya lica gyene.

¹⁹ Egäsu Moose nata weebibine Cotre icärininuji, yepä weeme nuuja te lica Cotre bine yäacwetnimuge. Weene ngena name pi cebine aglime naweniniye?”

²⁰ Biname cina teebine jejisi egä, “Eewe, cine meebine aglime lica naawenenisi. Määme niiya cable pisi nyene!”

²¹ Yeesu jejemige egä, “Weene calu te jitipi, cane lipu yepä gäabu Sabade bimu cabu kaakesea jaawenepene.

²² Moose te cotre icärininuji weene weeme tääpe matikolä iirputame Acejiyame me cewecu acata täापume. (Puu toraca Moose te lica ge, yepä mime kaakesaare cina jegednujisi pui mule ne.) Siige weene pui cewecu bägrä ne jaawenuye tääpe iirputa ca, ngänu gyene liba Sabade bimu.

²³ Yoo siige, weene liba bägrä me tääpe cabu cewecu jaawenuye Sabade bimu cabu naace täापume Moose me cotre ne äcwetname, weene piba ngeno memi claabe, cane liba biname ne iyeta miiji jaawenepene Sabade bimu cabu.

²⁴ Ätecitipeye papapapa atrana mule, miiji weene niinäce cängena ingle ne ärngi, piba atrana.”

Yeesu nää Keriso Sine?

²⁵ Poto Yerusalema biname cina jiicisi egä, “Cije ai lui pui biname lica gyene, teepi lui ne aglime jewenenisi?”

²⁶ Weene jepäneye, tabe lipu pajecurage jiicemenige, yepä teepi nuuja mene lica ge! Ire taatu jetwisi! Pama modamoda biname cina umle bäbitininisi, egä toraca tabe Keriso sine biname bine niiya cabu ca äsecreraame?”

²⁷ Yepä tabe äblicäco gyene Keriso lenaja, ingle mine umle gemi, egä tabe luma cita ca gyene. Keriso te liba otni, nuuja biname te umle lica gyene, egä tabe luma cita ca gyene.”

²⁸ Yeesu iiwäreja mete caale bora je biname bine ebiberäjimige. Tabe baborage tagepogogo ca jiicemige egä, “Yoo, weene umle gemi cane, piyepu weene umle gemi cane luma cita ca gäne. Yepä cane cäme singi ca lica itu tädujine. Lui te cebine itu nätyepuji, tabe sine toraca, yepä weene umle lica gemi tabe.

²⁹ Cane umle gäne tabe, ingle cane teeme bau ca itu tädujine. Tabe te cebine nätyepuji.”

³⁰ Piba teepi singi ge teebine oomlaname, yepä nuuja te ime ne lica ecitige teeme papa cabu me, ingle teemerage padare te camu ge atyaramta.

³¹ Bucurage biname cina teebine jitrungisi, siige teemeteme ätemläjiniisi egä, “Keriso liba cire tädepi, nää tabe pama cerämu apu poto ciitaca mule bine cire jaaweneme pi ai biname te lipu jewenenemige?”

Iiwäreja Mete Awamuta Biname bine Jityepimisi Yeesu ne Oomlaname

³² Parisea sigu biname cina itecijemige, biname cina lipu siiyā mene ca jiicemisi Yeesu poto cidi me, siige teepi modamoda iiwäreja biname cama poto iiwäreja mete awamuta biname bine jityepimisi Yeesu ne oomlaname.

³³ Yeesu biname bine jejemige egä, “Cane matikāli padare cerämu nanajinige weene cama, piba cane teeme bau me pa lacnenutepene, cebine lui te nätyepuji.

³⁴ Weene piba cebine pa närngepeye, yepä weene lica pa näpänepeye, ingle weene äblicäco gemi otni, cane lui puupu cabu me pa lädepene lenajame.”

³⁵ Puma cita ca Israela modamoda biname cina teemeteme jitransi egä, “Tabe baa liiyeme otnime äbitinige, siige piba mine äblicäco teebine päpäna? Nää, tabe pama ngene jotwanenige Griik gawe cabu me otnime, Israela biname cina luma icrajinige, siige puma Griik biname bine abiberäjame?”

³⁶ Ngena täापume tabe apu jiicige egä, ‘Weene cebine pa närngepeye, lica pa näpänepeye,’ cuta egä ‘Cane liiyeme pa lädepene lenajame, weene äblicäco piiyeme otni.’ Tabe ngena täापume pepu jiicige?”

Ireclota Niije

³⁷ Trii padare me ngäluagaabe bimu lui baborage gyene. Yeesu piba abujängtige, baborage tagepogogo ca jiicige egä, “Laati te liba niiyemecewe, tabe miiji cäme bau me otni niije nanime!

³⁸ Mene oogäräneji gyene, egä laati te cebine nätrunguge, ireclota niije te teeme ngenecu cabu ca tuudruge.”

³⁹ Yeesu ai mene Aceji Seemo poto cidi me jiicige. Laatibi Yeesu ne jäätrungusi, teepi pagege Aceji Seemo ne päpäna. Pui padare cabu teebine cäro camu ge ätyepa, ingle Yeesu camu ge acnenuta cabucewe me teeme apaclyera cabu me.

Biname cina Abelaninisi Yeesu name pi

⁴⁰ Laatibi Yeesu me ai mene itecijemige, teeme poto cina jiicisi egä, “Toraca, ai biname lui pui mename biname gyene, mine lui ne jewagrijenisi.”

⁴¹ Poto bime ngene atwanena apu ge egä Yeesu lui Keriso sine, Acejiyame te lui ne cirege ätyepa biname bine niyya cabu ca äsecrerame. Yepä poto cina jiicemisi egä, “Keriso äblicäco Galilaya probins cabu ca otni,

⁴² Ingle Oogäränejji mene te jiicenige egä tabe Daawida me kaakesaare gyene, siige tabe Daawida me cewe Betelehema cabu ca cire tädepi.”

⁴³ Puma cita ca biname cina abelaninisi Yeesu miji pi.

⁴⁴ Poto cina singi ge teebine oomlaname, yepä nuuja te ime ne lica ecitige teeme papa cabu.

Israela Modamoda Biname Ätrunga cäco Ge

⁴⁵ Iiwäreja mete ne lui cina jaawamutusi, modamoda iiwäreja biname piyepu Parisea sigu biname cina lui bine jityepimisi Yeesu ne oomlana täapume, siige teepi ime taatu äcnärige. Lui cina teebibine jityepimisi, teepi itemlimisi egä, “Weene ngena name pi teebine lica secaniye aima?”

⁴⁶ Awamuta biname cina jejemisi egä, “Cine nuuja biname ne niinäce lica ituge ätecija apu mene iicema cabu je.”

⁴⁷ Piba Parisea sigu biname cina jejemisi egä, “Oo siige, tabe cuta weebibine bingletnäjinige?”

⁴⁸ Weene nää ituge ätecija, egä Parisea biname bime yepä te coo modamoda biname bime yepä te teebine jitrungenige?”

⁴⁹ Yepä ai papa biname, lui bime cabu Acejiyame me claabe pisi nyene, ingle teepi umle lica gemi Moose me Cotre, teepi te jitrungenisi teebine.”

⁵⁰ Nikodemo, lui pui Parisea biname bime cabu ca yepä ge piyepu lui te Yeesu ne niinäce yäädärepä ciye cabu je, tabe jejemige egä,

⁵¹ “Mime Cotre te nijenininige, egä mine äblicäco biname ne papa atrana. Mine miiji niinäce teebine ätecija piyepu umle äbita, egä tabe ngena ne ituge wawena.”

⁵² Puma cita ca teepi jejisi egä, “Cuta maane peese näte nuuja Galilaya biname! Maane Oogäränejji mene miiji abiberärepä umle äbitame, egä Acejiyame me nuuja mename biname te Galilaya probins cabu ca lica cire tädepi!”

⁵³ Siige puma cita ca teepi iyeta mete me etengläjisi.

8

Sargi Magebi

¹ Yeesu Olibi Uli podo cabu me ädige.

² Nuuja bimu krokerage tabe cuta cääri acnenutige iiwäreja mete cabu me. Biname cina abasecretnige teeme bau me, siige tabe adnatige, giye abacitige teebibine abiberäjame.

³ Puma cita ca cotre abiberäja biname piyepu Parisea sigu biname cina yepä magebi ne tocanisi, lui ne jwoomlisi sargi mule wawena cabu, biname sobe cabu ocitisi,

⁴ siige Yeesu ne jejisi egä, “Abiberäja biname, cine ai magebi ne sargi mule wawena cabu twoomlisi.

⁵ Moose me Cotre te apu nijinininige, egä apu muleyame biname bine miiji kula ca äbyecra budre me aglime. Maane lipu ngene jotwanenite ai poto cidid me?”

⁶ Teepi ai mene naace name pi jejisi, ingle teepi singi ge teebine mene cabu oomlaname, siige ingle ne päpäname teebine aitnejame. Yeesu äcupige, ime kukluta ca mene yoogäridge gawe cabu.

⁷ Teepi liga teebine tii jewenanisi, tabe jeclajutige, jejemige egä, “Weeme cabu liba biname pisi nyene, lui te umle cäco niyya mule wawena, tabe te niinäce kula ne yaajarege teeme cabu me.”

⁸ Tabe cuta cääri äcupige, gawe cabu ngii yoogäridge.

⁹ Teepi liba Yeesu me mene itecijemige, teepi ngene ca eglisi egä cime niyya mule piti nemi. Siige teepi giye abacitinisi yepäyepä atenglejame, modamoda biname cabu ca ngälu matimati biname, ngälu Yeesu taatu te ityepurige pui magebi cama, teeme opo gaabe je lui te joclajutige.

¹⁰ Piba Yeesu jeclajutige, utemlige egä, “Magebi, lete nemi teepi, lui cina meebine naacanisi aima kula ca äbyecrame? Cije teepi lica jewenisi peei mule ne?”

¹¹ Tabe jejige egä, “Eewe babo biname.” Puma cita ca Yeesu jojige egä, “Cane cuta meebine kula ca lica naacnenine. Äte oculi, ingwe ca niyya mule gone jaawenute!”

Yeesu Apaclyera Gyene Biname bime täapume

¹² Yeesu liba biname bine cääri ebiberäjimige, tabe jejemige apu egä, “Cane age säne apaclyera ai gawecewe täapume. Laati te cebine ingwe näcwuge, tabe krokeciye cabu lica waatnuge, ingle tabe apaclyera ne jääpänuge teeme ireclota täapume.”

¹³ Puma cita ca Parisea sigu biname cina Yeesu ne jejisi egä, “Maane määmämu aitnäjenite, pipu pi määme aitneja lui toraca lica gyene.”

¹⁴ Yeesu jejemige egä, “Cane puu cämämu aitnäjenine, yepä căme aitneja lui papa me lica äbitenige, ingle cane umle gâne, cane luma cita ca gâne piyepu liiyeme ädenine. Yepä weene nuuja umle lica gemi, cane luma cita ca gâne piyepu liiyeme ädenine.

¹⁵ Weeme atrana lui biname bime pana gyene. Cane nuuja biname ne licarage pa jaatranepene.

¹⁶ Yepä cane liba atrana je, căme atrana lui conocăcorage ge, ingle cane taatu lica gâne. Babe lui te cebine nätyepuji, tabe cane cama gyene.

¹⁷ Nata weeme Cotre mene te cuta jiicenige, egä neeneni biname bime aitneja lui ibibi birige.

¹⁸ Yoo siige, cane cämämu aitnäjenine piyepu Babe, lui te cebine nätyepuji, tabe cuta naitnäjenige cebine.”

¹⁹ Puma cita ca teepi Yeesu ne itemlisi egä, “Baa, lese nyene määme babe?” Yeesu jejemige egä, “Weene umle lica gemi cane piyepu căme Babe. Weene liga umle cirege cane, weene cuta piba umle cirege tabe.”

²⁰ Yeesu ai mene jücemige, tabe liba biname bine ebiberäjimige iiwäreja mete caale bora je rarekaake acrana puupu gome. Siige nuuja te teebine lica joomlige, ingle teeme padare te camu ge atyaramta.

“Weene Äblicăco Gemi Otni, Cane Liiyeme Ädenine”

²¹ Yeesu biname bine căări mene jejanemige. Tabe apu jüicige egä, “Cane ama cita ca äyebtingtenine. Weene pa nărngepeye cebine, yepä weene weeme niya mule cabu budre cire äbitipeye. Weene äblicăco gemi otni, cane liiyeme ädenine.”

²² Puma cita ca Israela biname cina jüicisi egä, “Nää, tabe pama teemämu aglime pa läbitepi, ingle tabe jüicige egä, ‘Weene äblicăco gemi otni, cane liiyeme pa lädepene?’ ”

²³ Yeesu jejemige egä, “Weene lui gawecewe cabu ca gemi, yepä cane lui cabucewe cabu ca gâne. Weene ai gawecewe tääpu memi, yepä cane lica gâne ai gawecewe tääpume.

²⁴ Cane jüjinine, egä weene budre läbitininuye weene niya mule cabu. Weene liba ätrunga lica birige, egä cane pui biname gâne, cane lui poto cidi me jüicenenemine, weene toraca budre cire äbitipeye.”

²⁵ Teepi puma cita ca teebine itemlisi, “Baa, maane laasi näte?” Yeesu jejemige egä, “Cane uja weebibine lipu ituge jaji?”

²⁶ Căme bucurage mene piti nemi weeme poto cidi me iicemame piyepu weebibine ablawejame. Yepä cane peei taatu mene jaajananemune biname bine, cane lui me nătecjanuge teeme bau ca, cebine lui te nätyepuji. Tabe lui toraca gyene.”

²⁷ Teepi opo lica ewatnisi, egä Yeesu Babe poto cidi me jüicige.

²⁸ Puma cita ca Yeesu teebibine cuta căări jejemige egä, “Weene liba pa nawepăntepeye cebine, Acejiyame bau ca lui te tädujine biname me äbitujine, piba weene umle pa äbitipeye, egä cane pui biname gâne, cane lui poto cidi me jüicimimune. Cane nuuja gwidape ne căme singi ca lica jaawenune, yepä Babe te ngena ituge abiberäja cebine, cane peei poto cidi me taatu jüicimimune.

²⁹ Lui te cebine nätyepuji, tabe pisi nyene cane cama. Tabe cebine taatu lica ituge abmala, ingle cane ngena bine jaawenetnäjimune, peei cina teebine ngenecu mijji me jaawenusi.”

³⁰ Bucurage biname cina Yeesu ne jitrungisi, teepi liba itecijemige tabe apu iicema je.

Laati Bemı Toraca Abrahamo me Bägrăwale

³¹ Lui Israela biname cina Yeesu ne jitrungisi, tabe teebibine jejemige egä, “Weene liba căme abiberäja ne kokre cama joomle-niye, weene căme toracarage abiberäja băgră gemi piba.

³² Piba weene umle läbitininuye, toraca ngena gyene, siige pui toraca te weebibine kälyä jiwenininuge.”

³³ Teepi opo lica jewatnisi, Yeesu ngena tääpume jejemige, siige teepi jejisi egä, “Cine lui Abrahamo me kaakesaare gemi. Cine nuuja biname me aletnäneji biname lica gemi, cije maane ngena name pi nijinite cine kälyä äbitame?”

³⁴ Yeesu jejemige egä, “Căme mene nacateye: iyeta lui cina niya mule bine yaacnemusi, pui niya mule cina teebibine kokre joomle-musi epu pana, aletnäneji biname ne teeme yageyame te lipu kokre joomluge.

³⁵ Aletnäneji* biname te iyeteta lica yaanajuge teeme babo biname me mete cabu. Yepä băgră te iyeteta teeme babe me mete cabu yaanajuge.

* **8:35:** aletnäneji biname: Nuuja taje cuta nuuja te jaaletnuge pui biname ne coo yageyame te jaajuge egä, “Maane siige căme cabu ca, määme singi gaabe ädepi.”

³⁶ Siige Bāgrā te liba weebibine kālyā jiwenininuge niīya mule cabu ca, weene piba toraca kālyā birige.

³⁷ Yoo, cane umle gāne, egā weene Abrahamo me kaakesaare gemi. Yepā weene cebine aglime naweniniye, ingle weene singi lica gemi cāme mene ātecijame.

³⁸ Cane jijaninaninune, cane ngena ituge pāpāna Babe me gome. Weene cuta piīyepu jaawenimuye, weeme babe te ngeno me jijaninaninuge weebibine.”

³⁹ Teepi jejisi egā, “Cime babe Abrahamo sine.” Yeesu jejemige egā, “Weene liga Abrahamo me bāgrā cirege, weene epu mule bine cire jaawenemejiye tabe liīyepu.

⁴⁰ Yepā weene siige cebine aglime naweniniye, ingle cane toraca mene poto cidi me ituge jajanena, Babe bau ca cane lui mene ituge ātecijana. Abrahamo weeme pana lica ābituji.

⁴¹ Weene weemerage babe ne jitudaneniye.” Teepi puma cita ca Yeesu ne jejisi egā, “Cine babe cāco biname lica gemi. Cime yepā taatu Babe pisi nyene. Tabe lui Acejiyame sine.”

⁴² Yeesu jejemige egā, “Liga Acejiyame weeme Babe cirege, weene piba cāme tāāpume singi cirege, ingle cane teeme bau ca tādujine, siige cane page age sāne. Cane cāme singi ca lica tādujine, yepā tabe te cebine nātepuji.

⁴³ Weene ngena name pi cāme mene umle lica gemi? Weene naace name pi umle lica gemi cāme mene, ingle weeme tablame hermemiye cāme mene ātecija wālu name pi.

⁴⁴ Satani peese nyene weeme babe, siige weene weeme babe me singi bine jaawenemuye. Tabe lui agliyame gyene achedna cabu ca ngālu page. Tabe toraca mene ne jigyeniye, ingle teeme bau ca cude padare gyene. Tabe liba walya waatromuge, tabe teemerage mule ne jaawenuge; tabe walya biname gyene, babe gyene iyeta walya tāāpume.

⁴⁵ Cebine weene pui name pi lica nātrunguye, ingle cane jūicemimune, ngena gyene toraca.

⁴⁶ Baa, weeme nuuja te jaawabudnitege, egā cane ngena niīya ne ituge wawena. Cane liba toraca mene poto cidi me jūicemune, weene piba ngena name pi lica cebine nātrunguye.

⁴⁷ Laati te Acejiyame bau ca gyene, tabe te teeme mene jāātecijuge. Yepā weene Acejiyame me bāgrāwale lica gemi, peei name pi weene lica teebine jāātecijuye.”

Yeesu piīyepu Abrahamo

⁴⁸ Israela biname cina Yeesu ne jejisi egā, “Cime mene pama toraca gyene, egā maane Samariya biname gāte, cuta määme niīya cable pama pisi nyene?”

⁴⁹ Yeesu teebibine icisāremige egā, “Eewe, cane niīya cable cama lica gāne. Cane cāme Babe ne opo gaabe me ecitenine, yepā weene cebine opo gaabe me lica naciteniye.

⁵⁰ Cane singi lica gāne ngii te babo ābitame. Nuuja te pisi nyene, lui te singi ge cāme ngii te babo ābitame. Tabe te biname bine cirege atrana.

⁵¹ Cane toraca jijenininine weebibine, egā laati te cebine nātrunguge, tabe budre lica läbituge.”

⁵² Puma cita ca Israela biname cina jejisi egā, “Siige cine aga toraca umle bäbitininago, egā määme niīya cable pisi nyene. Abrahamo uja budre äbituji, piīyepu Acejiyame me mename biname cina uja budre äbitininujisi, siige maane piba cije lipu jūicenite, egā laati te liba määme mene yāātecijuge, tabe budre lica läbituge.

⁵³ Nata maane baborage lica gāte mime kaakesaare Abrahamo bau ca, lui te budre itu läbitepi. Piīyepu mename biname cina budre ituge äbita. Maane lipu ngene jotwaninite, egā maane baa laasi nāte?”

⁵⁴ Yeesu teebibine jejemige, “Cane liba cāmāmu babo läbitune, peei lui toraca lica ge. Yepā Babe te cāme ngii ne babo jaawenuge, weene lui ne weeme Acejiyame ca eineniye.

⁵⁵ Weene lica ituge umle äbita teeme poto cidi me, yepā cane umle gāne tabe. Cane liba iicana je, egā cane umle lica gāne tabe, cane piba weeme pana walya biname gāne. Yepā cane umle gāne tabe piīyepu teeme mene jāātecijune.

⁵⁶ Weeme kaakesaare Abrahamo gege ge, ingle tabe umle ge, egā tabe cebine cirege pāpāna. Tabe nāpānuji, siige mage gege äbituji.”

⁵⁷ Israela biname cina jejisi egā, “Maane camu gāte fifti kāmāge oomlana, maane piba cije lipu pi jūicenite, egā maane Abrahamo ne ituge pāpāna?”

⁵⁸ Yeesu jejemige egā, “Cane toraca jijenininine weebibine, egā cane uja ge, Abrahamo ingwe ca aplimlujī.”

⁵⁹ Puma cita ca Israela biname cina kula bine ewadimisi teebine äbyecrame, yepā Yeesu ämlitige, siige iiwāreja mete ne sebmaliye.

9

Yeesu Miiji Jeweniye Ireecu Määsumäsu Biname ne

1 Yeesu otni cabu irecu määsumäsu biname ne jepāniye, lui te pepu ärngeji ge.

² Abiberäja bägrä cina Yeesu ne itemlisi egä, “Abiberäja biname, laati me niya mule name pi tabe apu gyene, teeme coo teeme mage babe bime?”

³ Tabe jejemige egä, “Tabe irecu määsumäsu ärngeji lica gyene teeme niya mule ingle name pi coo teeme mage babe bime niya mule name pi. Tabe naace name pi irecu määsumäsu gyene egä Acejiyame me kokre ne teeme cabu ca päpäname.

⁴ Bimu apacljera te liba enajenige, mine miiji teeme kaakesea wawena, cebine lui te nätyepuji. Ciyye te tädenige, piba nuuja te äblicäco kaakesea wawena.

⁵ Cane liba gawecewe cabu säne, cane apacljera gäne gawecewe tääpume.”

⁶ Ai mene ingwe gaabe ca Yeesu mote ne eclmutige gawe cabu me, gawe cama elengläcitige, siige pui ngate ne ecatige, teeme irecu bine aaganige.

⁷ Piba tabe jejige egä, “Äte ädi, opo äcisäji Siloama cupicu cabu.” (Siloama me aboclomta lui ‘Ätyepäneji’.) Tabe ädige, opo äcisäjige, siige irecu aasatäneji tacnige.

⁸ Puma cita ca lui biname cina teeme gome icrajige, cuta lui cina teebine niinäce ituge päpänena ätina je, teepi ätemläjinisi egä, “Nää, age sena pui biname, mine lui ne ätina je jääpänanus?”

⁹ Poto cina jicisi egä, “Yoo, tabe sine,” poto cina egä, “Eewe, tabe lica gyene, yepä teeme opo pui biname me pana gyene.” Yepä tabe pui biname te teemämu jüicige egä, “Cane age säne pui biname.”

¹⁰ Teepi itemlisi egä, “Määme irecu cina lipulipu baasatäsi?”

¹¹ Tabe jejemige egä, “Biname ngii Yeesu, tabe te mote ne elengläcitige gawe cama, siige pui ngate ca naganige cäme irecu, nätyepige Siloama cupicu cabu cane opo äcisejame. Cane liba ädine, siige jicisäjine, piba cäme irecu cina aasatäsi.”

¹² Teepi teebine itemlisi egä, “Lese nyene tabe?” Tabe jejemige egä, “Cane umle lica gäne.”

Parisea Sigu Biname cina Itemläjisi Lui Irecu Määsumäsu Biname te Miiji Äbitige

¹³ Lui irecu määsumäsu biname te miiji bäbitige, teebine ecanisi Parisea sigu biname bime cabu me.

¹⁴ Lui bimu cabu Yeesu gawe ne mote cama elengläcitige, siige teeme irecu bine miiji jaawenige, pui lui Sabade bimu ge.

¹⁵ Puma cita ca Parisea sigu biname cina teebine itemlisi egä, “Määme irecu lipulipu miiji bäbitäsi?” Tabe jejemige egä, “Pui biname, tabe gawe ne teeme mote cama elengläcitige, pui ngate ca cäme irecu naganige. Cane opo äcisäjine, siige page cane gwidaape bine jepänenemine.”

¹⁶ Piba poto Parisea sigu biname cina apu jicisi egä, “Lui biname te pepu mule ne jwenenige, tabe äblicäco ge Acejiyame bau ca otni, ingle Sabade cotre ne jetropangtige.” Yepä poto cina jicisi egä, “Lipu miiji gyene conocono biname te apu ciitaca mule bine waweneca?” Siige teepi yepä ngene atwana lica ge Yeesu poto cidi me.

¹⁷ Parisea sigu biname cina cuta cääri itemlisi pui biname ne egä, “Maane lipu ngene jotwaninite pui biname poto cidi me, meebine lui te miiji naawenige?” Tabe jejemige egä, “Cane apu ngene jotwaninine, egä tabe lui Acejiyame me mename biname gyene.”

¹⁸ Yepä Israela biname cina ätrunga lica ge, egä tabe irecu määsumäsu ärngeji ge, siige page jepänenemige, peei name pi teepi teeme mage babe bine ala taasglicisi,

¹⁹ äätelisi egä, “Nää, ai lui weeme bägrä gyene? Lipu, tabe irecu määsumäsu ärngeji ge? Tabe page siige lipulipu jepänenemige?”

²⁰ Mage babe cina jejemäsi egä, “Yoo, cine umle gegi egä tabe cime bägrä gyene, cuta irecu määsumäsu ärngeji ge,

²¹ yepä cine nuuja umle lica gegi, tabe lipulipu irecu bii baasatige coo laati te miiji bii jwenenige teebine. Weene teebine itemleye. Tabe baborage gyene weebibine daremu mene jajime.”

²² Teepi naace popi apu jicäsi, ingle teepi wälu ge Israela modamoda biname bime tääpume. Israela biname cina apu ituge iicana, egä laati te jaawabudnituge Yeesu ne, egä tabe Keriso sine, Acejiyame lui ne cirege ätyepa biname bine niya cabu ca äsecrerrame, piba pui biname ne yääyeblingtisi teeme irecu ätumuta cabu ca.

²³ Peei name pi teeme mage babe cina jicäsi egä, “Tabe baborage gyene. Teebine itemleye.”

²⁴ Puma cita ca Parisea sigu biname cina cuta cääri ala tesoglicisi irecu määsumäsu ärngeji biname ne, jejisi egä, “Cine umle gemi, egä lui biname te meebine miiji naawenige, tabe conocono biname gyene. Maane lipu ngene jotwaninite teeme poto cidi me? Maane ngene gone näätimaluge, egä Acejiyame te näätacijenige, peei name pi maane toraca mene nijini.”

²⁵ Tabe jejemige egä, “Cane umle lica gäne, egä tabe conocono biname gyene coo liiyepu, yepä cane umle gäne, cane irecu määsumäsu ge niinäce, siige page jepänenemine.”

²⁶ Puma cita ca Parisea sigu biname cina itemlisi egä, “Tabe ngena jewenige mäame irecu cabu? Tabe lipulipu meebine irecu miiji naawenige?”

²⁷ Tabe jejemige egä, “Cane uja bii jijinine, yepä weene lica bitecjinige. Weene ngena täapume singi gemi peei yepä gwidape täapume cääri ätecjaname? Pama weene singi gemi cuta teeme abiberäja bägrä me äbitamel”

²⁸ Parisea biname cina teebine jisädisi, jejisi egä, “Maane peese näte teeme abiberäja bägrä. Cine Moose me abiberäja bägrä gemi.

²⁹ Cine umle gemi, egä Acejiyamerage te Moose ne jejanuji, yepä cine peei biname poto cidi me umle lica gemi, egä tabe luma cita ca gyene.”

³⁰ Pui biname te jejemige, “Tabe cäme irecu bii napatnige, yepä weene umle lica gemi, tabe laasi nyene. Cane calu te nätige wemiji pi.

³¹ Mine umle gemi, egä Acejiyame te conocono biname ne lica jäätecijuge, yepä tabe eei biname ne jäätecijuge, lui te teebine opo gaabe me yaacitanuge piyepu teeme singi ibibi jaaweninuge.

³² Agedna cabu ca ngälu page nuuja biname te lica ituge ätecija, egä biname te irecu määsumäsu ärngeji biname me irecu bine jaapatnige.

³³ Acejiyame te peei biname ne liga lica cire täätyejeji, tabe ibibi lica gyene apu mule bine wawenecame.”

³⁴ Parisea biname cina jejisi teebine egä, “Maane niyarage biname gäte mäame aplimla cabu ca ngälu page. Maane ngena miiji gäte cibibine abiberäjame!” Siige teepi teebine teeme abasecretna mete cabu ca ijarisi.

Seemo Ireclota Ngalebora Lui Ireku Määsumäsu Gemi

³⁵ Yeesu itecijige, egä tabe lui biname ne miiji jewenige, teebine sijarisi abasecretna mete cabu ca. Tabe liba teebine jepänige, tabe jejige egä, “Maane nää jitrungenite Acejiyame bau ca lui te täduji biname me äbituji?”

³⁶ Tabe pui biname te Yeesu ne jejige egä, “Babo biname, naji cebine, tabe laasi nyene, cane teebine piba jitrungenine?”

³⁷ Yeesu jejige egä, “Maane uja biiri jepänite teebine. Tabe page maane cama mene jicemenige.”

³⁸ Tabe Yeesu ne jejige egä, “Yageyame, cane näätungenine meebine.” Piba tabe kokorare ca ääpednutige teeme opo gaabe je.

³⁹ Yeesu puma cita ca jicige egä, “Cane naace täapume ai gawecewe cabu me itu tädujine biname bine atraname siige piba irecu määsumäsu cina päpänename, cuta lui cina jääpänanemusi teepi irecu määsumäsu me äbitame.”

⁴⁰ Poto Parisea sigu biname lui cina teta cama puga ge, itecijemige Yeesu ai mene iicema je, siige teepi teebine itemlisi egä, “Nää, maane apu naangeninige, egä cine cuta irecu määsumäsu gemi?”

⁴¹ Yeesu jejemige egä, “Weene liba toraca irecu määsumäsu lenaja je, piba nuuja te äblicäco weebibine niija mule poto cidi me aitneja; yepä weene jicenenemiye, egä weene cängena jepänenemiye, siige weebibine cirege atrana, ingle weeme niija mule piti nemi.”

10

Ngene ca Agli Mene Maamoi poto cidi me

¹ Yeesu jicemige egä, “Cane toraca jijenininine weebibine, egä lui biname te maamoi caale bora me lica labacituge grana cabu, yepä tabe jaageluge caale nuuja poto ca, tabe lui eromaame birige piyepu cuta agliyame birige.

² Yepä lui biname te labacituge caale granarage cabu, tabe peese nyene maamoi ire atwi biname.

³ Teeme täapume grana ire atwi biname te grana ne jiiitnuge, piyepu maamoi cina umle gemi teeme tagepogogo, siige tabe teemerage maamoi bine ngiirage ca jääjäcrimuge, caale cabu ca yääsemuge.

⁴ Tabe liba teebibine yääsemuge, tabe niinäce gaabe me läduge. Maamoi cina teebine ingwe yääcwusi, ingle teepi umle birige teeme tagepogogo.

⁵ Teepi idne biname ne ingwe lica yääcwusi. Teepi teeme bau ca luucratnuge, ingle teepi umle lica birige teeme tagepogogo.”

⁶ Yeesu teebibine ai ngene ca agli mene jejemige, yepä teepi opo lica ewatnisi, egä ngena tääpu myene.

Mijirage Maamoi Ire Atwi Biname

⁷ Yeesu cääri jicemige egä, “Cane toraca jijenininine weebibine, egä cane age säne grana maamoi bime täapume.

⁸ Iyeta lui cina căme niinăce gaabe ca itu saaclepi, teepi lui eromaame gemi piyepu aglecayame gemi, yepă maamoi cina teebibine lica jäätecijemusi.

⁹ Cane age săne grana. Laati te căme cabu ca tabacituge, tabe ireclota ne jääpănuge. Tabe tabacituge caale ngalebora me, cuta lasatuge, siige tabe jääpănimuge baace loolo me.

¹⁰ Eromaame te yepă tāduge acatame, sabe wawename piyepu budre me aglime. Yepă cane te tādujine naace tääpume egă maamoi cina toraca miijirage ireclota ne păpăname.

¹¹ Cane age săne miijirage maamoi ire atwi biname, lui te teeme ireclota ne yăăyemaluge maamoi name pi.

¹² Liba daremu cama biname te maamoi bine ire jaatwemuge, lui te toraca ire atwi biname lica birige piyepu lui me maamoi lica birige, tabe liba jääpănuge wulp ne otni je, tabe maamoi bine yaabmalimuge, luucruge. Puma cita ca wulp te maamoi bine jäängecrerăjimuge, maamoi cina maramara yaaplidnărusi.

¹³ Daremu cama lui ire atwi biname te luucruge, ingle teeme toracarage ngenecu lica gyene maamoi bime tääpume.

¹⁴ Cane săne miijirage maamoi ire atwi biname. Cane umle găne căme maamoi, teepi umle gemi cane,

¹⁵ epu pana Babe te lipu umle gyene cane, cane lipu umle găne tabe. Cane căme ireclota ne pa yăăyemalepene maamoi name pi.

¹⁶ Căme piti nemi poto maamoi ai caale cabu lui lica gemi. Cane cuta miiji teebibine awecetnăra, siige teepi căme tagepogogo cire nătecijepesi. Siige yepă maamoi tomi cirege, cuta teeme tääpume yepă ire atwi biname cirege.

¹⁷ Babe te singi gyene căme tääpume, ingle cane singi găne căme ireclota ne äyemelame naace tääpume cuta căări păpăname.

¹⁸ Nuuja biname te lica pagege cebine teeme singi ca agli, yepă cane cămămu pagege căme ireclota ceera budre tääpume. Căme conocăco pisi nyene căme ireclota ceerame cuta căări păpăname. Căme Babe te apu ituge jaji cane wawename.”

¹⁹ Yeesu me ai mene te Israela biname bine cuta căări maramara ngene atwănena me jewenimige.

²⁰ Teeme bucurage cina jiicisi egă, “Teeme niia cable pisi nyene. Tabe buduma biname gyene. Weene teebine ngeno me jitecijiye?”

²¹ Yepă poto cina jiicisi egă, “Niia cable cama biname te äblicăco apu mene iicema. Ingle naace gyene, niia cable cama biname te lipulipu irecu määsumăsu biname bine jaawenimuge teepi păpănename.”

Israela Biname cina Yeesu ne jigiyisi

²² Padare te tatyaramtuge Yerusalemă je iiwăreja mete ne ngene apecname. Pui lui găbu padare ge.

²³ Yeesu liba ädige Solomona me caagecage toro mete gawe cabu Acejiyame me iiwăreja mete caale bora je,

²⁴ piba Israela biname cina teebine jewaclomtisi, jejisi egă, “Maane lipu lecaleca padare naanajinige cibibine jaji căco, egă maane laasi năte? Nijini conocăco, maane liba Keriso săte, Acejiyame te lui ne ätyepame tiucuji biname bine măpu cabu ca äsecrăme.”

²⁵ Yeesu jejemige, “Cane uja ituge jaji weebibine, yepă weene lica itu nătrungepeye cebine. Cane lui ciitaca mule bine ituge waweneca căme Babe me ngii cabu je, pui cina cebine naitnăjenisi.

²⁶ Yepă weene lica nătrungeniye cebine, ingle weene căme maamoi lica gemi.

²⁷ Căme maamoi cina căme tagepogogo nătecijusi, siige cane umle găne teepi. Teepi căme ingwe poto ca saacluge.

²⁸ Nuuja te äblicăco teebibine căme bau ca äsecrăra, yepă cane teebibine iyeteta ireclota cire yăăcăremepene, siige teepi budre ne lica cire jääpănepesi.

²⁹ Căme Babe lui te ituge cebine ai maamoi ceera, tabe sine baborage. Nuuja te äblicăco gyene teebibine Babe me ime cabu ca äsecrăra.

³⁰ Cine Babe cama yepă gegi.”

³¹ Piba Israela biname cina cuta căări kula bine etomlicmisi Yeesu ne äbyecrame.

³² Yeesu teebibine jejemige egă, “Cane weeme opo gaabe bucurage miijimiji mule ituge waweneca, Babe te lui tääpume ituge jaji. Lui mule name pi weene cebine kula ca äbyecrame naweniniye?”

³³ Israela biname cina jejisi egă, “Cine määme miiji mule name pi kula ca äbyecrame lica naaweninisi, yepă maane lipu Acejiyame me ngii ne sabe itu tewenumete. Maane binamerage găte, yepă maane Acejiyame me äbitenitel!”

³⁴ Yeesu jejemige egă, “Weeme Cotre cabu oogărăneji gyene, egă Acejiyame te jiucuji, ‘Weene acejiyame gemi!’

³⁵ Mine umle gemi, egä Oogäräneji mene te ngena jiicenige, iyeteta toraca enajenige. Siige Acejiyame te liba acejiyame ca einemuji pui biname bine, Acejiyame me Mene lui bine ecäre mujisi,

³⁶ cije weene piba ngena name pi najeniye cebine, Babe te lui ne teeme täapume mara me nawenuji, siige gawecewe cabu me nätepuji, egä cane Acejiyame me ngii ne sabe jaawenune, teeme Bägrä ca liba lainune.

³⁷ Cane liba căme Babe me kaakesea bine lica jaawenimune, piba weene gone cebine nätrunguye.

³⁸ Yepä cane liba jaawenimune, weene müji căme kaakesea poto cidi me ätrunga, ngänu gyene liba weene cebine lica nätrunguye. Piba weene umle läbitininuye, egä Babe te căme cabu pisi nyene, cane Babe cabu pisi näne.”

³⁹ Israela biname cina cuta căări äbitininisi Yeesu ne oomla-name, yepä tabe uucrige.

⁴⁰ Puma cita ca Yeesu căări acnenutige Yoridana baduge nuuja poto doro me, pui puupu cabu me, Yoane luma niinäce biname bine müye ca jääcisäjepi, siige tabe puga enajige.

⁴¹ Bucurage biname cina totninisi teeme bau me. Teepe jüicisi egä, “Yoane nuuja ciitaca mule ne lica itu jaawenepi, yepä tabe lui mene jüicemepi ai biname poto cidi me, toraca gyene.”

⁴² Bucurage biname cina Yeesu ne puma jütrungisi.

11

Lajaro me Budre

¹ Yepä biname ngii Lajaro pita cama ge. Tabe Betaniya cewe je enajige teeme neeneni ngule cama Maareta piyepu Mariya.

² Age tona pui Mariya, lui te müji lengo oil ne yaapadurepi Yageyame me ernge cabu, siige teeme edingäli ca jääcisäjepi. Teeme wate Lajaro tage, lui te pita cama ge.

³ Siige ngule cina mene jityepäsi Yeesu bau me egä, “Yageyame, määme müjirage biname te pita cama gyene.”

⁴ Yeesu liba peei mene itecijige, tabe jüicige egä, “Ai pita te Lajaro ne budre me lica pa jaawenepi, yepä biname bine pa jaawenemepi Acejiyame me jamyacu apaclyera ne awepyeräjame. Piyyepu ai cabu ca Acejiyame me Bägrä me jamyacu apaclyera ne pa jääpänepesi.”

⁵ Yeesu babo singi ge Maareta teeme maade cama piyyepu teeme wate Lajaro täapume.

⁶ Yoo, Yeesu liba itecijige, egä Lajaro pita cama ge, tabe căro camu puga enajige neeneni bimu cama.

⁷ Puma cita ca tabe teeme abiberäja bägrä bine jejemige, “Biiri naclege Yuudea probins cabu me.”

⁸ Teepe jejisi egä, “Abiberäja biname, cemacema Israela biname cina meebine kula ca puga liga nääbyecrinumesi budre me, nää maane cuta piyyeme otrime äbitinite?”

⁹ Yeesu jejemige egä, “Cije bimu me ngalebora twelb awa lica gemi kroke cabu ca ngälu mämliteca oomlaname? Laati te bimu apaclyera cabu läduge, tabe lica yaatramuge, ingle tabe ai gawecewe me apaclyera ne jääpänuge.

¹⁰ Yepä ciye cabu laati te liba läduge, tabe yaatramuge, ingle teeme cabu nuuja apaclyera lica birige.”

¹¹ Puma cita ca tabe abiberäja bägrä bine jejemige, “Mime biname Lajaro ute gyene, yepä cane ädenine teebine alotnentame.”

¹² Teepe jejisi egä, “Yageyame, tabe liba ute ogrenige, müji äbitenige teeme pita cabu ca.”

¹³ Yeesu ai mene Lajaro me budre poto cidi me jüicige, yepä abiberäja bägrä cina apu jengemige, egä papa ute me jüicige.

¹⁴ Piba Yeesu pajecurage jejemige teebibine egä, “Lajaro budre gyene.

¹⁵ Cane wemiji pi gege gäne, egä cane puga lica ge, tabe lui padare cabu budre täbitumi, ingle peei cabu ca weene umle päbitipeye cebine ätrungame. Biiri naclege teeme bau me!”

¹⁶ Puma cita ca Tooma, ‘Päädepäde’ ca lui ne einenisi, nuuja abiberäja bägrä bine jejemige egä, “Yoo siige, mine biiri naclege iyeta Yeesu cama budre me.”

Yeesu Lui Ireclota Ceera Biname Gyene

¹⁷ Yeesu liba Betaniya me atyaramtuge, tabe umle äbitige, egä Lajaro ne uja secitumesi, siige gape ngalebora fooa bimu cama senajumi.

¹⁸ Betaniya lui trii kilomiita padare ge Yerusalema ca.

¹⁹ Bucurage Israela biname cina itu tabasecretnumi Maareta Mariya naabi bau me sigita täapume teeme wate me budre name pi.

²⁰ Maareta liba utecijige, egä Yeesu biiri tädenige, tabe oclige teebine awacletnäjame, yepä Mariya mete cabu je onajige.

²¹ Maareta liba Yeesu ne jepänige, tabe jejige egä, “Yageyame, maane liga ama cirege, căme wate te budre lica cire lăbiteji.

²² Yoo, tabe puu budre gyene, yepä cane umle gäne, egä Acejiyame te năăcärenige, maane ngeno me jejenite.”

²³ Yeesu Maareta ne jojige, “Măame wate te budre cabu ca alotnantenige ireclota me.”

²⁴ Tabe jejige egä, “Yoo, cane umle gäne, egä cerăcerăgăabu bimū cabu iyeta biname cina liba budre cabu ca ireclota me cire larpinăripesi, tabe cuta piba cirege arpinenta.”

²⁵ Yeesu jojige egä, “Cane age sâne budre cabu ca lui te biname bine cirege arpinera piyepu ireclota ceera. Laati te cebine nătrunguge, ngănuge tabe puu budre gyene, yepä tabe ireclota gyene.

²⁶ Piyepu laati te ai ireclota cabu nătrunguge cebine, tabe iyeteta budre ne lica jăăpănuge. Năă, maane căme mene nătrungenite?”

²⁷ Tabe jejige egä, “Yoo Yageyame, cane năătrungenine, egä maane Keriso sâte, Acejiyame lui ne itu năătyepuji biname bine ăsecrerame măpu cabu ca. Maane lui Acejiyame me Băgră gâte, lui ne jewagrijenisi otnime.”

Yeesu Ele Engenige

²⁸ Puma cita ca Maareta Yeesu ne ebmalige, acnenutige cewe me, teeme igane Mariya ne ogä jojige egä, “Abiberăja biname te bii tădige, tabe măame tăăpume nătemlige cebine.”

²⁹ Mariya liba utecijige, tabe watatarage mete cabu ca asatige, oclige teebine păpăname.

³⁰ Yeesu căro camu ge cewe ngalebora me abacita, yepä tabe camu puga ge Maareta luma teebine niinăce edărige.

³¹ Sigita me lui Israela biname cina seclumi, teepi liba jopănisi Mariya ne abujngta je watatarage asata je, siige teepi teebine ingwe ucwisi, ingle teepi apu jengemige, egä tabe gape cabu me oclenige ele me.

³² Mariya liba pui puupu cabu me atyaramtige, Yeesu luma enajige, siige teebine liba jepänige puma, tabe teeme opo gaabe je utramige, jejige egä, “Yageyame, maane ama liga cirege, căme wate te budre lica cire lăbiteji.”

³³ Yeesu liba jopănige teebine ele angena je cuta liba jepănimige teta cama lui Israela biname cina seclige ele angenetna je, tabe ngenecu măpu me ăbitige.

³⁴ Tabe itemli-mige egä, “Weene teebine luma secitumeje?” Teepi jejisi egä, “Yageyame, maane tădi ire me.”

³⁵ Puma cita ca Yeesu ele enge-nige.

³⁶ Israela biname cina jiiçisi egä, “Jepăneye, tabe lipu baborage singi ge teeme tăăpume!”

³⁷ Yepä poto cina jiiçisi egä, “Tabe irecu măăsumăsu biname ne miiji jaawenepi. Tabe ama liga cirege, tabe pama Lajaro me budre gaabe ne cuta cire yaarmejl.”

Yeesu Lajaro ne Budre cabu ca Erpinantige

³⁸ Yeesu căări ngenecu măpu me ăbitige, siige ădige gape gome me. Pui gape lui kula bora uureji ge. Grana kula ca armeji ge.

³⁹ Yeesu biname bine jejemige kula ne apetrengtame. Puma cita ca budre biname me ngule Maareta te jejige egä, “Yageyame gone, tabe niiyarage lengo cama gyene, ingle fooa bimū cama gape bora senajumi!”

⁴⁰ Yeesu jojige, “Egăsu nata cane naajine meebine, egä maane liba ătrunga cama gâte, maane Acejiyame me kokre ne jepănenite.”

⁴¹ Puma cita ca teepi kula ne epetrăngtisi. Yeesu piba cabu me ire acitige, jiiçige egä, “Babe, cane eso năăcärenine, egä maane cebine nătecjenite.

⁴² Cane umle gäne, egä maane iyeta padare cabu cebine nătecijanute, yepä cane ai mene biname bime name pi jiiçenine piba teepi ătrungame, egä maane te cebine itu nătyepujite.”

⁴³ Ai mene iicana ingwe gaabe ca tabe baborage tagepogogo ca ala abayige egä, “Lajaro, tasati peema cita ca!”

⁴⁴ Siige tabe tasatige gape cabu ca, teeme ime ernge căbletăăpe ca tope atneji ge piyepu opo căbletăăpe ca acwabăneji ge. Yeesu piba biname bine jejemige, “Jiibiremeye, siige lădege tabe.”

Glăamu Jecijemige Yeesu ne Aglime

(Matayo 26:1-5; Mareko 14:1-2; Luuka 22:1-2)

⁴⁵ Mariya bau me lui Israela biname cina sigita me saaclepi, teepi jepănisi Yeesu ngena mule ne jewenige, siige teeme bucurage cina jitrungisi teebine.

⁴⁶ Yepä teeme nesae cina ăcnărige Parisea sigu biname bime bau me, teebibine jejemisi, Yeesu ngena mule ne jewenige.

⁴⁷ Puma cita ca Parisea sigu biname piyepu modamoda iiwäreja biname cina, teepi iyeta mutre biname bine ala tesoglicimisi mene atraname, siige jejemisi egä, “Mine ngena ne jewenenisi? Ai biname te bucurage ciitaca mule bine jewenetnäjenemige.

⁴⁸ Mine liba ire taatu jecitenisi tabe apu mule wawenecame, piba iyeta biname cina tee-bine jitrungenisi, siige teeme bau me eclenige. Piba Rooma cubu biname cina pa saaclepi iiwäreja mete ne sabe waweneme piyepu cuta iyeta biname bine sabe waweneme, inle Rooma gabmani* te singi lica gyene nuuja biname te mope me äbitame.”

⁴⁹ Teeme yepä te ngii Kayapa, lui tage iiwäreja mope biname pui padare cabu, jejemige egä, “Weene lipu buduma gemi!

⁵⁰ Nää, weene umle lica gemi, egä yepä biname te miiji budre äbita iyeta biname bime tääpume, lica iyeta biname cina?”

⁵¹ Ai lui teeme ngena atwanena mene lica ge. Yepä pui padare cabu tabe tage iiwäreja mope biname, siige Acejiyame te piba ngena atwanena ecäriige, egä Yeesu te miiji budre äbita iyeta Israela biname bime tääpume.

⁵² Cuta tabe teeme taatu tääpume lica budre yepä iyeta Acejiyame me bägräwale bime tääpume, lui cina aplidnäreji gemi ai gawecewe cabu iyeta poto ta, naace name pi teebibine yepä gome me abasecretname.

⁵³ Pui padare cabu ca Israela mutre biname cina gläamu jecijemige Yeesu ne budre me acitame.

⁵⁴ Peei ingwe gaabe ca Yeesu cabucabu lica otnetnäjige Yuudea probins cabu. Tabe pui gawe ne piba sebmaliige, ädige yepä cewe me ngii Eperema, lui daapo taatu cewe gome jage. Tabe puga teeme abiberäja bägrä cama enajige.

⁵⁵ Israela biname bime äsuplengta trii mameta ge, siige bucurage biname cina abasecret-nige cewe maramara cabu ca Yerusalem me. Trii padare camuge, teepi niinäce eclige naace tääpume cude gwidape cabu ca kälyä äbitame piba ingwe ca trii cabu me äbäcname.

⁵⁶ Teepi puma Yeesu ne jirngisi, siige iiwäreja mete cabu ätemläjinisi egä, “Weene lipu ngena jotwanininiye, nää tabe pama tädenige ai trii padare tääpume coo lica?”

⁵⁷ Modamoda iiwäreja biname piyepu Parisea sigu biname cina jicisi egä, “Laati te liba päpäna je, egä tabe luma enajenige, pui biname te miiji cibibine umle waweneme, cine piba teebine oomlana.”

12

*Mariya te Yeesu ne Oil ca Eganige Betaniya Cewe je
(Matayo 26:6-13; Mareko 14:3-9)*

¹ Piyyeme siks bimu ge äsuplengta trii padare oomlaname, Yeesu piba Betaniya cewe me ädige, Lajaro luma senajenäjumi, tabe lui ne budre cabu ca yaarpenantepi.

² Yeesu ne deedei puga ecärisi. Lajaro pui bime yepä ge, lui cina teta cama deedei äbitininisi. Maareta mogobi jewenimige.

³ Piba Mariya ecatiige miiji lengo camlecamle nardus oil karpu ne, babo daremu ca lui oil ne jaaletnusi, epadurige Yeesu me ernge cabu, piba edingäli ca jicisäjige. Miijirage lengo te mete ne iyeta joomlige.

⁴ Yeesu me yepä abiberäja bägrä ngii Yuuda Isakariyota, lui te teebine pagege budre me awaba, tabe Yeesu ne jejige egä,

⁵ “Ngena name pi mine ai oil ne acata cäco aletname trii hanred silba rarekaake ca, siige pui rarekaake owecumete biname bine ceerame?”

⁶ Tabe ai mene naace name pi lica jiiçige, egä tabe owecumete biname bime tääpume owecu ge, yepä tabe naace popi jiiçige, inle tabe eromaame ge. Tabe te teeme iyeta bime rarekaake ire jaatwemuge, siige peema cita ca yaawadimuge rarekaake bine teeme singi gaabe wawenetnäjame.

⁷ Yeesu Yuuda ne jejige egä, “Obmali teebine. Tabe ewetnenige teeme lui oil cebo pisi nyene cebine gape cabu acita bimu tääpume.

⁸ Owecumete biname cina weene cama iyeteta pa yaacrajepi, yepä cane weene cama iyeteta lica pagege lenaja.”

Mene Jewenisi Lajaro ne Aglime Budre me

⁹ Bucurage Israela biname cina itecijemige, egä Yeesu Betaniya sine. Puma cita ca teepi eclige Betaniya cewe me lica Yeesu taatu name pi, yepä teepi cuta singi Lajaro ne päpäname, Yeesu lui ne budre cabu ca itu yaarpinantepi.

¹⁰ Siige modamoda iiwäreja biname cina gläamu jicrajige Lajaro ne cuta budre me aglime,

* 11:48: Rooma gabmani: Rooma gabmani te Yeesu me padare cabu Israela gawe ne ecenanige.

¹¹ Ingle temiji pi bucurage Israela biname cina Yeesu me poto cidi me äbitinini, teebine jitrungisi.

Yeesu Yerusalema me Abacitige

¹² Nuuja bimu cabu äsuplengta trii tääpume lui biname cina itu tabasecretnumi, teepi itecijemige, egä Yeesu biiri tädenige Yerusalema me.

¹³ Teepi uli ciipe bine icnapimisi, eclige teebine awacletnäjame. Teepi baborage tage-pogogo ca abayininisi egä,

“Acejiyame ne yaawepyeräjesi!

Yageyame me ngii cabu lui te tädenite, tabe miiji naawenege meebine!

Acejiyame te Israela mope biname ne miiji naawenege!”

¹⁴ Yeesu mamye dongki ne jepänige, siige acenutige teeme papa cabu me. Apu ibibi äbitige Oogäräneji mene, lui te jiicenige egä,

¹⁵ “Babo cewe lui Siiyona podo cabu, maane wälu gone!

Määme mope biname te aga tädenige mamye dongki papa cabu.”

¹⁶ Pui padare cabu abiberäja bägrä cina ai mule ne opo lica ewatnujisi, yepä Acejiyame te liba Yeesu ne budre cabu ca erpinan-tuji, teepi piba ngene jotwinujisi, egä apu oogäräneji gyene teeme poto cidi me, cuta teepi apu ituge wawena teeme tääpume.

¹⁷ Lui biname cina jääpänesi Yeesu lipu Lajaro ne gape cabu ca ala taasoglecepi, siige budre cabu ca yaarpinantepi ireclota me, teepi biname bine umle jaawenanemepesi.

¹⁸ Siige biname cina seclige Yeesu ne awacletnäjame, ingle teepi peei ciitaca mule poto cidi me ituge ätecija.

¹⁹ Puma cita ca Parisea sigu biname cina teemeteme ajananinisi egä, “Jepäneye! Mine äblicäco gemi nuuja mule ne wawena! Iyeta biname cina teebine ingwe icwenisi!”

Poto Griik Biname cina Yeesu ne Jirngisi

²⁰ Poto Griik biname cina cuta puga ge pui biname bime sobe cabu, lui cina Yerusalema me seclumi äsuplengta trii padare cabu Acejiyame ne awejename.

²¹ Teepi Pilipo bau me seclige. Tabe lui Betesaida cewe biname ge, lui cewe Galilaya probins ngalebora jage. Teepi Pilipo ne jejisi egä, “Babo biname, cine singi gemi Yeesu ne päpäname.”

²² Puma cita ca Pilipo ädige, Andrea ne jejige, siige teepi gigri aaclige Yeesu ne umle wawename.

²³ Yeesu teebibine jaajige egä, “Padare te bii tatyaramtige Acejiyame te awabudni-tame, egä teeme bau ca lui te täduji biname me äbituji, tabe lipu jamyacu apacyera cama gyene.

²⁴ Cane toracarage jijenine weebibine: wiiti kuu te liba gawe cabu me lica yaatramuge, siige budre liba lica läbituge, teeme cabu ca äblicäco nuuja gwidape te agi. Yepä liba budre läbituge, siige bucurage kuu cina täpletnärüge.

²⁵ Laati te teeme ireclota tääpume singi yaanajuge, tabe teeme ireclota ne yaapesaruge. Yepä laati te liba teeme ireclota tääpume singi lica birige ai gawecewe cabu, tabe teeme ireclota ne yaamacetnäjuge iyeteta ireclota tääpume.

²⁶ Laati te liba singi căme kaakesea wawename, tabe cane cama tädenige naace name pi egä căme kaakesea bägrä te emä lenajame cane luma. Căme Babe te eei ne opo gaabe me yaacituge, lui te căme kaakesea ne jaawenuge.”

Yeesu Teeme Budre poto cidi me Jiicenige

²⁷ “Page căme ngenecu mäpu gyene, siige cane miiji ngena iicaname! Nää, cane apu irecu lätumutene egä, ‘Babe, lui mäpu te tädenige căme niinăce gaabe me, maane iyeblingtepi.’ Eewe, cane äblicäco pepu irecu ätumuta, ingle cane aima tädujine ai mäpu cabu cewe oocaname.

²⁸ Babe, määme ngii me jamyacu apacyera ne seboclomtepi!” Puma cita ca tagepogogo te cabucewe ca tädige egä, “Cane căme ngii me jamyacu apacyera ne ituge aboclomta, cuta cane pagege căări aboclomta!”

²⁹ Lui biname cina puma aclajuteji icrajige, teepi liba ai tagepogogo itecijemige, teepi jiicisi egä, “Maadubi ala ge pama,” yepä poto cina jiicisi egä, “Acejiyame me mename seemo te mene tejige teebine.”

³⁰ Yeesu puma cita ca teebibine jejemige egä, “Ai tagepogogo te lica tädige căme name pi, yepä weeme name pi.

³¹ Siige page padare gyene ai gawecewe ne atraname. Ai gawecewe ne lui te ecanenige, teebine iyeblingtenisi page.

³² Cebine liba gawe cabu ca atecwenta cabu me, cane iyeta biname bine pa saawademepene căme bau me.”

³³ Ai mene iicema ca tabe eboclomtuge, tabe lipulipu gaabe cabu budre pa läbitepi.

³⁴ Puma cita ca biname cina jejisi teebine egä, “Mime Cotre te nijenininige, egä Keriso, biname bine mäpu cabu ca lui te cirege äsecrera, tabe iyeteta lenaja myene. Maane cije piba lipulipu jüicite, egä Acejiyame bau ca lui te otni biname me äbitame, teebine müji cabu me atecwenta? Laasi nyene ai, lui te Acejiyame bau ca cirege otni biname me äbitame?”

³⁵ Yeesu jejemige egä, “Apaclyera te cerämu matikolä padare weene cama pa yaanajepi. Weene otni-neye, apaclyera liba taatu camu pisi nyene weene cama, cije krokeciye te itrugärinuge weebibine. Krokeciye cabu lui te waatnuge, tabe umle lica gyene liiyeme otni.

³⁶ Weene ätrunga eciteye apaclyera cabu me, tabe liba pisi nyene weene cama, piba weene apaclyera cama biname birige.”

Israela Biname cina Ätrunga cäco Gemi

Ai mene ingwe gaabe ca Yeesu piba ädige, ämlitige biname bime bau ca.

³⁷ Yeesu puu bucurage ciitaca mule bine ituge waweneca Israela biname bime irewale je, yepä teepi lica jitrungisi teebine

³⁸ naace täapume Acejiyame me mename biname Isaya me mene te toraca me äbitame egä,

“Yageyame, biname cina ätrunga cäco ituge cime mene poto cidi me, piyepu teepi umle cäco mäame kokre.”

³⁹ Teepi naace popi äblicäco ge ätrungame, inge Isaya cuta itu jüicuji egä,

⁴⁰ “Acejiyame te teeme irecu bine iredärime me jewenimuji, egä teepi cije cängena jääpänusi.

Tabe teebibine mopemuli cäco me jewenemuji,

egä teepi cije umle läbitininusi,

piyepu cuta tatatrongäruge cäme bau me lui Acejiyame gäne

naace name pi egä cane teebibine müji waweneme.”

⁴¹ Isaya ai mene jüicuji, inge tabe niinäce gaabe me Yeesu me kokre ne jepänuji, peei name pi tabe teeme poto cidi me apu jüicuji.

⁴² Ngänuge puu iyeta ai mule cina äpletnera, yepä cuta bucurage modamoda Israela biname cina Yeesu ne jitrungisi. Yepä Parisea sigu biname bime wälu name pi teepi cabucabu lica jitrungisi, cije teebibine äyebengäja mage teeme irecu ätumuta cabu ca.

⁴³ Teepi singi biname cina teeme täapume mijirage ngene atwana cama lenajame, yepä lica Acejiyame te.

Yeesu Mene Jüicige Atrana poto cidi me

⁴⁴ Yeesu baborage tagepogogo ca jüicemige egä, “Laati te nätrunguge cebine, tabe cebine taatu lica nätrunguge, yepä cuta teebine jäätrunguge, cebine lui te nätyepuji.

⁴⁵ Laati te cebine näpänuge, tabe cuta jääpänuge eei ne, cebine lui te nätyepuji.

⁴⁶ Cane tädujine ai gawecewe cabu biname bine apaclyera täapume, egä iyeta lui cina cebine nätrungusi, teepi krokeciye cabu lica page yaacrajemepi.

⁴⁷ Laati te yääteciyuge cäme mene, yepä lica yaacatuge, cane teeme atrana biname lica gäne, inge cane lica itu tädujine aima biname bine atraneme yepä niya cabu ca äsecrerame.

⁴⁸ Atrana pisi nyene pui biname täapume, lui te cebine nägyuge piyepu cäme mene jäägyemuge. Cane lui mene bine ituge iicema, pui cina teebine cirege atrana.

⁴⁹ Cane cämerage ngii cabu lica ituge iicema, yepä Babe lui te cebine nätyepuji, tabe te ituge ajanena cane ngena jajaneneme piyepu iicemame.

⁵⁰ Cuta cane umle gäne, egä Acejiyame lui mene jüicemimuge, iyeteta ireclota yääcäranemuge biname bine pui mene te. Yoo siige, cane jüicemimune, Babe te ngena ituge jajanena cebine.”

13

Yeesu Teeme Abiberäja Bägrä bime Ernge Jicisäjemige

¹ Äsuplengta trii liba nuuja bimuge, Yeesu tabe umle ge, egä teeme padare te bii tatyaramtuge ai gawecewe ne abmalame siige Babe bau me acnenutame. Tabe iyeta padare singi ituge pui bime täapume, ai gawecewe cabu lui teemi nemi. Teeme budre te liba mameta me täbitige, tabe lica teebibine jigymige, yepä tabe singi ge teeme täapume ngälu ngälu gaabe oomlaname.

² Yeesu teeme abiberäja bägrä cama liba deedei cabu jage, Satani te uja ngene atwana ecäruji Yuuda ne, lui Simona Isakariyota me bägrä ge, tabe Yeesu ne awabame budre me aglime.

³ Yeesu umle ge, egä Babe te iyeta kokre teebine ituge ceera. Tabe cuta umle ge, egä tabe Acejiyame bau ca itu täduji cuta teeme bau me acnenutenige.

⁴ Siige tabe abujängtige deedei loolo dade cabu ca, teeme cäbletääpe ne iyeblingtige, taweli ca amlemaltige ibi cabu.

⁵ Piba tabe niye ne disi cabu epadurige, siige gije abacitige abiberäja bägrä bine ernge äcisejame. Liba yepä ne jääcisäjuge, pui taweli ca cuta nebo jääcisäjuge, lui te teeme ibi cabu amlemalteji ge.

⁶ Tabe liba Simona Peteru gome tädige teeme ernge äcisejame, Peteru jejige egä, "Yageyame, nää maane te äbitenite cäme ernge äcisejame?"

⁷ Yeesu jejige egä, "Maane page umle lica gäte, cane ai lui ngena ne jevenenine, yepä maane ingwe ca umle pagege äbita."

⁸ Peteru jejige egä, "Eewe, pipu padare te lica tädenige egä maane cäme ernge äcisejame!" Yeesu jejige egä, "Cane liba mäme ernge lica nääcisäjjenine, maane piba cäme abiberäja bägrä lica gäte."

⁹ Simona Peteru te jejige egä, "Yageyame, piba cäme ernge taatu gone näcisäjute, yepä ime piyepu mope cama näcisäjepi!"

¹⁰ Yeesu jejige egä, "Laati te liba gooni loowanguge, tabe nuuja gwidape täöpume singi lica, yepä tabe ernge taatu jääcisäjuge, siige tabe piba jugi cäco birige. Weene jugi cäco gemi, yepä weeme iyeta cina lica."

¹¹ Yeesu umle ge, egä laati te teebine budre me pa jaawabepi, peei name pi tabe jüicige, egä teepi iyeta jugi cäco lica gemi.

¹² Yeesu liba apirige abiberäja bägrä bine ernge äciseja ca, tabe teeme cäbletääpe asigrige, acnenutige teeme puupu cabu me adnatame, piba abiberäja bägrä bine itemlimige egä, "Weene nää umle bäbitiniye, cane ngena bii jevenine weeme täöpume?"

¹³ Weene naininiye Abiberäja biname ca piyepu Yageyame ca. Weene peei lui toraca mene jüiceniye, ingle cane pipu gäne.

¹⁴ Siige liba cane, weeme Yageyame piyepu Abiberäja biname te weeme ernge bii jüicisäjemine, weene cuta müji pepu weemeweme ernge äcisejana.

¹⁵ Cane ai ne naace täöpume bii jevenine weene cebine ätutename.

¹⁶ Cane toraca jijenininine, egä kaakesea bägrä te lica birige baborage teeme babo biname bau ca, cuta mename biname te babo lica birige teeme bau ca, teebine lui te jäätyepuge.

¹⁷ Weene aga umle bäbitiniye ai mule potu cidi me, siige lipu gege gemi weene, liba apu läbitininuye.

¹⁸ Cane weeme iyeta potu cidi me ai mene lica jüiceniye, ingle cane umle gäne weene lipu biname gemi, cane lui bine ituge äjäcra. Oogäräneji mene te lipu jüiceniye egä, 'Lui te cane cama deedei äbitenige, tabe cebine pa näcisärmutepi,' ai mene te müji toraca me äbitame.

¹⁹ Cane ai mene naace name pi niinäce gaabe me jijenininine weebibine, egä ai mule te liba pa läbitepi weene piba ätrungame, egä cane pui biname gäne, lui täöpume cane jijanininune weebibine.

²⁰ Cane toraca jijenininine, egä laati te yaacatuge, cane lui ne jäätyepune, tabe cebine nacatuge. Piyepu laati te cebine nacatuge, tabe cuta teebine yaacatuge, cebine lui te nätyepuji."

Yeesu piyepu Yuuda

(Matayo 26:20-25; Mareko 14:17-21; Luuka 22:21-23)

²¹ Ai mene iicema ingwe gaabe ca Yeesu mage ngenecu mäpu me äbitige, pajecurage jüicige egä, "Cane toraca jijenininine weebibine, egä weeme yepä te page nawabenige cebine budre täöpume!"

²² Abiberäja bägrä cina teemeteme ire atwananinisi umle cäco, egä tabe laati potu cidi me jüicige ai mene.

²³ Abiberäja bägrä bime yepä te, Yeesu lui täöpume babo singi, tabe teeme gome adnatäneji ge.

²⁴ Simona Peteru teebine irecu cubu ca jevenige Yeesu ne ätemlame, egä tabe laati potu cidi me jüicige peei mene.

²⁵ Siige pui abiberäja bägrä te äbyenutige Yeesu bau me, itemlige egä, "Yageyame, maane laati täöpume jüicite peei mene?"

²⁶ Yeesu teebine jejige egä, "Cane liba buluduu pacu ne yiiglenutenine jurä cabu me, siige liba laati ne ecärenine, peese nyene pui biname." Siige tabe buluduu pacu ne ecatige, yiiglenutige, ecärige Yuuda ne, lui Simona Isakariyota me bägrä ge.

²⁷ Liba Yuuda buluduu ne juutecige, piba taatu Satani te abacitige teeme trupa cabu me. Yeesu Yuuda ne jejige egä, "Maane ngena wawena mäte singi, watawata jeweni."

²⁸ Nuuja abiberäja bägrä cina nuuja umle lica ge, egä Yeesu ngena täöpume teebine apu jejige.

²⁹ Ingle Yuuda lui teeme rarekaake ire atwi biname ge, poto abiberäja bägrä cina apu jengemige, egä Yeesu teebine jejige ai soriyomu täápume gwidape aletname coo owecumete biname bine rarekaake ceerame.

³⁰ Siige Yuuda liba buluduu pacu juutecrige, tabe piba taatu asatige. Pui lui ciiey ge.

Kirece Cotre

³¹ Yuuda liba asatige, Yeesu piba abiberäja bägrä bine jejemige egä, “Siige Acejiyame bau ca lui te täduji biname me äbituji, teeme jamyacu apaclyera ne page jepänenisi, cuta Acejiyame me jamyacu apaclyera ne jepänenisi teeme cabu ca.

³² Siige Acejiyame me jamyacu apaclyera ne liba jepänenisi teeme cabu ca, piba Acejiyame te teeme Acejiyamerage cabu ca pajecu me jewenenige pui me jamyacu apaclyera ne, teeme bau ca lui te täduji biname me äbituji. Tabe peei ne watatarage jewenenige.

³³ Cäme miijirage bägräwale, cane matikäli padare taatu cerämu nanajinige weene cama. Weene cebine pa närngepeye, yepä cane peei yepä mene jijenininine weebibine, cane lipu Israela biname bine ituge jaji, egä cane liiyeme ädenine, weene peeyeme äblicäco gemi otni.

³⁴ Cane weebibine kirece cotre icärininine: weene miiji weemeweme singi äbitena. Cane lipu weeme täápume singi ituge, weene cuta miiji pepu weemeweme singi äbitena.

³⁵ Weene liba weemeweme singi läbitaninuye, pui cabu ca biname cina umle birige, egä weene cäme abiberäja bägrä gemi.”

Yeesu piyepu Peteru

(Matayo 26:31-35; Mareko 14:27-31; Luuka 22:31-34)

³⁶ Simona Peteru te Yeesu ne itemlige egä, “Yageyame, maane liiyeme ädenite?” Yeesu jejige egä, “Page maane äblicäco gäte cane cama otni, cane liiyeme ädenine, yepä maane ingwe ca cire tädepi.”

³⁷ Peteru jejige egä, “Yageyame, ngena name pi cane äblicäco gäne page maane cama otnime? Cane bamaceträjine mämiiji pi budre äbitame.”

³⁸ Yeesu jejige egä, “Maane nää toraca bamaceträjite cämiji pi budre äbitame? Cane toraca mene naajenine, airage ciiey cabu maane niinäce cebine nesae gääbu nainenite, paulo te ingwe ca ala piba sengenenige.”

14

Yeesu Gaabe Gyene Babe bau me

¹ “Weene ngenecu mäpu gone! Acejiyame ne jitrungeye cuta cebine nätrungeye.

² Cäme Babe me mete cabu bucurage puupu piti nem, siige cane ädenine weeme täápume amaceträjame. Puupu liga lica cirege, cane piba weebibine apu lica cire jijinejine.

³ Cane puu niinäce ädenine weeme täápume puupu ne amaceträjame, cane cuta cire tacnepene weebibine arwojame cäme bau me. Weene puma cire inajipi, cane luma.

⁴ Weene umle gemi gaabe, pui puupu cabu me lui gaabe te ädenige, cane luma pagege lenaja.”

⁵ Tooma Yeesu ne jejige, “Yageyame, cine umle lica gemi, maane liiyeme ädenite, cine piba lipulipu pagege umle äbita gaabe piyeyeme otnime?”

⁶ Yeesu Tooma ne jejige egä, “Cane age säne gaabe, cane age säne toraca, cane age säne ireclota. Nuuja gaabe lica gyene Babe bau me otni me, yepä cane säne gaabe.

⁷ Weene liba toraca umle cirege cane, weene piba cuta umle cirege Babe. Siige page ama cita ca weene umle gemi tabe; weene ituge teebine päpäna.”

⁸ Pilipo Yeesu ne jejige, “Yageyame, Babe niwabini cibibine! Cine peei taatu memi singi.”

⁹ Yeesu teebine jejige egä, “Pilipo, maane nää toraca umle cäco gäte cane, ngänuge cane puu lecaleca padare weene cama itu nanajenani. Laati te liba cebine näpänuge, tabe cuta Babe ne jääpänuge, peei name pi maane lipulipu jicite egä, ‘Babe niwabini cibibine.’

¹⁰ Maane nää ätrunga lica gäte, egä cane pisi näne Babe cabu, Babe pisi nyene cäme cabu. Cane cäme ngene atwana mene lica jicemimune, yepä Babe te cäme cabu sine, siige cäme cabu ca kaakesea jewenenige.

¹¹ Weene miiji ätrunga, egä cane Babe cabu säne, Babe cäme cabu sine. Weene liba nuuja ingle name pi lica birige ätrunga, weene miiji cäme kaakesea miiji pi ätrunga.

¹² Cane toraca jijenininine weebibine, egä laati te cebine nätrungeye, tabe epu mule bine jaawenimuge cane liiyepu. Cuta cerämu poto jaawenimuge, ingle cane Babe bau me ädenine.

¹³ Iyeta weene lui täápume yääteluyee cäme ngii cabu, cane jaawenune weeme täápume naace name pi biname cina piba Bägrä cabu ca päpäname Babe me jamyacu apaclyera ne.

¹⁴ Weene liba ngena täápume yääteluyee cäme ngii cabu, cane icärininune.”

Yeesu Abiberäja Bägrä bine Jejemige Aceji Seemo ne Ätyepame

15 “Weene liba singi căme tăăpume, weene căme mene ibi jaawenimuye.

16 Cane Babe ne itemlenine, tabe te nuuja Ātityerayame pa sicāripi weebibine. Pui te weene cama iyeteta pa yaanajepi. Tabe lui Seemo gyene, lui te saaboclomtuge, ngena gyene toraca.

17 Ātrunga căco biname cina āblicăco teebine acata, ingle teepi āblicăco teebine pāpāna coo teeme poto cidi me umle ābita. Yepā weene umle gemi tabe, ingle tabe weene cama enajenige piyepu tabe weeme cabu pagege lenaja.

18 Cane weebibine taatu lica pa sibmalipene, yepā cane cuta pa tacnenutepene weeme bau me.

19 Matikāli padare ingwe gaabe ca ātrunga căco biname cina cebine lica pa nāpānepesi, yepā weene pa nāpānepeye. Ingle naace popi cane ireclota nanajinige, weene cuta ireclota pinajipi.

20 Pui bimū cabu weene umle page ābitipeye, egā cane Babe cabu sāne, weene căme cabu temi, cane weeme cabu sāne.

21 Laati te căme mene ne yaacatuge, siige yāăcwetnuge, tabe peese nyene biname, lui te căme tăăpume singi. Laati te căme tăăpume singi, căme Babe te teeme tăăpume singi birige. Cane cuta singi gāne teeme tăăpume, siige teeme bau me pa laboclomtēpene.”

22 Yuuda, lica Isakariyota me băgrā yepā nuuja Yuuda, tabe Yeesu ne jejige egā, “Yageyame, peei lipu gyene, egā maane cime bau me pa taboclomtepi, lica ātrunga căco biname bime bau me?”

23 Yeesu Yuuda ne jejige, “Laati te liba căme tăăpume singi, tabe căme abiberāja mene bine yāăcwetnimuge. Căme Babe te teeme tăăpume singi, siige cine căme Babe cama pa niclepi teeme bau me teeme cabu lenajame.

24 Yepā laati te liba căme tăăpume singi lica, tabe căme abiberāja mene bine lica yāăcwetnimuge. Weene lui abiberāja mene bine ituge ātecija, căme lica gemi, yepā căme Babe memi, lui te cebine nātyepuji.

25 Cane ai mene bii jijanandinine weebibine, page cane liba weene cama camu pisi nāne.

26 Yepā Aceji Seemo, Acejijame te lui ne căme ngii cabu pagege ātyepa weebibine ātityeraname, tabe te iyeta mule poto cidi me pa sibiberājipi piyepu cāari umle pa tiwēnānipi, cane ngena poto cidi me itu jijanānipene.

27 Cane poode ne sebmalenine weeme bau me. Cane cămerage poode icārininine weebibine, peei name pi ngenecu māpu gone, wālu gone! Pepu pana poode ne weene āblicăco pāpāna ai gawecewe cabu ca.

28 Weene bii nātecijye cane iicana je egā, ‘Cane weebibine page sibmalipene, cuta page tacnenutepene weeme bau me.’ Weene liba căme tăăpume toraca singi gemi, weene gege gemi, egā cane Babe bau me ādenine, ingle tabe haborage gyene căme bau ca.

29 Cane aga niināce gaabe me iyeta bii jijanandinine weebibine naace tăăpume, egā ai cina liba pa lābitipesi, weene piba pagege ātrunga.

30 Cane āblicăco gāne cerāmu weene cama mene iicama, ingle ai gawecewe ne lui te ecaninige, tabe te tādēnige. Tabe nuuja kokre lica gyene căme tăăpume,

31 yepā ātrunga căco biname cina miiji gemi umle ābita, egā cane singi gāne Babe tăăpume piyepu jaawenimune iyeta, tabe ngena tăăpume cebine ituge jaji.

Abujāngineye! Biiri lāsīnago, naclege ama cita ca.”

15

Waina Uli piyepu Teeme Ciipe

1 “Cane age sāne toraca waina uli, piyepu căme Babe te calwacupi ire atwiyame gyene.

2 Tabe căme cabu ca yaacnāpimuge iyeta ciipe bine, lui cina kuu căco gemi. Yepā lui ciipe cina kuu cama birige, tabe cāngenarage yaamacetnājimuge, jugi bine jāăglubājemuge naace tăăpume teepi cerāmu kuu pāpāname.

3 Căme mene te uja weebibine jugi căco me ituge wawena.

4 Inajinege căme cabu, piba cane cuta weeme cabu pagege lenaja. Ciipe te liba lica uli mage cabu birige lenaja, tabe āblicăco kuu pāpāna. Pepu gemi weene cuta āblicăco kuu pāpāna, weene liba căme cabu lica birige lenaja.

5 Cane waina uli gāne, weene ciipe gemi. Laati te căme cabu yaanajuge, cane lui me cabu nanajuge, tabe bucurage kuu jāăpānimuge. Căme căco je weene nuuja gwidape ne āblicăco wawena.

6 Laati te căme cabu lica yaanajuge, teebine yaajarusi uli ciipe ne liiyepu, siige maaje me lābituge. Maaje ciipe bine yaatomli-cmusi, uliobo cabu me yīsābimusi, siige teepi puma layinusi.

⁷ Weene liba căme cabu inajininuge piyepu căme mene te liba weeme cabu pisi nyene, piba weene jääpänimuye iyeta, weene lui tääpume cebine nätinäruye.

⁸ Weene liba bucurage kuu bine jääpänimuye, peei cabu ca căme Babe me jamyacu apacyera te babo läbituge, siige weene lawabudnitininuye, egä weene căme abiberäja bägrä gemi.

⁹ Căme Babe te lipu singi gyene căme tääpume, cane cuta pipu singi gäne weeme tääpume. Weene căme singi cabu inajipi.

¹⁰ Weene liba căme mene bine yääcwetnimuye, căme singi te weeme cabu yaanajuge, epu pana cane lipu căme Babe me mene bine yääcwetnimune, siige teeme singi te căme cabu yaanajuge.

¹¹ Cane ai mene naace tääpume jijananinine egä căme gege te weeme cabu lenajame, cuta weeme gege te babo äbitame.

¹² Cane weebibine jijenininine, egä weene weemämu singi äbitanipeye, cane lipu weeme tääpume singi ituge.

¹³ Eei gyene baborage singi, biname te liba teeme ireclota ne yäyemaluge budre me teeme binamewale bime tääpume.

¹⁴ Weene liba căme mene ibi jaawenimuye, weene căme binamewale gemi.

¹⁵ Cane ingwe ca lica iyininine weebibine kaakesea bägrä ca, ingle kaakesea bägrä te umle căco teeme babo biname te ngena jewenenige. Yepä cane iyininine căme binamewale ca, ingle cane ituge weebibine jajanena iyeta, cane căme Babe bau ca ngena ituge ätecijana.

¹⁶ Weene te cebine lica itu noomlepeye, yepä cane te weebibine itu joomlipene. Cane weebibine joomlipene, jijipene otnime bucurage kuu bine päpăname, pepu kuu lui cina iyeteta gemi. Piba Babe te page icăripi iyeta gwidape, weene lui tääpume yäätinäruye căme ngii cabu.

¹⁷ Ai lui căme singi gyene, egä weene miiji weemämu singi äbitanipeye.”

Ätrunga căco Biname cina Jäägyemusii Yeesu me Binamewale bine

¹⁸ “Liba ätrunga căco biname cina weebibine jimugitnusi, weene gone ngene jitrimalinuge, egä teepi cebine niinäce pepu ituge ämugetna.

¹⁹ Weene liga ai gawecewe biname cama yepä cirege, teepi piba singi cirege weeme tääpume, teepi lipu singi teeme tääpume. Yepä weene teta cama yepä lica gemi, ingle cane te ituge weebibine teeme cabu ca omlana, peei name pi teepi weebibine jimugitnusi.

²⁰ Weene ngene gone jitrimalinuge, cane lipu jijininine egä, ‘Kaakesea bägrä te baborage lica gyene teeme babo biname bau ca.’ Peei name pi cebine liba ituge sabe wawena, cuta weebibine piba pagege sabe wawena. Biname cina liba căme mene ituge ätecija, teepi cuta weeme mene piba pepu pagege ätecija.

²¹ Yepä teepi weebibine iyeta ai pa jiwenanipesi cămiji pi, ingle teepi umle lica gemi tabe, cebine lui te nätyepuji.

²² Cane liga lica cire tädejine teebibine mene jajanename, piba teepi umle lica cirege, egä teepi niija mule biname gemi. Yepä page teepi äblicăco iicana, egä teepi niija mule biname lica gemi.

²³ Laati te cebine nämugitnuge, tabe cuta căme Babe ne jäämugetnuge.

²⁴ Cane liga biname bime sobe cabu epu mule lica cire jaawenemejine, lui bine nuuja te lica ituge waweneca, teepi piba umle lica cirege, egä teepi niija mule biname gemi. Yepä teepi ituge päpăna, cane ngena ituge wawenena, siige teepi nimugetnusi cibibine Babe cama.

²⁵ Apu ibibi äbitenige teeme Cotre mene te egä, ‘Teepi papa taatu cewe je cebine nämugetnusi.’

²⁶ Cane pa täätyepene weeme bau me Aceji Seemo ne weebibine ätityeräjame piyepu aboclomtame, ngena gyene toraca. Tabe Babe bau ca pa tädepi, siige cebine pa naitnäjeji.

²⁷ Weene cuta pagege cebine aitneja, ingle weene cane cama ituge lenaja căme kaakesea agedna cabu ca.”

16

¹ “Cane naace tääpume ai mene jijanininine egä weene ätrunga ne lica apesera.

² Israela biname cina weebibine teeme irecu ätumuta cabu ca pagege äyecreja. Cuta padare te page tädepi, liba lui cina weebibine budre me pa iglecipesi, teepi apu pa jaangemepi egä, ‘Cine miiji mule ne jewenisi Acejiyame tääpume.’

³ Teepi naace name pi apu pagege wawena, ingle teepi umle lica ituge Babe piyepu cane.

⁴ Yepä cane ai mene naace tääpume jijanininine egä weene căme mene ngene apecname, ai cina liba pagege äbita.”

Aceji Seemo me Kaakesea

“Cane niinäce ai poto cidi me lica jijipene weebibine, ingle cane weene cama ge.

⁵ Siige page cane teeme bau me ädenine, lui te cebine itu nätyepuji; yepä weeme nuuja te lica nätemlenige egä, ‘Maane liiyeme ädenite?’

⁶ Siige page cane lipu jijanininine weebibine, pui name pi weene ngenecu mäpu gemi.

⁷ Cane toraca mene jijenininine weebibine, egä ai lui miiji gyene cane weeme bau ca äyebtingtame, ingle cane liba lica äyebtingtenine, piba Aceji Seemo te lica pagege weeme bau me otni weebibine ätityerame. Yepä cane liba äyebtingtenine, cane pa täätpepene teebine weeme bau me.

⁸ Siige Ätityerayame te liba pa tädepi, tabe te pagege awabudnäja ai gawecewe biname bime täapume nüya mule piiyepu ngena gyene conocäco piiyepu Acejiyame te lipu biname bine atrana.

⁹ Teepi cängena umle lica gemi, nüya mule ngena gyene, ingle teepi cebine lica nätrungenis.

¹⁰ Teepi cängena umle lica gemi, ngena gyene conocäco, ingle cane ädenine Babe bau me, siige weene cebine ingwe ca lica pa näpänepeye.

¹¹ Piiyepu teepi atrana poto cidi me cängena umle lica gemi, ingle ai gawecewe ne lui te ecanenige, teebine uja ituge atrana.

¹² Cäme bucurage mene piti nemi weebibine jajanename, yepä page weene ibibi lica gemi umle äbitame.

¹³ Yepä Aceji Seemo, lui toraca gyene, liba pagege otni, tabe te pa sibiberäjiyi iyeta ngena gyene toraca. Tabe teemerage ngii cabu lica pagege iicema, yepä tabe eei mene pa jii cemepi, tabe ngena ituge ätecija. Tabe ciige gwidape poto cidi me pa jijananipi.

¹⁴ Tabe te weeme täapume pagege awaba, egä cane lipu jamyacu apaclyera cama gäne, ingle tabe cäme bau ca ngena mene pa yäätacijanepi, pui mene pa jijananipi weebibine.

¹⁵ Iyeta lui cina cäme Babe memi, teepi cuta cämi nemi. Peei name pi cane apu jii cine, egä Aceji Seemo te pa yaacatepi, cane teebine ngena pagege ceera, siige piba weebibine pa jijananipi.”

Mäpu Ngene Atwana te Pa Lateplingtepi Gege Me

¹⁶ “Matikäli padare ingwe gaabe ca weene cebine lica page näpänepeye. Cuta puma cita ca matikäli padare ingwe gaabe ca weene cuta cääri cebine page näpänepeye.”

¹⁷ Poto abiberäja bägrä cina teemeteme ätemläjinisi egä, “Tabe baa ngena täapume nijinige egä, ‘Matikolä padare ingwe gaabe ca weene lica page näpänepeye cebine. Cuta puma cita ca matikolä padare ingwe gaabe ca weene cääri cuta page näpänepeye cebine.’ Tabe cuta jii cige egä, ‘Apu gyene, ingle cane Babe bau me ädenine.’

¹⁸ Ngena gyene ingle teeme ai ‘matikäli padare ingwe gaabe ca’ mene täapume. Mine umle lica gemi, tabe ngena täapume jii cenige.”

¹⁹ Yeesu umle äbitige, egä teepi singi peei poto cidi me ätemlame, siige tabe jejemige egä, “Weene nää pui poto cidi me ngene jotwaniniye, cane lipu jijininine egä, ‘Matikäli padare ingwe gaabe ca weene lica cebine pa näpänepeye. Cuta puma cita ca matikäli padare ingwe gaabe ca weene cuta cääri cebine pa näpänepeye.’

²⁰ Cane toraca jijenininine, egä weene ele pingeni-tnipi, yepä ätrunga cäco biname cina gege pagege. Weene ngenecu mäpu cama pinajipi, yepä weeme peei ngenecu mäpu te gege me pa lateplingtepi.

²¹ Magebi te liba bägrä ärngime läbituge, tabe ngenecu mäpu birige, ingle pui padare cabu baborage pita ne jaasicnantuge. Yepä liba bägrä ne jäärnguge, tabe pita ngene jwäätrimaluge, ingle tabe gege birige, bägrä te lipu laplimluge ai gawecewe cabu me.

²² Cuta pepu gyene weene täapume, weene page ngenecu mäpu cama gemi, yepä cane weebibine cääri pa jipänipene. Piba weene gege taatu pinajipi, siige nuuja te äblicäco gyene weebibine pui gege uutecra.

²³ Pui padare cabu weene cebine lica pagege ätemla nuuja gwidape poto cidi me. Cane toraca jijenininine, egä weene liba ngena täapume yäätinäruey Babe ne cäme ngii cabu, tabe icärininge.

²⁴ Weene Babe ne lica ituge ätinera nuuja gwidape täapume cäme ngii cabu ngälu page. Itinärepeye, siige weene pa jepänepeye piba weeme gege te babo pa läbitepi.”

Yeesu Gawecewe Mule bine Epremalemige

²⁵ “Cane ngene ca agli mene ca bii jijanininine weebibine ai mule poto cidi me. Yepä padare te pa tädepi, cane liba ngene ca agli mene ca lica pagege jajanena weebibine yepä cane pajecurage page jijanipene cäme Babe poto cidi me.

²⁶ Pui padare cabu weene weemämu irecu pa pätumutanipeye Babe bau me cäme ngii cabu; siige cane lica jijenininine, egä cane pagege weeme täapume irecu ätumuta Babe bau me,

²⁷ Ingle Babe te teemämu singi gyene weeme täápume. Tabe naace popi singi gyene weeme täápume, inge weene singi ituge căme täápume piiyepu weene ituge átru-nga, egă cane Acejiyame bau ca tădujine.

²⁸ Cane Babe bau ca tădujine ai gawecewe cabu me, siige page cane ai gawecewe ne sebmalenine, acnenutenine Babe bau me.”

²⁹ Puma cita ca abiberăja băgră cina Yesu ne jejisi egă, “Maane siige page pajecurage jicenenemite, lica ngene ca agli mene ca.

³⁰ Page cine siige umle băbitinago, egă maane umle găte iyeta gwidape. Maane niinăce umle lăbitute biname cina singi ngena täápume átemlame. Peei name pi cine siige jitrun-genisi, egă maane Acejiyame bau ca itu tădujite.”

³¹ Yesu jejemige teebibine egă, “Weene siige page jitrungeniye.

³² Padare te tădenige – siige uja bii tatyaramtige – weene liba eplidnăreniye weeme yepăyepă bime mete me, cebine taatu nabmaleniye. Yepă cane taatu lica găne, căme Babe pisi nyene cane cama.

³³ Cane naace name pi weebibine iyeta ai mene bii jijanininine egă weene căme cabu ca poode ne păpăname. Ai gawecewe cabu weene măpu bine jăăpănanemuye, yepă wălu gone ábita, cane gawecewe mule bine ituge apremela.”

17

Yesu Irecu Átumutenige Abiberăja Băgră bime täápume

¹ Yesu liba mene iiceme iyeta apirige, tabe ire acitige cabucewe me, jicige egă, “Babe, căme padare te biiri tatyaramtige. Maane biname bime bau me eboclomtepi, egă cane määme Băgră lipu jamyacu apaclyera cama găne piba cane biname bime cabu me pagege aboclomta, egă maane lipu jamyacu apaclyera cama găte.

² Maane cebine conocăco itu năcărepete iyeta biname bine waadename naace täápume cane iyeteta ireclota ceerame iyeta eei biname bine, maane lui ituge ceera cebine.

³ Lui cina umle gemi maane, lui săte yepă taatu toraca Acejiyame piiyepu cuta lui cina umle gemi cane, Yesu Keriso, maane lui ne ai gawecewe cabu me nătyepujite, teepi uja iyeteta ireclota cabu me bebăcnisi.

⁴ Babe, cane määme jamyacu apaclyera ne ituge aboclomta ai gawecewe cabu, inge cane siige bepirine, maane lui kaakesea itu năcărepete cane te wawename.

⁵ Babe, määme opo gaabe pui yepă jamyacu apaclyera năcărepi, căme lui apaclyera puga ge, cane liba maane cama jage agedname niinăce gaabe me.

⁶ Cane ai biname bine umle ituge wawena määme poto cidi me, maane lui ituge äjăcra căme täápume ai gawecewe cabu ca. Teepi lui määme biname ge, yepă cebine itu năcărepete maane. Teepi määme mene ituge átrunga,

⁷ siige page teepi umle gemi, egă iyeta maane lui ituge ceera cebine, määme bau ca gemi.

⁸ Maane lui mene itu năcărepete cebine, cane teebibine ituge jajanena, siige teepi becatisi. Teepi umle gemi, egă toraca gyene, egă cane määme bau ca itu tădujine. Teepi jitrun-genisi, egă maane te cebine itu nătyepujite.

⁹ Cane irecu átumutenine teeme täápume. Cane lica irecu átumutenine biname bime täápume, lui cina icrajenige gawecewe mule cabu, yepă cane ai bime täápume irecu átumutenine, maane lui ituge cebine ceera, inge teepi määmi nemi.

¹⁰ Iyeta lui cina cămi nemi, cuta määmi nemi; piiyepu lui cina määmi nemi, cuta cămi nemi. Biname cina teeme cabu ca jăăpănusi, egă cane lipu jamyacu apaclyera cama găne.

¹¹ Babe, cane siige page määme bau me ádenine. Cane ai gawecewe cabu lica pa nanajepi, yepă teepi ama pagege. Mijirage Babe, maane miiji määme ngii me kokre ca ire atwemame teebibine, lui ngii maane ituge cebine ceera, piba teepi yepă ábitame, mine liiyepu yepă gegi.

¹² Cane liba taatu aga ge teta cama, cane teebibine căngena ire jaatwemune määme ngii me kokre ca, maane lui ngii cebine ituge ceera. Cane ituge căngenarage teebibine ire atwema, siige nuuja te lica ituge apesera, yepă pui taatu gyene, lui te miiji otni niia puupu cabu me naace täápume Oogărneji mene te toraca me ábitame.

¹³ Babe, cane page ádenine määme bau me. Cane ai mene naace täápume jicenenemine, cane liba taatu ai gawecewe cabu je, egă căme gege te teeme cabu babo ábitame.

¹⁴ Cane määme mene ituge jajanena teebibine, siige ai gawecewe muleyame biname cina teebibine jăămugetnemusi, inge teepi gawecewe me lica gemi epu pana, cane lipu ai gawecewe me lica găne.

¹⁵ Cane lica naawejanenine maane teebibine äsecerame ai gawecewe cabu ca, yepă cane naawejanenine maane teebibine awecetnărame Satani te oomlana wălu pi.

¹⁶ Teepi ai gawecewe me lica gemi cane liiyepu.

¹⁷ Määme mene ca lui toraca gyene, maane teebibine mara me jewenemepi määme täápume.

¹⁸ Maane cebine lipu itu nätyepujite ai gawecewe cabu me, cane cuta piyepu teebibine ituge ätyepa ai gawecewe cabu me.

¹⁹ Cane temiji pi căme ireclota ecitenine määme ime cabu naace täápume teepi cuta toracarge mara me äbitame määme täápume.”

Yeesu Ireçu Ätumutenige Iyeta Ätrunga Biname bime täápume

²⁰ “Cane ai abiberäja bägrä bime täápume taatu ireçu lica ätumutenine, yepä cane cuta ireçu ätumutenine eei bime täápume, lui cina cebine pa nätrungepesi teeme aitneja name pi.

²¹ Cane ireçu ätumutenine naace täápume teepi yepä me äbitame epu pana maane Babe te lipu căme cabu, cuta cane liiyepu määme cabu. Cane ireçu ätumutenine, egä teepi cuta mine cama yepä me äbitame naace täápume ai gawecewe muleyame biname cina piba ätrungame, egä maane te nätyepujite cebine.

²² Cane teebibine yepä jamyacu apaclyera ituge ceera, maane lui näcärujite cebine, naace täápume teepi yepä me äbitame mine lipu yepä gegi.

²³ Cane teeme cabu pisi näne, maane căme cabu pisi näte teepi piba toraca yepä äbitame. Siige piba ai gawecewe muleyame biname cina umle äbitininisi, egä maane te itu nätyepujite cebine piyepu maane te singi ituge teeme täápume, maane lipu singi ituge căme täápume.

²⁴ Babe, maane cebine ai abiberäja bägrä itu näcärepete, siige cane singi gäne teepi cane cama lenajame, cane luma pagege lenaja, cuta cane singi gäne teepi päpäname jamyacu apaclyera ne, maane lui cebine ituge ceera, inge maane niinäce singi ituge căme täápume, ingwe ca ai gawecewe ne jewenujite.

²⁵ Conocăco Babe, ai gawecewe muleyame biname cina umle lica gemi maane, yepä cane umle gäne maane piyepu ai cina umle gemi, egä maane te cebine itu nätyepujite.

²⁶ Cane meebine ituge awabudnita teeme bau me, cuta cerämu naawabudnäjinine naace name pi, egä määme lui singi pisi nyene căme täápume teeme cabu cuta lenajame cuta cane teeme cabu lenajame.”

18

Yeesu ne Joomlisi

(Matayo 26:47-56; Mareko 14:43-50; Luuka 22:47-53)

¹ Ai ireçu ätumuta mene ingwe gaabe ca Yeesu piba ädige teeme abiberäja bägrä cama, siige teepi Kidrona calame ne yuurisi. Calame nuuja poto doro ca puga ge calwacupi cewe. Yeesu abiberäja bägrä cama piyeme ädige.

² Teeme budre me awaba biname Yuuda, tabe cuta umle ge pui cewe, inge Yeesu teeme abiberäja bägrä cama bucurage gääbu labasecretininusi puma.

³ Puma cita ca Yuuda tädige pui calwacupi cabu me. Modamoda iiwäreja biname piyepu Parisea sigu biname cina teta cama jityepimisi yepä sange cubu biname bine piyepu poto iiwäreja mete awamuta biname bine. Teepi lampa piyepu ngale bine ewadimisi. Teeme cuta cubu gwidape puga ge.

⁴ Yeesu umle ge ngena te äbitenige teeme täápume, peei name pi tabe niinäce gaabe me awetäntige, jejemige egä, “Weene laati ne jirngeniye?”

⁵ Teepi jejisi egä, “Cine Yeesu Nasareta cewe biname ne jirngeni.” Yeesu jejemige egä, “Cane age säne.”

Pui biname bime sobe cabu cuta Yuuda puga ge, Yeesu ne budre täápume awabayame biname te.

⁶ Yeesu liba apu jejemige egä, “Cane age säne,” teepi ingwe gaabe me äsinininisi, siige itrametne-malemige gawe cabu me.

⁷ Yeesu cääri itemlimige egä, “Weene laati ne jirngeniye?” Teepi jejisi egä, “Cine Yeesu Nasareta cewe biname ne jirngeni.”

⁸ Yeesu jejemige egä, “Cane nata uja bii jijinine, egä cane age säne. Yoo, weene liba cebine närngeniye, weene ire taatu jicranemeye ai cina otnime.”

⁹ Apu toraca me bäbitige teeme niinäce gaabe mene te egä, “Cane nuuja ne lica ituge apesera, maane lui ituge cebine ceera.”

¹⁰ Simona Peteru me cubu turikä puga ge, siige tabe sisatige, jeläcnutige yepä biname me camu poto tablame ne iyeta. Tabe lui iiwäreja mope biname me kaakesea bägrä, ngii Malkus tage.

¹¹ Yepä Yeesu Peteru ne jejige egä, “Isinglanti cubu turikä ne siiti bora me. Nää, maane apu naangenenige, egä cane singi gäne uucraname ai mäpu cabu ca, căme Babe te lui mäpu cebine ituge ceera?”

Yeesu ne Ecanisi Anas bau me Ätemleja tääpume

¹² Cubu biname, teeme mope biname piyepu iiwäreja mete awamuta biname, teepi Yeesu ne joomlisi, seea ca jetäyisi,

¹³ siige ecanisi Anas bau me. Anas lui sasa mope iiwäreja biname ge, Kayapa me gite ge. Kayapa tage pui kämäge cabu iiwäreja mope biname.

¹⁴ Tabe peese nyene biname, lui te Israela biname bine jejemige egä, “Ai lui miiji gyene yepä biname te budre äbitame iyeta biname bime tääpume.”

Peteru Yeesu ne Jeinige

(Matayo 26:69-70; Mareko 14:66-68; Luuka 22:55-57)

¹⁵ Simona Peteru piyepu nuuja abiberäja bägrä, teepi Yeesu ne ingwe icwäsi. Iiwäreja mope biname te umle ge pui nuuja abiberäja bägrä, peei name pi tabe Yeesu cama abacitige iiwäreja mope biname me mete caale ngalebora me.

¹⁶ Peteru caale kaake poto ca imyemutige. Puma cita ca pui nuuja abiberäja bägrä, iiwäreja mope biname te lui poto cidi me umle ge, tabe tacnenutige, grana ire atwi ngulebägrä ne jojige, siige Peteru ne sisinglantige caale ngalebora me.

¹⁷ Puma cita ca pui grana ire atwi ngulebägrä te Peteru ne itemlige egä, “Nää, maane pui biname me abiberäja bägrä yepä gäte?” Peteru jojige egä, “Eewe, cane lica.”

¹⁸ Pui lui gäbu padare ge. Kaakesea bägrä piyepu iiwäreja mete awamuta biname cina uliobo yuungisi, siige gäbu jemajimige. Peteru cuta puga ge teeme sobe cabu gäbu jemajige.

Iiwäreja Mope Biname te Yeesu ne Itemläjige

(Matayo 26:59-66; Mareko 14:55-64; Luuka 22:66-71)

¹⁹ Iiwäreja mope biname te Yeesu ne itemläjige teeme abiberäja bägrä poto cidi me piyepu teeme abiberäja mene poto cidi me.

²⁰ Yeesu teebine jeige egä, “Cane pajecurage biname bine jaajananemune piyepu yaabiberäjimune abasecretna mete cabu ta piyepu iiwäreja mete cabu, iyeta Israela biname cina liiyeme labasecretnaninusi. Cane nuuja mene ogä lica ituge iicana.

²¹ Peei name pi maane ngeno me cebine nätemlite? Pui bine itemlimi, lui cina yäätacijanimuge, cane ngena ituge jajanena. Teepi umle gemi, cane ngena ituge iicema.”

²² Yeesu ai mene liba jicige, yepä awamuta biname lui tage teeme gome, ime ca maapace gome yoororige, jeige egä, “Iiwäreja mope biname gyene tabe. Maane lipulipu mene jejite teebine!”

²³ Yeesu jeige egä, “Cane liba niiyaniya jicine, nawabudniti, ngena gyene niiya. Yepä cane liba conocäco jicine, maane piba ngeno me cebine noororite?”

²⁴ Piba Anas Yeesu ne ätäyäneji jityepige iiwäreja mope biname Kayapa bau me.

Peteru Cääri Yeesu ne Jeinige

(Matayo 26:71-75; Mareko 14:69-72; Luuka 22:58-62)

²⁵ Simona Peteru camu aclajuteji ge puga uliobo gome, gäbu jemajige. Lui biname cina aclajuteji ge teta cama, jejisi egä, “Nää, maane age säte nuuja teeme abiberäja bägrä?” Yepä tabe jeinige, jejemige egä, “Eewe, cane lica.”

²⁶ Iiwäreja mope biname me kaakesea biname bime yepä te, pui me ingle biname Peteru lui me tablame jeläcnutige, tabe Peteru ne itemlige egä, “Cije cane meebine lica nääpänine teta cama calwacupi je?”

²⁷ Peteru cääri jeinige, siige piba taatu paulo te ala sengenige.

Pilato Yeesu ne Itemläjige

(Matayo 27:1-2; Mareko 15:1-5; Luuka 23:1-5)

²⁸ Yeesu ne iiwäreja mope biname Kayapa me mete cabu ca isatisi, Rooma gabmani babo biname ngii Pilato bau me ecanisi. Pui lui krokerage ge. Israela biname cina lica ebäcnisi Pilato me mete cabu me, ingle teeme tääpume cude gyene äsuplengta deedei loolo, teepi liba yäabäcnusi biname me mete cabu me, lui Israela biname lica ge.

²⁹ Siige Pilato asatige mete cabu ca teeme bau me, itemlimige egä, “Weene ai biname ne ngeno me secaniye cäme bau me? Tabe ngena niiya ne ituge wawena?”

³⁰ Teepi jejisi egä, “Tabe liga conocäco cirege, cine piba mäame bau me lica cire saacanejisi.”

³¹ Pilato jejemige egä, “Yoo siige, weene ecaneye, weemämu eblawäjepeye weeme cotre ibi.” Israela biname cina Pilato ne jejisi egä, “Cime conocäco lica gyene biname ne budre me acitame.”

³² Ai te naace tääpume äbitige Yeesu me niinäce gaabe mene teeme budre gaabe poto cidi me toraca me äbitame.

³³ Piba Pilato acnenutige teeme mete cabu me, Yeesu ne ala tesoglicige teeme bau me otnime, siige itemlige egä, “Nää, maane Israela biname bime mope biname gäte?”

³⁴ Yeesu jejige egä, “Maane nää mäame ngene atwanena mene jicite, coo nuuja cina bii naajisi meebine?”

³⁵ Pilato jejige egä, “Ebägä cane Israela biname gäne. Peei lui weemerage biname piyepu teeme modamoda iiwäreja biname, lui cina naacanisi meebine căme bau me. Maane ngena niyiya ne itu tewenumete?”

³⁶ Yeesu jejige Pilato ne egä, “Cane ai gawecewe mope biname bime pana lica gäne. Cane liga teeme pana cirege, căme kaakesea bāgrā cina cire laringejisi, cebine lica cire nabmalejisi Israela biname bime ime cabu. Yepä cane ai gawecewe mope biname bime pana lica gäne.”

³⁷ Piba Pilato Yeesu ne itemlige egä, “Nää siige toraca gyene, egä maane mope biname gäte?” Yeesu jejige egä, “Maane nata peega bii najite egä, ‘Maane mope biname gäte’. Cane aplimlujine piyepu ai gawecewe cabu me naace tääpume tādujine biname bine jajanename, egä ngena gyene toraca. Laatibi toraca mene ibi yaacrajuge, teepi nätecijusi cebine.”

³⁸ Pilato Yeesu ne jejige egä, “Ngena gyene toraca?”

Pilato Yeesu ne Budre me Jitranige

(Matayo 27:15-31; Mareko 15:6-20; Luuka 23:13-25)

Puma cita ca Pilato asatige mete cabu ca biname bime bau me, jejemige egä, “Cane nuuja ingle ne lica jepänine teebine budre me atraname.

³⁹ Yepä ai lui mule gyene egä cane äsuplengta soriyomu padare cabu yepä biname ne asatame krokeciye mete cabu ca weeme tääpume. Weene nää singi gemi cane Israela biname bime mope biname ne asatame?”

⁴⁰ Biname cina ala abayaninisi egä, “Eewe, tabe lica! Cine singi maane Baraba ne asatame!” Baraba lui cubucubu biname ge.

19

¹ Piba Pilato jejemige Yeesu ne acaname adnana tääpume.

² Cubu biname cina pägepäge seeasea ne jemlemaltisi, teeme mope cabu ecitisi krauni tääpume piyepu ciriyäciriyä cäbletääpe ca esigreräjisi. Teepi ai ne ätutena pana jewenisi, egä tabe babo mope biname gyene.

³ Piba teepi seclige teeme bau me, jewablisi egä, “Sebore Israela biname bime mope biname,” siige ime ca yoororisi.

⁴ Puma cita ca Pilato cuta cääri asatige teeme mete cabu ca, biname bine puutucu je jejemige egä, “Weene ire! Cane teebine sisatenine weene päpäname, egä cane nuuja ingle ne lica jepänenine teebine atraname budre tääpume.”

⁵ Puma cita ca Yeesu tasatige. Pägepäge seeasea puga ge teeme mope cabu piyepu pui ciriyäciriyä cäbletääpe cama ge tabe. Pilato jejemige egä, “Jepäneye, age sena biname!”

⁶ Liba modamoda iiwäreja biname piyepu iiwäreja mete awamuta biname cina teebine jepänisi, teepi ala abayaninisi egä, “Baarge uli cabu jibyecreye! Baarge uli cabu jibyecreye!” Pilato teebibine jejemige egä, “Weene weemämu ecaneye teebine, baarge uli cabu jibyecreye. Cane nuuja ingle ne lica jepänenine teebine budre me acitame.”

⁷ Israela biname cina Pilato ne jejisi egä, “Cime cotre te jüicenige, egä tabe miiji budre äbita, ingle tabe itu tainanumi Acejiyame me Bāgrā ca.”

⁸ Pilato liba itecijige ai mene, tabe baborage wālu äbitige,

⁹ abacitige mete bora me. Tabe puga Yeesu ne itemlige, “Maane luma cita ca gäte?” Yepä Yeesu bojācu ge, nuuja mene lica jüicige.

¹⁰ Pilato jejige egä, “Nää, maane singi lica gäte căme mene awecnistame? Cije maane umle lica gäte, egä căme conocāco pisi nyene meebine asatame coo baarge uli cabu acitame?”

¹¹ Yeesu jejige egä, “Määme conocāco ebā lica cirege, Acejiyame te liba lica cire nääcäreji meebine, peei name pi laati te cebine nacitige mäame ime cabu, teeme niyiya lui baborage gyene.”

¹² Pilato liba ai mene itecijige, tabe naabe liga äbitanige Yeesu ne asatame, yepä Israela biname cina ala abayaninisi egä, “Maane liba teebine sisatenite, maane Rooma gawe babo mope biname Siisa me biname lica gäte. Lui biname te lainuge mope biname ca, tabe Siisa ne yääcisärmutuge.”

¹³ Pilato liba itecijige biname cina apu ala abayena je, tabe puma cita ca Yeesu ne sisatige, ädige, adnatige emā, biname bine luma jaatranimusi. Pui puupu lui kula ca acwabāneji ge, peei name pi eienenisi ‘Kula Puupu’ ca. Heberu mene ca lui egä ‘Gabata’.

¹⁴ Ai mule te äpletmutige bimu duusa poto cidi me, äsuplengta trii bimu me niinäce gaabe ca lui bimu ge. Pilato Israela biname bine jejemige egä, “Peese nyene weeme mope biname.”

¹⁵ Teepi ala abayaninisi Pilato bau me egä, “Budre me eglī, budre me eglī! Baarge uli cabu jibyecreye!” Pilato teebibine itemlimige egä, “Cije weene singi gemi cane weeme

mope biname ne baarge uli cabu me äbyecrame?" Modamoda iiwäreja biname cina jejisi egä, "Cime nuuja mope biname lica gyene, yepä Siisa sine!"

¹⁶ Puma cita ca Pilato Yeesu ne ecitige teeme ime cabu teepi teebine baarge uli cabu acitame.

Yeesu ne Baarge Uli cabu jibyecrisi

(Matayo 27:32-44; Mareko 15:21-32; Luuka 23:26-43)

Puma cita ca teepi Yeesu ne ecanisi.

¹⁷ Tabe teeme baarge uli ne teemämu ecanige. Teepi atyarige cewe me lui ne einenisi 'Mopekaake Cewe' ca, Heberu mene ca lui 'Gologota'.

¹⁸ Teepi puga teebine toto ca jibyecrisi baarge uli cabu. Neeneni biname bine cuta puga jääbyecrisi teeme gome, yepä lui nuuja poto ca cuta yepä lui nuuja poto ca, siige Yeesu teeme cole je.

¹⁹ Pilato jejemige oogärame egä, YEESU NASARETA CEWEYAME, ISRAELA BINAME BIME MOPE BINAME, siige pui mene äbyecrame baarge uli cabu Yeesu me mope gome.

²⁰ Bucurage Israela biname cina ecnemisi pui mene bine, ingle lui puupu cabu jibyecrisi, cudecewe lica ge babo cewe gome ca. Pui mene lui oogäräneji ge Heberu mene ca, Latin mene ca, Griik mene ca.

²¹ Modamoda iiwäreja biname cina jejisi Pilato ne, "Maane ngeno me yoogärite egä, 'Israela biname bime mope biname.' Maane cire yoogärejite egä 'Ai biname te teemämu lainuge Israela biname bime mope biname ca.' "

²² Pilato jejemige egä, "Cane ngena bii byoogärine, pepu yaanajepi!"

²³ Cubu biname cina liba Yeesu ne baarge uli cabu toto ca jibyecrisi, peei ingwe gaabe ca teepi teeme cäbletääpe bine jewadimisi, jebelanemisi, fooa tomi bine jewenimisi, ingle teepi fooa biname ge. Puga ge nuuja cäbletääpe, lui mucmucu ge, äswäräneji deedi lica ge, Yeesu lui asigräneji yaacananuge ngalebora ca.

²⁴ Teepi jiiçisi egä, "Mine ai ne gone yäädericusi, yepä mine ngii cama kula bine yii-abäjenenemisi päpäname, egä laati te ecatenige." Apu ibibi äbitige Oogäräneji mene te egä, "Teepi cäme cäbletääpe bine jebelanemisi, piyepu bääclena äbäclaninisi cäme yepä cäbletääpe tääpume." Yoo, cubu biname cina pepu jewenisi.

²⁵ Yeesu me baarge uli gome jeclajutemige teeme mage, piyepu teeme mage me maade, cuta Kloopa me coga Mariya piyepu Mariya Magadala ceweyame magebi.

²⁶ Yeesu liba jopänige teeme mage ne ämyemuteji teeme baarge uli gawe me pui abiberäja bägrä cama, tabe lui tääpume babo singi, siige tabe teeme mage ne piba jojige egä, "Yääye, ire mäame bägrä peese nyene mäame gome!"

²⁷ Piba tabe pui abiberäja bägrä ne jejige, "Ire, mäame mage peeto nwenel!" Peema cita ca pui abiberäja bägrä te ocanige Yeesu me mage ne teeme metete me lenajame.

Yeesu me Budre

(Matayo 27:45-56; Mareko 15:33-41; Luuka 23:44-49)

²⁸ Yeesu umle ge, egä teeme kaakesea ne bepirige. Naace tääpume Oogäräneji mene te toraca me äbitame tabe jiiçige egä, "Cane niye mäne."

²⁹ Caapocapo waina niye puga ge. Puma cita ca yepä biname te waarpopale pana gwidape ne yüglenutige pui waina niye cabu me, cusopi suru ca jigadige, ewepäntige, Yeesu me tage cabu ecitige,

³⁰ siige tabe enige. Piba ingwe ca tabe jiiçige egä, "Iyeta cäme kaakesea bine siige biiri bepirimine." Piba teeme mope te ergo ecirige, siige tabe budre äbitige.

Yeesu ne Drawace Gome jigadisi

³¹ Pui lui Israela biname bime Sabade amaceträja bimu ge, peei name pi teepi eclige Pilato ne jajime, egä lipu gyene baarge uli cabu lui nesae biname bime pupuwace kaake bine acnapecame piyepu budrekaake bine ätrungame. Teepi singi lica Sabade bimu te puma wawename budrekaake bine atacwäneji baarge uli cabu, ingle pui Sabade lui baborage bimu ge teeme tääpume.

³² Puma cita ca cubu biname cina eclige, Yeesu cama lui neeneni biname bine jääbyecrisi, teepi teeme pupuwace kaake bine icnapimisi.

³³ Teepi liba seclige Yeesu bau me, teepi teebine jepänisi budre, peei name pi teeme pupuwace kaake bine lica ääcnäputisi.

³⁴ Piba teeme yepä te kalaku ca jigadige teebine drawace gome. Pui dupe cabu ca uudi piyepu niye cina tapiräsi.

³⁵ Yoo lui te ai ne jepänuji, tabe jeitnäjenige naace tääpume weene cuta piba ätrungame. Tabe ngena jeitnäjenige, toraca gyene. Tabe umle gyene, egä tabe toraca mene jiiçenige.

³⁶ Peei cina äbitininisi ai Oogäräneji mene te ibibi äbitame egä, “Teeme nuuja kaake ne lica pagege ägäbuta.”

³⁷ Cuta nuuja gome jüicenige egä, “Teepi teebine ire jetwenisi, kalaku ca lui ne drawace gome jigadisi.”

Yeesu ne Gape cabu Ecitisi

(Matayo 27:57-61; Mareko 15:42-47; Luuka 23:50-56)

³⁸ Ai ingwe gaabe ca yepä biname ngii Yoosepa, Arimatea cewe biname, te ädige Pilato bau me. Tabe cuta peese nyene yepä Yeesu me abiberäja bägrä. Yepä tabe cabucabu lica jitrungige, inge tabe wälu ge Israela modamoda biname bime tääpume. Tabe Pilato ne itinärige Yeesu me budrekaake ne ätrungentame. Pilato teebine ‘yoo’ mene jejige, siige Yoosepa ädige Yeesu me budrekaake ne ätrungentame.

³⁹ Yepä biname ngii Nikodemo, tabe peese nyene Yeesu ne lui te ciiye cabu yäädärepä, tabe cuta tädige piyeme. Tabe secanige teeti kilo miijirage lengolengo ngängye, lui wawenäneji ge miira uli ngedo ca piyepu aloe uli migi ca.

⁴⁰ Teepi Yeesu ne itrungentäsi, cäbletääpe bine ipyacemäsi pui ngängye ca, siige tope etnäsi. Israela biname cina apu jaawenimusi teeme budrekaake bine gape cabu acraname.

⁴¹ Pui puupu gome Yeesu ne luma baarge uli cabu ecitisi, calwacupi puga ge. Pui calwacupi cabu kula bora uureji ätruna cäco gape puga ge.

⁴² Ingle Sabade bimü me amacetrnäja bimü ge, peei name pi teepi puma ecitisi, inge pui gape lui teeme budre puupu mameta ge.

20

Yeesu Budre cabu ca Arpinantige

(Matayo 28:1-8; Mareko 16:1-8; Luuka 24:1-12)

¹ Sande krokerage baani te liba seclitige, Mariya Magadala cewe magebi te piba oclige gape ängrärame, siige jepänige, egä baborage kula te apeträngteji gyene gape grana gome ca.

² Puma cita ca tabe uuwamenamena oclige Simona Peteru piyepu pui nuuja abiberäja bägrä bau me, Yeesu lui tääpume baborage singi, siige jaajige egä, “Teepi mime Yageyame ne becatisi gape cabu ca. Cine umle lica gemi, teebine luma bii becitisi?”

³ Piba Peteru piyepu pui nuuja abiberäja bägrä aaclige gape cabu me.

⁴ Teepi niinäce yepä ibi uuwamäsi, yepä pui nuuja abiberäja bägrä te Peteru ne itucäriige, siige niinäce atyaramtige gape gome me.

⁵ Tabe äcupige, aepmalige gape bora me, bulubulu cäbletääpe bine jepänimige, yepä tabe lica abacitige.

⁶ Teeme ingwe ca Simona Peteru te tädige, siige gaabe ta abacitige gape bora me. Tabe jepänimige bulubulu cäbletääpe bine puma, Yeesu ne lui ca tope setnumesi,

⁷ cuta cäbletääpe ne jepänige, teeme mope ne lui ca tope setnumesi. Pui cäbletääpe lui mara gome enajige, lica poto cäbletääpe luma. Pepu tope enajige, Yeesu me mope ne lipu setnumesi.

⁸ Piba pui nuuja abiberäja bägrä, lui te niinäce atyaramtige, tabe cuta abacitige. Tabe liba jepänige iyeta, siige tabe piba jitrungige.

⁹ Teepi camu umle cäco aanajige, Oogäräneji mene te lipu jüicenige, egä tabe budre cabu ca cirege arpinenta.

¹⁰ Puma cita ca abiberäja bägrä cina acnenutäsi mete me.

Yeesu Aboclomtige Mariya Magadala Ceweyame Magebi bau me

(Matayo 28:9-10; Mareko 16:9-11)

¹¹ Mariya puga ge ele cama aclajuteji gape grana gome. Tabe liba ele cabu camu ge, tabe piba aepmalige gape cabu me,

¹² neeneni Acejiyame me mename seemo bine jääpäniige adnatäneji ge pui puupu cabu, Yeesu ne luma secitumesi. Teepi bulubulu cäbletääpe asigräreji ge. Nuuja te lui mopingle jage, nuuja te lui ernge gome jage, siige teepi Mariya ne jojäsi egä.

¹³ “Magebi, maane ngeno mäte ele?” Tabe jaajige egä, “Teepi cäme Yageyame ne becatisi. Cane umle lica gäne baa luma becitisi.”

¹⁴ Ai mene ingwe gaabe ca tabe atatrungtige, jepänige Yeesu ne aclajuteji, yepä tabe teebine opo lica ewatnige.

¹⁵ Yeesu utemlige egä, “Magebi, maane ngeno mäte ele? Laati ne jirngenite?” Mariya apu jongige, egä calwacupi ire atwi biname ge, peei name pi tabe jejige egä, “Babo biname, maane liga Yageyame ne becatisi, cebine naji, maane luma bii becitite, cane piba oclenine acatame.”

¹⁶ Yeesu jojige teebine egä, “Mariya!” Piba Mariya cääri atatrungtige, teebine jejige Heberu mene ca egä, “Raboni.” Peei lui egä ‘Abiberäja biname.’

¹⁷ Yeesu Mariya ne joiige egä, “Gone cebine noomlute, ingle cane camu gäne cäro Babe bau me otni. Maane äte oculi cäme abiberäja bägrä bime bau me, jejemepi, egä cane ädenine teeme bau me, lui sine cäme Babe piyepu teeme Babe, cäme Acejiyame piyepu teeme Acejiyame.”

¹⁸ Piba Mariya Magadala cewe magebi te oclige, teeme abiberäja bägrä bine jejemige egä, “Cane Yageyame ne bii jepänine,” piyepu tabe jejemige Yeesu teebine ngena joiige.

Yeesu Aboclomtige Teeme Abiberäja Bägrä bime bau me

(Matayo 28:16-20; Mareko 16:14-18; Luuka 24:36-49)

¹⁹ Pui Sande mämleteca me abiberäja bägrä cina abasecretnige yepä mete cabu me, siige gaabe armeji ge Israela modamoda biname bime wälu name pi. Yeesu puma cita ca tädige, teeme cole je jeclajutige, jejemige egä, “Poode weene cama yaanajege!”

²⁰ Ai mene iicema ingwe gaabe ca tabe teeme ime aaboclomtige teeme bau me cuta drawace ne eboclomtige. Abiberäja bägrä cina babo gege ge, teepi lipu Yageyame ne jepänisi.

²¹ Piba Yeesu cääri jejemige egä, “Poode weene cama yaanajege! Cäme Babe te lipu cebine nätyepuji, cane pepu jityepininine weebibine.”

²² Puma cita ca tabe buuwemope ne jipwälutige teeme bau me, jejemige egä, “Aceji Seemo ne ecateye!”

²³ Weene liba biname ne jaajuye egä ‘Määme niyu mule äcisäjeji gemi,’ siige tabe kälyä läbituge. Yepä weene liba jaji cäco peei mene, tabe piba kälyä lica läbituge.”

Tooma me Ätrunga cäco Mule

²⁴ Tooma, twelb abiberäja bägrä bime yepä, lui ne einenisi ‘Päädepäde’ ca, tabe potu abiberäja bägrä cama lica ge pui tomi cabu, Yeesu liba teeme bau me aboclomtige.

²⁵ Teepi Tooma ne jejisi egä, “Cine Yageyame ne biiri jepänisi.” Tooma jejemige egä, “Cane ebä jitrungininine weebibine, cane liba toto dupe bine jääpänenine teeme ime cabu, piyepu ime kukluta aacitenine piyeme, cuta liba ime ecitenine teeme drawace cabu.”

²⁶ Seben bimu ingwe gaabe ca abiberäja bägrä cina cääri abasecretnige yepä mete me. Tooma cuta puga ge. Gaabe armeji ge, yepä Yeesu abacitige, jeclajutige teeme cole je, jejemige egä, “Poode weene cama yaanajege!”

²⁷ Puma cita ca tabe Tooma ne jejige egä, “Maane ire cäme ime cabu me! Määme ime kukluta taaciti ama cäme ime dupe cabu, cuta drawace cabu määme ime seciti. Gone ätrunga cäco naanajuge, yepä maane miiji ätrunga!”

²⁸ Tooma Yeesu ne jejige, “Cäme Yageyame, cäme Acejiyame!”

²⁹ Yeesu teebine jejige egä, “Maane ätrunga gäte page, maane lipu näpänite cebine. Gege gemi eei biname, päpäna cäco je lui cina ätrunga.”

Ai Peba me Ingle Ngena Gyene

³⁰ Yeesu bucurage potu ciitaca mule bine jebenimige teeme abiberäja bägrä bime irewale je, yepä teepi oogäräneji lica gemi ai peba cabu.

³¹ Ai bine ituge oogäränäja weene piba ätrungame, egä Yeesu lui Keriso sine, Acejiyame me Bägrä gyene, siige weene liba birige ätrunga, weene piba iyeteta ireclota ne jääpänuye.

21

Yeesu Aboclomtige Seben Abiberäja Bägrä bime bau me

¹ Ai ingwe gaabe ca Yeesu teeme abiberäja bägrä bime bau me cääri aboclomtige Tiberiya sawa gome. Peei mule lui apu gyene:

² Simona Peteru piyepu Tooma, lui ne ‘Päädepäde’ ca einenisi, piyepu Natanaela Kaana cewe biname Galilaya probins cabu ca piyepu Jebedayo me bägrä neeneneni, cuta nuuja abiberäja bägrä neeneneni, iyeta teepi puga ge.

³ Simona Peteru potu bine jejemige egä, “Cane cibubade me lädene.” Teepi jejisi egä, “Cine cuta naclenige maane cama.” Piba teepi eclige, poo cabu me acetnärige, yepä pui ciye cabu teepi nuuja cibü ne lica joomlisi.

⁴ Krokerage bimu te liba tajarige, Yeesu niye ligiligi jeclajutige, yepä abiberäja bägrä cina opo lica ewatnisi teebine.

⁵ Piba tabe itemlimige egä, “Cäme binamewale, cibü bine weene lica bii joomlemiye?” Teepi jejisi egä, “Eewe, cime nuuja gwidape lica gyene.”

⁶ Tabe jejemige egä, “Weeme net ne ijareye poo camu potu cidi ca, piba weene cibü bine joomlenenemiye,” siige teepi net ne pui potu cidi me ijarisi piyeme. Mäpu name pi teepi äblicäco ge net ne aswecla poo cabu me acenutame, ingle bucurage cibü bine joomlemige.

⁷ Puma cita ca pui abiberäja bägrä, Yeesu lui täapume babo singi ge, Peteru ne jejige egä, “Ai lui Yageyame sine.” Simona Peteru liba itecijige, egä Yageyame sine ai, tabe cäbletääpe

ca amlenaltige, ingle tabe cäbletääpe bine iirecäneji ge, siige piba niye cabu me uuplige doro atwangame.

⁸ Poto abiberäja bägrä cina poo ne sewäcisi doro me, net ne cuta selädnisi teeme cibi cama, ingle teepi cudecewe lica ge doro cabu ca, yepä hanred miita pana padare ge doro omlanane.

⁹ Teepi liba poo cabu ca ärpige, teepi jepänisi egä cibi muye wiiryere cabu puga ge piyepu buluduu cuta puga ge.

¹⁰ Yeesu jejemige egä, "Sewademeye poto cibi, weene lui bine joomlemiye."

¹¹ Yoo, poo liba doro jage, Simona Peteru acenutige poo cabu me, net ne piba selädnige doro me bucurage modamoda cibi cama. Pui lui yepä hanred fiftitri cibi ge. Ngänuge puu bucurage cibi, yepä net te lica äderäriige.

¹² Yeesu jejemige egä, "Naaclege deedei äbitame." Abiberäja bägrä cina wälu ge ätemlame egä, "Maane laasi näte?" ingle teepi umle ge, egä ai lui Yageyame sine.

¹³ Puma cita ca Yeesu ädige, buluduu sewadige, teebibine ecäranemige piyepu cibi ecäranemige.

¹⁴ Ai lui Yeesu nesae me aboclomtige abiberäja bägrä bime bau me, tabe liba budre cabu ca arpinantige.

Yeesu piyepu Peteru

¹⁵ Teepi liba deedei äbita siige, piba Yeesu Simona Peteru ne itemlige, "Simona Yoane me bägrä, mäame singi cäme tääpume nää baborage gyene ai poto bime singi cabu ca?" Tabe jejige egä, "Yoo Yageyame! Maane umle gäte, egä cane singi gäne mäame tääpume." Yeesu teebine cuta jejige, "Maane cäme maamoi bine cängena engäremepi!"

¹⁶ Puma cita ca tabe neeneni me itemlige egä, "Simona Yoane me bägrä, äi nää maane singi gäte cäme tääpume?" Peteru jejige, "Yoo Yageyame! Maane umle gäte, egä cane singi gäne mäame tääpume." Yeesu jejige, "Maane cäme maamoi bine ire natwemepi."

¹⁷ Puma cita ca tabe nesae gäabu me cuta itemlige egä, "Simona Yoane me bägrä, äi nää maane singi gäte cäme tääpume?" Peteru ngenecu mäpu me äbitige, ingle Yeesu lipu nesae gäabu teebine itemläjige yepä mene ca. Puma cita ca tabe Yeesu ne jejige egä, "Yageyame, maane umle gäte iyeta gwidape, cije maane umle gäte, egä cane singi gäne mäame tääpume!" Yeesu jejige teebine, "Cäme maamoi bine engäremepi."

¹⁸ Cane toraca naajenine, maane liba mamye biname ge, maane lamacetnäjute, siige lädute maane liiyeme singi otnime. Yepä maane liba moda je cirege, maane ime cire uutepi, siige nuuja te cire naamacetnäjepi otnime, cire naacanepi, maane liiyeme singi lica gäte otnime."

¹⁹ Ai iicema ca Yeesu eboclomtige Peteru lipulipu gaabe ca cirege budre päpäna Acejyame me ngii ne awepentame. Piba Yeesu Peteru ne jejige egä, "Cebine ingwe näcwepi!"

Yeesu piyepu Nuuja Abiberäja Bägrä

²⁰ Puma cita ca Peteru atatröngtige ingwe gaabe me, pui nuuja abiberäja bägrä ne jepänige, Yeesu lui tääpume babo singi ge. Tabe peese nyene, lui te Yeesu cabu me läbyenutepi, teepi liba deedei äbita cabu jage, yäätlemepi egä, "Yageyame, laati te meebine naawabenige budre me?"

²¹ Yoo siige, Peteru liba teebine jepänige, tabe Yeesu ne jejige egä, "Yageyame, ai biname tääpume ngena te cire läbitepi?"

²² Yeesu Peteru ne jejige egä, "Cane liba singi gäne tabe ama lenajame ngälu cane cire tacnenutepene, peei mäame bau lica gyene. Maane cebine yepä ingwe näcwepi!"

²³ Siige mene te iyeta otnetnäjige eei biname bime cabu me, Yeesu ne lui cina jitrungenisi, egä ai abiberäja bägrä te lica budre cire läbitepi. Yepä Yeesu lica jüicige, egä tabe budre lica cire läbitepi, yepä tabe jüicige egä, "Cane liba singi gäne tabe ama lenajame ngälu cane cire tacnenutepene, peei mäame bau lica gyene."

²⁴ Tabe sine pui abiberäja bägrä, lui te jeitnäjemige iyeta ai mule bine, cuta tabe te yoogäremige iyeta ai mene bine. Mine umle gemi, egä tabe ngena jüicemige, toraca gyene.

²⁵ Yeesu bucurage poto mule bine jebenimige. Iyeta peei bine liba oogära je yepäyepä, cane apu ngene jotwanenine, egä puupu ibi lica gyene ai gawecewe cabu iyeta peei peba bine acraname. Cäme mene ngälu peese nyene.

APOSTOLO: YEESU ME ÄTYEPÄNEJI BINAME BIME KAAKESEA POTO CIDI ME

¹ Yoo Teopilo, cane niinäce lui mene ne itu yogärepenne, pui cabu puga ge mene Yeesu me kaakesea piyepu abiberäja poto cidi me, teeme kaakesea me gije abacita cabu ca

² ngälu Acejiyame te teebine cabucewe me ecatuji. Yeesu camuge cabucewe me otni, tabe lui biname bine ituge jäjäcra teeme ätyepäneji biname me äbitame, teebibine bääirmi jegednemige Aceji Seemo me kokre ca.

³ Yoo, teeme budre ingwe ca, Yeesu lui footi bimu ngalebora bucurage padare cabu awabudnitanige teeme opo gaabe, pipu pi teepi toraca umle äbitininisi egä tabe lui ireclota ge. Teepi teebine jepänanisi, tabe mene teebibine jejananemige Acejiyame te lipu biname bine yaawademuge.

⁴ Tabe liba ten cama enajige, jejemige teebibine egä, “Gone saabmaluye Yerusalema ne, yepä puma jewagrijepeye Babe te lui ätityera poto cidi me umle ituge wawena, piyepu cane lui poto cidi me jijipene.

⁵ Yoo, Yoane niye yaacituge biname bime cabu teeme niya mule äcisejame, yepä nesae pana bimu ingwe ca Acejiyame pa yaacitepi Aceji Seemo weeme yepäyepä trupa cabu me.

Yeesu Ädige Cabucewe me

⁶ Yeesu me ätyepäneji biname cina ten cama liba abasecretnige, teebine itemlisi egä, “Yageyame, nää maane ai padare cabu Israela biname cääri padare nicärininite cimyägämu ire atwime?”

⁷ Yeesu teebibine jejemige egä, “Peei lui weeme cabu lica gyene umle äbitame Babe te lui bimu piyepu lui padare ituge acrana, ingle iyeta mule lui teeme ime cabu temi.

⁸ Yepä, Aceji Seemo liba pa tädepi weeme yepäyepä trupa cabu me, weene piba kokre ne pa jepänepeye teeme bau ca, siige mene pa jüicemepeye cebine aitnejame Yerusalema cewe ngalebora, piyepu iyeta Yuudea gawe cabu ta, Samariya gawe cabu ta, cuta piyepu iyeta gawecewe cabu ta.”

⁹ Ai mene liba siige, Acejiyame te Yeesu ne ecatige cabu me teeme ätyepäneji biname bime opo gaabe je. Carbe te teebine piba icwabige teeme päpäna ca.

¹⁰ Yoo, tabe liba ädige cabu me, teepi ire ca ecanisi. Piba taatu neeneni biname bulubulu cäbletääpe cama tawabudnitäsi, jaaclajutige teeme gome,

¹¹ jejemäsi egä, “Galilaya biname, weene ngena tääpume aclajuteji gemi ire cabu me? Peei Yeesu lui Acejiyame becatige weeme bau ca, tabe cire tacnenutepi yepä pana mule ca weene lipu jepäniye tabe otni cabu me.”

Biname Lui te Yuuda me Kaakesea Puupu ne Jecatige

¹² Siige, piba Yeesu me ätyepäneji biname cina Olibi Üli podo cabu ca äcnärige Yerusalema me. Peei podo lui babo cewe mameta ge.

¹³ Teepi liba atyarige babo cewe cabu me, yepä mete cabu puupu cabu me eclige, teepi luma icrajinige: Peteru, Yoane, Yakobu piyepu Andrea, Pilipo piyepu Tooma, Bartoloma piyepu Matayo, Yakobu lui Alapeus me bägrä, Simona lui Kanana sigu biname ge, piyepu Yuuda lui nuuja Yakobu me bägrä ge.

¹⁴ Teepi jäje labasecretnuge yepä gome irecu ätumutame, cuta ten cama puga ge poto magebi piyepu Yeesu me mage Mariya piyepu Yeesu me iganewale.

¹⁵ Poto bimu ingwe ca Yeesu bau me ätrunga biname cina abasecretnige, iyeta lui pama yepä hanred twenti biname ge. Puma cita ca Peteru abujängtige mene jajanename. Tabe jejemige egä,

¹⁶ “Cäme binamewale, Acejiyame me Oogäräneji Mene te ibibi häbitige, Aceji Seemo lui mene jüicui Daawida me tage cabu ca ciige ngena cire läbitepesi Yuuda poto cidi me, lui Yeesu ne jaawabepi cubuyame bau me.

¹⁷ Yuuda mime tomi cabu ge, ingle Yeesu teebine itu ecatuji mime gigri kaakesea wawename.”

¹⁸ Yoo, Yuuda lui rarekaake ecatuji teeme niya kaakesea tääpume, tabe peei ca yepä gawe ne jeletnuji. Puga pui gawe cabu tabe itramuji, camuge ipluji, came iyeta täsuji, siige budre äbituji.

¹⁹ Iyeta biname lui cina icrajuji Yerusalema cabu je, mene itecijemuji peei poto cidi me. Peei name pi teepi pui gawe ne teeme mene ca einujisi Akeladama ca, peei me aboclomta lui Uudi Gawe.

²⁰ Siige, Peteru puma cita ca jejemige egä, “Salamo uupera peba cabu mene pisi nyene Yuuda poto cidi me egä,

‘Teeme mete te kaake läbitege;
nuuja te puma gone yaanajuge.’

Cuta nuuja mene egä:

‘Nuuja te teeme kaakesea puupu ne yaacatege.’

²¹⁻²² Siige, pepu pi miiji nuuja biname te mine cama abasuta mene iicaname Yeesu me arpinenta poto cidi me. Miiji yepä ne acata mime tomi cabu ca; yepä lui te mine cama waatnetnäjuge iyeta pui padare cabu, Yageyame Yeesu liba mine cama ge. Pui padare ne gije jebacituiji, Yoane liba niye ca äciseja mene jüicemuji; siige pui padare teeme ngälu gaabe gyene, Yeesu liba lädepi mime bau ca cabucewe me.”

²³ Teepe puma cita ca jaajisi neeneni rooriye bine ngii: Yoosepa lui ne yaainusi Barsaba ca, teeme nuuja ngii lui Yuustus sine. Tabe yepä biname gyene, cuta nuuja biname ngii lui Matiya sine.

²⁴ Teepe piba irecu ätumutiniisi egä, “Yageyame, maane umle gäte iyeta biname bime ngene atwanena, peei name pi ai neeneni biname cabu ca niwabinini, maane lui ne ituge jaji.

²⁵ Nää, maane singi laati te ai ätyepäneji biname me kaakesea pa yaacatege Yuuda lui ne itu saabmalepi, tabe liba budre täbitumi, niyarage puupu cabu me tädumi?”

²⁶ Yoo siige, teepi peei meeneni biname ngii bine yoogärisi matimati kula cabu. Matiya me kula te yuutrutige, siige teebine ecitisi pui lebin ätyepäneji biname cama abasutame.

2

Aceji Seemo me Otni poto cidi me

¹ Pentikos bimü liba tädige, iyeta Yeesu bau me ätrunga biname cina abasecretnige yepä mete cabu me.

² Teepe piba taatu itecijemige babo mumwämu carbe cabu ca. Pui mumwämu lui babo kokre buuwe pana ge, mete iyeta ngalebora tabacitige teepi luma icrajige.

³ Teepe puma cita ca jepänisi muye wädräji pana gwidape bine lui cina äpletnäriige, otninisi iyeta biname bime mope papa cabu.

⁴ Aceji Seemo te abacitanige teeme yepäyepä trupa ngalebora iyeta poto cabu lenajame. Teepe mene maramara jüicemisi. Aceji Seemo te lui mene ecäremige, teepi papa jüicemisi.

⁵ Puga ge Yerusalema je Israela biname lui cina itu saaclepi iyeta gawe maramara cabu ca. Teepe iyeta Acejiyame ne yaawejanusi.

⁶ Bucurage biname cina abasecretnige peei mene maramara liba itecijemige. Teepe iyeta ngenecu jelonecmige mene ätecijame, ingle Yeesu bau me ätrunga biname cina mene jüicemisi pui biname bime yepäyepä tagepogogo ca.

⁷ Teepe mutäcäco äbitininisi, piba jüicemisi egä, “Lui biname cina mene jüicenenemisi, teepi iyeta Galilaya biname gemi!

⁸ Peei lipu gyene egä mine teebibine jitecijenemisi mimerage cewe mene iicema cabu ca?

⁹ Mine Partiya gawe cabu ca, Mediya cabu ca, piiyepu Elama cabu ca; Mesopotamiya gawe cabu ca, Yuudea piiyepu Kapadokiya gawe cabu ca gemi; Pontus piiyepu Asiya cabu ca gemi;

¹⁰ Pirugiya piiyepu Pampuliya cabu ca gemi; cuta piiyepu Aikupito cabu ca, piiyepu poto Libiya cewe cabu ca gemi, lui Kurene cewe mameta gyene. Poto mine lui Rooma cabu ca gemi;

¹¹ cuta piiyepu pui tomi cabu ca poto lui Israela biname gemi, poto lui Israela biname lica gemi, yepä mine iyeta Israela biname bime mule jättrungemusi; cuta piiyepu poto mine lui Krete curä cabu ca piiyepu Arabiya gawe cabu ca gemi; yepä mine iyeta jitecijemisi teepi mimerage mene maramara ca jüicetnäjemisi. Teeme mene lui peei babe miiji mule poto cidi me Acejiyame lui bine itu jaawenemepi.”

¹² Yoo siige, biname cina mutäcäco äbitininisi piiyepu maramara ngene atwanena jepänemisi, piba teemeteme ätemläjinisi egä, “Ai ngena mule gyene?”

¹³ Yepä, poto cina ätrunga biname bine bääclena me jewenemisi, jüicemisi egä, “Ai biname lui sice buduma gemi!”

Peteru me Mene

¹⁴ Peteru puma cita ca jeclajutige pui lebin ätyepäneji biname cama, piiyepu babo tage ca gije abacitige mene jajanename biname bine egä, “Israela biname piiyepu weene iyeta lui cina Yerusalema cabu je inajininige, cäme mene nätecijeyel! Cane weebibine umle jwenininine ai mule lui ngena tääpu myene.

¹⁵ Ai biname sice buduma lica gemi, weene lipu jiceniye, inge bimu lui nain oklok kroke gyene. Peei lui sice nänäja padare lica gyene.

¹⁶ Yepä, ai mule lui eei tääpu myene Acejiyame me mename biname Yoele lipu itu jicuji egä,

¹⁷ 'Acejiyame jicige: Age sena mene cane ngena cire jaawenepene ceräcerägäabu padare cabu.

Cane căme Seemo ne cire yaacitepene iyeta biname bime trupa cabu.

Weeme imäbägrä piyepu ngulebägrä cina căme tagepogogo mene cirege iicema; weeme mamye rooriye cina maramara mule bine wama pana cirege päpäna; piyepu weeme moda cina wama bine cirege päpäna.

¹⁸ Yoo, căme kaakesea biname, rooriye cuta magebi piyepu, pui padare cabu căme Seemo cane cire yaacitepene teeme yepäyepä trupa cabu.

Teepi cuta piyepu căme tagepogogo mene cirege iicema.

¹⁹ Cane owowä gwidape cirege wawena dume cabu, piyepu kokre mule gwidape cirege wawena gawe cabu.

Uudi, muyemuye, piyepu waaniwaniba kloka weene cirege päpäna;

²⁰ bimu te căsă me cirege äbita, cuta mabye te uudi pana uududi me cirege äbita.

Iyeta ai mule cina niinäce cirege äbita,

piba ingwe ca mime Yageyame me babo ceräcerägäabu bimu te cire tädepi.

²¹ Siige, iyeta biname lui cina Yageyame me ngii yaawejanusu, tabe teebibine niia cabu ca cire yäsecräremepi.' Siige.

²² Israela biname, ai mene itecijinege! Acejiyame ciitaca mule, călu täti gwidape, piyepu owowä gwidape bine căngena jaawabäjemepi weeme opo gaabe; tabe pui bine Yeesu Nasaretayame cabu ca jaawenanemepi. Weene pui umle gemi, inge weeme gome jaawenanemepi. Tabe pepu pi singi weebibine umle waweneme egä Yeesu lui ätyepänejige teeme bau ca.

²³ Acejiyame teeme singi ca itu iyemaluji Yeesu ne weeme bau me ätyepame. Tabe pui padare umle ge ngena cirege äbita. Weene teebine piba budre me jaawenepewe, liba niia mule biname bine giri jaacranemepewe teebine baarge uli cabu äbyecrame.

²⁴ Yepä, Acejiyame teebine budre cabu ca yaarpinantepi, teeme budre mäpu cabu ca yäyeblingtepi, inge naace gyene budre te teebine äblicăco căngena gawe me apremela.

²⁵ Yoo, Daawida te mene jicuji teeme poto cidi me egä,

'Iyeta padare cane Yageyame ne jăăpänune căme niinäce gaabe je; cane niia päpäna äblicăco gäne, inge tabe iyeta padare cane cama gyene.

²⁶ Peei name pi cane ngenecu miiji gäne, piyepu gege cama mene jicune.

Yoo, Acejiyame, cane budre cire läbitepene, yepä cane mäame trämă papa nanajenige,

²⁷ inge maane licarage căme seemo ne cire nabmalepi biname bime cable cewe cabu je, cuta piyepu lica cirege căme trupa ne abmala gape cabu ocwăwame, cane lui mäame miijirage kaakesea biname gäne.

²⁸ Maane ireclota gaabe itu nawabepete; piyepu cane mäame gome gege cama nanajenige.'

²⁹ Siige, Peteru piba jejemige, "Căme binamewale, lui mene mime kaakesaare Daawida poto cidi me, cane miiji weeme tääpume pajecu me wawena. Tabe budre ge, gape cabu ecitujisi; teeme gape pisi nyene ama mime gome.

³⁰ Tabe Acejiyame me mename biname ge. Tabe umle ge Acejiyame lui mene teeme kokre ngii cama teebine ituge jaji egä, 'Yepä mäame kaakesaare cane mope biname ne cire jaawenepene maane liyepu.'

³¹ Siige, Daawida ngena ca egluji Acejiyame ngena singi cirege wawena, peei name pi tabe mene jicuji Keriso me arpinanta poto cidi me egä,

'Acejiyame teebine lica ebmalige biname bime cable cewe cabu je; teeme trupa te lica gape cabu ocwăwige.'

³² Siige, ai mene lui Yeesu poto cidi me. Acejiyame teebine yaarpinantepi budre cabu ca. Cine iyeta teebine tepănanumesi ireclota ge.

³³ Acejiyame liba teebine yaarpinantepi, puupu teeme gome yäăcärepi, piba teebine Aceji Seemo cuta yäăcärepi, teeme Babe te lipu itu jejuji waweneme. Yoo, page weene lui bine jepänemiye piyepu lui maramara mene itecijenininige, peei iyeta lui Yeesu bau ca gyene.

³⁴ Siige, Daawida lica Yeesu pana äduji cabucewe me, yepä tabe apu mene jicuji egä, 'Yageyame te căme Yageyame ne jejuji:

Ama adnati căme camu poto cidi ca,

³⁵ ngălu cane mäame cubuyame bine mäame ernge gawe me cire yaacranemepene.'

³⁶ Yoo, Israela biname iyeta, weene miiji cängena umle egä peese nyene pui Yeesu weene lui ne itu yaacitepeye baarge uli cabu. Acejiyame teebine itu jaawenepi Yageyame piyepu Keriso.”

Cine Ngena ne Miiji Wawena

³⁷ Siige, biname cina Peteru me mene liba itecijemige, teepi mage ngenecu mäpu äbitinisi teeme conocono mule name pi. Teepi Peteru piyepu nuuja ätyepäneji biname bine itemlemisi egä, “Binamewale, cine ngena ne miiji wawena?”

³⁸ Peteru teebibine jejemige egä, “Atatrongärineye weeme niiyaniya mule cabu ca, piyepu niiye ca äciseja ne ecateye Yeesu Keriso me ngii cabu. Piba Acejiyame te weebibine niiya cabu ca pa isecräripi, cuta teeme miijirage owecu gwidape pa täätyepipi weeme bau me, peei lui Aceji Seemo gyene.

³⁹ Peei mene Acejiyame bau ca lui weeme täápume, piyepu weeme bägrä, weeme saarewale täápume, cuta piyepu iyeta biname bime täápume lui cina cudecewe cabu icrajenige, iyeta biname Acejiyame mime Yageyame lui bine cire taasoglecmepi teeme bau otnime.”

⁴⁰ Peteru jegednemige peei bääirmi, piyepu bucurage nuuja mene ca teebibine sewadanemige egä, “Täsecräripeye conocono mule cabu ca, ingle mäpu daremu te tädenige ai niijarage biname bime bau me!”

⁴¹ Bucurage biname cina ätrunga ca ecatisi teeme mene ne, piyepu niiye ca äciseja ne ecatisi Yeesu me ngii cabu. Pui yepä bimubabu pama trii tausen biname cina ätrunga biname bime tomi cabu ebäcnisi.

⁴² Bucurage padare teepi singi ge Yeesu me ätyepäneji biname bime bau ca mene abiberäjame. Teepi labasecretnininusi mene abaitname, deedei gigri läbitininusi, piyepu cuta Acejiyame bau gigri irecu lätumutinusi.

Ätrunga Biname bime Mule

⁴³ Acejiyame me ätyepäneji biname cina bucurage ciitaca mule piyepu kokre mule gwidape Acejiyame me kokre ca jaawenemusi. Biname iyeta mutäcäco läbitininusi.

⁴⁴ Iyeta lui cina Yeesu ne jitrungisi, teepi yepä gome labasecretnuge piyepu teeme gwidape lui gigri.

⁴⁵ Teepi poto gwidape piyepu gawe bine aletnename jaawenemusi, siige rarekaake jääpänemusi. Lui bime singi pitü nemi, teeme täápume jaabelanemusi.

⁴⁶ Iyeta bimubabu teepi labasecretnuge Acejiyame me iiwäreja mete caale ngalebora, puma cita ca toraca gege cama yaacluge teeme mete me deedei gigri äbitame.

⁴⁷ Teepi eso yääcärusi egä, “Acejiyame lui babo miiji gyene!” Iyeta biname teeme ngenecu miiji ge pui ätrunga biname bime bau me. Iyeta bimubabu gaabegabe Yageyame Yeesu te biname bine yääbäcnanemuge teeme tomi cabu me, lui cina niiya cabu ca äsecräreji gemi.

3

Ernge Niiyaniya Biname te Miiji Äbitige

¹ Nuuja bimubabu Peteru Yoane naabi aacilige Acejiyame me iiwäreja mete me teeme mämle irecu ätumuta padare trii oklok.

² Puga ge iiwäreja mete caale cabu yepä grana, ngii Jamyacu. Cuta puga ge peei grana gaabe gome yepä rooriye lui me ernge niiyaniya ge. Tabe otnetneja äblicäco, ingle pepu ärngeji ge. Iyeta bimubabu gaabegabe biname cina teebine yaacananusi, peei grana gome yaabmalusi biname bine rarekaake täápume ätineräjame, lui cina yääbäcnusi iiwäreja mete caale ngalebora me.

³ Tabe liba Peteru Yoane naabibine jääpäniige abacita je, teebibine äätinäruji rarekaake täápume.

⁴ Teepi ire acitäsi teeme bau me, Peteru piba jejige, “Ire cime bau me!”

⁵ Tabe puma cita ca ire jaatwige teebibine, teemämu ngene jotwanige egä, “Teepi pama ceera me singi gegi.”

⁶ Peteru jejige, “Cäme rarekaake licarage gyene, yepä cäme lui pisi nyene, cane pa näacärene: Yeesu Keriso Nasareta ceweyame me ngii cabu, cane meebine naajenine egä abujängti otnime!”

⁷ Tabe teeme camu poto ime ca joomlige, teebine ewejängtige. Piba taatu pui biname me ernge dugulace kokre äbitige.

⁸ Tabe piba abujängtige, jeclajutige teeme ernge ca, piba gije abacitige otnetnejame. Tabe ten cama iiwäreja mete caale ngalebora me abacitige. Tabe otnetnäjiige, uuplatäjiige, piyepu Acejiyame ne ewepyeräjiige.

⁹ Biname cina teebine jepänisi otni je piyepu Acejiyame ne awepyeräja je.

¹⁰ Teepi liba umle äbitininisi egä pui ätineräja biname peese nyene, lui te ladnatuge iiwäreja mete caale grana ngii Jamyacu gome, teepi cälu te jitemige, lui miiji te tädige teeme bau me.

Peteru te Mene Jejemige Iiwäreja Mete Puutucu je

¹¹ Pui ernge niyaniya biname egäcäro Peteru Yoane naabibime ime joomlige, iyeta biname ngenecu aloneca cama tuuwametnige teeme bau me. Teepi iiwäreja mete caale ngalebora pui puupu cabu jage, lui ne ngii yaainusi “Solomona me Caagecage Toro Mete” ca.

¹² Peteru te liba biname bine jepänemige, jejemige egä, “Israela biname, weene ngena name pi cälu te jitemige? Weene ngena täapume cime bau me ire sinajininige? Näa, weene apu jinge-nininige egä cime kokre ca, coo cime miiji mule ca, ai biname ne otnetnejame jewenago? Licarage!

¹³ Acejjyame peese nyene lui ne Abrahamo, Isacako, piyepu Yakobu yaawejanusi; Acejjyame peese lui ne mime sasa kaakesaare cina yaawejanusi. Tabe te peei ne bii jewenige, teeme miiji kaakeseyame Yeesu ne jamyacu apaclyera ceerame. Yoo, weene Yeesu ne yäacärepeye Israela modamoda biname bime bau me, piyepu teebine jäägyepeye Pilato me opo gaabe, ngänu gyene tabe itu ngene jwaatwanepi teebine asatame.

¹⁴ Yeesu lui mara conocäco biname gyene, yepä weene teebine jäägyepeye, Pilato ne jaajepeye cubucubu biname weebibine ceerame, lica Yeesu.

¹⁵ Weene pepu pi teebine budre me jaawenepeye, lui te biname bine ireclota gaabe jaawabäjemuge, yepä Acejjyame teebine yaarpinatepi budre cabu ca. Cine ire arbi biname gemi peei poto cidi me.

¹⁶ Peei Yeesu me ngii te ai biname ne kokre becärige. Yoo ai biname weene lui ne jepäneniye piyepu sasa umle gemi, teeme ernge dugulace kokre häbitige teeme ätrunga ca Yeesu me ngii cabu. Yeesu bau ätrunga te teebine miiji bii jewenige weeme opo gaabe je.

¹⁷ Yoo cäme binamewale, cane umle gäne, weene liba Yeesu ne niya jaawenepeye, weene umle lica gemi weene ngena jaawenepeye. Weeme modamoda biname piyepu, teepi umle lica gemi.

¹⁸ Yepä, peei mule ca Acejjyame te teeme sasa mene ibibi itu jaawenepi. Sasa cabu ca iyeta teeme mename biname cina peei mene jaaitnäjusi egä teeme Keriso mage mäpu cire jääpänepi.

¹⁹ Yoo, ebmaleye page weeme niyaniya ngene atwanena Yeesu poto cidi me, atrongärineye Acejjyame bau me. Tabe piba weeme niyaniya mule pa yääyebngemepi. Peei jewenepeye,

²⁰ piba ngenecu plowa pa tädepi Yageyame bau ca, piyepu tabe cire täätyepipi Yeesu Keriso, lui ne ituge jaji weeme bau ätyepame.

²¹ Page tabe miiji cabucewe je yaanajuge, ngälu pui padare te cire tädepi Acejjyame liba iyeta gwidape bine kirece me cire jaawenemepi. Ujarage Acejjyame te mene jiicuji peei poto cidi me, piyepu teeme miiji mename biname cina jaaitnäjusi pui mene bine.

²² Moose jiicenige Oogäränejä Mene cabu egä, ‘Acejjyame weeme Yageyame te nuuja mename biname cire täätyepipi, cebine liiyepu itu nätyepuji. Tabe lui weeme biname cabu ca cirege otni. Weene iyeta teeme mene miiji jewenepeye.

²³ Laati te teeme mene lica yaacatuge, teebine yääyebngitusi Acejjyame me biname bime bau ca iyeteta.’

²⁴ Iyeta mename biname, Samwela piyepu iyeta teeme ingwe ca lui cina secluji, iyeta lui cina Acejjyame me tagepogogo mene jiicemusi, teepi mene jiicemujisi ngena cina täbitimesi ai padare cabu.

²⁵ Acejjyame me sasa mename biname cina jeitnujisi tabe ngena cire jaawenepi. Teeme pui mene lui weeme tääpu myene. Cuta piyepu weeme tääpu myene ai nuuja mene, Acejjyame te weeme sasa kaakesaare bine lui ecäranemuji, tabe liba Abrahamo ne jejuji egä, ‘Cane iyeta biname bine ai gawecewe cabu je miiji cire jaawenemepene määme ingwe kaakesaare cabu ca.’

²⁶ Yoo, Acejjyame liba teeme kaakesea bägrä Yeesu ne yaarpinantepi, siige teebine tityepipi niinäce weeme bau me weebibine miiji ceerame, tabe liba weebibine iyeta pa itatrongäripi weeme niya mule cabu ca.”

4

Peteru Yoane naabi Israela Modamoda Biname bime Opo Gaabe je Jaaclajutige

¹ Peteru Yoane naabi liba mene jejemäsi biname bine, poto Acejjyame täapume iiwäreja biname, piyepu iiwäreja mete awamuta mope biname, cuta piyepu poto Sadukea sigu biname, teepi iyeta piba atyarininisi.

² Teepi ngenecu niiya cama itecijemige Peteru naabi Yoane biname bine ebiberäjemäsi egä, "Yeesu lui budre cabu ca itu larpinantepi, peei name pi teeme kokre pisi nyene cuta biname bine budre cabu ca arpinerame."

³ Yoo, pui biname cina singi lica teeme peei mene ätecijame, peei name pi Peteru Yoane naabibine joomlisi. Mämalerage ge, peei name pi krokeciye mete bora me ääsinglantisi ngälu nuuja kroke.

⁴ Yepä, bucurage biname cina lui Peteru Yoane naabibime mene itecijemige, teepi peei mene jitrungisi, siige ätrunga biname cina bucurage äbitinisi, faib tausen joomlige.

⁵ Nuuja bimu cabu, poto Israela mope biname, nuuja modamoda biname, piiyepu cotre abiberäja biname cina yepä gome me abasecretnige Yerusalema cewe cabu je.

⁶ Teepi mene ajananinisi iiwäreja babo biname Anas cama piiyepu Kayapa cama, Yoane piiyepu Aleksanda cama, cuta piiyepu Anas me poto ingle biname cama.

⁷ Teepi piba Peteru Yoane naabibine taasoglicisi teeme opo gaabe je aclajutame, piba teebibine äatemplisi egä, "Weene peei biname ne lipu miiji tewenumeye? Nää, ngena kokre ca piiyepu laati me ngii cama tewenumeye?"

⁸ Siige, Aceji Seemo te babo äbitige Peteru me trupa cabu. Tabe puma cita ca teebibine jejemige egä, "Mope biname piiyepu nuuja modamoda biname,

⁹ weene nää cibibine nitemleniye pui mule poto cidi me lui te täbitumi ernge niiyaniya biname tääpume? Nää, weene singi umle äbitame cine lipu tewenumago peei mule ne?

¹⁰ Weene iyeta miiji umle äbita, piiyepu Israela biname iyeta miiji umle, egä Yeesu miji kokre te ai biname ne iyeta miiji me tewenumi, lui biname te aclajuteji gyene weeme opo gaabe je. Yeesu Keriso Nasareta ceweyame peese nyene, weene lui ne baarge uli cabu itu yaatecwamtepeye. Acejiyame teebine budre cabu ca itu yaarpinantepi.

¹¹ Tabe peese nyene lui poto cidi me Oogäräneji mene te jicenige egä, 'Lui kula ne weene raranga biname cina jigysi, baborage bäbitige iyeta nuuja cabu ca.'

¹² Siige, Yeesu peese nyene lui taatu ibibi gyene biname bine niiya cabu ca äsecrera. Ai gawecewe cabu Acejiyame te nuuja biname me ngii lica ituge ceera lui te ibibi gyene mibibine niiya cabu ca äsecrera."

¹³ Siige, pui mutre biname cina mutäcäco äbitinisi Peteru naabibine Yoane päpäname egä teepi lui wälu umle cäco gegi, cuta umle äbitame egä teepi papa biname gegi, sukulu cäco. Teepi puma cita ca umle äbitinisi Peteru naabi Yoane Yeesu cama cuta waatnetnejäsi.

¹⁴ Yepä, teepi nuuja mene äblicäco ge licana, ingle teepi ernge niiyaniya biname ne jepänisi Peteru Yoane cama aclajuteji ge, lui ne miiji me tewenumäsi.

¹⁵ Siige, teepi Peteru Yoane naabibine jaajisi pui mutre biname tomi äyebलगame puutucu me asatame puma awagriyame. Puma cita ca teemeteme mene ajananinisi egä,

¹⁶ "Mine ngena ne jaawenesi ai neeneni biname poto cidi me? Iyeta biname Yerusalema cabu umle gemi egä teepi peei mara ciitaca mule ne tewenumäsi. Mine äblicäco peei ne aina.

¹⁷ Yepä, mine singi lica ai mene te otnetnejame, peei name pi mine miiji teebibine ablawayame egä, 'Ingwe ca gone Yeesu me ngii cabu nuuja biname ne mene jaji.' "

¹⁸ Siige, teepi Peteru Yoane naabibine cääri taasoglecisi, jaajisi egä, "Gone Yeesu me ngii cabu mene jaajanemuye, coo biname bine yaabiberäjimuyel!"

¹⁹ Yepä, Peteru naabi Yoane jejemäsi egä, "Weene weemämu atranineye egä Acejiyame me opo gaabe je lui gyene conocäco, nää weebibine ätrungame, coo Acejiyame ne ätrungame.

²⁰ Cine ngena ituge päpäna piiyepu ätecija, cine äblicäco bojä lenaja peei poto cidi me."

²¹ Puma cita ca pui mutre biname cina teebibine kokre mene cama aablawäjisi, siige jäätyepisi. Teepi äblicäco teebibine niiya cabu acita, ingle biname tääpume wälu ge. Biname iyeta Acejiyame me ngii ne ewepyeräjisi pui gwidape tääpume lui cina ituge äbita.

²² Lui biname te ciitaca mule cabu ca miiji me täbitumi, tabe footi kämäge cama senajumi piiyepu cerämu poto.

Ätrunga Biname cina Irecu Ätumutinisi Acejiyame bau me

²³ Peteru naabi Yoane liba tasatäsi, teepi acenutäsi teeme ätrunga binamewale bime bau me, teebibine jeitnemäsi ngena mene modamoda iiwäreja biname piiyepu nuuja modamoda biname cina bii jaajisi teebibine.

²⁴ Ätrunga biname cina teeme mene liba itecijemige, teepi iyeta irecu ätumutinisi Acejiyame bau me egä, "Yageyame, maane lui tewenemujite cabucewe, gawecewe, malu, piiyepu iyeta lui peei cabu temi, maane mene itu jejujite mäame kaakesea biname, cime kaakesaare Daawida ne.

²⁵ Tabe piba Aceji Seemo me ätiyera ca peei mene jeitnuji apu egä, 'Ngena name pi maramara gawe biname cina babo claabe gemi?

Teepi ngena name pi gläämu bine papapa jewenemisi?

²⁶ Gawe maramara mope biname cina cubu gwidape bine emacetrnäjenemisi.

Modamoda biname cina yepä gome abasecretnenige cubu agedname Yageyame piyepu teeme jaji biname Keriso cama.'

²⁷ Siige, ai mene te ibibi läbitepi Heroda piyepu Pontiyu Pilato liba ai cewe ngalebora nuuja gawe biname piyepu poto Israela biname cama labasecretnipesi määme conocäco kaakeseayame Yeesu ne äciseräjame, maane lui ne ituge jaji biname bine niiya cabu ca äsecerame.

²⁸ Teepi labasecretnepi iyeta mäame singi wawename, maane lipu uja ngene jotwanujite Yeesu bau ngena te äbitame.

²⁹ Yoo, Yageyame, cuta page maane mene bii näätecijige, teepi lipu opo cabu nirmäjininisi. Gone ätecija taatu, yepä maane mäame kaakesea bägrä bine nitityäripi mäame mene wälu cäco iicemame.

³⁰ Määme kokre niwabinini pita biname bine miiji me wawenecame, piyepu owowä piyepu ciitaca mule bine wawenecame Yeesu mäame conocäco kaakeseayame me ngii cabu."

³¹ Teeme irecu ätumuta mene liba siige, piba taatu pui mete teepi luma tabasecretnige, peei te akocnäjige. Aceji Seemo te babo äbitige iyeta teeme yepäyepä trupa cabu. Teepi gije abacitinisi Acejiyame me mene wälu cäco iicemame.

Ätrunga Biname cina Jebelanemisi Gwidape bine

³² Iyeta ätrunga biname teeme ngenecu piyepu teeme singi lui yepä ge. Nuuja biname te lica jiiicige egä, "Cäme gwidape lui cämi nemi," yepä teepi iyeta teemeteme jebelanemisi.

³³ Yeesu me ätyepäneji biname cina babo kokre cama ire jerbisi Yageyame Yeesu me arpinenta poto cidi me, piyepu Acejiyame me baborage miiji ten cama ge.

³⁴ Teeme tomi cabu nuuja biname lica ge lui te singi cama enajige bimu gaabegabe gwidape täapume. Laatibi yageyame ge gawe coo mete täapume, teepi aletname jaawenimusi, aletna rarekaake saawecnemusi,

³⁵ piba ätyepäneji biname bine yääcäremusi. Teepi peei rarekaake jaabelanemusi teeme yepäyepä laati bemi gwidape cäco.

³⁶ Biname ngii Yoosepa pepu jewenige. Tabee Leebi me ingle cabu ca ge; teeme aplimla puupu lui Kupro curä cabu. Ätyepäneji biname cina teebine yaainusi Banaba ca, peei me aboclomta lui kokre ne ceerayame biname ge.

³⁷ Yoosepa poto gawe aletname jewenige, gawe aletnäneji rarekaake bine ewademige, puma cita ca ätyepäneji biname bime ime cabu icranemige.

5

Ananiya naabi Sapira

¹ Yepä, puga ge rooriye ngii Ananiya lui teeme coga Sapira cama poto teeme gawe aletname jewenäsi.

² Yepä, tabe poto aletnäneji rarekaake mara gome icranemige teeme täapume, poto taatu ecäremige ätyepäneji biname bine, engletnäjemige egä, "Camle-camle daremu gyene ai pui gawe täapume." Teeme coga iyeta umle ge peei poto cidi me.

³ Peteru rooriye ne jejige, "Ananiya, maane ngenome ire taatu jecitite Satani te meebine acaname. Maane angletneja mule bii jewenite Aceji Seemo bau me, maane liba poto gawe aletna rarekaake ne cumä tewenumete.

⁴ Pui gawe liba aletna cäco ge, mäame yene piba, cuta peei gawe täapume lui rarekaake sewadenumete, mäami nemi iyeta. Peei name pi maane ngenome ngene totwananumete peei angletneja mene iicemame? Maane walya mene lica jiiicite biname bau me, yepä maane Acejiyame bau me walya bii jiiicite!"

⁵ Ananiya liba peei mene itecijige, puiirage padare cabu budre tama itramige. Siige, iyeta lui cina itecijemige peei poto cidi me, teepi mage wälu.

⁶ Mamyee rooriye cina mete ne sebäcnisi, Ananiya me budrekaake ne etnisi, ecanisi, gape piba ecitisi.

⁷ Matikolä padare ingwe gaabe ca, Sapira te peei mete me tabacitige, yepä tabe umle lica ge ngena te bäbitige teeme rooriye poto cidi me.

⁸ Peteru teebine utemlige egä, "Cebine naji, nää ai rarekaake lui camlecample daremu gyene, maane piyepu mäame rooriye lui secatumeye weeme gawe täapume?" Tabe jejige egä, "Yoo, camlecample daremu peese nyene."

⁹ Siige, Peteru jojige teebine, "Maane piyepu mäame rooriye weene ngenome mene tewenumeye Aceji Seemo ne walya mene ca apicentame? Pui biname cina lui mäame rooriye ne gape me becitisi, age tema mete grana gome, cuta meebine naasatenisi!"

¹⁰ Piba taatu tabe utramige Peteru me ernge gome, siige budre äbitige. Pui mamye rooriye cina mete ne sebäcnisi, jopänisi budre, puma cita ca teebine usatisi, cuta gape ocitisi teeme rooriye gome.

¹¹ Iyeta Yeesu bau ätrunga biname piyepu iyeta nuuja biname lui ai mule potu cidi me itecijemige, teepi iyeta mage wälu äbitinisi.

Ciitaca Mule Gwidape potu cidi me

¹² Yeesu me ätyepäneji biname cina bucurage owowä mule piyepu ciitaca mule bine jaawenemusi biname sobe cabu. Ätrunga biname iyeta yepä gome labasecretname iiwäreja mete caale ngalebora me, Solomona me Caagecage Toro Mete cabu je.

¹³ Nuuja laatibi ätrunga biname lica, teepi wälu ge ten cama abasecretname, ngänu gyene iyeta biname cina miiji mene taatu jiicusi teeme potu cidi me.

¹⁴ Yepä bucurage magebi piyepu rooriye cina mime Yageyame Yeesu ne jäätrungusi, piyepu ätrunga biname bime tomi cabu ebäcnisi.

¹⁵ Ätyepäneji biname bime ätityera mule name pi, biname cina pita biname bine yaawade-musi babo gaabe gome, waaku coo tiire cabu yaabmalemusi, ingle naace popi teepi singi Peteru me cege teebibine awabame, tabe liba peei pita biname bine yäasuplingtemuge.

¹⁶ Bucurage biname lui yaacrajemuge Yerusalema mameta, cewe matimati cabu, teepi babo cewe me yäabäcnusi ätyepäneji biname bime bau me yaacluge, pita biname yaawade-musi piyepu potu biname lui niyya cable cama gemi. Siige, teepi iyeta miiji me läbitinisi.

Ätyepäneji Biname cina Mäpu Padare Jepänisi

¹⁷ Iiwäreja babo biname piyepu iyeta lui cina ten cama ge, teepi iyeta lui Sadukea sigu biname ge. Teepi claabemete jepänanemisi, ingle biname cina babo singi ätyepäneji biname bime tääpume. Teepi peei claabe name pi mene jitranisi ätyepäneji biname bine niyya wawename.

¹⁸ Teepi teebibine joomlemisi, babo cewe krokeciye mete cabu me ebäcnemisi.

¹⁹ Yepä, mime Yageyame me mename seemo te peei ciye cabu tädige, krokeciye mete gaabe ne jiitnige, ätyepäneji biname bine pui mete cabu ca ewademige, teebibine piba jejemige egä,

²⁰ "Weene biiri, naaclege iiwäreja mete me. Puma jicljatupi, biname bine ebiberäjemepeye iyeta mene ai kirece ireclota potu cidi me."

²¹ Ätyepäneji biname cina peei ne jewenisi. Bimu liba tacitige, teepi iiwäreja mete me ebäcnisi, gije abacitini biname bine abiberäjame.

Pui iiwäreja babo biname piyepu teeme binamewale tesoglecimisi iyeta Israela modamoda biname cina abasecretname mutre biname tomi tääpume. Teepi piba teeme ätityera biname bine krokeciye mete me jityepemisi ätyepäneji biname bine teeme bau me waadename.

²² Yepä, pui biname cina liba atyarige, teepi lica krokeciye mete cabu jepänemisi teebibine, peei name pi cuta äcnärige, abasecretna biname bime bau jeitnemisi egä,

²³ "Cine liba krokeciye mete me atyarinago, gaabe jepänisi armeji ge, iyeta awamuta biname gaabe bine jewamutemisi, yepä cine liba gaabe jiitnisi, mete ngalebora pui biname bine lica jepänemisi!"

²⁴ Modamoda iiwäreja biname piyepu iiwäreja mete awamuta mope biname, teepi liba peei itecijemige, calu te jitemige egä, "Baa, ngena te bäbitige? Lete nemu pui biname?"

²⁵ Puma cita ca yepä biname te tabacitige, teebibine jejemige egä, "Cäme mene näteciye! Peei rooriye weene lui bine krokeciye mete me sebäcnimume, teepi iiwäreja mete cabu temi, biname bine puma ebiberäjemenisi!"

²⁶ Pui awamuta mope biname te piba ädige teeme ätityera biname cama, ätyepäneji biname bine sewademisi, yepä teepi ime ca lica joomlemisi, ingle teepi wälu ge egä biname cina pama teebibine kula ca äbyecra mage, ai name pi teepi owecu gemi ätyepäneji biname bime tääpume.

²⁷ Teepi ätyepäneji biname bine ebäcnemisi mutre biname bime opo gaabe je aclajutame. Iiwäreja babo biname te piba teebibine jejemige egä,

²⁸ "Cine weebibine uja itu jijanipago kokre mene ca egä, 'Gone peei biname me ngii cabu yaabiberäjemuye,' yepä weene cime mene lica ituge äteciya, siige iyeta biname bine Yerusalema ngalebora je ebiberäjemeniye, piyepu weene singi cibibine aitna-me egä cine te Yeesu ne budre me itu yaacitepesi."

²⁹ Peteru piyepu nuuja Acejiyame me ätyepäneji biname cina mene jewecnistisi egä, "Cine miiji Acejiyame me singi wawena, lica biname bime singi ne."

³⁰ Acejiyame peese nyene laati ne mime sasa kaakesaare cina yaawejanusi. Tabe te Yeesu ne budre cabu ca yaarpinantepi, weene liba teebine budre me itu yaacitepeye baarge uli cabu.

³¹ Acejiyame teebine itu yaarpinantepi teeme camu poto me, teebine biname bine Waadena Biname piyepu niya cabu ca Åsecrera Biname me itu jaawenepi. Yoo, tabe singi Israela biname bine padare ceerame teeme niya mule abmalåcemame piyepu pui niya cabu ca åsecrera.

³² Cine ire arbi biname gemi peei gwidape poto cidi me, cuta Aceji Seemo piyepu, Acejiyame lui ne tååtyepuge biname bime cabu me, laatibi teeme singi jaawenusi."

Gamaliya te Mutre Biname bine Båarmi Jegednemige

³³ Siige, peei mutre biname cina ai mene liba itecijemige, teepi mage claabe ge, singi ge åtyepåneji biname bine budre me wawename.

³⁴ Yepå, puga ge yepå Parisea biname teeme ngii Gamaliya. Tabe cotre abiberåja biname ge, lui te baborage ge iyeta biname bime ngene atwanena cabu. Tabe abujångtge pui mutre biname bime sobe cabu, jejemige egå åtyepåneji biname bine miiji åsime puutucu me.

³⁵ Siige, tabe piba mutre biname bine b�armi jegednemige egå, "Cåme Israela biname-wale, weene miiji cångena ngene jotwananineye weene singi peei biname poto cidi me ngena wawename.

³⁶ Weene ngene jepecneye biname ngii Tiyudas poto cidi me. Poto kåmåge niinåce gaabe me tabe tåduji, biname bine jejemuji egå, 'Cane babo biname gåne.' Pama fooa hanred rooriye cina ten cama abasatinuji. Yepå, tabe budre jepånuji, teeme biname cina piba maramara åbitininuji, siige wata apiruji teeme sigu te.

³⁷ Tiyudas me ingwe ca, biname bime ngii acnema padare cabu, Yuuda Galilaya ceweyame te piba tåduji. Tabe cuta bucurage biname ewademuji ten cama otnetnejame, yepå tabe cuta budre jepånuji, siige teeme biname cina maramara åbitininuji.

³⁸ Yoo, peei name pi ai biname bime poto cidi me cane weebibine jijenininine, gone teebibine niya jaawenemuye, yepå ebmalemepeye! Liba biname bau ca gyene teeme ngene atwanena piyepu teeme waweneca, piba peei te papa me pagege åbita,

³⁹ yepå liba Acejiyame bau ca gyene, weene åblicåco teebibine iibana. Weene piba Acejiyame cama pa aglipeye!"

Siige, mutre biname cina Gamaliya me mene jecatisi.

⁴⁰ Teepi tesoglecemisi åtyepåneji biname bine, teebibine etemelåjemisi, piba jejemisi, "Gone mene cååri jicemuye Yeesu me ngii cabu," siige teebibine jityepemisi.

⁴¹ Åtyepåneji biname cina peei mutre biname bine ebmalemisi gege cama, ingle naace popi Acejiyame ngene jotwanige egå teepi miiji ge Yeesu me ngii name pi måpu påpåneme.

⁴² Iyeta bimu teepi iiwåreja mete cabu piyepu biname bime mete maramara cabu mene jaajanemus, biname bine yaabiberåjemusi Miiji Mene Yeesu Keriso poto cidi me.

6

Seben Åtityera Biname poto cidi me

¹ Ingwe ca Yeesu me åtrunga biname cina liba bucurage åbitininisi, Israela biname lui cina Griik mene jicemusi, teepi jicnecimisi Heberu mene biname bine egå, "Teepi liba cuublacubla bine rarekaake yååcåranemus, cime cuublacubla bine kupae lica jaawenemus."

² Puma cita ca pui twelb åtyepåneji biname cina tesoglecemisi iyeta åtrunga biname bine yepå gome abasecretna-me, jejemisi teebibine egå, "Miiji lica gyene cine liba Acejiyame me b�armi mene jajanena kaakesea ne abmalame rarekaake ire atwi tååpume.

³ Cime binamewale, peei name pi weeme cabu ca jejåcremeye seben rooriye bine, lui cina umle biname gemi, piyepu Aceji Seemo ne cångena jååtrungusi, cuta piyepu iyeta biname cina lui tååpume ngenecu miiji gemi. Cine teebibine rarekaake ire atwi kaakesea pa yååcåremepesi.

⁴ Siige, cine piba iyeta padare irecu åtumuta piyepu b�armi kaakesea cabu pa lacranipago."

⁵ Siige, iyeta åtrunga biname singi ge pepu wawename. Teepi seben rooriye bine ngii jejåcremisi. Age temi teeme ngii: Setepano lui me åtrunga baborage ge piyepu lui me trupa cabu Aceji Seemo te baborage ge, cuta Pilipo, Prokora, Nikano, Timona, Parmenas, piyepu Nikolas lui Antiyoka ceweyame ge. Tabe Israela biname lica, yepå tabe Israela biname bime irecu åtumuta mule ne ituge acata.

⁶ Siige, åtrunga biname cina teebibine ewademisi åtyepåneji biname bime bau me. Teepi irecu åtumutininisi piyepu ime etacwe-misi peei seben biname bime papa cabu.

⁷ Siige, Acejiyame me Miiji Mene te otnetnäjige iyeta poto ta. Yeesu bau ätrunga biname cina ablinisi Yerusalema ngalebora, cuta piyepu bucurage Acejiyame täápume iiwäreja biname cina peei Miiji Mene ne jitrungisi.

Israela Modamoda Biname cina Setepano ne Joomlisi

⁸ Setepano lui te baborage ätityera piyepu kokre jääpänuge Acejiyame bau ca, tabe ciitaca mule piyepu owowä mule bine jaawenemuge Aceji Seemo me kokre ca biname bime opo gaabe je.

⁹ Yepä, poto biname cina Setepano cama mene abajininisi. Teepi lui Israela biname bime yepä abasecretna mete cabu ca, pui mete ngii yaainusi egä 'abasecretna mete asatäneji biname bime täápume.' Puga ge pui abasecretna cabu Israela biname lui Kurene piyepu Aleksandriya cewe cabu ca gemi, piyepu poto nuuja Israela biname Kilikiya piyepu Asiya Probins cabu ca. Teepi iyeta gije abacifininisi Setepano cama mene abajame.

¹⁰ Yepä, Aceji Seemo te Setepano ne babo umle ecärige. Peei umle cama tabe liba mene jüicemuge, teepi äblicäco daremu mene iicana.

¹¹ Teepi peei name pi poto biname bine ogä rarekaake ecäremisi walya mene jajime. Teepi apu jüicisi egä, "Cine Setepano ne jitecijisi, tabe Moose me cotre mene bine jiseblecäjemige, cuta piyepu Acejiyame ne jiseblecäjige."

¹² Pepu pana teepi ngenecu alongecame jewenemisi biname bine, piyepu modamoda biname, cuta piyepu cotre abiberäja biname. Teepi Setepano ne joomlisi, ecanisi mutre biname bime opo gaabe me.

¹³ Teepi piba poto biname bine ebäcnemisi walya mene iicaname Setepano poto cidi me. Pui cina jejemisi egä, "Ai biname te jääseblecäjemuge ai cudege iiwäreja mete poto cidi me piyepu Moose me cotre mene poto cidi me."

¹⁴ Cine ituge ätecija tabe jaji je egä Yeesu pui Nasareta ceweyame te ai iiwäreja mete ne pagege iibpageca, piyepu mime sasa mule lui Moose bau ca gyene, peei ne mara me pagege wawena!"

¹⁵ Iyeta lui cina mutre biname tomi cabu adnatärenige, teepi ire jetwa-nanisi Setepano ne, jepänisi egä teeme opo lui mename seemo pana ge.

7

Setepano me Mene

¹ Iiwäreja babo biname te Setepano ne itemlige egä, "Nää, teeme mene toraca gyene mäáme poto cidi me?"

² Setepano jejemige egä, "Cäme babewale, binamewale, cäme mene nätecijeye! Ujarage mime kaakesaare Abrahamo liba camuge Harana cewe me otni, Acejiyame lui jamyacu apacyera cama ge, tabe teemämu aboclomtuji Abrahamo bau. Pui padare tabe Mesopotamiya gawe cabu enajuji.

³ Acejiyame teebine jejige egä, 'Ebmalemi mäáme inglewale bine, piyepu mäáme gawecewe ne ebmal, nuuja gawe cabu me ädi, cane lui gawe ne pagege awaba mäáme täápume.'

⁴ Siige, Abrahamo piba ebmaluji Kaladea gawe ne, äduji Harana cewe me lenajame. Liba Abrahamo me babe budre äbituji, Acejiyame piba teebine jityepuji otnime ai Kanana gawe cabu me, weene page luma inajininige.

⁵ Yepä, pui padare Acejiyame te yepä gawe matikolä lica ecäruji Abrahamo ne teemerage gawe lenaja täápume, yepä Acejiyame teebine mene jejuji gawe ceera teeme täápume piyepu teeme kaakesaare täápume ingwe ca. Yoo, pui padare Acejiyame liba peei mene jejuji, Abrahamo bägrä cäco enajuji.

⁶ Age Acejiyame me mene teeme bau me: 'Mäáme ingwe kaakesaare cina cirege otni mage cudecewe me nuuja biname bime gawe cabu lenajame, puma mäpurage daremu cäco kaakesea cirege wawena. Teeme ireclota mäpu cirege fooa hanred kämäge cama.

⁷ Yepä, pui gawe biname lui bime täápume teepi mäpurage kaakesea cire jaawenepesi, cane teebibine teeme mäpu daremu cirege ceera. Ingwe ca mäáme kaakesaare cirege äsecrera peei gawecewe cabu ca. Teepi cäme bau piba cirege awejena airage gawe cabu.'

⁸ Siige liba peei mene apiruji, Acejiyame piba Abrahamo ne jejuji teeme cewecu acitame teeme tääpe matikolä iirputa ca. Peei cewecu ca Abrahamo te Acejiyame me jajiji mene ecatuji teeme täápume teeme biname me äbitame. Pui name pi Abrahamo, Isacako te liba aplimlujji, teeme tääpe matikolä jüirputuji seben bimu teeme aplimla ingwe ca; piyepu ingwerage Isacako teeme bägrä Yakobu me tääpe matikolä cuta jüirputuji. Yakobu me padare liba, tabe cuta teeme twelb imäbägrä bime tääpe matimati cuta jüirpeclimujji pui cewecu acitame. Pui twelb imäbägrä cina kaakesaare me äbitinininujisi mime twelb ingwe lenajame.

⁹ Pui bāgrā cina claabemete jepānujisi Yoosepa ne lui teeme yepā ge, siige teebine aletname ecanujisi daremu cāco kaakesea wawename Aikupito gawe cabu je. Yepā, Acejiyame puga ge ten cama,

¹⁰ teebine cāngena isatuji iyeta teeme peei māpu cabu ca. Yoosepa liba jeclajutuji Aikupito gawe Mopeyame Parao me opo gaabe je, Acejiyame te Parao ne ngenecu miiji jewenuji Yoosepa tääpume, piyepu Yoosepa ne babo umle ecāruji. Parao piba Yoosepa ne ecituji Aikupito gawe piyepu iyeta Parao me mete bine ire atwime.

¹¹ Gane padare piba tāduji Aikupito piyepu Kanana gawe cabu iyeta; biname cina mage loolo me cewe icrajuji. Mime kaakesaare licarage nuuja deedei bine jepānemujisi.

¹² Peei name pi Yakobu liba itecijuji egā deedei puga ge Aikupito je, tabe teeme bāgrāwale, lui gemi mime kaakesaare, teebibine jityepemujisi teeme niināce gaabe me piyeme.

¹³ Ingwe ca teepi liba cāāri ācnāruji, Yoosepa teeme naniganewale bime bau aboclomtuji. Parao pui padare cabu umle ābituji Yoosepa me ingle biname poto cidi me.

¹⁴ Yoosepa piba mene jityepuji teeme babe Yakobu te otrime teeme inglewale cama Aikupito me. Teepi iyeta lui sebenti faib biname ge.

¹⁵ Puma cita ca Yakobu āduji Aikupito me. Tabe puga ge budre, cuta teeme bāgrā iyeta budre puga ge.

¹⁶ Ingwe ca teeme kaakesaare cina pui saarewale bime budrekaake ewademujisi Kanana gawe cabu me cewe ngii Sekem me, puga kaake bine gape jerbemujisi, lui gapecewe ne Abrahamo te rarekaake ca itu jeletnuji Hamora biname bime bau ca.”

¹⁷ Setepano mene jicemige egā, “Acejiyame me padare liba mameta ge atyaramta teeme jajeji mene toraca me ābitame, lui mene Abrahamo ne itu jejuji, mime biname cina piba Aikupito gawe cabu bucurage itu ablinujisi.

¹⁸ Pui padare cabu kirece mope biname te gije abacituji Aikupito gawe ne ire atwime; tabe umle lica ge Yoosepa poto cidi me.

¹⁹ Pui mopeyame piyepu teeme biname cina mime biname bine engletnājemujisi, mime kaakesaare bime ireclota māpu me jewenemujisi. Teepi teebibine giri jicranemujisi teeme engbāgrā bine puutucu abmalame budre ābitame.

²⁰ Siige, Moose pui padare cabu aplimluji; tabe jamyacu bāgrā ge. Nesae mabye teeme mage babe cina teebine mete cabu ire jetwujāsi.

²¹ Moose ne liba nuuja puupu cabu me imlitāsi, pui Parao me ngulebāgrā te teebine esicrutuji, joomluji teeme bāgrā tääpume.

²² Aikupito umleumle biname cina Moose ne ebiberājujisi. Tabe babo me ābituji teeme mene piyepu teeme waweneca cabu.

²³ Moose liba footi kāmāge joomluji, tabe ngene jotwananuji teeme Israela binamewale bine ādārame.

²⁴ Tabe jepānuji Aikupito biname te yepā Israela biname ne egluji. Moose pui ne itityāruji, Aikupitoyame ne daremu jewecnistuji, budre tama egluji, siige.

²⁵ Moose apu jengenuji egā teemerage Israela biname cina umle ge egā Acejiyame te teebine pa jaajepi teebibine āsacererame teeme māpu ireclota cabu ca, yepā Israela biname umle lica ge peei poto cidi me.

²⁶ Nuuja bimu tabe jāpānuji neeneni Israela biname arngi cabu jage. Moose singi teeme claabe ne agawame, jaajuji egā, ‘Siige, weene yepā biname gegi. Weene ngenome weemāmu arngeniye?’

²⁷ Yepā, lui te nuuja ne egluji, tabe Moose ne iyebingājuji, teebine itemluji egā, ‘Meebine laati te bii naajige cime ire atwi biname piyepu ablaweja biname ābitame?’

²⁸ Wāā, maane singi cebine agli mäte, maane lipu birice Aikupito biname yepā ne seglumete?’

²⁹ Siige, Moose liba peei mene itecijuji, tabe Aikupito gawe cabu ca āyebingtuji cudecewe me, siige Midiyan gawe cabu gije abacituji lenajame. Puga teeme coga te neeneni imābāgrā bine aaplimluji.”

Setepano cerāmu cuta jicemige egā,

³⁰ “Footi kāmāge liba apirinunujisi, Moose piba Sinai podo wajwa je daapo taatu gawe cabu enajuji, siige Acejiyame me mename seemo te teeme bau taboclomtuji. Uli te puga ayige, pui wādrāji cabu peei mename seemo ne jepānuji.

³¹ Moose cālu te jituji peei uli ne liba jepānuji ayi je, āduji mameta me cāngena ireme. Tabe piba Acejiyame me tagepogogo itecijuji egā,

³² ‘Cane Acejiyame sāne, lui ne määme kaakesaare Abrahamo, Isacako, piyepu Yakobu yaawejanusi.’ Moose me tääpe te wālu name pi jeclonuji, tabe wālu ge ireme.

³³ Acejiyame teebine jejuji, ‘Määme ernge gwidape yiirecimi, ingle maane aclajuteji gāte cude puupu cabu.

³⁴ Yoo, cane jääpänemune căme biname bime ireclota Aikupito je lui mage mäpurage ge. Cane teeme mäpu cabu cewe oocanena näteccjanuge; cane bii täinine teebibine mäpu cabu ca äsecreraame. Ayo, cane meebine Aikupito me pa näätjepene.'

³⁵ Siige, Moose peese Israela biname cina lui ne itu jigjujisi, teebine jejujisi egä, 'Laati te meebine naajige cibibine ire atwime piyepu ablawejame?' Yepä, Moose peese nyene lui ne Acejiyame te itu tityepuji Israela biname bime ire atwime piyepu teebibine teeme mäpu ireclota cabu ca äsecreraame. Pui mename seemo lui te ayeji uli cabu taboclomtuji, tabe Moose ne itityäruji.

³⁶ Moose peese nyene lui te biname bine ewademuji Aikupito gawe cabu ca. Footi kämäge cama tabe ciitaca gwidape bine jewenemuji Aikupito ngalebora piyepu Uududi Malu gome piyepu pui daapo taatu cewe cabu.

³⁷ Moose peese nyene lui te Israela biname bine jejemuji egä, 'Acejiyame nuuja mename biname ne cire täätjepipi, tabe cebine liyepu itu nätyepuji. Tabe weeme cabu ca yepä cirege.'

³⁸ Siige, Moose peese nyene lui puga ge Israela biname cama pui daapo taatu cewe cabu je. Tabe puga ge mime sasa kaakesaare cama piyepu pui mename seemo cama, lui teebine mene jejui Sinai Podo cabu je. Tabe puga sewademuji Acejiyame miji ireclota mene mibibine jajanename.

³⁹ Yepä, mime kaakesaare cina äbwäricninujisi teeme mene äteccijame, siige Moose ne jigjujisi. Teepi singi ge cuta Aikupito me äcnärame.

⁴⁰ Peei name pi teepi Moose me naane Aarona ne jejujisi egä, 'Mime uuje bine jewenemi mime niinäce gaabe otnime. Mine nuuja umle lica gemi ngena te itu täbitumi Moose tääpume podo cabu je, lui te mibibine Aikupito gawe cabu ca niwadipi.'

⁴¹ Teepi puma cita ca uuje ne jewenujisi awejename, teeme opo lui kau plongo pana ge. Teepi peei ne yiwäräjujisi, babo deedei jewenujisi, lui teeme ime ca wawenäneji gwidape ge.

⁴² Peei name pi Acejiyame te kaake ca icelyäremuji teebibine, ire ta jicranemuji teeme peei singi gaabe cabu otnime dume piyepu wale bine iiwärejame. Mene pisi nyene Oogäräneji Mene cabu Acejiyame me mename biname bime bau ca egä, 'Israela biname, peei lui căme tääpume lica gyene

weene lui footi kämäge cabu cibucibu gwidape yaaglecimuye, yiwäräjemuye pui daapo taatu cewe cabu je.

⁴³ Yepä, Moloko uuje tääpume weene cäbletääpe ca mete ne erangujiye, pui ne ecanujiye, cuta piyepu weeme uuje Rapana, teeme ämyeji wale ne ecanujiye.

Teepi lui ime ca wawenäneji gwidape ge iiwäreja tääpume.

Cane peei name pi weebibine cudecewe me cirege ätyepa Babloniya nuuja poto me.'

⁴⁴ Siige, mime kaakesaare bime iiwäreja mete puga ge pui daapo taatu cewe cabu je. Peei watata rarangäneji mete lui cäbletääpe ca wawenäneji ge. Peei lui Acejiyame me mete ge biname cama lenajame. Teepi peei ne cängena jewenujisi epu pana Acejiyame te Moose bau me lipu eboclomtuji mene taatu ca mete raranga tääpume.

⁴⁵ Ingwe ca teepi peei mete teeme bägrä bine ecäremujisi. Teeme bägrä cina pui mete ne piba ecanujisi ten cama, teepi liba Yosua cama ecluji ai Kanana gawe bine waadename, Acejiyame te teeme niinäce gaabe ca liba iyecräjemuji maramara biname bine. Pui mete te ten cama enajuji ngälu Daawida me padare.

⁴⁶ Yoo, Acejiyame ngenecu miiji ge Daawida tääpume. Tabe Acejiyame ne itemluji tabe te meterage wawename Acejiyame tääpume, lui ne iyeta mine Yakobu me kaakesaare cina yaawejanusi.

⁴⁷ Yepä, Daawida me bägrä Solomona te peei mete ne eranganuji.

⁴⁸ Yepä, Caburage Acejiyame tabe lica yaanajuge mete cabu lui ne biname cina yaarangusi, teeme mename biname te lipu jiicuji egä,

⁴⁹ 'Yageyame te jüicenige: căme puupu gyene cabucewe je, cane biname bine puma cita ca ire pa taatwemepene.

Gawecewe lui căme ernge acita puupu gyene.

Lipu mete ne weene singi căme tääpume rarangame?

Lese nyene puupu căme lenajame?

⁵⁰ Cije cane iyeta gwidape cämämu lica jewenemujine? "

⁵¹ Siige, puma cita ca Setepano cuta jejemige egä, "Weene ätrunga căco gemi. Weene ngena atwana Acejiyame bau lica gemi. Weene Acejiyame me mene äteccija căco gemi. Weeme sasa kaakesaare liyepu weene pepu gemi. Teepi lipu singi lica Aceji Seemo ne äteccijame, weene cuta piyepu.

⁵² Wää, nuuja mename biname bime puga ge weeme kaakesaare cina lui ne niiya lica jaawenusi? Eewe, teepi niiya jaawenemusi iyeta mename biname bine! Teepi Acejiyame

me mename biname bine budre me jaawenemusi lui cina mene jeitnājujisi teeme Conocāco Kaakesayame Yeesu me otni poto cidi me. Siige, ai padare weene walya mule ca teebine budre me itu yaaglepeye.

⁵³ Weene peete nemi lui cina Acejiyame me cotre mene ewademujiye, mename seemo cina lui cotre weebibine icārininujisi, yepā weene lica peei cotre bine jaawenemuye!”

Biname cina Setepano ne Kula ca Jibyecrisi

⁵⁴ Siige, pui mutre biname cina liba Setepano me mene itecijemige, teepi claabemete jepānisi, giricu bine etebecmisi teeme claabe name pi.

⁵⁵ Yepā, Aceji Seemo Setepano me trupa cabu baborage ge. Setepano cabu me ire acitige, Acejiyame me jamyacu apaclyera ne jepānige piyepu Yeesu ne jepānige aclajuteji ge Acejiyame me camu poto ca.

⁵⁶ Tabe jiicige, “Ire cabu me! Cane jepānenine dume āpācuteji ge piyepu teebine, lui Acejiyame bau ca tāduji biname me ābituji, tabe aclajuteji ge Acejiyame me camu poto ime je!”

⁵⁷ Baborage ala cama pui mutre biname cina teeme tablame bine ime ca ermemisi, piba taatu Setepano bau me tuuwametnige,

⁵⁸ teebine babo cewe cabu ca wata iyebingtisi, kula ca jibyecrisi. Teepi teeme acwabeja cābletāāpe ebmalemisi yepā mamye biname gome je, teeme ngii Saulo.

⁵⁹ Teepi Setepano ne jāje jibyecranisi, siige tabe mime Yageyame ne jejige egā, “Yageyame Yeesu, nacati cāme seemo!”

⁶⁰ Tabe kokorare ca āāpednutige, piba babo tage ca jejige egā, “Yageyame, gone ngene taapecnute teeme poto cidi me ai niīya mule ne.” Tabe ai mene jiicige, siige budre ābitige.

8

¹ Yoo, Saulo singi ge Setepano me budre tāāpume.

Saulo te Ātrunga Biname bine Mage Niīya Jaawenanemuge

Puirage bimū cabu poto biname cina gije abacitinisi ātrunga ingle biname bime ireclota māpurage wawename Yerusalema je. Teepi iyeta ātrunga biname bine iyecrājemisi, siige teepi uucratni-ge cewe maramara me Yuudea piyepu Samariya probins ngalebora me. Ātjepāneji biname taatu icrajige Yerusalema je.

² Poto cāngena ātrunga biname cina Setepano ne gape me ecitisi, mage ele ewāyisi.

³ Yepā, Saulo gije abacitige ātrunga biname bine āyebļengame. Tabe mete yepāyepā ngalebora abacitanige, ātrunga biname bine sisecrājemige, siige magebi rooriye bine icranemige krokeciīye mete bora me.

Samariya Cewe cabu ta Miiji Mene Jaajanemusi

⁴ Lui ātrunga biname bine iyecrājemisi, teepi otninisi cewe gaabegabe ta, Miiji Mene iyeta poto ta jejananemisi.

⁵ Pilipo ādige babo cewe Samariya me, puga biname bine umle jebenemige Keriso poto cidi me, lui te biname bine niīya cabu ca yāāsecrāremuge.

⁶ Bucurage biname tomitomī cabu teepi cāngena itecijemige Pilipo ngena mene jejananemige. Teepi iyeta teeme mene jitecijanisi, piyepu ciitaca mule bine jepānemisi, tabe lui bine jebenemige.

⁷ Niīya cable cina mage ala cama āsinisi bucurage biname cabu ca; piyepu biname lui bime ime ernge apineca cāco ge, piyepu biname lui eepanepana otni, teepi miiji me ābitininisi.

⁸ Yoo, peei name pi baborage gege puga ge Samariya cewe cabu je.

⁹ Pui babo cewe cabu yepā biname ngii Simona te enajige. Mage padare cama tabe Samariya biname bine cālu te ātime jaawenemuge teeme piiseba mule ca. Tabe jūcemige egā tabe babo biname ge.

¹⁰ Iyeta biname pui babo cewe Samariya cabu, matimati cabu ca ngālu modamoda me, teepi teeme mene jāātecijisi, jiicusi egā, “Tabe peese nyene biname lui Acejiyame me kokre cama gyene, lui ne yaainusi Babo Kokreyame ca.”

¹¹ Lecaleca padare cama teeme piiseba mule name pi biname cina mutācāco lābitininisi, peei name pi teeme mene jāātecijanusi.

¹² Yepā, teepi liba Pilipo me mene jitecijisi, Miiji Mene Acejiyame te biname bine waadena poto cidi me piyepu Yeesu Keriso poto cidi me, teepi piba niīye ca āciseja ne ecatisi, rooriye magebi iyeta.

¹³ Simona cuta peei mene liba itecijige, teebine cuta niīye ca jicisājisi Yeesu me ngii cabu. Peei ingwe gaabe ca, tabe Pilipo me mameta je enajige, piba cālu te jitige kokre

mule gwidape piijepu ciitaca mule bine liba jepänemige, Pilipo lui bine jaawenemuge Aceji Seemo me kokre ca.

¹⁴ Yerusalema cabu lui ätyepäneji biname cina liba itecijemige egä Samariya biname cina itu yaacatepesi Acejiyame me mene ne, siige teepi piba Peteru Yoane naabibine jäätyepisi teeme bau me.

¹⁵ Teepi liba atyaramtäsi, Acejiyame ne puma ewejenäsi pui ätrunga biname bime täápume egä Aceji Seemo te pa labacitanegge teeme yepäyepä trupa cabu me,

¹⁶ Ingle naace popi Aceji Seemo te camuge abacitana teeme nuuja biname cabu, yepä teepi niije ca äciseja taatu itu yaacatepesi mime Yageyame Yeesu me ngii cabu.

¹⁷ Puma cita ca Peteru naabi Yoane ime icranemäsi teeme papa cabu, siige Aceji Seemo te piba teeme yepäyepä trupa cabu abacitanige.

¹⁸ Simona liba jepänige egä Aceji Seemo te ätrunga biname bime trupa cabu babacitanige, ätyepäneji biname cina liba ime icranemäsi teeme papa cabu, tabe piba singi rarekaake ceerame Peteru Yoane naabibine,

¹⁹ Jaajige teebibine egä, “Cuta cebine näcäreye peei kokre, egä cane lui biname cabu căme ime laacitune, Aceji Seemo te piba labacituge teeme cabu me.”

²⁰ Yepä, Peteru teebine jejige egä, “Maane äte, määme rarekaake cama ädi ngälu căco niija puupu me, ingle naace popi maane ngene bii jotwanite Acejiyame me owecu gwidape ne aletname rarekaake ca!

²¹ Maane äblicăco gäte cine cama gigri kaakesea wawename, ingle määme ngene atwana conocono gyene Acejiyame me opo gaabe.

²² Ebmali page ai niija mule ne, Acejiyame ne ewejani määme niija ngene atwanena poto cidi me. Tabe pama meebine kälä pa naawenege.

²³ Cane nääpänenine egä maane niija claabe gäte cime kokre poto cidi me. Määme niija mule te meebine bii noomlige.”

²⁴ Puma cita ca Simona te Peteru Yoane naabibine jaajige egä, “Owecu, weene Yageyame ne ewejaneye căme täápume egä nuuja peei niija gwidape te, weene lui poto cidi me bii najije, lica pagege äbita căme täápume.”

²⁵ Siige, Peteru naabi Yoane Yeesu me ireclota poto cidi me liba jicemäsi, piijepu Yageyame me mene liba jejananemäsi, teepi peei ingwe ca acnenutäsi Yerusalema me. Cuta gaabe cabu liba aalige, Miiji Mene jejananemäsi Samariya gawe biname yepäyepä cewe cabu ta.

Pilipo Miiji Mene Jejige Yepä Etiyopiya Gawe Biname ne

²⁶ Acejiyame me mename seemo te Pilipo ne jejige, “Maane amacnepi, uule poto me ädi, ngälu gaabe cabu atyaramtepi, lui gaabe gyene Yerusalema ca Gaasa me.” Yoo, ai taje biname lica waatnetnäjinusi peei gaabe cabu.

²⁷⁻²⁸ Siige, Pilipo amacetnäjige, abymärige. Yepä Etiyopiya gawe ngii biname puga ge gaabe cabu teeme cewe otnime. Tabe lui rarekaake ire atwi mope biname ge magebi täápume lui te Etiyopiya gawe ne ire jaatwuge. Tabe itu lädepi Yerusalema me Acejiyame ne iiwärejame; tabe tacne-nutenige cewe me teeme älädnalädna gwidape cabu. Gaabegabe liba tädige, tabe Oogäräneji Mene bine secnemige, Acejiyame me menameyame Isaya lui bine soogäruji.

²⁹ Aceji Seemo te Pilipo ne jejige egä, “Ädi älädnalädna gwidape gome me.”

³⁰ Puma cita ca Pilipo uuwamige Etiyopiya biname mameta me, teebine jitecijige Isaya me Oogäräneji Mene acnema cabu. Tabe teebine itemlige egä, “Nää, iyeta umle gäte ai mene lui ecnenenemite maane?”

³¹ Etiyopiya biname te jejige egä, “Cane lipu umle äbita; nuuja biname liba lica pisi nyene cebine abiberäjame?” Tabe piba Pilipo ne jejige, “Tacenuti älädnalädna gwidape cabu, căme gome adna-ti!”

³² Age peei neeneni Oogäräneji Mene pargi Yeesu poto cidi me tabe lui bine aacnenige: ‘Tabe epu maamoi pana, aglime lui ne ecanisi.

Tabe maamoi plongo pana, lui te bojăcu yaanajuge teeme ngäli liba jaaclanimusi.

Tabe nuuja mene lica.

³³ Teepi ajiri me jebenisi teebine, yepä äwärimta biname lica ge teeme täápume.

Nuuja biname te äblicăco mene iicana teeme ingwe kaakesaare poto cidi me,

ingle naace popi teeme ireclota ai gawecewe cabu ngälu bii joomlige.”

³⁴ Siige, pui biname te Pilipo ne jejige, “Cebine naji, laati ne peei mename biname te jeitnenige? Teeme täápume aitnäjenige, coo nuuja biname ne jeitnäjenige?”

³⁵ Pilipo piba gije abacitige mene me. Tabe jegednige peeirage mene pargi cabu ca, piba teebine jejanige Miiji Mene Yeesu poto cidi me.

³⁶ Teepi liba gaabe cabu aaclige, niiye gome atyaramtäsi, piba pui biname te jejige egä, “Agesa niiye. Nää, maane lipu gäte cebine niiye ca äcisejame Yeesu me ngii cabu?”

³⁷ Pilipo te jejige teebine egä, “Yoo, cane miiji gäne meebine niiye ca äcisejame mäame ngenecu bora liba ätrunga pisi nyene.” Tabe jejige egä, “Yoo, cane jitrungenine egä Yeesu Keriso lui Acejiyame me bägrä gyene.”

³⁸ Pui biname liba mene jejige teeme kaakeseayame te älädnalädna gwidape iibaname, piba Pilipo piiyepu Etiyopiya biname niiye cabu me äglenutäsi, siige Pilipo piba Yeesu me ngii cabu jicisäjige teebine.

³⁹ Teepi liba tarpatäsi niiye cabu ca, mime Yageyame me Seemo te Pilipo ne ecatige. Pui biname te teebine ingwe ca lica jepänige; yepä, gege cama teeme gaabe cabu ädige.

⁴⁰ Pilipo piba jepänige egä tabe lui babo cewe ngii Asotus cabu jage. Puma cita ca tabe ädige, iyeta cewe cabu ta Miiji Mene jejanemige, ngälu siige Kesarea cewe me atyaramtige.

9

Saulo Ätrunga Biname me Äbitige

¹ Peei padare cabu Saulo te biname bine drämä ca jewenemige egä tabe singi Yageyame me ätrunga biname bine budre me aglecame. Tabe iiwäreja mope biname bau me ädige,

² teebine itemlige peba ceerame egä tabe peei peba cama miiji gyene Israela biname bime abasecretna mete yepäyepä cabu me abacitaname, lui cina babo cewe Damaseko ngalebora jage. Saulo singi ge peei peba bine naace täápume päpäname, egä tabe liba biname bine jääpänemuge lui cina Yageyame me gaabe cabu waatninusi, magebi piiyepu rooriye, siige peei peba te conocäco yääcäruge oomlemame, Yerusalema me waadename.

³ Saulo liba babo cewe Damaseko mameta atyaramtige, piba taatu apaclyera te carbe cabu ca teebine tuungepmalige.

⁴ Tabe itramige gawe cabu me, tagepogogo piba itecijige egä, “Saulo, Saulo, maane ngenome cebine niiya nawenanenite?”

⁵ “Babo Biname, baa maane laasi näte?”

“Cane Yeesu säne, maane lui ne niiya nawenanenite.

⁶ Abujängti, ädi babo cewe me, cane puma mene pa naajene maane ngena waweneme.”

⁷ Saulo cama lui biname cina eclige, teepi imyemutemige mene cäco. Teepi tagepogogo itecijemige, yepä nuuja biname ne lica jepänisi.

⁸ Siige, Saulo gawe cabu ca abujängtigi, irecu aasatige, yepä äblicäco ge päpäna gwidape bine. Teepi peei name pi teeme ime joomlisi, eweclujisi, Damaseko cewe me ecanisi.

⁹ Nesae bimü ngalebora tabe äblicäco ge päpäna. Pui padare cabu tabe deedei piiyepu niiye cäco enajige.

¹⁰ Puga ge Damaseko cewe je yepä ätrunga biname ngii Ananiya. Yageyame teebine wama pana jejige egä, “Ananiya!”

Tabe jejige, “Yageyame, cane age säne.”

¹¹ Yageyame piba teebine jejige egä, “Abujängti, ädi yepä gaabe cabu me, pui gaabe ngii Conocäco ge. Puma Yuuda me mete cabu je maane itemlepi yepä Taasu cewe biname täápume, teeme ngii Saulo. Tabe irecu ätumutenige.

¹² Tabe Saulo te wama pana yepä biname ne bii jepänige, ngii Ananiya, teeme mete me lui te tabacitige, ime aacitige teeme papa cabu, piba tabe cääri irecu aasatige.”

¹³ Ananiya jejige, “Ewe, Yageyame! Bucurage biname cebine itu najanepesi ai biname poto cidi me, tabe lipu baborage niiya jaawenemuge mäame biname bine Yerusalema ngalebora je.

¹⁴ Tabe peba cama Damaseko me tädumi, cuta peei peba cabu conocäco pisi nyene modamoda iiwäreja biname bime bau ca iyeta biname bine oomläjecome Acejiyame me ngii lui cina yaawejanusu.”

¹⁵ Puma cita ca Yageyame te jejige, “Maane äte, teeme bau me ädi, ingle naace popi cane teebine itu jaajepene cäme kaakesea waweneme, cäme ngii aitnejame nuuja gawe biname bime bau me, piiyepu maramara gawecewe mope biname bime bau me, cuta piiyepu Israela biname bime bau me.

¹⁶ Cane cämämu teebine pa jaawabepene iyeta mäpu tabe lui pagege päpäna cämiji pi.”

¹⁷ Siige, Ananiya ädige, pui mete me abacitige, piba ime aacitige Saulo me papa cabu. Tabe jejige egä, “Cäme biname Saulo, Yageyame Yeesu lui mäame bau me taboclomtumi gaabe cabu maane liba aima tädumete, tabe te cebine bii nätyepige, ingle naace täápume maane cääri päpäname piiyepu Aceji Seemo te mäame trupa cabu abacitame.”

¹⁸ Piba taatu cibi idre pana gwidape cina taatramige Saulo me irecu cabu ca. Tabe piba irecu aasatige ireme. Tabe abujängtigi; piba Ananiya teebine niiye ca jicisäjige Yeesu me ngii cabu.

¹⁹ Tabe liba deedei äbitige, teeme kokre te cääri piba tacnenutige.

Saulo te Miiji Mene Jejananemige poto Damaseko Abasecretna Mete cabu je

Nesae bimu cama Saulo ätrunga biname cama enajige Damaseko cewe je.

²⁰ Tabe conocäco ädige poto abasecretna mete me, giije abacitige mene jajanename egä Yeesu lui Acejiyame ne Bägrä gyene.

²¹ Iyeta lui cina itecijemige, cälu te jitemige, teemeteme ätemläjiniisi egä, “Baa, agesa tabe lui te Yerusalema je pui biname bine yaaglecimuge lui cina Yeesu me ngii yaawejanusii? Tabe pama aima tädumi, ingle naace popi tabe singi ätrunga biname bine oomläjecame modamoda iiwäreja biname bime bau waadename!”

²² Yepä, Saulo me mene kokrerage äbitige. Tabe toraca conocäco Yeesu ne jewabudnitige, jejemige egä, “Tabe peese nyene lui ne Israela biname cina jewagrijanisi teebibine niya cabu ca äsecrerame.” Siige, Damaseko cewe je lui Israela biname, teepi äblicäco ge teeme mene awecnista.

²³ Bucurage bimu ingwe ca, poto Israela biname cina abasecre-tnige, mene jitranisi Saulo ne aglime.

²⁴ Yepä, nuuja biname te teebine jejige teepi ngena mene jitranisi. Ciiye bimu teepi cewe grana gome ire jetwisi teebine aglime.

²⁵ Yepä, ciiye cabu Saulo me binamewale cina teebine ecanisi cewe kula caale gome me. Puma cita ca teebine baborage diiba ngalebora insinglantisi, kula gaga cabu ca iyiniisi gawe me.

Saulo Yerusalema Ngalebora je

²⁶ Saulo piba Yerusalema me ädige. Tabe singi ätrunga biname cama alenglecäjame, yepä teepi Saulo me mene lica jecatisi egä tabe lui toraca ätrungayame gyene. Teepi iyeta wälu ge teeme tääpume.

²⁷ Puma cita ca Banaba teebine itityärige, ecanige ätyepäneji biname bime bau me. Banaba teebibine jejananemige Saulo lipu mime Yageyame ne itu jääpänepi Damaseko gaabe cabu, piyepu Yageyame te ngena mene itu jaajepi teebine. Tabe cuta piyepu jeitnige Saulo te mene Yeesu me ngii cabu lipu wälu cäco jaajanenemepi Damaseko cewe cabu je.

²⁸ Saulo peei name pi ten cama enajige piyepu Yerusalema ngalebora ta otnetnäjige. Tabe mene wälu cäco jüicemige mime Yageyame me ngii cabu.

²⁹ Puga ge Israela biname lui Griik mene ca jüicemusi. Tabe ten cama mene jüicemige, teebibine jiseblecäjemige, yepä teepi singi ge teebine aglime.

³⁰ Ätrunga biname liba umle äbitininiisi ai poto cidi me, teepi Saulo ne ecanisi Kesarea malu cewe me, puma cita ca teebine jityepisi Taasu cewe me.

³¹ Siige, piba iyeta ätrunga ingle biname cina Yuudea, Galilaya, piyepu Samariya gawe cabu poode jepänanisi. Teepi kokre äbitininiisi, piyepu bucurage me äbitininiisi Aceji Seemo me ätityera name pi, piyepu Yageyame me opo gaabe je teepi cängenarage icrajige.

Peteru Ädige Cewe Neeneni Luuda piyepu Yoopa me

³² Peteru iyeta cewe ta otnetnäjige. Nuuja taje tabe ädige Luuda me, Acejiyame me biname bine puma engräjemige.

³³ Puga tabe biname ne jepänige ngii Aenea lui me ime ernge apineca cäco ge. Eit kämäge ngalebora tabe äblicäco ge teeme ute puupu cabu ca arpinenta.

³⁴ Peteru teebine jejige egä, “Aenea, Yeesu Keriso te meebine miiji naawenenige. Arpinanti, mäame ute gwidape emacetnäjemil!” Siige, Aenea piba taatu arpinantige.

³⁵ Iyeta biname cina lui Luuda piyepu Saron cewe ngalebora icrajige, Aenea ne jepänisi. Teepi piba mime Yageyame bau tatatrongäraniniisi.

³⁶ Puga ge Yoopa cewe cabu yepä magebi ngii Tabita lui ätrunga biname gwene. Yoo, teeme Griik ngii lui Dooka, peei me aboclomta lui diiya. Iyeta padare tabe miijimiji kaakesea jaawenemuge, owecumete biname bine yäätityäremuge.

³⁷ Peee padare cabu teebine pita te ywoomlige, siige budre äbitige. Teepi teeme budrekaake ne jucisäjisi, cabu je lui mete puupu, pui cabu ocitisi.

³⁸ Yoopa cewe cudecewe lica ge Luuda cewe ca. Peei name pi Yoopa je ätrunga biname liba umle äbitininiisi egä Peteru lui Luuda cewe cabu jage, teepi neeneni biname bine jäätyepisi teeme bau me mene cama egä, “Owecu, wata tädepi cime bau me.”

³⁹ Siige, Peteru piba amacetnäjige, ten cama ädige. Tabe liba Yoopa me atyaramtige, teepi ecanisi pui cabu puupu me. Iyeta cuublacubla cina teebine jowaclomtisi, ele jolwisi, maramara asigreräja gwidape Peteru ne piba jewabäjisi, Dooka lui bine itu yaaterutäjemepi tabe liba ireclota ge.

⁴⁰ Siige, Peteru iyeta biname bine iyebhengemige peei puupu cabu ca, kokorare ca piba äpednu-tige Acejiyame bau irecu ätumutame. Puma cita ca tabe atatröngtige budrekaake bau me, jöjige teebine egä, "Tabita, arpinanti!" Tabe irecu aasatige, Peteru ne liba jepänige, piba adnatige.

⁴¹ Peteru teebine ime ca jwoomlige, owejängtige. Tabe piba tesoglecemige ätrunga biname bine cuta cuublacubla bine iyeta, teebibine jewabemige egä Tabita ireclota gwene.

⁴² Iyeta Yooa ngalebora biname cina itecijemige ai poto cidi me, siige bucurage biname cina Yageyame ne jitrungisi.

⁴³ Peteru poto bimu cama Yooa je enajige, biname ngii Simona teeme mete cabu. Simona me kaakesea lui cibü tääpe bine yaamacetnäjemuge maramara kaakesea tääpume.

10

Koroneliyo te Peteru ne Ala Tesoglige

¹ Puga ge Kesarea cewe je yepä biname ngii Koroneliyo lui ge mope biname Rooma cubu biname bime yepä sange tääpume. Pui sange ne yaainusi 'Italiya Sange' ca.

² Tabe babo singi irecu ätumuta mule tääpume. Tabe piyepu teeme inge biname iyeta Acejiyame ne yaawejanus. Teeme ätityera baborage ge Israela owecumete biname bime tääpume, piyepu tabe jäje irecu läutumutanuge Acejiyame bau me.

³ Yoo, yepä mämlëbimu me trii oklok poto cidi me, tabe wama pana pajecurage jepänige mename seemo ne, lui tädige, teebine jejige egä, "Koroneliyo!"

⁴ Tabe pui mename seemo ne wäluwälu ire jetwige, piba jejige egä, "Yageyame, ngena gyene?"

Mename seemo te jejige egä, "Acejiyame te ngenecu miiji gyene määme irecu ätumuta tääpume piyepu määme owecu mule tääpume. Tabe singi ge meebine miiji mene jajime.

⁵ Page Yooa me määme biname bine jityepimi yepä biname ne ärngime teeme ngii Simona Peteru.

⁶ Nuuja biname ngii Simona lui te cibü tääpe bine yaamacetnäjemuge, tabe teeme mete cabu enajenige. Pui mete lui malu ligi jage."

⁷ Siige, mename seemo te liba peei mene teebine bii jejige, piba abyemäridge. Puma cita ca Koroneliyo ala taasoglicige teeme neeneni mete kaakesea biname bine piyepu yepä cubu biname ne, lui tage teeme miiji kaakeseayame, cuta lui te Acejiyame ne yaawejanuge.

⁸ Koroneliyo teebibine jäjäjäniige ngena te bii bäbitige, siige piba Yooa me jäätjepänige.

Peteru Babo Gwidape ne Wama pana Jepänige

⁹ Nuuja bimu teepi liba gaabe cabu jage Yooa cewe mameta atyara, peei padare Peteru piba jegelige mete toro cabu lui puupu cabu me irecu ätumutame. Bimu duusa mameta ge.

¹⁰ Peteru loolo me cewe te joomlige, tabe singi deedei tääpu mage. Deedei gädnäja trämä, tabe wama pana jepänige,

¹¹ dume te iitnige, puma cita ca yepä gwidape te gawe me täinige, lui babo daamledamle cäbletääpe pana ge; teeme fooa mutre ca siyiniisi gawe me.

¹² Puga ge pui gwidape papa cabu maramara cibü piyepu biicwale piyepu glunubora ele.

¹³ Piba tagepogogo te jejige teebine egä, "Peteru, arpinanti, eglecemi, erngäjemi!"

¹⁴ Yepä, Peteru jejige, "Eewe, Yageyame, cude gemi! Cane umle cäco gäne gwidape ärngäja lui gemi cude cime tääpume, coo piyepu lui gemi cibucibu lica."

¹⁵ Pui tagepogogo te cuta jejige, "Maane gone gwidape bine yaainemute cude ca, Acejiyame lui bine cibü me itu jaawenemepi!"

¹⁶ Nesae gääbu liba pepu äbitige, peei cäbletääpe ne gwidape cama piba cabu me ewecnis-tisi.

¹⁷ Peteru mage ngene jotwananige teeme wama pana mule me aboclomta poto cidi me. Puirage padare lui biname bine Koroneliyo itu täätjepämi, teepi Simona me mete ne jepänänisi, siige mete gaabe gome jaacclajutänige.

¹⁸ Teepi ala abayänisi, biname ne itemlänisi egä, "Pisi nyene, nää, biname ngii Simona Peteru?"

¹⁹ Peteru te liba ngene jotwananenige peei wama pana mule me aboclomta poto cidi me, Aceji Seemo te piba teebine jejige egä, "Ire! Nesae biname age tämi, meebine näärngenänisi.

²⁰ Maane amacetnäji, äini, gone däägudägu läbitute ten cama otnime, inge cane te bii jäätjepänine teebibine."

²¹ Siige, Peteru äinige, pui biname bine jejemige, "Cane age säne weene lui biname ne jirngeniye. Weene ngenome tujiye?"

²² Teepi jejänisi egä, "Cubu mope biname Koroneliyo te nityepämi. Tabe miijirage biname gyene, lui te umle gyene Acejiyame ne awejena, piyepu iyeta Israela biname ngenecu miiji

gemi teeme poto cidi me. Acejiyame me conocãco mename seemo te Koroneliyo ne tejumi meebine asoglecame teeme mete me otnime, naace tãápume tabe mãame mene ätecijame.”

²³ Siige, Peteru pui biname bine mete me ääsinglentãnige yepã ciye cama ute me.

Peteru Atyaramtige Koroneliyo me Mete me

Nuuja bimu tabe amacetnãjige, siige ten cama ädige. Poto ätrunga biname Yoopa cewe cabu ca ten cama eclige.

²⁴ Yepã bimu ingwe ca, Peteru atyaramtige Kesarea cewe me, Koroneliyo luma teebine jewagrijiige. Koroneliyo cama puga ge teeme inglewale piiyepu poto binamewale, tabe lui bine tesoglecemige.

²⁵ Peteru liga mete me abacitige, Koroneliyo teeme bau ädige, kokorare ca teeme gome äpednutige,

²⁶ yepã, Peteru teebine ewejãngtige, jejige egã, “Abujãngtil Cane cuta biname gãne.”

²⁷ Peteru Koroneliyo ne mene jejanige egãcãro teepi mete me abacitãsi. Tabe puma pui biname bine jepãnemige.

²⁸ Tabe jejemige egã, “Weene umle gemi egã cime Israela biname bime cotre pisi nyene egã, cine lica ädãra coo abasuta nuuja gawe biname cama. Yepã, Acejiyame cebine nabiberãjumi egã: ‘Gone nuuja biname ne jããgyuye, gone teebine cude me jaawenuye.’

²⁹ Peei name pi maane liba cebine nasoglumete, cane tãdine meebine ädãrame, ngãnu gyene maane Israela biname lica gãte. Siige, cane page nããtemlenine, maane cebine ngenome nasoglumete?”

³⁰ Koroneliyo jejige, “Nesae bimu liba bapirige, cane piba mãmlebimu me trii oklok poto cidi me, page liiyepu ge, cãme mete cabu irecu tãtumutanumene. Piba taatu yepã biname te, lui me cãbletããpe apacyãreji cama ge, cãme opo gaabe teclajutumi,

³¹ najumi egã, ‘Koroneliyo, Acejiyame te mãame irecu ätumuta mene bii bitecijige, cuta nããpãnige maane owecumete biname bine lipu yããtityãremute.

³² Maane Yoopa me mãame biname bine jityepemepi, yepã biname ngii Simona Peteru bau me. Tabe lui nuuja Simona me mete cabu jage, lui te cibi tããpe yaamacetnãjemuge. Teeme mete lui malu ligi jage.’

³³ Puma cita ca cane biname bine tityepemumene meebine lowejutame, siige baborage eso maane lipu tãdite. Page cine age temi Acejiyame me opo gaabe je, meebine naawagri-jenisi maane cibibine umle wawename Yageyame te ngena mene naajumi jajime.”

Peteru me Mene

³⁴ Siige, Peteru Koroneliyo naabibine mene jejemige egã, “Cane page umle bãbitine lipu toraca gyene egã Acejiyame te yepã pana ire nitwenininiige.

³⁵ Tabe singi iyeta gawecewe biname bime tããpume, lui cina teeme ngii yaawejanusi piiyepu miiji taatu mule bine jaawenemusi.

³⁶ Weene umle gemi Acejiyame lui mene Israela biname bime bau itu jityepuji egã poode pisi nyene Acejiyame cama Yeesu Keriso name pi. Tabe Yageyame gyene iyeta biname bime tããpume.

³⁷ Weene umle gemi ngena itu äbituji Galilaya je piiyepu iyeta poto Israela gawe cabu ta pui padare ingwe gaabe ca, Yoane liba mene jejemuji nũye ca äciseja poto cidi me.

³⁸ Weene umle gemi Yeesu Nasareta ceweyame poto cidi me, Acejiyame te lipu teeme cabu Aceji Seemo ne ecituji cuta kokre ne ecituji. Yeesu iyeta poto ta waatnetnãjuge, miijimiji mule jaawenemuge, piiyepu iyeta biname bine miiji me jaawenemuge lui cina Satani me kokre cabu yaacrajuge, ingle Acejiyame lui ten cama ge.

³⁹ Cine ire arbi biname gemi iyeta mule tããpume Yeesu lui bine itu jewenemuji Israela biname bime gawe cabu cuta piiyepu Yerusalema ngalebora je. Teepi teebine budre me jewenujisi baarge uli cabu äbyera ca.

⁴⁰ Yepã, nesae bimu ingwe gaabe ca Acejiyame teebine budre cabu ca erpinantuji, piiyepu cuta eboclomtuji,

⁴¹ lica iyeta biname bime bau me, yepã cime bau me. Cine ire arbi biname gemi, tabe lui bine itu nijinuji ai kaakesea tããpume. Yeesu me budre piiyepu arpinenta ingwe ca cine ten cama deedei erwãjujisi cuta piiyepu nũye enujisi.

⁴² Yeesu cibibine nijinuji biname bine Miiji Mene jajanename, piiyepu aitnejame egã tabe peese nyene Acejiyame lui ne atrana biname me jewenuji ireclota biname piiyepu budre biname bime tããpume.

⁴³ Iyeta sasa mename biname cina mene jeitnujisi teeme poto cidi me, jicemujisi egã iyeta biname lui cina teebine jããtrungusi, Acejiyame teeme niyaniya mule cabu ca kãlyã cire jaawenemepi Yeesu me kokre name pi.”

Aceji Seemo te Nuuja Gawe Biname bime Yepãyepã Trupa cabu Abacitanige

⁴⁴ Peteru liba mene iicema cabu je, Aceji Seemo te abacitanige iyeta lui cina teeme mene jitecijiisi.

⁴⁵ Israela ätrunga biname lui cina Peteru cama seclige Yoopa ca, teepi cälu te jitemige Acejiyame liba teeme ätityerayame Aceji Seemo ne cuta nuuja gawe biname bime cabu ecitanige.

⁴⁶ Teepi teebibine jitecijemisi maramara tagepogogo ca iicema je piyepu Acejiyame me kokre ne awepeyeräja je. Peteru piba jejemige egä,

⁴⁷ "Aceji Seemo te ai biname bime cabu babacitige tabe uja lipu tabacitanuji mime cabu me. Nää, miiji gyene nuuja biname te teebibine iibaname, teepi liba niye ca äciseja ne acatame Yeesu me ngii cabu?"

⁴⁸ Tabe puma cita ca Koroneliyo naabibine jejemige Yeesu Keriso me ngii cabu niye ca äciseja acatame. Teepi pui kaake poto ca Peteru ne jejisi poto bimu cama ten cama lenajame.

11

Peteru Mene ne Jeitnige Yerusalema Ätrunga Biname bime bau me

¹ Yuudea gawe cabu ta ätyepäneji biname piyepu iyeta ätrunga biname cina itecijemige egä nuuja gawe biname cina Acejiyame me Miiji Mene ne itu secatumesi.

² Peteru liba ädige Yerusalema me, puga ge poto ätrunga biname lui singi gemi nuuja gawe biname cina Acejiyame me cewecu ne acatame, teeme tääpe matikolä iirputa ca Israela biname pana äbitame. Teepi peei name pi Peteru ne jiyingäjisi egä,

³ "Maane lipulipu labacitepete nuuja gawe biname me mete cabu me, lui Israela biname lica gyene piyepu lui me tääpe ne lica ituge iirputa mime pana. Maane cuta piyepu deedei teta cama läbitepete? Maane peei lui mime cotre ne jaatropangtepete!"

⁴ Peei äingeja mene name pi Peteru teebibine jejananemige iyeta lui itu läbitepesi pui mule me agedna cabu ca. Tabe apu jiicige egä:

⁵ "Yoo, cane liba Yoopa cewe cabu irecu lätumutepene, cane piba yepä gwidape ne wama pana jääpänepene. Peei gwidape lui daamledamle cäbletääpe pana ge, teeme fooma mutre ca säinepesi gawe me, siige cäme mameta me liibepi.

⁶ Cane piba ngalebora me cängena ire jaatwananepene. Puga cibi gwidape bine piyepu cibi cäco gwidape, biicwale, glunubora ele bine jääpänepene.

⁷ Cane puma cita ca tagepogogo nätecijepi, cebine lui najepi egä, 'Peteru, arpinanti, eglecemi, erngäjemi!'

⁸ Yepä, cane jaajepene, 'Ewe, Yageyame, cane umle cäco gäne nuuja cude cibi piyepu cibi cäco gwidape cäme tage cabu acita.'

⁹ Pui tagepogogo mene cabucewe ca piba neeneni me najepi, 'Gone yaainute cibi cäco gwidape ca Acejiyame lui ne cibi me jaawenuge.'

¹⁰ Nesae gääbu pepu läbitepi, siige piba pui gwidape bine iyeta yaawecnemepi cabu me.

¹¹ Puirage padare nesae biname lui bine cäme bau täätypämepi Kesarea cewe cabu ca, teepi mete me tataräpesi, cane lui mete cabu nanajepi.

¹² Aceji Seemo te cebine najepi pui biname cama wata otnime. Siige, ai siks ätrunga biname cina Yoopa ca cane cama yaaclepi Kesarea me. Puga cine iyeta Koroneliyo me mete me yääbäcnepesi.

¹³ Koroneliyo piba cibibine nijipi tabe lipu mename seemo ne jääpänepi, teeme mete cabu lui aclajuteji, jaajepi teebine egä, 'Maane biname bine jityepemepi Yoopa me yepä biname ne arwojutame, teeme ngii Simona-Peteru.

¹⁴ Tabe meebine mene pa naajepi maane piyepu mäame inglewale lipulipu niya mule cabu ca äsecerame.'

¹⁵ Siige, cane liba gije labacitepene mene me, Aceji Seemo te piba teeme yepäyepä trupa cabu me labacitanepi, ai ätrunga mule agedna cabu je mime trupa cabu lipu abacitanuji.

¹⁶ Cane piba mime Yageyame me mene ngene jaapecnepene tabe lipu tiicuji egä, 'Yoane lipu niye yaacituge biname bime papa cabu niye ca äciseja tääpume, Acejiyame te pepu Aceji Seemo weeme trupa cabu pa yaacitanepi.'

¹⁷ Cäme tääpume pajecu gyene egä Acejiyame pui nuuja gawe biname bime trupa cabu yepä pana Ätityerayame ne yaacitanepi tabe lui ne mime cabu itu ecitanuji, mine liba Yageyame Yeesu Keriso ne niinäce jitrunguji. Nää, cäme kokre pisi nyene Acejiyame ne iibaname teeme Ätityerayame ne ceerame? Ewe, äblicäcol!"

¹⁸ Siige, ätrunga biname cina Peteru me mene liba jitecijiisi, teepi pui äingeja mule ne piba ebmalisi, Acejiyame me ngii ewepäntisi, jiicisi egä, "Acejiyame padare cuta yääcäremepi nuuja gawe biname bine atatrongärame teeme niyaniya mule cabu ca toraca ireclota ne päpäname lui ngälu cäco gyene."

Mene Antiyoka Ätrunga Ingle Biname bime poto cidi me

¹⁹ Ätrunga biname cina Yerusalema cabu ca uucratnuji maramara gawe cabu me, teeme mäpu ireclota name pi Setepano me budre ingwe ca. Poto cina cudecewe me eclige Poenikiya, Kupro, piyepu Antiyoka me. Teepi Israela biname taatu bine Miiji Mene jejananemisi.

²⁰ Yepä, poto ätrunga biname cina Kupro curä piyepu Kurene gawe cabu ca cuta Antiyoka cewe me eclige. Teepi puga mene jejananemisi biname bine lui Israela biname lica gemi, teebibine umle jewanemisi Miiji Mene mime Yageyame Yeesu poto cidi me.

²¹ Mime Yageyame me kokre ten cama ge, peei name pi bucurage biname cina mime Yageyame bau me tatatrongärinini, teebine jitrungisi.

²² Idre ecanisi peei mule poto cidi me Yerusalema ätrunga biname bime bau me. Teepi puma cita ca Banaba ne Antiyoka cewe me jityepisi.

²³ Siige, Banaba liba atyaramtige Antiyoka me, jepänige Acejiyame te biname bine lipu miiji itu jaawenemepi. Tabe Banaba te piba gege äbitige, teebibine iyeta bäärmii jegednemiige mime Yageyame ne toraca ätrungame, teeme gome cängena lenajame.

²⁴ Yoo, Banaba miijirage biname ge, teeme ätrunga baborage, piyepu Aceji Seemo me kaakesea te teeme cabu babo äbitige. Siige, bucurage biname cina Yageyame ne jitrungisi teeme mene name pi.

²⁵ Banaba puma cita ca Taasu cewe me ädige Saulo ne ärngime,

²⁶ liba jepänige teebine, ecanige Antiyoka cewe me. Yepä kämäge ngalebora teepi puga ätrunga biname cama abasutini, bucurage biname bine ebiberäjemäsi. Antiyoka je teepi Keriso me binamewale bine ciitacorage einemisi egä 'Kristiyan'.

²⁷ Pui padare poto Acejiyame me mename biname cina Yerusalema ca eclige Antiyoka me.

²⁸ Teeme yepä te ngii Agabu abujängtige, Aceji Seemo me kokre ca mene jiiicge egä, "Gane padare mameta gyene otni iyeta gawe cabu ta." Yoo, pui gane padare te täduji Klaudiyus liba enajuji Rooma Mopeyame tääpume.

²⁹ Ätrunga biname cina mene jitransi rarekaake ätyepame teeme biname bine Yuudea gawe cabu ätityerame. Laatibi rarekaake cama, teepi yootonisi. Bucurage rarekaake cama biname cina, teepi bucurage icranemisi; rarekaake cäco biname lui, teepi nesae icranemisi.

³⁰ Siige, pui rarekaake jityepemisi Banaba piyepu Saulo cama Yuudea ätrunga ingle mutre biname bime bau me.

12

Heroda te Ätrunga Biname bine Mäpu cabu Icranemige

¹ Pui padare Mope Biname Heroda gije abacitige poto ätrunga biname bine mäpu cabu acranecame.

² Tabe cubu biname bine jejemige Yoane me naane Yakobu ne budre me aglime cubu turikä ca.

³ Heroda liba umle äbitige egä poto Israela biname cina singi ge pepu agleca mule tääpume, tabe piba cuta Peteru ne joomlige. Pui te äbitige Israela biname bime trii padare ngalebora, teepi liba uutneca cäco buluduu bine yäärwäjusi.

⁴ Yoo, Peteru ne liba joomlisi, teepi piba teebine krokeciye mete cabu me isinglantisi, awamuta biname bime ime cabu ecitisi. Yoo, puga ge fooa sigu awamuta biname; yepä sigu lui fooa biname cama, cuta iyeta nuuja sigu piyepu. Siige, Heroda ngene jotwanige Peteru ne atraname biname sobe cabu Israela biname bime Äsuplengta trii ingwe poto ca.

⁵ Siige, Peteru krokeciye mete cabu enajige, yepä ätrunga biname cina Acejiyame ne jäje yaawejanusii teeme poto cidi me.

Peteru Krokeciye Mete cabu ca Tasatige

⁶ Lui bimu cabu Heroda singi ge Peteru ne acaname krokeciye mete cabu ca biname sobe cabu atraname, pui bimu me niinäce gaabe ciye cabu, Peteru ute ogrige neenenii awamuta biname bime cole je. Tabe ätäyäneji ge neenenii ayana seea ca, piyepu cuta poto awamuta biname puga ge krokeciye mete grana gome.

⁷ Piba taatu Yageyame me mename seemo puga aclajuteji ge Peteru mameta gome, piyepu apaclyera te tuungepmalige puupu cabu me tabe luma enajige. Pui mename seemo te Peteru ne palace gome joomlige, elotnicige arpinentame, jejige egä, "Wata arpinanti!" Puirage padare ayana seea cina aatramige Peteru me ime cabu ca.

⁸ Mename seemo piba jejige, "Määme baagi ca amlemalti, ernge gwidape aasigräri!" Peteru pui jaawenige, siige mename seemo piba jejige, "Määme acwabeja cäbletääpe ca ätrugäri, cane cama tädi!"

⁹ Peteru teebine ingwe icwige krokeciye mete cabu ca, yepä tabe umle lica ge egä mename seemo te ngena jewenenige, nää toraca gyene coo lipu. Tabe apu jengenige egä, "Cane pama wama ogrenine."

¹⁰ Teepe niinäce sigu awamuta biname bine sisuplengemäsi, puma cita ca nuuja sigu ne sisuplengemäsi, siige ceräcerägäabu tatyaramtäsi ayana grana gome me cewerage abacitame. Pui gaabe te teemämu äpäcutige, siige teepe asatäsi, mete me otni gaabe cabu aalige, piba taatu mename seemo te Peteru ne ebmalige.

¹¹ Peema cita ca Peteru toraca umle äbitige ngena te bäbitige teeme tääpume. Tabe jüicige egä, "Ai lui toraca ge! Yageyame te teeme mename seemo ne tityepige, cebine Heroda me ime cabu ca nasatige piyepu iyeta niya gwidape cabu ca Israela biname cina lui singi gemi cäme bau wawenane."

¹² Peteru pui ingwe ca ädige Yoane-Mareko me mage Mariya teeme mete me. Bucurage biname puga tabascretnumi, irecu ätumutanisi.

¹³ Teepe puutucu gaabe ne seyäjige, piba mete kaakesea ngulebägrä ngii Rooda toclige ireme.

¹⁴ Tabe liba Peteru me tagepogogo opo ewatnige, tabe gege name pi uuwamige, puutucu gaabe ne lica jüitnige, yepä mete me cääri abacitige, jejemige egä, "Peteru pisi nyene puutucu je."

¹⁵ Teepe jojisi egä, "Buduma gäte maane!" Yepä, Rooda jejemige, "Ai lui toraca mene gyene!" Puma cita ca teepe jowecnistisi, "Peei lui pama teeme mename seemo gyene!"

¹⁶ Iyeta pui padare Peteru gaabe ne seyäjjanige. Siige, teepe liba gaabe ne jüitnisi, cälu te jitemige Peteru ne päpäname.

¹⁷ Peteru teebibine ime ca bojä jewenemige, jejemige Yageyame te lipu teebine sisatige krokeciye mete cabu ca. Peteru piba jejemige egä, "Yakobu^{*} naabibine jejemepewe ai mule poto cidi me." Siige, tabe teebibine ebmalemige, nuuja gome me ädige.

¹⁸ Krokerage liba, awamuta biname cina mage teemeteme äcnecininisi egä, "Peteru liiyeme bädige?"

¹⁹ Piba Heroda teebibine jejemige Peteru ne ärngime, yepä teepe lica jepänisi. Puma cita ca Heroda awamuta biname bine itemlemige, siige teeme cubu biname bine jejemige pui awamuta biname budre me acraname.

Pui ingwe gaabe ca, Heroda Yuudea gawe cabu ca ädige Kesarea gawe cabu me puma matikolä lenajame.

Heroda me Budre poto cidi me

²⁰ Heroda mage claabe ge Turo piyepu Sidona cewe biname cama, peei name pi teepe gigri otninisi Heroda cama mene me. Teepe Heroda me mete ire atwiyame ngii Blasto bau me niinäce seclige, teebine teeme biname me jewenisi. Siige, piba Heroda bau me eclige, teebine itemlisi poodo ten cama äbitame, inge naace popi teepe teeme deedei gwidape yaawadanemusi Heroda me gawecewe cabu ca.

²¹ Puma cita ca Heroda bimu ne ecitige, siige teeme mararage cäbletääpe ne pui bimu cabu asigräriige, adnatige teeme atrana puupu cabu, puma cita ca biname bine mene jejananemige.

²² Biname cina ala cama jüicemisi egä, "Biname pana mene lica gyene peei, yepä uuje gyene!"

²³ Piba taatu Yageyame te mename seemo ne tityepige. Tabe Heroda ne budre pita ecäriige, inge naace popi Heroda singi lica ge Acejiyame ne opo gaabe me acitame, yepä biname bime awepyeräja bine tabe ewademige teeme tääpume. Cuple cina teeme tääpe erwisi, budre me itwitisä.

²⁴ Yoo siige, iyeta padare bucurage biname cina Acejiyame me Miiji Mene yäätcejemuge, Yeesu ne piba jäätrungusi.

²⁵ Banaba naabi Saulo rarekaake waadena ne liba epiräsi, teepe Yeruselema ca tacnenutäsi, mamye biname ngii Yoane-Mareko ne ten cama secanäsi.

13

Antiyoka Ätrunga Biname cina Banaba Saulo naabibine Kaakesea tääpume Jäätyepisi

¹ Puga ge Antiyoka ätrunga biname cama poto Acejiyame me tagepogogo mene iicana biname piyepu abiberäja biname: Banaba; Simeona, lui yaainusi cäsäcäsä tääpe biname ca; Lukiyus, lui Kurene ceweyame ge; Manena, lui Mopeyame Heroda me keege ge teepe liba bägrä je; cuta piyepu Saulo.

* **12:17:** Yakobu: Pui Yakobu lui Yeesu me igane gyene. Ire Matayo 13:55.

² Teepi liba Yageyame ne ewepyeräjisi piyepu deedei cäco icrajige Acejiyame ne ngene apenname, Aceji Seemo piba teebibine jejemige egä, “Weene Banaba Saulo naabibine căme gome tääyeblyngteye kaakesea wawenname cane lui tääpume teebibine ituge jaji.”

³ Peei ingwe ca teepi iyeta deedei cäco cuta cääri icrajige, irecu ätutumatininisi, piba ime icranemisi Banaba Saulo naabibime papa cabu, piba jäätjepisi teebibine.

Kupro Curä je

⁴ Aceji Seemo te Banaba Saulo naabibine jäätjepige. Teepi asatäsi Selukiya malu cewe me, puma cita ca poo gaabe aalige Kupro curä me.

⁵ Teepi liba pui curä cabu Salami cewe me atyaramtäsi, teepi puga Acejiyame me mene Israela biname bime abasecretna mete cabu jejananemäsi. Puga ge ten cama Yoane-Mareko teeme kaakesea cabu ätityerame.

⁶ Teepi curä ne piba jeclänutäsi nuuja poto malu me, Paapos cewe me atyaramtäsi. Teepi puga opopa jwenäsi yepä piiseba biname lui me ngii Bar-Yeesu. Tabe Israela biname ge lui te walya jiuuce egä, “Cane Acejiyame me mename biname gäne.”

⁷ Bar-Yeesu lui curä Mopeyame Sargiyu-Paulu me biname ge. Mopeyame Sargiyu-Paulu lui mage ngene atwanena biname ge. Tabe Banaba Saulo naabibine taasoglicige teeme opo gaabe otni-me, ingle naace popi tabe singi Acejiyame me mene ätecijame.

⁸ Yepä, pui piiseba biname, teeme nuuja ngii Griik mene ca lui Eluma, tabe singi Saulo Banaba naabibime mene iibaname, cuta singi Mopeyame Sargiyu-Paulu me gaabe armime Yeesu bau ätrungame.

⁹ Saulo lui teeme nuuja ngii Paulo, Aceji Seemo me kokre te babo äbitige teeme cabu. Paulo piba pui piiseba biname conocäco ire jetwige,

¹⁰ jejige egä, “Maane Satani me bägrä gäte! Maane cubuyame gäte iyeta conocäco mule tääpume. Määme angletneja mule bucurage gemi. Maane singi gäte cime Yageyame me toraca mene aboclomtame walya mene me!”

¹¹ Yageyame te teeme ime yaacitege mäame cabu me, siige mäame irecu cina määsumäsu page läbitäsi. Teeme singi padare ngalebora maane bimu apaclyera ne lica pa jepänanepi!”

Siige, piba taatu krokeciye pana klokakloka te teeme irecu aacwabige. Tabe otnetnäjige biname ne ärngime teebine ime ca aweclujame.

¹² Mopeyame Sargiyu-Paulu liba peei ne jepänige, Paulo me mene jitrungige. Tabe ngenecu jelonigice mime Yageyame poto cidi me abiberäja name pi.

Antiyoka Cewe Pisidiya Gawe cabu je

¹³ Paulo piyepu ten cama lui biname, teepi Paapos cewe ca poo gaabe eclige cewe ngii Perga me, lui Pampuliya gawe cabu. Puga teeme ätityerayame Yoane-Mareko teebibine taabmalige, Yerusalema me acnenutige.

¹⁴ Teepi Perga cewe ca doro gaabe aalige, Antiyoka cewe me atyaramtäsi, lui Pisidiya gawe cabu. Sabade bimu cabu teepi abasecretna mete me abacitäsi, adnatäsi.

¹⁵ Puga biname cina poto cotre mene ecnemisi Oogäräneji Mene cabu ca, Moose lui mene sogäremuji, cuta piyepu poto Oogäräneji Mene mename biname cina lui sogäremujisi. Peei liba siige, abasecretna mete modamoda biname cina piba mene jityepisi Paulo Banaba naabibime bau me egä, “Cime biname, cine singi weene biname bine bäärmii aagedname, weeme mene liba pisi nyene cibibine kokre ceerame.”

¹⁶ Puma cita ca Paulo jeclajutige, ime ewejängtge, piba gije abacitige mene jajanename. Ageda teeme mene:

Paulo me Mene Israela biname bime tääpume

“Ama lui Israela biname piyepu iyeta nuuja gawecewe biname lui cina Acejiyame bau me irecu lätumutaninisi, weene căme mene nätecijeyel

¹⁷ Acejiyame lui ne Israela biname cina yaawejanusii, mime sasa kaakesaare bine jejäcremuji, teebibine piba ablime jwenemuji pui padare cabu teepi liba säärpe biname icrajuji Aikupito gawe cabu je. Acejiyame teeme babo kokre ca teebibine Aikupito cabu ca sewademuji.

¹⁸ Footi kāmäge ngalebora Israela biname ätecija cäco icrajuji, yepä tabe teebibine cängena ire jetwemuji pui daapo taatu cewe cabu je.

¹⁹ Tabe seben maramara biname tomi bine Kanana gawe cabu ca iyecräjemuji, piba teeme Israela biname bine yageyame me jwenemuji Kanana gawe tääpume.

²⁰ Tabe pama fooa hanred fifti kāmäge ngalebora peei bine epiremuji.

Pui padare ingwe ca tabe ablaweja biname ecäranemuji Israela biname bine teeme ire atwime, ngälu mename biname Samwela me padare te tatyaramtuji.

²¹ Siige, teepi liba Acejiyame ne mope biname tääpume itinäruijisi, tabe piba Saulo teeme mopeyame tääpume ecäremuji. Saulo lui Kiisa me bägrä ge Benjaminina me ingle cabu ca. Tabe Israela biname bime mopeyame enajuji footi kämäge cama,

²² siige Acejiyame teebine iyebtingtuji, piba Daawida ne mopeyame me jewenuji. Age Acejiyame me mene Daawida potu cidi me: 'Cane asicnantine Yese me bägrä Daawida lui căme singirage biname gyene, lui te iyeta căme singi jaawenemuge.'

²³ Yepä Daawida me kaakesaare Yeesu peese nyene, Acejiyame lui ne jewenuji Israela biname bine niija mule cabu ca äsecrera, tabe lipu itu jiuuji.

²⁴ Yeesu liba camuge gije abacita teeme kaakesea, piba Yoane niije ca äciseja biname te iyeta Israela biname bine bäärmi mene jegednemuji teeme niianiya mule cabu ca atatrongärame piyepu niije ca äciseja ne acatame.

²⁵ Yoane teeme kaakesea ne apirame liba äbitige, tabe biname bine jejemuji egä, 'Weene lipu ngene jotwaniniye egä cane laasi näne? Weene lui ne jewagrieniye, cane tabe lica gäne. Yepä, weene ire! Tabe tädenige căme ingwe potu ca. Cane miiji lica gäne teeme ernge gwidape iirecame teeme ernge cabu ca.' Siige.

²⁶ Yoo, căme binamewale, weene lui Abrahamo me kaakesaare gemi, piyepu weene lui cina Acejiyame ne yaawejanuye, yepä Abrahamo me kaakesaare lica gemi, mime tääpume Acejiyame te mene tityepuji egä äsecrera pisi nyene niianiya mule cabu ca.

²⁷ Peei mene lui mime tääpume, ingle naace gyene Israela biname lui cina Yerusalema ngalebora icrajenige piyepu teeme mutre biname, teepi umle lica ge egä Yeesu peese nyene pui biname teebibine niija cabu ca äsecrera. Cuta piyepu teepi cängena umle lica ge mename biname bime mene, teepi lui Oogäräneji Mene cabu yaacnemusi iyeta Sabade bimubabu. Yepä, teepi pui mename biname bime mene toraca me jewenemuji, teepi liba Yeesu ne jigyuji.

²⁸ Ngänu gyene teepi äblicäco toraca ingle ne päpäna Yeesu me agli tääpume, yepä teepi Pilato ne itemlujisi teebine budre me acitame.

²⁹ Teepi liba iyeta mene ibibi jewenemuji, lui piti nemi sasa Oogäräneji Mene cabu Yeesu potu cidi me, piba teebine baarge uli cabu ca itrungantuji, gape me ecitujisi.

³⁰ Yepä, Acejiyame teebine budre cabu ca erpinantuji,

³¹ siige bucurage bimubabu tabe taboclomtanuji teeme bau me, lui cina Galilaya ca itu ecluji ten cama Yerusalema me. Pui cina page ire arbi biname gemi teebine aitname mime Israela biname bine umle wawename.

³²⁻³³ Cine age temi page, ai mene cuta weeme bau acaname egä Acejiyame lui mene mime kaakesaare bine jejemuji tabe pagege wawena, tabe mime padare cabu itu jewenuji mime tääpume, lui teeme kaakesaare gemi, tabe liba Yeesu ne jäätungusi, teepi iyeta äseji potu cidi me mene pisi nyene Salamo uupera peba poce neeneneni cabu egä,

'Maane căme bägrä gäte;

cane page mäame Babe me häbitine.'

³⁴ Cuta agesa nuuja mene Acejiyame lui jiuuji Yeesu me budre cabu ca arpinenta piyepu teeme tääpe ocwäwa căco potu cidi me egä,

'Cane weebibine toraca cängena miiji cire jiwenipene, cane lipu mene Daawida ne jejujine.'

³⁵ Daawida peei mene jeitnuji egä,

'Maane căme trupa ne licarage cirege abmala gape cabu ocwäwame, cane lui mäame miijirage kaakesea biname gäne.'

³⁶ Daawida lui padare cabu ireclota enajuji, tabe Acejiyame me singi jewenemuji, piba budre äbituji. Teepi gape me teebine ecitujisi teeme kaakesaare gome, siige teeme tääpe gape cabu ocwäwuji.

³⁷ Yepä, pepu lica äbituji teeme tääpume Acejiyame lui ne budre cabu ca erpinantuji. Peei lui Yeesu sine.

³⁸⁻³⁹ Yoo, căme binamewale, weene iyeta miiji toraca umle egä peei lui Yeesu me cabu ca gyene cane weebibine jijenininine ai Miiji Mene niianiya mule cabu ca kälyä äbita potu cidi me. Weene miiji umle egä iyeta biname lui cina Yeesu ne jäätungusi, teepi iyeta äseji gemi teeme niianiya mule cabu ca, lui mule cabu ca Moose me cotre äblicäco weebibine äsecrera.

⁴⁰⁻⁴¹ Oogäräneji Mene te apu jiiicenige egä,

'Tre, weene laatibi Acejiyame ne jääguyue!

Cäro, weene călu te pa jiti, piba budre päbitipeye, ingle naace popi page cane ngena jewenenine, weene lica jitrungeniye,

ngänu gyene cuta nuuja te liba weebibine ibiberäjininuge!'

Yoo, weene cängena inajininige, piba peei mename biname bime sasa mene weeme bau lica pa läbitepi!"

⁴² Siige mene, Paulo naabi Banaba liba abasecretna mete ne sebmäläsi, biname cina teebibine jaajisi acnenutame nuuja Sabade cabu teebibine cuta cerämu abiberäjame peei mene poto cidi me.

⁴³ Ingwe ca biname cina abasecretna mete ne liba sebmälisi, poto Israela biname piyepu poto nuuja gawe biname lui cina Israela biname bime irecu ätumuta mule itu yaacatepesi, teepi Paulo Banaba naabibine ingwe äacwisi. Peei neeneni ätyepänejä biname piba teebibine mene jejemäsi piyepu bäärmi jegednemäsi teepi Acejiyame me baborage miiji cabu cängena lenajame.

Paulo piyepu Banaba bime Mene Acejiyame Umle cäco biname bime tääpume

⁴⁴ Nuuja Sabade bimu cabu, pama iyeta biname pui cewe cabu tabasecretnige mime Yageyame poto cidi me mene ätecijame.

⁴⁵ Yepä, poto Israela biname cina biname tomi ne liba jepänisi, teepi ire patre eglemisi egä, "Cime biname bine bewadimige," piba Paulo me mene jeclanisi, teebine jicnecisi.

⁴⁶ Yepä, Paulo naabi Banaba wälu cäco jejemäsi egä, "Miiji ge cine Acejiyame me mene niinäce weeme bau iicana, yepä ingle weene jigyeniyee peei mene ne, apu egä weene ibibi lica gemi iyeteta ireclota tääpume, peei name pi cine weebibine ibmalininago, nuuja gawe biname bime bau me niclenige.

⁴⁷ Cine apu jewenenago, ingle Yageyame cibibine ituge jaji egä, 'Cane weebibine apaclyera pana icitenine nuuja gawe biname bime tääpume, toraca ireclota gaabe iyeta gawecewe biname bine awabame.' "

⁴⁸ Siige, nuuja gawe biname liba peei mene jitecijiisi, teepi gege ge, Yageyame me mene ewepyeräjisi. Laati bine Acejiyame ituge jäjäcra toraca ireclota lui ngälu cäco päpäname, teepi Yeesu ne jitrungisi.

⁴⁹ Bucurage biname lui cina Antiyoka cewe mameta icrajige, mime Yageyame me mene itecijemige.

⁵⁰ Yepä, poto Israela biname cina cewe modamoda biname bine ngenecu alongecame jewenemisi, cuta piyepu poto dogwe magebi bine ngenecu alongecame jewenemisi, lui cina Acejiyame ne yaawejanusu. Pui Israela biname piba gije abacitinisi Paulo Banaba naabibine mäpu cabu acitame, siige teeme gawe cabu ca ääyecräjisi.

⁵¹ Pui neeneni ätyepänejä biname cina teeme ernge cabu ca secre äglubejäsi. Teepi singi pepu mule ca awabame egä biname bime ätrunga cäco mule name pi teepi cewe ne sebmäläsi. Teepi puma cita ca Ikoniya cewe me aalige.

⁵² Siige, Paulo me mene name pi Antiyoka ätrunga biname cina mage gege cama icrajige, piyepu Aceji Seemo me kokre ten cama ge.

14

Ikoniya Cewe je

¹ Peei yepä mule te äbitige Ikoniya cewe je. Paulo naabi Banaba aalige Israela biname bime abasecretna mete cabu me, puga mene jejananemäsi kokre cama. Siige, bucurage Israela biname piyepu nuuja gawe biname piba Yeesu ne jitrungisi.

² Yepä, poto Israela biname lui cina singi lica ge Yeesu ne ätrungame, teepi poto nuuja gawe biname bine ngenecu alongecame jewenemisi, nüiya mene ca teeme ngene atwanena jetatrongtemisi ätrunga biname bime bau ca.

³ Yoo, Paulo naabi Banaba puga aanajige lecaleca padare cama. Teepi mene wälu cäco jejananemäsi Yageyame poto cidi me. Tabe te kokre äcärige teebibine ciitaca mule bine wawename. Tabe pepu jewenige awabame egä teeme mene lui toraca ge, egä Acejiyame owecu gyene biname bime tääpume cuta singi teebibine ätityerame.

⁴ Ikoniya cewe biname cina äpliniisi: poto cina singi Israela modamoda biname bime tääpume; poto cina singi pui neeneni ätyepänejä biname bime tääpume.

⁵ Puma cita ca poto Israela biname piyepu poto nuuja gawe biname teeme modamoda biname cama mene jitraniisi ätyepänejä biname bine nüiya wawename piyepu kula ca budre me äbyecrame.

⁶ Paulo naabi Banaba peei poto cidi me liba umle äbitäsi, teepi uucräsi Lukaniya gawe cabu me, luga ge neeneni cewe ngii Lustra piyepu Derbe cuta piyepu poto matimati cewe.

⁷ Teepi puga Miiji Mene biname bine jejananemäsi.

Lustra Cewe piyepu Derbe Cewe je

⁸ Puga ge Lustra cewe je yepä biname lui teeme ernge niyiyanija ge. Tabe pepu aplimläneji ge, äblicäco otnetneja.

⁹ Tabe adnatäneji ge, Paulo me mene jitecijiige. Paulo teebine opo ewatnige egä tabe teeme mene jitrungenige, siige peei ätrunga name pi tabe miiji ge miiji me äbita. Paulo piba teebine conocäco ire jetwige,

¹⁰ babo tage ca jejige, “Abujängti, mäame ernge ca conocäco naaclajutege!” Peei rooriye te wata abujängtigi, siige otnetnäjige.

¹¹ Biname cina jepänisi Paulo lui ne jewenige, teepi piba ala abayisi teeme Lukaniya gawe mene ca egä, “Cabucewe uuje cina ai gawecewe biname pana me bateplengtäsi, täinäsi mime bau me!”

¹² Teepi Banaba ne ngii ecärisi Jeeu piiyepu Paulo ne ngii ecärisi Hermes, inge Paulo te mene jiiçige. Teepi apu jewenisi, inge teepi jengemige egä cabu je piti nemi neeneni uuje Jeeu piiyepu Hermes.

¹³ Yoo, Jeeu me iiwäreja mete puga ge cewe wajwa je. Siige, Jeeu täapume iiwäreja biname te rooriye kau bine piiyepu tabi lui popo sewadige cewe grana gome me. Piba pui iiwäreja biname piiyepu biname tomi cina singi kau aglime ätyepäneji biname bine iiwärejame, inge teepi apu jengemige egä Paulo piiyepu Banaba lui Jeeu piiyepu Hermes naabi tegi.

¹⁴ Banaba naabi Paulo biname bime mene liba äatecçijige, teepi ngenecu mäpu name pi teeme cäbletäape iderecmäsi piiyepu uuwamäsi biname tomi cabu me, siige baborage tage ca mene jejemisi egä,

¹⁵ “Biname, weene ngena jeweniyeye? Cine ai gawe biname gegi, weene liiyepu! Cine age tegi Miiji Mene aitname, weebibine ai walya gwidape cabu ca atatrongärame Acejiyame bau me opire wawename, tabe lui toraca ireclota gyene. Peese nyene Acejiyame lui te cabucewe, gawecewe, piiyepu malu bine jewenemuji iyeta teeme gwidape cama.

¹⁶ Sasa cabu ca tabe biname bine ire ta jaacitanemuge teepi biname cina teeme singi gaabe cabu otnetnejame.

¹⁷ Yepä, iyeta padare tabe teemämu conocäco taboclomtuge teeme miiji ätiyera mule cabu. Tabe ngupe ne weeme bau me täätyepuge dume cabu ca, piiyepu gije bine jaawenemuge kuu wawenecame teeme maramara äyi padare cabu kämäge naglebora. Tabe pepu weebibine deedei icäraninuge weeme ngenecu ne gege wawename.”

¹⁸ Paulo ai mene ca jibemige biname bine lui cina singi teebibine kau ca iiwärejame, yepä plowa lica ge teebibine iibaname peei mule cabu ca.

¹⁹ Piba seclige poto Israela biname cina Pisidiya gawe Aniyoka cewe cabu ca piiyepu Ikoniya cewe cabu ca. Teepi biname bine giri jecitanemisi teeme singi wawename. Teepi Paulo ne kula ca jibyecrisi, piba teebine elädniisi pui babo cewe Lustra cabu ca. Teepi apu jengemige tabe budre ge.

²⁰ Yepä, ätrunga biname cina liba seclige, Paulo ne jewaclomtisi, tabe piba arpinantige, acne-nutige pui cewe me. Siige, nuuja bimu Paulo naabi Banaba aaclige Derbe cewe me.

Paulo naabi Banaba Suriya Gawe Antiyoka Cewe me Acnenutäsi

²¹ Paulo naabi Banaba Derbe cewe biname bine Miiji Mene jejananemäsi. Puga bucurage biname teeme mene jitrungisi. Teepi piba acnenutäsi Lustra cewe me, puma cita ca Ikoniya cewe me, puma cita ca matikolä Antiyoka cewe me Pisidiya gawe cabu.

²² Iyeta peei cewe cabu teepi ätrunga biname bine ngenecu kokre ecäremäsi piyepu teebibine bäärmi jegednemäsi conocäco Yeesu bau ätrungame. Teepi biname bine ebiberäjemäsi egä, “Ai ireclota cabu mine iyeta bucurage mäpu cabu ca täsinago, ingwe ca piba Acejiyame me biname bine waadena cabu me cire yäähäcnepesi.”

²³ Ätrunga inge yepäyepä cabu Paulo naabi Banaba biname bine jejäremäsi mope biname me äbitame ätrunga biname bine waadename. Iyeta cewe cabu teepi irecu ätmutanäsi piiyepu deedei cäco aanajige Acejiyame ne ngene apecname, piba pui cewe ätrunga biname bine mime Yageyame me ime cabu icranemäsi, teepi lui bau me teeme ngenecu ituge acita.

²⁴ Pisidiya gawe liba jeläcnutäsi, teepi cääri atyaramtäsi Pampuliya gawe cabu me.

²⁵ Teepi Miiji Mene Perga cewe cabu jejananemäsi, puma cita ca Ataliya cewe me aaclige.

²⁶ Teepi puma cita ca poo gaabe abyemeräsi Antiyoka babo cewe otnime, luma ätrunga biname cina teebibine Acejiyame me miiji ire atwi cabu ituge acita peei kaakesea täapume, page lui ne bii jimlitäsi.

²⁷ Teepi liba Antiyoka babo cewe me atyaramtäsi, ätrunga biname bine tebasecretnemäsi, jejanemäsi iyeta Acejiyame te ten cabu ca lui itu jaawenemepi, piiyepu tabe gaabe ne lipu itu jiiçnepi gawe maramara biname bime täapume Yeesu ne ätrungame.

²⁸ Siige, teepi leca padare cama Antiyoka ätrunga biname cama aanajige.

15

Babo Abasecretna Puga Ge Yerusalema je

¹ Poto biname Yuudea ca seclige Antiyoka me, puga gije abacitinisi ätrunga biname bine walya abiberäjame egä, “Weene äblicäco weeme niya mule cabu ca äsi weene liba lica acata Israela biname bime cotre Moose lui sogäremuji, egä imäbägrä bime tääpe matikolä iirpeclame Acejiyame me cewecu acitame.”

² Siige, Paulo naabi Banaba pui Yuudea ca biname bime mene jisädemäsi, ten cama mage äciseräjininisi tääpe iirputa mule pototo cidi me. Siige, teepi iyeta mene jitranisi Paulo Banaba naabibine piyepu pototo nuuja Antiyoka ätrunga biname bine Yerusalemame me ätyepame, puma ätyepäneji biname piyepu nuuja ätrunga mope biname cama mene atraname tääpe iirputa cotre pototo cidi me egä lui biname cina miiji acatame.

³ Siige, ätrunga biname piba teebibine jityepemisi Yerusalemame otnime. Teepi gaabe cabu eclige, Poenikiya piyepu Samariya gawe liba ääsuplangtisi, gaabegabe ätrunga biname bine jejemisi egä, "Gawe maramara biname cina Acejiyame bau me ituge atatrungära." Ai mene te babo ngenecu gege me jewenemige iyeta ätrunga biname bine.

⁴ Teepi liba atyarige Yerusalemame, ätyepäneji biname piyepu nuuja mope biname, piyepu iyeta ätrunga ingle biname cina teebibine jewacletnäjemisi. Teepi teebibine jeitnemisi iyeta Acejiyame te ten cabu ca ngena bine ituge wawena.

⁵ Yepä, pototo ätrunga biname lui Parisea sigu biname gemi, teepi jeclajutemige, jejemige egä, "Cuta nuuja gawe ätrunga biname miiji teeme tääpe matikolä iirpecla. Weene miiji teebibine jaji iyeta Moose me cotre mene wawename."

⁶ Ätyepäneji biname piyepu nuuja ätrunga mope biname cina piba abasecretnege mene atraname pui tääpe iirputa cotre pototo cidi me.

⁷ Lecarage padare teepi mene äciseräjininisi.

Peteru me Mene

Peei ingwe ca Peteru abujängtige, jejemige egä, "Cäme ätrunga binamewale, weene umle gemi egä ujarage Acejiyame te cebine weeme cabu ca nätränutuji Miiji Mene Yeesu pototo cidi me jajaname nuuja gawe biname bine teepi ätecijame piyepu ätrunga-me.

⁸ Acejiyame lui iyeta biname bime ngene atwanena umle gyene. Tabe Aceji Seemo ne jityepuji cuta nuuja gawe biname bime bau me, tabe teebine mime bau me lipu itu tityepuji. Tabe pepu jewabuji egä, cuta nuuja gawe biname miiji gemi teeme bau otnime.

⁹ Tabe nuuja mara lica jewenemuji cime tääpume piyepu teeme tääpume. Tabe cuta teeme ngenecu cabu ca niya mule iyebngemuji teeme ätrunga name pi.

¹⁰ Yoo siige, weene page ngenome singi gemi Acejiyame ne apicetnärame? Lui ätrunga biname Israela biname lica gemi, teeme palace cabu weene cotre bine icranemeye, lui bine mine piyepu mime kaakesaare äblicäco ge wawena.

¹¹ Pepu gone! Mine jäätungusi egä pui lui Yeesu Keriso me owecu piyepu miijirage ätityera miiji pi mine niyaniya mule cabu ca läsecrärinago, teepi liyepu, lica cotre wawena name pi."

¹² Siige, teepi iyeta bojäcu piba icrajige Banaba Paulo naabibime mene ätecijame, teepi liba mene jeitnemäsi iyeta ciitaca mule piyepu kokre mule gwidape pototo cidi me, Acejiyame lui bine ten cabu ca itu jewenemuji nuuja gawe biname bime tääpume.

Yakobu me Mene

¹³ Teeme mene liba siige, Yakobu piba abujängtige mene me egä, "Cäme ätrunga binamewale, cäme mene nätecijeye!

¹⁴ Simona-Peteru bii nininige, Acejiyame teeme owecu niinäce lipu jewabemuji pui biname bine lui Israela biname lica gemi, teeme pototo bine liba sewademuji teeme biname me äbitame.

¹⁵ Ai Simona-Peteru me mene ibibi gyene Acejiyame me sasa mename biname bime mene cama, ingle Oogäräneji Mene cabu pisi nyene egä,

¹⁶ Yageyame te Daawida me ingle ne mete ca etonärige, jüicige egä:

Ingwe ca cane liba cire tacnepene,

cane piba Daawida me atramäneji mete cire yaawejängtepene;

pototo pui sasa pargi cama cääri cire yaarangepene;

kokrerage me cire jaawenepene.

¹⁷ Piba iyeta nuuja biname cäme bau cire saaclepi, iyeta lui Israela biname lica gemi,

cane lui bine ituge äjäcra cäme biname me äbitame.

¹⁸ Apu jüicenige Yageyame te, lui ujarage biname bine umle jewenemuji ai pototo cidi me."

¹⁹ Siige, Yakobu piba jejemige ätrunga biname bine egä, "Cäme ngene atwanena apu egä mine miiji lica ngenecu mäpu ceera pui biname bine lui Israela biname lica gemi, lui cina Acejiyame bau tatatrungärininisi.

²⁰ Yepä, mine miiji mene oogära teeme bau teebibine jajime egä: Gone deedei yäärwäjimuye lui cude ge, ingle iiwäräneji ge uuje bine; piyepu gone cibi yäärngäjimuye lui teeme mäju cabu uudi yaanajuge; piyepu gone uudi yäänäjuyje; cuta piyepu sargi mule gone wawena.

²¹ Siige, teepi miiji ai cotre bine wawena, ingle naace popi bucurage kämäge ngalebora biname cina Moose me Cotre bine yaacnemusi iyeta Israela biname bime abasecretna

mete cabu iyeta Sabade bimu, cuta piyepu Moose me Cotre mene jajanäneji ge iyeta cewe cabu ta.”

Teepi Nuuja Gawe Ätrunga Biname bime bau Mene Jityepemisi

²² Siige, pui ätyepäneji biname piyepu nuuja ätrunga mope biname cina iyeta ätrunga inge biname cama mene jitransi poto biname bine äjäcrame teeme cabu ca, teebibine ätyepame Antiyoka cewe me Paulo naabi Banaba cama otnime. Teepi neeneni biname bine jaajisi: yepä lui Yuuda, lui ne yaainusi Barsaba ca, cuta nuuja lui Siila. Pui neeneni cina lui modamoda ätrunga biname gegi.

²³ Teepi apu leta ne yoogärisi, ten cama jityepisi egä:

“Ätrunga biname lui Israela biname lica gemi, lui cina icrajenige Antiyoka babo cewe cabu, piyepu Suriya, Kilikiya gawe cabu je, cine weebibine sebore jiweninago. Cine weeme biname gemi, ätyepäneji biname piyepu nuuja mope biname.

²⁴ Cine mene nitacijinige egä cime poto biname weeme bau me itu saaclepi, lui cina teeme kokre mene ca weebibine ngenecu mäpu itu icäripesi. Yepä, teepi cime bau ca lica mene jääpänepesi peei ne wawename.

²⁵ Yoo, cine pui name pi yepä gome tabasecrtinago. Cine yepä ngene atwanena cama mename biname bine jaajisi weeme bau ätyepame. Teepi Banaba naabi Paulo cama aaclenige, lui cime ngenecurage biname gegi,

²⁶ lui cina mäpu ireclota jepänanujäsi mime Yageyame Yeesu Keriso me kaakesea name pi.

²⁷ Yoo, cine Yuuda naabi Siila jäätyepenisii weeme bau me. Teepi weeme opo gaabe pa jiicepäsi cine lui mene ne yoogärenago.

²⁸ Cine Aceji Seemo cama mene jitransi nuuja mäpu cotre lica weebibine ceerame, yepä ai taatu cotre egä:

²⁹ Gone deedei yäärwäjimuye lui iiwäräneji ge uuje bine; gone uudi yäänäjuyje; gone cibi yäärngäjimuye lui teeme mäju cabu uudi yaanajuge; piyepu sargi mule gone jaawenuye. Siige, weene miiji pagege lenaja, weene liba ai cotre bine cängena jaawenemuye.

Mene peese. Äto.”

³⁰ Yerusalema ätrunga biname puma cita ca Yuuda Siila naabibine pui mene cama jäätyepisi Antiyoka me. Puga teepi iyeta ätrunga biname bine jebasecrtinemäsi, teebibine pui oogäräneji mene ecäremäsi.

³¹ Antiyoka ätrunga biname pui mene liba ecne-misi, teepi mage gege ge, inge naace popi peei mene te teeme ngene atwanena plowa me jewenemige.

³² Yuuda naabi Siila lui Acejiyame me tagepogogo mene iicema biname gegi, teepi leca padare cama ten cama mene jiičemäsi teebibine kokre piyepu miiji ngenecu ceerame.

³³ Teepi poto bimu ten cama liba aanajige, piba Antiyoka ätrunga biname cina teebibine aawecnistisi poode cama. Teepi teeme bau me acnenutäsi lui cina teebibine ituge ätyepa.

³⁴ Yepä, Siila ngene jotwanige puma lenajame Antiyoka cewe cabu je.

³⁵ Paulo naabi Banaba poto mabye cama aanajige Antiyoka je. Teepi piyepu poto nuuja ätrunga biname teta cama mene jejananemisi piyepu biname bine ebiberäjemisi Yageyame Yeesu poto cidi me.

Paulo naabi Banaba Maramara me Äbitäsi

³⁶ Poto mabye ingwe ca Paulo jejige Banaba ne egä, “Mine biiri, lacnenutago, mime ätrunga biname bine yäängräremaigo iyeta cewe cabu ta, mine luma mene tejanemumago mime Yageyame Yeesu poto cidi me. Mine miiji umle äbita teepi page lipu icrajenige.”

³⁷ Siige, Banaba singi Yoane, teeme nuuja ngii Mareko, ten cama otnime.

³⁸ Yepä, Paulo ngene jotwanige egä miiji lica gyene teebine acana, inge pui niinäce otni cabu Yoane-Mareko lica ten cama enajuji teeme kaakesea ngälu gaabe oomlaname, yepä tabe atatrongtuji, teebibine aabmaluji Pampuliya gawe cabu je.

³⁹ Paulo naabi Banaba mene äciseräjäsi, siige maramara me äbitäsi. Banaba Mareko cama poo gaabe Kupro curä me ädige.

⁴⁰ Paulo Siila ne jejige, siige ten cama abyemäriige. Antiyoka ätrunga biname teebibine mime Yageyame me ime cabu aacitisi teebibine ire atwime.

⁴¹ Paulo doro ta ädige, Suriya piyepu Kilikiya gawe cabu ta otnige, ätrunga inge bine kokre me jewenemige.

16

Timoti te Paulo naabi Siila cama Otnetnäjige

¹ Paulo puma cita ca ädige Derbe piba Lustra cewe me. Puga ge Lustra cewe cabu yepä ätrunga biname ngii Timoti. Teeme mage cuta ätrunga magebi gwene, piyepu Israela cabu ca gwene, yepä teeme babe lui Griik biname gyene.

² Iyeta ätrunga biname Lustra piyepu Ikoniya cewe cabu müiji taatu mene jüicusi Timoti poto cidi me.

³ Paulo singi ge Timoti ten cama otnime, tabe peei name pi Timoti me tääpe ne matikolä jüirputige Acejiyame me cewecu acitame. Tabe peei ne jewenige, inge iyeta Israela biname lui cina icrajinige pui cewe maramara cabu, teepi umle ge egä Timoti me babe lui Griik biname gyene.

⁴ Teepi liba otnänisi cewe gaabegabe ta, Paulo naabi Siila ätrunga biname bine ecäremäsi pui cotre lui poto cidi me ätjepäneji biname piyepu ätrunga mope biname cina Yerusalema je itu jaatranepesi. Teepi biname bine jejemäsi pui cotre bine ätrungame.

⁵ Yoo, ätrunga inge cina peei ätityera name pi ätrunga kokre äbitinisi, piyepu iyeta bimu cerämu poto biname sebäcnisi peei inge yepäyepä ngalebora me.

Trooasi Cewe je Paulo Wama Ogrige

⁶ Teepi Pirugiya piyepu Galatiya gawe cabu ta aaclige, inge naace popi Aceji Seemo teebibine lica jäätjepige Asiya Probins ngalebora Müiji Mene puma iicemame.

⁷ Teepi liba atyaramtäsi Musiya gawemutre, Bituniya Probins liga abacitäsi, Yeesu me Seemo te gaabe äbäclige teeme otni tääpume.

⁸ Peei name pi teepi gaabe ta aaclige Musiya gawe cabu, ngälu malu cewe Trooasi ne joomläsi.

⁹ Peei ciye cabu Paulo wama ogrige, lui wama cabu yepä Makedoniya gawe biname ne jepänige. Tabe jeclajutige, teebine itinärige egä, "Tädi Makedoniya gawe cabu me cibibine ätityerame!"

¹⁰ Paulo liba peei wama ogrige, cine* piba taatu amacetnäjinago poo gaabe otnime Makedoniya me, inge naace popi cine mene jitränisi egä Acejiyame pui wama cabu nininige Müiji Mene puma iicemame.

Pilipi Cewe je: Ludiya te Ätrungayame me Äbitige

¹¹ Cine Trooasi ne sebmalsi, poo gaabe conocäco naclige Samotrake curä cabu me, puma cita ca nuuja bimu naclige, ärpino malu ligi cewe Neapoli me.

¹² Cine puma cita ca doru ta naclige Pilipi cewe me. Yoo, Makedoniya Probins me pui cube cabu Pilipi cewe lui niinäce gaabe cewe gyene. Pilipi cudecewe gyene Rooma cabu ca, yepä Rooma biname cina itu jewenujisi peei cewe ne, piyepu cewe mopeyame cina lui Rooma ca taacluji. Siige, cine nesae bimu cama Pilipi cewe cabu ninajige.

¹³ Sabade bimu cine cewe cabu ca naclige baduge ligi me. Cine apu ningenininige egä Israela biname bime irecu ätumuta puupu pisi nyene puma. Cine puga adnatärinago, mene abaitninago magebi cama lui cina babasecretnige baduge ligi me irecu ätumutame.

¹⁴ Teeme yepä lui te cibibine niticijeninige Ludiya tage. Tabe Tiyatira cewe magebi gwene, lui aletname yaawademuge mage daremu cama ciriyäciryä ududi cäbletääpe bine. Ai magebi te Acejiyame ne yaawejanuge Israela biname bime mule ca. Yageyame te teebine ngene atwana tocärige Paulo me mene ätecijame piyepu ätrunga-me.

¹⁵ Tabe piyepu teeme mete biname cina niye ca äciseja liba ecatisi Yeesu me ngii cabu, tabe piba cibibine nisoglicninige egä, "Naclege cime mete cabu lenajame, weene liba ngene jotwa-naniniye egä cane lui Yageyame ne toraca jäätzungune." Siige, cine teeme singi ne becatisi, teeme mete me naclige.

Pilipi je Paulo naabi Siila Krokeciye Mete cabu Aanajige

¹⁶ Yepä bimu cine pui irecu ätumuta puupu me liba naclige, cine kaakesea tääpume aletnäneji ngulebägrä cama oppa oyisi, lui me cabu niya cable puga ge. Peei cable te teebine mene iicemame jwaawenuge ciige gwidape poto cidi me. Teeme yageyame cina bucurage rarekaake jääpänemusite teeme pui mule cabu ca.

¹⁷ Siige, pui ngulebägrä te Paulo cama cibibine ingwe nicwenige, ala abayige egä, "Age tema biname lui cina Caburage Acejiyame me kaakesea jaawenusi! Teepi mene jüicenemisi niyaniya mule cabu ca äsecrera poto cidi me!"

¹⁸ Tabe bucurage bimu pepu pote tewenäjumi, ngälu Paulo babo ngenecu mäpu äbitige teeme poto cidi me. Tabe atatrungtige, niya cable ne jejige egä, "Yeesu Keriso me ngii cabu cane meebine naajenine egä tasati ai ngulebägrä cabu ca!" Siige, niya cable te peeirage padare cabu asatige.

¹⁹ Ngulebägrä me yageyame cina liba umle äbitinisi egä teeme rarekaake päpäna gaabe lui sabe bäbitige, teepi Paulo Siila naabibine joomlisi, ääländisi neeneni cewe mope biname bime bau me cole puupu cabu me.

²⁰ Teepi liba teebibine aacanis pui neeneni cewe mope biname bime cabu me, jaajisi egä, "Ai biname lui Israela biname gegi. Teepi niya bii jewenäsi mime cewe cabu.

* 16:10: cine: Luuka puma Paulo cama abasutige.

²¹ Teepi biname bine mule ebiberäjemäsi lui cotre gemi mime tääpume. Mine lui Rooma biname gemi, mine teeme mule äblicäco acata piyepu wawena.”

²² Biname tomi cabu teebibine claabe cama joomlisi, piba cewe mope biname cina teeme cubu biname bine jejemisi Paulo Siila naabibime cäbletääpe äderecame, teebibine adnaname.

²³ Teepi Paulo Siila naabibine oräre jaadna-nisi, piba krokeciije mete awamuta biname ne jejisi teebibine cängena ireme.

²⁴ Awamuta biname peei mene liba itecijige, tabe teebibine aacanige mete cole puupu me, borabora uli cabu ernge äasinglantige, siige jätätäyige.

Paulo naabi Siila Krokeciije Mete Cabu ca Asatäsi

²⁵ Ciiye duusa mameta Paulo naabi Siila irecu ätumutäsi piyepu uopera etangäsi Acejiyame bau me. Nuuja krokeciije mete biname cina jätäecijisi teebibine.

²⁶ Piba taatu babo ocneja te krokeciije mete me kula caage bine jekocnäjemige. Puirage padare cabu iyeta grana cina iitnetnäjinisi, piyepu ayana seea cina gawe me itrametnemiye iyeta krokeciije mete biname cabu ca.

²⁷ Awamuta biname te ute cabu ca arpinantige. Tabe liba jepänemige mete grana bine iitnemäneji, tabe apu jengenige egä krokeciije mete biname iyeta buucratnige. Siige, tabe teeme cubu turikä ne isatige teemämu aglime, ingle naace popi peei krokeciije mete biname cina liba uucratna, piba teebine pa yaaglepesi.

²⁸ Yepä, Paulo babo tage ca jejige, “Gone laglute maane! Cine iyeta age tema!”

²⁹ Puma cita ca pui awamuta biname te ngale tääpume ala abayige, puupu cabu me wata abacitige, tääpe aloneca cama kokorare ääpednutige Paulo Siila naabibime ernge gome.

³⁰ Tabe piba teebibine taasatige, äätelmäige egä, “Babo biname, cane miiji ngena ne wawena căme niya mule cabu ca asatame?”

³¹ Teepi jewecnistäsi egä, “Jitrungi Yageyame Yeesu ne, piba niya cabu ca pa asatepi, maane piyepu mäáme mete biname cama.”

³² Teepi piba Yageyame poto cidid me mene jejanemäsi teebine piyepu iyeta biname bine lui teeme mete cabu puga ge.

³³ Pui padare ciiye cabu, krokeciije mete awamuta biname te Paulo Siila naabibine nuuja puupu cabu me aacanige teeme adnana dupe äcisejame. Siige, Paulo naabi Siila pui awamuta biname piyepu iyeta teeme mete biname bine niye ca jicisäjemäsi Yeesu me ngii cabu.

³⁴ Puma cita ca tabe Paulo Siila naabibine aacanige teeme mete cabu me, teebibine deedei ääcäriige loolome. Tabe teeme mete biname cama mage gege ge, ingle teepi pui ciiye cabu Acejiyame ne jitrunGISi. Siige, deedei kaake poto ca Paulo naabi Siila cääri abacitäsi krokeciije mete bora me.

³⁵ Nuuja krokerage pui neeneni cewe mope biname cina teeme cubu biname bine jityepemäsi krokeciije mete awamuta biname bau me mene cama egä, “Peei neeneni biname bine aasatepi!”

³⁶ Puma cita ca awamuta biname te Paulo ne jejige egä, “Cewe mope biname cina mene tityepäsi căme bau me maane Siila cama asatame. Weene miiji asateye, siige poode cama laaclege.”

³⁷ Yepä, Paulo pui cubu biname bine jejemige egä, “Birice cibibine nuuja niya cabu lica nipänumesi, yepä atrana căco cibibine sobe cabu mage nidnanumesi, ngänu gyene cine Rooma ngii cama biname gegi. Teepi miiji cibibine cängena ire atwi iyeta nuuja Rooma ngii cama biname bine liiyepu, yepä teepi cibibine nisinglantumesi krokeciije mete bora me. Nää, page teepi singi cibibine ogä ätyepame? Eewe, äblicäco! Cewe mope biname cina miiji teepirage te otni cibibine asatame.”

³⁸ Siige, cubu biname cina Paulo me mene jeitnisi cewe mope biname bime bau me. Teepi liba äätäecijige egä Paulo naabi Siila lui Rooma ngii cama biname gegi, teepi wälu ge, ingle naace gyene teeme cotre pisi nyene egä Rooma ngii cama biname ne atrana căco gone niya jaawenuye.

³⁹ Teepi peei name pi Paulo Siila naabi bau me aaclige poode mene jajime. Teepi piba teebibine aasatäsi krokeciije mete cabu ca, teebibine äätelmäisi cewe ne gomalame.

⁴⁰ Siige, Paulo naabi Siila krokeciije mete cabu ca piba asatäsi, aaclige Ludiya me mete me. Puga teepi ätrunga biname bine edäremäsi, mene jejemäsi cängena ätrungame Yeesu ne, siige cewe ne ebmaläsi.

¹ Paulo naabi Siila neeneni cewe Amapipoli piyepu Apoloniya täasuplingtäsi, aaclige Tesalonika cewe me, luga ge Israela biname bime abasecretna mete.

² Paulo ädige pui abasecretna mete cabu me, inge teeme mule pepu ge. Puga nesae Sabade bimu cabu tabe biname cama mene äciseräjige Oogäräneji Mene cabu ca.

³ Tabe pui mene teebibine ebiberäjemige, piyepu pui cabu ca eboclomtige egä Keriso te miji mäpu padare piyepu budre päpäna, piba budre cabu ca arpinenta. Paulo jejemige egä, "Ai Yeesu cane lui poto cidi me jijenininine, tabe peese nyene Keriso, biname bime niiya cabu ca äsecrerayame."

⁴ Poto pui biname cina Paulo me mene jecatisi piyepu Paulo naabi Siila cama abasutinini. Bucurage Griik biname lui cina Acejiyame bau irecu lätmutinini piyepu bucurage mope magebi teepi cuta Paulo me mene jecatisi.

⁵ Yepä poto Israela biname cina ire patre jeglisi, inge bucurage biname Paulo bau me otninisi. Teepi jebasecretnemisi poto kaakesea umle cäco niiya biname bine gaabe gome ca, tomi jwenisi. Teepi cewe biname bine giri jecitemisi, piba Yasona me mete me claabe cama eclige, ebäcnisi. Teepi singi Paulo Siila naabibine oomlaname, biname tomi cabu me acaname,

⁶ Yepä lica jääpänisi teebibine. Teepi piba Yasona piyepu poto nuuja ätrunga biname bine oomleji ewademisi babo cewe mope biname bime bau me, piyepu babo tage ca jicemisi egä, "Peei biname Paulo naabi Siila, lui cina mage niiya mule jaawenemepäsi iyeta poto ta, teepi mime cewe me taclumi.

⁷ Siige, Yasona te teebibine ire jaatwenige teeme mete cabu. Teepi iyeta cina Rooma Mopeyame me cotre bine jetroppengäjenemisi, jicememisi egä kirece mope biname pisi nyene, teeme ngii Yeesu sine."

⁸ Siige, biname tomi piyepu cewe mope biname ai mene liba itecijemige, teepi ngenecu niiya me äbitininisi.

⁹ Siige, cewe mope biname cina asata rarekaake bine etomlecmisi Yasona piyepu ten cama lui biname teeme bau ca, piba teebibine jityepemisi.

Berea Cewe je

¹⁰ Ciye te liba tuumlige, piba taatu Tesalonika cewe ätrunga biname cina Paulo Siila naabibine jäätyepisi Berea cewe me claabeclabe biname wälu name pi. Teepi liba atyaramtäsi Berea cewe me, Israela biname bime abasecretna mete me aaclige.

¹¹ Berea cewe cabu lui Israela biname teepi lica Tesalonika cewe cabu Israela biname pana ätecija cäco ge. Teepi babo singi Paulo me mene ätecijame, piyepu iyeta bimu teepi Acejiyame me Oogäräneji Mene labiberäjininisi umle äbitame egä Paulo me mene liba toraca ge.

¹² Teeme bucurage cina teeme mene jitrungi-si, cuta piyepu bucurage dogwe Griik magebi piyepu bucurage Griik rooriye.

¹³ Yepä, Tesalonika cewe cabu lui Israela biname, teepi liba itecijemige egä Paulo Acejiyame me mene jicemuge Berea cewe cabu je, teepi piyeme eclige, puga biname bine ngenecu jelonecmisi piyepu tomi cabu lui biname bine claabe me jewenemisi Paulo tääpume.

¹⁴ Siige, Berea cewe ätrunga biname cina Paulo ne wata jityepisi malu me, yepä Siila naabi Timoti Berea je aanajige.

¹⁵ Lui ätrunga biname cina Paulo ne malu me jewecitisi, teepi ten cama poo gaabe eclige ngälu Atena babo cewe me atyarige. Puma cita ca teepi Berea me täcnärige Paulo me mene cama egä Siila naabi Timoti miji wata teeme bau otnime.

Atena Babo Cewe je

¹⁶ Paulo liba jaawagrije Siila Timoti naabibine Atena cewe cabu je, tabe ngenecu mäpu äbitige, liba jepänemige ime ca wawenäneji uuje, biname cina lui bine yaawejanusi piyepu yiwäräjemus. Tabe ngenecu mäpu gyene, inge pui gwidape lui bucurage ge Atena cewe ngalebora je.

¹⁷ Tabe mene läciseräjuge Israela biname cama piyepu nuuja gawe biname cama lui cina Acejiyame ne yaawejanusi, tabe liba Israela biname bime abasecretna mete cabu. Cuta piyepu iyeta bimu gaabegabe tabe eei biname cama mene läciseräjuge cewe cole puupu cabu, lui cina piyeme yaacluge.

¹⁸ Poto abiberäja biname lui cina Epikuro sigu cabu piyepu poto lui cina Stowika sigu cabu, teepi Paulo cama mene äciseräjininisi. Poto cina jicisi egä, "Ai biname te ngena buduma mene singi iicaname?"

Yepä, nuuja cina jicisi egä, "Teeme mene lui nuuja gawe biname bime uuje poto cidi me." Teepi naace name pi pepu jicemisi, inge Paulo lui Yeesu poto cidi me jicige, cuta piyepu teeme budre cabu ca alotnenta poto cidi me.

¹⁹ Teepi puma cita ca Paulo ne ecanisi Atena cewe modamoda biname bime abasecretna cabu me Areo podo cabu me. Puga teepi Paulo ne jejisi egä, “Cine singi umle me ai kirece abiberäja maane lui jicenenemenite.

²⁰ Poto mäame mene cine lui nitacijinige, mara opo gemi cime täápume. Cine singi umle me teeme aboclomta lipu ge.”

²¹ Yoo, iyeta Atena cewe biname piiyepu ten cama lui catecewe biname, teepi singi iyeta padare mene iicaname piiyepu ätecijame ciitaca kirece ngene atwanena poto cidi me.

Paulo me Mene Cewe Modamoda Biname bime Abasecretna cabu

²² Paulo jeclajutige cewe modamoda biname bime abasecretna cabu, teebibine jejemige egä, “Atena cewe biname, cane jepänemine egä weeme uuje iiwäreja mule nesae lica gemi.

²³ Cane liba totnumene weeme cewe cabu piiyepu weeme uuje iiwäreja puupu bine sengräräjemumene, cane yepä iiwäreja dade tepänumene apu oogäräneji mene cama egä, MINE LUI BABO BINAME POTO CIDI ME CAMUGE UMLE ÄBITA, TEEME TÄÄPUME AI DADE. Yoo, weene lui ne yiwäräjuyje, yepä lui poto cidi me weene camu gemi umle äbita, cane page umle jiweninine.

²⁴ Acejiyame lui te gawecewe ne tewenuji iyeta teeme gwidape cama, tabe peese nyene Yageyame cabucewe piiyepu gawecewe täápume. Tabe lica yaanajuge uuje iiwäreja mete cabu, biname cina lui ne yaarangusi.

²⁵ Cuta piiyepu tabe nuuja singi lica ge gwidape täápume biname cina lui teeme ime ca yääcärusi, ingle tabe peese nyene lui te iyeta biname bine yääcäremuge teeme ireclota, piiyepu buuwemope, piiyepu iyeta nuuja gwidape.

²⁶ Tabe yepä biname cabu ca iyeta tääpe maramara biname bine jewenemuji, siige eplidnärujisi iyeta gawe maramara cabu lenajame. Camuge biname bine wawena, tabe ngene ca egluji lui padare piiyepu lui gawe cabu teepi cirege lenaja.

²⁷ Tabe apu jewenuji naace täápume iyeta biname cina teebine ärngime piiyepu teeme bau me awetentame, teepi piba pama teebine päpäname. Yepä, toraca gyene egä Acejiyame cudecewe lica gyene mime yepäyepä cabu ca,

²⁸ yepä biname te lipu jicuji egä:

‘Mine teeme kokre cabu ninajininige, otnetnäjininago, piiyepu ireclota jepäninisi.’

Yoo, poto weeme oogära biname cina ai poto cidi me jicujisi egä,

‘Cuta mine teeme bägrä gemi.’

²⁹ Yoo, ingle naace popi mine Acejiyame me bägrä gemi, mine miiji lica gemi apu angi egä tabe lui gol, silba, coo kula ca wawenäneji uuje pana ge, lui bine biname cina yootonutemusi, cängena jäämyeremusi.

³⁰ Yoo, lui padare cabu biname cina umle cäco Acejiyame poto cidi me, tabe piba teeme niiyaniya mule bine lica yaacnemuge, yepä page tabe iyeta biname bine iyeta poto ta jejananemige teeme niya mule cabu ca atatrongäräme,

³¹ ingle naace popi tabe bimü ne ngene ca itu egluji, lui cabu tabe iyeta gawecewe biname bine cirege conocäco atrana. Tabe peei täápume teeme biname ne ituge jaji, cuta peei biname ne itu eboclomäjuji iyeta biname bime täápume, tabe liba teebine budre cabu ca erpinantuji.”

³² Siige, teepi liba Paulo me mene itecijemige biname budre cabu ca arpinenta poto cidi me, poto cina teebine jitutanisi, yepä poto cina teebine jejisi egä, “Cine singi cääri ätecijame ai poto cidi me nuuja padare cabu.”

³³ Siige, puma cita ca Paulo peei abasecretna ne sebmalige.

³⁴ Poto biname cina ten cama abasutanininisi, teeme mene jitrungisi. Teeme yepä, ngii Diyonisius, lui peei modamoda biname bime abasecretna cabu ca, cuta nuuja lui magebi gwene, teeme ngii Damari, cuta piti nemi cerämu poto biname.

18

Korinito Babo Cewe je

¹ Peei ingwe ca Paulo Atena cewe ne sebmalige, ädige Korinito babo cewe me.

² Puga tabe jepänige yepä Israela biname ngii Akwila, lui me ärngi gawe Pontus ge. Tabe Rooma babo cewe Italiya gawe cabu ca piba taatu tädige coga ngii Prisila cama, ingle Rooma Mopeyame Klaudiyus mene itu jicupi iyeta Israela biname cina Rooma babo cewe ne gomalame. Yoo, Paulo teebibine äädäriige,

³ siige ten cama enajanige, kaakesea ten cama jewenemige, ingle naace popi Paulo teeme rarekaake jääpänuge yepä kaakesea cabu ca Akwila naabi Prisila lui kaakesea jaawenäsi. Teepi kokre cäbletäpe bine yaaterutäjemusi watawata mete wawena täápume.

⁴ Iyeta Sabade bimu gaabegabe, Paulo ädige Israela biname bime abasecretna mete me, puga mene iciseräjemige. Tabe singi ge Israela piyepu Griik biname cina teeme mene acatame.

⁵ Siila naabi Timoti Makedoniya gawe cabu ca liba tacliffe, tatyaramtäsi Korinito cewe me, Paulo pui rarekaake täapume kaakesea ne sebmalige, piba iyeta padare Miiji Mene jaajanemuge, Israela biname bine cängena yaabiberäjemige egä Yeesu peese nyene Keriso, teepi lui ne jewagrijenisi otnime teebibine nüya cabu ca äsecreraame.

⁶ Israela biname cina liba teeme mene lica jecatisi piyepu teebine jelwisi, tabe teeme cäbletääpe bine jiglubäjemige, piba teebibine kokre mene ca jejemige egä, “Weene Acejiyame bau ca liba cudecewe läbitininuye, peei lui weeme nüya birige. Weene liba cäme mene täapume ätecija cäco läbitininuye, peei lui cäme ingle lica ge! Page cabu ca cane ädenine nuuja gawe biname bime bau me.”

⁷ Siige, tabe pui abasecretna mete ne ebmalige, ädige nuuja mete cabu lenajame, lui peei abasecretna mete wajwa jage. Pui mete yageyame, ngii Titiyu-Yuustus, tabe Israela biname lica ge, yepä nuuja gawe biname, lui te Acejiyame ne yaawejanuge.

⁸ Yepä Israela biname ngii Krispo, lui pui abasecretna mete mope biname ge, tabe piyepu iyeta teeme ingle biname cina Yageyame ne jitrungisi. Cuta piyepu bucurage nuuja Korinito cewe biname lui cina Miiji Mene itecijemige puga, teepi jitrungisi, piba nüye ca äciseja ne ecatisi Yeesu me ngii cabu.

⁹ Nuuja ciye Yageyame te Paulo ne wama ca jejige egä, “Wälu gone läbitute, yepä mene jicemepi! Goose te gone noomluge,

¹⁰ ingle cane maane cama gäne. Nuuja biname te äblicäco ge meebine nüya wawena, ingle naace gyene bucurage biname ai cewe cabu lui cäme biname gemi.”

¹¹ Peei mene name pi Paulo puga enajige yepä kämäge cebo cama, biname bine yaabiberäjemuge Acejiyame me mene potu cidi me.

¹² Rooma Babo Mope Biname te liba biname ngii Galiyo ne mopeyame me jewenige Griik biname bime Akaya gawe täapume, Israela biname cina piba Paulo ne gigri joomlisi, ecanisi teebine atrana puupu me.

¹³ Teepi jejis egä, “Ai biname singi biname bine atamongärame Acejiyame ne awejena mara mule ca, lui mule te Rooma cotre ne jaatropangtuge.”

¹⁴ Paulo mene me liga äbitige, Mopeyame Galiyo te piba Israela biname bine jejemige egä, “Ai biname te liga babo nüya mule ne jaaweneji, coo Rooma biname bime cotre liga jaatropangteji, cane piba weene Israela biname bine cängena jitecijinejine,

¹⁵ yepä ai gwidape lui weeme papa abaja mene gemi, weeme ngii, piyepu weeme cotre potu cidi me. Peei name pi weene weemämu jeweneye atraname. Cane singi lica gäne atraname pepu mule potu cidi me!”

¹⁶ Tabe puma cita ca teebibine siyebhengemige atrana puupu cabu ca.

¹⁷ Siige, teepi iyeta piba Israela biname ngii Sostene ne joomlisi. Tabe lui kirece mopeyame ge pui Israela biname bime abasecretna mete täapume. Teepi teebine eglisi atrana puupu opo gaabe je, yepä Mopeyame Galiyo tabe nuuja singi lica ge teebibine iibaname.

Paulo Babo Antiyoka Cewe me Acnenutige

¹⁸ Peei ingwe potu ca Paulo Korinito cewe cabu enajanige bucurage bimu ätrunga biname cama, teebibine piba sebmalemige, Akwila naabi Prisila cama ädige poo gaabe Suriya gawe me. Puga Kenekrea malu cewe je, teepi liba camuge babo poo cabu me acetnera, Paulo teeme edingäli jeclanemige, ingle naace popi Israela biname bime mule apu ge egä biname te padare yaacituge, lui cabu tabe mage ngene jotwananuge Acejiyame potu cidi me. Tabe edingäli lica äläcnuta ngälu peei padare te lapiruge, siige piba edingäli jaaclanimuge piyepu gwidape Acejiyame ne yiwäräjuge.

¹⁹ Yoo siige, teepi liba atyarige Epeso cewe me, tabe Israela biname bime abasecretna mete me abacitige, mene äciseräjige Israela biname cama.

²⁰ Biname cina teebine tesoglicisi tabe leca padare ten cama lenajame, yepä tabe singi lica ge.

²¹ Pätä tabe liba sebmalemige, jejemige teebibine egä, “Liba Acejiyame singi gyene, cane cire tacnepene weeme bau me.” Siige, tabe Akwila naabi Prisila puga taabmalige, poo gaabe Epeso cewe ca abyemäriige.

²² Tabe liba atyaramtuge Kesarea malu cewe me, tabe doro ta ädige Yerusalema me, ätrunga biname bine jewablemige, piba ädige Antiyoka cewe me.

²³ Tabe potu bimu enajige Antiyoka cewe je, piba abyemäriige, otnige Galatiya piyepu Pirugiya gawe cabu ta, puga iyeta ätrunga biname bine ngene atwana kokre jewenemige.

²⁴ Yepä Israela biname, teeme ngii Apolo, lui aplimlänēji ge Aleksandriya cewe je Aikupito gawe cabu, tabe tädige Epeso cewe me. Tabe lui mopemuli biname ge piyepu babo umle ge Acejiyame me Oogäräneji Mene poto cidi me.

²⁵ Tabe ituge abiberäja mime Yageyame me gaabe poto cidi me. Tabe mene jüucege drämä cama, piyepu biname bine conočo ebiberäjemige Yeesu poto cidi me. Yepä gwidape, tabe umle Yoane me niye ca äciseja mule taatu; tabe nuuja umle lica ge egä biname cina äciseja yaacatusi Yeesu Keriso me ngii cabu.

²⁶ Yoo, Apolo gije abacitige mene wälu cäco iicemame Israela biname bime abasecretna mete cabu Epeso je. Prisila naabi Akwila liba äätecijige teeme mene, teepi piba teebine teeme mete me ecanäsi, teebine cängena pajecurage ebiberäjäsi Acejiyame me gaabe poto cidi me.

²⁷ Yoo, Apolo liba singi ge Griik biname bime Akaya gawe cabu otnime, Epeso ätrunga biname cina teebine itityärisi. Teepi teeme Griik ätrunga binamewale bime bau me mene yoogärisi egä teepi Apolo ne awacletnäjame. Siige, Apolo liba Griik biname bime gawe cabu atyaramtuge, tabe babo ätityeräja biname ge teeme tääpume, lui cina Acejiyame me owecu piyepu ätityera ca Yeesu ne ituge ätrunga.

²⁸ Tabe kokre mene ca Israela biname bine epremalemige sobe cabu. Tabe eboclomtige Yeesu ne Oogäräneji Mene cabu ca egä tabe peese nyene Keriso, lui ne Israela biname cina jaawagrijsi teebibine niya cabu ca äsecerame.

19

Paulo Epeso Cewe je

¹ Apolo liba Korinito cewe cabu enajige, Paulo doro gaabe ädige Pirugiya probins cabu ta, ngälu atyaramtuge Epeso cewe cabu me. Tabe puga jepänemige poto ätrunga biname bine,

² itemlemige egä, "Nää, Aceji Seemo weeme bau itu labacitanepi, weene lui padare cabu niinäce liba jäätrungepeye?"

Teepi jejisi egä, "Cine nuuja umle lica gemi Aceji Seemo poto cidi me."

³ Puma cita ca Paulo teebibine itemlemige egä, "Weene ngena ätrunga ne piba yaacatepeye, weene liba niye ca äciseja ne yaacatepeye?"

Teepi jejisi egä, "Pui niye ca äciseja biname Yoane, cine teeme mene yaacatepesi."

⁴ Paulo piba jejemige egä, "Yoane me äciseja eei bime tääpu myene, lui cina teeme niya mule cabu ca latatrongärininusi Acejiyame bau me. Tabe Israela biname bine jaajemuge ätrungame teeme bau me lui te teeme ingwe ca tädenige. Peei lui Yeesu sine."

⁵ Epeso ätrunga biname cina liba peei mene itecijemige, teepi niye ca äciseja ne ecatisi Yageyame Yeesu me ngii cabu.

⁶ Siige, Paulo liba ime aacitanige teeme papa cabu, piba Aceji Seemo te abacitanige teeme yepäyepä trupa cabu. Teepi teeme umle cäco mene ca jüicemisi, cuta piyepu Acejiyame me tagepogogo mene jüicemisi.

⁷ Teepi iyeta pama twelb rooriye ge.

⁸ Nesae maybe ngalebora Paulo Israela biname bime abasecretna mete me labacitanuge, mene wälu cäco jüicemuge biname cama, piyepu teebibine mene yääciseräjemuge, ingle tabe singi teebibine umle wawenname Acejiyame te lipu biname bine yaawademuge.

⁹ Yepä, poto cina ätecija cäco ge. Teepi singi lica ge ätrungame, piyepu niya mene jüicemusi abasecretna cabu je mime Yageyame me gaabe poto cidi me. Paulo peei name pi teebibine ebmalemige, siige ätrunga biname bine ewademige ten cama. Puma cita ca iyeta bimugaabegabe tabe läduge biname ngii Turanus me abiberäja mete cabu, puga biname cama mene labaitnuge.

¹⁰ Tabe peei ne jaawenuge neeneni kämäge cama. Peei name pi iyeta biname lui cina yaacrajuge Asiya probins ngalebora, Israela biname piyepu nuuja gawe cabu ca lui biname iyeta, teepi yäätecijemuge mene Yageyame poto cidi me.

Sekewa me Imäbägrä

¹¹ Acejiyame te mararage ciitaca mule bine jaawenemuge Paulo me ime ca.

¹² Nuuja taje biname cina Paulo me cäbletääpe pläsu bine yaawademusi, lui bine ituge ätäya teeme mope cabu coo ibi cabu, siige pita biname bime cabu me yaarpetnemusi. Piba teeme pita cina teeme bau ca läyebhenguge, piyepu niya cable cina teeme trupa cabu ca läsuige.

¹³ Yoo, poto Israela biname lui cina waatne-tnäjinusi niyaniya cable bine äyecrejame biname bime trupa cabu ca, teepi läbitininusi Yageyame Yeesu me ngii jajime peei mule wawenname. Teepi jejemisi niya cable bine egä, "Cine weebibine jijenininago Yeesu me ngii cabu, lui ne Paulo jeitnäjenige, weene äyebhingeyel!"

¹⁴ Yoo, puga ge seven naniganewale lui cina peei mule ne jaawenusi. Teepi yepä Israela iiwäreja babo biname Sekewa me bägrä gemi.

¹⁵ Teepi liba niia cable cama biname ne Yeesu me ngii cabu pepu mene jejisi, tabe niia cable te teebibine jejemige egä, “Cane umle gäne Yeesu, piyepu cane umle gäne Paulo poto cidi me, yepä weene baa laati bemi?”

¹⁶ Lui biname niia cable cama ge, tabe girigale cama ädige pui seven naniganewale cabu me, teebibine iyecräjemige. Teepi iyeta teeme mete cabu ca uucratnige dupe cama, teeme cäbletääpe mage äsupleceji ge.

¹⁷ Israela biname piyepu Griik biname Epeso cewe ngalebora, teepi liba itecijemige peei poto cidi me, iyeta mage wälu ge, siige Yageyame Yeesu me ngii te babo äbitige teeme tääpume.

¹⁸ Bucurage ätrunga biname cina totninisi Paulo naabibime bau me, sobe cabu teepi teeme piiseba mule aitäjiniisi.

¹⁹ Bucurage lui cina piiseba tääpume labiberäjininusi teepi teeme oogäräneji mene piiseba mule poto cidi me sewademisi, sobe cabu juubuderäjemisi. Teepi elenglecäjemisi pui peba bime daremu iyeta, ngälu fifti tausen silba rarekaake bine joomlemisi.

²⁰ Pepu kokre mule ca Yageyame me mene te babo äbitige iyeta poto ta, cuta piyepu cerämu kokre me äbitige.

Claabeclabe Biname Epeso je

²¹ Ai mule cina liba täbitimesi, Paulo ingwe ca piba ngene jotwanige Griik biname bime gawe Makedoniya piyepu Akaya cabu me otnime, puma cita ca piba Yerusalema me otni. Tabe jüicige egä, “Peei padare ingwe ca cane müiji Rooma babo cewe ne päpäname.”

²² Tabe jäätyepige Makedoniya gawe me neeneni teeme ätityera biname Timoti Erasto naabibime, yepä tabe cerämu enäjige Asiya probins cabu.

²³ Yoo, puga ge Epeso cewe cabu pui padare mäpurage mule Yageyame me gaabe poto cidi me.

²⁴ Yepä biname puga ge teeme ngii Demetriyus lui te silba ca ceegecege gwidape bine jaawenemuge. Tabe silba iiwäreja mete ceegecege bine jaawenemuge teeme uuje magebi tääpume, ngii Artemi. Demetriyus piyepu teeme kaakesea biname cina bucurage rarekaake jääpänemusi peei mete ceegecege wawena cabu ca.

²⁵ Yoo, Demetriyus tesoglecemige teeme kaakesea biname bine piyepu poto nuuja biname lui cina yepä pana kaakesea jaawenusi, teebibine jejemige egä, “Binamewale, weene umle gemi egä mine ai kaakesea name pi dogweyame gemi.

²⁶ Page weene jepäneniye, jitecijiye ai biname Paulo te ngena jewenenige. Tabe jüicenemige egä, ‘Ime ca wawenäjeji uuje lui toraca lica gemi.’ Bucurage biname cina peei mene bii jitrungisi mime cewe Epeso je piyepu Asiya probins iyeta poto ta.

²⁷ Pama mime kaakesea te niia ngii pagege päpäna Paulo me mene name pi, cuta piyepu pama niia pa tädepi mime uuje magebi Artemi bau me. Biname cina pama ngene pa jäätrimalemepi teeme iiwäreja mete poto cidi me. Puma cita ca Artemi, lui tääpume iyeta Asiya biname piyepu biname cina iyeta gawecewe cabu ta yiiwärajusi, teeme babo ngii pama pa lapesarepi.”

²⁸ Biname cina liba Demetriyus me mene itecijemige, teepi claabe me äbitininisi, babo tage ca jüicemisi egä, “Baborage gwene mime Epeso biname bime uuje magebi Artemi!”

²⁹ Biname cina teeme guugla itecijemige Epeso cewe iyeta poto ta. Tomi cabu lui biname cina neeneni Makedoniya biname bine claabe cama joomli-si, teeme ngii Gayus naabi Aristakus, lui cina Paulo cama totnumäsi. Teepi teebibine wata aacanisi Epeso cewe babo abasecretna puupu me.

³⁰ Paulo singi otnime abasecretna biname bime opo gaabe me, yepä ätrunga biname cina teebine jüibisi.

³¹ Cuta piyepu poto Epeso cewe modamoda ngii biname, lui cina singi gemi Paulo tääpume, teepi mene jityepisi teeme bau me egä, “Gone lädute peei claabe biname bime opo gaabe!”

³² Peei padare biname cina abasecretna puupu cabu mage guugla ecisi, yepä bucurage pui biname cina nuuja umle lica gemi teepi ngena tääpume babasecretnege. Poto singi gemi yepä gwidape tääpume; nuuja cina singi nuuja gwidape tääpume.

³³ Poto biname cina apu jengemige egä yepä Israela biname ngii Aleksanda name pi peei tomi bäbitininisi, ingle naace gyene Israela biname cina teebine jewenisi niinäce gaabe otnime. Puma cita ca Aleksanda te singi gyene biname bine ime ca bojä wawename. Tabe liga gije abacitige mene me egä peei guugla lui teeme ingle lica ge,

³⁴ biname cina teebine opo ewatnisi egä tabe lui Israela biname ge, piba lecaleca padare cabu teepi gigri jiicanisi babo tage ca egä, “Baborage gwene mime Epeso cewe biname bime uuje magebi Artemi!” Teepi peei yepä mene jiicanisi mage leca padare ngalebora.

³⁵ Ingwe ca yepä cewe mope biname te pui biname tomi ne bojä jewenige. Tabe biname bine walya mene jejemige egä, “Epeso ceweyame, iyeta biname umle gemi egä Epeso lui ire atwi cewe gyene Artemi me iiwäreja mete täöpume piyepu pui cudege kula täöpume, lui te sitramuji dume cabu ca.

³⁶ Nuuja biname te äblicäco aina ai poto cidi me. Pipu pi weene müiji bojä agi, cängena ngene atwana cama inajipi.

³⁷ Weene ai neeneni biname bine aima bii taacaniye, yepä teepi nuuja gwidape lica ero ca isatäsi iiwäreja mete cabu ca, piyepu lica niya mene jüicemäsi mime uuje magebi poto cidi me.

³⁸ Demetrius piyepu ten cama lui kaakesea biname cina liba singi gemi mene aitname nuuja biname poto cidi me, atrana bimu piti nemi piyepu cuta ablaweja biname. Teepi müiji puma teemeteme pa latranipesi.

³⁹ Yepä, weene liba cerämu nuuja gwidape täöpume singi, weene müiji cewe ngii biname bime abasecretna cabu peei iicana.

⁴⁰ Page ai guugla mule te lui bäbitige, mäpu gyene mime täöpume, ingle Rooma biname cina pama mibibine pa niyitnipesi ai mule poto cidi me. Mime nuuja ingle lica gyene ai guugla täöpume. Mine äblicäco teebibine müiji ingle ceera ai mule poto cidi me.”

⁴¹ Yoo, teeme mene liba siige, tabe biname bine jityepäjemige.

20

Paulo Ädige Makedoniya piyepu Akaya Gawe cabu me

¹ Siige, Epeso cewe biname liba bojä icrajige, Paulo piba ätrunga biname bine tebasecret-nemige, mene jejemige teeme ngene atwana kokre wawename, siige yewo jewenemige. Puma cita ca tabe sebmalemige teebibine, poo gaabe ädige Makedoniya gawe me.

² Tabe pui gawe cabu ta otnige, bucurage mene jejananemige ätrunga biname bine kokre ceerame. Puma cita ca tabe ädige Akaya gawe cabu me,

³ puga enajige nesae mabye cama. Tabe liga abyemerame äbitige poo gaabe Suriya gawe cabu otnime, piba umle äbitige egä poto Israela biname cina mene jitransenisi teebine gaabe cabu aglime, peei name pi tabe tacnenutige Makedoniya gawe cabu me, piba puma cita ca otni Suriya me.

⁴ Yoo, ätrunga biname ngii Sopata, lui Purus me bägrä ge Berea cewe cabu ca, tabe Paulo ne jewecitige. Cuta puga ge ten cama Aristakus naabi Sekundu, lui Tesalonika cewe biname, piyepu Gayus lui Derbeyame, piyepu Tukikus naabi Tropimus, lui Asiya probins cabu ca, cuta piyepu Timoti.

⁵ Teepi iyeta niinäce eclige, cibibine niwagrijinisi Trooasi cewe je.

⁶ Israela biname bime Uutneca cäco Buluduu Trii kaake poto ca, cine poo gaabe naclige Pilipi cewe cabu ca. Siige, faib bimu ingwe ca cine ten cama abasecretninago Trooasi cewe cabu. Cine puga Trooasi je seven bimu ninajininige.

Paulo Trooasi Ätrunga Biname bine Ceräcerägäbu Edäremige

⁷ Sabade mämleteca me cine tabasecretninago deedei matikolä gigri äbitame. Paulo biname bine mene jejemige ngälu ciye duusa, ingle naace popi nuuja kroke tabe singi teebibine abmaläcemame.

⁸ Cine lui caburage puupu cabu tabasecretninago, bucurage lampa cina puma ayeninini-si.

⁹ Yepä mamye rooriye, teeme ngii Yuutikus adnatäneji enajige mete traapi uli cabu. Paulo liba mene camu jüicemige, Yuutikus ute me jicriranige, ngälu tabe toraca ute te jewenige, siige pui caburage puupu cabu ca puma cita ca sitramige gawe me. Biname cina liba teebine ecatisi, piba jepänisi egä tabe budre ge.

¹⁰ Yepä, Paulo äinige gawe me, budre biname papa cabu ätwitige, teebine jejeclenäjige. Tabe biname bine jejemige egä, “Ngenecu mäpu gone. Tabe ireclota gyene!”

¹¹ Siige, Paulo piba jegelige, pui caburage puupu cabu me cääri abacitige, puma buluduu ne itrecige, biname cama erwäjige. Tabe piba cääri mene abaitnige lecarage padare cabu ngälu bimu te tacitige, piba abyemärige.

¹² Teepi jewecitisi pui mamye rooriye ne ireclota cama teeme mete me, siige babo ngenecu müiji äbitininisi.

Paulo Trooasi Cewe ca Ädige Miletu Cewe me

¹³ Cine babo poo cabu me niināce acetnārīnago, abyemārīnago Asos cewe me, Paulo luma singi ge poo cabu me acenutame. Tabe cibibine itu nijipi pepu gaabe wawenane, ingle tabe singi ge doro ta otnime Asos cewe me.

¹⁴ Tabe liba cibibine opopa niwenininige Asos cewe je, cine teebine ecenutisi, piba naclige Mitulene curā me.

¹⁵ Cine puma cita ca naclige, nuuja bimu Kiyosa curā mameta me atyarīnago, cuta nuuja bimu Samo curā me atyarīnago, piba cuta nuuja bimu cabu atyarīnago Miletu malu cewe me.

¹⁶ Paulo mene itu titranumi Epeso cewe ne āsuplengtame, ingle naace popi tabe singi lica padare te apirame Asiya probins ngalebora, yepā tabe singi ge Yerusalema ne wata oomlaname Pentikos bimu tāāpume, liba ibibi ge poo me uuwama.

Paulo Yewo Mene Jejemige Epeso Ātrunga Ingle Mope Biname bine

¹⁷ Miletu cewe ca Paulo mene jiyepige Epeso me, ātrunga ingle mope biname bine jajime ten cama opopa ayime Miletu je.

¹⁸ Teepi liba atyarige, tabe teebibine jejemige egā, “Yoo, weene umle gemi egā iyeta padare cane liba weene cama itu nanajepi, pui niināce bimu cabu ca cane itu latyaramte-pene Asiya probins cabu, ngālu cane probins ne saabmalepene,

¹⁹ cāmāmu awepperāja cāco piyepu ele cama, cane Yageyame me kaakesea jaawenune māpu padare cabu, lui bine jāāpānemune Israela biname bime cabu ca, teeme āmugetna mule name pi.

²⁰ Weene umle gemi egā cane durau ābita lica weebibine mene jajanenane lui weeme miji tāāpume birige, cane liba mene jijanānipene piyepu weebibine ibiberājipene biname sobe cabu cuta piyepu weeme maramara mete cabu ta.

²¹ Israela biname piyepu nuuja gawe biname bine cane kokre cama bāārimi jaaged-nemepene teeme niīya mule cabu ca Acejiyame bau me atatrongārame piyepu mime Yageyame Yeesu ne ātrungame.

²² Siige, page cane Yerusalema me ādenine, ingle Aceji Seemo nātyepenige cebine. Cane umle lica ngena pa lābitepi puma cāme tāāpume.

²³ Cane pui taatu umle gāne egā iyeta cewe cabu ta Aceji Seemo cebine itu najananumi egā krokeciīye mete piyepu poto māpu cina puma nawagrijenisi.

²⁴ Yepā, cane ngenē jotwanenine egā cāme ireclota lui babo gwidape lica gyene, cane liba taatu epirenine pui kaakesea ne Yageyame Yeesu lui itu nācārūji wawenane. Peei kaakesea lui Miji Mene iicaname Acejiyame me owecu piyepu singi poto cidi me.

²⁵ Yoo, cane iyeta weeme bau waatnetnājepene, biname bine mene jaajanemepene Acejiyame te lipu biname bine yaawademuge. Siige, page cane umle gāne egā weeme nuuja te lica cāāri pa nāpānepi cebine.

²⁶ Cane peei name pi page ai bimu cabu jijenininine weebibine egā weeme yepā te Acejiyame bau ca liba lapesaruge, peei lui cāme ingle lica ge,

²⁷ ingle naace popi cane lica durau lābitune weebibine mene jajanenane, yepā cāngena jijinune iyeta Acejiyame lui singi gyene wawenane.

²⁸ Weene cāngena ire atwipēye weeme ireclota poto cidi me, cuta piyepu pui biname bime ireclota cāngena ire jetwemepeye Aceji Seemo te lui bine weeme bau me itu yaawademepi weene ire atwime. Yoo, maamoi ire atwi biname pana, weene ātrunga ingle biname bine cāngena ewademepēye, ingle naace popi Acejiyame teebibine itu jaaletne-mepi teeme bāgrā Yeesu me uudi piyepu budre ca.

²⁹ Cane umle gāne egā cāme otni ingwe gaabe ca, niīyaniya biname cina weeme bau me pa twaatnipesi, girigale drego pana teepi niīya pa jaawenemepesi poto biname bine weeme tomi cabu.

³⁰ Yoo, padare cire tādepi, poto biname cina weeme tomi cabu ca piba walya mene cire jicemepesi poto ātrunga biname bine teeme bau me āyēble-ngame.

³¹ Peei name pi ire! Cuta piyepu ngenē napecnepēye cane lipu ciye bimu ele mācu cama iyeta weebibine ibiberājipene nesae kāmāge cama.

³² Yoo, page cane weebibine icranininine Acejiyame me ime cabu. Pisi nyene weene cama Miji Mene Acejiyame me owecu piyepu singi poto cidi me, lui mene ibibi gyene weeme ngenē atwana kokre wawenane piyepu weebibine teeme miji cabu acranane. Peei miji lui pisi nyene iyeta Acejiyame me biname bime tāāpume.

³³ Yoo, weene miji cāme mule ingwe ācwime. Cane singi lica ituge ābita nuuja biname bime silba coo gol rarekaake, piyepu cābletāāpe tāāpume.

³⁴ Weene weemāmu umle gemi cane lipu rarekaake kaakesea cāme ime ca itu jaawenepene iyeta gwidape pāpāname, cane piyepu lui biname cane cama cime tāāpume.

³⁵ Iyeta căme mule ca cane weebibine ibiberäjininune egä lui biname pisi nyene kokre căco, mine miiji pepu kokre kaakesea cama teebine ätityerame. Mine miiji nyene jwaatwananinago lui mene Yageyame Yeesu teemämu itu jejuji egä, 'Lui biname te gwidape yääcăruge, teeme gege baborage gyene peei me gege cabu ca lui te saacatuge.'

³⁶ Paulo me mene siige liba, teepi iyeta kokorare ipednemisi, Acejiyame bau me irecu ätumutinisi.

³⁷ Teepi iyeta ele engenetne-mige teebine liba yewo täapume jejecletnäjisi, jetecnisi.

³⁸ Teepi mage owecu jewenisi, ingle tabe bii jejemige egä, "Weene ingwe ca opo lica pa näpänepeye." Pipu pi teepi Paulo ne englecitisi babo poo cabu me.

21

Paulo Yerusalema me Ädige

¹ Cine ätrunga biname bine yewo jewenemisi Miletu je, piba teebibine ebmalemisi. Cine babo poo gaabe malu ne conocăco yuurisi, Kosa curä je atyarinago. Nuuja bimu cine Roos curä ne joomlisi. Puma cita ca malu cewe Patara me naclige.

² Puga cine jepänisi yepä babo poo ne lui te Poenikiya gawe me ädenige. Cine peei babo poo cabu me acetnärinago, malu cabu naclige.

³ Poto bimu ingwe ca cine Kupro curä ne jepänisi, yepä poo te malu gaabe ta ädige Suriya gawe me. Turo malu cewe je cine ärpetnäjınago, pui padare täapume poo biname cina liba gwidape bine irpetnäjemisi.

⁴ Cine poto ätrunga biname puga jepänemisi, seben bimu ten cama ninajininige poo trämä. Aceji Seemo me umle cabu teepi Paulo ne jejisi egä, "Gone lädute Yerusalema me!"

⁵ Yepä, cime padare ten cama liba apirige, piba cine gaabe cabu abyemärinago. Iyeta ätrunga biname teeme coga bägrä cina cine cama äsige cewe cabu ca malu me. Cine iyeta kokorare koriyo cabu ipednemisi, irecu ätumutinago.

⁶ Puma cita ca cine yewo äbitinago, siige babo poo cabu cääri acetnärinago, cuta teepi äcnärige cewe me.

⁷ Cine Turo ca poo gaabe naclige Petolemaisa cewe me. Puga cine ätrunga biname bine sebore jewenemisi, piyepu yepä bimu ten cama ninajininige.

⁸ Nuuja bimu cine teebibine sebmalemisi, Kesarea cewe me atyarinago. Puga ge yepä biname ngii Pilipo lui te Miiji Mene jiicemuge. Cine teeme bau naclige teeme mete cabu lenajame. Tabe lui yepä ge pui seben* cabu ca Yerusalema ätrunga biname lui bine jejäcremujisi ätyepäneji biname bine ätityerame.

⁹ Teeme puga ge fooa ngulebägrä lui cina Acejiyame me tagepogogo mene jiicemusi.

¹⁰ Cine puga liba poto bimu cama ninajininige, piba yepä mename biname te tatyaramtuge Yuudea gawe cabu ca, teeme ngii Agabu.

¹¹ Tabe cime bau me tädige, Paulo me baagi ecatige, peei ca teeme ernge ime ätäyige, piba ninjinege egä, "Aceji Seemo te apu jiicenege: Ai baagi yageyame ne Israela biname cina Yerusalema je apu pana pa jäätäyepesi, siige pa yaacitepesi nuuja gawe biname bime ime cabu."

¹² Ai mene liba nitecijininige, cine piyepu puga lui biname, cine iyeta Paulo ne ele cama jejananisi egä, "Gone otni Yerusalema me!"

¹³ Yepä, tabe mene niwecnistinige egä, "Weene ngena jeweneniye? Ele ingeni-tninige, cebine ngenecu mäpu me naweniye! Cane amacetnäjäneji gäne lica ätäya taatu me, yepä cuta budre äbitame Yerusalema je Yageyame Yeesu täapume."

¹⁴ Cine liba äblicăco ge teebine mara ngene atwanena ceera, piba mene ebmalisi, jiicisi egä, "Mime Yageyame me singi pa läbitepi."

¹⁵ Cine poto bimu ninajininige Kesarea cewe je, piba cime gwidape emacetnäjemisi doro ta otni Yerusalema me, siige abyemärinago.

¹⁶ Poto Kesarea ätrunga biname cina cine cama eclige, cibibine niwadininisi mete me, cine luma pa ninajipi. Pui mete yageyame ngii Manasona, tabe Kupro curä cabu ca ge, lecarage padare ätrunga cama yaanajepi.

Paulo te Ätrunga Mope Biname Yakobu ne Edärige

¹⁷ Cine liba atyarinago Yerusalema me, ätrunga biname cina cibibine niwacletnäjininisi gege cama.

¹⁸ Nuuja bimu Paulo cibibine niwecitinige, Yakobu ne edärisi. Iyeta modamoda ätrunga biname cine cama puga ge.

¹⁹ Paulo teebibine sebore jewenemige, iyeta cängena jeitnäjemige Acejiyame te ngena bine ituge waweneca teeme Paulo me kaakesea cabu ca nuuja gawe biname bime täapume.

* 21:8: pui seben: Pui seben biname bime ngii täapume ire Apostolo 6:1-6.

²⁰ Teeme mene liba itecijemige, teepi iyeta cina Acejiyame ne ewepyeräjisi, puma cita ca Paulo ne jejisi egä, “Cime biname, maane jepänenite lija tausen Israela biname cina Yeesu ne ituge ätrunga, piyepu teepi iyeta mime Israela biname bime cotre bine cängena jaawenemusi.

²¹ Teepi idre ituge ätecija mäame poto cidi me egä, iyeta Israela biname lui cina yaacrajuge nuuja biname bime gawe maramara cabu, maane teebibine yaabiberäjimute Moose me cotre mule gomalame, piyepu jaajanemute teeme imäbägrä bime matikolä täape lica iirputame Acejiyame me cewecu acatame, coo piyepu teebibine jaajanemute Israela biname bime mule lica wawename.

²² Yoo, teepi pama pa yäatecijemepi egä maane age säte cewe je. Mine ngena ne pa jaawenepesi piba?

²³ Yoo, maane miiji apu wawena cine lipu naajenisi! Piti nämi cine cama fooa biname, lui cina Acejiyame ne mene ituge jaji mime Israela biname bime mule ibibi, egä poto mabye ngalebora teepi singi gwidape wawena Acejiyame täapume. Siige pui padare cabu teepi edingäli äswi cäco yaacrajuge.

²⁴ Maane ten cama ädepi, gigri Acejiyame ne cibi ca yiwäräjepeye teepi teeme mene ibi wawename, siige kälyä äbitame. Maane te peei cibi bine teeme täapume jeletnemepi! Siige, iiwäreja ingwe gaabe ca teepi piba miiji gämi teeme edingäli äswime. Yoo, maane liba apu jewenenite, piba iyeta biname cina pa jääpänepesi egä toraca lica gyene teepi lui mene ituge ätecija mäame poto cidi me, yepä teepi umle pa läbitipesi egä maane Moose me Cotre Mene cabu naanajuge.

²⁵ Yepä, lui biname Israela cabu ca lica gemi, lui cina Yeesu ne jäätrungusi, cine teeme poto cidi me ituge atrana, piyepu mene teeme bau me itu jäätyepesepi teeme umle me egä: Gone deedei yäärwäjemuye lui cude ge, ingle uuje täapume iiwäräjeji gemi, piyepu gone cibi yäärngäjemuye lui bime mäju cabu uudi yaanajuge, piyepu uudi gone yäänäjuyue, cuta piyepu sargi mule gone jaawenimuye. Siige.”

²⁶ Yoo, puma cita ca nuuja bimu Paulo pui fooa biname bine ewademige, ten cama Acejiyame ne yiwäräjisi kälyä äbitame. Peei liba siige, Paulo piba Acejiyame me iiwäreja mete gomerage me ädige. Tabu puga mene jejemige lui bimu cabu pui fooa biname bime kälyä wawena padare pagege apira, piyepu jejemige egä tabe pui bimu cabu pagege cibi bine aletna teeme yepäyepä iiwäreja mule bine apirame.

Teepi Paulo ne Joomlisi Iiwäreja Mete Cabu

²⁷ Seben bimu ingwe ca teeme kälyä äbita padare te liba mameta ge apira, poto Israela biname lui Asiya Probins cabu ca ge, teepi Paulo ne jepänisi Acejiyame me iiwäreja mete cabu je. Teepi biname bine giri jicranemisi, siige Paulo ne joomlisi,

²⁸ babo tage ca jicemisi egä, “Israela biname, nitityärineye! Agesa biname lui te iyeta poto ta waatnetnäjuge, biname bine yaabiberäjemuge Israela biname bine äciseräjame, piyepu Moose me cotre bine, cuta piyepu ai iiwäreja mete ne. Cuta piyepu page tabe poto Griik biname bine iiwäreja mete caale bora me sewademige, siige pepu pi niija bii jewenige ai cudege puupu ne!”

²⁹ Yoo, teepi apu jicisi, ingle naace popi teepi yepä Epeso cewe biname ne, ngii Tropimus, Paulo cama jepänisi Yerusalema cewe ngalebora, piyepu teepi apu jengemige egä Paulo teebine ecanige iiwäreja mete caale bora me.

³⁰ Siige, babo cewe iyeta poto ta biname cina buduma äbitininisi, yepä gome uuwametnige iiwäreja mete caale bora me. Teepi Paulo ne joomlisi, piba elädniisi pui puupu cabu ca. Piba taatu iiwäreja mete caale grana bine ermemisi, ingle teepi singi lica uudi wawename pui puupu ne.

³¹ Claabe biname bime tomi cina liga Paulo ne budre me jewenisi, piba cubu biname lui Rooma cewe cabu ca, teeme mope biname te itecijige egä iyeta Yerusalema ngalebora teepi cubu jicenis.

³² Piba taatu peei cubu mope biname te poto cubu modamoda biname piyepu poto cubu biname bine sewademige, wata eclige pui tomi cabu me. Biname cina liba cubu mopeyame jepänisi teeme cubu biname cama, teepi ebmalisi Paulo ne aglime.

³³ Cubu mope biname te piba Paulo bau me ädige, joomlige, mene jejemige teebine ätäyame neeneni ayana seea ca. Puma cita ca tabe biname bine itemlemige egä, “Laasi nyene ai biname; tabe ngena bii jewenige?”

³⁴ Poto biname yepä mene jicisi; nuuja cina mara mene jicisi. Mene maramara name pi, cubu mopeyame äblicäco cängena umle äbita ngena bii äbäbitige. Tabu peei name pi teeme biname bine jejemige Paulo ne acaname teeme cubu biname bime kokre mete cabu me.

³⁵ Paulo cama cubu biname cina mete bäbleta ne liba joomlisi, teepi piba teebine cabu ta ecanisi, ingle puga ge poto mage drowäyame biname.

³⁶ Teepi iyeta teebine ingwe icwisi, ala cama juicisi egä, “Egleye teebine budre me!”

Paulo Teeme poto cidi me Mene Jejemige

³⁷ Paulo cama lui cubu biname cina teeme kokre mete me mameta liba äbäcna, Paulo piba mene jejige cubu mopeyame ne egä, “Nää, cane mene naajene?”

Puma cita ca mopeyame te itemlige, “Baa, maane Griik mene umle gäte?”

³⁸ Maane piba pui Aikupitoyame lica gäte, lui te ai padare niinäce gaabe je gije itu labacitepi Rooma gabmani cama cubu iicaname. Tabe lui fooa tausen girigale biname bine cubu turikä cama ewademige daapo taatu cewe cabu me.”

³⁹ Paulo jejige egä, “Eewe lica, cane Israela biname gäne, aplimlujine Taasu cewe je Kilikiya gawe cabu. Cane ngii biname gäne pui babo cewe Taasu cabu je. Owecu, cane singi gäne mene jajime biname bine.”

⁴⁰ Piba cubu mopeyame teebine mene me padare ecärige. Puma cita ca Paulo mete bäbleta cabu jeclajutige, teeme ime ca biname bine bojä jewenemige. Teepi liba bojä jegemige, Paulo teebibine jejemige Israela biname bime Heberu mene ca egä:

22

¹ “Cäme babewale, cäme binamewale, cebine nätecijeyel! Cane cämämu ai juicene egä cäme mule niija lica gyene.”

² Siige, biname cina liba itecijemige tabe Heberu mene ca teebibine jaji, teepi piba toraca bojä äbitinisi. Paulo piba jejemige egä,

³ “Cane Israela biname gäne, aplimlujine Taasu cewe je Kilikiya gawe cabu, yepä aima Yerusalema me tädujine abiberäja täápume. Cane Gamaliya me abiberäja bägrä gäne. Tabe cebine cängena nabiberäjuji mime kaakesaare bime cotre cabu, piyepu cane babo singi Acejiyame täápume, weene page liiyepu.

⁴ Cane cuta niija jaawenemune ngälu budre me biname bine, lui cina ai Gaabe cabu waatnininusi. Cane magebi piyepu rooriye bine ewademujine krokeciye mete cabu me.

⁵ Iiwäreja mope biname piyepu iyeta mutre biname teepi ibibi gemi ire arbime egä cäme mene toraca gyene. Cane teeme bau ca peba bine jepänemujine Damaseko je lui Israela biname bime bau me waadename, naace täápume puma Keriso lui cina jäätrungusi, pui bine oomlemame. Cane piyeme ädujine teebibine oomläjecame, ayana seea cama Yerusalema me awecname mäpu daremu päpäname teeme mara ätrunga täápume.”

Paulo Jejemige Tabe Lipu Äbitige Ätrunga Biname me

⁶ “Yoo, cane liba gaabe cabu ädenujine, Damaseko cewe me mameta atyaramta, piba taatu bimü duusa padare cabu, babo apacylera te dume cabu ca tuungepmaluji cäme gome.

⁷ Cane natramuji gawe me, siige tagepogogo te cebine najuji egä, ‘Saulo, Saulo! Maane ngenome cebine mäpu näcäranenite?’

⁸ Cane itemlu-jine, ‘Babo biname, maane laasi näte?’ Tabe najuji egä, ‘Cane Yeesu Nasareta ceweyame gäne, maane lui ne mäpu näcäranenite.’

⁹ Lui biname cane cama secluji, apacylera te jepänujisi, yepä teepi lica itecijemuji peei tagepogogo lui te mene cebine najanuji.

¹⁰ Puma cita ca cane itemlujine egä, ‘Babo Biname, cane ngena jewenenine?’ Yageyame piba cebine najuji egä, ‘Arpinanti, ädi Damaseko cewe cabu me. Puma yepä biname te meebine iyeta gwidape pa naajepi Acejiyame lui ituge jaji maane te wawename.’

¹¹ Pui babo apacylera name pi cane äbicäco ge pui padare cabu gwidape päpäna. Cane cama lui biname cina cebine ime ca nacanujisi Damaseko cewe cabu me.

¹² Yoo, puga ge Damaseko cewe je yepä biname, teeme ngii Ananiya. Tabe mime cotre bine cängenarage jaawenemuge. Tabe baborage ge Damaseko cewe Israela biname bime ngene atwanena cabu.

¹³ Tabe cäme bau me täduji, cäme gome jeclajutuji, najuji egä, ‘Cäme biname Saulo, maane irecu ca jepänil!’ Piba taatu cane müiji ge teebine päpäname.

¹⁴ Tabe najuji egä, ‘Acejiyame lui bau me mime kaakesaare cina irecu lätumutanininusi, meebine ituge jaji teeme singi poto cidi me umle äbitame, teeme Conocäco Kaakesea Biname ne päpäname, piyepu teemerge tagepogogo mene ätecijame.’

¹⁵ Maane peei name pi ire arbi biname me pa päbitepi teeme täápume iyeta biname bine jajime, maane ngena itu tepänumete piyepu näätecijumi.

¹⁶ Siige, maane ngena täápume jewagrijenite? Arpinanti, niije ca äciseja ne ecati teeme ngii cabu mäame niija mule äyebingtame, maane liba Yageyame me ngii ne yaawejanute.”

Acejiyame Paulo ne Jejige Nuuja Gawe Biname bime bau Otnime

¹⁷ “Yoo, cane Yerusalema me acnenutujine, egäcäro iiwäreja mete cabu irecu ätumutujine, piba wama pana jepänujine Yageyame ne.

¹⁸ Tabe cebine najuji egä, 'Wata Yerusalemä ne page sebmali, ingle naace popi ama biname cina lica pa yaacatepesi mäáme aitneja mene căme poto cidi me.'

¹⁹ Cane teebine jejujine, 'Yageyame, teepi umlerage gemi egä cane cime Israela biname bime abasecretna mete cabu ta waatnetnäjune, meebine lui cina näätrungusi, teebibine joomläjecomune, yaaglecimune.

²⁰ Piiyepu, mäáme miiji aitneja biname Setepano ne liba budre me jewenujisi, cane puga ge, "yoo" mene jajime teebine budre me acitame, teeme cubuyame bime căbletääpe bine cane ire jetwemujine.'

²¹ Piba Yageyame cebine najuji egä, 'Äte, ädi, cane meebine cudecewe me pa näätyepepene biname bime bau me lui cina Israela biname lica gemi.'

²² Siige, biname cina Paulo ne jitecjanisi ngälu tabe peei mene jicige, yepä teepi piba gije abacitinisi ala cama mene me egä, "Iyebtingteye! Egleye budre me! Miiji lica tabe ireclota me lenaja!"

²³ Teepi ala abayaninisi, căbletääpe bine ewewutäjemisi, piiyepu secre bine cabu me eyäremisi.

²⁴ Siige, pui cubu mopeyame te piba mene jejemige teeme biname bine Paulo ne acaname cubu biname bime kokre mete cabu me. Tabe teebibine jejemige Paulo ne adnaname teeme bau ca umle pöpäname Israela biname cina ngena täápume ala abayaninisi teeme poto cidi me.

²⁵ Yepä, teepi liga teebine jetäjisi adnaname, Paulo puma cita ca jejige yepä cubu babo biname ne, lui te teeme gome aclajuteji ge egä, "Nää, cotre lica gyene weene Rooma ngii cama biname ne adnaname, teebine liba căro camuge atrana teeme mule täápume?"

²⁶ Cubu babo biname te liba peei mene itecijige, tabe teeme mopeyame bau me ädige, teebine itemlige egä, "Maane ngena jewenenite? Tabe lui Rooma ngii cama biname gyene!"

²⁷ Puma cita ca pui cubu mopeyame te Paulo bau me ädige, itemlige egä, "Maane naji, nää maane Rooma ngii cama biname gäte?"

Paulo jejige egä, "Yoo!"

²⁸ Cubu mopeyame te piba jejige, "Cane babo rarekaake itu ecärujine Rooma ngii cama biname me äbitame."

Paulo jejige egä, "Yepä, cane Rooma ngii cama aplimlujine."

²⁹ Cubu biname lui cina singi Paulo ne mene me wawename, teepi piba taatu teeme bau ca äyebtingige. Siige, cubu mopeyame wälu te joomlige liba umle äbitige egä Paulo Rooma ngii cama biname enajenige, piiyepu tabe ayana seea ca teebine bii besigrige.

Paulo Jeclajutige Israela Mutre Biname Tomi cabu je

³⁰ Cubu mopeyame te singi toraca umle äbitame ngena niija täápume Israela biname cina Paulo ne jeitnäjisi. Tabe peei name pi nuuja bimubabu biname bine jejemige Paulo ne iibirame. Tabe jejemige modamoda iiwäreja biname piiyepu iyeta Israela mutre biname abasecretname. Tabe piba Paulo ne ecanige teeme opo gaabe aclajutame.

23

¹ Paulo conocăco ire acitige pui Israela mutre biname bime bau me, teebibine jejemige egä, "Căme binamewale, cane ngena ca begline egä căme mule lui conocăco gyene, ingle iyeta padare cane căngenarage watnetnäjenune Acejiyame me opo gaabe je ngälu page."

² Siige, puma cita ca iiwäreja mope biname ngii Ananiya tabe Paulo me mameta lui biname bine jejemige teebine tage ayemeltame.

³ Siige, Paulo teebine jejige egä, "Meebine Acejiyame pa naayemaltep! Maane peema adnatenite cebine cotre ibi atraname, yepä maane määmämu peei cotre ne jetropangtite, maane mene liba jejite cebine ayemeltame! Maane epu pana gäte bulubulu atreji liiyepu, biname te lui ne yaaganuge jugijugi ne acwabame, yepä pui jugi cerămu pisi nyene sungabe je."

⁴ Siige, Paulo gome biname cina teebine jejisi, "Maane jicnecite Acejiyame me iiwäreja mope biname ne!"

⁵ Paulo jejemige egä, "Căme binamewale, cane umle lica ge egä tabe iiwäreja mope biname gyene. Oogărăneji Mene te jicenige egä, 'Gone niija mene jicute mäáme biname bime mopeyame poto cidi me.'

⁶ Yoo, Paulo liba ngena ca eglige egä pui mutre biname tomi cabu poto lui Sadukea sigu biname ge, piiyepu nuuja poto lui Parisea sigu biname ge, tabe piba babo tage ca jejemige teebibine egä, "Căme binamewale, cane Pariseayame gäne piiyepu Parisea biname bime băgră gäne. Cebine nacanisi weeme bau me atraname, ingle naace gyene căme ngena atwanena pisi nyene egä budre biname cina cirege arpinera ireclota täápume!"

⁷ Tabe liba peei mene jiiçige, piba Parisea sigu piiyepu Sadukea sigu biname cina gjie abacitinisi mene abajame. Pui mutre biname cina neenedi sigu äbitininisi.

⁸ Yoo, Sadukea sigu biname cina apu jiiçusi egä budre biname lica cirege budre cabu ca arpinera, piiyepu teepi jiiçusi egä Acejiyame me mename seemo piiyepu iyeta poto seemo toraca lica gemi, yepä Parisea sigu biname cina iyeta peei gwidape bine jitrungemisi.

⁹ Teeme guugla te baborage me äbitige, siige poto cotre abiberäja biname lui cina Parisea sigu biname ge, teepi abujängige, kokre cama peei mene ne jisädanemisi egä, "Cine äblicäco nuuja niija päpäna ai biname cabu. Pama toraca gyene egä mename seemo te coo nuuja seemo te mene tejumi teebine."

¹⁰ Siige, mene äsädena te epu babo me äbitige egä cubu mopeyame wälu äbitige egä biname cina pama Paulo ne piicwapi-cwa jaawenusi. Tabe peei name pi teeme cubu biname bine pui mutre biname bime tomi cabu me jityepemige Paulo ne teeme bau ca asatame, teebine cääri acaname cubu biname bime kokre mete cabu me.

¹¹ Nuuja ciye Yageyame te Paulo gome jecajutige, teebine jejige egä, "Wälu gone! Maane cebine lipu ituge aйна Yerusalema je, maane miiji cuta cebine pepu aitname Rooma babo cewe je."

Israela Biname cina Gläamu Jicrajige Paulo ne Aglime

¹² Nuuja krokerage poto Israela biname cina abasecretnige, gläamu jicrajige. Teepi mene yepä gome ecitisi Acejiyame me opo gaabe je egä teepi deedei lica äbita piiyepu niije lica nänäja, ngälu liba Paulo ne pa yaaglepesi.

¹³ Teepi iyeta footi biname cuta cerämu, lui cina icrajige peei gläamu cabu.

¹⁴ Teepi piba eclige modamoda iiwäreja biname piiyepu nuuja modamoda biname bime bau me, teebibine jejemisi egä, "Cine mene Acejiyame me opo gaabe jejisi egä cine deedei lica äbita, ngälu cine Paulo ne liba pa yaaglepesi.

¹⁵ Yoo, weene piiyepu iyeta lui cina mutre biname tomi cabu, weene mene jityepepeye peei cubu mopeyame bau me tabe Paulo ne ätyepame weeme bau me, epu tääpume egä weene singi gemi cängena umle äbitame teeme poto cidi me. Cine pa lamacetnäjpago teebine gaabegabe aglime budre me."

¹⁶ Yepä, Paulo me ngango bägrä te ai gläamu mene itecijige. Tabe piba ädige cubu biname bime kokre mete me, Paulo ne pui mene jejige.

¹⁷ Puma cita ca Paulo ala tesoglicige yepä cubu babo biname ne, jejige teebine egä, "Ecani mopeyame bau me ai mamye biname ne. Teeme mene pisi nyene jajime."

¹⁸ Siige, pui yepä hanred cubu biname bime babo biname te teebine ecanige teeme mopeyame bau me, jejige egä, "Ama lui krokeciye mete biname ngii Paulo, tabe cebine nätemlige ai mamye biname ne mäame bau acaname, inge teeme mene pisi nyene meebine jajime."

¹⁹ Siige, cubu mope biname te teebine ime joomlige, ecanige teeme taatu puupu me, piba itemlige egä, "Maane cebine ngena mene tääpu mäte singi jajime?"

²⁰ Tabe jejige egä, "Israela modamoda biname cina mene yepä cabu becitisi. Ciiyeciye teepi meebine näätinärenisi Paulo ne cääri acaname Israela mutre biname tomi cabu me, epu tääpume egä teepi singi gemi teeme poto cidi me cerämu cängena umle äbitame.

²¹ Yepä, gone jäatecijemute, inge naace popi footi biname, cerämu poto piti nemi, teepi ämletnäreji icrajenige, Paulo ne jewagrijenisi. Teepi gläamu bii jicrajige deedei lica äbita piiyepu niije lica nänäja, ngälu teepi liba Paulo ne pa yaaglepesi. Teepi amacetnäjäneji gemi peei ne wawename, yepä mäame mene ne jewagrijenisi."

²² Siige, cubu mope biname te piba pui mamye biname ne jejige, "Gone nuuja biname ne jaajute maane lui mene bii tiicite cäme bau." Siige, pui mamye biname ne jityepige.

Paulo ne Jityepige Yuudea Probins Mopeyame Peliki bau me

²³ Puma cita ca cubu mope biname te ala taasoglicige teeme neenedi cubu sigu babo biname bine, teebibine jaajige egä, "Weene jejemepeye neenedi hanred cubu biname bine, piiyepu sebenti cubu biname bine cooso cama, cuta piiyepu neenedi hanred cubu biname bine kalaku cama, teepi Kesarea cewe me otnime. Amacetnäjineye, weene nain oklok ciye abyemerame.

²⁴ Cooso bine cuta ewadeniye Paulo me otni tääpume, teebine cängena ecaneye Mope Biname Peliki bau me."

²⁵ Cubu mope biname te piba apu mene yoogäriige:

²⁶ "Sebore, Yuudea Probins Mope Biname Peliki!

Cubu mope biname Klaudiyus-Lusiyus, cane mäame bau me yoogärenine.

²⁷ Israela biname cina ai biname ne toomlumesi, piiyepu mameta ge teebine budre me agli. Cane umle täbitumene egä tabe Rooma ngii cama enajenige. Siige cane peei name pi cäme cubu biname cama tädumene, teebine teeme bau ca sewepläcitumene.

²⁸ Yoo, cane singi ge umle äbitame, teepi ngenome tiicetnumesi teebine, cane peei name pi secanumene teeme Israela mutre biname tomi cabu me.

²⁹ Cane puga umle täbitumene egä tabe nuuja niija mule lica itu jaawenepi lui täápume budre me wawename, coo krokeciye mete me acitame. Teepi teebine tiicetnumesi teemerage cotre atropengta poto cidi me.

³⁰ Siige, cane liba umle äbitine egä poto Israela biname cina singi Paulo ne ngatna wawena budre me, cane piba ngene jotwanine teebine wata mäáme bau ätyepame. Cane teeme iicetna biname bine jejemine mäáme opo gaabe teeme mene iicemame. Siige.”

³¹ Cubu biname cina teeme mopeyame me mene jewenisi. Teepi pui ciye cabu Paulo ne ecanisi cewe ngii Antipatiri me.

³² Nuuja bimu lui cubu biname cina ernge ta waatninusi, teepi äcnärige cubu biname bime kokre mete me. Teepi cooso cama lui cubu biname bine sebmalemisi Paulo ne piyeme acaname.

³³ Teepi teebine ecanisi Kesarea cewe me, puma pui Mopeyame ne peba ecärisi, piba Paulo ne ecitisi teeme ime cabu.

³⁴ Siige, Peei Mopeyame te peba cabu lui mene bine ecnemige, piba Paulo ne itemlige egä, “Maane ngena probins cabu ca gäte?” Tabe liba umle äbitige egä Paulo lui Kilikiya probins cabu ca ge, tabe jejige egä,

³⁵ “Cane mäáme mene pa näätəcijepene, mäáme iicetna biname cina liba pa tatyarepi.” Tabe piba poto cubu biname bine mene jejemige Paulo ne awamutame Mopeyame Heroda me babo mete cabu.

24

Israela Biname cina Paulo ne Jeitnäjisi

¹ Faib bimu ingwe ca iiwäreja mope biname Ananiya atyaramtige Kesarea cewe je, poto modamoda biname cama piyepu teeme mene iicema biname, ngii Teretulus. Teepi Mopeyame Peliki me opo gaabe jeclajutemige Paulo ne aitnejame.

² Mopeyame te piba Paulo ne tesoglicige teeme bau otnime, puma cita ca Teretulus te gije abacitige Paulo ne aitnejame egä,

“Babo Biname Peliki, cine poode cama ninajininige leca padare mäáme miijirage ire atwi name pi, cuta piyepu weene poto cotre bine cängena itu yaamacetnäjemepeye cime gawecewe miiji täápume.

³ Cine singi pepu miiji mule täápume iyeta padare cabu iyeta poto ta, peei name pi baborage eso!

⁴ Yoo, cane singi lica mäáme babo padare acata, peei name pi cane näätlemenine cime matikolä mene cängena ätecijame.

⁵ Cine umle äbitinago egä ai biname te niija mule jaawenuge ai gawecewe täápume. Tabe Israela biname bine claabe me jaawenemuge iyeta maramara gawe cabu ta. Tabe mopeyame gyene Nasareta sigu biname täápume,

⁶ piyepu tabe liga tapicetnärumi iiwäreja mete ne sabe wawename, siige cine piba teebine toomlumesi. Yoo, cine singi ge teebine atraname cimerage cotre ibibi,

⁷ yepä cubu mopeyame Lusiyus piba tädumi, babo drowä cama teebine secatumi cime bau ca.

⁸ Lusiyus puma cita ca mene tiicummi egä aitneja biname cina miiji mäáme opo gaabe me otnime. Maane liba ai biname ne yäätəmläjute, maane teeme bau ca piba umle päbitepi iyeta gwidape poto cidi me, cine lui täápume jeitnäjenisi.”

⁹ Yoo, Teretulus me mene liba siige, pui Israela biname cina piba jejisi egä iyeta pui aitneja mene lui toraca ge.

Paulo Mene Jiicige Peliki me Opo Gaabe je

¹⁰ Probins Mopeyame Peliki puma cita ca Paulo ne ime ca jewenige mene me. Paulo piba jejige egä,

“Babo Biname Peliki, cane umle gäne egä maane ai gawe biname bine jaatranemute bucurage kämage cama. Cane peei name pi ngenecu miiji gäne cämämu aitname mäáme opo gaabe.

¹¹ Maane liba singi, maane ibibi gäte umle äbitame egä twelb bimu ingwe gaabe ca, cane piba itu lädepene Yerusalema me puma iiwäreja mete cabu irecu ätumutame.

¹² Cane liba iiwäreja mete cabu jage, Israela biname cina lica puma itu näpänepesi nuuja biname cama äcela je, piyepu cuta lica itu näpänepesi biname bine giri acrana cabu Israela biname bime abasecretna mete cabu ta coo cewe nuuja poto ta,

¹³ piyepu teepi äblicäco gemi teeme pui aitneja mene ne toraca me wawena.

¹⁴ Yoo, page cane mäame bau me cämämu aitenenine. Cane cime kaakesaare bime Acejiyame ne mara mule ca yaawejanune, teepi lui mule ne yaainusi egä toraca mule lica gyene. Yepä, cane cuta iyeta Oogäräneji Mene jäätrungemune, lui pisi nyene Cotre Mene ngalebora piyepu sasa mename biname bime oogäräneji mene ngalebora.

¹⁵ Cane piyepu iyeta nuuja Parisea biname cine Acejiyame me padare ne jewagrijenisi, lui padare cabu iyeta miiji mule biname piyepu iyeta niiya mule biname piba budre cabu ca cirege arpinera.

¹⁶ Cane pui name pi cängenarage nanajuge cämämu conocäco me ngene ca agli biname bime opo gaabe piyepu Acejiyame me opo gaabe je.

¹⁷ Cane nesae kämäge cama Yerusalema ca itu äyebtingujine. Cema cane piyeme cääri lädepene poto rarekaake cäme binamewale bime bau me waadename, cuta piyepu Acejiyame ne iiwärejame.

¹⁸ Ai neeneni mule bine liba jaawenepene, teepi cebine näpänepesi iiwäreja mete cabu. Cane niinäce kälyä läbitene iyeta cudege gwidape cabu ca, ingwe ca piba Acejiyame me mete puupu cabu me labacitene. Biname tomi lica ge cäme gome, cuta piyepu guugla lica ge piba.

¹⁹ Yepä, puga ge poto Israela biname Asiya probins cabu ca. Teepi teemämu mäame opo gaabe cire saacleji, teeme liba pisi nyene mene cebine aitnejame.

²⁰ Co, age temi lui biname, teepi miiji jüicesi teepi ngena conocono ne cäme cabu tepänumesi, cane liba naclajutumi atrana täapume pui mutre biname tomi cabu je.

²¹ Co, pama teeme täapume conocono gyene pui yepä mene babo tage ca lui tiicumene, cane liba teeme opo gaabe naclajutumi. Agesa pui mene: 'Cebine nacanisi weeme bau atraname, ingle naace gyene cane jitrungenine egä budre biname cirege arpinera ireclota täapume.' "

²² Siige, Peliki lui te cängena umle ge ätrunga gaabe poto cidi me, tabe piba peei atrana padare ne epirige. Tabe pui Israela modamoda biname bine jejemige egä, "Cane ingwe ca atrana pagege weeme poto cidi me, cubu mopeyame Lusiyus te liba pa tatyaramtepi."

²³ Siige, tabe mene yepä cubu babo biname ne jejige Paulo ne awamutame, yepä Paulo miiji ge asatame abacitame pui mete cabu, piyepu teeme binamewale miiji ge teeme singi gwidape teebine ceerame.

Paulo Jeclajutige Peliki naabi Drusila Teeme Opo Gaabe je

²⁴ Poto bimu ingwe ca Peliki coga cama taaclige. Teeme coga, ngii Drusila, lui Israela magebi gwene. Mopeyame Peliki Paulo ne tesoglicige, teeme mene jiteciijige Yeesu Keriso ne ätrunga poto cidi me.

²⁵ Yepä, Paulo liba teebibine mene jaajanige conocäco mule poto cidi me, piyepu täape singisingi abmala poto cidi me, cuta piyepu atrana bimu poto cidi me, lui te cirege otni, Peliki wälu te piba joomlige, tabe Paulo ne jejige, "Siige, page ai padare cabu maane cibibine nibmali! Cane liba miiji padare ne pa jääpänepene, cane piba cääri pa naasoglecepene."

²⁶ Yoo, Peliki apu jengenige egä, "Paulo pama rarekaake cebine näcärenige teeme asata täapume." Tabe peei name pi poto padare Paulo ne taasoglicige ten cama mene abaitname.

²⁷ Neeneni kämäge ingwe ca, kirece biname teeme ngii Porokiyo-Peesto, tabe Peliki me puupu jecatige Probins Mope biname täapume. Peliki liba äyebtingtipe puma cita ca, tabe Paulo ne sebmaliige puga awamuta biname cama krokeciye mete cabu, ingle naace popi tabe singi Israela biname bine ngenecu miiji me wawenname teeme poto cidi me.

25

Paulo Singi Rooma Babo Mope Biname te Teebine Atraname

¹ Peesto atyaramtipe peei probins ngalebora, piba nesae bimu ingwe ca ädige Kesarea ca Yerusalema me.

² Puga modamoda iiwäreja biname piyepu Israela mutre biname cina kirece Mopeyame Peesto bau eclige Paulo ne aitnejame. Teepi mene itu titranumesi Paulo ne gaabegabe aglime, peei name pi teepi Peesto ne itemlisi

³ teeme singi wawenname egä Paulo ne awecnistame Yerusalema me.

⁴ Peesto jejemige egä, "Paulo ne jewamutenisi krokeciye mete bora Kesarea je. Cane mameta gäne acnenuta piyeme.

⁵ Weene miiji ge weeme poto mutre biname cane cama ätyepame Kesarea me puma Paulo ne aitnejame, tabe liba niyaniya mule ituge wawena."

⁶ Peesto Yerusalema je enajige cerämu eit coo ten bimu cama, piba acnenutige Kesarea me. Nuuja bimu tabe adnatige atrana puupu cabu, mene jejemige Paulo ne teeme bau acaname.

⁷ Paulo liba puma atyaramtige, Yerusalema ca lui Israela biname cina seclumi, teepi teeme gome jeclajutemige, gije abacitinisi mäpu mene iicemame Paulo poto cidi me, yepä teepi äblicäco ge teeme mene awaba egä toraca gyene.

⁸ Siige, Paulo piba teemämu aitänjige egä, “Cane nuuja niiya lica ituge wawena Israela biname bime cotre poto cidi me, cuta piyepu nuuja niiya ne lica ituge wawena iiwäreja mete täápume, cuta piyepu Rooma Babo Mope Biname täápume.”

⁹ Siige, Peesto singi Israela biname cina ngenecu miiji äbitame teeme poto cidi me, peei name pi Paulo ne itemlige egä, “Nää, maane singi gäte Yerusalema me otni, puma căme opo gaabe meebine atraname ai biname bime aitäneja mene poto cidi me?”

¹⁰ Paulo jejige, “Cane page naclajutenige Rooma Babo Mope Biname bime yepä atrana puupu cabu, lui cabu cebine miiji pa natranepeye. Cane nuuja niiya lica ituge wawena Israela biname bine. Maane peei umlerage gäte!

¹¹ Cane liba cotre ne jaatropangtune niiya mule wawename, cuta pui niiya mule cabu ca cane liba ibibi ge budre daremu päpäname, cane piba singi lica uucraname. Yepä, teeme aitna mene toraca lica gyene, peei name pi nuuja biname te lica cebine pa nacitepi teeme ime cabu. Cane singi gäne Rooma Babo Mope Biname te cebine atraname.”

¹² Siige, Peesto teeme atrana ätityera biname cama mene ajanininisi, piba Paulo ne jejige egä, “Maane singi gäte Babo Mope Biname te meebine atraname, yoo siige, maane Babo Mope Biname bau pa ädepi.”

Paulo Jeclajutige Agripa naabi Berenike bime Opo Gaabe

¹³ Poto bimu ingwe ca Israela biname bime mopeyame Agripa piyepu teeme ngule Berenike teepi Kesarea me taaclige peei probins me kirece mopeyame Peesto ne ängrärame.

¹⁴ Teepi nesae bimu icrajige, piba Peesto Paulo poto cidi me mene jejanige Agripa ne egä, “Ama pisi nyene yepä biname Peliki lui ne saabmalepi awamuta biname cama, tabe liba ama cita ca läyebtingtepi.

¹⁵ Cane liba Yerusalema me itu lädepene, Israela modamoda iiwäreja biname piyepu teeme nuuja modamoda biname cina teebine jaaitnäjepesi, nätemlepesi cane teebine mäpu cabu acitame.

¹⁶ Yepä, cane teebibine jaajemepene egä cime Rooma biname bime mule lica gyene, biname ne teeme aitäneja biname bime ime cabu papa acitame, yepä niinäce tabe miiji teeme aitäneja biname cama opopa ayi piyepu padare päpäna teemämu aitäname.

¹⁷ Yoo, teepi liba aima cane ama saaclepi, cane padare ne papa lica yaapirepene, yepä nuuja bimu cabu atrana puupu cabu ladnatepene, mene jaajemepene Paulo ne acaname.

¹⁸ Siige, teeme aitäna biname cina piba jaaclajutemepi mene me, yepä teepi epu niyarage mule poto cidi me lica jaaitnepesi. cane lipu nangenepi.

¹⁹ Iyeta teeme aitäna lui äciseräja mene teemerage iiwäreja mule poto cidi me piyepu yepä biname ngii Yeesu poto cidi me, lui budre ge, yepä Paulo jüicenige egä tabe ireclota gyene.

²⁰ Cane liba umle lica gäne lipu umle mene päpäname peei poto cidi me, cane piba Paulo ne yäätlemepene tabe lipu gyene Yerusalema me otnime puma atraname teebine teeme aitäneja poto cidi me.

²¹ Yepä, Paulo singi lica ge. Tabe cebine nätemlepi awamuta täápume cuta Rooma Babo Mope Biname te teebine atraname. Siige, cane peei name pi mene jaajemepene teebine awamutame ngälu gaabe ne liba päpäna teebine Babo Mope Biname bau me ätyepame.”

²² Siige, Agripa te Peesto ne jejige egä, “Cane singi gäne ätecijame ai biname me mene.”

Peesto jejige egä, “Yoo, ciyeciye maane pa näätacijepi.”

²³ Nuuja bimu Agripa naabi Berenike mage awamla cama aaclige, babo abasecretna puupu me abacitäsi; cubu modamoda biname piyepu cewe modamoda biname ten cama ge. Peesto piba mene ecäremige Paulo ne äsinglentame.

²⁴ Peesto jejemige egä, “Israela biname bime mopeyame Agripa piyepu iyeta lui cina cine cama tabasecretnininiye, weene ai biname ne jepäneye. Ama iyeta Israela biname cuta piyepu Yerusalema je iyeta Israela biname, teepi aitäna mene căme bau itu saawadepesi ai biname poto cidi me. Teepi cuta ala cama mene jüicanemepesi teebine budre me wawename.

²⁵ Yepä, cane jääpänepene egä tabe nuuja niiya mule lica ituge wawena lui täápume teebine budre me agli. Siige, tabe cebine nätemlepi Rooma Babo Mope Biname bau otnime, peei ingle pi cane ngene jotwanine piyeme ätyepame.

²⁶ Yepä, căme nuuja cängengarage mene lica gyene teeme poto cidi me Rooma Babo Mope Biname bau me oogärame. Cane peei name pi teebine secanenine weeme bau me, piyepu toraca määme bau me, Agripa, teeme mene ätecijame, pipu pi mene pisi nyene ingwe ca oogärame,

²⁷ Ingle naace gyene cane äblicäco biname ne papa ätyepa, liba peba mene lica ge teeme aitra poto cidi me.”

26

Paulo Teemämu Aitnige Agripa bau me

¹ Agripa te Paulo ne mene jejige egä, “Yoo, maane miiji määme poto cidi me mene iicana.” Paulo piba ime uutige, gije abacitige teemämu aitnejame egä:

² “Agripa Mopeyame, page babo miijirage gyene cäme täápume egä cane määme obo gaabe je naclajutenige cäme ngii cängena wawename Israela biname bime aitneja poto cidi me,

³ Ingle naace popi maane babo umle gäte Israela biname bime mule piyepu teeme äciseräja mene poto cidi me. Peei name pi cane meebine näätelenine cäme mene cängenarage ätecijame.

⁴ Iyeta Israela biname umle gemi cäme ireclota lipu ge matikolä bāgrä cabu ca. Teepi umle gemi cane lipu nanajuji niinäce cäme gawecewe cabu cuta piyepu ingwe ca Yerusalemaja je.

⁵ Teepi sasa cabu ca umle gemi cane, siige teepi liba singi gemi, teepi miiji gemi aitname egä cane lipu niinäce cabu ca yepä sigu cabu nanajuji, lui Parisea sigu biname cina Acejiyame ne yaawejanusu mäpu cotre mule ca.

⁶ Yoo, page cane naclajutenige atrana täápume, inge cane ngenen atwana ne ecitenine peei mene cabu Acejiyame cime kaakesaare bine lui mene itu jejemuji.

⁷ Yoo, cime biname lui iyeta twelb inge cabu ca gemi, teepi liba Acejiyame ne ciye bimu yaawejanusu, teepi cuta jaawagrijuusi peei jajeji mule ne päpäname. Yoo, Mopeyame, cäme peei ngenen atwana name pi Israela biname cina cebine naitnenisi.

⁸ Nää, weene ngena name pi äblicäco gemi ätrunga egä Acejiyame te biname bine budre cabu ca cire jaarpinäremepi?

⁹ Yoo, cane cuta piyepu apu nanguji egä cane miiji iyeta gwidape wawena Yeesu Nasareta ceweyame me ngii ne äyebtingame.

¹⁰ Cane pepu jewenanujine Yerusalemaja je. Cane mene ecanujine modamoda iiwäreja biname bime bau ca, bucurage Acejiyame me biname bine icranemujine krokeciye mete cabu me. Ingwe ca biname liba singi ge teebibine budre me acraname, cane cuta singi ge teepi budre me.

¹¹ Bucurage padare cane teebibine mäpu cabu yaacranune iyeta Israela biname bime abasecretna mete cabu ta. Cane pepu pi singi teebibine giri acraname teeme mara ätrunga mule ne abmalame. Yoo, cane epu mage claabe teeme täápume egä cane nuuja gawe biname bime cewe cabu ta otunujine teebibine mäpu cabu acraname.”

Paulo Jejemige Tabe Lipu Ätrungayame me Äbituji

¹² “Cane peei name pi Damaseko me ädujine modamoda iiwäreja biname bime peba mene cama.

¹³ Yoo, Mopeyame, bimu duusa gaabe cabu jage, cane apaclyera ne jepänujine lui baborage ge bimu cabu ca, dume cabu tuungepmaluji cäme gome piyepu teeme gome lui cina cane cama secluji.

¹⁴ Cine iyeta gawe me nitramitnimuji. Cane tagepogogo nätecijuji, Heberu mene ca lui najuji egä, ‘Saulo, Saulo! Maane ngenome cebine mäpu näcäranenite? Maane määmämu niija cabu äbitenite peei mule cabu ca, inge maane toraca gaabe ne jigyenite, nuuja gaabe cabu otnenite.’

¹⁵ Cane puma cita ca itemlujine egä, ‘Babo Biname, maane laasi näte?’ Yageyame te najuji egä, ‘Cane Yeesu säne, maane lui ne mäpu näcäranenite.’

¹⁶ Maane abujängti, ernge ca naaclajutege. Cane määme bau baboclomtine meebine jajime cäme kaakesea biname me äbitame. Maane biname bine cire jejanemepi, maane ngena page bii jepänite cäme poto cidi me, piyepu ciige cane ngena cire nawabepene.

¹⁷ Cane määme Israela biname bime ime cabu ca, cane lui biname bime bau me cire näätyepene.

¹⁸ Maane teeme irecu cire jiiñnemepi, teebibine etatrongäremepi krokeciye cabu ca apaclyera cabu me, cuta piyepu etatrongäremepi Satani me kokre cabu ca Acejiyame bau me. Pipu pi teeme cäme bau ätrunga name pi, teepi teeme niija mule cabu ca cire läsecräripesi, teepi puupu ne piba cire jääpänesipi Acejiyame me miiji biname cama.’ ”

Paulo Teebibine Cuta Jejemige Teeme Kaakesea poto cidi me

¹⁹ “Yoo, Agripa Mopeyame, cane lica ibwärujine ätecijame cäme Babo Biname cabucewe ca lui mene seboclomtuji.

²⁰ Yepä, cane mene jii cemune niinäce Damaseko je, puma cita ca Yerusalem je, puma cita ca iyeta Israela biname bime gawe cabu ta, piba cuta piiyepu nuuja gawe biname bime bau me. Cane apu jii cemune egä, 'Weeme niiya mule ebmalemepeye, Acejiyame bau me atatröngäripeye. Piba miiji mule jewenemepeye awabudnitame egä weene niiya mule bine ituge abmala.'

²¹ Peei mene pi Israela biname cina cebine itu noomlepesi, cane liba iiwäreja mete cabu jage, siige läbitipesi cebine aglime.

²² Yepä, iyeta padare ngälu page ai bimu Acejiyame cebine nätiyärüge. Pipu pi cane page naclajutenige toraca mene iyeta biname bine jajanename, matimati biname cuta piiyepu modamoda biname. Piiyepu cane nuuja mene lica jijenininine, yepä pui mene taatu Moose piiyepu mename biname cina lui poto cidi me jii cemujisi egä toraca me cirege äbita.

²³ Peei mene apu egä, 'Israela biname bime niiya cabu ca äsecrera biname te miiji mäpu päpäna, budre äbita, siige niinäce me cirege äbita budre cabu ca arpinentame, mene iicemame piiyepu ireclota gaabe pepu apaclyerame Israela biname bime täápume piiyepu nuuja gawe biname bime täápume.'

²⁴ Siige, Paulo liba pepu teemämu aitränäjige, Probins Mopeyame Peesto babo tage ca jejige, "Paulo, maane buduma gäte; mäáme oräre abiberäja te buduma me naawenige!"

²⁵ Paulo jejige egä, "Mopeyame, cane buduma lica gäne. Cane toraca mene miiji ngene atwana cama jii cemene.

²⁶ Yoo, Agripa Mopeyame, cane wälu lica gäne ai mene meebine jajime, ingle maane umle gäte ai mule poto cidi me, ingle naace gyene ai mule ämlitäneji lica gyene, yepä biname bime sobe cabu wawenäneji ge.

²⁷ Agripa Mopeyame, nää maane Acejiyame me sasa mename biname bime mene jitrungenemite? Cane umle gäne, maane peei ne jewenenite!"

²⁸ Siige, Agripa Paulo ne jejige, "Nää, maane apu naangeneniige egä ai matikolä padare cabu cebine Yeesu Keriso me biname me nawenenite?"

²⁹ Paulo jejige egä, "Ngänu gyene liba matikolä padare coo leca padare, cane Acejiyame ne ewejanenine egä maane piiyepu weene iyeta lui cina page cebine nätecijeniye, weene cäme pana ätrunga-yame me äbitame, yepä cane singi lica weeme täápume ai ayana seea!"

³⁰ Mene liba siige, Mopeyame Peesto, Mopeyame Agripa, Berenike, piiyepu iyeta cina abujängige.

³¹ Teepi liba abyemäriige, teemeteme ajananinisi egä, "Ai biname nuuja niiya lica ituge wawena lui daremu me teebine miiji budre me acita coo krokeciye mete me äsinglenta."

³² Puma cita ca Agripa te Peesto ne jejige egä, "Ai biname cire lasateji, yepä tabe Rooma Babo Mope Biname bau me otnime meebine itu näätlempli."

27

Paulo Poo Gaabe Ädige Rooma me

¹ Teepi mene liba jitränisi egä cine Rooma cewe Italiya gawe me poo gaabe pa naclepi, piba Paulo piiyepu poto nuuja krokeciye mete biname bine yepä biname, ngii Juliyo, me ime cabu icranemisi. Yoo, Juliyo lui cubu babo biname ge yepä hanred cubu biname teeme sigu täápume, peei sigu lui ne yaainusi 'Rooma Babo Mope Biname me Sigu' ca.

² Siige, cine Kesarea cewe cabu ca babo poo cabu me acetnärinago, lui poo ne Adramutiye cewe cabu ca emegisi otnime poto malu cewe me Asiya probins ngalebora. Siige, cine abyemärinago. Yoo, cine cama puga ge poo cabu yepä Makedoniya gawe biname Tesalonika cewe cabu ca, teeme ngii Aristakus.

³ Siige, nuuja bimu cine Sidona cewe je atyarinago. Cubu babo biname Juliyo owecu ge Paulo täápume, teebine jejige egä tabe otnime teeme binamewale ädärume gaabegabe deedei waadename teeme bau ca.

⁴ Siige, cine puma cita ca malurage naclige, piba Kupro curä uuwa cabu naclige, ingle opopo buuwe te kokrerage tipwäjige.

⁵ Cine Kupro ca malu ne yuurisi Kilikiya piiyepu Pampuliya gawe mameta me, siige Muura cewe me atyarinago lui Lukiya gawe cabu je.

⁶ Puga cubu babo biname Juliyo nuuja poo ne jepänige Aleksandriya cewe cabu ca, lui poo te äbiteniige Italiya me otnime. Puma cita ca tabe peei cabu cibibine nicetneräjininige.

⁷ Cine däägu naclige poto bimu cama, mage mäpu padare ne jepänisi ngälu matikolä cewe Niido mameta me atyarinago. Peei opopo buuwe te cime gaabe ne jii bige piiyeme otnime, peei name pi cine Krete curä uuwa cabu ta naclige, Salamone Mubä ne sisuplingtisi.

⁸ Cine doro ligi ta naclige, cuta cääri mage mäpu padare ne jepänisi, ngälu cewe me atyarinago lui ne yaainusi 'Miijirage Poo Lenaja Puupu', lui cudecewe lica ge Lasea cewe ca.

⁹ Cine puga babo padare ninajininige, ngälu babo buuwe me padare te tatyaramtige. Yoo, pui bimu ituge otni lui cabu Israela biname cina ngene jaapecnusi teeme niyianiya cabu ca äsecrera poto cidi me. Pui bimu kaake poto ca biname cina äblicäco poo gaabe otni buuwe name pi. Yoo, peei name pi Paulo teebibine umle mene jejemige egä,

¹⁰ “Biname, cane umle häbitine egä mine mage wälu cama pagege otni ama cita ca. Babo niiya te pa tädepi mime poo piyepu gwidape täapume, cuta piyepu mime ireclota täapume.”

¹¹ Yepä, cubu babo biname Julyio poo waapo biname piyepu poo yageyame bime mene jäärungige, lica Paulo me mene ne.

¹² Pui poo lenaja puupu toraca miiji lica ge buuwe padare cabu puma lenajame, peei name pi bucurage pui poo biname cina singi poo ne malu ta acaname Poenika cewe ne oomlaname, buuwe liba ibibi gyene. Yoo, puga ge Poenika cewe cabu babo miijirage lenaja puupu poo täapume Krete curä cabu, ingle naace gyene kokre ciye buuwe piyepu baarge buuwe cina peei puupu ne lica joomlusi. Siige, teepi puma ibibi gemi awagrijame buuwe me apira padare ne.

Malu cabu Kokre Buuwe te Tipwäjige

¹³ Lädrrage buuwe te liba gije abacitige äpwäjame uule poto ca, biname cina apu jengene-nige egä, “Ibibi gyene cime otni täapume.” Teepi peei name pi cangka ne tesweclisi, Krete curä wajwa ta eclige.

¹⁴ Matikolä padare ingwe ca, babo kokre buuwe te, lui ne yaainusi ‘Baarge Buuwe’ ca, tädige curä poto ca.

¹⁵ Pui kokrerage buuwe te poo ne liba toomlige, cine äblicäco buuwe ne äträja. Cine gloose te niglinige, siige ire ta jeitisi poo ne, buuwe te liba secwenistige.

¹⁶ Cine matikolä uuwa ne jepänisi, liba sisuplingtige uule poto ca yepä matikolä curä ne, ngii Kauda. Puga peei uuwa cabu cine baborage poo me tatakua ne cängena joomlusi, yepä mäpu ge peei wawename.

¹⁷ Teepi tatakua ne setecwantisi babo poo cabu me, piba poo ne jetäyisi seea ca kokre wawename, ingle uli ca wawenäjige ge peei poo. Teepi wälu äbitininisi egä poo te pama yäätynecnuge koriyo doro cabu Libiya malu je. Teepi peei name pi äwä bine iyinetnemisi gawe me, poo ne ire ta jecitisi eewaname.

¹⁸ Kokrerage buuwe te tipwäjjanige, siige nuuja bimu teepi gije abacitinisi acenetna gwidape bine niye cabu me iisabejame,

¹⁹ cuta nuuja bimu teeme ime ca yiisabäjemisi poorage me gwidape bine.

²⁰ Bucurage bimu cama cine äblicäco bimu piyepu wale päpäna, piyepu buuwe te cääri tipwäjjanige kokre cama. Siige, cine iyeta apu ninginige egä cine budre memi.

²¹ Biname cina liba leca padare icrajenige deedei cäco, piba Paulo teeme opo gaabe jeclajutige, jejemige egä, “Binamewale, weene cebine cire nätecejiye, piyepu Krete ca lica cire naacleji. Piba mime gwidape cina lica sabe läbittinejisi.

²² Yepä, page cane weebibine jijenininine, wälu gone! Weeme nuuja me ireclota te lica sabe äbitinige, yepä poo taatu te niya äbitenige.

²³ Cane peei umle gäne, ingle birice ciye cabu Acejiyame lui cäme yageyame, cane lui ne yaawejanune, teeme mename seemo te cäme bau tädumi,

²⁴ cebine najumi egä, ‘Paulo, wälu gone! Maane miiji Rooma Babo Mope Biname me opo gaabe je aclajuta, cuta piyepu iyeta lui cina maane cama eclenige, Acejiyame te owecu name pi teeme ireclota meebine näcärenige.’

²⁵ Yoo, binamewale, weene peei name pi wälu gone, yepä ngenecu kokre äbitipeyel! Cane ätrunga ne ecitenine Acejiyame cabu me egä peei te pa läbitipi, tabe lipu cebine itu najumi.

²⁶ Yepä, buuwe te mibibine pa niwadipi yepä curä cabu me.” Siige.

²⁷ Teetin ciye kaake poto ca, pui babo buuwe te cibibine cääri niwadininige Med-itareniya Malu cabu. Liba ciye duusa mameta ge, poo cabu kaakesea biname cina apu jengenemige egä, “Cine doro mameta me naclenige.”

²⁸ Teepi peei name pi mäpu gwidape ne seea ca jemlemaltisi, niye bora me englecantisi, piba jepänisi niye lui yepä hanred twenti ngälu uugle ge. Matikolä padare ingwe ca teepi cääri tesweclisi, cabu me secenutisi, jepänisi niye lui nainti ngälu uugle ge.

²⁹ Teepi wälu äbitininisi egä poo te latecwamtuge kula cabu, peei name pi teepi poo waapo cabu ca fooma cangka bine niye ngalebora me iyinetnemisi, siige teepi irecu ätumutini awala täapume.

³⁰ Yoo, poo cabu lui kaakesea biname cina singi uucratname babo poo cabu ca. Teepi tatakua ne iyinisi niye cabu me seea ca, piba sinäme jemenisi egä teepi singi poto cangka bine äinetname cuta poo me niinäce gaabe ca.

³¹ Yepä, Paulo jejemige cubu babo biname Juliyo piiyepu teeme cubu biname bine egä, “Poo cabu kaakesea biname cina liba poo cabu lica yaacrajuge, weene äblicäco doru ne oomlana ireclota cama.”

³² Cubu biname cina peei name pi tatau oomlana seea bine jeclanemisi, siige tatau ne ire ta jecitisi eewaname.

³³ Bimu äpula mameta liba, Paulo giri jicranemige teebibine deedei äbitame. Tabe jejemige egä, “Weene page footin bimu wälu cama inajininige, piiyepu iyeta pui padare weene deedei cäco inajipi.

³⁴ Page cane weebibine jijenininine deedei äbitame. Weene deedei äbitineye ireclota cama lenajame. Yoo, weeme nuuja te niya lica jepänenige, weeme yepä edingäli te lica apesarenige.”

³⁵ Teeme mene ingwe ca, Paulo buluduu ne ecatige, Acejiyame ne eso ecärige iyeta biname bime opo gaabe, peei deedei piba itremaltige, erwige.

³⁶ Peema cita ca iyeta biname cina ngenecu kokre äbitininisi, piba deedei erwäjisi.

³⁷ Yoo, cine iyeta lui neeneni hanred sebenti siks biname ge pui babo poo cabu.

³⁸ Iyeta biname liba erwäjisi ibibi ge, teepi piba wiiti kuu bine malu me yiisabemisi poo ne plowa wawenname.

Babo Uule te Poo ne Iplegicige

³⁹ Bimu liba tädige, poo cabu kaakesea biname cina peei doru ne lica opo ewatnisi, yepä teepi miiji poo lenaja puupu ne jepänisi, niye te luma labacituge cube cabu me, cuta piiyepu koriyo puga ge. Teepi mene jitransisi poo ne acaname koriyo cabu me, liba ibibi ge peei ne wawenname.

⁴⁰ Teepi peei name pi cangka seea bine jeclanemisi, cangka bine ebmalemisi niye bora je. Pui yepä padare cabu nuuja cina pui seea bine jiiitnemisi lui cina waapo joomlisi. Teepi piba niinäce gaabe äwä ne jecitisi, inge naace popi buuwe te poo ne niinäce gaabe me ecanige, siige cine doru me abyemärinago.

⁴¹ Yepä, poo te koriyo doru cabu me atecwamtige, ityecnige. Siige, poo niinäce gaabe te koriyo cabu lipu batecwamtige, teepi äblicäco poo ne älädna. Poo waapo ne kokre uule kuu cina luma jidnanisi, iyeta iplegicisi poo ne, siige.

⁴² Yoo, cubu biname cina mene jitransisi iyeta krokeciye mete biname bine aglecame, inge naace popi teepi singi lica teepi atwangetna doru oomlaname, puma cita ca uucratname.

⁴³ Yepä, cubu babo biname Juliyo tabe singi lica ge Paulo ne budre me aglime. Tabe peei name pi teebibine jiiibemige peei ne wawenname. Tabe mene jiiicemige egä, “Laatibi atwangetna umle gemi, weene niinäce uupletnärineye doru me atwangetname.

⁴⁴ Iyeta nuuja weene teebibine ingwe icwemeye. Weene ime icranemeye uli cabu, coo poto poo cabu ca agabeceji uli bine joomläjecmeyel!” Yoo, cine iyeta pepu naclige, siige doru ne cängena joomlisi.

28

Malta Curä cabu je

¹ Cine liba cängenarage doru me atyarinago, cine umle äbitinago egä curä ngii lui Malta ge.

² Pui curä biname cina cibibine biname me niwenininisi. Teepi muye ne yuungisi, piba cibibine pui gome me ala nisoglicininisi, inge ngupe te gije tabacitige atramame piiyepu gäbu ge.

³ Paulo uli pargi bine ime cabu ewademige, siige muye cabu liba icranemige, niya cobyame te piba tasatige nuunu name pi. Siige, cobyame te Paulo me ime ne bii jetäyige.

⁴ Curä biname cina liba cobyame ne jepänisi Paulo me ime cabu je, teepi teemeteme ajananinisi egä, “Ai biname pama niyarage agliagli biname gyene, siige Daremu te singi lica tabe ireclota cama lenajame. Ngänu gyene tabe malu ca uucrana, budre pa jääpänege.”

⁵ Yepä, Paulo cobyame ne ijarige, muye cabu eceratige. Tabe pita ne lica jesicnantige.

⁶ Curä biname cina liga teebine ire jetwisi teeme ime ädrime coo tabe budre tama atramame, teepi liga lecaleca padare ire jetwanisi, nuuja gwidape ne lica jepänisi teeme bau äpletnutame. Teepi piba ngenecu atatrongäjininisi, jiiicisi egä, “Tabe pama uuje biname gyene.”

⁷ Puga ge yepä biname me calwacupi gawe, lui cudecewe lica ge pui muye puupu cabu ca. Pui gawe yageyame, ngii Publiyo, tabe cuta peei curä biname bime mopeyame ge. Tabe cibibine niwacletnäjininige, cängena niwadininige teeme cewe cabu me. Cine ten cama ninajininige nesae bimu cama.

⁸ Yoo, Publiyo me babe ute puupu cabu jage. Tabe pita cama enajige, gebale piyepu ecni cama ge. Paulo abacitige teeme ute puupu cabu me, Acejiyame ne ewejanige, ime piba aacitige teeme papa cabu, siige teebine miiji me jewenige.

⁹ Peei te liba äbitige, iyeta pita biname pui curä cabu piba totninisi, siige Paulo teebibine miiji jewenemige.

¹⁰ Teepei nicärininisi bucurage owecu gwidape, cuta piyepu ingwe ca cine liba abyemärinago, teepi ecetnäremisi nuuja poo cabu cine lui gwidape gaabegabe tääpume singi ge.

Cine Malta Curä ca Naclige Rooma me

¹¹ Nesae mabye ingwe ca, cine nuuja babo poo gaabe abyemärinago. Peei poo cuta Aleksandriya cewe cabu ca ge, lui te kokre buuwe padare ne jewagrijiige Malta curä cabu. Poo me ngii lui 'Uuje Päädepäde' ge.

¹² Cine malu cabu naclige, Surakusa cewe me atyarinago, puga ninajininige nesae bimu cama.

¹³ Puma cita ca cine cääri naclige, siige Regiyo cewe me atyarinago. Nuuja bimu uule buuwe te gije tabacitige äpwäjame, siige neeneni bimu ingwe ca cine atyarinago Puteoli matikolä cewe me.

¹⁴ Puga cine poto Yeesu ne ätrunga biname bine edäremisi. Teepei cibibine niwadininisi ten cama lenajame seben bimu cama. Cine piba doro ta abyemärinago Rooma cewe me otnime.

¹⁵ Rooma ätrunga biname cina liba itecijemige cime poto cidi me, cine cama opopa ayime seclige neeneni cewe mameta me, cewe ngii Aapi Aletna Puupu piyepu Nesae Üte Mete. Paulo liba pui ätrunga biname bine jepänemige, Acejiyame ne eso ecäriige binamewale tääpume, siige ngenecu kokre me äbitige.

Babo Cewe Rooma je

¹⁶ Cine liba atyarinago Rooma cewe me, Rooma krokeciije mete ire atwi biname te jüicige egä Paulo miiji ge mara mete cabu lenajame, yepä cubu biname te teebine awamutame.

¹⁷ Rooma cewe cabu lui Israela modamoda biname cina icrajige, nesae bimu ingwe gaabe ca Paulo teebibine ala tesoglecemige teeme bau abasecretname. Teepei liba abasecretnige, tabe jejemige teebibine egä, "Cäme binamewale, cane nuuja niija ne lica mime wawena mime biname tääpume, piyepu nuuja niija ne lica mime babewale bime mule poto cidi me, yepä teepi cebine noomlujisi, krokeciije mete cabu naciitui Jerusalema je, piba Rooma biname bime ime cabu naciitui.

¹⁸ Pui liba cebine nätemlepesi cäme ireclota poto cidi me, teepi singi cebine asatame, ingle peei ne jääpänesepi egä cane lica ituge nuuja niija ne wawena lui tääpume cebine budre me wawename.

¹⁹ Yepä, poto Israela biname cina singi lica ge cane papa asatame. Cane peei name pi mene jaajemepene egä cane singi ge Rooma Babo Mope Biname bau otnime tabe te cebine atraname. Yepä, cäme nuuja aitna mene lica gyene cäme Israela binamewale poto cidi me.

²⁰ Cane peei name pi weebibine ala bii tisoglicinine weebibine päpäname piyepu weene cama mene me. Yoo, ai ayana seea pisi nyene cäme ime cabu pui biname name pi Israela biname cina lui ne jewagrijenisi mibibine niija cabu ca äsecreame."

²¹ Siige, Israela biname cina teebine jejisi egä, "Cine nuuja peba ne Yuudea cabu ca lica ituge päpäna mäame poto cidi me, piyepu cime nuuja biname lica itu tädepi puma cita ca idre mene cama coo aitna mene cama mäame poto cidi me.

²² Yepä, cine singi gemi mäame ngene atwana poto cidi me umle äbitame, ingle naace popi iyeta poto ta biname cina jääcelusi mäame peei sigu ne."

²³ Siige, teepi bimu ne ecitisi Paulo cama, piyepu pui bimu liba joomlige, piba bucurage biname cina seclige Paulo luma enajige. Krokerage ca ngälu ciye tabe mene cängena jejananemige, teebibine ebiberäjemige mene Acejiyame te lipu biname bine yaawademuge. Tabe singi teebibine ätrunga abiberäjame Yeesu poto cidi me, peei name pi mene jewabemige Moose me Cotre mene piyepu sasa mename biname bime oogäräneji mene cabu ca.

²⁴ Poto biname cina singi teeme mene acatame, yepä nuuja poto cina singi lica ätrungame.

²⁵ Teepei äblicäco yepä ngene atwana oomlana, siige gije abacitinisi Paulo ne abmalame, yepä niinäce gaabe teeme otni, Paulo cuta yepä mene jejemige egä, "Toraca gyene Aceji Seemo me mene weeme kaakesaare bime bau me, mename biname Isaya me tagepogogo cabu ca,

²⁶ tabe lui jüicui egä:

Äte, ädi, ai biname bine jejemepi:

Weene itecijinuge cuta itecijinuge, yepä lica umle läbitininuye.

Weene ire lacitaninuye piyepu ire lacitaninuye, yepä weene lica jääpänuje.

²⁷ Ingle naace gyene ai biname bime ngene atwanena krokeciye gemi;
teepi tablame buduma gemi;
teepi irecu atumuteji gemi.

Teepi apu liga lica cire läbitinnejisi,
teepi piba irecu ca jääpänemusi,
tablame ca yäätecijanemuge,
piiyepu ngene atwanena ca opo yaawatnusi,
siige căme bau me tatatrongärininusi,
siige cane Acejiyame te teebibine miiji me jaawenemune.' ”

²⁸ Siige, Paulo piba jejemige egä, “Page weene miiji gemi umle äbitame egä Acejiyame me Miiji Mene biname bine niya mule cabu ca äsecrera poto cidi me, peei ne ituge ätyepa gawe maramara biname bime bau me, piiyepu teepi singi gemi ätecijame.”

²⁹ Paulo peei mene jejemige, piba Israela biname cina teebine sebmalisi, yepä gaabe cabu ta teemeteme jicelisi.

³⁰ Yoo, neeneni kämäge ngalebora Paulo puga Rooma cewe cabu je enajige, rarekaake yääcäremuge teeme lenaja mete täapume. Tabe iyeta biname bine jaawablemuge lui cina teeme bau me saacluge.

³¹ Tabe mene jaajanemuge Acejiyame te lipu biname bine yaawademuge; tabe cuta piiyepu biname bine yaabiberäjemuge Yageyame Yeesu Keriso poto cidi me. Tabe wälu căco mene jaajanemuge iyeta biname bine. Nuuja te lica teebine jiiibige.

Siige, ai peba me mene ngälu agesa.

PAULO ME LETA ROOMA ÄTRUNGA BINAME BIME BAU ME

¹ Cane Paulo, Yeesu Keriso me kaakesea bägrä gäne. Acejiyame cebine najuji teeme ätyepäneji biname me äbitame piyepu mara me nawenuji teeme Miiji Mene biname bine jajanename.

² Peei Miiji Mene tabe teeme sasa mename biname bine ituge jajanena teepi Oogäräneji Mene cabu oogärame egä cirege äbita.

³ Peei Miiji Mene lui Acejiyame me Bägrä mime Yageyame Yeesu Keriso poto cidi me. Tabe lui ai gawecewe cabu je biname me äbituji, Daawida me inge cabu liba aplimlujii,

⁴ tabe cuta Acejiyame bau ca gyene. Tabe budre cabu ca liba arpinantuji, pui kokre ca biname bine jewabemuji egä tabe Acejiyame me conocäco Bägrä gyene.

⁵ Cane teeme miiji ne jepänujine, tabe liba cebine teeme ätyepäneji biname me nawenuji naace täापume cane iyeta maramara gawe biname bine gaabe awabejame teepi Yeesu Keriso me ngii poto cidi me mene ätecijame teebine ätrungame.

⁶ Weene cuta poto peei biname gemi, lui bine Acejiyame te itu tisoglicipi Yeesu Keriso me biname me äbitame.

⁷ Yoo, căme mene agesa iyeta weeme täापume lui cina babo cewe Rooma je ätrunga cama inajininige, inge Acejiyame baborage singi weeme täापume, weebibine ituge asogleca teeme biname me äbitame.

Acejiyame mime Babe piyepu mime Yageyame Yeesu Keriso, cane teebibine aawejananine teemi miiji te lenajame weeme cabu piyepu poode weebibine ceerame.

Paulo Eso Mene Jiicige

⁸ Yoo, niinäce cane căme Acejiyame ne eso ecärine Yeesu Keriso cabu ca iyeta weeme täापume, inge naace gyene iyeta ai gawecewe cabu biname cina itecijenemige weeme ätrunga poto cidi me.

⁹ Cane Acejiyame me kaakesea iyeta căme ngenecu cama jaawenemune, liba teeme Miiji Mene jaajanemune Yeesu Keriso poto cidi me. Teeme opo gaabe ai mene jiicenine egä cane Acejiyame ne ewejananine weeme täापume,

¹⁰ iyeta padare cane liba teeme bau irecu lätumutune. Cane teebine ewejananine egä cane gaabe päpäna ai padare cabu weeme bau otnime, tabe liba singi gyene.

¹¹ Yoo, cane baborage singi gäne weebibine päpäname kokre ceerame weeme seemo ireclota täापume.

¹² Cane ai jijanininine, inge cane singi gäne weeme ätrunga ne kokre me wawename cuta piyepu kokre päpäname weeme bau ca căme ätrunga täापume.

¹³ Căme ätrunga binamewale, cane singi gäne weene umle äbitame egä bucurage padare cane ngene ituge atwanena weebibine ädärame, yepä cane äblicăco ge otni ngălu page. Cane singi gäne weebibine ätityera ceerame piyepu peei ätityera cabu ca weeme miiji ätrunga mule ne päpäname, cane lipu nuuja gawecewe biname bine pepu pana ätityera ituge ceera.

¹⁴ Cane ngenecu ca asicnantine egä căme kaakesea gyene iyeta biname bine toraca gaabe awabame, iyeta lui cina Griik biname bime mene piyepu mule umle gemi, cuta lui cina teeme nuuja glunubora mene taatu jiicemusi; biname lui cina umleumle cama gemi, piyepu biname lui cina umle căco gemi.

¹⁵ Yoo, cane peei name pi singi gäne Miiji Mene cuta weebibine jajanename, weene lui cina babo cewe Rooma je inajininige.

Miiji Mene Lui Kokre Gyene

¹⁶ Cane ngene jotwananine egä Miiji Mene lui babo kokre cama gyene, inge Acejiyame bau ca gyene peei mene. Peei cabu kokre pisi nyene biname bine ngenecu atatrungame teeme niya mule cabu ca äsecrera gaabe ceerame, iyeta lui cina peei Miiji Mene jăätrungusi. Peei mene niinäce Israela biname bime bau jajeji ge, puma cita ca cuta nuuja gawe biname bime bau me.

¹⁷ Yoo, peei Miiji Mene te jiicenige Acejiyame lipu pui biname bine conocăco me jaawenemuge lui cina teebine jăätrungusi. Biname te toraca ireclota cabu me labacituge, teeme ätrunga liba Yeesu Keriso me kaakesea cabu gyene, piyepu tabe peei ireclota cabu cängena yaanajuge teeme ätrunga name pi, Oogäräneji Mene te lipu jiicenige egä, "Pui biname me ireclota iyeteta gyene,

Acejiyame lui ne conocăco me jaawenuge teeme ätrunga cabu ca.

Iyeta Biname Conocono Gemi

¹⁸ Acejiyame te biname bine umle jaawenanemuge egä tabe teebibine mäpu daremu yääcāranemuge teeme niyaniya ngene atwanena täापume piiyepu teeme niyaniya waweneca täापume, ingle teeme niyaniya mule cina Acejiyame poto cidi me toraca ngene atwanena bine jibbemusi.

¹⁹ Acejiyame teebibine mäpu daremu yääcāranemuge, ingle naace popi biname bime täापume pajecu gyene teepi Acejiyame poto cidi me ngena umle cire läbitejisi, ingle tabe peei ne teeme täापume pajecu me ituge wawena.

²⁰ Yoo, pui padare cabu ca Acejiyame liba gawecewe ne tewenuji ngälu page, biname cina müji gemi umle äbita egä Acejiyame pisi nyene piiyepu teeme kokre iyeteta gyene. Ngānu gyene biname cina puu äblicāco teebine päpäna, yepä teepi müji gemi iyeta gwidape päpäname Acejiyame lui bine ituge wawena, piba pui cabu ca teeme mule poto cidi me umle äbitame. Peei name pi teeme nuuja ingle lica gyene teeme umle cāco piiyepu niyaniya mule täापume.

²¹ Biname umle gemi egä Acejiyame pisi nyene, yepä teepi lica teebine yaawejanusi egä, “Maane peese näte cime caburage Acejiyame, cime ire atwiyame,” piiyepu lica teebine eso yääcārusi iyeta gwidape täापume. Peei name pi teeme ngene atwanena mage kākāco me ituge äbita, teeme mope cabu nuuja müji ngene atwana lica gyene, yepä iyeta teeme ngene atwanena krokeciye gemi.

²² Teepi jücenisi, “Cine umle cama gemi,” yepä teepi buduma gemi.

²³ Yoo, teepi lica Acejiyame ne yaawejanusi, lui iyeteta gyene, yepä teepi biname pana ceege bine jaawenemusi pui bine awejename, lui bime ireclota lica iyeteta gyene. Nuuja cina ceege bine jaawenemusi lui gawe cabu otnetneja gwidape pana, piiyepu ele, piiyepu biicwale pana, peei bine awejename.

²⁴ Peei buduma mule name pi Acejiyame biname bine papa ire taatu jaacitemuge teepi teeme conocono singisingi mule wawenecame. Teepi ajiri cama mule bine teemeteme jaawenemusi.

²⁵ Teepi toraca ngene atwana ne Acejiyame poto cidi me yääyeblingtusi, piba tuwāngle walya ngene atwana ne yaacatusi. Teepi yaawejanemusi piiyepu teeme täापume yi-iwārājemusi lui gwidape bine Acejiyame te itu tewenemuji, lica Acejiyamerage ne yaawejanusi. Yepä, mine müji Acejiyame ne awepyerājame iyeteta. Yoo, mine pepu pa jaawenepesi!

²⁶ Biname bime buduma awejena mule name pi Acejiyame teebibine ire taatu jaacitemuge teeme niyarage ajiri cama mule wawenecame. Pepu pi magebi cina singisingi läbitininusi nuuja magebi me tääpe täापume. Peei lui babo niyarage gyene, lica magebi bime toraca mule.

²⁷ Cuta rooriye cina pepu pana niyarage mule bine jaawenemusi. Teepi lica coga täापume singi, yepä singisingi läbitininusi nuuja rooriye me tääpe täापume. Teepi teeme tääpe me niyarage singi bine jaawenemusi, pepu pi mäpurage daremu ne jääpānusi teeme tääpe piiyepu teeme ngene atwanena liba pui mule cina sabe jaawenemusi. Peei lui conocāco daremu gyene.

²⁸ Ingle naace popi biname cina singi lica gemi ngene atwa-nename Acejiyame poto cidi me, tabe peei name pi teebibine ire taatu jaacitemuge, piba teeme Acejiyame cāco ngene atwanena cina iyeta niyarage me läbitininusi niya singisingi bine waweneme, teepi lui bine cire lica jaawenemejisi.

²⁹ Teeme niyaniya mule cina babo läbitininusi, teepi nuuja singi lica conocāco mule täापume, iyeta teeme ngene atwanena nuuja biname poto cidi me lui claabe taatu. Teepi ire patre yaagemusi, biname bine walya yaangletnājemusi, larnginininusi, piiyepu nuuja biname bine budre me yaaglecimusi. Teepi nuuja biname bine teeme ngencu bora jäämugetnemusi. Teepi nuuja bine yäärmārimusi,

³⁰ cuta teeme poto cidi me niya mene jücetnājemusi. Teepi Acejiyame ne jäämugetnusi, piiyepu teemeteme jääcelusi. Teepi lasicnantinusi egä teepi baborage gemi nuuja biname bime cabu ca, piba teemāmu lawepyerājininusi. Teepi ngene jwaatwananinusi cerāmu cuta poto niya mule bine wawenecame; teepi cuta mage babe bime singi bine lica yaawademusi.

³¹ Teepi geāji gemi niya mule wawenecame, peei name pi lica ngene ca agli egä, “Ai lui niya mule gyene.” Teepi lica teeme mene toraca me jaawenemusi, teepi lica asicnenta owecu nuuja biname bime täापume, piiyepu nuuja singi lica gemi teeme binamewale täापume.

³² Teepi iyeta umle gemi Acejiyame me cotre pisi nyene peei mule täापume egä laati te peei mule bine jaawenemuge, tabe müji budre päpäna, yepä teepi peei bine jaawenemusi. Teepi cuta singi gemi nuuja cina peei bine wawenecame.

2

Acejiyame te Iyeta Biname bine Cirege Atrana

¹ Gone weene ngene jwaatwananinuye egä, “Yoo, poto biname pepu niiyarage gemi,” ingle weene lica conocäco gemi, ngänu gyene weene laati bemi. Weene liba nuuja biname ne aitneja egä, “Niiyarage mule biname gyene,” piba teeme pana mule pa jewenepeye, weene weemämu laitnäjinuye.

² Mine iyeta umle gemi egä Acejiyame conocäco gyene biname bine atraname lui cina peei niiyarage mule jaawenemusi.

³ Yepä, weene lui nuuja biname bine jaaitnäjemuye, cuta peei yepä niiya mule jaawenemuye, weene gone ngene jwaatwaninuye egä Acejiyame te nuuja biname bine mäpu daremu pa yäacäremepi, yepä weene pagege äsecrera teeme atrana cabu ca. Eewe, weene licarage cirege äsecrera!

⁴ Gone ngene jwaatwananinuye egä Acejiyame me owecu lui papa gwidape gyene, ingle tabe owecu baborage gyene piyepu lica watawata mäpu daremu weebibine ceera. Weene miiji umle gemi egä Acejiyame weeme bau babo owecu gyene, ai name pi tabe singi weene niiya mule cabu ca atatrongärame teeme bau me.

⁵ Yepä, weene liba ätecija cäco gemi, piba babo mäpurage cirege weeme daremu pui Ceräcerägäabu Bimu cabu, Acejiyame te liba biname bine conocäco cire jaatranemepi mäpu daremu ceerame.

⁶ Yoo, Acejiyame piba iyeta biname bine teeme daremu cirege ceera teeme mule ibibi.

⁷ Tabe iyeteta ireclota teebibine cirege ceera lui cina miiji mule jaawenemusi gloose cäco, ingle teepi lui singi gemi teeme jamyacu apaclyera, awepyeräja, piyepu ngälu cäco ireclota päpäname.

⁸ Yepä, nuuja biname cina teeme singisingi bine taatu jaawenemusi; teepi toraca gaabe ne jäägyusi teeme conocono gaabe cabu otnime, siige Acejiyame teebibine teeme mäpurage daremu cirege ceera.

⁹ Teepi babo ngenecu mäpu piyepu cewe cire loocaninipesi. Iyeta lui cina niiya mule bine jaawenemusi, teepi teeme mäpu daremu cirege päpäna, Israela biname niinäce piyepu nuuja gawe biname iyeta.

¹⁰ Yepä, iyeta lui cina miiji mule bine jaawenemusi, Israela biname niinäce piyepu nuuja gawe biname iyeta, Acejiyame te jamyacu apaclyera, awepyeräja, piyepu poode teebibine cirege ceera.

¹¹ Ingle naace popi iyeta biname lui yepä pana gemi Acejiyame me opo gaabe je.

¹²⁻¹⁵ Yoo, iyeta lui cina Acejiyame me singi jaatropangtusi, teepi mäpu daremu cirege päpäna. Acejiyame te mäpu daremu cirege ceera maramara gawe biname bine, teepi liba teeme singi ne jaatropangtusi niiya mule waweneme. Ngänu gyene teeme bau oogäräneji lica ge Acejiyame me Cotre Mene Moose lui bine soogäremuji, ingle naace gyene teeme ngenecu bora teepi umle gemi lui mule conocono gyene, lui mule conocäco. Teeme ireclota cabu ca mine opo yaawatnusi egä Acejiyame me cotre piti nemi teeme trupa ngalebora. Teepi cuta ngena ca laglinusi egä miiji mule, coo niiya mule, ingle nuuja taje teepi ngenecu miiji birige teeme mule poto cidi me, cuta nuuja taje ngenecu niiya birige. Acejiyame cuta Israela biname bine teeme mäpu daremu cirege ceera teeme niiya mule täapume, ingle naace gyene teeme bau piti nemi oogäräneji Cotre Mene, yepä teepi peei bine lica jaawenemusi. Teepi umle gemi lui gaabe toraca gyene, yepä teepi lica conocäco peei gaabe cabu otni. Yoo, biname te lica conocäco läbituge Acejiyame me opo gaabe, tabe liba umle taatu ngena ne waweneme, yepä tabe cuta miiji peei ne toraca wawena.

¹⁶ Yoo, pui bimu cirege otni, lui cabu Acejiyame te Yeesu Keriso ne cire jaajepi biname bime ogä ngene atwanena bine atraname, cane lipu Miiji Mene cabu jücenine.

Cotre Mule Lica Gyene Äsecrera Gaabe Israela Biname bime täapume

¹⁷ Yoo, weene lui cina jücuwe egä, “Cine Israela biname gemi,” weene apu jingenininige egä weeme ätityera pisi nyene Cotre Mene cabu, piyepu weeme mene nesae lica gemi egä, “Acejiyame lui cime yene.”

¹⁸ Weene iyeta umle gemi Acejiyame te ngena singi weene waweneme, piyepu weene Cotre Mene cabu ca umle ituge äbita toraca gaabe luci yene.

¹⁹ Weene biname bine jäje jaajanemuye egä, “Cine age temi awecluja irecu mäasumäsu biname täapume,” piyepu egä, “Cine apaclyera gemi biname täapume lui cina krokeiye cabu icrajenige.”

²⁰ “Cine age temi ablaweja biname buduma mule biname bime täapume piyepu abiberäja biname bägrä pana biname bime täapume.” Weene apu jingenininige, “Cine iyeta gwidape umle gemi, ingle Cotre Mene cime bau piti nemi, piyepu peei Cotre Mene toraca gyene.”

²¹ Yoo, weene babo singi nuuja biname bine abiberäjame, ngena name pi weene weemämu lica abiberäja? Weene bääirmi mene birige jajanena egä, “Ero gone!” Yepä, weene ero mule umle gemi.

²² Weene jiiceniye egä, “Sargi mule gone!” Yepä, weene cuta umle gemi peei mule. Weene uuje bine jäägyemuye, lica peei bine yiwäräjemuye, yepä weene gwidape bine ero ca yaawademuye peei uuje bime iiwäreja mete maramara cabu ca.

²³ Weene jäje jaajananuye egä, “Cime bau piti nemi Acejiyame me Mene,” yepä weene Acejiyame me miiji ngii sabe jaawenuye, weene liba teeme cotre bine jaatropangtemuye.

²⁴ Oogäräneji Cotre Mene te jiicenige egä, “Weene Israela biname bine mule name pi nuuja gawe biname cina niya mene jiicemusi Acejiyame poto cidi me.”

²⁵ Yoo, weene Acejiyame me Cotre Mene liba cängena jaawenemuye, piba cuta miijirage birige teeme cewecu weeme tääpe cabu lenajame, yepä weene teeme Cotre Mene liba cängena lica birige wawena, piba weeme Acejiyame tääpume cewecu lui papa gyene weeme tääpe cabu.

²⁶ Nuuja gawe biname, lui bime cewecu lica birige, teepi peei Cotre Mene liba jaawenemusi, Acejiyame teebibine pa yaawademepi, epu pana teepi cewecu cama gemi liiyepu.

²⁷ Yoo, weene Israela biname lui cina Cotre Mene jaatropangtuye, ngänu gyene peei mene weeme bau piti nemi oogäräneji, piyepu ngänu gyene weene cewecu cama gemi, weene weeme mäpu daremu cuta cirege päpäna, ingle naace popi poto nuuja gawe maramara biname cina Cotre bine toraca jaawenemusi, ngänu gyene Acejiyame me cewecu teeme tääpe cabu lica gyene.

²⁸ Yoo, tääpe iirputa taatu te lica biname ne Israela biname me jaawenuge, ingle cewecu lui biname me tääpe papa cabu.

²⁹ Yepä, tabe Acejiyame me toraca Israela biname gyene lui te teeme trupa piyepu teeme ngenecu Acejiyame bau me ituge ceera. Siige, peei lui Aceji Seemo me kaakesea cabu ca gyene, lica Oogäräneji Cotre Mene cabu ca. Pepu biname te lica nuuja biname bau ca awepyeräja yaacatuge yepä teeme awepyeräja lui Acejiyame bau ca gyene.

3

Acejiyame lui Toraca piyepu Conocäco Gyene

¹ Weeme nuuja biname te pama ngene jotwananenige egä, “Nää, Israela biname niinäce gaabe gemi nuuja gawe biname bime cabu ca?” coo egä, “Teeme tääpume, nää, lipu ätiyera gyene teeme tääpe cabu cewecu?”

² Yoo, teeme tääpume miijirage birige. Pui lui babo gwidape gyene egä Acejiyame teeme mene Israela biname bine ecäremuji ire atwime iyeta nuuja biname bime tääpume.

³ Yoo, toraca gyene egä poto Israela biname cina peei mene cängena lica ire jaawenemusi. Yepä, weene gone ngene jwaatwa-naninuye egä Acejiyame teeme mene cängena lica jaawenemuge ai ingle naace popi poto biname cina cängena lica peei mene bine jaawenemusi.

⁴ Eewe, pepu lica! Acejiyame lui toraca gyene. Ngänu gyene iyeta biname cina walya mene jaajananemusi, Acejiyame iyeta padare teeme mene toraca me jaawenemuge. Oogäräneji Mene teeme poto cidi me jiicenige egä,

“Maane lui mene jiicemute, peei mene cina meebine naawabusi egä conocäco gäte.

Maane cuta conocäco yuutrutute atrana cabu ca.”

⁵ Yoo, page weeme nuuja te pama ngene jotwananenige egä, “Nää, cine Israela biname cina liba conocono mule jaawenemusi, biname piba taatu jääpänusi egä, ‘Acejiyame me mule lui mara gyene; tabe conocäco gyene!’ Ai name pi Acejiyame te miiji ngii puma cita ca jääpänuge cime niya mule cabu ca, tabe peei name pi conocono gyene cibibine mäpu daremu peei tääpume ceerame.” Pepu binamerage ngene atwanena gone!

⁶ Peei lui walya gyene! Acejiyame äblicäco poto conocono mule äsuceja, ingle naace popi tabe toraca conocäco gyene. Tabe liba conocono gyene, tabe piba äblicäco ai gawecewe biname bine cängena atrana, yepä tabe miiji gyene biname bine atranage, ingle tabe conocäco gyene.

⁷ Gonerage apu ngene jwaatwananinuye egä, “Nää, cine liba walya mule bine jaawenemusi, piba Acejiyame me mara toraca mule te babo me läbituge, siige tabe puma cita ca jamyacu apaclyera ne jääpänuge cime walya mule name pi. Acejiyame peei name pi miiji lica cibibine jaji egä, ‘Weene niya mule biname gemi.’ ” Yepä, weene gonerage pepu ngene atwanena!

⁸ Yoo, poto biname cina buduma ngene atwanena name pi jiicemusi egä, “Mine niya mule pa jaawenemepesi, ingle peei cabu ca Acejiyame me miiji ngii caburage pa läbitepi.”

Yoo, poto biname cina cebine naitnäjusi walya mene ca egä cane te peei buduma mene jüicine. Peei walya cabu ca teepi teeme mäpu daremu cirege päpäna. Eso!

Nuuja Biname te Lica Iyeta Padare Conocäco Mule Jaawenemuge

⁹ Yoo, peei cabu ca mine umle gemi egä Acejiyame me opo gaabe mine lui Israela biname gemi, mine miiji lica gemi nuuja biname cabu ca. Cane weebibine ituge jaji egä iyeta Israela biname piyepu iyeta nuuja gawe biname yepä pana gemi. Mine iyeta niija mule me kokre cabu ninajininige.

¹⁰ Oogäräneji Mene te pepu jüicenige egä:
“Nuuja biname te conocäco lica gyene Acejiyame me opo gaabe je.

¹¹ Nuuja biname te lica toraca umle cama gyene.

Nuuja biname te lica toraca singi läbituge Acejiyame gome lenajame.

¹² Iyeta biname cina Acejiyame bau ca itu latatrongäripesi.

Teepi iyeta niija me itu läbitipesi.

Nuuja biname lica gyene lui te toraca mule jaawenuge, lica yepä te wawena.

¹³ Babo walya mene te täduge teeme tage cabu ca, epu pana niija lengo te lipu tasatuge gape cabu ca, gape te liba ätrugera cäco.

Niija mene te cobyame me niija uudi pana täduge teeme tage cabu ca nuuja biname bine sabe wawename.

¹⁴ Teepi claabe name pi alwi mene jüicemusi.

¹⁵ Teepi wata nuuja biname bine niija jaawenemusi; budre me yaaglecemusi.

¹⁶ Ngänu gyene teepi cewe ne liba yaabmalusi, pita piyepu mäpu puma birige teeme niija mule name pi.

¹⁷ Teepi umle cäco gemi poode cama lenaja.

¹⁸ Teepi cuta umle cäco gemi wälu pana äbita Acejiyame me opo gaabe je.”

¹⁹ Süige, mine umle gemi egä iyeta mene Cotre Mene cabu lui eei biname täöpume lui cina Cotre Mene ngalebora yaacrajimuge. Pepu aitreja mene lui iyeta ai gawecewe biname bime täöpume mine bojä agime mime niija mule name pi, ingle mine iyeta cirege aclajuta Acejiyame me opo gaabe je atrana täöpume.

²⁰ Nuuja biname te licarage Acejiyame me opo gaabe je conocäco läbituge teeme Cotre Mene waweneca cabu ca, yepä Cotre Mene me kaakesea agesa: Biname bine umle wawename egä teepi niija mule cuta jaawenemusi.

Acejiyame Lipu Biname bine Conocäco me Jaawenemuge

²¹ Yoo, Acejiyame gaabe ne ituge awabudnita egä biname cina lipu Acejiyame me opo gaabe je conocäco me läbitininusi, piyepu ai gaabe lica birige cotre wawena. Cotre Mene piyepu mename biname bime mene cina itu teitnäjüjisi peei gaabe ne.

²² Biname cina Acejiyame cama conocäco läbitininusi, teepi liba Yeesu Keriso ne jättrungusi. Peese nyene yepä taatu gaabe. Nuuja mara gaabe lica gyene Israela biname bime täöpume piyepu nuuja gawe biname bime täöpume,

²³ Ingle naace gyene iyeta biname cina niija mule bine jaawenemusi. Iyeta biname lui toraca ingwe gaaberage gemi Acejiyame bau ca, tabe lui conocäco piyepu jamyacu apacljera cama gyene.

²⁴ Yepä, Acejiyame te biname bine papa itityeräjenemige teeme babo miiji cabu ca. Tabe teebibine teeme täöpume kälyä jaawenemuge Yeesu Keriso me kaakesea name pi, lui kaakesea te biname bime mäpu daremu yääyeblinge-muge.

²⁵ Acejiyame Yeesu ne jityepuji biname cabu me teeme tääpe piyepu uudi ca Acejiyame ne iiwärejame biname bine teeme niyaniya mule cabu ca äsecerame. Yeesu Keriso me uudi tapiruji, tabe budre jepänuji, siige biname bime äsecerera gaabe pepu jewenuji. Yoo, biname cina ai äsecerera gaabe ne jätänusi, teepi liba Yeesu ne jättrungusi. Acejiyame peei äsecerera gaabe ne jewenuji, pepu pi jewabemuji egä teeme mule uja niinäce padare cabu lui conocäco ge, tabe lui padare cabu biname bime niija mule bine yääsuwäjemuge,

²⁶ Ingle tabe ingwe padare ne jewagrijenuji Keriso liba tatyaramtepi biname bime mäpu daremu ne äyebtingame. Tabe ai padare cabu teemämu awabudnitenige egä tabe conocäco gyene, ingle peei lui conocäco mule gyene tabe biname bine mäpu daremu cabu ca lipu conocäco me jaawenemuge, lui cina Yeesu ne jättrungusi.

²⁷ Yoo, nuuja miiji lica gyene biname teemämu awepeyeräjame, ingle naace popi puu biname cina umle gemi awepeyeräja waadename cotre waweneca täöpume, yepä teepi umle cäco awepeyeräja waadename ätrunga täöpume.

²⁸ Yoo, pajecu gyene egä biname te Acejiyame cama conocäco läbituge ätrunga cabu ca, lica cotre waweneca cabu ca.

²⁹⁻³⁰ Acejiyame peese nyene yepä taatu Israela biname bime täöpume piyepu nuuja gawe biname bime täöpume. Tabe Israela biname bine conocäco me cire jaawenemepi teeme

ätrunga name pi, cuta piiyepu nuuja gawe biname bine conocäco me cire jaawenemepi teeme ätrunga name pi.

³¹ Yoo, cane lica peei mene jiićenine mime Cotre Mene äyebliᅅtame, inᅅle naace gyene mine liba Yeesu ne jäätrungusi, mine piba taatu miiji gemi teeme cotre cāᅅgena wawename.

4

Abrahamo me Ätrunga cabu ca Mine Umle Äbitininago eᅅä Ätrunga Lui Baborage Gwidape Gyene

¹ Mine nᅅene jwaatwananinago Abrahamo poto cidi me, tabe lui mime Israela biname bime kaakesaare gyene.

² Abrahamo Acejiyame me opo gaabe liba conocäco me läbituge teeme kaakesea ca, piba teeme inᅅle pisi nyene teemämu awepyeräja, yepä pepu lica ge. Abrahamo äblicäco teeme kaakesea ne awepyeräja, inᅅle naace gyene

³ Oogäräneji Mene te jiićenige eᅅä, “Abrahamo Acejiyame ne jitrungige, siige teeme ätrunga name pi Acejiyame teebine einige conocäco ca.”

⁴ Yoo, biname te liba rarekaake jääpānuge teeme kaakesea cabu ca, tabe lica teeme rarekaake poto cidi me nᅅene jwaatwananuge eᅅä, “Agesa owecu gwidape cāme täapume.” Eewe, tabe nᅅene jwaatwananuge eᅅä, “Agesa cāme daremu cāme kaakesea täapume.”

⁵ Yepä, biname te liba Acejiyame ne jäätrunguge, Acejiyame piba peei cabu ca teebine conocäco me jaawenuge. Peei ätityera lui daremu lica gyene, inᅅle pui biname te lica teeme kaakesea cabu ca Acejiyame cama conocäco läbituge. Yoo, Acejiyame te conocono biname bine yaainemuge conocäco ca, eei biname lui cina teebine jäätrungusi.

⁶ Ai mene lui cāme taatu lica gyene, yepä ujarage Daawida te mene jiićuji pui biname me gege poto cidi me, Acejiyame lui ne conocäco me jaawenuge teeme waweneca kaake poto ca.

⁷ Daawida mene bine yoogäremuji peei poto cidi me Salamo uupera peba cabu eᅅä: “Babo nᅅenecu gege gemi pui biname lui bime conocono Acejiyame te yiisibricmuge, lui cina kälyä gemi teeme conocono mule cabu ca.

⁸ Teepe babo nᅅenecu gege gemi, inᅅle siige, Acejiyame te lica inᅅwe ca acnema teeme conocono bine.”

⁹ Yoo, Daawida me mene poto cidi me mine nᅅene jwaatwa-naninago eᅅä pui babo nᅅenecu gege laati bemii? Nää, pui biname täapume taatu peei mene, lui bime tääpe matikolä iirputāneji gemi Acejiyame me cewecu acatame? Eewe, lica teeme taatu me. Peei nᅅenecu gege cuta teeme täapume lui cina jäätrungusi, yepä teeme tääpe cabu cewecu lica gyene, inᅅle mine umle gemi eᅅä Acejiyame Abrahamo ne einige conocäco ca teeme ätrunga name pi.

¹⁰ Tabe lui padare cabu peei ne jwenige, nää Abrahamo me tääpe iirputa kaakesea niinäce gaabe, coo inᅅwe gaabe ca? Yoo, Abrahamo liba camuge teeme tääpe iirputa, Acejiyame teebine einige eᅅä, “Conocäco biname gyene.”

¹¹ Abrahamo inᅅwe ca teeme tääpe matikolä ne jiiirputuji cewecu täapume eᅅä Acejiyame teebine ituge acata teeme ätrunga name pi. Yoo, peei name pi weene iyeta lui cina Acejiyame ne jäätrunguye piiyepu tabe lui bine conocäco me niwenininuge, Abrahamo lui weeme ätrunga kaakesaare gyene, ngānu gyene cewecu liba lica yaacatuye.

¹² Cuta mime poto cidi me lui cewecu cama gemi, Abrahamo cuta mime kaakesaare gyene, inᅅle mine page Acejiyame ne jäätrungusi, Abrahamo lipu teebine itu jitrunguji, tabe liba camuge cewecu ne acata.

Abrahamo Acejiyame me Miiji ne Ecatuji Teeme Ätrunga cabu ca

¹³ Ujarage Acejiyame liba Abrahamo ne jejuji eᅅä, “Weene ai gawecewe ne cirege acata, maane piiyepu mäāme kaakesaare cama,” pui padare cabu Abrahamo nuuja umle lica ge Oogäräneji Cotre Mene poto cidi me, inᅅle pui cotre me padare camuge atyaramta. Yoo, Acejiyame Abrahamo ne peei mene jejuji lica teeme cotre wawena name pi, yepä naace name pi eᅅä tabe Acejiyame ne jitrunguji, piba teeme hau ca mene itecijuji eᅅä, “Maane cāme täapume conocäco biname gāte.”

¹⁴ Yepä biname te liba Acejiyame me miiji ne jääpānuge cotre wawena ca, piba nuuja inᅅle lica gyene ätrunga täapume, cuta piba papa gyene Acejiyame lui mene ituge jaji.

¹⁵ Yoo, mine liba cotre ne atropengta, mime mäpu daremu pisi nyene peei täapume, yepä cotre liba lica ge, piba cuta lica gyene cotre atropengta.

¹⁶ Yoo siige, Acejiyame nᅅena miiji ituge jaji ceerame, mine ätrunga ca jääpānusi, naace täapume eᅅä Acejiyame owecu name pi papa ceerame, piiyepu naace täapume tabe iyeta Abrahamo me kaakesaare bine ceerame. Lica Israela biname taatu cina jääpānusi, lui

cotre bine jaawenemusi, yepä cuta eei cina lui Abrahamo pana Acejiyame ne jäätrungusi. Abrahamo peese nyene lui ätrunga cabu mine iyeta bime babe,

¹⁷ Acejiyame Abrahamo ne lipu jejuji Oogäräneji Mene cabu egä, “Cane meebine babe me naawenepene bucurage gawe maramara biname bime täápume.” Yoo, Acejiyame me opo gaabe, Abrahamo lui epu pana babe liiyepu mime täápume. Tabe Acejiyame ne jitrunguji lui me kokre pisi nyene budre biname arpinerame, piyepu lui te mene ca gwidape bine jaawenemuge, lui cina lica ituge lenaja.

¹⁸ Abrahamo teebine jewagrijuji teeme mene bägrä poto cidi me toraca me wawename, ngänu gyene tabe puu umle lica ge Acejiyame te peei ne lipu pagege wawena, tabe papa jewagrijuji. Siige, ingwe ca tabe kaakesaare ngii jepänuji maramara gawe biname bime bau ca, epu pana Acejiyame teebine lipu itu jejuji egä, “Määme kaakesaare bucurage cirege äbita.”

¹⁹ Mine Abrahamo me ätrunga poto cidi me ngene jwaatwananinago. Tabe yepä hanred kämäge mameta joomluji, yepä teeme ätrunga te enajuji kokre cama. Tabe ngene jotwanuji egä, “Cane moda gäne; cane budre mameta gäne, cuta piyepu căme coga Saara tabe äblicăco bägrä päpäna,”

²⁰ yepä tabe lica jejuji egä, “Acejiyame me mene äblicăco äbita.” Tabe teeme ätrunga cabu kokre äbituji, siige Acejiyame ne ewepyeräjuji,

²¹ jejuji egä, “Acejiyame me mene toraca me pa läbitepi. Cine bägrä ne pagege päpäna.”

²² Peei name pi Acejiyame liba teeme ätrunga ne jepänuji, tabe jejuji egä, “Maane căme täápume conocăco biname gäte.”

²³ Yoo, peei mene egä “Maane căme täápume conocăco biname gäte,” lui lica oogäräneji ge Abrahamo täápume taatu,

²⁴ yepä cuta mime täápume oogäräneji ge, Acejiyame lui bine cirege jaji egä, “Weene căme täápume conocăco biname gemi,” mime täápume lui cina teebine jäätrungusi, lui te mime Yageyame Yeesu ne budre cabu ca erpinantuji.

²⁵ Yoo, mime conocono mule name pi tabe budre äbituji, piyepu budre cabu ca arpinanteji gyene naace täápume mine conocăco äbitame Acejiyame cama.

5

Acejiyame me Ätityera Mime täápume

¹ Ai ingle naace gyene mine ätrunga ca conocăco me ituge äbita Acejiyame me opo gaabe je, mime poode pisi nyene Acejiyame cama mime Yageyame Yeesu Keriso me kaakesea name pi.

² Tabe mime ätrunga ca mibibine niwadininige teeme babo miiji cabu lenajame. Mime babo ngenecu gege pisi nyene, ingle mine umle gemi egä mine Acejiyame me jamyacu apacıyera cabu cirege lenaja.

³ Mine liba mäpu jääpänusi, mime ngenecu gege cuta pisi nyene, ingle naace popi mine umle gemi egä peei mäpu te mibibine niwenininuge bojăcu lenajame,

⁴ piyepu peei bojăcu lenaja te mime ngenecu bine kokre me jaawenemuge, piyepu ngenecu kokre cama mine jaawagrijuji Acejiyame ne tabe mibibine äsecrerame.

⁵ Peei awagrija lica papa me läbituge, ingle tabe Aceji Seemo ne ituge ätyepa mime yepäyepä trupa cabu lenajame mime ngenecu bine umle wawenename egä teeme baborage singi pisi nyene mime täápume.

⁶ Yoo, mine liba äblicăco mimămu ätityerăja, Acejiyame me miijirage padare cabu, Keriso te piba budre äbituji mibibine ätityerame, lui niija conocono biname gemi.

⁷ Yoo, mime gawe biname bime mule cabu, nuuja biname te pama lica gyene budre äbita nuuja biname ne ätityerame, ngänu gyene tabe conocăco biname coo piyepu miiji biname birige, yepä Acejiyame me mule mara gyene.

⁸ Teeme singi epu baborage gyene mime täápume egä pui padare mine liba conocono biname ge, tabe piba teeme Bägrä Yeesu ne tityepuji budre äbitame mibibine ätityerame.

⁹ Yoo, Yeesu liba budre äbituji, teeme uudi te tapiruji mibibine Acejiyame me opo gaabe je conocăco wawename, cuta piyepu teeme peei ätityera ca mine cirege äsecrera mäpu daremu cabu ca, Acejiyame lui biname bine cirege ceera teeme niija mule täápume.

¹⁰ Mine niinäce Acejiyame cama cubuyame pana ninajenäjimi, yepä teeme Bägrä me budre cabu ca Acejiyame te mibibine teeme biname me itu niwenipi. Yoo, page mine teeme biname gemi, piyepu tabe mibibine niija mule cabu ca toraca cire nisechräripi teeme Bägrä me ireclota name pi.

¹¹ Peei name pi mime baborage ngenecu gege pisi nyene Acejiyame täápume, lui te mime Yageyame Yeesu Keriso name pi mibibine teeme biname me itu niwenininuji.

Adamu cabu ca Biname cina Budre ne Jepänujisi; Yepä, Keriso cabu ca Teepi Ireclota ne Jepänenisi

¹² Yepä biname Adamu te conocono mule ne jewenuji, piba budre äbituji teeme niiya name pi. Pepu pi iyeta biname budre läbitininusi, ingle naace gyene teepi conocono mule cuta jaawenemusi.

¹³ Acejiyame te Cotre Mene Moose ne liba camuge ceera, biname cina piba niiya mule bine tewenemäjumesi. Yoo, peei biname cina Cotre Mene bine lica yaabiberäjemusi, ingle Cotre Mene camuge atyaramta, peei name pi Acejiyame teeme niiya mule bine lica ecnemuji Atrana Bimu täápume.

¹⁴ Biname Adamu cabu ca ngälu Moose me padare teepi niiya mule bine jaawenemusi, piba peei cabu ca budre jääpänanusi, ngänu ge teeme peei niiya mule lui cotre atropangta lica ge Adamu me liiyepu, tabe liba cude uli kuu ne erwuji.

Adamu me niiya mule te lipu joomlemige iyeta biname bine, pepu pana Keriso miji pi miji mule te totnenige iyeta biname bine ätityerame.

¹⁵ Acejiyame me owecu mule mara gyene Adamu me conocono mule cabu ca. Toraca gyene egä bucurage biname cina budre läbitininusi pui yepä biname Adamu me conocono mule name pi, yepä bucurage biname cina conocono mule täápume kälyä läbitininusi pui nuuja biname Yeesu Keriso me ätityera name pi, ingle naace gyene Acejiyame babo owecu gyene biname bime täápume.

¹⁶ Cuta piyepu Acejiyame me owecu piyepu ätityera mule baborage gyene Adamu me conocono mule cabu ca. Niinäce Adamu yepä conocono mule ne jewenuji, piba Acejiyame teebine jejuji egä, "Maane conocono biname gätel!" Yepä, ingwe ca bucurage biname liba conocono jaawenemusi, Acejiyame piba teebibine yäätityäremuge, jaajemuge egä, "Weeme conocono piti nemi, yepä weene kälyä gemi peei cabu ca Yeesu Keriso me miji kaakesea name pi."

¹⁷ Cuta piyepu Acejiyame me ätityera mule kokre gyene Adamu me conocono mule cabu ca. Toraca gyene egä pui yepä biname me conocono mule name pi budre me kokre te joomlemuge iyeta biname bine, yepä peei nuuja biname Yeesu Keriso teeme ätityera mule lui babo kokre gyene budre me kokre cabu ca. Iyeta biname lui cina Acejiyame me owecu gwidape ne yaacatusi, piyepu teeme baborage miji cabu ca teeme täápume conocäco me läbitininusi, teepi ngälu cäco ireclota cabu yaacrajuge Yeesu Keriso me kokre cabu je.

¹⁸ Yoo, Adamu me conocono cabu ca iyeta biname conocono jaawenemusi, piba teeme mäpu daremu yaawademusi, yepä Yeesu Keriso me conocäco ireclota cabu ca tabe äsecrera gaabe ne jewenuji iyeta biname bime täápume teepi ngälu cäco ireclota ne päpäname.

¹⁹ Adamu me ätecija cäco mule cabu ca bucurage biname cina ätecija cäco läbitininusi, yepä Yeesu Keriso biname bine Acejiyame täápume conocäco cire jaawenemepi, ingle tabe Acejiyame me singi mene itecijuji, siige budre me äbituji biname bine ätityerame.

²⁰ Moose te biname bine jejananemuji Acejiyame me Cotre Mene, naace täápume Cotre Mene te teebibine awabame teeme niiya mule lipu bucurage gemi. Siige, biname cina liba umle läbitininusi teeme niiya lipu baborage gyene, teepi piba cuta umle läbitininusi Acejiyame me miji lipu baborage gyene biname bime täápume.

²¹ Niinäce, biname bime niiya mule te teebibine yaawademuge teeme budre me, yepä page Acejiyame me miji mule te biname bine yaawademuge teepi teeme opo gaabe je conocäco äbitame, piba ngälu cäco ireclota ne jääpänanusi mime Yageyame Yeesu Keriso me kaakesea name pi.

6

Mine Yepä me Läbitinago Keriso cama Lenajame

¹ Nää, weene pama apu jingenininige egä, "Nuuja niiya lica gyene mine liba conocono mule wawename, ingle piba Acejiyame me miji mule mime täápume cuta babo me läbituge."

² Pepu ngene gone jwaatwananinuye. Mime täápume conocono mule te ituge apira, siige mine äblicäco conocono mule cabu cääri lenaja.

³ Weene miji umle gemi egä mine liba niye ca äciseja ne ituge acata Yeesu Keriso me ngii cabu, mine epu pana egä ten cama yepä me itu äbitininujago. Yoo, mine epu pana gemi ten cama gigri budre ituge.

⁴ Peei niye ca äciseja cabu ca mine ten cama gigri budre, piyepu gape cabu gigri acranäneji gemi, siige mime Babe te Keriso ne budre cabu ca lipu erpi-nantuji teeme babo kokre ca, mine cuta pepu miji gemi arpinera kirece ireclota cabu lenajame.

⁵ Yoo, mine liba ten cama yepä me äbitini-nujago teeme budre cabu, mine cuta ten cama yepä budre cabu ca cirege arpinera.

⁶ Mine umle gemi ngena ge ingle ai budre mene tääpume. Mime sasa trupa agleji pana ge pui padare cabu teepi Yeesu ne baarge uli cabu liba etecwamtujisi. Pepu pi Acejiyame cuta miiji gyene agli mime trupa me kokre singi ne niyaniya mule tääpume mine niya mule me kokre cabu ca äsecrerame.

⁷ Ingle biname te liba budre pana birige, tabe piba asatäneji gyene niya mule me kokre cabu ca.

⁸ Yoo, mine liba Keriso cama ituge budre, mine jitrungenisi egä mine ten cama cuta ireclota me cire larpinärripago.

⁹ Yoo, mine umle gemi egä Keriso itu arpinantuji budre cabu ca, siige tabe lica budre ingwe ca. Budre me kokre te äblicäco teebine cääri oomlana.

¹⁰ Tabe yepä gäabu budre äbituji biname bime niya mule tääpume, yepä page tabe Acejiyame tääpume ireclota cama enajenige.

¹¹ Yoo, weene pepu ngena jotwananineye egä, “Cine budre gemi conocono mule waweneca tääpume, yepä Keriso Yeesu cama älengläcita miiji pi cine ireclota gemi Acejiyame tääpume.”

¹² Peei name pi gone weebibine niya mule te iwadininuge, weeme conocono singi wawename.

¹³ Cuta piyepu weeme tääpe gone ceera niya kaakesea wawename, yepä weemämu äcärineye Acejiyame bau me. Weene epu pana biname gemi lui cina budre cabu ca ituge äsecrera ireclota cabu me, peei name pi weene weemämu äcärineye Acejiyame bau me teeme miiji kaakesea wawename.

¹⁴ Weene lica Cotre Mule cabu inajininige, luma conocono mule te ibibi gyene weebibine oomlana, yepä weene Acejiyame me miiji cabu page inajininige. Peei name pi gone niya mule ne padare ceera.

Mine Miiji Conocäco Lenajame

¹⁵ Weene gone apu jingenininuge egä, “Ngänu gyene mine liba cotre bine jaatropangtemusi, ingle mine lica cotre mule cabu ninajininige, yepä mine lui Acejiyame me miiji cabu temi.” Pepu ngena gone jwaatwananinuye,

¹⁶ Ingle weene umle gemi egä lui me kokre cabu weene singi lenajame, pui kokre te weebibine iwadininige. Peei name pi weene liba conocono mule me kokre cabu singi lenajame, pui te weebibine iwadininuge budre me, coo weene liba singi Acejiyame me kokre cabu lenajame teeme mene ätecijame, pui te weebibine iwadininuge conocäco me äbitame teeme opo gaabe je.

¹⁷⁻¹⁸ Yoo, niinäce weene niya mule me kokre cabu itu inajininuji, yepä page weene kokre ngenecu cama yaacatuwe pui toraca mene ne, weene lui ituge ätecija. Acejiyame weebibine niya mule me kokre cabu ca itu isecrärinuji teeme singi cabu ibäcnininuji teeme toraca mule cabu lenajame. Peei name pi baborage eso Acejiyame tääpume.

¹⁹ Cane ai mene weeme ireclota cabu ca eboclomtenine weeme tääpume pajecu wawename. Niinäce weene tääpe piyepu ngena atwanena niya mule tääpume itu icranemujiye. Weeme niya mule piyepu jugi mule baborage äbitininujisi. Siige, page weene weemämu äbitineye toraca mule tääpume miiji piyepu conocäco mule taatu wawenecame.

²⁰ Niinäce weene liba itu inajininuji conocono mule cabu, weene piba Acejiyame me singi cabu lica inajininuji piyepu conocäco mule bine lica jwenemujiye.

²¹ Page weene ajiri gemi peei niya mule poto cidi me. Nää, weene ngena miiji daremu ne ituge päpäna pui niinäce mule cabu ca? Teeme daremu lui budre piyepu niya puupu cabu lenajame.

²² Yepä, page weene äsecräreji gemi niya mule cabu ca. Weeme niya singi bine weene lica jaawenemuye, yepä weene weemämu Acejiyame bau me ituge ceera teeme singi wawename. Page weeme daremu gyene conocäco mule wawenecame ngälu iyeteta ireclota weene cirege päpäna.

²³ Yoo, niya mule me daremu gyene budre piyepu niya puupu cabu lenajame iyeteta. Yepä, Acejiyame owecu gyene mime tääpume piyepu mibibine iyeteta ireclota ne nicärininige mime Yageyame Yeesu Keriso cama ngälu cäco lenajame.

7

Keriso me Biname bine Cotre Mule te Lica Joomlenemige

¹ Cäme ätrunga binamewale, weene ngena pa jiglipi ai mene, ingle weene umle gemi cotre poto cidi me. Biname te liba cotre mule cabu yaanajuge, cotre te teebine yaacanuge ngälu tabe budre läbituge, cotre me kokre piba siige.

² Peei lui epu pana rooriye cama magebi te lipu cotre cabu waanajuge, tabe miiji teeme rooriye cama yepä lenajame teeme ireclota ngälu gaabe, yepä teeme rooriye liba budre, siige peei cotre teeme täápume. Tabe piba miiji gwene cuta nuuja rooriye ne acata.

³ Yoo, tabe liba nuuja rooriye cama onajige, piyepu teeme niinäce rooriye te liba ireclota gyene, biname cina waainusi, “ero magebi!” ca, yepä rooriye te liba budre, tabe asatäneji gwene pui cotre cabu ca. Tabe piba ero magebi lica gwene, liba nuuja rooriye ne yaacatuge.

⁴ Yoo, căme binamewale, cotre mule poto cidi me weene peei magebi pana gemi. Cotre mule lui weeme täápume epu pana pui magebi me niinäce rooriye liiyepu. Yepä, weene Keriso me budre ituge acata cuta weeme täápume, siige weene epu pana gemi budre biname liiyepu cotre mule poto cidi me. Peei te lica gyene weebibine waadena. Keriso lipu budre cabu ca arpinantuji, weene pepu pana ituge arpinera kirece ireclota cabu me. Page tabe epu pana kirece rooriye liiyepu weeme täápume; weene teemi nemi. Weene miiji teeme kaakesea wawena Acejiyame täápume.

⁵ Niinäce mime ngene atwanena lui ai gawe me teule cabu. Mine liba umle äbitininujago cotre poto cidi me mene egä, “Gone apu pana mule wawena,” piba mime singi te babo me äbituji pui niyya mule täápume, siige mime tääpe me singisingi mine cuta jaawenemusi budre gaabe cabu abacitame.

⁶ Yepä, page mine äsecräjeji gemi cotre mule cabu ca. Mine epu pana budre biname liiyepu cotre mule poto cidi me. Cotre mule äblicăco mibibine căări oomlana. Siige mime täápume pui sasa mule, pui Oogărăneji Cotre Mene te lica mibibine niwadininuge. Page kirece mule te mibibine niwadininige, peei lui Aceji Seemo me.

Miiji Ngene Atwanena piyepu Niyya Ngene Atwanena Cubuyame pana Gegi Biname bime Trupa Ngalebora

⁷ Peei mene name pi pama poto biname cina pa jicemepesi egä, “Cotre lui niyya gwidape gyene,” yepä peei lui toraca lica. Cotre liba lica, mine piba umle lica lui mule gyene niyya, coo lui mule gyene miiji. Yoo, cotre mene pisi nyene egä, “Gone gwidape täápume singisingi läbitininuye.” Peei cotre cabu ca cane umle itu äbitujine pepu singi poto cidi me.

⁸ Peei cotre mene name pi căme niyya ngene atwanena piba tasatige, piba căme baborage singi pisi nyene nuuja biname bime gwidape täápume. Cane liba umle lica peei cotre mene, piba căme niyya ngene atwanena pama kaakesea căco yaanajuge căme ngenecu bora.

⁹ Yoo, niinäce cane miiji asicnantujine, ingle cane nuuja umle lica gäne cotre mene poto cidi me egä, “Gone peei niyya bine jaawenemute!” Yepä, cane liba umle äbitujine peei cotre mene poto cidi me, cane piba baborage singi äbitujine pui niyya mule wawenane.

¹⁰ Cuta piba taatu umle äbitujine egä cane budre gaabe cabu me ituge abacita, ingle niyya mule me daremu lui budre gyene. Peei cotre Acejiyame lui ca singi cebine ätityerame ireclota gaabe cabu lenajame, peei ca cane umle äbitujine egä cane budre gaabe cabu säne.

¹¹ Cane liba apu nangenige egä cotre mene wawena lui gaabe gyene iyeteta ireclota täápume, piba căme niyya ngene atwanena te tasatige piyepu peei cotre ca cebine singisingi me nawenige. Piba peei te cebine nawabenige egä cane budre gaabe cabu abacitenine.

¹² Yoo siige, cotre mene lui Acejiyame bau ca gyene, peei name pi iyeta teeme maramara cotre lui epucăco, miiji, piyepu conocăco gemi.

¹³ Cotre te lica cebine budre gaabe cabu nacitenige, yepä căme niyya ngene atwana te peei ne jewenenige. Căme niyya ngene atwana te miiji cotre ne ecatenige, cebine peei ca nangletnäjenige, piba nawabenige egä cane budre gaabe cabu säne. Niyya mule lui pepu gyene. Yoo, cotre mene cabu ca mine opo yaawatnusi lipu toraca niyyarage gyene mime niyya ngene atwanena.

¹⁴ Mine umle gemi egä Cotre Mene lui Acejiyame bau ca gyene, yepä cane binamerage gäne. Niyya mule te căme ngenecu ne joomluge.

¹⁵ Căme mule poto cidi me cane toraca umle lica gäne: cane căme toraca singi bine lica jaawenemune, yepä lui mule täápume cane singi lica gäne, peei bine jaawenemune.

¹⁶ Yoo, cane liba jaawenune cane lui mule singi lica wawenane, peei mule ca cane jewabenine căme toraca asicnenta ne egä, “Cotre mene lui miiji gyene.”

¹⁷ Stige, peei lui căme toraca singi lica gyene egä cane niyya mule bine jaawenemune, yepä căme niyya ngene atwana te tasatige căme ngenecu cabu ca, cane puma cita ca peei niyya bine jaawenemune.

¹⁸ Cane umle gäne egä căme trupa cabu nuuja miiji lica gyene. Cane cămămu äblicăco gäne căme tääpe ne giri acita miiji mule wawenane. Cane singi gäne, yepä äblicăco!

¹⁹ Căme singi pisi nyene miiji mule wawenane, yepä cane lica peei bine jaawenemune. Cane singi lica gäne niyya mule wawenane, yepä cane peei bine jaawenemune.

²⁰ Cane liba peei bine jaawenemune lui tääpume cane singi lica gäne, piba lica canerage te peei bine wawena, yepä pui niyya ngene atwanena cina peei bine jaawenemusi lui cina täsuge căme ngenecu bora ca.

²¹ Yoo, căme mule apu gyene: Cane liba singi miiji wawename, niyya ngene atwanena te piba tasatuge, cebine nacanuge niyya cabu me.

²² Pisi nyene căme ngenecu bora baborage singi Acejiyame me Cotre wawename,

²³ yepä cane asicnantenine cuta mara kokre ngene atwanena piti nemi căme cabu. Peei cina căme miiji singi ne jäänäcnutusi, cebine kokre cama noomlusi căme tääpe me niyya singi mule wawename.

²⁴ Cane peei name pi babo ngenecu mäpu gäne. Laati te ibibi gyene cebine asatame ai niyya mule cabu ca, lui te cebine nacanuge căme budre me?

²⁵ Peese nyene Yeesu Keriso! Tabe te äsecrera gaabe ne itu jewenuji. Baborage eso Acejiyame tääpume, lui te Yeesu ne tityepuji mibibine ätityerame!

Yoo siige, mimerage kokre ca mine äblicăco Acejiyame me Cotre wawename, ngănu gyene mime singi pisi nyene, ingle mime tääpe me niyya singi te mibibine niwadininuge niyya gaabe cabu me.

8

Aceji Seemo me Ätityera ca Mime Ireclota Miiji Gemi

¹ Yoo, ai ingle naace gyene Acejiyame mibibine ninjuge, “Weene kälyä gemi,” page lui biname cina Keriso Yeesu cabu temi, teepi lica teeme niyya mule me daremu cirege päpäna Acejiyame bau ca.

² Aceji Seemo mibibine ire nitwinuge, niwadininuge Yeesu Keriso me toraca ireclota gaabe cabu. Peei name pi page niyya ngene atwanena teepi kokre lica gemi cebine acaname niyya gaabe cabu me, piyepu cane asatäneji gäne niyya mule me budre daremu cabu ca.

³ Yoo, Acejiyame me Cotre Mene te äblicăco biname bine miiji gaabe cabu me waadena, ingle binamerage bime kokre ibibi lica gyene teeme niyya ngene atwanena äyecrejame. Acejiyame peei name pi nuuja gaabe ne itu jewenuji, teemerage Băgră ne itu tityepuji budre äbitame mime niyya mule daremu ne äyeblyngame. Yeesu täduji biname pana, biname pana ngenecu cama, yepä teeme mara kokre puga ge niyya ngene atwanena bine ägyemame. Tabe conocăco enajuji biname bime niyya mule äyeblyngame.

⁴ Puma cita ca mine miiji gemi Acejiyame me conocăco cotre bine wawename, mine liba kokre ne acata Aceji Seemo bau ca mime niyya ngene atwanena bine äyeblyngame.

⁵ Biname lui cina yaacrajuge teeme tääpe me singisingi mule cabu, teepi jăje ngene jwaatwananinusi teeme tääpe me singi wawename, yepä biname lui cina yaacrajuge Aceji Seemo lipu jaajemuge teebibine, teepi jăje ngene jwaatwananinusi Aceji Seemo me singi wawename.

⁶ Biname lui cina teeme tääpe me singi jaawenusi teepi budre gaabe cabu temi. Biname lui cina Aceji Seemo me singi jaawenusi, teepi toraca ireclota gaabe cabu temi, piyepu ngenecu poode pä jăäpänepesi.

⁷ Yoo, biname te liba teeme singi mene yăätəcijuge, tabe cubuyame pana läbituge Acejiyame tääpume, ingle naace gyene tabe Acejiyame me Cotre Mene lica yaacatuge, piyepu peei ätecija căco gaabe cabu tabe äblicăco Cotre Mene wawena.

⁸ Yoo, teepi lui cina teemerage singi bine jaawenemusi, teepi äblicăco Acejiyame ne ngenecu miiji me wawena.

⁹ Yepä, weene pepu lica gemi. Weene weemerage singi lica jaawenemuye, yepä weene Aceji Seemo me singi jaawenemuye, liba toraca pisi nyene Aceji Seemo weeme trupa cabu je. Yoo, laati bau Keriso me Seemo lica gyene, pui biname cuta lica gyene Keriso me biname.

¹⁰ Yepä, Keriso me Seemo liba pisi nyene weeme yepăyepă trupa cabu, weeme tääpe puu budre pagege niyya mule name pi, yepä weeme seemo toraca ireclota cama gyene page piyepu iyeteta, ingle naace gyene Acejiyame weebibine teeme tääpume conocăco me ituge wawena.

¹¹ Cuta piyepu, liba Acejiyame me Seemo pisi nyene weeme cabu, Acejiyame lui te Yeesu ne budre cabu ca itu erpinantuji, tabe cuta weeme budre tääpe arpinera cirege. Aceji Seemo lui te weeme cabu yaanajuge teeme kokre pisi nyene peei ne wawename.

¹² Yoo, căme binamewale, ai name pi mine miiji Aceji Seemo me gaabe ne yaacatusi, gone weeme tääpe me singi ne yaacatusi,

¹³ ingle weene liba peei mule ne jaawenuye, weene budre daremu cirege päpäna. Yepä, weene liba weeme tääpe me singi ne jăäggyue Aceji Seemo me kokre ca, cuta lica peei niyya mule wawename, weene toraca ireclota ne cirege päpäna iyeteta.

¹⁴ Lui cina Aceji Seemo me singi yaacatusi, teepi Acejiyame me bägrä gemi.

¹⁵ Yoo, Acejiyame Aceji Seemo ne tityepuji weeme cabu lenajame lica weebibine ädretnecame piyepu cääri wälu me wawename, yepä mibibine teeme ingle cabu me waadename. Mine piba müiji gemi teebine awejena egä, “Babe, cime babe.”

¹⁶ Aceji Seemo te mime yepäyepä seemo bine jaajananemuge egä, “Maane toraca Acejiyame me bägrä gäte.”

¹⁷ Mine lui Acejiyame me bägrä gemi, mine Babe me babo müiji ne teeme bau ca cirege päpäna. Keriso müijirage puupu ne ituge acata teeme Babe bau ca, piyepu mine ten cama gigri cirege lenaja. Page mine poto mäpu bine jääpänemusi mime müiji kaakesea name pi, Keriso lipu mäpu ituge päpäna. Yepä, mine liba teeme täapume mäpu bine jääpänemusi ai gawecewe cabu, mine cuta teeme jamyacu apaclyera cabu cirege lenaja.

Mine Teeme Jamyacu Apaclyera Cabu Cirege Lenaja

¹⁸ Cane ngene jotwananenine egä page mime mäpu lui matimatirage gemi jamyacu apaclyera cabu ca, Acejiyame lui ne cirege awabudnita mime täapume.

¹⁹ Iyeta gwidape Acejiyame lui bine itu tewenemuji, teepi cängenarage jewagrijenisi ngälugaabe bimu ne, Acejiyame lui bimu cabu cirege awabudnita teeme jäjäcräneji bägrä bine.

²⁰ Ai ingle naace gyene pui sasa padare cabu ca biname cina liba conocono mule ne niinäce jenuwujisi, iyeta gawecewe gwidape cina ocwäwäneji cabu icrajuji. Iyeta gwidape cina singi cängena lenajame, yepä biname bime conocono mule name pi Acejiyame teebibine pepu ireclota ecäremuji, ingle tabe singi gyene iyeta gwidape cina cängena awagriyame pui bimu täapume teepi Acejiyame me binamewale cama gigri äsecrera ne päpäname ai mäpu ireclota cabu ca.

²¹ Yoo, iyeta ai gawecewe gwidape cina cirege äsecrera teeme ocwäwäneji cabu ca, piba mine lui cina Acejiyame me bägrä gemi, teepi mine cama pui jamyacu äsecrera cabu cirege lenaja.

²² Ingle mine umle gemi egä iyeta ai gawecewe gwidape cina keke mene cama cewe loocanininusi, epu pana magebi te lipu bägrä aplimla täapume cewe loocanuge ngälu page.

²³ Lica gawecewe gwidape taatu, yepä cuta mine te cewe loocaninininago, pui padare ne cängena jewagrijenisi, Acejiyame liba mibibine teeme jäjäcräneji bägrä me toraca wawename, mime täape tabe liba äsecrera ai gawecewe mäpu cabu ca. Aceji Seemo lui page mime cabu enajenige, tabe niinäce gwidape gyene pui jamyacu ireclota cabu ca mine lui ne cirege päpäna.

²⁴ Mine ätrunga cama teeme padare ne jewagrijenisi, cuta peei ätrunga ca mine äsecräreji ituge äbita peei jamyacu ireclota ne cirege päpäname. Yoo, mine liba gwidape ne cirege päpäna, siige mine lica ingwe ca awagrija peei gwidape täapume, ingle pisi nyene page.

²⁵ Yepä, mine liba camuge päpäna, mine piba cängena ätrunga cama jewagrijenisi.

²⁶ Yoo, mine liba kokre lica piyepu umle lica gemi lipu mene Acejiyame bau jajime, piba Aceji Seemo te mibibine nitityärininuge. Tabe te Acejiyame ne yaawejanuge mime täapume mara pana mule ca. Teeme irecu ätumuta mule lui müijirage gyene mene cabu ca,

²⁷ piyepu Acejiyame lui te jääpänemuge biname bime singi bine teeme ngenecu bora, tabe cuta piyepu umle gyene Aceji Seemo ngena singi gyene mime täapume. Aceji Seemo te teebine yaawejanuge pui gwidape piyepu mule täapume Acejiyame lui singi gyene teeme ätrunga biname bine ceerame.

²⁸ Yoo, mine umle gemi egä iyeta lui te läbituge, peei cabu Acejiyame kaakesea jaawenuge mime müiji täapume, lui cina babo singi gemi teeme täapume, piyepu lui bine tabe biname me itu niwenininuji ten cama iyeteta lenajame.

²⁹ Tabe lui biname bine niinäce jejäcremuji, teebibine cuta mara me jenenemuji teeme Bägrä Yeesu pana äbitame. Yoo, teeme Bägrä naane me läbituge mime täapume, cuta mine teeme täapume igane gemi.

³⁰ Yoo, Acejiyame lui bine mara me ituge wawena, teebibine cuta ala taasoglecemepi, piyepu tabe lui bine ituge ala asogleca, tabe cuta teebibine teeme täapume conocäco me jaawenemepi, piyepu lui bine conocäco me ituge wawena, tabe cuta teebibine teeme jamyacu apaclyera cabu itu yaacranemepi.

Lipu Baborage Gyene Acejiyame me Owecu Piyepu Singi Mime Täapume

³¹ Yoo siige, mine ngena mene jüicusi iyeta peei ätityera poto cidi me? Acejiyame liba mine cama gyene, laati te piba ibibi gyene mibibine toraca niüya wawename?

³² Tabe teemerage Bägrä ne lica sewecnistuji, yepä teebine owecu gaabe cabu tityepuji budre äbitame iyeta mime täapume. Peei cabu ca mine umle gemi egä tabe singi iyeta gwidape Bägrä cama mibibine ceerame.

³³ Biname cina äblicäco Acejiyame me jäjäcräneji biname bine jaji egä, “Weene äblicäco Acejiyame gome lenaja, ingle weene conocono gemi.” Teepi äblicäco gemi pepu iicana, ingle Acejiyame te ituge jaji egä, “Weene căme opo gaabe je conocăco biname gemi.”

³⁴ Cuta Yeesu Keriso tabe licarage mibibine aina, yepä tabe lui budre äbituji, piba cuta arpinantuji Acejiyame me camu poto ime gome lenajame, siige tabe Acejiyame ne ewejanenige mime miiji täápume.

³⁵ Mine liba mäpu piyepu pita jääpänusi, coo ämugetna nuuja biname bau ca; mine liba loolo me cewe piyepu gwidape căco; coo mine liba drowä biname coo piyepu budre jääpänusi, nää pui padare Keriso me singi cuta pisi nyene mime täápume? Yoo, pisi nyene.

³⁶ Oogäräneji Mene te jücenige egä,
“Määme täápume teepi singi cibibine budre me agleca iyeta padare bimu gaabegabe.

Mibibine epu niwenininusi maamoi liiyepu, lui me agleca padare mameta gyene.”

³⁷ Siige, ngänu gyene ngena te tädenige, Keriso me baborage singi pisi nyene mime bau; tabe nitityäripi mine toraca uutrutame.

³⁸⁻³⁹ Cane umle gäne egä nuuja gwidape te äblicäco mibibine äyeblena Acejiyame me singi cabu ca. Mime budre cabu piyepu mime ireclota cabu teeme singi pisi nyene. Nuuja kokreyame gwidape epu pana mename seemo coo piyepu cable coo maadubi, teepi äblicäco mibibine äyeblena Acejiyame me singi cabu ca. Piyepu page ngena cina äbitinisi cuta ciige ngena cina cire läbitipesi, piyepu ngena pisi nyene dume cabu, coo ngena pisi nyene gawe ngalebora, teepi cuta äblicäco mibibine äyeblena Acejiyame me singi cabu ca. Yoo, iyeta Acejiyame lui bine tewenemuji, peei bime nuuja te äblicäco mibibine äyeblena Acejiyame me singi cabu ca, mine lui ne jääpänusi mime Yageyame Keriso Yeesu name pi.

9

Israela Biname bime Äjäcra poto cidi me

¹ Cane toraca mene jijenininine, lica walya, ingle cane lui Keriso me biname gäne. Căme ngenecu bora Aceji Seemo te lui ire natwenige, peei cabu ca cane ngene ca eglenine egä cane walya lica gäne.

² Căme toraca mene agesa: Cane baborage ngenecu mäpu piyepu baborage owecu gäne cămerage Israela binamewale poto cidi me, ingle teepi singi lica gemi Keriso me ätityera ne acatame.

³ Cane liba ibibi gäne teebibine ätityerame, cane singi căme puupu Keriso me biname cama teebibine ceerame cane niija puupu me äyebtingame, yepä peei äblicäco gyene.

⁴ Bucurage Israela biname cina Keriso ne jäägyusi, puu teepi lui Acejiyame me sasa cabu ca jäjäcräneji biname gemi; cuta tabe jamyacu apacljera teeme bau itu eboclomtuji, teebibine jäje tejanenanemumi egä, “Cane weeme Acejiyame gäne; weene căme biname gemi;” puu tabe teebibine cotre mene piyepu iiwäreja mule itu ecäremuji, cuta piyepu tabe teebibine mene jejemuji ingwe ca äsecerera biname ne ätyepame;

⁵ puu modamoda biname Abrahamo, Isacako, piyepu Yakobu teeme kaakesaare gemi, cuta piyepu Keriso liba biname me äbituji, tabe Israela biname ge, yepä teepi teeme Keriso ne jäägyusi. Yoo, Acejiyame lui te iyeta biname bine yaawademuge, miiji teeme ngii ne awepyeräjame ngälu căco. Eso!

⁶ Peei lui lica epu egä Acejiyame me jajeji mene toraca lica läbituge, yepä apu egä lica iyeta Israela biname lui Acejiyame me toraca Israela biname gemi.

⁷ Piyepu, lica iyeta Abrahamo me kaakesaare lui Acejiyame me bägrä gemi. Acejiyame Abrahamo ne jejuji egä, “Määme toraca kaakesaare eei gemi lui määme bägrä Isacako bau ca.”

⁸ Yoo, lica iyeta Abrahamo me kaakesaare lui Acejiyame me bägrä gemi, yepä teepi taatu lui cina Isacako me kaakesaare gemi, ingle Isacako itu aplimluji Acejiyame me jajeji mene ibibi me äbitame.

⁹ Pui mene lui egä, “Toraca padare te liba tatyaramtenige, cane piba tacnenutenine, siige Saara imäbägrä cama pa waanajepi.”

¹⁰ Cuta piyepu ingwe ca Isacako babo äbituji, coga ocatuji, siige teeme coga Rebeka me padare te liba mameta ge päädepäde imäbägrä päpäname,

¹¹⁻¹² Acejiyame piba teebine jojuji egä, “Igame te naane ne cire jaatwepi.” Tabe niinäce peei mene Rebeka ne jojuji; Rebeka ingwe ca imäbägrä bine jääpänuji. Yoo, ingle naace gyene camuge teeme aplimla, peei neeneni imäbägrä lica nuuja miiji coo piyepu niija mule ituge wawena pui padare cabu Acejiyame liba teeme mage ne pui mene jojuji. Yoo, lui te äbituji, Acejiyame ngene ca itu egluji peei ne waweneme, lica bägrä bime mule name pi, yepä Acejiyame tabe singi ge pepu waweneme.

¹³ Oogäräneji Mene pisi nyene peei poto cidi me Acejiyame lui jiicuji egä, “Cane Jakobu täápume singi äbitujine, yepä Esau ne jigyjuline.”

¹⁴ Nää, weene ngene jotwananiniye egä Acejiyame me mule conocono gyene? Pepu gone!

¹⁵ Ingle Acejiyame Moose ne itu jejuji egä, “Cane laati ne singi ätityerame, cane peei biname ne yäätityärune. Cäme bau sine laati me täápume cane owecu läbitune.”

¹⁶ Yoo, Acejiyame liba biname ne jaajuge, coo lica jaajuge, peei lui biname me singi piijepu wawena cabu ca lica birige, yepä naace name pi egä Acejiyame singi pui biname ne owecu waweneme.

¹⁷ Oogäräneji Mene cabu Acejiyame te Aikupito Mopeyame ne jejuji egä, “Cane mee-bine Mopeyame me naawenujine, ai ingle naace popi cane singi maane cäme kokre ne awabudnitame biname bime täápume, cuta piijepu ai ingle naace popi egä iyeta biname ai gawecewe cabu umle äbitame cäme ngii poto cidi me.”

¹⁸ Yoo, peei mene cabu ca mine umle läbitinago egä Acejiyame liba singi biname ne owecu waweneme, tabe jaawenuge; coo piijepu tabe liba singi nuuja biname ne ätecija cäco waweneme, tabe cuta peei ne jaawenuge.

Acejiyame Umle Gyene Mäpu Daremu Ceera Biname bine; coo Cuta Umle Gyene Owecu Waweneme Biname bine

¹⁹ Cäme binamewale, pama weeme yepä te singi gyene cebine ätemlame egä, “Acejiyame me mule liba pepu gyene, tabe piba äblicäco biname ne aitna teeme ätecija cäco mule täápume, ingle biname te äblicäco Acejiyame me singi äsäda.”

²⁰ Yoo, cäme biname, maane laasi näte? Nää, maane ibibi gäte Acejiyame ne äseblecäjame? Maane biname gäte. Mäame ireclota epu pana gyene diiba liijepu. Diiba te miiji lica teeme raranga biname ne ätemla egä, “Maane cebine apu ngenome nawenite?”

²¹ Ingle naace gyene diiba raranga biname te miiji ge teeme singi gwidape ne wawena teeme laame cabu ca. Tabe miiji ge neeneni diiba raranga yepä laame tomi cabu ca, yepä diiba ne raranga miijimiji kaakesea täápume cuta nuuja ne raranga domäji täápume.

²² Yoo, Acejiyame me mule pepu pana gyene. Tabe miiji gyene biname bine awabeja egä tabe singi lica gyene niija mule täápume, cuta teeme kokre pisi nyene niija mule biname bine äyebhengame. Yepä, tabe wata lica yääyebhengemuge. Tabe däägudägu läbitanuge biname bime täápume lui bime niija mule name pi tabe teebibine miiji gyene äyebhengame.

²³ Tabe cuta singi gyene teeme jamyacu apaclyera ne aboclomtame mime täápume, tabe lui bine owecu niwenininige, lui bine tabe ituge miiji me waweneca teeme apaclyera täápume.

²⁴ Mine peete nemi tabe lui bine itu ala nisoglicipi: lica eei taatu bine lui cina Israela biname bime cabu ca gemi, yepä cuta eei bine lui cina nuuja gawe biname bime cabu ca gemi.

²⁵ Agesa teeme mene jäjäcra poto cidi me teeme mename biname Hosea lui soogäruji egä, “Cane nuuja biname bine cäme bägrä me cire jaawenemepene,

lui cina lica cäme ingle cabu ituge.

Cane teebibine owecu cire jaawenemepene,

lui cina cäme owecu cabu lica ituge lenaja.

²⁶ Cuta lui gawe cabu biname bine ituge jaji egä,

‘Weene lica gemi cäme ingle biname,’

puma cane teebibine cirege jaji egä,

‘Cane lui Iyeta Lenajayame gäne, weene cäme bägrä gemi.’”

²⁷ Cuta nuuja mene pisi nyene Oogäräneji Mene cabu mename biname Isaya te jiicuji Israela biname bime poto cidi me egä, “Israela biname cina bucurage cire läbitipesi epu pana secre liijepu, yepä mime Yageyame te teeme cabu ca nesae pana biname taatu cire yaawademepi;

²⁸ Ingle tabe biname bine cirege jaatranemepi poto biname piba wata äyebhengame teeme ope gaabe ca.”

²⁹ Yoo, Isaya cuta nuuja ciige mene ituge jaji egä, “Yageyame teeme kokre baborage gyene. Tabe liba owecu lica gyene mine Israela biname bime täápume, tabe mibibine iyeta cire nibyageceji, epu pana tabe Sodoma piijepu Gomora cewe biname bine lipu itu jibiyagecemuji. Yoo, piba mime nuuja kaakesaare lica cirege.”

Acejiyame me Miiji Mene ne Israela Biname cina Lica Jäätrungusi

³⁰ Yoo, cane ngena poto cidi me jüicenine agesa: Gawe maramara biname lui cina lica teemämu läbitininusi Acejiyame täápume conocäco äbitame, Acejiyame teebibine conocäco me itu jaawenemepi, ingle naace gyene teepi teebine jäätrungepesi,

³¹ yepä Israela biname teepi cotre mule ne liba jäärngusi peei cabu ca Acejiyame täápume conocäco äbitame, teepi conocäco lica jääpänusi.

³² Ingle agesa: Teepi teeme waweneca mule ne jäätru-ngusi, cuta lica Yeesu ne jäätrungusi teeme conocäco täápume. PEEI toraca mene Yeesu me budre poto cidi me, teepi lui ne opo lica yaawatnepesi, epu pana gyene teeme gaabe cabu kula liiyepu, teepi lui ne lica jääpänusi, piba peei cabu ca yaatrametnemege.

³³ Pisi nyene Oogäräneji Mene peei poto cidi me egä Yeesu lui epu pana gyene kula liiyepu Israela biname bime täápume. Mene agesa:

“Ire, cane kula ne yaacitene Yerusalema cewe cabu Siiyona podo cabu je,
lui te jaawenemuge biname bine naabe atropengäja,
eei kula lui te teebibine jaawenemuge atrametname.

Yepä, lui cina teebine jäätrungusi,
teepi lica birige ajiri me äbita,
yepä miiji lenaja ne jääpänusi.”

10

¹ Cäme ätrunga binamewale, cäme babo singi pisi nyene cämerage Israela biname cina conocono mule cabu ca äsecrera iyeteta ireclota ne päpäname. Cane Acejiyame ne peei täápume ewejanenine.

² Cane teeme mule poto cidi me weebibine umle jiweninine egä teeme toraca singi pisi nyene miiji kaakesea Acejiyame täápume wawename, yepä teepi toraca umle lica gemi lipu gyene Acejiyame me biname me äbitame.

³ Teepi toraca gaabe ne opo lica yaawatnusi Acejiyame te lipu biname bine teeme täápume conocäco me jaawenemuge. Teepi singi gemi teemämu gaabe wawename cuta singi lica Acejiyame te teebibine teeme täápume conocäco wawename teeme gaabe ca.

⁴ Yoo, Keriso te cotre wawena mule ne ngälu me ituge acita biname cina peei ca conocäco me äbitame, ai ingle naace popi iyeta biname lui cina teebine jäätrungusi, siige teepi conocäco läbitininusi Acejiyame me opo gaabe je.

Äsecrera Gaabe Pisi Nyene Iyeta Biname bime täápume

⁵ Siige, Moose te mene itu soogäremuji cotre wawena mule ca Acejiyame me opo gaabe je conocäco me äbitame apu egä, “Laati te cängena jaawenemuge iyeta gwidape lui poto cidi me cotre mene te jiičenige, tabe peei cabu ca iyeteta ireclota cirege päpäna.” Yepä, biname cina äblicäco peei ne wawena.

⁶ Yepä, nuuja mene pisi nyene ätrunga ca conocäco äbitame apu egä: “Biname te äblicäco otni cabucewe me Keriso ne äiname,

⁷ piiyepu biname te äblicäco otni piiyemrage cupicu cabu me Keriso ne puma cita ca acaname.”

⁸ Yoo siige, teeme nuuja ingle lica gyene pepu wawename, ingle Keriso itu täinuji biname bine ätityerame piiyepu cuta itu arpinantuji budre cabu ca. Biname lui cina cime mene Keriso poto cidi me jäätrungusi, teepi peei ca Acejiyame täápume conocäco läbitininusi. Moose te jiičuji egä, “Acejiyame me mene cudecewe lica gyene, yepä weeme ngenecu bora piiyepu weeme tage cabu pisi nyene.”

⁹ PEEI name pi weene liba tage ca jiičemuye egä, “Yeesu lui cäme Yageyame,” piiyepu ngenecu cama jäätrunguye egä, “Acejiyame te Yeesu ne budre cabu ca erpinantuji,” weene piba äsecräreji gemi iyeteta ireclota päpäname.

¹⁰ Ingle naace gyene mine liba ngenecu cama jäätrungusi, mine Acejiyame täápume conocäco läbitininusi, cuta liba tage ca peei ätrunga poto cidi me jiičemusi, mine äsecrera gaabe ne jääpänusi.

¹¹ Yoo, Oogäräneji Mene te jiičenige Keriso poto cidi me egä, “Lui cina teebine jäätrungusi, teepi lica ajiri me äbita, yepä miiji lenaja ne jääpänusi.”

¹² PEEI mene lui iyeta biname bime tääpu myene, ingle naace gyene gaabe mara lica gyene Israela biname bime täápume piiyepu nuuja gawe biname bime täápume. Keriso lui yepä Yageyame gyene iyeta ätrunga biname bime täápume. Tabe babo miiji jaawenemuge iyeta lui cina teebine yaawejanusi.

¹³ Oogäräneji Mene cuta jiičenige egä, “Iyeta biname lui cina Yageyame me ngii yaawejanusi, tabe teebibine niija cabu ca cire yääsecrärempi.”

¹⁴ Yepä, biname cina teebine lipulipu yaawejanusi, liba teeme ätrunga lica? Piiyepu teepi lipulipu jäätrungusi, liba peei mene lica ituge ätecija? Cuta piiyepu teepi lipulipu yäätecijemuge, teebibine liba mene lica ituge jaji?

¹⁵ Piiyepu biname cina peei mene teebibine lipulipu jaajemusi, teepi liba lica ätyepäneji gemi? Oogäräneji Mene pisi nyene egä, “Babo müjirage gyene teeme otni lui cina Müiji Mene yaacanusi.”

¹⁶ Yepä, lica iyeta biname cina peei Müiji Mene ne yaacatusi. Sasa mename biname Isaya te jiiucuji egä, “Yageyame, laati te cime mene jäätrungepesi?”

¹⁷ Yoo, biname cina niinäce mene yäätəcijemuge, piba jäätrungusi, piiyepu biname cina müiji Keriso poto cidi me mene jajanena nuuja biname cina ätecijame.

¹⁸ Yoo, Israela biname bime poto cidi me, cane singi gäne jajime egä teepi peei mene itu itecijemuji. Oogäräneji Mene pisi nyene peei poto cidi me egä,

“Mename biname cina ituge otni iyeta poto ta.

Pui Müiji Mene itu waatnetnäjepi iyeta gawecewe cabu teepi luma icrajuji.”

¹⁹ Cuta piiyepu Israela biname bime padare puga ge cängena umle äbitame. Niinäce Moose te Acejiyame me mene Israela biname bine jejemuji egä,

“Cane gawe maramara biname bine müiji cire jaawenemepene,
weene piba ngenecu bora claabe me cire äbitipeye teeme müiji poto cidi me,
biname lui bine weene yaainemuye ‘umle cäco biname’ ca.”

²⁰ Cuta Isaya Acejiyame me mene nuuja gawe biname bime umle poto cidi me wälu cäco jiicemuji egä,

“Biname cina cebine ituge päpäna,
lui cina lica närngenusi.

Cane teeme bau me itu laboclomtepene,

lui cina cäme täöpume lica nätemlusi.”

²¹ Yepä, Israela biname bime poto cidi me tabe jiicemuji egä,

“Iyeta bimü cane ime uutanujine ngälu mämlē teebibine cäme bau awecname,
yepä teepi ätecija cäco piiyepu ägyiägyi biname gemi.”

11

Acejiyame Israela Biname bine Owecu Jaawenemuge

¹ Cane weebibine itemlininine egä Acejiyame nää teeme Israela biname bine ituge jägyi? Eewe, licarage! Cane age säne yepä Israela biname, Abrahamo me kaakesaare gäne, Benjamina me inge cabu ca.

² Yoo, Acejiyame lui bine niinäce jejäcremuji, teebibine lica iyebhengemuji. Weene umle gemi Oogäräneji Mene Eliya poto cidi me, tabe Israela biname bine lipu jeitnäjemuji, Acejiyame ne jejuji egä,

³ “Yageyame, teepi määme mename biname bine ituge agleca piiyepu määme iiwäreja dade bine ituge iiglicneja. Cane taatu ätrunga cama gäne, piiyepu teepi singi cuta cebine aglime.”

⁴ Agesa Acejiyame me daremu mene: “Eewe, maane taatu lica gäte. Cäme seven tausen biname piti nemi, lui cina kokorare lica ituge äpedna pui uuje ngü Baala täöpume teebine awejename.”

⁵ Page cuta pepu gyene: mine nesae pana biname piti nemi Acejiyame lui bine ituge jäjäcra teeme owecu name pi.

⁶ Tabe biname bine jäjäcremuge owecu name pi, lica pui biname bime müiji mule name pi. Yoo, Acejiyame liba yepä biname ne jaajuge müiji mule name pi, peei jaji lui daremu pana birige müiji mule täöpume, yepä pepu lica gyene. Acejiyame biname bine jäjäcremuge toraca owecu name pi.

⁷ Yoo, Israela biname cina lica jääpänsi teepi ngena täöpume jäärngusi, yepä pui nesae pana biname Acejiyame lui bine jejäcremuji, teepi jääpänsi. Nuuja Israela biname cina ätecija cäco läbitininusi.

⁸ Peei ätecija cäco mule poto cidi me Oogäräneji Mene pisi nyene egä,
“Acejiyame teebibine ngene atwanena dumä itu jewenemuji.

Teepi irecu ca lica päpäna,
tablame ca lica ätecija Keriso poto cidi me, ngälu page.”

⁹ Cuta peei poto cidi me Daawida te jiiucuji Oogäräneji Mene cabu nuuja poto ca egä,
“Teepi dade cabu adnatäreji gemi deedei täöpume.

Teepi ngene pa jwaatwananipesi egä, ‘Poode pisi nyene Acejiyame cama,’
yepä teeme ätecija cäco mule te teebibine pa joomlemepi.

Dici abrenuteji gyene.

Teepi pa yaatrametnemepesi, teeme mäpu daremu pa jääpänepesi.

¹⁰ Teepi irecu mäasumäsu pa läbitipesi,
piba teepi äblicäco päpäne.

Teepi äcupenapena otni teeme mäpu name pi.”

¹¹ Yoo, Israela biname cina teeme ätecija cäco mule name pi yaatrametnemuge, yepä teeme atrametna iyeteta lica gyene. Israela biname bime mule name pi Acejijame te nuuja gawe biname bine padare ecäremuji teeme biname me äbitame. Israela biname cina piba ire patre pa yaaglecemepesi nuuja gawe biname bine teeme miiji name pi, cuta teepi piba singi pui Miiji Mene ätecijame.

¹² Yoo, Israela biname bime niija mule name pi nuuja gawe biname cina babo miiji ne ituge päpäna. Peei miiji cuta baborage cire läbitepi, iyeta pui jäjäcräneji Israela biname liba ireclota biname bime tomi cabu cirege äbäcna.

Olibi Uli cabu ca Mine Acejijame me Mule Opo Yaawatnusi

¹³ Yoo, weene gawe maramara biname, ai mene lui weeme tääpume. Cane lui Acejijame me ätyepäneji biname gäne weene gawe maramara biname bime bau me, cuta piyepu peei kaakesea cäme tääpume babo miijirage gyene.

¹⁴ Cane yaapicetnärune cäme Israela biname bine ire patre agli me wawename pama poto cina Acejijame me owecu mule cabu äbäcname iyeteta ireclota ne päpäname.

¹⁵ Acejijame Israela biname bine liba ebmalemuji teeme ätecija cäco mule name pi, tabe piba nuuja gawe biname bine teeme biname me jebenemuji. Yepä, Israela biname cina teeme ätecija cäco mule ne liba cire yaabmalepesi, Acejijame cuta teebibine cire yaawademepi. Teepi piba epu pana budre biname liiyepu lui cina täcnärepi ireclota me.

¹⁶ Calwacupi ire acita mule pisi nyene yepäyepä deedei waadename iyeta deedei aboclomäjame miiji tääpume. Yoo, pepu pana Israela biname bime tääpume cirege äbita. Abrahamo lui Acejijame me inge cabu ge, piyepu teeme kaakesaare Acejijame me inge biname cirege äbita. Yoo, Israela biname lui epu pana gemi uli liiyepu: teeme braju liba Acejijame memi, teeme ciipe cuta teemi nemi.

¹⁷ Yoo, Olibi uli cabu ca mine Acejijame me mule ne opo ewatnenisi. Biname te poto ciipe bine yaacnapemuge teeme ätemäneji olibi uli cabu ca, piba pui ciipe bime puupu cabu tuwängle me glunu bora olibi uli me ciipe bine jäätäyemuge puma uutaname pui calwacupi uli cabu. Weene nuuja gawe biname lui epu pana peei glunu bora olibi uli me ciipe gemi. Page weene kokre piyepu miiji bine jääpänemuye Israela biname cama, peei glunu bora olibi uli me ciipe teeme ngedo ne lipu yaacatusi ätemäneji uli me braju cabu ca.

¹⁸ Weene gone gawe me jaawenemuye Israela biname bine, lui bime puupu weene ituge waadena. Weene nuuja inge lica gyene weemämu awepyeräja. Weene ciipe pana gemi, lica braju pana. Weene weeme kokre yaacatusi braju cabu ca.

¹⁹ Pama weene apu ngene jotwananiniye egä, “Yoo, peei niinäce ciipe bine ituge acnapa cime tääpume puupu wawename.”

²⁰ Peei toraca gyene. Teepi acnapäneji ge, inge naace popi teepi ätrunga cäco gemi, egäcäro weene teeme puupu cabu inajaninuge, inge naace popi weene Keriso ne jäät runguye. Yepä, weene gone ngenecu pudupudu; weene ire cängena inajipi!

²¹ Acejijame te lica Israela biname bime ätrunga cäco mule ne ire taatu jaacituge, yepä teebibine ituge äyeblena teeme puupu cabu ca, ngänu gyene teepi lui ätemäneji uli me ciipe pana gemi. Peei name pi tabe cuta lica weebibine papa ire taatu jicitininuge.

²² Weene miiji peei cabu ca abiberäja egä Acejijame me owecu pisi nyene cuta piyepu teeme ablaweja. Tabe Israela biname bine kokre cama yaablawemuge lui cina ätecija cäco gemi, yepä tabe weebibine owecu jiwennininuge weene liba teebine jäät runguye. Yepä, weeme ätrunga mule weene liba abmala, weene acnapäneji ciipe pana pagege äbita.

²³ Israela biname cina liba teeme ätecija cäco mule ne yaabmalusi Yeesu ne ätrungame, Acejijame piba teebibine teeme puupu cabu cääri pa yaacranemepi weene cama. Teeme kokre pisi nyene peei ne wawename.

²⁴ Yoo, weene nuuja gawe biname lui glunu bora olibi uli ciipe pana gemi, biname te lui ciipe bine icnapemige, ewademige, puu opopo gyene, siige teeme ätemäneji uli cabu erpecnemige. Yepä, Israela biname lui ätemäneji uli ciipe pana gemi. Acnapäneji ciipe seeji plowa gyene cääri arpetna pui yepä uli cabu.

Acejijame te Iyeta Biname bine Owecu Jaawenemuge

²⁵ Cäme ätrunga binamewale, pisi nyene mene lui ne lica ituge awabudnita, yepä cane singi gäne weebibine umle wawename naace tääpume weene piba weemämu lica awepyeräjame. Agesa peei mene: Israela biname bime ätecija cäco mule lica gyene iyeteta, yepä peei mule me ngälu gaabe pisi nyene. Iyeta nuuja gawe biname Acejijame lui bine ituge jäjäcra, teepi liba teeme bau cirege atyareca,

²⁶ piba iyeta jäjäcräneji Israela biname cina cire latatrongäripesi Yeesu Keriso bau me. Acejijame cuta teebibine cire yääsecräremepi iyeteta ireclota cabu me waadename. Teeme Oogäräneji Mene cuta pisi nyene peei poto cidi me egä,

“Äsecrera biname te cire tädepi Siiyona podo cabu ca Yerusalem ce we je.

Tabe Yakobu me kaakesaare bine cire yaatrongäremepi teeme niiya mule cabu ca.

²⁷ Cane ai jajeji mene cire jaawenemepene teeme täápume,
cane liba teeme niiya mule bine cire yääyblengäjemepene.”

²⁸ Yoo, page bucurage Israela biname lui cubuyame pana gemi Acejiyame me Miiji Mene poto cidi me, siige weene nuuja gawe biname cina babo miiji ne peei cabu ca ituge päpäna. Yepä, Acejiyame me owecu pisi nyene Israela biname bime täápume, ingle tabe teebibine ituge jäjäcra, cuta mene itu ecäranemuji teeme sasa kaakesaare bine egä, “Weeme kaakesaare cina căme singi biname me cirege lenaja.”

²⁹ Yoo, Acejiyame me jäjäcra lui iyeteta gyene; tabe lica teeme miiji ne acwecnista, cuta lica teeme mene ne mara me wawena.

³⁰ Yoo, niinăce padare cabu weene nuuja gawe biname cina Acejiyame me singi lica jaawenuye, yepä page weene Acejiyame me owecu ne ituge päpäna, ingle Israela biname cina teeme mene lica itu jecatujisi.

³¹ Yoo, page teepi ätecija căco gemi, ingle Acejiyame me owecu pisi nyene weene nuuja gawe biname bime bau, yepä teepi teeme niiya mule ne cire yaabma-lepesi cuta Acejiyame me owecu weene cama cirege päpäna.

³² Ingle naace gyene Acejiyame iyeta biname bine joomlemuge niyaniya mule cabu, naace täápume tabe teebibine iyeta owecu cama yäätityäremuge.

Mine Miiji Acejiyame ne Awepyeräja

³³ Acejiyame babo miihirage gyene biname bime täápume. Tabe babo ngene atwanena cama piyepu babo umle gyene. Nuuja biname te äblicăco gyene teeme ngene atwanena aboclomăja. Nuuja biname te äblicăco gyene ingle ne päpäna teeme mule poto cidi me.

³⁴ Oogărăneji Mene pisi nyene egä,

“Laasi nyene biname lui te umle gyene Yageyame me ngene atwanena?

Laati te ibibi gyene teebine umle mene jananename?

³⁵ Laati te teebine nuuja gwidape ituge ceera,
tabe lui täápume miiji daremu awecnistame?

Nuuja biname te äblicăco peei mule bine waweneca.”

³⁶ Yoo, iyeta gwidape cina seclenige teeme bau ca, iyeta gwidape cina teeme kokre cabu icrajinige, piyepu iyeta gwidape teeme awepyeräja täápume icrajinige. Mine miiji teebine yaawepyeräjesi ngălu căco. Siige, pepu yaanajeje!

12

Mine Lipulipu Lenaja Acejiyame täápume

¹ Yoo, căme binamewale, Acejiyame te babo owecu cama mibibine maramara ätityera nicărininuge, peei name pi cane weebibine jjenininine weeme ireclota teebine toraca ceerame. Weene liba ai ireclota cabu weeme täăpe piyepu weeme ngenecu teebine ceera teeme singi taatu wawenecame, Acejiyame piba ngenecu miiji gyene weeme täápume. Peese nyene toraca gaabe teebine awepyeräjame.

² Ai gawecewe me mule bine gone jaawenemuye! Gawecewe biname bime singi weemămu gone yaawaduye! Yepä, weeme ngene atwanena Acejiyame ne yäăcăruye tabe kirece me wawename. Weene piba taatu miiji gemi teeme singi poto cidi me umle äbitame egä ngena mule gyene miiji, ngena gyene toraca teeme täápume, piyepu ngena gyene conocăco.

³ Cane ai mene iyeta weebibine jjenininine, ingle naace gyene Acejiyame baborage owecu piyepu ätityera cebine ituge ceera. Gone ngene jwaatwananinuye egä weene baborage gemi, yepä weene miiji weemămu căngena atrana egä weeme Acejiyame miji ätrunga liba babo gyene.

⁴ Yoo, biname me täăpe cabu maramara piicwa gemi. Pui piicwa maramara teeme cuta maramara kaakesea piti nemi.

⁵ Yoo, Keriso bau ätrunga biname teepi bucurage gemi, yepä mine iyeta lui epu pana gemi yepä biname me täăpe liyepu. Yeosu Keriso lui mope gyene, piyepu mine lui teeme täăpe me piicwa pana gemi.

⁶ Acejiyame mibibine kaakesea maramara ituge ceera, piyepu kokre peei kaakesea căngena wawename. Epu pana maramara piicwa bime kaakesea lipu maramara gemi, mine cuta pepu gemi. Mine miiji mimerage kaakesea căngena wawena Acejiyame te lipu kokre nicăraninige. Nuuja me kaakesea lui Acejiyame me mene jananename, tabe miiji iyeta teeme ätrunga ca căngena jaajanemuge.

⁷ Cuta nuuja me kaakesea lui ätrunga biname bine ätityeräjame, tabe miiji teebibine cängena yääityäremuge. Nuuja me kaakesea lui biname bine abiberäjame, tabe miiji cängena yaabiberäjemuge teebibine.

⁸ Nuuja me kaakesea lui biname bine bääirmi agedname, tabe miiji bääirmi mene cuta cängena jaajanemuge. Nuuja me kaakesea lui teeme poto gwidape ceerame, tabe miiji camlecample yääcäruge. Nuuja me kaakesea lui biname bine waadename, tabe miiji teebibine cängena yaawademuge gloose cäco. Cuta nuuja me kaakesea lui owecu cama ätityerame biname bine lui cina ngenecu mäpu cama gemi, tabe miiji gege ngene atwanena cama toraca yääityäremuge.

Toraca Owecu Lipu Gyene

⁹ Sinäme owecu gone! Weene iyeta niiya mule jäägyemuye, yepä miiji mule bine ewademeye ireclota täápume.

¹⁰ Nanigane wäsi lipu singi gegi, weene pepu pana owecu jaawenemuye weeme ätrunga binamewale bine, piyepu nuuja ne opo gaabe me wata yaacituye.

¹¹ Weene durau gone, yepä kaakesea kokre cama jaawenemuye; iyeta weeme ngenecu piyepu seemo cama jaawenemuye Acejiyame täápume.

¹² Weene gege ngenecu cama inajininuge, inge weene umle gemi egä Acejiyame me babo miiji pisi nyene weeme täápume. Mäpu liba weeme bau me läduge, weene miiji bojäcu cama awagriyame Acejiyame me ätityera täápume, piyepu iyeta padare Acejiyame ne yaaweanuye.

¹³ Weeme nuuja ätrunga biname cina liba gwidape singisingi yaacrajuge, weene teeme mäpu cabu teeme singi gwidape yääcäremuye, cuta piyepu gaabe cabu otnetneja biname bine ala taasoglecemuye teeme deedei piyepu ute puupu ceerame.

¹⁴ Nuuja biname liba weeme täápume conocono piyepu claabe, weene Acejiyame ne yaaweanuye teeme miiji täápume, gone awejena teeme niiya daremu täápume.

¹⁵ Nuuja cina liba gege gemi, weene miiji cuta gege äbita ten cama. Nuuja cina liba ele yaangenetnemuge, weene miiji ele angenetna ten cama.

¹⁶ Weeme owecu te miiji yepä pana äbita iyeta biname bime täápume. Weene apu gone ngene jwaatwananinuye egä, “Cane baborage gäne poto biname cabu ca,” yepä ajiri gone läbitininuye matikolä biname cama lenajame, piyepu durau gone weeme singi cäco kaakesea ne wawename. Cuta weene gone apu ngene jwaatwananinuye egä, “Cane taatu säne umle cama biname.”

¹⁷ Nuuja biname te liba weebibine conocono jwenininuge, weene gone daremu jaawenuye. Weene miiji mule taatu jaawenuye, piba biname cina äblicäco gemi weeme mule aitneja.

¹⁸ Gone nuuja biname ne claabe me wawena piyepu gone teeme claabe ne daremu wawena. Yoo, iyeta biname cama weene poode cama inajininuge.

¹⁹ Cäme ngenecurage binamewale, niiya mule daremu awecnista gone, yepä peei awecnista yaabmaluye Acejiyame bau me. Oogäräneji Mene pisi nyene egä, “Yageyame te jüicenige: ‘Niiya mule daremu lui cäme ime cabu sine; cane te cirege ceera.’”

²⁰ Peei name pi weeme cubuyame te liba loolomecewe, weene teebine deedei yääcäruye. Tabe liba niiye täápume singi, weene teebine niiye yääcäruye nanime. Yoo, weeme miiji mule name pi tabe piba ajiri me läbituge.

²¹ Gone niiya ne padare ceera weebibine apremelame, pätä weene niiya cabu ca yuutrutuye miiji mule ca.

13

Weeme Mope Biname bime Mene Itecijinuge

¹ Iyeta mope biname lui cina biname bine ire jaatwemusi, Acejiyame te teebibine pui kaakesea cabu yaacrajemuge, peei name pi mine miiji teeme kaakesea mene ätecijame. Yoo, iyeta kokre nuuja biname bine ire atwime lui Acejiyame bau ca gyene.

² Laatibi teeme mope biname bime mene jäägyusi, teepi cuta Acejiyame me singi ne jäägyusi. Teepi teeme mäpu daremu pagege päpäna.

³ Miiji mule biname cina wälu lica gemi teeme ire atwi biname bime täápume, yepä conocono mule biname teepi wälu gemi. Weene liba singi lica ire atwi biname täápume wälu äbita, weene piba conocäco mule jaawenemuye. Teepi piba weebibine pa iwepeyeräjipesi.

⁴ Acejiyame te ire atwi biname bine teeme kaakesea yääcäremuge weeme miiji täápume. Yepä, weene liba conocono jaawenemuye, weene miiji wälu, inge naace gyene teeme kokre cuta pisi nyene biname bine mäpu cabu acraname. Teepi Acejiyame me kaakesea bägrä gemi niiya mule daremu ceerame.

⁵ Peei name pi weene pui biname bime cotre bine cängena jaawenemuye, piba teeme mäpu daremu ne lica jääpänuye. Cuta nuuja ingle pisi nyene cotre bine wawenecame: Weene ngene ca yaagluye egä peei mule lui toraca gyene.

⁶ Peei neeneni ingle name pi weene cuta weeme täks rarekaake yaacranemuye. Peei täks rarekaake cabu ca weeme ire atwi biname cina teeme kaakesea daremu jääpänusi. Piba teepi teeme kaakesea cängena jaawenemusi, Acejiyame lui ire atwi kaakesea ne teebibine ituge ceera.

⁷ Yoo, lui cotre piti nemi rarekaake uutecrena poto cidi me, weene peei cotre bine jaawenemuye, rarekaake yääcäremuye. Cuta opo gaabe yaacranemuye weeme ire atwi biname bine piyepu matimati ätityera teebibine yääcäremuye.

Biname cina Miiji Owecu cama Lenaja

⁸ Weene yaawecnemuye gwidape bine piyepu rarekaake bine teeme padare cabu, pätä weene äblicäco singi me ibi awecnista, peei name pi iyeta padare weene miiji weemeweme singi läbitaninago. Yoo, lui biname te teeme nuuja biname täápume singi läbitanuge, pui mule cabu tabe Acejiyame me cotre mene birige wawena.

⁹ Acejiyame me cotre mene lui apu egä: “Sargi mule gone jaawenuye; gone nuuja biname ne budre me yaagluye; gone gwidape ero ca yaawaduye; piyepu gone gwidape täápume singisingi läbitininuye,” cuta pepu pana cotre iyeta, teepi yepä babo cotre ngalebora gemi. Agesa pui babo cotre: “Maane miiji nuuja biname bime täápume epu singi äbitena, maane lipu mäame täápume singi läbitanute.”

¹⁰ Apu gyene, ingle biname te liba nuuja biname bime täápume singi läbitanuge, tabe teebibine lica nuuja niya jaawenemuge. Yoo, peei name pi liba biname te biname täápume singi läbituge, tabe iyeta cotre bine cuta jaawenemuge.

¹¹ Yoo, mine miiji cängena lenaja, ingle mine umle lica luma ngänu cerämu padare pisi nyene. Padare te itu tatyaramtumi weene ute pana lenaja cabu ca arpinerame, ingle mine äsecrera ai ireclota cabu ca iyeteta ireclota cabu me lui mametarage gyene pui padare cabu ca mine liba Yeesu ne niinäce jäätrungujisi.

¹² Yoo, ciye pana padare mameta gyene awala, Yeesu me acnenuta padare te mameta gyene atyaramta. Miiji mine krokeciye pana mule ne yaabmalesi, apaclyera pana mule ne yaacatesi, lui cabu kokre aclajutame.

¹³ Mine miiji epu pana cängena lenaja, biname cina apaclyera cabu lipu yaacrajuge. Siige iyeta sice buduma mule; siige iyeta sargisargi mule, siige iyeta mene abaja cuta piyepu iyeta ämugetna.

¹⁴ Yoo siige, page mine Yageyame Yeesu Keriso me mule bine ewademeye, peei name pi weene niya singisingi ngene atwanena gone padare ceera.

14

Mime Ätrunga Binamewale Gone Ängeja

¹ Lui Ätrunga biname ngenecu onyaonya pana gemi, teebibine weeme ingle cabu yääbäcnuye, piyepu gone mene ca jäingäjinuye teeme singi mule poto cidi me.

² Poto ätrunga biname apu jüicenis egä, “Iyeta maramara cibi deedei miiji mime täápume ärwäjame, ingle iyeta deedei iyeta cibi lui Acejiyame bau ca gemi.” Nuuja poto ätrunga biname apu ngene jotwananinisi egä, “Poto cibi aletna puupu cabu ca lui uuje bine iiwäräjeji gemi, peei name pi cine singi lica gemi cibi mäju ärngäjame, yepä calwacupi deedei taatu ärwäja.”

³ Yoo, ätrunga biname lui cina umle gemi cibi cama deedei ärwäja, teepi miiji lica nuuja ätrunga biname ne aina egä, “Tabe onyaonya ngenecu biname gyene.” Cuta piyepu lui cina umle cäco cibi cama deedei äbita, teepi miiji lica teeme nuuja poto biname bine, lui cibi umle gemi, aitneja egä, “Conocono mule biname gemi.” Teepi miiji lica nuuja biname ne pepu aitneja, ingle naace gyene pui lui Acejiyame me biname gyene.

⁴ Yoo, biname te äblicäco nuuja biname me kaakesea bägrä ne ablaweja. Peei lui teeme yageyame me kaakesea gyene. Tabe te teebine jaatranuge egä miiji gyene coo niya gyene. Yoo, yepä pana gyene: mine miiji lica nuuja biname poto cidi me aitneja egä, “Tabe conocono biname gyene,” ai ingle naace gyene teeme yageyame lui Acejiyame sine. Teebine Acejiyame bau ebmalepeye! Tabe te teebine umle pa jaawenepi teeme mule liba conocono gyene. Tabe ätrunga cabu cängena pa jaacclajutepi, ingle Acejiyame te miiji gyene teebine toraca gaabe awabame.

⁵ Yoo, yepä ätrunga biname te singi poto bimu bine mara me wawename teeme mule ca Acejiyame täápume, yepä nuuja ätrunga biname te singi lica gyene pepu mule wawenecame, ingle tabe apu ngene jwaatwananuge egä nuuja bimu te mara lica gyene

Acejiyame täापume. Yoo bimu maramara poto cidi me, iyeta biname cina miiji cängena ngene atwanena, piba ngene ca agli lui mule miiji gyene teeme täापume.

⁶ Lui ätrunga biname cina singi gemi poto bimu mara me wawename, teepi pepu jaawenemusi Acejiyame ne awepyeräjame, piyepu lui ätrunga biname cina umle gemi cibu cama deedei äbitame, teepi cuta Acejiyame ne yaawepyeräjusi, liba teebine eso yäacärsi teeme deedei täापume. Yoo, lui ätrunga biname cina umle cäco gemi poto cibu ärngäja, inge teepi singi lica peei cabu ca uuje ne awepyeräjame, teepi cuta Acejiyame ne yaawepyeräjusi teeme mule ca, inge naace popi teepi teebine cuta eso yäacärsi teeme deedei täापume.

⁷⁻⁸ Mine lui ätrunga biname gemi, iyeta mime ireclota cabu cuta piyepu mime budre padare cabu mine miiji Acejiyame taatu ne awepyeräjame piyepu teeme singi wawename, lica mime singi. Mine lipu ireclota cabu ninajininige, peei ireclota lui Acejiyame täापume, cuta piyepu mine liba budre jääpänusi, peei budre lui teeme täापume, peei name pi ireclota cabu coo budre cabu mine Yageyame täapu memi.

⁹ Keriso budre itu äbituji piyepu budre cabu ca arpinantuji Yageyame me äbitame iyeta teeme ätrunga binamewale täापume. Mine iyeta teeme ime cabu temi: lui cina ireclota cama page, cuta piyepu teepi lui cina budre ituge äbita.

¹⁰ Yoo, peei name pi weene ngeno memi singi weeme ätrunga binamewale bine aitneja? Cuta weene ngeno memi singi teebibine jajime egä, "Weene camu gemi cime pana babo umle cama äbitame?" Pepu iicana lui weeme kaakesea lica gyene. Mine iyeta cirege aclajuta Acejiyame me opo gaabe je tabe te mibibine atraname.

¹¹ Yageyame te Oogäräneji Mene cabu jüicenige egä, "Ai inge naace gyene cane toraca ireclota cama gäne, cäme mene cuta toraca gyene egä: Iyeta biname kokorare ca cire yäapednemepesi cäme opo gaabe je.

Iyeta biname cuta cire jüicemepesi egä, 'Peese nyene Acejiyame!' "

¹² Yoo siige, mine yepäyepä mime ireclota cirege aitneja Acejiyame täापume.

Mime Poto Binamewale bime Ätrunga Gone Sabe Wawena

¹³ Yoo, peei name pi mine gone mimemime aitneja. Mine päta kirece ngene atwanena pa yaacatesi egä, "Mine gone epu mule wawena lui te nuuja ätrunga biname ne jaawenuge atraname coo niija mule wawename."

¹⁴ Yoo, Yageyame Yeesu cabu ca cane toraca umle gäne egä nuuja deedei coo cibu gwidape lica gyene cude, yepä biname te liba gwidape poto cidi me ngene jwaatwa-nanuge egä, "Ai lui cude gyene," siige piba teeme täापume cude me läbituge.

¹⁵ Weene liba weeme poto binamewale bine weeme cibu ärngäja ca ngenecu mäpu me jaawenemuye, weene piba owecu lica gemi teeme täापume. Keriso cuta peei biname bime täापume budre ituge äbita; gone teeme Yeesu bau ätrunga ne sabe wawena weeme deedei äbita mule ca.

¹⁶ Ngänu gyene weene umle egä weeme mule conocäco gyene, yepä weene gone mara mule biname bime sobe cabu peei ne wawena! Teepi piba weebibine lica birige aitneja weeme mule täापume.

¹⁷ Yoo, Acejiyame me waadena lui lica ärwäja piyepu änäja cotre poto cidi me, inge peei lui matimati gwidape gemi. Yepä, teeme waadena lui conocäco mule poto cidi me, piyepu poode nuuja biname cama, piyepu ngenecu gege poto cidi me. Aceji Seemo te mibibine nitityärinuge ai bine wawenecame.

¹⁸ Weene liba Keriso täापume pepu inajininuge, piba Acejiyame ngenecu miiji gyene weeme täापume, piyepu biname cina ngenecu miiji gemi.

¹⁹ Yoo, peei name pi mine miiji apicetnera peei mule taatu wawenecame lui cina mibibine poode cabu me niwadininusi piyepu lui cina mimemime kokre me niweninininusi.

²⁰ Yoo, Acejiyame me kaakesea nuuja ätrunga biname cabu gone sabe jaawenemuye weeme cibu ärngäja mule ca. Iyeta deedei piyepu cibu miiji gemi ärwäjame, yepä conocono gyene cibu coo deedei äbita, liba peei mule te nuuja biname ne jaawenuge niija mule wawename.

²¹ Miiji mule agha: Gone cibu ärngäja coo waina niije änäja, coo nuuja gwidape ne wawena, liba peei te weeme ätrunga biname ne atrama me jaawenusi.

²² Yoo, miiji gyene liba Acejiyame taatu umle gyene weeme ätrunga peei mule poto cidi me. Yoo, biname te liba apu ngene jwaatwananuge egä, "Cane lui mule ne jewenenine, peei miiji gyene cäme täापume," piyepu tabe liba lica niija lasicnantuge peei poto cidi me, tabe piba miiji taatu yaanajuge.

²³ Yepä, tabe liba neenenen ngene atwanena cama jüicuge egä, "Baa, cane yäärwäjene, coo lica?" tabe piba conocono mule ne jaawenuge liba yäärwäjuge, inge tabe ätrunga cabu ca lica jaawenuge. Yoo, iyeta mule lui lica ätrunga cabu ca wawenäneji, peei lui conocono mule gemi.

15

Mine Miiji Cängena Ngene Atwanena cuta Nuuja Biname bime täापume; Lica Mime Taatu

¹ Mine lui bime ätrunga kokre gyene Yeesu cabu, mine miiji cängena gigri lenaja ngenecu onyaonya biname cama, teepi liba ngenecu maramara läbitininusi Acejiyame me singi mule poto cidi me. Mine gone mime miiji taatu täापume lenaja,

² yepä mine miiji mime nuuja binamewale poto cidi me cuta ngene atwanena teeme miiji täापume teeme ätrunga ne kokre ceerame.

³ Keriso cuta piyyepu, tabe teeme miiji täापume lica enajuji, pätä Oogäräneji Mene te jüicenige egä, "Biname lui cina niuya mene jüicemusi mäáme poto cidi me, teeme peei niuya mule te cuta cebine niuya nawenuge."

⁴ Yoo, iyeta Acejiyame me Oogäräneji Mene lui mime ätityera täापume. Peei te mibibine nibiberäjininige kokre ngene atwanena cama lenajame piyyepu cängena awagriyame Acejiyame me ätityera padare ne.

⁵ Mime kokre piyyepu mime ätityera tädenige Acejiyame cabu ca. Cane Acejiyame ne ewejanenine tabe weebibine yepä ngene atwanena ceerame Yeesu Keriso me ngene atwanena liiyepu,

⁶ naace täापume weeme yepä ngene atwanena cama piyyepu yepä mene ca Acejiyame ne awepyeräjame, lui gyene mime Yageyame Yeesu Keriso me Babe piyyepu teeme Acejiyame.

Acejiyame me Miiji Mene Lui Iyeta Gawe Maramara Biname bime täापume

⁷ Yoo, peei name pi weeme ätrunga binamewale bine toraca biname me jaawenemuye owecu cama, epu pana Keriso weebibine lipu teeme biname me ituge wawena. Nuuja biname cina peei mule ne liba pa jääpänepesi, teepi Acejiyame ne pa yaawepyeräjepesi.

⁸ Yoo, Yeesu Keriso täduji Israela biname bine ätityerame biname bine awabame egä Acejiyame teeme mene toraca me jaawenuge, tabe lui mene itu jejemuji Israela biname bime kaakesaare bine egä tabe teeme ätityera biname ne pa täätyepipi.

⁹ Tabe cuta piyyepu täduji nuuja gawe biname bine ätityerame teepi piba Acejiyame ne awepyeräjame teeme owecu täापume. Pisi nyene Oogäräneji Mene cabu Daawida te lui mene Acejiyame ne jejuji egä,

"Cane meebine eso näacärenine nuuja gawe biname cama teeme sobe cabu.

Cane mäáme ngii uupera ca naawepäntenine."

¹⁰ Oogäräneji Mene te nuuja poto cabu jüicenige egä,

"Gawe maramara biname, weene babo gege äbitineye Acejiyame me jäjäcräneji biname cama."

¹¹ Cuta nuuja mene te egä,

"Gawe maramara biname, weene iyeta Acejiyame ne ewepyeräjeye.

Yoo, iyeta ai gawecewe biname, weene teebine eso ecäreyle!"

¹² Cuta Isaya nuuja Oogäräneji Mene cabu jüicuji egä,

"Ingwe ca yepä biname cire tädepi Yese* me ingle cabu ca.

Acejiyame teebine cire yaacitepi nuuja gawe biname bine waadename.

Teepi ätrunga cire yaacitepesi teeme cabu."

¹³ Yoo siige, Acejiyame lui cabu mine ngene atwanena bine yaacranemusi, cane teebine ewejanenine tabe weebibine baborage gege piyyepu poode ceerame weene liba teebine jütrungeniye, weene piba baborage ätrunga cama jewagrijeniyete teeme ätityera täापume. Aceji Seemo teeme kokre ca pepu ngene atwanena pa icäripi.

Paulo Rooma Biname bine Jejemiige Ai Leta Ngena Täापu Myene

¹⁴ Cäme ätrunga binamewale, cane cäme ca umle gäne egä weene miiji mule biname gemi, piyyepu weene umle cama gemi lui mule bine wawenecame, cuta piyyepu weene miiji gemi nuuja biname bine bääirmi mene jajanename.

¹⁵ Yepä, cane weeme bau conocäcorage yoogärenine weene poto gwidape bine ngene apचना-me. Cane conocäco jijananininine weebibine, ingle naace gyene Acejiyame te cebine ai müjirage kaakesea itu näcäruji

¹⁶ Yeesu Keriso me ätyepäneji biname me äbitame gawe maramara biname bine ätityerame. Cane epu pana gäne Acejiyame me iiwäreja biname liiyepu. Cane teeme Miiji Mene gawe maramara biname bine jaajanemune teepi te owecu gwidape pana äbitame Acejiyame täापume, lui poto cidi me tabe ngenecu miiji me pa läbitepi, Aceji Seemo liba teebibine teeme täापume mara me jaawenemuge.

¹⁷ Yoo, cane gege gäne, ingle cane baborage kaakesea Acejiyame täापume ituge wawena Keriso Yeesu cama.

* 15:12: Yese: Yese lui Daawida me babe ge, piyyepu Daawida lui Yeesu me kaakesaare ge.

¹⁸ Cane weebibine jijenininine egä lica căme kokre name pi căme kaakesea baborage gyene, yepä Keriso babo kokre cebine itu năcărepi gawe maramara biname bine waadename teepi Acejiyame tăăpume ätrungame teeme gaabe cabu otnime. Peei te itu läbitepi căme mene piiyepu căme kaakesea cabu ca,

¹⁹ kokre owowă piiyepu ciitaca mule cabu ca, piiyepu Aceji Seemo me kokre cabu ca. Yoo, Yerusalema cewe cabu ca ngălu Iluriku gawe ne oomlaname, cane iyeta pui gawe cabu itu totnăjumene biname bine iyeta poto ta jajanename Miiji Mene Keriso poto cidi me.

²⁰ Niinăce cabu ca căme singi puga ge Miiji Mene jajanename cewe maramara biname bine, lui cina lica ituge ätecija Keriso poto cidi me. Căme singi lui pui maramara cewe cabu puma kaakesea agedname, cuta lica otni nuuja biname te luma Acejiyame me mene itu jaajanemepi.

²¹ Oogărăneji Mene te ai poto cidi me jicenige egă,
 “Lui biname bime bau lica ituge jajanena teeme poto cidi me,
 teepi Miiji Mene ca pa jăăpănepesi teebine,
 piiyepu lui biname cina lica ituge ätecija,
 teepi umle pa läbitipesi.”

Paulo Rooma Biname bine Jejemige Teeme Singi Teebibine Ädărume

²² Yoo, bucurage padare cane liba singi ge otni weeme bau me, căme nuuja cewe cabu kaakesea name pi, cane pui padare äblicăco weeme bau me otni.

²³ Yepă, ai padare peei maramara cewe cabu lui kaakesea ne cane bepirine. Yoo, bucurage kămăge cama căme singi puga ge weebibine ädărume,

²⁴ cuta piiyepu ai padare cabu cane otni mănē. Cane Spaniya gawe cabu me ädenine. Cane singi gănē weebibine gaabe je păpăname, piiyepu weeme bau ca ätityera păpăname căme otni tăăpume piiyeme. Yepă, niinăce cane singi gănē matikolă miijirage padare cuta weene cama lenajame.

²⁵ Yepă căro, cane niinăce ädenine Yerusalema me Acejiyame me biname bine puma ätityerame,

²⁶ ingle naace gyene maramara ätrunga ingle Makedoniya piiyepu Akaya gawe cabu teepi ngenecu gege cama mene itu jaatranepesi rarekaake otoname piiyepu ätyepame owecumete biname bime bau me, lui piti nemi Yerusalema ätrunga biname bime ingle cabu.

²⁷ Teepi teeme singi cabu peei ne itu jaatranepesi, piiyepu teepi miiji pepu wawename, ingle Israela biname cabu ca nuuja gawe biname cina ituge păpăna Acejiyame me miiji teeme seemo bime tăăpume. Teepi peei name pi miiji cuta Israela biname bine ätityerame miijimiji gwidape ca teeme tăăpe tăăpume.

²⁸ Yoo, cane liba peei kaakesea ne pa yaapirepene piiyepu iyeta ootona rarekaake cängena teebibine pa yăăcăremepene, cane piba pa labyemărepene Spaniya gawe me otnime piiyepu weebibine gaabe cabu ädărume.

²⁹ Piiyepu cane umle gănē egă cane liba pa tădepene, cane weeme bau me pa tatyaramtepene iyeta Keriso me miiji cama.

³⁰ Căme binamewale, mime Yageyame Yeesu Keriso name pi piiyepu mime singi name pi, Aceji Seemo te lui mibibine itu nicăripi, cane weebibine jijenininine Acejiyame ne cane cama awejename căme miiji tăăpume.

³¹ Teebine ewejaneye egă pui Israela biname Yuudea gawe cabu lui cina lica Yeesu Keriso tăăpume birige ätrunga, teepi lica cebine niiya me wawena. Acejiyame ne cuta ewejaneye egă teeme biname Yerusalema cewe cabu je, teepi ngenecu miiji cama pa yaawadepesi pui rarekaake bine lui cime ätityera gyene teeme tăăpume.

³² Acejiyame liba singi gyene, cane piba babo gege cama pa tădepene weeme bau me mime ngenecu apretnemalame.

³³ Yoo, Acejiyame lui te mibibine ngenecu poode nicărininuge, cane teebine ewejaneninē iyeta weeme gome lenajame. Pepu pa läbitege.

16

Paulo Sebore Jewenemige Poto Rooma Ätrunga Biname bine

¹ Mime yepă ätrunga biname ngii Poebe tabe pa twaaclepi Rooma me. Tabe miijirage magebi gwene, lui te cängenarage kaakesea jaawenemuge Kenekrea ätrunga ingle cabu je.

² Weene teebine sebore jowenepeye, piba cängena tocanepeye weeme ätru-nga ingle cabu me. Mine Acejiyame me binamewale miiji mime yepă ne pepu ire jaatwusi. Teeme singi gwidape tăăpume weene utityäreye, ingle tabe bucurage biname bine ituge ätityera, cebine piiyepu.

³ Sebore Akwila piyepu teeme coga Prisila täápume. Teepi cane cama gigri kaakesea jaawenäsi Yeesu Keriso täápume.

⁴ Teepi mameta budre jääpänäsi cebine ätiyera name pi. Cane singi teebibine baborage eso ceerame, lica cane taatu, yepä ätrunga biname iyeta gawe maramara biname bime ingle cabu teepi cuta piyepu.

⁵ Cuta sebore pui ätrunga ingle biname bime täápume, lui cina teeme cabu labasecretininusi irecu ätumutame.

Sebore căme singi biname Epänetus täápume. Tabe niinäce biname gyene Asiya Probins cabu lui te Keriso ne itu jitrunguji.

⁶ Sebore cuta Mariya täápume, tabe lui baborage kaakesea ituge wawena weeme täápume.

⁷ Sebore cuta Andronikus naabi Juniya täápume. Teepi căme Israela biname gegi, lui cina krokeciye mete cabu cane cama itu aanajui mime ätrunga mule name pi. Teepi baborage ätyepäneji biname gegi, lui cina ätrunga biname me ituge äbita căme niinäce gaabe me.

⁸ Sebore Ampliyatus täápume. Tabe căme singirage biname gyene mime Yageyame täápume.

⁹ Sebore Urbanus täápume, tabe lui mine cama kaakesea biname gyene Keriso täápume. Piiyepu sebore căme ngenecurage biname Stakus täápume.

¹⁰ Sebore Apeles täápume, lui te Keriso ne ätrunga me apicetnera cabu ca tasatui kokre cama. Sebore iyeta biname täápume lui cina Aristobulus me mete cabu yaacrajuge.

¹¹ Sebore Herodiyo täápume. Tabe cuta căme Israela biname gyene. Cuta sebore ätrunga biname bime täápume lui cina Narkisus me mete cabu yaacrajuge.

¹² Sebore Trupaena naabi Truposa bime täápume. Ai neeneni magebi cina mime Yageyame me kaakesea cängena jaawenäsi. Cuta sebore căme ngenecurage biname Perisis täápume. Tabe miijirage magebi gwene, lui baborage kaakesea ituge wawena mime Yageyame täápume.

¹³ Sebore Rupus täápume. Tabe mime Yageyame me babo miijirage kaakeseyame gyene. Cuta sebore teeme mage täápume, lui te căme mage pana cebine itu ire natwepi.

¹⁴ Sebore Asunkritus, Plego, Hermes, Patrobas, piyepu Hermas täápume, piyepu iyeta ätrunga biname lui teeme ingle cabu temi.

¹⁵ Sebore Pilologus naabi Juliya; Nereus piyepu teeme ngule; cuta Olimpäs piyepu iyeta Acejiyame me biname lui teeme ätrunga ingle cabu temi.

¹⁶ Weene weemeweme ajecletnäjineye gege cama. Keriso me biname cina iyeta maramara ätrunga ingle cabu ca, teepi weeme täápume sebore mene ne jityepenisi.

Paulo Leta ne Umle Mene ca Ermuji

¹⁷ Căme binamewale, cane weebibine toraca jijenininine, cängena ire pui biname täápume lui cina biname bine maramara me jaawenemusi. Teepi biname bine mara walya gaabe yäcäremusi Acejiyame poto cidi me, süge poto biname bime ätrunga sabe jaawenemusi. Yepä, weebibine pepu lica ituge abiberäja; weene ten cama abasuta gone!

¹⁸ Biname lui cina pepu yaabiberäjemusi, teepi lica mime Yageyame Keriso täápume kaakesea jaawenemusi, yepä teeme kaakesea lui teeme singisingi mule täápume. Poto ngenecu onyaonya biname bine teepi yaangletnäjemusi teeme mitemite mene ca.

¹⁹ Yoo, iyeta biname cina cebine najanusu egä Miiji Mene te kokre cama yaanajuge weene Rooma ätrunga biname cama. Cane peei name pi mati gege lica gäne weeme poto cidi me. Cane singi gäne weene umle cama lenajame miiji mule poto cidi me, yepä umle căco pana lenajame nüya mule täápume.

²⁰ Piba Acejiyame lui te mibibine poode nicärininuge, tabe Satani me kokre ne pa yaapremalepi teebine gawe me wawename weeme täápume. Mime Yageyame Yeesu me miiji te weene cama yaanajuge.

²¹ Timoti lui te cane cama kaakesea jaawenemuge, tabe jüicenige sebore weeme täápume. Căme Israela binamewale Lukiyus, Yasona, piyepu Sosipata teepi cuta sebore jiwenininisi.

²² Yoo, cane säne Tertiyus cuta piyepu weebibine sebore jiweninine mime Yageyame me ngii cabu. Paulo lui mene jüicenige, cane te yoogärenine weeme täápume.

²³ Gayus lui me mete cabu cime ätrunga ingle biname cina labasecretninago, tabe cuta sebore weebibine jiwenininige, cuta piyepu Eratus, lui te rarekaake ire jaatwemuge ai babo cewe täápume, cuta piyepu mime biname Kwartas, teepi weebibine sebore jiwenininisi. [

²⁴ Mime Yageyame Yeesu Keriso me babo miiji te iyeta weene cama yaanajuge.]

Paulo te Acejiyame ne Ewepyeräjige

²⁵ Mine miiji Acejiyame ne awepperäja. Teeme kokre pisi nyene mibibine ätiyera me mine ätrunga cabu cängena lenajame. Teeme kokre tädenige pui Miiji Mene cabu ca, cane lui jüicemune Yeesu Keriso poto cidi me. Peei Miiji Mene te Acejiyame me singi ne

jaawabudnituge, lui singi poto cidi me biname cina umle cäco yaacrajuge teeme niinäce kaakesaare cabu ca.

²⁶ Yepä, ai padare cabu Acejiyame me singi awabudnitäneji gyene. Teeme mename biname cina teeme singi itu jüicemujisi Acejiyame me Oogäräneji Mene cabu. Acejiyame lui iyeteta gyene, tabe ätrunga biname bine ituge jaji teepi iyeta gawecewe biname bine jajanename egä: Acejiyame singi iyeta biname bine waadename. Tabe singi iyeta biname cina teeme mene acatame teebine ätrungame.

²⁷ Yoo, Acejiyame taatu umle cama gyene iyeta gwidape poto cidi me. Jamyacu apacljera lui teeme yene iyeteta Yeesu Keriso me kaakesea cabu ca. Pepu pa yaanajege!

Cane ngii Paulo, siige cäme mene ngälu peese.

PAULO ME NIINÄCE LETA KORINITO ÄTRUNGA BINAME BIME BAU ME

Sebore Mene

¹ Cane, Paulo, Yeesu Keriso me ätyepäneji biname gäne, Acejiyame lui ne teeme singi miji pi najuji ai kaakesea täápume. Cane piyepu mine cama yepä ätrunga biname Sostene, cine te yoogärenago

² Acejiyame me ätrunga ingle cabu me Korinito babo cewe ngalebora. Cine weebibine jiwablininago, lui bine ala ituge asogleca mara me äbitame Acejiyame täápume, lui cina teemi nemi Yeesu Keriso cama yepä me äbita miji pi. Ai leta cuta iyeta biname bime bau me iyeta poto ta, lui cina yaawejanusu mime iyeta bime Yageyame Yeesu Keriso ne.

³ Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi weebibine poode ceerame.

Acejiyame te Yeesu Keriso me cabu ca Mibibine Miiji Niwenaneninige

⁴ Cane Acejiyame ne eso yäacäranune weerne täápume, ingle tabe lipu owecu ituge äbita weeme täápume Yeesu Keriso cabu ca.

⁵ Keriso cama yepä äbita miji pi weene kokre ituge äbita iyeta mule cabu, cuta piyepu iyeta iicema cabu piyepu iyeta umle cabu.

⁶ Keriso poto cidi me mene te weeme cabu braju itu jaawenepi epu kokre cama,

⁷ egä weene itu jääpänanemepeye iyeta miijimiji gwidape weeme seemo ireclota täápume, weene liba jewagrieniye Yageyame Yeesu Keriso me acnenuta ne.

⁸ Tabe te cuta weebibine kokre me cire jiwenipi ngälu ngälugaabe me, piba weeme cabu nuuja niya ne lica cirege päpäna teeme acnenuta bimu cabu.

⁹ Acejiyame lui te weebibine tisoglicipi teeme Bägrä Yeesu Keriso, mime Yageyame cama yepä me äbitame, weene toraca ätrunga ecitepeye teeme cabu, egä tabe cirege wawena tabe ngena täápume ituge jaji.

Korinito Ätrunga Biname cina Maramara Abelaninisi

¹⁰ Cäme ätrunga binamewale, cane Yageyame Yeesu Keriso me ngii cabu jijenininine weene yepä ngene atwana cama lenajame, piba weene mara me lica päbitipeye. Weene miiji gigri yepä ngene atwana cama lenaja.

¹¹ Kloee me ingle cabu ca poto biname cina cebine najepesi, egä weene, cäme ätrunga binamewale, jiceliniye peema, egä laasi nyene babo biname.

¹² Cane naace täápume egä weeme yepä te jüicenige egä, "Cane Paulo me biname gäne," nuuja te jüicenige egä, "Cane Apolo me biname gäne," nuuja te egä, "Cane Peteru me biname gäne," cuta nuuja te egä, "Cane Keriso me biname gäne."

¹³ Yeesu me binamewale lui teeme tääpe gemi. Ingle teeme tääpe lui yepä gyene, peei name pi teepi äblicäco maramara äbita. Nää Paulo tage, lui te baarge uli cabu budre äbituji weeme täápume? Nää, Paulo me ngii cabu weebibine niye ca ituge äciseja?

¹⁴ Cane Acejiyame ne eso ecärenine, egä cane te lica weebibine niye ca jicisäjiipene, yepä Krispo naabine taatu Gayus jääcisäjepene.

¹⁵ Siige nuuja te äblicäco iicana, egä weebibine cäme abiberäja bägrä täápume ituge niye ca äciseja.

¹⁶ Yoo, cane cuta Setepano teeme ingle biname cama niye ca jääcisäjemepene. Yepä cane ngene lica jotwenine, egä cane cuta poto bine ituge niye ca äciseja coo liyepu.

¹⁷ Keriso cebine lica nätyepuji niye ca äcisejame, yepä tabe nätyepuji Miiji Mene jajaname. Cane ai gawecewe umle biname bime pana lica jüicemimune, ingle cane singi lica gäne Keriso me budre me kokre te papa me äbitame.

Acejiyame me Kokre piyepu Umle Lui Keriso Sine

¹⁸ Mene Keriso me budre poto cidi me baarge uli cabu papa gyene eei bime täápume, budre gaabe cabu lui cina yaocluge. Yepä mine lui cina ireclota gaabe cabu naclenige, mime täápume Acejiyame me kokre pisi nyene pui mene cabu.

¹⁹ Oogäräneji mene te jüicenige apu egä, "Cane ai gawecewe umle biname bime umle ne cire yiigarecepene; cuta laatibi bucurage mule poto cidi me labiberäjininusi, cane teeme peei abiberäja ne papa me cire jaawenepene."

²⁰ Siige ai gawecewe umle biname cina teepi ngena miiji gemi; piyepu laatibi labiberäjininusi bucurage mule poto cidi me, teepi cuta ngena miiji gemi; piyepu laatibi

cängena jaatranimusi ai gawecewe me gwidape potu cidi me, teepi cuta ngena miiji gemi? Acejiyame te ituge aboclomta, egä ai gawecewe me umle lui buduma umle gyene.

²¹ Acejiyame teeme baborage umle ngalebora apu ngene jotwananuji, egä biname cina lica birige teemerage umle ca Acejiyame täápume umle äbita. Eewe, päta tabe ngene jotwananuji, egä cine lui Miiji Mene jaajanemus, gawecewe muleyame biname cina lui mene ne buduma mene ca einenisi, laati bi jäätungusi pui mene ne, teepi te ireclota ne jääpänsi.

²² Israela biname cina singi ciitaca mule bine päpänename, Griik biname cina umle ne jirngenis,

²³ yepä cine te Yeesu Keriso potu cidi me mene jejanenemisi, baarge uli cabu lui te budre äbituji. Israela biname cina ai mene ne jigyenisi piyepu Griik biname bime täápume papa gyene.

²⁴ Yepä Acejiyame lui bine ala ituge asogleca teeme binamewale täápume, Israela biname coo potu biname, teepi Keriso ne jääpänsi ai mene cabu. Tabe sine Acejiyame me kokre piyepu umle.

²⁵ Acejiyame lui mule ne jaawenuge, biname cina lui mule potu cidi me jüicusi egä, "Buduma mule gyene," pui mule te yäätucärüge biname bime umle ne. Piyepu Acejiyame me ngena mule potu cidi me jüicusi egä, "Kokre cäco mule gyene," pui mule te yäätucärüge biname bime kokre ne.

²⁶ Cäme ätrunga binamewale, weene ngene jotwineye, weene lipu biname ge, Acejiyame te liba weebibine ala tisoglicipi. Weeme cabu nesae taatu ge, lui potu cidi me jüicusi egä, "Umle biname, kokre cama biname, babo ngii biname."

²⁷ Acejiyame naace täápume eei bine jejäcimuji, gawecewe muleyame cina lui bime potu cidi me ngene jwaatwananinusi, egä teepi papa gemi, ingle tabe singi ai gawecewe umle biname bine ajiri me wawename. Cuta eei bine naace täápume jejäcimuji, gawecewe muleyame cina lui bime potu cidi me ngene jwaatwananinusi, egä teepi kokre cäco gemi, ingle tabe singi ai gawecewe kokreyame biname bine ajiri me wawename.

²⁸ Tabe eei biname bine jejäcimuji, biname cina lui bine gawe me yaapremalemusi, jäägymusi, jüicusi, egä papa gemi, naace täápume eei bine iigarecame gawecewe muleyame cina lui bime täápume ngene jwaatwananinusi, egä teepi modamoda biname gemi.

²⁹ Tabe ai ne naace popi jewenuji, egä nuuja biname te äblicäco Acejiyame me opo gaabe je teemämu awepyeräja.

³⁰ Yepä weebibine Acejiyame te yepä me itu jiwenipi Keriso cama piyepu teebine jaawenepi mime umlyame me. Tabe te niwenipi mine conocäco äbitame Acejiyame me opo gaabe je, siige mine mara me itu läbitipago Acejiyame täápume, piyepu mine kälyä gemi niija mule cabu ca.

³¹ Yoo siige, mine miiji wawena, Oogäräneji mene te lipu jüiceniige egä, "Laati te singi awepyeräjäme, tabe miiji eei mule bine awepyeräja, Yageyame te lui mule bine ituge wawena."

2

Cine Miiji Mene Keriso potu cidi me Jaajanemus, Baarge Uli cabu Lui ne Jibyecrujisi

¹ Cäme ätrunga binamewale, cane liba lädepene weeme bau me jajanename, egä ngena gyene toraca Acejiyame potu cidi me, lui toraca te niinäce ämlitäneji ge biname bime bau ca, cane epu lica lädepene, egä cane baborage gäne iicema cabu piyepu umle cabu.

² Cäme ngene atwanena puga ge, egä cane nuuja gwidape potu cidi me lica iicema, yepä Yeesu Keriso potu cidi me piyepu teeme budre potu cidi me baarge uli cabu.

³ Yoo, cane liba weene cama puga ge, cane mage wälu ge, kokre cäco läbitepene, siige nalonecepi wälu miiji pi.

⁴ Piyepu cane liba mene jijananiipene, weebibine ibiberäjiipene, epu lica ai gawecewe umle biname cina lipu miijimiji tagepogogo ca jaajanemus piyepu yaabiberäjimusi. Yepä Acejiyame te jaawabudnitepi, egä cäme jajanena piyepu abiberäja lui toraca ge, ingle Aceji Seemo me kokre puga ge.

⁵ Pipu pi biname bime umle te lica jiwenipi weene Keriso cabu me ätrunga acitame, yepä Acejiyame me kokre te jiwenipi.

Acejiyame me Umle Lipu Gyene

⁶ Cane cuta umle mene jaajanemus eei biname bine, lui cina ätrunga cabu kokre gemi. Yepä pui umle lui mara gyene ai gawecewe me umle cabu ca; cuta mara gyene pui biname bime umle cabu ca, ai gawecewe ne lui cina ecanenisi, lui bime kokre gemi mameta apira.

⁷ Cane jaajanemus Acejiyame me umle potu cidi me, lui ge ämlitäneji, teeme ämlitäneji ngene atwanena potu cidi me, tabe lui ne ecituji agedna me niinäce gaabe ca naace täápume mine teeme apacljera cabu me äbäcname.

⁸ Lui cina ai gawecewe ne ecanenisi, teepi umle lica ge Acejiyame me pui ngene atwana pota cidi me. Teepi liga umle cirege, teepi piba mime Yageyame, lui te jamyacu apacylera cama, teebine baarge uli cabu lica cire jääbyecrejisi.

⁹ Oogäräneji mene te ai pota cidi me jiicenige egä,

“Lui ne nuuja te lica ituge päpäna coo ätecija,
lui ne ngene atwana ca äblicäco oomlana,

peese nyene pui gwidape, Acejiyame lui ne ituge amacetnäja biname bime täápume,
lui cina teeme täápume singi.”

¹⁰ Yepä mime täápume Acejiyame te ituge Aceji Seemo ca teeme pui ämlitäneji ngene atwana ne aboclomta. Aceji Seemo te iyeta gwidape bine jäärngemuge, cuta eei bine lui cina ämlitäneji gemi Acejiyame me sungaberage.

¹¹ Biname me seemo tabe taatu umle gyene pui biname me sungaberage. Pepu pana gyene, Acejiyame me Seemo tabe taatu umle gyene, Acejiyame lipu gyene.

¹² Mine ai gawecewe me seemo ne lica ituge acata, pätä mine pui Seemo ne ituge acata, Acejiyame te lui täätpepi naace täápume, mine piba umle iyeta Acejiyame ngena ituge ceera mibibine.

¹³ Peei name pi cine lica jicemusisi mene, biname bime umle cabu ca lui ituge abiberäja, yepä cine jicemusisi Aceji Seemo te ngena nibiberäjininige, cine liba yaaboclomäjimusi seemo ireclota gwidape bine pui biname bime bau me, laati bime cabu pisi nyene Aceji Seemo.

¹⁴ Yepä laati me cabu lica gyene Aceji Seemo, tabe äblicäco nuuja gwidape ne Acejiyame me Seemo bau ca acata. Pepu gwidape cina teeme täápume opo lica lacitininusi piyepu mäpurage yaanajuge, ingle Aceji Seemo lica gyene teeme cabu pui gwidape bine aboclomäjame.

¹⁵ Yepä laati me cabu pisi nyene Aceji Seemo, tabe ibibi gyene iyeta gwidape bine atraname, yepä teebine äblicäco nuuja te atrana.

¹⁶ Oogäräneji mene te jiicenige egä,

“Laasi nyene biname, lui te umle gyene Yageyame ne ngene atwanena?

Laati te ibibi gyene teebine umle mene jajanename?”

Mine age tema biname, lui bime cabu pisi nyene Keriso me ngene atwanena.

3

Acejiyame me Kaakesea Biname

¹ Cäme ätrunga binamewale, cane liba weene cama puga ge, cane äblicäco ge epu mene iicema, lipu mene jaajanemusisi pui biname bine, lui bime cabu Aceji Seemo pisi nyene. Cane miiji epu jijananipe Aceji Seemo cäco biname bine liiyepu, epu ätrunga cabu bägrä bime pana biname bine liiyepu.

² Cane weebibine deedeirage lica ingäranipene, yepä ngame migi taatu icäranipene, ingle weeme iguwace kokre lica ge deedeirage täápume. Cuta page piyepu weene deedeirage täápume iguwace kokre lica gemi,

³ ingle weemerage singisingi cina camu jitruwetnäjenenemisi. Weeme cabu liba pisi nyene ämugetna mule, mene abaja mule, nää peei te lica jiwabininige, egä weeme singi cina weebibine jitruwetnäjenenemisi; weene epu inajininige ai gawecewe mule cabu lenajayame biname liiyepu.

⁴ Weeme yepä te lipu jiicenige egä, “Cane Paulo me biname gäne,” cuta nuuja te lipu jiicenige egä, “Cane Apolo me biname gäne,” egäsu peei te nata jiwabininige, egä weene ai gawecewe muleyame biname bime pana gemi?

⁵ Cije Apolo laasi nyene? Cuta Paulo laasi nyene? Cine Apolo cama Acejiyame me kaakesea bägrä gegi, lui cina weebibine itityeräjipago weene ätrungame. Cine yepäyepä cina cime kaakesea ne jewenenisi pui umle ca, Acejiyame lui nicärepi.

⁶ Cane te gije bine itu yäättemepene, Apolo te niiye ca itu jaacnanga-nemepi, yepä Acejiyame te uutaname itu jaawenemepi.

⁷ Liteta biname papa gyene, acnanga biname papa gyene, yepä Acejiyame lui baborage gyene, ingle tabe te gije bine uutaname jaawenimuge.

⁸ Liteta biname piyepu acnanga biname, teepi puu yepä kaakesea ne jewenenäsi, yepä Acejiyame teeme kaakesea ibi teeme yepäyepä bine daremu pa lääcäranepi.

⁹ Cine Apolo cama yepä kaakesea ne jewenenago Acejiyame täápume. Weene peete nemi teeme calwa-cupi.

Cuta weene peete nemi Acejiyame me mete.

¹⁰ Acejiyame lui umle năcärepi, cane pui umle ca miiirage raranga biname pana ingle ne jaacnepene, siige nuuja te pui ingle cabu erangenige. Yepä iyeta raranga biname bime cabu sine ireme, egä teepi lipu erange-nisi.

¹¹ Lui ingle ne uja ituge acni, pui ingle papa cabu äblicäco nuuja ne atecwenta. Pui ingle lui Yeesu Keriso sine.

¹² Siige ai ingle cabu yepäyepä biname cina miiji gemi raranga, teepi ngena gwidape ca rarangame singi: gol ca, silba ca, modamoda daremu kula ca, uli ca, tune ca, dage ca.

¹³ Atrana bimu cabu pajecu me cirege äbita, biname yepäyepä cina lipu mete ne ituge raranga. Pui bimu cabu iyeta peei maramara mete bine uliobo ca cirege apicetnära.

¹⁴ Lui biname me mete lica cire layepi, tabe daremu ne cire yaacatepi.

¹⁵ Yepä lui biname me mete te cire layepi, tabe daremu ne lica cire yaacatepi, yepä taberage te ireclota ne cire jääpänepi epu pana, biname te lipu uliobo wädräji cabu ca lasatuge.

¹⁶ Egäsu nata weene umle gemi, egä weene peete nemi Acejiyame me mete. Teeme Seemo te weeme cabu enajenige.

¹⁷ Laati te liba sabe jaawenuge Acejiyame me mete ne, Acejiyame cuta teebine sabe jaawenuge. Acejiyame me mete mara me awenäneji gyene teeme täápume, piyepu pui mete lui weene peete nemi.

¹⁸ Weene gone langletnäjininuye. Weeme nuuja te liba ngena jwaatwananuge, egä tabe ai gawecewe umle biname bime pana umleyame gyene, tabe miiji niinäce pui umle ne abmalame, piba tabe toraca umle biname me äbita.

¹⁹ Ai gawecewe muleyame biname cina lui potu cidi me jücenisi, egä umle gyene, Acejiyame täápume pui lui buduma gyene. Oogäräneji mene te jücenige egä, "Acejiyame te umle biname bine teeme pui umle ca jääbrecimuge."

²⁰ Cuta apu jücenige egä, "Acejiyame umle gyene, egä umle biname bime ngena atwana lui papa gemi."

²¹ Peei name pi weene gone apu iicana, egä weene Apolo me coo Paulo me biname gemi. Cine iyeta weeme tääpu memi,

²² cane Paulo, Apolo, Peteru, ai gawecewe, ireclota, budre, page ngena cina äbitininisi piyepu ingwe ca ngena cina cire läbitipesi, iyeta ai lui weeme tääpu memi,

²³ yepä weene lui Keriso memi piyepu Keriso lui Acejiyame myene.

4

Keriso me Ätyepäneji Biname

¹ Weene miiji cime potu cidi me apu ngena atwana, egä cine Keriso me kaakesea bägrä gemi, Acejiyame lui bine itu ninujuji mene jajanename teeme toraca mene piyepu mule potu cidi me, lui cina ämletnäreji gemi.

² Ai kaakesea ne cine miiji toraca ngenecu cama wawena.

³ Cane nuuja ngena atwana lica gäne, egä biname cina lipu cebine natranusi, coo weene lipu natranuye, cuta cane cämämu lica atraninine.

⁴ Cäme asicenta miiji gyene, yepä cäro peei te lica nawabenige, egä cane toraca conocäco gäne. Acejiyame tabe taatu gyene, lui te cebine atrana.

⁵ Peei name pi weene gone nuuja ne atrana ngälu toraca atrana padare te cire tädepi. Atrana me padare ebä cirege, Yageyame te liba cire tacnepi. Tabe te cire yaawademepi apaclyera cabu me gwidape bine, lui cina krokeciye cabu ämletnäreji gemi, piyepu tabe te cire jaawabudnitemepi biname bime ngena atwanena bine. Piba Acejiyame te biname bine yepäyepä cire yaawepyeräjemepi teeme mule ibi.

⁶ Cäme ätrunga binamewale, cane aga ngena bii jücinine cime potu cidi me Apolo cama, ai lui cuta weeme tääpu myene. Cime cabu ca weene abiberäjame, egä ai mene iicana ngeno myene egä, "Gone uutruta lui mene oogäräneji gemi!" Peei name pi weene gone lawepyeräjininuye, egä weene cime yepä ne yaacatuye, nuuja ne cuta yaabmaluye.

⁷ Määme nuuja conocäco lica gyene babo äbitame. Määme nuuja gwidape lica gyene, Acejiyame te lui lica ituge ceera. Peei name pi määme liba iyeta gwidape Acejiyame bau ca gemi, maane ngena name pi lawepyeräjute epu pana, egä maane te itu saawademepete?

⁸ Weeme nää iyeta seemo ireclota gwidape uja piti nemi, weene lui täápume singi? Weene nää uja bewadimiye iyeta miijimiji mule seemo ireclota täápume? Weene nää mope biname me bäbitininuye, ngänu gemi cine lica? Oo, weene mope biname me liga cire läbitininije, piba cine cuta yepä cirege weene cama mope biname me lenaja.

⁹ Cane apu ngena jotwaninine, egä Acejiyame te cine ätyepäneji biname bine ingwe gaabe me ituge acrana. Cine epu biname pana gemi, budre me lui bine ituge atrana, siige iyeta cina cime bau me ire sicrajnige, biname piyepu mename seemo cina.

¹⁰ Cine Keriso miji pi buduma gemi, weene ten cama yepä äbita miji pi umle cama gemi! Cine kokre cäco gemi, weene kokre gemi! Cibibine gawe me ire nitwenininisi, weebibine opo gaabe me icranininisi.

¹¹ Cine camu loolomecewe piiyepu niyemecewe gemi; cime cäblätäpe iyeta niyyarage gemi; cibibine nitemeläjininisi; cine mete cäco gemi, otnetnäjenininago yepä cewe cabu ca nuuja cewe me.

¹² Cine cimeraige ime ca baborage kaakesea jewanenenisi cime lenaja täápume. Biname cina liba cibibine niyya mene nijinininusi, cine teebibine jaajemusi egä, "Acejiyame te weebibine miiji mule pa jiwenipi." Cibibine liba sabe niwenininusi, cine nimyemutinuge.

¹³ Liba niyya mene nijinininusi, cine owelaamelame mene jaajemusi. Gawecewe muleyame cina cibibine domäji pana niwenininusi. Teepi cibibine epu ire nitwinininusi, egä cine singi cäco gwidape gemi.

¹⁴ Cane ai mene naace täápume lica yoogärinine egä weebibine ajiri me wawename, cane yepä singi gäne weebibine awecetnärame cäme ngenecurage bägrä bine liiyepu.

¹⁵ Ngänu gemi, weeme bucurage awecetnära biname piti nemi, yepä weeme yepä taatu babe pisi nyene lui cane säne. Weene pui padare cabu äbitininujiye Keriso me binamewale me, cane liba Miiji Mene jijanininujine weebibine.

¹⁶ Peei name pi cane singi gäne weene cäme pana lenajame.

¹⁷ Cane Timoti ne jityepenine weeme bau me. Tabe lui ätrunga cabu ca cäme miijirage bägrä gyene cuta teeme kaakesea ne toraca ngenecu cama jaawenuge. Tabe te pa cääri umle jiwenipi cane lui mule bine yäacwetnimune, cane liba Keriso Yeesu cama lalenglecäjune, piiyepu cane lui yaabiberäjimune iyeta ätrunga ingle bine.

¹⁸ Weene poto cina mope modamoda me itu läbitipeye, ingle weene apu ituge angi, egä cane ingwe ca lica pagege weeme bau me otni.

¹⁹ Yepä cäro, mime Yageyame liba singi gyene, cane watata pa lädepene peeyeme, siige pa jääpänemepene, egä pui mope modamoda biname cina lipu piige jaangenetnemuge gwidape bine wawenecame, nää teeme kokre pisi nyene peei ibi wawename?

²⁰ Acejiyame lui bine yaawadimuge, teepi gone mene taatu iicana, teepi cuta miiji Acejiyame me kokre ne aboclomta teeme ireclota ngalebora.

²¹ Nää, weene ngena tääpu memi singi, cane liba peeyeme pa lädepene, cane cubu suru cama otnime coo owecu cama otnime?

5

Ätrunga Biname bime Sargi Mule poto cidi me

¹ Cane ituge ätecija, egä weeme sobe cabu epu sargi mule biname pisi nyene, egä Acejiyame umle cäco biname cina umle cäco pepu mule acni. Naace, cebine ituge jaji, egä weeme yepä te teeme acenuteji mage cama gigrä ecijanenige.

² Weene nää ai täápume gege gemi? Weene miiji ajiri lenaja! Lui biname te peei mule ne yaacnepi, weene miiji teebine äyebingta weeme ätrunga ingle cabu ca.

³ Cane puu weeme bau ca cude padare gäne, yepä cäme ngenecu pisi nyene weeme cabu. Yoo, cane epu pana gäne, egä cane weeme sobe cabu pisi näne, siige ngene uja itu totwananumene ngena wawename pui niyya mule biname täápume.

⁴ Weene mime Yageyame Yeesu me ngii cabu liba pagege abasecre-tna peema, piiyepu cäme ngenecu weeme cabu liba puma pagege piiyepu mime Yageyame Yeesu me kokre liba pisi nyene weeme cabu,

⁵ weene piba Satani ne pui biname ceera naace täápume tabe te teeme tääpe ne sabe wawename. Yepä tabe pui biname te liba teeme mäpu cabu Acejiyame bau me cire latatrongtepi, Acejiyame te teeme seemo ne ireclota cire yäacärepi Yageyame me acnenuta bimu cabu.

⁶ Weeme awepyeräja lui nuuja miiji lica gyene! Egäsu weene umle gemi egä, "Matikäli uutneca gwidape te iyeta buluduu ne juutnecuge."

⁷ Weene miiji niyya mule bine abmaläcema, ingle uutneca gwidape pana gemi, iyeta buluduu ne lui te joomluge. Piba weene kirece biname gemi epu pana kirece buluduu, lui cabu nuuja uutneca gwidape lica gyene. Weene nata pepuyame gemi, weene uutneca gwidape cäco buluduu pana gemi epu pana äsuplengta deedei buluduu liiyepu. Cuta toraca gyene, egä mime äsuplengta bim uja ituge atyaramta, ingle mime äsuplengta Maamoi Keriso ne uja itu eglujisi.

⁸ Siige mine liba ngene jaape-cnusi äsuplengta bim ne, mine gone niyyarage piiyepu conocono ngene atwanena cama wawena, lui cina uutneca gwidape cama wawenänej buluduu pana gemi, päta mine miiji toraca piiyepu conocäco ngene atwanena cama wawena, lui cina epu pana uutne-ca gwidape cäco buluduu liiyepu.

⁹ Cäme niinäce leta cabu cane yoogärepenne, egä weene gone lalenglecäjiniinuye biname cama, lui cina umle gemi biname ero coo piyepu sargi mule wawena.

¹⁰ Yepä cane ätrunga cäco biname täápume lica jiicepene, lui cina sargi mule biname, singi ädri biname, eromaame coo uuje awejena biname, ingle weene teebibine liba ägyema, weene miiji ai gawecewe ne abmala.

¹¹ Cane naace me jiicepene, egä weene gone lalenglecäjiniinuye biname cama, ätrunga biname ca lui te lainuge, yepä tabe sargi mule yaacnuge, singi yäädruge, uuje bine yaawejanemuge piyepu tabe eromaame birige. Pepu biname cama weene gone lalenglecäjiniinuye coo deedei gone yäärwäjimuye.

¹²⁻¹³ Peei lui cäme bau lica gyene ätrunga cäco biname bine atraname. Acejiyame te teebibine cire jaatranemepi. Yepä weene miiji weeme ätrunga ingle ngalebora weemämu latranininuye. Oogäräneji mene te jiičenige egä, “Niiyarage mule biname ne iyeblingtepeye weeme sobe cabu ca.”

6

Ätrunga Biname ne Gone Yaacanuye Ätrunga cäco Biname cina Teebine Ablawame

¹ Peei lipu gyene, egä weeme ätrunga ingle biname te liba nuuja cama jääceluge, teepi lipulipu laacluge ätrunga cäco biname bime bau me ablaweja täápume. Ngena name pi ätrunga ingle biname cina lica teebibine ablaweja?

² Egäsu weene umle gemi, egä Acejiyame me binamewale cina ai gawecewe ne cirege ablaweja. Siige weene liba ai gawecewe ne cirege ablaweja, weene cuta ibibi gemi apu matimati mule bine ablawejame.

³ Egäsu nata weene umle gemi, egä mine cuta Acejiyame me mename seemo bine cirege ablaweja. Peei name pi mine cuta ibibi gemi iyeta bimu gaabegabe mule bine ablawejame.

⁴ Yepä weene liba jääceluye papa mule poto cidi me, lui cina bimu gaabegabe läbitinusi, weene siige ätrunga cäco biname bime bau me naacluge ablaweja täápume, lui bime nuuja kokre lica gyene ätrunga ingle ngalebora.

⁵ Weene miiji ajiri lenaja! Egäsu nata weeme ätrunga ingle ngalebora pisi nyene umle biname, lui te ibibi gyene ätrunga biname bime äceläcela mule bine ablawejame.

⁶ Yepä weene lica teeme bau me naacluge, weene mene iiwana puupu cabu me naacluge ätrunga cäco biname cina puma weebibine ablawejame.

⁷ Weene lipu weemeweme ablaweja puupu me lawadaninuye, peei te jiwabininuge, egä weene bitramitninige. Miiji gyene weene ire taatu acita nuuja ne tabe niija mule wawename weeme täápume cuta piyepu waadename, weeme ngena gwidape piti nemi.

⁸ Pätä weene weemeweme niiyarage mule yaacnemimuye piyepu weeme yepäyepä bime bau ca gwidape angletneja mule ca yaawadimuye. Weene apu läbitaninuye weeme poto ätrunga biname bime cama!

⁹ Egäsu weene umle gemi, egä Acejiyame te lica cirege niija mule biname bine conocäco ceera teta cama biname bine waadename. Weene gone langletnäjinuye. Laatibi sargi mule bine jaawenimusi, laatibi uuje bine yaawejanemusi, laatibi mule jaawenusi nuuja biname cama lui teeme coga coo rooriye lica birige, rooriye imäbägrä laatibi teemeteme lakananinusi, magebi ngulebägrä laatibi pui yepä mule yaacnusi;

¹⁰ coo piyepu laati bemi gwidape eroyame, singi ädri biname, sice nänäja biname, iicetneja biname, eromaame, apu mule biname bine Acejiyame te lica cirege conocäco ceera teta cama biname bine waadename.

¹¹ Weeme poto cina niinäce pepu ituge. Yepä page weeme niija mule äcisäjeji gemi, weebibine mara me ituge wawena Acejiyame täápume, mime Yageyame Yeesu Keriso piyepu mime Acejiyame me Seemo teepi te weebibine conocäco ituge wawena Acejiyame me ope gaabe je.

Weeme Tääpe cina Miiji Acejiyame me Ngii ne Babo Wawena

¹² Weeme yepä te pama jiiçuge egä, “Iyeta mule papa gemi cane wawenetnäjame.” Yoo, yepä iyeta mule miiji lica gemi mäame täápume. Cane naace täápume jiičenine, egä iyeta gwidape puu papa gemi cäme täápume, yepä cane singi lica gäne nuuja mule te cebine acaname.

¹³ Cuta nuuja te pama jiiçuge egä, “Deedei lui camuge tääpu myene, camuge lui deedei tääpu myene.” Peei toraca gyene, yepä teepi iyeta cire lapirepäsi. Tääpe lica naace tääpu myene ero sargi mule wawenetnäjame yepä Yageyame me kaakesea wawenecame, piyepu Yageyame te tääpe ne ire jetwe-nige.

¹⁴ Acejiyame te Yageyame ne budre cabu ca erpinantuji, cuta tabe mibibine teeme kokre ca cire nirpinäripi.

¹⁵ Egäsu nata weene umle gemi, egä weeme tääpe lui Keriso me tääpe piicwa gemi. Peei name pi mine liba rarekaake yääcāranemusi magebi bine teta cama sargi mule wawenane, peei lui mine Keriso me tääpe piicwa bine sabe jaawenimusi. Mine licarage pepu mule wawena!

¹⁶ Coo weene pama umle lica gemi, egä lui biname te rarekaake wääcāruge magebi coo ngulebāgrā ne teta cama sargi mule wawenane, teepi siige yepā me läbitāsi. Oogārāneji mene te pajecurage jiićenige ai poto cidi me egä, "Laatibi magebi rooriye bime mule jaawenāsi, teepi yepā me läbitāsi."

¹⁷ Yepā, Yageyame cama yepā äbita lui mara gyene. Laati te teta cama yepā läbituge, peei lui egä teepi seemo ireclota cabu yepā gegi.

¹⁸ Weene miiji sargi mule cabu ca cude padare äbita. Laati te liba nuuja niija mule ne yaacnuge, teeme tääpe ne sabe lica jaawenuge, yepā sargi mule ne liba yaacnuge, peei te teeme tääpe ne sabe jaawenuge.

¹⁹ Weene umle gemi, egä weeme tääpe lui mete gemi Aceji Seemo täापume, lui te weeme cabu yaanajuge, Acejiyame lui Seemo ituge weebibine ceera. Weene weeme lica gemi, weene Acejiyame memi,

²⁰ Ingle tabe te weebibine baborage daremu ca jiletnininui. Peei name pi weene miiji epu lenaja, egä weeme tääpe ireclota cabu ca weene Acejiyame me ngii ne babo wawenane.

7

Ätemla Coga Rooriye bime Ireclota poto cidi me

¹ Niinäce weene lui gwidape poto cidi me leta soogärepeye căme bau me, siige cane page pui daremu mene jiwecnistenininine. Nuuja niija lica gyene biname te liba coga căco lenaja.

² Yepā ero piiyepu sargi mule wālu name pi biname cina miiji coga rooriye awadrecā.

³ Siige rooriye te miiji teeme coga bau me läcāruge piiyepu coga te teeme rooriye bau me läcāruge. Teepi miiji yepāyepā teeme singi ngene aglime.

⁴ Coga te yageyame lica gwene teeme tääpe täापume, yepā rooriye sine yageyame. Cuta pepu gyene, rooriye te yageyame lica gyene teeme tääpe täापume, yepā coga tune yageyame.

⁵ Weene nuuja ingle name pi gone äbwāreca coga rooriye bime mule cabu ca, yepā ebā läbwāricuye, weene liba giri singi yaanajuge padare acatename irecu ätumutame. Cuta weeme peei irecu ätumuta padare te liba siige, weene cuta piba giri icijuge, siige Satani te piba weebibine lica angletneja ingle weeme singisingi name pi.

⁶ Cane ai lui naace täापume lica jiićenine, egä cane weebibine giri jicitinine coga rooriye awadrecame. Yepā weene liba singi gemi, cane lica jiićenininine.

⁷ Cane gege cirege, weene iyeta liba epu cirege cane lipu coga acata căco. Yepā mime yepāyepā cina maramara mule täापume kokre ne jääpānusi Acejiyame bau ca. Yepā me kokre lui yepā gwidape täापume, nuuja me kokre lui nuuja gwidape täापume.

⁸ Yepā atejäclmuta căco biname piiyepu cuublacubla bime täापume cane căme ngene atwana mene jiićenine, egä teepi miiji atejäclmuta căco lenaja cane liiyepu.

⁹ Yepā weene liba singi idrinuge coga rooriye awadrecame, siige äblicăco weeme singi bine iibaname, weene lawadricinuye. Weeme singi ädri cabu ca miiji gyene weene atejäclmuta.

¹⁰ Piiyepu cuta laatibi ituge atejäclmuta, weeme täापume mene age sena. Ai căme mene lica gyene, Yageyame miiji mene gyene. Coga te gone teeme rooriye ne ägyi.

¹¹ Yepā tabe liba jäägyuge, tabe miiji taatu lenaja coo tabe miiji anenuta teeme rooriye bau me. Cuta rooriye te gone teeme coga ne ägyi.

¹² Poto bime täापume Yageyame bau ca mene lica gyene, yepā cane te jiićenine. Liba ätrunga biname me coga pitu nvene, tabe lui ätrunga căco gwene, gone jwäägyute, tabe liba singi maane cama lenajame.

¹³ Cuta ätrunga magebi, määme liba rooriye ätrunga căco, tabe liba singi maane cama lenajame, gone jäägyute.

¹⁴ Cane ai mene naace name pi jiićenine, ingle ätrunga căco rooriye te ätrunga biname cama lalenglecājuge teeme coga me ätrunga miiji pi; cuta ätrunga căco magebi te teeme rooriye me ätrunga miiji pi lalenglecājuge ätrunga biname cama. Liba apu lica cirege, piba teeme bāgrā eei biname bime bāgrā pana cirege, laatibi Acejiyame ne lica jäätrungusi. Yepā liba apu cirege, teeme bāgrā cina cuta ätrunga biname cama lalenglecājininusi.

¹⁵ Yepā lui te ätrunga căco birige, tabe liba singi teeme ätrunga coga ne coo rooriye ne abmalame, tabe jaawenuge. Piba ätrunga coga coo rooriye kälü birige pui atejäclmuta cotre cabu ca, ingle Yageyame te weebibine itu tisoglicipi weene poode cama lenajame.

¹⁶ Ätrunga coga, maane toraca umle lica gäte, egä mäame mule te nää mäame rooriye ne singi me jaawenuge ireclota gaabe cabu me atatrongtame, piyepu ätrunga rooriye maane cuta toraca umle lica gäte, egä mäame mule te mäame coga ne singi me jwaawenuge ireclota gaabe cabu me atatrongtame.

Ätrunga Biname cina Miiji Acejiyame me Singi cabu Lenajame

¹⁷ Ätrunga biname cina miiji eei ireclota cabu lenajame, Yageyame te luma itu icranimuji piyepu luma cita ca tabe ituge ala asogleca teeme bägrä täapume. Cane apu yaabiberäjimune iyeta ätrunga ingle ngalebora.

¹⁸ Laati te liba täape cewecu cama birige, Yageyame te liba ala taasoglicuge, tabe gone läbituge pui cewecu ne äyeblyngtame. Cuta piyepu laati te liba täape cabu cewecu cäco birige, Yageyame te liba ala taasoglicuge, tabe gone läbituge pui cewecu ne acatame.

¹⁹ Nuuja gwidape lica gyene biname te liba täape cewecu cama coo täape cewecu cäco, yepä eei gyene baborage gwidape tabe Acejiyame me Mene ne ätecijame.

²⁰ Biname te lipu ireclota cabu yaanajuge, Acejiyame te liba ala taasoglicuge teeme biname täapume, tabe miiji pepu lenaja.

²¹ Maane liba aletnäneji biname gäte, Acejiyame te liba ala naasoglicuge, ngänu gyene, maane pepu naanajepi. Yepä maane liba ibibi gäte pui ireclota cabu ca kälyä äbitame, yoo maane kälyä äbitepi.

²² Yageyame te liba ala taasoglicuge aletnäneji biname ne, tabe kälyä läbituge Keriso me miiji pi. Cuta pepu gyene, laati te liba lica gyene aletnäneji biname, Acejiyame te liba ala taasoglicuge, tabe Keriso me aletnäneji biname me läbituge.

²³ Weebibine ituge babo daremu ca aletna, peei name pi ire taatu gone acrana biname cina weebibine cääri ätäyame.

²⁴ Cäme ätru-nga binamewale, weene lui ireclota cabu inajipi, Acejiyame te liba ala tisoglicipi teeme binamewale täapume, weene peema inajipi.

Ätemleja Atejäclmuta cäco Biname piyepu Cuublacubla bime potu cidi me

²⁵ Mime Yageyame te lica ituge mene iicema atejäclmuta cäco biname bime potu cidi me, yepä cane cäme ngenec atwana mene jiićenine. Ai puu cäme mene gyene, yepä weene miiji ngenecu ceera, ingle Yageyame te ngenec atwana näcäranuge cane umle cama mene iicemame.

²⁶ Ingle naace popi ai lui mäpu padare gyene, peei name pi cäme ngenec atwanena apu gyene, egä rooriye te miiji epu lenaja, tabe lipu yaanajuge.

²⁷ Mäame liba coga piti nwene, gone waabmalute. Maane liba coga cäco gäte, gone läbitute coga ne acatame.

²⁸ Yepä maane liba coga waacatute, maane nuuja niija mule ne lica jaawenute. Cuta ngulebägrä te liba rooriye acata je, tabe niija mule lica jaawenuge. Yepä laatibi latejäclmutäsi, pui cabu cuta mäpu pisi nyene, cije cane singi lica gäne weene pui mäpu cabu me abacitame.

²⁹ Cäme ätrunga binamewale, cane naace täapume jiićenine, egä babo padare lica gyene ngälugaabe oomlaname, peei name pi coga rooriye cama biname, teepi puu atejäclmuta biname gemi, yepä teepi miiji ama cita ca epu yepä ngenec atwana cama lenajame atejäclmuta cäco biname liiyepu.

³⁰ Piyepu laatibi ele yaangene-tnemuge, teeme puu ngenecu mäpu piti nemi, yepä teepi miiji epu lenaja ele cäco biname liiyepu. Piyepu laati bemi ngange, teepi puu gege gemi, yepä teepi miiji epu lenaja ngange cäco biname liiyepu. Cuta piyepu laatibi gwidape bine jaaletnanemusi, teeme puu gwidape piti nemi, yepä teepi miiji epu lenaja gwidape cäco biname liiyepu.

³¹ Yoo, laatibi gawecewe ireclota mule täapume kaakesea jaawenusi, teepi ngenec atwanena oräre gone peei cabu lenajame, ingle ai gawe te lecaleca padare apu lica cirege lenaja.

³² Cäme singi apu gyene, egä weene ngenecu mäpu cäco lenajame. Ätrunga cama cusucusi me nuuja ngenec atwanena lica gyene, yepä tabe singi Yageyame ne ngenecu miiji me wawename.

³³ Yepä coga cama biname te, tabe ngenec jwaatwananuge ai gawecewe ireclota potu cidi me, ingle tabe singi teeme coga ne ngenecu miiji me wawename,

³⁴ siige tabe neeneni potu ire jaatwu-ge. Cuta piyepu rooriye cäco magebi coo ngulebägrä cina, teepi ngenec jwaatwananinusi Yageyame potu cidi me taatu, ingle teepi singi teeme täapume mara me äbita teeme seemo ireclota piyepu täape ireclota ngalebora. Yepä rooriye cama magebi te, tabe ngenec jwaatwananuge ai gawecewe ireclota potu cidi me, ingle tabe singi birige teeme rooriye ne ngenecu miiji me wawename.

³⁵ Cane naace täápume jiićenine egä weebibine ätityerame, lica iibaname coga rooriye awadrecä cabu ca. Cane singi gäne weene eei bine wawenetnäjame, ngena gemi miiji piiyepu conocäco, piiyepu yepä ngene atwana cama äcärame Yageyame me kaakesea wawename.

³⁶ Liba ciwelooloyame wäsi piti negi, siige teepi liba niinäce apu egä, “Cine lica atejäclmuta,” yepä ingwe ca liba cusucusi te apu egä, “Ai atejäclmuta cäco mule lui miiji lica gyene ngulebägrä täápume,” coo piiyepu teeme singi cina ngulebägrä täápume liba kokre yaacrajuge, tabe siige lasicnantuge egä, “Cane miiji atejäclmuta,” siige teepi latejäclmutäsi. Ai mule lui niiya mule lica gyene.

³⁷ Yepä, cusucusi me liba ciwelooloyame pitu nwene, siige nuuja te liba lica jüibuge egä, “Maane gone waacatute,” yepä tabe teemämu ngene jwaatwanuge coga cäco lenajame, siige pui ngene atwana cabu kokre yaanajuge, tabe peei lui miiji mule jaawenuge.

³⁸ Pipu pi laati te coga waacatuge, peei lui niiya lica gyene, yepä laati te lica waacatuge, peei lui miijirage gyene.

³⁹ Piiyepu rooriye cama magebi te miiji teeme rooriye cama lenaja. Yepä rooriye te liba budre, tabe piba kälyä läbituge. Siige tabe liba singi nuuja rooriye ne acatame, tabe yaacatuge, yepä pui rooriye te miiji ätrunga biname.

⁴⁰ Yepä cäme ngene atwana te apu jiićenige, egä tabe liba rooriye cäco waanajuge, peei miiji gyene. Ai puu cäme mene gyene, yepä Acejiyame me Seemo cäme cabu pisi nyene.

8

Ätemleja Cibu Deedei poto cidi me, Lui ca Uuje bine Ituge Iiwäreja

¹ Cane singi cuta mene jajime weene lui soogärepeye cäme bau me cibu deedei poto cidi me, uuje bine lui ca ituge iiwäreja. Yoo mine umle gemi iyeta ai poto cidi me. Yepä pepu umle te biname ne jaawenuge mope babo me, yepä owecu te yäätiyäruge nuuja biname ne.

² Laati te liba apu angi, egä teeme umle pisi nyene poto gwidape poto cidi me, tabe cäro camu ge umle äbita, tabe lipu cirege.

³ Yepä laati te liba Acejiyame täápume singi, Acejiyame te umle gyene tabe.

⁴ Yoo siige cäme mene age sena pui cibu deedei poto cidi me, lui cina iiwäreneji gemi uuje bine. Mine umle gemi, egä uuje lui toraca gwidape lica gemi, piiyepu mine umle gemi, egä yepä taatu pisi nyene lui Acejiyame gyene.

⁵ Toraca gyene, egä biname cina einenisi poto gwidape bine cabu je piiyepu gawe cabu uuje ca; piiyepu toraca gyene, egä pepu uuje piiyepu yageyame bucurage gemi.

⁶ Yepä mime täápume yepä taatu “Uuje” pisi nyene, lui sine Babe piiyepu lui sine Acejiyame iyeta gwidape täápume, piiyepu lui täápume mine ninajininige. Piiyepu cuta yepä taatu Yageyame pisi nyene, Yeesu Keriso, lui cabu ca iyeta gwidape cina acinujisi piiyepu lui cabu ca mine ninajininige.

⁷ Yepä poto ätrunga biname cina umle lica gemi, egä uuje lui toraca gwidape lica gemi. Teepi teeme sasa ireclota cabu epu geäji gemi uuje bine cibu deedei ca iiwärejame, egä cuta page teepi liba pepu cibu deedei bine yäärwäjimusi, teepi camu puga ngene jotwanininisi, egä uuje bine äcäräneji gemi ai cibu deedei. Ingle naace popi teepi cängena lica ngene ca agli, egä ngena gyene toraca, ngena gyene walya, teepi peei name pi lasicnantinusi, egä cine niiya mule jwenisi pipu cibu deedei liba yäärwäjusi.

⁸ Yepä, cibu deedei papa gyene loolo; peei te äblicäco mibibine Acejiyame gome waadena. Mine liba ärwäja cäco, mine nuuja niiya ne lica jääpänusi, cuta mine liba yäärwäjusi, nuuja miiji ne lica jääpänusi.

⁹ Yoo, weene umle gemi, egä iyeta cibu deedei papa gemi, yepä weene gone ärwäja, liba umle cäco biname ne ire jaarmetnuye atramame.

¹⁰ Weene lui umle gemi, egä uuje bine iiwäreneji cibu deedei papa gemi, ingle uuje lui toraca gwidape lica gemi, siige nuuja ätrunga biname lui te ai poto cidi me cängena umle lica birige, liba jipänininuge loolo cabu, nää ai te lica opo jaarmetnuge tabe cuta loolo me, ngänuge tabe teeme asicnenta ne yääcisäruge.

¹¹ Siige weeme peei umle te sabe jaawenuge weeme nuuja ätrunga biname ne, lui te umle cäco yaanajuge piiyepu Keriso lui täápume budre äbituji.

¹² Weene liba apu niiya mule jaawenuye weeme ätrunga biname yepä ne, teebine lipu jaawenuye tabe teeme asicnenta ne äciserame, weene peei lui Keriso täápume niiya mule ne jaawenuye.

¹³ Yoo siige, cane liba cibu deedei ärwäja ca ire jaarmetnune cäme biname ne, siige cane ingwe ca lica pui cibu deedei loolo, ingle cane singi lica gäne teebine ire armetname.

9

Paulo Ngena Ingle cabu Keriso me Ätyepäneji Biname Gyene

¹ Nuuja biname te äblicäco cebine giri acitame egä cane ngena wawename. Cane Keriso me ätyepäneji biname gäne. Cane mime Yageyame Yeesu ne irecurage ca jepänujine. Cane lui kaakesea jaawenune Yageyame täöpume, weene pui kuu gemi.

² Ngänu gyene, poto cina lica nacatusi, egä cane ätyepäneji biname gäne, yepä weene te nacatuye! Weene lipu yepä me läbitipeye mime Yageyame cama, peei te jaawabudnituge, egä cane Keriso me ätyepäneji biname gäne.

³ Laatibi singi cebine ablawejame, cane cämecäme apu jiićenine

⁴ egä cäme conocäco pisi nyene biname bime bau ca deedei päpäname cäme kaakesea daremu me.

⁵ Cuta cäme conocäco pisi nyene ätrunga magebi ne coga me acatame siige teta cama gigri otnetneja poto Keriso me ätyepäneji biname cina liiyepu, Yageyame me iganewale liiyepu coo Peteru liiyepu?

⁶ Cine nää Banaba cama taatu gegi epu ätyepäneji biname, lui cina miiji kaakesea wawena cime lenaja täöpume?

⁷ Nata caami biname te daremu lica yäcärüge teeme lenaja täöpume? Cuta calwacupi yageyame te tabe waina kuu loolo teeme calwacupi cabu ca. Piiyepu maamoi ire atwi biname te tabe maamoi bime ngame miigi yäänäjimuge.

⁸ Binamerage bime ngame atwanena mene taatu lica gemi ai, cuta Acejiyame me cotre te pepu jiićenige.

⁹ Moose me Cotre cabu apu oogäräneji gyene egä, “Gone kau me tage jätäyumi, tabe liba wiiti mope bine jäämüngäjemuge.” Nää Acejiyame kau bime täöpume taatu jiićenige, cime täöpume lica gyene?

¹⁰ Ngenä pi, tabe cuta cime täöpume jiićenige. Ai mene toraca cime täöpume oogäräneji gyene. Laati te gawe ne yäängwädnuge piiyepu laati te gije bine yäätémuge, teepi kaakesea jaawenimusi kuu päpäna täöpume.

¹¹ Siige cine seemo ireclota täöpume gije bine ituge ätema weeme cabu, peei name pi bucu lica gemi cine weeme bau ca daremu me gwidape päpäname tääpe ireclota täöpume.

¹² Poto bime conocäco liba pisi nyene weeme bau ca gwidape päpäname, cime conocäco piba baborage gyene.

Yoo, cime puu conocäco pisi nyene, yepä cine apu lica ituge äbita. Cine iyeta mule cabu ituge ämyemutana naace täöpume egä cine lica iibana Miiji Mene ne Keriso poto cidi me daamledamle äbitame.

¹³ Egäsu weene umle gemi, egä lui biname cina Acejiyame me mete cabu kaakesea jaawenusi, teepi puma cita ca deedei bine jääpänimusi. Piiyepu lui cina Acejiyame ne cibü ca yiiwärajusi iiwäreja dade cabu, teepi puma cita ca teemanu kupae bine yaawadimusi.

¹⁴ Cuta pepu gyene, Yageyame te ituge iicana, egä laatibi Miiji Mene jajanena kaakesea jaawenusi, teepi miiji peema cita ca daremu päpäna teeme lenaja täöpume.

¹⁵ Yepä cane pepu lica ituge äbita. Cuta cane ai ne naace täöpume lica bii byoogärine egä cane weeme bau ca daremu päpäname. Cane singi lica gäne weebibine ätineräjame, ngänuge cane loolomecewe budre. Nuuja te äblicäco gyene cäme ai awepyeräja ingle ne acata cäme bau ca.

¹⁶ Miiji Mene acenena name pi cane äblicäco awepyeräja, ingle cane cäme singi ca lica jewenenine ai kaakesea ne, yepä Acejiyame te itu najuji cane wawename. Miiji Mene cane miiji jajanena, cije cane niya ne jääpänune.

¹⁷ Cane liba cäme singi ca ai kaakesea ne cire jaawenejine, piba cane miiji cirege daremu täöpume ätemlame. Yepä cane Acejiyame täöpume ai kaakesea ne jewenenine, ingle tabe te itu najuji.

¹⁸ Siige cane ngena daremu ne acata ai kaakesea cabu ca? Cäme daremu lui eei gyene, egä cane Miiji Mene daremu cäco jaajananemune. Cäme puu conocäco pisi nyene daremu päpäname ai kaakesea cabu ca, yepä cane pepu lica äbitenine.

¹⁹ Cane puu nuuja biname me aletnäneji biname lica gäne, yepä cane cämämu äbitujine iyeta biname bime täöpume aletnäneji biname pana lenajame naace täöpume egä bucurage biname bine piba Yageyame bau me waadename.

²⁰ Cane liba Israela biname cama birige, cane teeme pana nanajuge naace täöpume teebibine Yageyame bau me waadename. Cane puu Moose me Cotre cabu ca äyebingtujine, yepä cane liba Israela biname cama kaakesea jaawenune, cane epu nanajuge, egä cane pui cotre bine icwetnenemine naace täöpume teebibine Yageyame bau me waadename.

²¹ Cuta cane liba biname cama birige lui Israela biname lica, cane teeme pana nanajuge Moose me Cotre äcwetna cäco naace täöpume teebibine cuta waadename Yageyame bau me.

Cane naace me lica jiićenine, egä cane Acejiyame me cotre cabu ca kälyä gäne; eewe, cane Keriso me cotre ngalebora säne pätä.

²² Laati bemi ätrunga cabu kokre liba lica, cane liba ten cama birige, cane teeme pana läbitune teebibine Yageyame bau me waadename. Yoo, cane lipu biname cama nanajuge, cane teeme pana läbitune naace tääpume cane lipu maramara gaabe ca teeme poto bine waadename Yageyame bau me.

²³ Cane iyeta gwidape bine Miiji Mene miji pi jaawenimune naace tääpume mine iyeta pui Mene cabu ca miiji ne päpäname.

²⁴ Weene nata umle gemi, egä puu bucurage cina luuwamitnu-ge daremu tääpume, yepä teeme yepä taatu te yuutrutuge, siige tabe daremu ne yaacatuge. Peei name pi weene miiji pepu uuwamitnipeye, egä weene daremu ne cirege päpäna.

²⁵ Laati bemi singi apu bääclena cabu me äbäcname, teepi miiji eei mule bine ägyema, lui cina teeme tääpe bine kokre cäco me jaawenimusi naace tääpume teepi piba niinäce daremu ne acata. Teepi lui daremu ne yaacatusi iyeteta lica gyene, yepä mine lui daremu tääpume uuwametnenininago, peei lui iyeteta gyene.

²⁶ Peei name pi cane conocäco uuwamenine ngälu ngäluagaabe me. Piiyepu cane eei biname pana gäne, lui te imecubu bääclena cabu kuutamaraage yoororuge.

²⁷ Cane naace name pi cäme tääpe ne egletnäjenine egä tabe kokre me äbitame piiyepu cäme singi ibi lenajame, cije Acejiyame te cebine, lui te poto bine Miiji Mene ituge jajanena, pama äyebingta mage.

10

Umle Mene Uuje bine Iiwäreja poto cidi me

¹ Cäme ätrunga binamewale, weene ngene gone jitrimalinuge, ngena te äbituji mime kaakesaare bime tääpume, teepi liba Moose cama Aikupito ca secluji. Carbe te gaabe tewabimuji teepi luma otnime, piiyepu teepi iyeta Ududi Malu ne cängenaraage ernge ta suuruji.

² Teepi carbe uuwa cabu lipu secluji piiyepu malu ne lipu ernge ta suuruji, teepi peei lui Moose cama yepä me äbitininujsi cotre bine äcwetname.

³⁻⁴ Teepi yepä deedei ne serwa-nenanumesi piiyepu yepä niye ne senäjumesi teeme seemo ireclota tääpume. Teepi ireclota kula cabu ca niye ne senäjumesi, teta cama lui kula te äduji. Pui kula lui Keriso tage.

⁵ Ngänuge apu, yepä Acejiyame te ngenecu miiji lica ge teeme iyeta bime tääpume, siige teeme bucurage cina budre äbitininujsi daapo taatu cewe cabu.

⁶ Yoo siige, ai lui umle mene gyene mime tääpume, egä mine gone singi ädri niyaniya mule wawenime teepi liiyepu.

⁷ Cuta mine gone uuje bine awejena teeme poto cina liiyepu. Oogäräneji mene te ai poto cidi me jiićenige, egä teepi soriyomu eclitujisi, giire jewäjanujsi ime ca wawenäneji uuje gwidape ne opo gaabe me acitame.

⁸ Mine cuta ero piiyepu sargi gaabe cabu gone otnetneja teeme poto cina liiyepu, siige yepä taatu bimu cabu twentitrii tausen biname cina budre itrametnememuji.

⁹ Piiyepu mine gone Yageyame ne apicetnära, egä mine luma ngälu niya mule acni tabe piba daremu ceerame mibibine, teeme poto cina lipu jewenujsi, siige cobyame cina teebibine budre me eglecanemujsi.

¹⁰ Piiyepu mine gone Acejiyame bau me yaaratusi teeme poto cina liiyepu, siige teebibine sabe wawenayame mename seemo te budre me eglecanemuji.

¹¹ Iyeta ai gwidape cina äpletnäruji teeme tääpume naace tääpume teepi peema cita ca ngene ca aglanename; siige oogäräneji gemi mime umle tääpume, lui cina ireclota gemi page ai padare cabu, ngäluagaabe liba mameta gyene atyaramta.

¹² Peei name pi laati te ngene apu jwaatwananuge, egä tabe ätrunga cabu kokre cama jeclajutenige, tabe miiji cängena ire, cije tabe yaatramuge.

¹³ Iyeta apicetnära weene lui bine jääpänanemuye, weeme taatu cabu lica, cuta iyeta biname cina peei bine jääpänanemusi. Yepä Acejiyame te teeme mene ibi jaawenuge, tabe epu taatu apicetnära bine täätjepäjemuge weeme bau me, weene lui cabu ca miiji gemi uutruta. Apicetnära te liba täduge, tabe kokre icärininuge weene ämyemutame siige äsime.

¹⁴ Peei name pi cäme miijirage binamewale, weene uucratni-peye uuje bine awejena cabu ca.

¹⁵ Weene ngene atwanena cama biname gemi, weene jitranemepeye cane lui jijjana-neninine.

¹⁶ Mine liba aareto jaarwusi, siige eso yääcärusi kwäye tääpume, mine liba pui kwäye cabu ca nani, mine piba gigri yepä me läbitininago Keriso cama teeme uudi nani name pi. Cuta

mine liba yäätrecusi buluduu ne, siige jaarwusi, mine piba gigri yepä me läbitininago Keriso cama teeme tääpe arwi name pi.

¹⁷ Aareto buluduu lui yepä gyene. Mine puu bucurage gemi, yepä mine yepä tääpe gemi, ingle mine iyeta peei yepä buluduu ne jaarwusi.

¹⁸ Weene ngene jotwananineye Israela biname bime poto cidi me. Teeme apu mule pisi nyene, egä laatibi yäärwäjimusi cibü deedei bine, lui ca Acejiyame ne yiiwärujisi, teepi iiwäreja dade cabu ca gigri yäärwäjimusi, siige teepi gigri Acejiyame cama yepä me läbitininusi.

¹⁹ Cane naace tääpume lica jüicenine, egä lui cibü deedei uuje bine iiwäräneji gemi, mara gemi poto cibü deedei cabu ca, piyepu cane naace me lica jüicenine, egä uuje lui toraca gwidape gemi.

²⁰ Yepä cane naace me jüicenine, egä Acejiyame umle cäco biname cina liba uuje bine yiiwärajemusi, teepi niya cable bine yiiwärajemusi, lica Acejiyame ne. Cane singi lica gäne weene peei mule cabu ätenglecäjame niya cable bime cama yepä äbitame.

²¹ Weene äblicäco gemi Yageyame me aareto kwäye cabu ca nani piyepu cuta niya cable bime kwäye cabu ca nani. Weene cuta äblicäco gemi Yageyame me dade cabu ca loolo cuta piyepu niya cable bime dade cabu ca loolo.

²² Mine liba apu läbitininago mine peei lui Acejiyame ne yaapicetnärusi, egä lipu, tabe ire taatu nicranininige mine ai mule wawename? Mine nää apu ninge-nininuge, egä mine kokre gemi, tabe kokre cäco gyene?

Weene Jaawenimuye Iyeta Gwidape bine Acejiyame me Ngii Babo Wawename

²³ Biname cina apu jüicusi egä, "Iyeta mule lui papa gemi wawenetnäjame." Yoo toraca gyene, yepä iyeta mule lui miiji lica gemi. Cuta apu jüicusi egä, "Cine papa gemi iyeta mule bine wawenetnäjame." Yoo, yepä iyeta mule lui biname bine lica yäätityeräjimusi.

²⁴ Nuuja te gone teeme taatu miiji ne jäärnguge, yepä miiji tabe poto bime miiji ne ärngi.

²⁵ Weene miiji gemi loolo me iyeta cibü deedei bine, lui bine jaaletnimusi aletna puupu cabu. Pepu cibü deedei ärwäja cabu ca weene gone niyaniya lasicnantinuye, egä pama uuje bine iiwäräneji deedei gemi.

²⁶ Oogäräneji mene te apu jüicenige egä, "Gawecewe piyepu iyeta teeme gwidape Yageyame memi."

²⁷ Piyepu ätrunga cäco biname te liba weebibine ala tisoglicininuge deedei loolo me, weene liba singi otnime, piba naaclepi, erwäjemepeye, tabe ngena icärininuge. Weeme nuuja ingle lica birige niya asicnentame pui cibü deedei name pi.

²⁸ Yepä pui abasecretna cabu liba nuuja te jüinuge egä, "Ai cibü lui uuje bine iiwäräneji gemi," piba pui biname name pi gone yäärngäjuyee, lui te jüinuge pui mene. Cuta piyepu teeme asicnenta name pi gone yäärngäjuyee, ingle tabe lasicnantuge egä niya mule gyene.

²⁹ Yoo, cane weeme asicnenta name pi lica jüicenine ai mene, ingle pui cibü ärngäja te äblicäco weeme asicnenta ne sabe wawena, yepä pui nuuja me asicnenta name pi cane jüicenine.

Siige weeme yepä te pama jüicenige egä, "Nuuja biname me asicnenta te ngeno me niibenige cane gwidape wawename, lui cäme tääpume papa gemi.

³⁰ Cane liba Acejiyame ne eso yäacärune deedei tääpume, siige yäärwäjune, piba ngena name pi poto cina cebine niicetnusi deedei poto cidi me, cane lui tääpume eso yäacärune Acejiyame ne?"

³¹ Agesa cäme mene pui biname tääpume: weene ngena liba jaawenimuye, yäärwäjuyee coo yäänäjuyee, weene iyeta jaawenimuye Acejiyame me ngii babo wawename.

³² Weene epu inajipi, egä weene Israela biname bine atramame gone jaawenimuye, coo piyepu lui cina Israela biname lica gemi, coo piyepu Keriso ne lui cina jäärngusi.

³³ Weene epu äbitinineye cane liiyepu, lui te äbitinine iyeta biname bine ngenecu miiji me wawename. Cane cäme miiji tääpume lica äbitinine, yepä iyeta biname bime miiji tääpume naace tääpume piba iyeta cina ireclota ne päpäname Yeesu cabu ca.

11

¹ Cebine nätuteye epu, cane lipu Keriso ne jütutenine.

Magebi Rooriye cina Lipulipu Lenajame Ireçu Ätumuta Padare cabu

² Cane weebibine iwepyeräjininine, ingle weene ngene lica jitrimalinuge cäme poto cidi me, piyepu weene icwetnenemiye, cane lui itu ibiberäjipene weebibine.

³ Yepä cane singi gäne weene umle äbitame, egä Keriso sine mope iyeta rooriye bime tääpume, rooriye sine mope teeme coga tääpume, piyepu Acejiyame sine mope Keriso tääpume.

⁴ Pipu pi rooriye te liba ätrunga ingle abasecretna cabu irecu lätumutuge coo Acejiyame me tagepogogo mene jicemuge mope acwabäneji, tabe Keriso ne opo gaabe me lica yaacituge, lui sine teeme mope biname.

⁵ Piiyepu cuta lui magebi te mope acwaba cäco ätrunga ingle abasecretna cabu irecu lätumutuge coo Acejiyame me tagepogogo mene jicemuge, tabe teeme rooriye ne opo gaabe me lica yaacituge. Pui lui epu pana gyene, egä teeme mope äsweji ge.

⁶ Magebi te liba teeme mope lica yaacwabuge, tabe cuta miiji teeme edingäli alacna. Yepä, ingle ajiri mule gyene magebi täapume edingäli alacname coo mope äsweji lenajame, tabe miiji teeme mope ne acwaba.

⁷ Yepä rooriye te gone teeme mope ne acwaba, ingle Acejiyame te ituge teebine teeme pana me wawena piiyepu teeme pana ireclota ituge ceera. Yepä magebi ne rooriye me pana ireclota ituge ceera,

⁸ ingle rooriye ne lica ituge magebi cabu ca wawena, yepä magebi ne ituge rooriye cabu ca wawena.*

⁹ Cuta piiyepu rooriye ne lica ituge wawena magebi täapume yepä magebi ne ituge wawena rooriye täapume.

¹⁰ Peei name pi magebi te miiji teeme mope ne cängena acwaba naace täapume Acejiyame me mename seemo cina päpäname, egä tabe teeme rooriye ne opo gaabe me yaacituge.

¹¹ Yepä Yageyame me ätrunga ingle cabu magebi te taatu lica gwene cuta piiyepu rooriye te taatu lica gyene. Magebi me lipu singi pisi nyene rooriye me ätityera täapume, rooriye me cuta singi pisi nyene magebi me ätityera täapume.

¹² Magebi ne lipu ituge rooriye me cabu ca wawena, cuta pepu gyene, rooriye te magebi me cabu ca lapli-mluge, piiyepu Acejiyame agednayame gyene iyeta gwidape täapume.

¹³ Siige weene weemämu atranipeye, egä nää miiji gyene magebi te ätrunga ingle abasecretna cabu irecu ätumuta mope acwaba cäco.

¹⁴ Acejiyame te lipu biname bine icranuji ai gawe cabu lenajame, peei te birige abiberäja, egä rooriye täapume lecaleca edingäli lui ajiri cama birige,

¹⁵ yepä magebi ne lui miiji opo me jwaawenuge. Teebine lecaleca edingäli ituge ceera acwaba täapume.

¹⁶ Liba biname piti nemi, laati bemi singi ai poto cidi me äcelame, cäme nuuja mene lica gyene iicemame, yepä cine piiyepu iyeta ätrunga ingle cina apu läbitininusi.

Korinito Ätrunga Biname cina Aareto ne Niiyarage Yaarwusi

¹⁷ Cane liba ai umle mene jijanenenine, cane miiji cuta weebibine ablaweja. Weene liba labasecretnininuye irecu ätumutame, weene nuuja ätityera ne puma cita ca lica jääpänuye, yepä sabe jiwenninuge weebibine.

¹⁸ Yoo, cane ituge ätecija, egä weene liba labasecretnininuye irecu ätumuta täapume, weene yepä ngene atwanena cama lica birige. Cuta cane jitrungenine, egä ai mene lui toraca gyene,

¹⁹ ingle cane umle gäne, egä weeme maramara äbita lui papa lica gyene. Peei lui weebibine apicetnärame weene piba opo awatname, egä weeme sobe cabu laati bemi toracarage ngenecu cama.

²⁰ Yoo siige, weene liba labasecretnininuye, weene aareto[†] ne cängena lica jaarwuye puma.

²¹ Ingle weene liba läbitininuye deedei loolo me, weeme yepäyepä cina jilonicininuge watawata teeme gome waadename weeme yepäyepä cina lui deedei piiyepu waina niye saawadimuye. Peei name pi owecumete biname cina loolomecewe birige piiyepu laatibi bucurage waina niye saawadimusi, teepi pui cabu ca buduma me läbitininusi.

²² Weeme nää weemerage mete lica gemi pepu loolo me coo nänäjame? Weeme täapume nää papa gyene Acejiyame me binamewale bime abasecretna cabu buduma mule acnetnejame? Coo piiyepu weene nää singi gemi owecumete biname bine ajiri me wawename? Cane nää miiji weebibine awepyeräja? Ai poto cidi me cane licarage iwepyeräjininine!

Yageyame me Aareto

²³ Cane Yageyame bau ca ituge acata cane lui weebibine cuta itu ibiberäjpene, egä Yageyame Yeesu ne lui ciye cabu jewabudni-tujisi budre täapume, tabe piba buluduu ne ecatige,

²⁴ Acejiyame ne eso ecäriige, itrecige, jicige egä, “Ai lui cäme täape gyene, lui weeme täapu myene. Weene erweye cebine ngenecname.”

* **11:8:** magebi rooriye: Ire Genesis 2:21-23 † **11:20:** aareto: Pui padare cabu ätrunga biname cina liba labasecretnininusi aareto loolome, teepi pui padare cabu cuta deedei läbitininusi.

²⁵ Cuta pepu gyene, deedei ingwe gaabe ca tabe kwäye ne ecatige, jiiçige egä, “Ai kwäye te klaje jecenige Acejiyame lui kirece mene ituge jaji biname bine niya cabu ca äsecrera, cäme uudi liba tapirenige. Weene liba yaanuye, cebine ngene napecnuye.”

²⁶ Siige iyeta padare cabu weene liba ai buluduu ne jaarwuye piiyepu ai kwäye cabu ca yaanuye, weene peei lui Yageyame me budre ne jaaitnäjuye, ngälu tabe liba cire tacnenutepi.

²⁷ Peei name pi laati te liba papapapa jaarwuge Yageyame me buluduu ne cuta yaanuge teeme kwäye cabu ca, tabe teeme tääpe piiyepu uudi bine sabe jaawenimuge.

²⁸ Yoo, pipu pi iyeta biname cina miiji niinäce teemämu lablawäjinuye, ingwe ca piba jaarwuye pui buluduu ne cuta yaanuye pui kwäye cabu ca.

²⁹ Laati te liba aareto cabu buluduu ne jaarwuge piiyepu kwäye cabu ca yaanuge opo awatna cäco, egä Yageyame me tääpe ngena tääpu myene, peei biname te mäpu ne jääpänuge.

³⁰ Peei name pi weeme bucurage cina pita gemi piiyepu bleela gemi, nesae cina budre ituge äbita.

³¹ Yepä mine liba mimämu niinäce lablawäjinago, piba Yageyame te nuuja singi lica mibibine pui mäpu daremu ceerame.

³² Yepä Yageyame te nitranininuge, niblawäjinuge naace tääpume ngälugaabe je piba tabe singi lica mibibine mäpu daremu ceerame gawecewe muleyame biname cama yepä.

³³ Yoo siige, cäme ätrunga binamewale weene liba naacluge aareto loolo me, weene miiji nuuja bine awagrija, piba gigri loolo.

³⁴ Liba laasi nyene loolomecewe, tabe miiji niinäce mete cabu säärwäjuge, siige Acejiyame te piba weebibine lica ablaweja weeme niyarage mule name pi weeme abasecretna ngalebora. Yepä poto mule poto cidi me cane ebä umle pa jiwenipene, cane liba pa lädepene peeyeme.

12

Aceji Seemo te Kokre Yääcäranemuge Maramara Kaakesea Wawenecame

¹ Cäme ätrunga binamewale, cane singi gäne weene toraca umle äbitame, egä Aceji Seemo te ngena maramara kaakesea tääpume kokre ceera.

² Weene umle gemi, egä weene liba camu Acejiyame umle cäco inajininuji, mene cäco uuje cina weebibine conocono gaabe cabu me iwadininujisi weene teebibine awejename.

³ Peei name pi weene miiji cängena ire lui gyene miiji seemo, cuta lui gyene niya seemo. Liba Acejiyame me Seemo te biname ne yaacenanuge, tabe äblicäco iicana egä, “Yeesu, maane nääglumegel!” Cuta nuuja poto me, nuuja te äblicäco iicana egä, “Yeesu lui cäme Yageyame gyene,” liba teeme cabu Aceji Seemo te lica yaanajuge.

⁴ Maramara kokre piti nemi maramara kaakesea wawenecame, yepä lui Seemo te biname bine yääcäranemuge peei kokre, tabe yepä taatu gyene.

⁵ Cuta kaakesea maramara gemi, yepä Yageyame lui tääpume jaawenimusi, tabe yepä taatu gyene.

⁶ Kokre mule lui maramara gemi, yepä Acejiyame lui te umle yääcäranemuge, tabe yepä taatu gyene.

⁷ Acejiyame te biname bime yepäyepä cabu maramara gaabe ca yaaboclomäjuge, egä teeme Seemo pisi nyene teeme cabu. Siige iyeta mule, lui maramara biname cabu läpletneräjuge, teepi iyeta biname bime miiji tääpume.

⁸ Yoo, teeme Seemo te yepä ne umle yääcäruge tabe mäpu cabu ca asata gaabe ne päpäname; cuta nuuja ne ngene atwana yääcäruge tabe ämleträjeji gwidape coo mule poto cidi me umle äbitame.

⁹ Tabe cuta nuuja ne ätrunga yääcäruge poto gwidape poto cidi me egä pagege äbita; cuta nuuja ne kokre yääcäruge biname bine pita cabu ca miiji wawenecame.

¹⁰ Piiyepu nuuja ne yääcäruge kokre tabe kokre cama ciitaca mule bine wawenecame; cuta nuuja ne kokre yääcäruge Acejiyame me tagepogogo mene iicemame; cuta nuuja ne kokre yääcäruge tabe ngene ca aglime, egä nuuja biname ne lui seemo te ecanenige, nää tabe Aceji Seemo gyene coo niyarage seemo gyene; cuta nuuja ne kokre yääcäruge tabe teeme umle cäco mene ca iicemame; cuta nuuja ne kokre yääcäruge pui mene ne aboclomtame.

¹¹ Iyeta ai mule bine yepä Seemo te jaawenimuge, lui te maramara kaakesea yääcäranemuge biname yepäyepä bine, tabe lipu tääpume singi ceerame.

Yepä Tääpe, Bucurage Piicwa

¹² Ätrunga inge cina lui Keriso me tääpe gemi. Ätrunga biname cina lui maramara piicwa gemi, lui cina yepä tääpe ne jewenenisi.

¹³ Mine puu maramara biname gemi, Israela biname coo nuuja gawe biname, aletnäneji biname coo poto biname, yepä mibibine iyeta yepä Seemo ca ituge äciseja, siige mine yepä tääpe me ituge äbita. Piijepu Acejiyame pui yepä Seemo ne ituge acitena mime yepäyepä cabu tabe lenajame.

¹⁴ Tääpe cabu yepä taatu piicwa lica gyene, yepä bucurage piicwa gemi.

¹⁵ Ernge te liba jüucuge egä, “Cane ime lica gäne, peei name pi cane tääpe me piicwa lica gäne,” peei te lica jüubuge tabe tääpe me piicwa lenajame.

¹⁶ Cuta tablame te liba jüucuge egä, “Cane irecu lica gäne, peei name pi cane tääpe me piicwa lica gäne,” peei te cuta lica jüubuge tabe tääpe me piicwa lenajame.

¹⁷ Tääpe te liga iyeta irecu taatu cirege, tabe piba lipulipu lengo ärmetneja. Piijepu tääpe te liga iyeta tablame taatu cirege, tabe piba lipulipu lengo ärmetneja.

¹⁸ Yepä Acejiyame te piicwa maramara bine icranimuji tääpe cabu, tabe lipu ituge singi.

¹⁹ Liga iyeta yepä taatu piicwa cirege, piba tääpe te lica cirege.

²⁰ Yepä pepu lica gyene. Piicwa maramara gemi, tääpe lui yepä gyene.

²¹ Peei name pi irecu te äblicäco ime ne jaji egä, “Cane singi lica gäne mäame tääpume.” Cuta mope te äblicäco ernge bine jaji egä, “Cane singi lica gäne weeme tääpume.”

²² Cuta piijepu tääpe te äblicäco eei piicwa cäco lenaja, mine lui poto cidi me ngene jwaatwananinago, egä kokre cäco gemi.

²³ Piijepu lui piicwa poto cidi me ngene jwaatwananinago, egä papa gemi, mine cängenarage ire jwaatwemusi; cuta lui piicwa bine äblicäco awabudnita, mine cängenarage yaacwabimusi.

²⁴ Yepä lui piicwa bine biname cina miiji päpäname, teepi acwaba cäco yaacrajimuge. Acejiyame te tääpe ne epu jewenuji, egä mine lui piicwa tääpume lasicnanti-nago, egä papa gemi, tabe singi peei piicwa bine opo gaabe me acraname.

²⁵ Yoo siige, tääpe me maramara piicwa cina äblicäco teemeteme ägyi, yepä teepi teemeteme ire latwinusi.

²⁶ Yepä piicwa te liba mäpu cabu yaanajuge, teepi iyeta pui mäpu cabu yaacrajuge ten cama. Cuta yepä piicwa ne liba yaawepyeräjusi, teepi iyeta yepä gege teta cama.

²⁷ Yoo, weene peete nemi Keriso me tääpe; weene yepäyepä cina lui teeme yepäyepä piicwa gemi.

²⁸ Ätrunga ingle ngalebora Acejiyame te biname bine ituge maramara kaakesea tääpume acranetnäja. Tabe poto bine ätyepäneji biname me ituge acrana, poto bine ituge acrana Acejiyame me tagepogogo mene iicemame, poto bine abiberäjame, poto bine kokre cama ciitaca mule bine wawenecame, poto bine kokre ituge ceera pita biname bine miiji wawenename, poto bine nuuja biname bine ätityeräjame, poto bine ituge acrana mope biname me, cuta poto bine kokre ituge ceera teepi teeme umle cäco mene ca iicemame.

²⁹ Yepä iyeta ätrunga biname cina ätyepäneji biname lica gemi, coo teepi iyeta cina Acejiyame me tagepogogo mene lica jüicemusi, iyeta cina lica yaabiberäjimusi, ciitaca mule bine lica jaawenimusi,

³⁰ coo pita biname bine miiji lica jaawenanemusi, coo teeme umle cäco mene ca lica jüicemusi, coo teepi iyeta cina ibibi lica gemi pui mene aboclomtame.

³¹ Yoo, weene äbitinineye kokre päpäname modamoda mule bine wawenecame. Yepä, yepä taatu gwidape pisi nyene, lui gyene baborage. Peei lui singi gyene biname bime tääpume.

13

Toraca Singi Lipu Gyene

¹ Cane liba ibibi birige iicema biname bime maramara mene ca coo mename seemo bime maramara mene ca, yepä cane liba singi lica biname bime tääpume, cäme mene lui epu pana birige paate ala coo gogogo ala liijepu.

² Ngänu gyene, cane liba ibibi birige Acejiyame me tagepogogo mene iicemame, piijepu cuta cäme liba umle piti nemi iyeta mule poto cidi me, piijepu cane liba umle birige iyeta ämletnäneji gwidape piijepu mule poto cidi me, cuta cäme liba ätrunga pisi nyene podo bine äyebhengame teeme puupu cabu ca, yepä cane liba singi cäco nanajuge biname bime tääpume, iyeta peei mule lui papa birige.

³ Ngänu gyene cane puu iyeta cäme gwidape ceerana owecumete biname bine coo cäme tääpe ne ceera uubuderame, yepä cane liba singi lica biname bime tääpume, peei mule cina nuuja miiji lica birige cäme tääpume.

⁴ Toraca singi cama lui biname te mäpu cabu bojäcu yaanajuge, tabe owelaamelame gyene, ire patre lica yaagluge, lica lawepyeräjuge, mope babo me lica läbituge.

⁵ Toraca singi cama biname te cāngena yaanajuge, teeme taatu miiji ne lica jäärnguge, claabe me wata lica läbituge, biname bime niya mule bine lica yaawadimuge, yepä ngene jäätrimaluge teeme niya mule poto cidi me.

⁶ Toraca singi lui gege lica birige walya täápume, yepä tabe gege birige toraca täápume.

⁷ Biname te liba toraca singi cama, ngänuge lipulipu teebine sabe jaawenusi, tabe yäämyemutuge. Toraca singi cama biname te teeme ätrunga ne lica yaapesaruge, tabe wälu lica birige, piyepu tabe gloose lica läbituge mäpu cabu bojäcu lenajame.

⁸ Toraca singi te iyeteta gyene. Acejiyame me tagepogogo mene iicema cina cire lapiripesi, piyepu biname bime umle cāco mene iicema cire lapiripesi, cuta umle te cire lapirepi.

⁹ Mime umle lui cāngena lica gyene, piyepu mine lui Acejiyame me tagepogogo mene jicemusi, poto bine jäätibäjemusii;

¹⁰ yepä eei te liba tädenige lui te epucāco gyene, piba iyeta lui cina epucāco lica teepi cire lapiripesi.

¹¹ Cane liba bägrä je, cane bägrä pana mene jicemujine piyepu ngene jotwananujine. Cane liba babo me äbitujine, cane bägrä bime mule bine ebmalimujine.

¹² Mine page Acejiyame ne jepānanenisi owowä pana, lica pajecurage, siige ingwe ca mine teebinerage cire jääpānepesi. Page cane teebine cāngena umle lica, yepä piba cirege cane cāngena iyeta umle äbita teeme poto cidi me, tabe lipu umle iyeta cāme poto cidi me.

¹³ Yoo siige, ai nesae cina cire yaacrajemepi, ätrunga, ngene atwanena ca oomlana piyepu singi, yepä ai bime cabu ca singi lui baborage gyene.

14

Lipu Maramara Kaakesea täápume Aceji Seemo Kokre Ceera

¹ Weene kokre äbitipeye toraca singi cama lenajame, cuta kokre äbitipeye Aceji Seemo bau ca kokre päpāname maramara kaakesea wawename, toracarage lui Acejiyame me tagepogogo mene iicemame.

² Laati te teeme umle cāco mene ca jicemuge, tabe biname bine lica jaajananemuge, yepä Acejiyame ne jaajanuge, ingle nuuja biname te äblicāco teeme mene ätecija. Tabe Aceji Seemo me kokre ca mene jicemuge ogä gwidape poto cidi me.

³ Yepä laati te Acejiyame me tagepogogo mene jicemuge, tabe biname bine yäätityeräjimuge, kokre yäacärimuge piyepu ngenecu plowa me jaawenimuge.

⁴ Yepä laati te liba teeme umle cāco mene ca jicemuge, tabe teeme taatu miiji täápume jicemuge. Yepä laati te Acejiyame me tagepogogo mene jicemuge, tabe ätrunga ingle ne yäätityeräjuge.

⁵ Cane singi gāne weene iyeta weeme umle cāco mene ca iicemame; yepä cane toraca singi gāne weene kokre ne acatame Acejiyame me tagepogogo mene biname bine jajanename. Laati te Acejiyame me tagepogogo mene biname bine jaajananemuge, tabe baborage gyene, ingle biname cina yäatecijemuge tabe ngena täápume jicemuge. Yepä laati te teeme umle cāco mene ca jicemuge, tabe matikäli gyene, ingle biname cina lica yäatecijemuge, tabe ngena täápume jicemuge. Tabe ebä babo läbituge, liba biname pisi nyene peei mene ne aboclomtuge cane weebibine jajanename, coo liba lica saawadimune umle mene, coo piyepu Acejiyame me tagepogogo mene, coo abiberäja mene.

⁶ Yoo, cāme ätrunga binamewale, cane cāme cabu ca etonärenine ai mule ne. Cane liba lädume peeyeme, siige mime umle cāco mene ca jicemune, cane piba lipulipu itityärinune weebibine? Cane licarage itityärinune, cane liba lica saawadimune Acejiyame te ngena cāme bau me saaboclomtuge cane weebibine jajanename, coo liba lica saawadimune umle mene, coo piyepu Acejiyame me tagepogogo mene, coo abiberäja mene.

⁷ Cuta pepu gyene, laati te liba jääcnäjuge dobidobi ne coo gogogo ne papapapa, biname cina umle lica birige, egä ngena uupera täápume jecnäjenige.

⁸ Piyepu laati te liba moole ne däägurage cubu täápume jääcnäjuge, biname cina lica birige amaceträja.

⁹ Cuta pepu gyene, maane liba mäāme umle cāco mene ca jicemute, biname cina lipulipu ätecija, maane ngena täápume jicemute. Mäāme mene te papa me läbituge.

¹⁰ Ai gawecewe cabu lui bucurage maramara mene gemi, yepä teepi papa lica gemi, ngene atwana cama gemi.

¹¹ Yepä laati te liba cāme umle cāco mene ca cebine najananuge, pui biname te catecewe biname pana birige cāme täápume, cane cuta piyepu catecewe biname pana birige teeme täápume.

¹² Siige weene liba äbitininiye Aceji Seemo me kokre pöpäname maramara kaakesea wawename, weene miiji eei kaakesea tääpume oräre singi, lui cina yäätityeräjimusi ätrunga biname cina kokre äbitame.

¹³ Peei name pi lui biname te teeme umle cäco mene ca jücemuge, tabe miiji irecu ätumuta Acejiyame bau me tabe teebine kokre ceerame pui mene ne cuta aboclomtame.

¹⁴ Cane liba cäme umle cäco mene ca irecu läutumutanume, cäme seemo te cäme cabu irecu läutumutanuge, yepä cäme ngene atwana te pui mene ne lica joomluge.

¹⁵ Cane siige miiji ngena wawena? Cane singi gäne cäme seemo te cäme cabu cäme umle cäco mene ca irecu ätumuta piijepu uupera atanga, yepä cane cuta singi gäne cämegerage mene ca irecu ätumutame piijepu uupera atangame, cane lui mene tääpume umle.

¹⁶ Maane liba weeme abasecretna ngalebora Acejiyame ne yaawepyeräjute mäame umle cäco mene ca, Aceji Seemo lui mene yäacärüge mäame seemo ne, pui mene umle cäco biname cina lipulipu "Amen" mene iicana, ingle teepi nuuja umle lica birige, maane ngena tääpume jücemute?

¹⁷ Maane puu miijirage yaawepyeräjute Acejiyame ne, yepä poto bine lica yäätityeräjimute.

¹⁸ Cane Acejiyame ne eso ecärenine, egä cane cäme umle cäco mene ca magerage jüicananemune weeme iyeta cabu ca.

¹⁹ Cane puu miiji gäne ätrunga ingle me abasecretna ngalebora bucurage mene iicemame cäme umle cäco mene ca, yepä weene lica itecijinuge, peei name pi cane singi gäne mimerage mene ca iicema. Ngänuge cane matikäli taatu jücemune, yepä weene liba umle, weene peei cabu ca labiberäjiminuue.

²⁰ Cäme ätrunga binamewale, weene bägrä bime pana ngene gone jwaatwananinuue. Matimati bägrä cina lipu umle cäco bucurage gwidape poto cidi me, weene miiji pepu umle cäco inajipi niya mule wawenecame, yepä weeme ngene atwanena miiji epu lenaja modamoda biname bime liijepu.

²¹ Oogäräneji mene te apu jüicenige egä, "Yageyame te jüicenige:

cane idne mene biname bine cire jaawenemepene
cäme binamewale bine jajanename;

cane catecewe biname bime tage cabu ca cire jüicemepene,
yepä teepi puu singi lica ätecijame cebine."

²² Yoo siige, biname te liba teeme umle cäco mene ca jücemuge, peei lui cewecu gyene ätrunga cäco biname bime tääpume, lica ätrunga biname bime tääpume. Yepä Acejiyame me tagepogogo mene iicema lui cewecu gyene ätrunga biname bime tääpume, lica ätrunga cäco biname bime tääpume.

²³ Siige weeme ätrunga ingle me abasecretna ngalebora liba iyeta biname cina weeme umle cäco mene ca jücemusi, siige lui ätrunga biname bine lica ituge abiberäja ai mule poto cidi me coo piijepu ätrunga cäco biname, teeme poto cina liba sääbäcnusi, siige yäätjecijemuge weene iicema je, teepi apu jaangemuge, egä weene iyeta buduma gemi.

²⁴ Yepä weene iyeta liba Acejiyame me tagepogogo mene jüicemimuye, siige ätrunga cäco biname coo piijepu ätrunga biname te, lui nuuja umle lica gyene ai mule poto cidi me, liba tabacituge, liba yäätjecijuge pui mene, tabe lasicnantuge, egä tabe niya mule ituge waweneca. Tabe lui mene yäätjecijuge teebine yaablawäjuge,

²⁵ siige teeme ngena gemi ämletnäreji, iyeta sääsemuge. Tabe piba kokorae ca lääpednutuge, Acejiyame ne opo gaabe yaacituge, siige teeme niya mule bine jaawabud-nitemuge, jüicuge egä, "Toraca, Acejiyame pisi nyene weene cama."

Irecu Ätumuta Kaakesea Miiji Cängena Wawena

²⁶ Yoo, cäme ätrunga binamewale, mine ngena abiberäjame ai cabu ca? Weene liba labasecretnininuue irecu ätumutame, yepä te uupera ne yaacatuge, nuuja te ibiberäjininuge, nuuja te jüjinuge Acejiyame te ngena yaaboclomtuge teeme bau me, nuuja te teeme umle cäco mene ca jücemuge, cuta nuuja te peei mene ne yaaboclomtuge. Iyeta weene lui mule jaawenimuye, miiji weeme ätrunga ingle ne ätityera.

²⁷ Weeme abasecretna ngalebora liba pisi nyene weeme umle cäco mene ca iicema mule, neeneni coo nesae cina miiji iicema; yepä te liba lätecituge, nuuja te piba gije labacituge. Cuta nuuja te miiji aboclomäja peei mene bine.

²⁸ Yepä aboclomta biname liba lica birige, pepu biname cina miiji abasecretna ngalebora bojä agime. Teepi miiji teeme taatu tääpume iicema piijepu Acejiyame tääpume.

²⁹ Neeneni coo nesae biname cina miiji Acejiyame me tagepogogo mene iicema, cuta poto cina miiji atrana, egä ngena tääpu myene peei mene.

³⁰ Biname te liba pisi nyene Acejiyame me tagepogogo mene iicema cabu, siige nuuja te liba pui padare cabu yäätēcijuge Acejiyame bau ca, niinäce lui te jicemuge, tabe miiji ätecita padare ceerame pui nuuja ne tabe cuta iicemame.

³¹ Apu gaabe ca weene iyeta miiji gemi padare päpäname Acejiyame me tagepogogo mene iicemame, siige piba iyeta biname cina labiberäjininusi, kokre läbitininusi.

³² Acejiyame me tagepogogo mene iicema biname te teemämu lawecetnäruge,

³³ Ingle Acejiyame tabe singi lica weene apu mule papapapa wawenetnäjame irecu ätumuta padare cabu, yepä cängengarage poode cama.

Iyeta poto ta ätrunga maramara inge cabu luma biname cina labasecretnininusi irecu ätumutame,

³⁴ magebi cina miiji bojäcu lenaja. Peei lui miiji lica gyene teepi mene iicema, piyepu teepi gone niinäce gaabe me äbita, Israela biname bime Cotre te cuta lipu jicenige.

³⁵ Teepi liba singi ngena tääpume umle äbitame, teepi miiji irecu ätumuta kaake poto cidi ca teeme rooriye bine ätemleja mete cabu, inge niija gyene teepi irecu ätumuta padare cabu mene iicema.

³⁶ Acejiyame me mene te weeme cabu ca lica täduge, coo weeme taatu tääpume lica täduge?

³⁷ Laati te liba ngene jwaatwananuge, egä tabe Acejiyame me tagepogogo mene iicema biname gyene, coo piyepu Aceji Seemo te teebine kokre yäacäranuge poto kaakesea wawename, tabe miiji umle, egä cane ngena yoogärenine, Acejiyame bau ca gyene.

³⁸ Tabe liba ai mene ne lica jäätēcijuge, weene gone cuta teebine ätecija.

³⁹ Yoo, cäme ätrunga biname, weene kokre äbitipeye Acejiyame me tagepogogo mene iicemame. Yepä weene cuta gone jibemuye, laati teeme umle cäco mene ca jicemus.

⁴⁰ Yepä weene ngena jaawenuye weeme irecu ätumuta ngalebora, miiji cängena wawena.

15

Keriso me Budre cabu ca Arpinenta

¹ Cäme ätrunga binamewale, cane singi gäne weene cuta cääri ngene atwaname cane lui Miiji Mene itu jijananipe weebibine, weene lui mene ne yaacatepeye piyepu weeme ätrunga te lui mene cabu kokre jeclajutenige.

² Pui Miiji Mene cabu ca weene ireclota ne jepäniniye, weene liba kokre cama joomleniye, cane lipu jijananipe, cije weeme ätrunga te papa me läbituge.

³ Yoo, cane lui mene niinäce itu ecaturjine, lui niinäce gaabe gwidape gyene, siige cane weebibine pui mene jijananipe, egä Keriso te budre äbituji mime niija mule tääpume, Oogäräneji mene te lipu jicenige.

⁴ Teebine gape cabu me ecitujisi, siige nesae me lui bimu piba Acejiyame te teebine erpinantuji, Oogäräneji mene te lipu jicenige.

⁵ Tabe Peteru bau me niinäce aboclomtuji, puma cita ca teeme iyeta twelb bau me.

⁶ Piba tabe cuta faib hanred cerämu poto cama ätrunga biname cabu me yepä gääbu taboclomtuji. Teeme bucurage cina camu ireclota gemi, puu poto cina budre gemi.

⁷ Puma cita ca tabe cuta aboclomtuji Yakobu bau me piyepu iyeta teeme ätyepäneji biname bime bau me.

⁸ Ingwerage ca tabe cuta cäme bau me taboclomtuji, lui epu pana gäne, egä cane toracarage padare cabu lica aplimlujine.

⁹ Cane matikäli gäne iyeta poto teeme ätyepäneji biname bime cabu ca. Cuta cane miiji lica gäne teeme ätyepäneji biname ngii ne acenename, inge cane Acejiyame me biname bine sabe itu tewenenäjemumene.

¹⁰ Yepä Acejiyame te owecu nawenuji, siige cane page age säne, cane lipu nanajinige. Tabe lui owecu nawenuji papa me lica äbituji, yepä cane mage kaakesea ituge wawena poto ätyepäneji biname bime cabu ca. Puu toraca gyene, egä cane cäme ca ai kaakesea ne lica ituge wawena, yepä Acejiyame me owecu ca ituge, lui te cäme cabu kaakesea jewenenige.

¹¹ Yoo siige, ngänu gyene laati te weebibine Miiji Mene jajanena, cane te coo poto ätyepäneji biname cina, inge cine biname bine yepä mene jaajanemus, siige weene peei mene ne ituge ätrunga.

Budre cabu ca Arpinenta

¹² Yoo, cine jaajanemus, egä Keriso budre cabu ca itu arpinantuji, cije lipu pi weeme poto cina piba jicuye, egä budre cabu ca arpinera lica gyene.

¹³ Peei liba toraca gyene, piba Keriso budre cabu ca lica itu arpinantuji.

¹⁴ Cuta tabe liba lica itu arpinantuji, piba cime mene jajanena kaakesea papa gyene, weeme ätrunga cuta papa gemi.

¹⁵ Pui taatu lica, cuta piba cibibine nipäninisi, egä cine walya otrometnenininago Acejiyame poto cidi me, inge cine ituge iicana, egä tabe Keriso ne budre cabu ca itu

erpinantuji. Yepä liba toraca gyene, egä budre cabu ca arpi-nenta lica gyene, tabe piba Keriso ne lica itu erpinantuji.

¹⁶ Ingle budre cabu ca arpinenta liba lica gyene, piba Keriso ne cuta lica ituge arpinenta.

¹⁷ Piiyepu Keriso ne liba lica ituge arpinenta, piba weeme ätrunga te papa me äbitenige, siige weene camu niüya mule cabu inajininige.

¹⁸ Piba cuta budre biname lui cina Keriso ne itu jäätrungepesi, iyeteta ituge apeseräja.

¹⁹ Mine liba Keriso cabu me ngene atwana yaacranusi ai taatu ireclota täápume ätityera päpäname, lica ciige ireclota täápume, cine piba owecumete gemi iyeta biname bime cabu ca.

²⁰ Yepä toraca gyene, egä Acejiyame te Keriso ne budre cabu ca erpinantuji, siige ai te niwabininige, egä tabe eei bine cire yaarpinäremepi, lui cina budre ituge äbita.

²¹ Budre te lipu biname cabu ca täduji, cuta budre cabu ca arpinenta te piiyepu biname cabu ca täduji.

²² Iyeta biname cina lipu Adamu miji pi budre läbitininusi, teepi pepu Keriso miji pi cuta budre cabu ca cirege arpinera.

²³ Yepä Acejiyame te iyeta biname bine teemerage padare cabu cire yaarpineräjemepi: tabe Keriso ne niinäce gaabe me itu erpinantuji, siige Keriso te liba cire tacnenutepi, Acejiyame Keriso me biname bine piba cire yaarpinäremepi.

²⁴ Peei ingwe gaabe ca ai padare me ngälugaabe te ebä cire tädepi, Keriso te liba cire yaapremalemepi teeme cubuyame seemo bine piiyepu teeme poto cubuyame kokre bine, siige iyeta gwidape Aceji Babe ne cire yääcärepi tabe te waadename.

²⁵ Ingle naace gyene Keriso te müji babo biname me lenaja, ngälu Acejiyame te iyeta cubuyame bine cire yaapremalemepi, siige cire yaacranemepi Keriso me ernge gawe me.

²⁶ Budre lui ceräcerägäabu cubuyame gyene tabe apremelame.

²⁷ Oogäräneji mene te jüicenige egä, “Acejiyame te ituge iyeta gwidape bine acrana teeme ernge gawe me.” Yepä mine umle gemi, egä ai “iyeta gwidape” ngalebora Acejiyame lica gyene, lui te iyeta gwidape bine cire yaacranemepi Keriso me ernge gawe me.

²⁸ Siige Bägrä te liba mope biname me cire yaanajepi iyeta gwidape täápume, piba tabe cire läcärepi teemämu Acejiyame te ire atwime, siige piba Acejiyame te iyeta ire cire jaatwemepi.

²⁹ Cije lipu gyene lui biname cina niye ca äciseja ne ituge acata budre biname bime puupu cabu? Teepi ngena name pi pui mule ne itu jaawenepesi, liba budre biname bine lica cirege arpinera.

³⁰ Piiyepu cuta budre cabu ca arpinera liba lica cirege, cije cine piba ngena name pi iyeta padare cabu ai kaakesea name pi mäpu cabu ninajininige.

³¹ Cäme ätrunga binamewale, peei lipu toraca gyene, egä cane mime Yageyame Yeesu Keriso me opo gaabe je babo gege gäne wemiji pi, peei cuta toraca gyene, egä cane iyeta bimu gaabegabe cabu budre mametarage cama waatnune.

³² Ngena müji gyene cäme täápume, cane liba Epeso je larngepene biname bime cama lui cina girigale gwidape bime pana ge, cane liba lica jäätrungepene, egä ireclota pisi nyene budre me ingwe gaabe ca. Liba budre cabu ca arpinera lica cirege, piba “Mine yäärwäjemesi, yäänäjemesi, ingle ciyeciye siige mine budre.”

³³ Gone langletnäjinuye. “Niüyarage abasutanayame cina biname bime müji mule bine sabe jaawenimusi.”

³⁴ Weene müji täcnäripeye weemerage ngene atwanena cabu me, niyaniya mule bine ebmaläcemepeye. Cane ai lui weeme ajiri me jüicenine, egä weeme poto cina Acejiyame umle cäco gemi.

Biname cina Lipulipu Budre cabu ca Arpinera

³⁵ Yoo, biname yepä te pama apu birige ätemla egä, “Budre cabu ca biname cina lipulipu larpinäruge, piiyepu lipulipu tääpe bine teepi yaawadanemusi?”

³⁶ Maane lipulipu pepu ätemla! Maane liba kuu gije ne jaacnute, tabe ebä lica agi, tabe liba budre niinäce lica läbituge.

³⁷ Maane gijerage ne lica jaacnute, yepä kuu ne jaacnute, wiiti kuu ne coo ngena nuuja kuu ne, siige pui cabu ca gije te taaguge.

³⁸ Siige Acejiyame te kuu ne jaawenuge teemerage tääpe cama gije te agime. Cuta maramara kuu bine jaawenimuge maramara tääpe cama gije cina agime.

³⁹ Gije bime tääpe lipu maramara gemi, poto gwidape bime tääpe cuta pepu maramara gemi. Biname bime tääpe mara gyene, glunubora otnetneja gwidape bime tääpe mara gyene, niye bora cibi bime tääpe mara gyene, ele bime tääpe mara gyene.

⁴⁰ Piiyepu lui cina cabucewe je icrajenemige, teeme tääpe lui mara gyene, cuta gawecewe cabu lui cina icrajenemige, teeme tääpe mara gyene. Cabu tääpe me jamyacu mara gyene, gawe tääpe me jamyacu mara gyene.

⁴¹ Cuta dume cabu je lui gwidape teepi maramara gemi: bimu me apaclyera mara gyene, mabye me mara gyene, wale bime mara gyene. Cuta wale cina lica gemi yepä apaclyera cama, poto cina babo apaclyera cama, poto cina matikäli apaclyera cama gemi.

⁴² Apu cirege, biname cina liba budre cabu ca arpinera. Biname ne liba yaacitusi, teeme tääpe te locwäwuge; yepä tabe lui tääpe cama cirege arpimenta, budre cäco tääpe cirege.

⁴³ Liba yaacitusi, niiyarage piiyepu kokre cäco; liba larpinantuge, miijirage piiyepu kokre cama.

⁴⁴ Liba yaacitusi, pei lui gawe me tääpe gyene, liba larpinantuge, seemo me tääpe cirege. Gawe me tääpe lipu pisi nyene, cuta pipu ge seemo me tääpe pisi nyene.

⁴⁵ Apu oogäräneji gyene egä, "Acejiyame te niinäce Adamu ne gawe ca jewenuji, buuwe-mope ecäruji, siige tabe ireclota ge." Yepä Keriso lui ingwe ca Adamu gyene, tabe seemo gyene, lui te gwidape bine ireclota yäcäranemuge.

⁴⁶ Yepä, seemo me tääpe lui niinäce tääpe lica birige, yepä ai gawe me tääpe niinäce birige, siige piba seemo me tääpe ingwe ca birige.

⁴⁷ Niinäce Adamu ne Acejiyame te gawe ca jewenuji, siige tabe gawecewe cabu ca gyene, ingwe ca Adamu lui cabucewe ca gyene.

⁴⁸ Ai gawe cabu lui biname cina icrajinge, teepi gawe ca wawenäneji biname pana gemi, yepä laatibi cirege otni cabucewe me, teepi puma pui biname pana cirege äbita, cabucewe ca lui te täduji.

⁴⁹ Yoo, page mine gawe ca awenäneji biname pana gemi, yepä mine cire läbitipago teeme pana me, cabucewe ca lui te täduji.

⁵⁰ Cäme ätrunga binamewale, cane naace täापume jicemenine, egä page mine lui tääpe bine ewadanemenisi, teepi äblicäco otni Acejiyame me puupu cabu me; watawata gwidape äblicäco iyeteta lenaja.

⁵¹⁻⁵² Itecijinege, cane ogä mene jijenininine: mine iyeta budre lica cirege äbita, liba ceräcerägäabu moole te cire saangeneji, yepä mine watawata taaturage mara me cire läbitipago, epu pana biname te lipu teeme irecu ne watawata taaturage lätumuge. Yoo, pui moole te liba ala cire saangeneji, budre biname cina cire tarpinäripesi, siige ingwe ca budre lica cire läbitipesi. Yepä mine lui cina camu ireclota gemi, mine kirece tääpe ne cire yaacatepesi.

⁵³ Ai tääpe lui watawata piiyepu budre myene, miiji ateplingta budre cäco tääpe me, lui te iyeteta gyene.

⁵⁴ Siige ai mule te liba cire läpletnutepi, watawata tääpe te liba cire lateplingtepi budre cäco tääpe me, piba ai Oogäräneji mene te ibibi cire läbitepi egä, "Budre iigareceji gyene; tabe uutrutäneji gyene."

⁵⁵ "Budre, mäáme kokre siige bapirige; mäáme biigu iyeta siige bämlige!"

⁵⁶ Yoo, lui biigu te jaawenuge biname ne budre me, pui lui niia mule gyene; piiyepu niia mule te teeme kokre ne yaacatuge Cotre cabu ca biname bine mäpu ceerame, ingle Cotre te jaawabuge, egä biname te niia mule ne bii becnige.

⁵⁷ Yepä mine miiji Acejiyame ne eso ceera, lui te niwenininuge uutrutame mime Yageyame Yeesu Keriso me kaakesea miiji pi.

⁵⁸ Yoo, cäme miijirage ätrunga binamewale, weene kokre cama jicläjutipi. Weene gloose cäco kaakesea jewenepeye Yageyame täापume, ingle weene umle gemi, egä weene ngena kaakesea jaawenuye teeme täापume, papa me lica läbituge.

16

Rarekaake Ootona Ätrunga Biname bime täापume

¹ Yoo, cane jijenininine, weene lui soogärepeye rarekaake ootona täापume ätrunga biname bime täापume Yuudea gawe ngalebora. Weene epu jewenepeye, cane Galatiya gawe cabu lui ätrunga ingle bine lipu jaajemepene.

² Iyeta Sande gaabegabe weeme yepäyepä cina miiji rarekaake äyebenga weene luma ngälu ibibi gemi ceerame, siige ingwe ca piba weene nuuja singi lica rarekaake otoname, cane liba pa lädepene peeyeme.

³ Cane liba pa latyaramtepenene, cane leta cama piba pa jäätjepemepene biname bine, weene lui bine tejäcrimume, weeme owecu gwidape ne acaname Yerusalema me.

⁴ Cuta cane liba pa jääpänepene, egä miiji gyene cane teta cama otnime, cane pa lädepene.

Paulo Gläamu Jecijige

⁵ Cane apu gläämu nacijige, egä cane weebibine ebä pa pidäripene, cane liba niinäce Makedoniya probins cabu ta pa lädepene, ingle cane ngene jotwananenine Makedoniya probins cabu ta otrime.

⁶ Cane weene cama pa nanajepi seeji lecaleca padare, pama iyeta gäbu padare. Siige piba weene cebine pa nätinyärepeye căme otni täápume, cane liba liiyeme pa lädepene.

⁷ Cane singi lica gäne weebibine watatarage äsuplengtame. Căme singi apu gyene, egä cane lecaleca padare weene cama lenajame, liba Yageyame singi gyene.

⁸ Cane Epeso je pa nanajepi ngălu Pentikos bimu ne oomla-name,

⁹ ingle gaabe ititeji gyene cane Epeso babo cewe je miijirage kaakesea wawename, puu bucurage biname cina cuta cebine năciserăjenisi.

¹⁰ Timoti liba otni je peeyeme, weene miiji teebine awabla, căngenarage ire atwi, ingle tabe Yageyame me kaakesea jewenenige cane liiyepu.

¹¹ Weene gone teebine ägyi pana jaawenuye, yepă weene teebine itityärepeye poodo cama tabe otrime, siige tabe piba pa tacnenutepi căme bau me. Cane teebine jewagrijenine poto ätrunga biname cama.

¹² Cuta mime biname Apolo, cane teebine jaajananune tabe poto ätrunga biname cama weebibine ädărame, yepă căro tabe camu gyene căngena ngene atwanena, egä tabe ai padare cabu pa lădepi. Yepă tabe liba miiji padare ne pa jăăpănepi, tabe piba pa lădepi.

Cerăcerăgăăbu Mene

¹³ Weene ireire inajipi, piyepu kokre cama imyemutipi ätrunga cabu. Weene miiji wălu căco piyepu kokre.

¹⁴ Weene iyeta mule bine owecu cama jewenemepeye.

¹⁵ Weene umle gemi Setepanus piyepu teeme ingle biname; teepi lui niinäce biname gemi ätrunga acitame Yeesu Keriso cabu me Akaya probins ngalebora. Teepi teemeteme lăcărıpesi Acejiyame me binamewale bime täápume kaakesea wawename. Căme ätrunga binamewale, peei name pi cane jijenininine,

¹⁶ weene miiji apu biname bine ätecija, cuta laatibi teta cama kaakesea jeweninisi.

¹⁷ Cane gege găne Setepanus, Fortunatus, Akaiqus, teeme otni name pi, ingle teepi ituge wawena căme täápume, weene ngena ne äblicăco ge wawena.

¹⁸ Teepi cebine ngenecu plowa me ituge wawena, weebibine lipu ngenecu plowa me itu jwenıpesi, peei name pi weene miiji apu biname bine opo gaabe me acrana.

¹⁹ Asiya probins ngalebora ätrunga ingle cina weebibine jiwablininisi. Piyepu Akwila naabi Prisila piyepu teeme mete cabu lui ätrunga biname cina labasecretnuge, teepi cuta weebibine jiwablininisi Yageyame me ngii cabu.

²⁰ Cuta ama lui ätrunga biname cina, teepi jiwablininisi weebibine. Weene peema weemeweme ajecletnăjıpeye ätrunga biname bime mule liiyepu.

²¹ Cane lui mene aga biiri jicemine, nuuja biname te yoogărımige căme täápume. Yepă canerage te ama yoogărınine egä: Cane Paulo te weebibine jiwablininine.

²² Laati te Yageyame täápume singi lica, tabe niıya puupu ne pa jăăpănepi. "Maranata" – Mime Yageyame, maane tădi!

²³ Yageyame Yeesu me miiji te lenajame weeme cabu.

²⁴ Căme singi pisi nyene weeme täápume. Yeesu Keriso me miiji pi mine iyeta yepă gemi. Cane ngii Paulo. Căme mene ngălu peese.

PAULO ME NEENENI MANU LETA KORINITO ÄTRUNGA BINAME BIME BAU ME

Sebore Mene

¹ Cane, Paulo, Yeesu Keriso me ätyepäneji biname gäne, Acejiyame te lui ne najuji ai kaakesea tääpume. Cane piyepu mine cama yepä ätrunga biname Timoti, cine te yoogärenago Korinito babo cewe ätrunga inge cabu me piyepu Akaya probins ngalebora iyeta Acejiyame me binamewale bime bau me.

² Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi weebibine poode ceerame.

Paulo Acejiyame ne Eso Ecärige

³ Mine eso yääcäresi Yageyame Yeesu Keriso me Acejiyame piyepu Babe ne. Tabe babo owecuyame Babe gyene piyepu Acejiyame, lui cabu ca iyeta ätityera cina totneninini!

⁴ Tabe nitityeräjininuge iyeta mäpu cabu, siige pui ätityera ca, mine lui ne teeme bau ca jepäninisi, mine miiji gemi poto bine ätityera, laatibi maramara mäpu bine jääpänanemusi.

⁵ Keriso lipu mäpu cabu senajenäjumi, mine cuta pepu mäpu cabu ninajininige; Keriso ne lipu Acejiyame te itityäruji, tabe cuta mibibine Keriso cabu ca nitityeräjininige.

⁶ Cine liba mäpu cabu ninajininuge, pei lui weene Korinito biname bime miiji tääpume piyepu weeme seemo ireclota ne kokre me wawename; piyepu cine liba ätityera ne jääpänusi, weene cuta peei yepä ätityera ne jääpänuye, siige weene kokre läbitininuye epu mäpu cabu ämyemutaname, cine lipu mäpu cabu ninajininige.

⁷ Peei name pi cine wälu lica gemi weeme tääpume; cine umle gemi, egä weene lipu cime pana inajininige mäpu cabu, Acejiyame te weebibine pa itityeräjipi epu, tabe lipu nitityeräjininige cibibine.

⁸ Cime ätrunga binamewale, cine singi lica gemi weene umle cäco lenajame, cine lipu mäpu bine jääpänanemepesi Asiya probins ngalebora. Teepi epu babo niiyarage ge, egä cine apu ningipi egä, "Siige ai cime ngälugaabe gyene."

⁹ Cine lasicnanti-pago, egä cine budre cabu ca äblicäco uucratna. Yepä ai mäpu te naace tääpume läbitipi cibibine abiberäjame, egä cine cime cabu gone ngene atwana yaacranimusi yepä Acejiyame taatu cabu me, lui te biname bine budre cabu ca birige arpinera.

¹⁰ Yoo, tabe cibibine pepu budre mäpu cabu ca itu nisechräripi, cuta tabe pagege äsecreta. Cine teeme cabu me cime ngene atwana ituge acrana, egä tabe cuta ciige cirege äsecreta,

¹¹ weene liba weeme irecu ätumuta ca cibibine nitityeräjininuye. Yoo siige bucurage biname cina pa irecu lätumutanipesi Acejiyame bau me cime tääpume, Acejiyame te teeme irecu ätumuta daremu pa jaawecnistemepi, siige cibibine miiji pa niwenipi. Piba bucurage cina Acejiyame ne eso pa yääcäranepesi, egä cine ätityera ne ituge päpäna.

Paulo me Mene Teeme Otni Gläamu poto cidi me

¹² Cine ai tääpume gege gemi, egä cine ngene ca eglenisi, egä cine iyeta padare cängenarage ninajininuge iyeta biname cama, toracarage lui weene Korinito biname cama. Cine Acejiyame miiji conocäco mule cama piyepu Acejiyame miiji yepä taatu ngene atwana cama ituge lenaja. Cimerage umle te cibibine lica ituge awecetnära, yepä Acejiyame me owecu te niwecetnärininuge cibibine.

¹³⁻¹⁴ Cine lui leta bine yoogärimusi weeme bau me, mäpu lica gemi acnemame piyepu opo awatname. Yepä ai padare cabu weene cängena umle lica bäbitiniyiye iyeta cime poto cidi me, yepä cane ngene atwana icraninine weeme cabu me, egä weene ingwe ca cängena umle päbitipeye iyeta cime poto cidi me. Siige mime Yageyame Yeesu Keriso me acnenuta bim cabu weene epu gege cire inajipi cime tääpume cine liiyepu weeme tääpume.

¹⁵ Yoo, cäme toraca ätrunga puga ge ai poto cidi me, siige cane niinäce gläamu nacijepi peeyeme Korinito cewe me otnime weebibine ängrärame weene piba neeneni gääbu gege äbitame.

¹⁶ Cane naace me jüicenine, egä cane gläamu nacijepi weebibine neeneni gääbu ängrärame: niinäce ängrärame Makedoniya me liba pa pa lädepene, cuta cääri ängrärame puma cita ca liba pa tacnepene naace tääpume cane piba weeme bau ca ätityera ne päpäname cäme Yuudea me otni tääpume.

¹⁷ Cane acinacina biname lica ge, cane liba cäme gläamu ne mara me jaawenepene. Cane epu biname lica gäne, lui te papa gläamu jaacijuge, lui te mene taatu jüicuge yepä wawename lica.

¹⁸ Acejiyame te lipu toraca mene jüicuge, cäme mene cuta toraca ge, weeme bau me otni poto cidi me liba jüipene.

¹⁹ Yeesu Keriso Acejiyame me Bägrä, lui poto cidi me Siila, Timoti piyepu cane mene jjananinago, tabe lica gyene epu biname liiyepu, lui te jiuuge, yepä lica jaawenuge. Tabe acinacina biname lica gyene.

²⁰ Teeme cabu ca Acejiyame me iyeta mene cina toraca me läbitinusi. Peei name pi mine teeme ngii cabu 'Amen' mene jiuusi, mine liba Acejiyame ne yaawepyeräjus.

²¹ Weene Korinito cewe ätrunga biname piyepu cine, Acejiyame te gigri niweninunuge mine kokre cama aclajutame Keriso bau. Tabe mibibine mara me itu niwenipi teeme kaakesea wawename.

²² Tabe cuta teeme cewecu ne itu yaacitanepi mime cabu me awabame, egä tabe mime Yageyame gyene, piyepu Aceji Seemo itu nicäripi klaje wawename, egä mine cirege päpäna iyeta, teeme ngena piti nemi mime tääpume.

²³ Acejiyame lui te umle gyene cane, tabe naitnenige, egä cane pui name pi otni cäco läbitepene peeyeme Korinito me, inge cane singi lica ge weebibine ngenecu mäpu me wawename.

²⁴ Cine lica äbitinunago weebibine jajanenname, egä weene ngena ätrungame, inge cine umle gemi, egä weene ätrunga cabu kokre gemi. Eewe, pätä cine singi gemi weene cama kaakesea wawename weeme miiji tääpume.

2

¹ Yoo, peei name pi cane otni cäco läbitepene peeyemopo Korinito cewe me, inge cane liga cire lädejine, cane cuta cääri ngenecu mäpu me cire jiwenejine weebibine.

² Inge naace gyene, cane liba ngenecu mäpu me wawena je weebibine, piba laati te cebine gege me pa nawenepi, inge weene iyeta ngenecu mäpu gemi.

³ Yoo, cane naace name pi peei leta yoogärepene, inge cane singi lica ge weebibine ängrärame. Inge naace popi pui padare cabu cane liga cire lädejine, cane ngenecu mäpu cire jääpänejine wemiji pi. Cuta weene peete nemi pui biname, lui cina cebine gege me nawenuyel! Cuta cane toraca umle gäne, egä cane liba gege birige, weene iyeta cuta piyepu gege birige.

⁴ Yoo, cane peei leta ne mage ngenecu mäpu piyepu ele mäcu cama yoogärepene. Cane naace name pi lica yoogärepene, egä weebibine ngenecu mäpu me wawename, yepä weebibine umle wawename egä cäme singi lipu baborage gyene weeme tääpume.

Paulo Singi Gyene Ngene Ätrimelame Yepä Biname me Niiya Mule ne

⁵ Lui biname te weeme sobe cabu niiya mule ne itu jaawenepi, tabe cebine ngenecu mäpu me lica nawenepi yepä weebibine – yoo weeme poto bine. Cane singi lica teebine lipu wawename,

⁶ naace popi ibibi gyene, weene lui teebine seblawäjumeye piyepu daremu secärumeye.

⁷ Page weene siige ngene jitrimalinege teeme niiya mule, ngenecu kokre me jeweneye, cije tabe ngenecu mäpu name pi niiya ne jääpänuge.

⁸ Peei name pi cane jijenininine weene teebine umle wawename, egä weene singi gemi teeme tääpume.

⁹ Cane peei leta ne naace tääpume yoogärepene weebibine apicetnärame. Cane singi umle äbitame, egä weene iyeta mule cabu cäme mene ibi naaclenige coo lica.

¹⁰ Weene liba ngene jitrimalinuge biname me niiya mule, cane cuta pipu ngene nätrimaluge. Inge cane singi gäne weeme tääpume, peei name pi cane Keriso me opo gaabe je ngene ituge ätrimelame niiya mule poto cidi me, liba toraca gyene egä niiya mule pisi nyene, cane lui poto cidi me miiji ngene ätrimelame.

¹¹ Cane ai ne naace tääpume jaawenune, egä Satani te piba äblicäco mibibine oomlana, inge mine umle gemi, teeme gläamu lipu gemi.

Paulo Mage Ngenecu Mäpu Yaanajepi Trooasi je

¹² Cane liba Trooasi me latyaramtepene Keriso poto cidi me Miiji Mene jajanenname, cane jääpänepene, egä Yageyame te gaabe ne ituge iitnana cane puma kaakesea wawename.

¹³ Yepä cäme babo ngenecu mäpu puga ge, inge cane mime biname Taitus ne lica jääpänepene puma. Peei name pi cane pui cewe ne yaabma-lepene, siige Makedoniya me lädepene.

Keriso te Niwenininige Mine Uutrutame

¹⁴ Yepä mine miiji Acejiyame ne eso ceerame! Inge naace gyene, mine liba Keriso cama yepä gemi, Acejiyame te lipu jewenuji Keriso ne uutrutame teeme cubuyame bime cabu ca, tabe cuta cine ätyepäneji biname bine niwenininuge Keriso cama gigri uutrutame. Acejiyame te niwenininuge cine iyeta poto ta biname bine mene jajanenname Keriso poto cidi me. Pui mene lui miiji lengo pana gyene, lui te cewe ne iyeta yaacwabuge.

¹⁵ Cine miiji lengo gwidape pana gemi, Keriso lui ne juubudäruge Acejiyame ne iiwärejame, ingle cime cabu ca Miiji Mene te Keriso poto cidi me otnenige iyeta biname bime cabu me; eei bime cabu me, lui cina cirege iyeteta ireclota ne päpäna, cuta eei bime cabu me, lui cina cirege iyeteta budre ne päpäna.

¹⁶ Apesareji biname bime täöpume Keriso poto cidi me mene lui budre lengo cama birige, yepä lui bine niya cabu ca ituge äsecrera, teeme täöpume ireclota lengo cama birige. Nää, baa laasi nyene ibibi ai kaakesea wawename?

¹⁷ Cine eei bucurage biname bime pana lica gemi, lui cina toraca ngenecu cama ai kaakesea ne lica jaawenusi. Teepi Miiji Mene yaacenanusi rarekaake päpäna taatu name pi. Yepä cine toraca gemi, toraca ngenecu cama ai kaakesea ne jebenenis; cine Miiji Mene jaajanemus Acejiyame me awecetnära ngalebora. Tabe te cibibine nityepipi, siige cine Keriso me kaakesea bägrä gemi.

3

Acejiyame Lui Kirece Jajeji Mene ne Secituji

¹ Cane ngena bii byoogärine, naace täöpume lica gyene, egä cine cääri cimämu awepyeräjininago, poto cina lipu iicana mage. Cine poto biname bime pana lica gemi; cine nuuja singi lica gemi leta täöpume cibibine weeme bau me awabudnitame, egä cine toraca Keriso me mename biname gemi. Cine cuta nuuja singi lica gemi weene te leta oogärane cibibine aitname nuuja biname bime bau me.

² Weene peete nemi leta cibibine aitnejame, lui cime ngenecu cabu oogäräneji gemi iyeta biname cina acnename, umle äbitame.

³ Weene lui leta pana gemi, Keriso lui soogärumi cime kaakesea ca. Ai lui epu pana leta lica gyene, lui bine yoogärumus ingki ca peba cabu, yepä epu pana gyene, egä Keriso te yoogärempi biname bime ngenecu cabu me Ireclota Acejiyame me Seemo ca.

⁴ Cine apu jücenisi, ingle cime ätrunga pisi nyene Acejiyame cabu weeme poto cidi me, Keriso lui ätrunga ituge ceera cibibine.

⁵ Cime cabu nuuja gwidape lica gyene cibibine lui te niweninunge jajime, egä cine ibibi gemi ai kaakesea wawename. Eewe, cime lui umle pisi nyene, Acejiyame bau ca gyene.

⁶ Pui lui tabe sine, lui te ibibi niwenimi cine kirece jajeji mene ne acenename, Acejiyame te lui mene ituge ceera biname bine niya cabu ca äsecrera. Ai kirece gaabe me ingle lui oogäräneji cotre lica gyene yepä Aceji Seemo gyene, ingle oogäräneji cotre lui budre ne saacanuge, yepä Aceji Seemo te ireclota ne saacanuge.

⁷ Cotre lui kula cabu oogäräneji gyene, piiyepu lui padare cabu ceereji ge, Acejiyame me babo apacylera te puga taboclomtuji. Pui apacylera te Moose me opo cabu ca sepacyläruji. Tabe puu äyebtingtenuji, yepä epu kokre ge, egä Israela biname cina äblicäco Moose bau me ire acita. Siige cotre lui te budre ne saacanuge, apu apacylera cama liba taboclomtuji.

⁸ piba lipu baborage apacylera cama birige, Aceji Seemo te liba kaakesea jaawenuge biname bime cabu.

⁹ Cotre mene, lui te biname bine jaatranimuge teeme niya mule cabu, liba apacylera cama ge, piba lipu baborage apacylera cama gyene pui Miiji Mene, lui te ireclota ne saacanuge.

¹⁰ Page padare me baborage apacylera te itucärenige pui sasa padare me apacylera ne.

¹¹ Acejiyame te lui sasa mene ecäruji watata mene gyene, yepä apacylera cama ge, piba lipu baborage apacylera cama gyene, tabe lui kirece mene ne ecituji, lui te iyeteta mene gyene.

¹² Ingle ai kirece mene me apacylera lui baborage gyene, peei name pi cine wälu cäco gemi.

¹³ Cine Moose pana lica gemi, lui te teeme opo ne icwabuji naace täöpume Israela biname cina piba lica päpäna pui apacylera te äyebtingta teeme cabu ca.

¹⁴ Pui padare cabu Israela biname bime mopemuli armeji ge; cuta ai taje pepu gyene, teeme mopemuli acwabäneji gemi, teepi liba yaacne-musi sasa cotre bine. Yepä Keriso te miiji gyene peei acwabäneji ne äyebtingtame.

¹⁵ Cuta page teepi liba yaacnemusi Moose me cotre bine, teeme mopemuli acwabäneji gemi;

¹⁶ yepä ebä läyebtingtuge biname te liba latatrongtuge Yageyame bau me.

¹⁷ Yoo, Yageyame lui Seemo gyene. Siige laati cabu pisi nyene Yageyame me Seemo, tabe kälyä gyene sasa cotre cabu ca, niya mule cabu ca piiyepu budre cabu ca.

¹⁸ Mime opo lui acwabäneji lica gemi, peei name pi mine Acejiyame me apacylera ne jääpänsi. Siige mine iyeta Yageyame me apacylera ne opo acwaba cäco epacylärenisi;

cuta pui yepä apaclyera lui te tädenige Yageyame bau ca lui te Seemo gyene, tabe te niweninuge teeme pana me, siige mime cabu baborage me äbitenige teeme apaclyera te.

4

Biname Lui Kokre cäco, Acejiyame Lui Kokre

¹ Peei name pi cine ngenecu onya lica äbitininago, ingle cine umle gemi, egä Acejiyame te teeme miiji name pi nicäriinuji ai kaakesea cine wawename.

² Lui ajiri mule bine ogä jaawenimusi, cine peei mule kaake ca ituge äcelyera; siige cine biname bine lica yaangletnäjemusi, piyepu cine Acejiyame me Mene ne mara me lica jaawenusi. Acejiyame me opo gaabe je cine pajecurage piyepu toracarage jicemusi Miiji Mene. Cine ai ne naace name pi jaawenusi, cine singi gemi biname cina miijirage asicentame cime poto cidi me.

³ Cine lui mene jicemusi poto biname bime täápume mäpurage umle äbitame, yepä eei biname bime täápume taatu mäpurage ge, lui cina apesareji gemi.

⁴ Teepi Miiji Mene ne lica jäätrungusi, ingle Satani lui te ai gawecewe ne ecanenige, tabe te teeme irecu bine itu yaacwabemepi. Teepi äblicäco päpäna, lui apaclyera te sepaclyärenige cime mene cabu ca, lui mene te jicenige Keriso me apaclyera poto cidi me. Pui apaclyera lui Acejiyame me apaclyera pana gyene.

⁵ Cine cime poto cidi me lica jijanenenininago, yepä cine jijanenenininago, egä Keriso Yeesu lui Yageyame sine piyepu cine weeme täápume kaakesea jewenenisi temiji pi.

⁶ Acejiyame lui te jicuji egä, “Krokeciye cabu me apaclyera te saapaclyärege,” tabe cuta jewenenige teeme apaclyera ne mime cabu me apaclyerame. Ai apaclyera te Keriso cabu ca sepaclyärenige, siige umle niweninige, egä Acejiyame te lipu miijirage gyene piyepu kokrerage gyene.

⁷ Cine lui bime cabu ai baborage seemo ireclota gwidape te yaanajuge, cine papa gemi, epu gemi gawe ca wawenäneji disi liiyepu naace täápume awabame, egä iyeta kokre lui Acejiyame myene, cime lica gyene.

⁸ Cine mäpu cama opopa yaayanusi, yepä teepi äblicäco cibibine ämungeja. Cine poto padare cabu toracarage umle lica gemi egä ngena wawename, yepä cine ngenecu onya lica läbitininago.

⁹ Biname cina cibibine sabe niweninusi, yepä Acejiyame te lica nibmalininuge. Cibibine gawe me niyärininusi, yepä budre tama lica niglecininusi.

¹⁰ Iyeta padare cabu cine wälu birige budre päpäname Yeesu liiyepu, yepä cine lipu camu ireclota gemi, peei te jewabudnitenige, egä Yeesu cuta ireclota gyene.

¹¹ Yoo, iyeta padare cime ireclota ngalebora cine wälu birige budre päpäname Yeesu name pi, yepä cime ai gawe ireclota tääpe cina lipu camu ireclota cama gemi, peei te jewabudnitenige, egä Yeesu cuta ireclota gyene.

¹² Pipu pi cine ätyepäneji biname cina iyeta padare cabu birige budre mäpu päpäname, siige peei name pi Acejiyame me ireclota te weeme seemo cabu kaakesea jaawenuge.

¹³ Oogäräneji mene te jicenige egä, “Cane Acejiyame ne jitru-ngenine, peei name pi cane mene jicemune.” Cine cuta peei yepä ätrunga cama Acejiyame ne jäätrungusi, siige peei name pi Miiji Mene jicemusi.

¹⁴ Cine umle gemi, egä Acejiyame te Yageyame Yeesu ne budre cabu ca itu erpinantuji, cine cuta umle gemi, egä tabe mihibine pipu cirege budre cabu ca cuta arpinera. Siige tabe te cine piyepu weene yepä cire niwadipi Yeesu bau me.

¹⁵ Yoo, iyeta ai cina weeme miiji täápume läbitininusi. Piyepu Acejiyame liba teeme owecu name pi bucurage biname bine yääseceräjimuge niyya cabu ca, siige bucurage cina teebine eso yääcärusi teeme jamyacu apaclyera ne awepyeräjame.

Keriso me Binamewale cina Ätrunga cama Icrajinan

¹⁶ Peei name pi cine ngenecu onya lica äbita. Cine puu kokre te nigletnäjenige, yepä cime seemo cina kirece kokre jepänaneni bimu gaabegabe.

¹⁷ Cine lui mäpu cabu ninajininuge, pui lui baborage padare lica birige, piyepu pui mäpu lui matikolä gwene. Tabe cire saacanepi baborage gwidape ne cime täápume, lui te iyeteta gyene. Pui lui Acejiyame me jamyacu apaclyera gyene.

¹⁸ Cine eei täápume ire lica gemi, lui bine jääpänimusi, yepä päpäna cäco tääpu memi cine ire, ingle lui bine jääpänimusi, watawata gemi, lui cina päpäna cäco, iyeteta gemi.

5

¹ Yoo, mine umle gemi, egä mime ai gawetääpe, mine lui cama page ninajininige, liba cire lapesarepi, Acejiyame te kirece tääpe cire nicäripi cabucewe je mine pui cama lenajame. Tabe pui tääpe ne teemämu ituge amacetnäja piyepu pui tääpe lui iyeteta gyene.

² Mine liba ai gawetääpe cama ninajininige, mine gege lica gemi, ingle mine babo singi gemi cabutääpe ne acatame.

³ Mine singi pui kirece tääpe ne acatame, siige piba mine tääpe cäco lica cirege budre biname liiyepu.

⁴ Mine liba ai gawetääpe cama ninajininige, mine ngenecu mäpu cama piyepu ala cama. Ai lui naace name pi lica gyene, egä mine singi gemi gawetääpe ne abmalame, yepä mine singi gemi watawatarage cabutääpe mime cabu me acitame, piba mine budre lica cirege, yepä iyeteta ireclota te mime ai gawetääpe ne mara me cire jaawenepi.

⁵ Acejiyame te apu mule tääpume mibibine ituge amacetnäja. Tabe nicäripi teeme Seemo cewecu tääpume, egä tabe pipu cirege mibibine wawena.

⁶ Siige peei name pi cine ngenecu onya lica äbitininago piyepu cine umle gemi, egä ai ireclota cabu mime mete lui ai gawetääpe gemi; nuuja ireclota cabu mime mete lui Yeesu Keriso cama cirege.

⁷ Mine ai ireclota cabu ätrunga ca joomlemusi Acejiyame ngena tääpume ituge jaji wawename, ngänu gyene mine päpäna lica.

⁸ Mine siige wälu lica gemi, piyepu mime singi pisi nyene ai gawetääpe ne abmalame piba otnime Yageyame cama lenajame.

⁹ Yepä mime toracarage singi naace gyene teebine ngenecu müiji me wawename, ngänu gyene mine ama ai gawetääpe cama ninajininuge, coo ten cama kirece ireclota cabu je.

¹⁰ Ingle naace gyene, mine müiji iyeta cirege mime atrana biname Yeesu Keriso me opo gaabe je aclajuta. Tabe te cire nitranipi, siige müiji coo niyya daremu cire nicäranipi eei mule ibi, mine lui ituge waweneca ai gawe ireclota ngalebora.

Poode Mene

¹¹ Cine wälu gemi, ingle cine umle gemi, egä Keriso te mibibine iyeta cirege atrana. Peei name pi cine biname bine owe yäaswemusi teepi ätrungame, egä cine toraca piyepu yepä ngena atwana cama biname gemi. Acejiyame te umle gyene iyeta cäme poto cidi me, cuta piyepu cane ngena atwana icranininine weeme cabu me, egä weene cuta pepu umle äbitame iyeta cäme poto cidi me.

¹² Weene apu gone jinginuge, egä cine cääri äbitininago cimämu aitnejame, egä cine müiji biname gemi. Eewe, cine pätä pui name pi jiičenisi, ingle cine singi gemi weebibine ingle ceerame weene gege äbitame cimiji pi. Siige weene piba umle birige, lipu mene awecnistame pui biname bine, lui cina gege me läbitininusi biname bime papa awepyeräja mule name pi lica teeme ngenecu borarage mule name pi.

¹³ Nää cane toraca buduma gäne, biname cina lipu jiičenisi? Yoo, cane liba buduma gäne, peei lui Acejiyame name pi. Yepä toraca gyene, egä cane müiji ngena atwana cama gäne, siige peei lui weeme müiji tääpume.

¹⁴ Cine apu läbitininago, ingle Keriso me singi te cibibine niwadininuge. Tabe iyeta biname bime tääpume budre äbituji, siige cine toraca jitrungenisi, egä ai yepä biname lipu budre iyeta biname bime tääpume, peei te jewabudnitenige, egä teepi iyeta teta cama budre ituge äbita teeme sasa ireclota cabu ca.

¹⁵ Keriso te iyeta biname bime tääpume budre äbituji naace tääpume, egä laati te kirece ireclota cama yaanajuge, tabe gone teeme müiji ne jäärnguge, yepä tabe müiji Keriso tääpume lenaja. Ingle naace gyene, Keriso temiji pi budre äbituji, siige arpinantuji.

¹⁶ Cine liba ätrunga biname me äbitininujago, cine biname bine lica jaatranimusi ai gawe mule cabu. Toraca gyene, egä padare puga ge, cine liba Keriso ne jitranejisi ai gawe mule biname cina lipu jaatranusi, yepä page cine siige lica jewenenisi peei ne.

¹⁷ Laati te liba Keriso cama yepä me läbituge, tabe siige kirece biname gyene. Teeme sasa ireclota ne yaabmaluge, siige kirece ne yaacatuge.

¹⁸ Ai mule lui Acejiyame bau ca gyene, lui te Yeesu Keriso miji pi gäbu äbituji mime tääpume, tabe lui bime tääpume claabe ge niinäce. Siige tabe kaakesea mibibine ituge ceera mine iyeta biname bine teeme binamewale me wawename.

¹⁹ Cane naace me jiičenine, egä Keriso me kaakesea name pi Acejiyame te äbitenige iyeta biname bine teeme binamewale tääpume wawename. Tabe teeme niyya mule bine lica yaawadimuge, cuta tabe cine ätyepäneji biname bine mene ituge ceera cine iyeta biname bine jajanename, egä tabe singi teebibine teeme binamewale me wawename.

²⁰ Cine siige Keriso me mename biname gemi. Cine te puu jiičemusi, yepä Acejiyame te cime cabu ca jijanininuge. Cine Keriso me puupu ne becatisi, weebibine jijenininago, egä weene Acejiyame ne padare ecäreye tabe weebibine waadename teeme bau me.

²¹ Keriso lui conocäco gyene, yepä mime name pi Acejiyame te teebine epu pana jwenuji, egä tabe lui niyya mule biname gyene. Siige mine liba Yeesu cama yepä läbitininago, mine conocäco läbitininago Acejiyame me opo gaabe je.

6

¹ Cine Acejiyame cama gigri kaakesea jaawenanusi, siige cine jijenininago, egä Acejiyame lui owecu ne itu yaaboclomtepi weeme bau me, papa gone yaasacluye.

² Naace, Acejiyame te ituge iicana egä,
“Cane jitecijipene weebibine,
padare liba tädepi cane weebibine ätityerame.
Cane itityäripene,

padare liba tädepi cane weebibine nüya cabu ca äsecerame.”
Itecijinege, page padare gyene Acejiyame te weebibine ätityerame! Page padare gyene Acejiyame te weebibine nüya cabu ca äsecerame!

³ Cine singi lica gemi nuuja biname ne nüyarage asicnentame wawename cime poto cidi me, cije teepi cime kaakesea ne jäängäjusi.

⁴ Eewe, cine ngena bine jaaweninusi, peei cina niwabudnitininusi, egä cine Acejiyame me kaakesea bägrä gemi. Age tema pui gwidape: cine mäpu cabu bojäcu cewe loocaninago, nimyemutanininuge mäpu biijabija cabu.

⁵ Cibibine ituge adnana, krokeciye mete cabu äbäcna, biname sange cina cubu gije ituge abacita cime mene name pi, cine gloose cama ituge kaakesea wawena, ute cäco piiyepu deedei cäco.

⁶ Cine ituge awabudnita, egä cine Acejiyame me kaakesea bägrä gemi, ingle cine conocäco ninajininuge, piiyepu cine umle gemi, egä toraca ngena gyene; cine mäpu cabu bojäcu ninajininuge piiyepu cine miijirage muleyame biname gemi; Aceji Seemo te cibibine niwecetnärininuge; cime singi biname bime täápume lui toracarage gyene.

⁷ Cine lui mene ne yaacenanusi, toraca gyene; Acejiyame te teeme kokre ne cime cabu yaaboclomtanuge; cime conocäco ireclota lui cubu gwidape pana gyene, cine lui ca laglinago piiyepu lälyenganinago.

⁸ Poto cina lui cibibine opo gaabe me nicranininusi, poto cina lui nücetnininusi. Poto cina lui sabe niwenininusi, poto cina lui niwepyeräjininusi. Poto cina cuta apu jüicusi, egä cine walya biname gemi, yepä cime mene lui toraca gyene.

⁹ Poto cina puu apu jüicusi egä, cine papa biname gemi, yepä iyeta poto ta biname cina umle gemi cine. Cine puu puga ge budre me, yepä weene jepäneneniye, egä cine ireclota gemi; cibibine nüya me niwenininusi, niglecininusi, yepä cine budre lica gemi.

¹⁰ Cine puu ngenecu mäpu cama, yepä cine gege gemi. Cime puu nuuja gwidape lica gemi, yepä cime cabu ca seemo ireclota täápume bucurage miijimiji gwidape jääpäninusi. Cine puu owecumete biname gemi, yepä cime iyeta gwidape piti nemi.

¹¹ Cime binamewale Korinito cewe ngalebora! Cine conocäcorage aga biiri jijanininago. Cine cime ngene atwanena bine aga biiri jepatnimisi weeme bau me.

¹² Peei lui cine te lica ge, lui cina ngenecu yaarmemusi weeme bau ca, yepä weene te ngenecu saarmemuye cime bau me.

¹³ Babe te lipu teeme bägrä bine jaajananemuge, cane cuta pepu jijenininine weebibine: cime lipu singi pisi nyene weeme täápume, weene cuta miiji pepu singi lenaja cime täápume. Weene weeme ngenecu bine jepatnemepeye cime täápume!

Cine Ireclota Acejiyame me Mete Gemi

¹⁴ Weene gone alenglecäja ätrunga cäco biname cama ireclota poto cidi me kaakesea wawename. Conocäco piiyepu conocono äblicäco yepä me äbita, piiyepu apacyera te äblicäco krokeciye cama alengläcita.

¹⁵ Keriso naabi Satani, teepi lui yepä ngene atwana cama lica gegi. Ätrunga biname piiyepu ätrunga cäco biname, teepi cuta äblicäco yepä me äbita.

¹⁶ Acejiyame me awejena mete piiyepu uuje bime awejena mete äblicäco gigri äbita. Mine temi Acejiyame me mete. Tabe apu ituge iicana egä,
“Cane cäme binamewale bime cabu nanajinige,

ten cama otnenine.
Cane teeme Acejiyame gäne,
teepi cäme binamewale gemi.”

¹⁷ Peei name pi Yageyame te teeme binamewale bine cuta apu jejenemige egä,
“Weene miiji teebibine ehmäläcemepeye,
cude padare äbitipeye teeme bau ca.

Conocono mule cabu gone lalenglecäjininuye,
cane piba weebibine piwadipene.”

¹⁸ Piba cane weeme Babe gäne,
weene cäme bägräwale gemi.
Babo kokre Yageyame te jüicenige ai mene.”

7

¹ Cäme miijirage binamewale, Acejiyame te ituge mibibine pepu mene ceera, peei name pi mine miiji abmaläcema, lui mule cina jaawenimusi mime tääpe piyepu seemo bine jugi me. Mine miiji wälu cama lenaja piyepu mara me äbita Acejiyame tääpume.

Paulo Gege Gyene Korinito Biname bime tääpume

² Weeme ngenecu bine jepatnemepeye cime tääpume. Cine nuuja biname ne lica ituge niija wawena. Cine nuuja biname me ätrunga ne lica ituge sabe wawena, piyepu cine nuuja ne lica ituge giri acita kaakesea wawenname cime miiji tääpume.

³ Cane ai mene naace tääpume lica jicenine egä weebibine äingejame. Eewe, päta cane uja ituge weebibine jaji, egä cine epu babo singi gemi weeme tääpume, egä nuuja te mibibine mara me äblicäco wawena, budre te coo ireclota cabu nuuja gwidape te.

⁴ Cane toraca ätrunga gäne weeme tääpume piyepu babo gege gäne. Iyeta mäpu biijabija cabu cine lipu ituge otni, teepi cebine ngenecu onya me lica nawenumesi. Eewe, cane iyeta padare cabu baborage gege gäne.

⁵ Cine liba Makedoniya gawe cabu me latyaripago, cine cängena lica ninajipi puma. Cine bucurage mäpu bine jääpänanemepesi. Iyeta pota ta cime cubuyame puga ge, siige cine mage wälu ge.

⁶ Yepä Acejiyame lui te kokre sääcäranemuge lui cina ngenecu onya me läbitininusi, tabe ngenecu kokre me niwenipi, Taitus ne lipu täätyepipi.

⁷ Teeme otni taatu te cibibine ngenecu kokre me lica niwenipi, yepä cuta tabe lipu weebibine tiyitnipi, egä weene lipu teebine ngenecu kokre me jaawenepeye. Tabe cuta nijipi, egä weene baborage singi gemi cebine päpäname, piyepu weene babo ngenecu mäpu gemi, ngena te läbitepi puma, cuta piyepu weene singi gemi cebine ätityerame. Iyeta peei cina cebine cerämu gege me nawenepesi.

⁸ Cane lui leta ne yoogärepepe weeme bau me, puu ngenecu mäpu me jiwenipi, yepä cane apu egä, “Ngänu gyene, weeme miiji me.” Cane puu puga ge ngenecu mäpu me äbita, liba jääpänepene, egä weebibine matikolä ngenecu mäpu me jiwenipi pui leta te,

⁹ yepä page cane siige gege gäne. Naace name pi lica, egä cane weebibine ngenecu mäpu me jiwenipene, yepä weeme ngenecu mäpu cina itatrongäripesi miiji mule cabu me. Weeme pui ngenecu mäpu lui Acejiyame me singi miiji pi, siige peei name pi cine ngena itu jaawenepesi weeme tääpume, sabe lica jiwenipi weebibine.

¹⁰ Ingle naace gyene, lui ngenecu mäpu lui Acejiyame me singi birige, peei ngenecu mäpu te yaatatrongtuge biname ne Acejiyame bau me, siige ireclota ne saacanuge. Siige peei ne lica yaaratasi. Yepä lui mäpu te lica birige Acejiyame me singi, yepä binamerage bime mäpu, peei te seemo ireclota ne jaawenuge budre me.

¹¹ Yoo, weeme peei ngenecu mäpu lui Acejiyame me singi ge weeme tääpume, siige weene jepäneye tabe ngena jaawenepi weeme tääpume. Tabe jiwenipi weene aclajutame piyepu awabudnitame, egä weene nuuja conocono lica ituge wawena. Weene claabe me läbitipeye, ngena te itu läbitepi; wälu me läbitipeye, ciige ngena te läbituge. Peei te cuta jiwenipi egä weene singi cebine päpäname piyepu cebine äwärimtame piyepu cuta pui biname ne daremu wawenname, lui te niija mule jaawenepi weeme sobe cabu. Siige weene ai lui ituge awabudnita, egä weeme niija lica ge, ngena te itu läbitepi.

¹² Cane liba peei leta ne yoogärepepe, pui biname name pi lica, lui te niija mule yaacnepi, coo lui tääpume jaawenepi, yepä cane naace name pi yoogärepepe egä weene Acejiyame me opo gaabe je opo awatname, egä weene toracarage singi gemi cime tääpume.

¹³ Siige peei name pi cine ngenecu gege gemi. Cuta peei taatu lica, yepä Taitus me gege te magerage gege me niwenipi, tabe liba nijipi weene lipu teebine ngenecu plowa me itu jaawenepeye.

¹⁴ Cane weebibine iwepyeräjipene Taitus bau me, cuta cane ajiri ne lica ituge päpäna wemiji pi. Cine walya mene lica ituge otroma weeme bau me, cuta cine Taitus ne ngena ituge jajanena weeme pota cidi me, walya lica gyene.

¹⁵ Taitus weebibine ngeneciipeccininuge, egä weene lipu wälu cama teebine yaacatepeye piyepu weene lipu singi ge teeme mene äteciyame, siige teeme singi te weeme tääpume babo me äbitenige.

¹⁶ Siige cane mage gege gäne weeme tääpume. Cane nuuja ngenecu lica gäne, ingle cäme ätrunga pisi nyene, egä weene cebine näteciyuje.

8

Rarekaake Ootona Owecumete Biname bime tääpume

¹ Cime ätrunga binamewale, cine singi weene umle äbitame, Acejiyame me owecu te ngena ituge wawena Makedoniya gawe ngalebora maramara ätrunga ingle bime tääpume.

² Mäpu biijabija cina puu ituge otni teeme bau me teebibine apicetnärame, yepä teeme gege ne äblicäco sabe wawena. Teepe cuta babo owecumete gemi, yepä teepe ceera cäco lica gemi.

³ Cane toraca jijenininine, teepe rarekaake yaacranemepesi teepe luma ngälu acraname, piiyepu cuta teepe cerämu poto yaacranemepesi. Teepe ai ne teeme singi ca jaawenepesi,

⁴ siige nitemläjipesi cibibine, egä teepe lipu ge cuta ätityerame Acejiyame me binamewale bine Yuudea probins ngalebora.

⁵ Teepe yäätucäremepesi, cine lui täापume jaawagrijemepesi: teepe niinäce Acejiyame bau me ireclota yaacranepesi, ingwe ca cuta cime bau me Acejiyame me singi miji pi.

⁶ Taitus te gije jaabacitepi baborage rarekaake ne owecu gwidape täापume otoname weeme bau ca, siige cine teebine jaajepesi peei kaakesea ne ämlitejame.

⁷ Iyeta mule cabu weene niinäce gaabe gemi poto ätrunga biname bime bau ca: weeme ätrunga cabu piiyepu Miji Mene acenena cabu weene niinäce gaabe gemi, piiyepu weeme umle lui baborage gyene toraca mene poto cidi me, weene gloose lica gemi ätityerame, cuta weeme singi cime täापume lui baborage gyene. Peei name pi cane singi gäne weene cuta niinäce gaabe me äbitame ai owecu mule wawename rarekaake otoname.

⁸ Cane ai lui weebibine lica idretnininine. Yepä cane naace name pi jeitnäjenine, Makedoniya biname cina lipu babo singi ge rarekaake ceerame, ingle cane singi päpäname egä weene nää cuta toraca singi gemi ceerame.

⁹ Weene umle gemi, mime Yageyame Yeesu Keriso lipu baborage singi ge mime täापume. Tabe liba Acejiyame cama cabucewe je, tabe dogweyame ge, yepä tabe mime name pi täduji gawecewe cabu me, owecumete biname pana äbituji. Tabe ai ne naace täापume jewenuji mine piba seemo ireclota ngalebora dogwe äbitame.

¹⁰ Cäme ngene atwanena apu gyene, egä pui lui weeme miiji täापu myene weene page ämlitejame, niinäce kämäge weene lui rarekaake otona ne gije ituge abacita. Weene magerage singi puga ge, cuta kaakesea jaawenepeye pui täापume,

¹¹ siige jimlitepeye pui kaakesea ne. Weene lipu baborage singi cama taagednepeye, cuta pipu singi cama jimlitepeye. Weeme ibi ecärepeye.

¹² Weeme liba singi pisi nyene ceerame, Acejiyame ne ngenecu miiji me jaawenuye, weene liba yäacärye, weeme ngena piti nemi ceerame. Tabe lica jiwagrijenininige, weeme liba ngena lica gyene, pui ne ceerame.

¹³ Cane naace täापume lica jiićenine egä weebibine mäpu cabu acraname siige poto cina piba kälyä äbitame.

¹⁴ Eewe, pätä cane naace me jiićenine, egä ai padare cabu weeme lipu iyeta gwidape bucurage gemi, weene miiji pui bine ceera, laati bemi owecumete page. Siige nuuja taje weene liba owecumete lenaja ji, teeme liba bucurage birige, teepe piba pa pitityäripesi. Apu mule ca weene neeneni yepä ibi inajuge.

¹⁵ Oogäräneji mene te ai poto cidi me jiićenige egä,

“Laati te magerage deedei yaatomlecemepi,
teeme bucurage lica ge.

Laati te nesae deedei bine yaatomlecemepi,
tabe ngene jaaglepi.”

Taitus piiyepu Ten cama Lui Biname

¹⁶ Cine Acejiyame ne eso ecärenisi, egä Taitus ne ngene atwana säacärepi tabe weebibine ätityerame cine liiyepu.

¹⁷ Tabe yaacatepi cane lui jaajepene tabe weeme bau me otnime. Yoo, tabe epu baborage singi ge otnime, egä tabe te niinäce otni mene tiicepi, cane ingwe ca jaajepene otnime.

¹⁸ Cine teta cama jityepenisi mime yepä ätrunga biname ne, ätrunga ingle cina lui ne yaawepyeräjus i teeme Miji Mene jajanena name pi.

¹⁹ Peei taatu lica, yepä teebine ätrunga ingle cina cuta itu jaajepesi cine cama otnime, cine liba ai owecu gwidape täापume yootoninisi, lui owecu gwidape name pi bucurage biname cina Yageyame Yeesu Keriso ne pagege awepyeräja piiyepu cuta lui owecu gwidape te pagege awabudnita, egä cine toraca singi gemi cime owecumete ätrunga biname bine ätityerame.

²⁰ Cine singi lica nuuja mule wawename, lui te biname bine jaawenimuge cibibine äingejame, egä cine ai baborage owecu gwidape ne lipulipu yootoninisi piiyepu ceera pagege.

²¹ Cine singi gemi iyeta gwidape conocäco wawenetnäjame, lica Acejiyame me taatu opo gaabe je piiyepu cuta biname bime opo gaabe je.

²² Cine siige ai neeneni biname cama cuta cime nuuja ätrunga biname ne jityepinisi. Cine teebine itu yaapicetnärepesi, siige jääpänepesi, egä tabe babo singi gyene ätityerame. Teeme baborage ätrunga pisi nyene weeme tääpume, siige tabe singi gyene weebibine ätityerame.

²³ Yoo, weene umle Taitus. Tabе cane cama kaakesea biname gyene weeme miiji tääpume. Cuta pei neeneni biname, ten cama lui aaclenige, ätrunga ingle cina lui bine jaajepesi, teeme kaakesea te Keriso me ngii ne babo jaawenuge.

²⁴ Weeme singi ne jewabudnitepeye teeme tääpume. Lui ätrunga ingle cina teebibine pa jäätyepemepesi, teepi liba pa yäätecijemepi weeme singi poto cidi me, siige peei te pa jaawabudnitepi teeme bau me, egä cime awepyeräja lui weeme poto cidi me papa lica gyene.

9

Ätrunga Biname bine Miiji Ätityera

¹ Nuuja singi lica gyene cane cuta cääri weeme bau me oogärume rarekaake otona poto cidi me Acejiyame me binamewale bine ceerame, Yuudea probins cabu je lui cina icrajenige.

² Cane umle gäne, egä weene singi gemi ätityerame, siige cane ituge weebibine awepyeräja Makedoniya biname bime cabu. Cane jaajemepene teebibine egä, “Akaya gawe cabu lui ätrunga biname, teepi niinäce kämäge cabu ca amacetnäjäneji gemi ätityerame.” Siige weeme baborage singi ätityerame ituge poto bine cuta singi me wawena ätityerame.

³ Siige page cane jäätyepenänine cime ai nesae ätrunga biname bine naace tääpume egä cime awepyeräja te papa me lica äbita weeme poto cidi me, yepä cane lipu Makedoniya biname bine ituge jajanena, weene pepu amacetnäjäneji gemi ätityerame.

⁴ Cije cane liba pa lädepena peeyeme, cuta poto Makedoniya ätrunga biname cina liba cane cama otni je, cane singi lica teepi päpäname, egä weene amacetnäjäneji lica gemi. Ai te liba äbita je, cane lipu ajiri pa nanajepi căme awepyeräja name pi weeme poto cidi me! Piiyepu cane nuuja singi lica gäne iicaname, egä weene te cuta babo ajiri ne pecatepeye.

⁵ Siige peei name pi cane jääjäpene ai biname bine teepi căme niinäce gaabe otnime amacetnäjame, weene lui owecu gwidape tääpume ituge iicana. Apu mule ca pui owecu gwidape amacetnäjäneji pagege, cane liba pa latyaramtepene peeyeme. Piiyepu weene weeme singi ca pecäremepeye, lica ädretneca name pi.

⁶ Weene gone ngene ätrimela, egä laati te nesae gije jäächnänuge, tabe cuta nesae kuu bine jääpänimuge. Cuta laati te bucurage yäätemuge, tabe cuta bucurage jääpänimuge.

⁷ Biname cina, teepi miiji teemämu ngene atwanena, egä teepi luma ngälu ceerame; yepä teepi ngena yääcärusi, gege cama miiji ceera, ingle lui biname te gege cama birige ceera, Acejiyame te singi gyene teeme tääpume.

⁸ Acejiyame te miiji gyene weeme singi ibi ceera cuta poto ceera, siige piba weeme iyeta piti nemi weene lui tääpume singi. Piiyepu peei taatu lica, cuta weene miiji gemi nuuja biname bine bucurage ceerame ätityera tääpume.

⁹ Oogäräneji mene te jiičenige ai poto cidi me egä,
“Tabе owecumete biname bine papa yääcäranemuge,
teeme owecu lui ngälu căco gyene.”

¹⁰ Acejiyame te gije yääcärüge liteta biname ne, siige pui biname te deedei jääpänimuge teeme loolo me. Tabe cuta weebibine gije icäraninuge weene ätemame siige teepi uutaname. Yepä pana gyene, weeme ceera mule cabu ca weene bucurage kuu bine jääpänimuye.

¹¹ Tabe iyeta padare cabu dogwe me jiwenininuge piba weene ceera biname lenajame, siige bucurage biname cina Acejiyame ne eso pagege ceera wemiji ootonäneji owecu gwidape tääpume, cine lui ne pa yaacanepesi teeme bau me.

¹² Ingle naace gyene, ai kaakesea weene lui jaawenuye, eei taatu me lica gyene owecumete biname bine ätityerame, piiyepu cuta jaawenimuge bucurage biname bine Acejiyame ne awepyeräjame piiyepu eso ceeraname.

¹³ Weeme ai kaakesea te jaawabudnituge, egä weene lui Miiji Mene ne secatuije, weene weeme ireclota ngalebora pui ibi inajininuge, siige lui cina weeme owecu gwidape ne pa jääpänepesi, teepi weeme Miiji Mene äcwetna name pi Acejiyame ne pa yaawepyeräjepesi cuta piiyepu weeme owecu gwidape name pi teeme tääpume piiyepu poto ätrunga biname bime tääpume.

¹⁴ Siige teepi baborage ngenecu miiji cama irecu pa lätumutipesi weeme tääpume, ingle Acejiyame te lipu baborage singi ne itu saaboclomtepi weeme tääpume.

¹⁵ Mine Acejiyame ne eso yääcäresi teeme owecu mule tääpume, lui epu baborage gyene, egä äblicäco mene iicana.

10

Paulo me Conocăco Keriso me Ätyepäneji Biname me Lenajame

¹ Cane Paulo singi gäne weebibine mene jajime. Weene apu jüicuye, egä cane liba weene cama cane owelaamelame birige, yepä cane liba weene cama lica, cane drämä cama jiweninunune. Cane singi epu owelaamelame piyepu cängena cama lenajame Keriso liiyepu,

² siige cane itemlininine, egä weene gone giri nawenuye drämä täöpume, cane liba pa lädepene peeyeme, ingle cane umle gäne, egä cane miiji gäne eei bine drämä cama wawename, lui cina walya naitnäjusi, egä cane gawe ireclota mule bine yäacwetni-mune.

³ Puu toraca gyene, egä cine gawe cabu ninajininuge, yepä cine ai gawecewe biname bime pana cubu lica jüicusi.

⁴ Cine lui gwidape ca cubu jüicusi, ai gawe ireclota me cubu gwidape lica gemi, yepä Acejiyame me kokre cubu gwidape gemi, cine lui ca sabe jaawenimusi Satani ne teeme cubuyame cama.

⁵ Cine yääyblengemusi iyeta walya mene bine; cine jüibemusi iyeta mule bine, mope modamoda biname cina lipu yäaciseräjusi toraca umle ne Acejiyame potu cidi me; cine biname bine yaatatröngärimusi teepi Keriso me singi ibi ngene atwaname.

⁶ Weene liba lawabudnäjininuye, egä cibibine nitecijeniniye, siige cine piba taatu eei bine mäpu daremu pa yäacaranemepesi, lui cina lica nitecijinusi cibibine.

⁷ Weene ngene atwana ngalebora me lica gemi. Biname peeci yene lui te jüicenige, egä tabe sine biname lui te Keriso bau ca mene saawadäjemuge. Pui biname te miiji cääri ngene atwana, siige tabe ngene ca pa laglepi, egä tabe lipu mene saawadimuge Keriso bau ca, cane cuta piyepu.

⁸ Mime Yageyame Yeesu Keriso te cebine conocăco näcärepi weebibine waadename, lica weebibine gawe me wawename yepä cabu me wawename. Ngänu gyene, cane lipu baborage lawepyeräjune căme conocăco potu cidi me, yepä căme nuuja ingle lica gyene pui potu cidi me ajiri lenajame.

⁹ Cane singi lica gäne weene ngene atwaname, egä cane lui leta bine weeme bau me itu jäatyepäjemepene naace me weebibine wälu me wawename.

¹⁰ Potu cina jüicusi egä, "Paulo me leta mene lui trängäli piyepu kokre cama gemi, yepä tabe liba mine cama yaanajuge, tabe bleelablela birige piyepu kokre căco mene jüicemuge."

¹¹ Pui biname cina miiji umle, egä cane ngena yoogärune cudecewe ca, cane jaawenune, cane liba peema birige.

¹² Cane lica ajenine epu biname ca, lui cina teemämu leta bine yoogärimusi teeme miiji mule awabudnitame. Cane singi lica gäne pepu biname cama atonerame. Teepi teemämu jaawenimusi atonera gwidape bine teeme singi ibi, siige pui ca latoneräjininusi. Teepi buduma biname gemi!

¹³ Cane liba lawepyeräjune, cane äblicăco piyeme papa iicetneja, yepä cane eei kaakesea ibi lawepyeräjune Acejiyame lui cebine näcäruji, cuta weene peei kaakesea ngalebora gemi.

¹⁴ Weene pui gawe ngalebora ina-jininuge, Acejiyame lui najuji, siige cane gawe ngälu ne lica jaatropangtepene, liba peeyeme Korinito me lädepene Miiji Mene jajanename Keriso potu cidi me.

¹⁵ Siige cane lica lawepyeräjune nuuja biname bime kaakesea täöpume, teepi lui ne ituge wawena căme caale kaake potu ca, Acejiyame lui näcäruji. Weeme ätrunga cina liba babo läbitininusi, căme singi pisi nyene cuta căme kaakesea te babo äbitame, yepä cane singi gäne pui gawe cabu taatu wawena Acejiyame lui itu najuji.

¹⁶ Acejiyame te liba căme ai singi ne toraca me jaawenuge, cane miiji gäne otni Korinito cewe nuuja potu cidi me puma cuta Miiji Mene jajanename. Cane singi lica nuuja biname me kaakesea ne acatame, tabe lui cewe cabu ituge wawena, Acejiyame lui teeme täöpume ituge jaji.

¹⁷ Oogäräneji mene te apu jüicenige egä, "Laati te singi awepyeräjame, tabe miiji eei täöpume awepyeräja, Yageyame lui bine ituge waweneca."

¹⁸ Ingle naace gyene, Yageyame eei biname ne lica yaacatuge, lui te teemämu lawepyeräjuge; yepä eei ne yaacatuge, tabe lui ne yaawepyeräjuge.

11

Paulo piyepu Keriso me Walya Mename Biname

¹ Cane singi gäne weene ire taatu acitame cane matikäli buduma mene iicemame. Yoo ngenä popi, weene ire taatu nacininiye cane buduma mene iicemame.

² Cane ngenecu gāne weeme poto cidi me; epu asicnantenine weeme poto cidi me Acejiyame liiyepu. Cane weebibine simacetnājimene weene Keriso cama atejāclmutame. Cane singi gāne weene epucāco lenajame, siige atejāclmuta bimu cabu piba picāripene teeme bau me epu pana, camu ngulebāgrā lipu yācārusi ciwelooloyame ne.

³ Yepā cane wālu pisi nāne, egā Satani te lipu ongletnājuji Eeba ne teeme walya mene ca, weeme ngene atwanena cina cuta pepu conocono me pama läbitininusi, siige weene piba toraca singi lica birige Keriso täapume.

⁴ Cane naace name pi wālu gāne, ingle cane jepānenine, weene lipulipu watatarage biname bine yaawadimuye, lui cina weeme bau me saacluge. Weene jäätrunguye teepi lui mene Keriso poto cidi me jicemusi, ngānu gyene teeme mene mara căme mene cabu ca. Cuta teepi lui seemo poto cidi me jicemusi, weene yaacatuye, ngānu gyene tabe Aceji Seemo lica, weene lui ne yaacatuye căme bau ca. Cuta teepi lui miiji mene yaacenanusi weene yaacatuye, ngānu gyene pui mene mara, cane lui Miiji Mene itu jijananiipene weebibine.

⁵ Cane apu ngene jotwananenine, egā cane yepā ibi gāne pui biname cama, weene lui täapume jinge-nininige, egā teepi modamoda ätyepāneji biname gemi.

⁶ Cane pama miijirage mene iicema biname lica gāne, yepā căme umle baborage gyene, siige cane maramara gaabe ca peei ne ituge aboclomāja weeme bau me.

⁷ Cane jijananiipene Acejiyame me Miijirage Mene, piyepu cane daremu täapume weebibine lica itināripene. Cane cămāmu matikāli läbitepene naace täapume weene piba baborage me äbitame. Nāā, cane peei lui niya mule jaawenepene?

⁸ Cane poto ätrunga biname bime bau ca rarekaake jääpānanemune weeme täapume kaakesea waweneme. Ai lui egā cane teebibine juutecrimune weebibine ätityerame.

⁹ Cane liba weene cama jage, căme rarekaake cina lämlipesi, yepā cane lica itināripene weebibine rarekaake ceerame. Yepā Makedoniya ca lui ätrunga biname cina saaclepi, teepi te năcārepsi iyeta cane lui täapume singi. Cane umle căco gāne weebibine nuuja gwidape täapume ätinera, cuta lica pa itināripene. Eewe, licarage!

¹⁰ Keriso iyeta padare cabu lipu toraca mene jicemimuge, cane cuta piyepu cane liba jiceninine, egā Akaya gawe cabu nuuja te äblicāco cebine iibana apu awepyerājame.

¹¹ Cane ai ne naace name pi lica jiceninine, egā cane singi lica gāne weeme täapume? Acejiyame umle gyene, egā cane singi gāne.

¹² Yoo, cane lipu weebibine lica ituge rarekaake täapume ätinerāja ngālu page, cane cuta pepu pagege äbita, naace name pi egā lui cina Keriso me ätyepāneji biname ca lainininusi, teepi piba äblicāco teemāmu awepyerāja piyepu iicana egā teepi cane cama yepā opo kaakesea jewenenisi.

¹³ Teepi walya kaakesea biname gemi, Keriso te teebibine lica ituge ätyepa. Teepi walya laininusi Keriso me ätyepāneji biname ca, siige weebibine ingletnājinusi.

¹⁴ Cane călu te lica äti. Pui lui ciitaca mule lica gyene. Satani te cuta lateplingtuge, läbituge epu pana Acejiyame me mename seemo liiyepu.

¹⁵ Peei name pi ciitaca lica gyene, egā teeme kaakesea bāgrā cina cuta läbitininusi Acejiyame, lui conocāco gyene, teeme kaakesea bāgrā bime pana me. Yepā ngālugaabe je teepi teeme mule ibi daremu ne cire jääpānepesi.

Paulo Awepyerājenige Teeme Māpu cabu Lenaja poto cidi me

¹⁶ Cane cuta cāāri jiceninine, egā nuuja te apu gone angi, egā cane toraca buduma gāne. Yepā weene liba pepu jaawenuye, weene piba gone yaacatuye cane liba buduma biname pana matikāli awepyerājenine.

¹⁷ Cane liba apu awepyerājenine, cane mime Yageyame Yeesu Keriso me mene lica icwetnenine; cane mage buduma mule jewenenine.

¹⁸ Yepā ingle bucurage biname piti nemi, laatibi lawepyerājininusi biname bime pana, lui cina gawe ireclota mule cabu yaacrajuge, cane cuta teeme pana äbitenine.

¹⁹ Weene peete nemi umle biname, peei name pi gege cama ire taatu jaacranimuye buduma biname bine.

²⁰ Weene ire taatu jaacranimuye biname cina weebibine aletnāneji biname pana me waweneme; piyepu weene ire taatu gemi teepi weebibine giri acraname teeme kaakesea wawenetnājame; piyepu weene ire taatu gemi teepi weebibine angletnejame, äingejame, niyaniya tagepogogo iicemame.

²¹ Cane ajiri gāne, egā cane toraca drowā lica ge pepu äbitame weeme täapume.

Cane buduma pana jicenenemine poto buduma cina liiyepu, awepyerājinine eei täapume, teepi lui täapume lawepyerājininusi.

²² Teepi jiiçusi egä, “Cine Heberu biname gemi.” Yoo, cane cuta piyepu. Teepi apu egä, “Cine Israela biname gemi.” Yoo, cane cuta piyepu. Cuta teepi egä, “Cine Abrahamo me kaakesaare gemi.” Yoo, cane cuta piyepu.

²³ Teepi jiiçusi egä, “Cine Keriso me kaakesea biname gemi.” Cane buduma pana awepyeräjiniine, yepä cane age säne teeme bau ca miijirage Keriso me kaakesea biname. Teepi puu kaakesea jaawenusi, yepä cane te magerage kaakesea ituge wawena. Cane teeme bau ca magerage ituge lenaja krokeciye mete cabu, cebine magerage ituge adnana, cuta cane magerage teeme bau ca puga ge cuta budre päpäname.

²⁴ Israela biname cina cebine teetinain gääbu ituge adnana faib maramara padare cabu.

²⁵ Cuta nesae maramara padare cabu Rooma biname cina nadnanepesi. Yepä gääbu cuta kula ca nacnepesi. Cane liba malu cabu waatnetnäjepene, nesae gääbu buto cina sabe läbitanipesi, cuta yepä gääbu cane yepä bimu cebocebo padare cama niye papa cabu nanajepi malu cabu.

²⁶ Cäme otnetneja cabu iyeta poto ta mäpu puga ge. Cane igi cabu labumäjune, cane wälu puga ge ero biname bime name pi, cuta cane wälu cämegerage Israela biname bime name pi piyepu nuuja gawe biname bime name pi. Mäpu puga ge modamoda cewe cabu ta, glunubora ta, malu cabu ta piyepu eei biname bime bau ca, lui cina ätrunga biname ca lainininusi, yepä teepi lica gemi ätrunga biname.

²⁷ Cane magerage kaakesea ituge wawena gloose cäco, ute cäco. Cane umle gäne loolomecewe piyepu niyemecewe lenaja. Cäme otnetneja ngalebora cäme deedei ibibi lica ge, cäme mete lica ge, cane niyarage cäbletääpe cama ge.

²⁸ Ai taatu lica, cuta cäme ngenecu mäpu pisi nyene iyeta padare, egä ätrunga biname cina lipu icrajiniine.

²⁹ Laati te liba ätrunga cabu onya yaanajuge, cane cuta pepu lasicnantune; laati te liba niija mule jaawenuge, cäme ngenecu mäpu me läbituge.

³⁰ Ingle weene cebine giri nacitiye cane awepyeräjame, cane ai mule poto cidi me bawepyeräjine, lui cina nawabudnitusi, egä cane matikolä gäne.

³¹ Acejiyame, mime Yageyame Yeesu Keriso me Babe, mine lui ne yaawepyeräjesi, tabe umle gyene, egä cane walya lica otrominiine.

³² Cane liba Damaseko babo cewe jage, mope biname Areta me ingwe gaabe biname, lui te pui cewe ne ire jaatwuge, tabe yaacranemepi teeme awamuta biname bine pui cewe caale grana gome cebine oomlaname.

³³ Yepä pui caale atreji cabu traapi puga ge, siige ätrunga biname cina cebine diiba bora näsinglantepesi, pui traapi cabu ca näinepesi caale kaake poto cidi me, siige cane lucrepene.

12

Paulo Gwidape bine Jepänimige Cabucewe je

¹ Ai awepyeräja mule puu nuuja miiji lica gyene, yepä cane miiji cerämu awepyeräja. Siige cane page jiiçemenine mime Yageyame te lipu taboclomtuji piyepu teeme singi ne lipu seboclomtuji cäme bau me.

² Cane umle gäne yepä ätrunga biname, Acejiyame te lui ne cabucewe me caburage me ecanuji, footin kämäge liba ituge apira. Yoo, cane age säne pui biname. Yepä cane toraca umle lica gäne, egä cane toraca cabucewe me caburage jage, coo cane wama pana jepänimujine. Acejiyame tabe taatu umle gyene.

³ Cane cääri jiiçenine, egä cebine Acejiyame me lenaja puupu cabu me nacanujisi – yoo siige cane umle lica gäne, egä cane toraca puga ge, coo wama pana jepänimujine. Acejiyame taatu umle gyene.

⁴ Cane puga nätecijuji maramara gwidape poto cidi me, lui täapume mene lica gyene piyepu lui poto cidi me cudege iicana.

⁵ Siige cane ai cabucewe miijirage mule täapume awepyeräjiniine, cuta iyeta poto mule cabu ca lui cina ituge äpletnera cäme täapume, cane eei taatu mule täapume awepyeräjiniine lui cina cebine nawabudnitusi, egä cane matikolä gäne.

⁶ Cane liba awepyeräja je, cane buduma lica cirege, ingle cane toraca mene cire jiiçemenijine. Yepä cane siige ingwe ca lica awepyeräjiniine pui cabucewe mule poto cidi me, ingle cane singi lica gäne biname cina cebine opo gaabe me acitame pui mule name pi, yepä eei taatu name pi teepi ngena jääpänusi cane wawena je piyepu ngena yäätəcijemuge cane iicema je.

⁷ Acejiyame lui gwidape bine seboclomäjimuji cäme bau me cabucewe je, ingle babo miijirage gwidape gemi, peei name pi cane cije awepyeräja mage; yepä tabe mäpu ne cäme tääpe cabu itu secituji, lui te gaale pana cebine nagadäjeniine. Ai lui Satani me kaakesea gwidape gyene cebine aglime, siige niibenige cane mope babo me äbitame.

⁸ Cane nesae gääbu Acejiyame bau me irecu ätumutanujine ai mäpu ne äyeblyngtame, yepä tabe singi lica ge.

⁹ Tabe apu najuji egä, “Cäme baborage owecu määme tääpume ibibi gyene iyeta maane lui tääpume singi gäte, ingle cäme kokre te babo läbituge määme cabu, maane liba kokre cäco gäte.” Siige peei name pi cane gege gäne, egä cane kokre cäco gäne naace tääpume piba cäme cabu Keriso me kokre te lenajame.

¹⁰ Peei name pi cane gege gäne Keriso miji pi mäpu cabu lenajame, ngänu gyene cane lipu kokre cäco, niyaniya nawenusi, coo gwidape cäco; ngänu gyene lipu sabe nawenanusi coo lipu mäpu bine jääpänanemune. Ingle naace gyene, cäme kokre cina liba lämluge, Keriso me kokre te piba yaanajuge cäme cabu.

Paulo Ngenecu Mäpu Gyene Korinito Ätrunga Ingle name pi

¹¹ Cane buduma pana bäbitine cämämu awepyeräjame, yepä weene te giri naweniye. Weene te cebine cire nawepyeräjejiye. Cane puu papa gäne, yepä weeme pui mararage ätyepäneji biname bime cabu ca cane gawe me lica gäne.

¹² Acejiyame te bucurage owowä piyepu cälu täti gwidape piyepu ciitaca mule bine weeme sobe cabu yaaboclomäjänemepi cäme bau ca, cane liba gloose cäco cäme kaakesea jaawenepene peema. Peei ciitaca mule cina cebine pajecu me nawenepesi, egä cane Keriso me ätyepäneji biname gäne.

¹³ Cane lipulipu weebibine niyaniya ire jitwipene poto ätrunga ingle bime bau ca? Nää peei ge niya, cane lipu weeme bau ca rarekaake lica yaawadanemepene? Siige ngänu gyene, gone yaacatuje peei poto cidi me.

¹⁴ Siige cane ai lui nesae me otnime äbitinine peeyeme Korinito cewe me. Cane singi lica gäne nuuja rarekaake tääpume weeme bau ca, yepä cane singi weeme tääpu mäne. Mule lica gyene bägrä cina teeme mage babe bine ire atwemame, yepä mage babe cina miiji bägrä bine ire atwemame.

¹⁵ Cane gege gäne, cäme ngena piti nemi weebibine ceerame, cuta cäme ireclota piyepu ceerame weebibine ätityerame. Weene nää pui name pi matikolä singi gemi cäme tääpume, ingle cane baborage singi gäne weeme tääpume?

¹⁶ Siige ai lui pama mime gigri ngene atwana gyene, egä cane weebibine mäpu me lica jiwenipene, cane liba puma Korinito jage. Yepä poto cina pama jicenis, egä cane weebibine ingletnäjpene piyepu walya waatromepene.

¹⁷ Peei lipu gyene? Cane lui biname bine jäätyepemepene weeme bau me, teepi nää weebibine jiwenipesi cäme miiji tääpume kaakesea wawename?

¹⁸ Cane jaajepene Taitus ne peeyeme otnime weeme bau me, cuta jäätyepene nuuja ätrunga biname ne teta cama. Taitus nää nuuja gwidape ne yaacatepi weeme bau ca? Eewe, licarage! Cine Taitus cama yepä ngene atwanena cama kaakesea jaawenenago piyepu cime mule yepä ibi ge.

¹⁹ Weene gone apu angi, egä cane weeme cabu ca cäme cäme aga bäwäricine. Acejiyame me opo gaabe je cane jijenininine, egä cane Keriso me kaakesea liba jaawenune, cane toraca mene jicemune. Piyepu cäme biname, iyeta cane lui bine jaawenimune, peei lui weeme ätityera tääpu memi.

²⁰ Cäme wälu pisi nyene, egä cane peeyeme liba pa lädepene, cane pama epu pa pidäripene weebibine, cane lipu tääpume singi lica gäne. Cuta weene pama epu pa näpänepeye cebine, weene lipu tääpume singi lica gemi. Cane wälu gäne, egä cane weebibine pidäripene mene abaja cabu, ire patre agli cabu, watata claabe cabu, weemämu ngene atwanena cabu, niyaniya mene cabu, icetneja cabu, weemämu awepyeräja cabu, ätecija cäco mule cabu.

²¹ Cane wälu gäne, egä nuuja taje cane peeyeme liba pa lädepene, Acejiyame te cebine cuta cääri ajiri me pa nawenepi weeme name pi. Siige cane ele pa nangenepi eei biname bime name pi, lui cina niyaniya mule itu yaacnemepesi niinäce gaabe me, yepä lica itu tatatrongäripesi teeme sargi mule cabu ca, magebi rooriye cina teeme sargi ero mule cabu ca, ngulebägrä imäbägrä cina teeme sargi ero mule cabu ca piyepu poto ajiri mule cabu ca.

13

Ceräcerägääbu Umlle Mene piyepu Yewo Mene

¹ Cane ai lui nesae me otnime äbitinine weeme bau me. Oogäräneji mene te jicenige egä, “Weene miiji neeneni coo cerämu poto bime aitneja mene ätecija biname me niya mule poto cidi me, piba weene miiji gemi teebine ablawejame.”

² Cane lui padare cabu neeneni me lädepene peeyeme, cane piba umle mene jijipene weebibine. Cuta page cane liba cude padare gäne weeme bau ca, cane cääri pui yepä mene jijenininine, egä ingwe ca cane liba pa lädepene peeyeme, lui biname cina niya mule

niinäce gaabe me itu tewenimumesi piyepu iyeta poto cina, teepi lica pa luucratni-pesi daremu päpäna cäco pi.

³ Siige weene piba pagege umle äbita, egä toraca gyene, Keriso te cäme bau ca mene jicemuge. Tabe weeme opo gaabe je riiberibe lica pagege, pätä tabe teemerage kokre page yaaboclomtepi weeme bau me.

⁴ Biname cina puu teebine baarge uli cabu jibyecrujisi, tabe liba kokre cäco enajuji, yepä tabe Acejiyame me kokre miji pi page siige ireclota enajenige. Tabe lipu kokre cäco enajuji, cine teeme ätyepäneji biname cuta pepu kokre cäco gemi. Yepä cine liba peeyeme Korinito me pa naclepi, ingle cine ireclota Keriso cama yepä gemi, siige cine Acejiyame me kokre cama pa niclajutipi weeme opo gaabe je.

⁵ Weene weemämu apicetnäripeye päpäname, egä weene nää toraca Yeesu Keriso ne jitrungeniye. Weene liba birige äsecrera peei apicetnera cabu ca, weene piba umle gemi, egä tabe pisi nyene weeme cabu.

⁶ Cäme ätrunga pisi nyene, egä weene umle itu läbitipeye, egä cebine pepu ituge apicetnera, siige jääpänepesti, egä cane toraca Keriso me ätyepäneji biname gäne.

⁷ Cane Acejiyame bau me irecu lätumutanune, egä weene nuuja niya ne lica pagege wawena. Cane naace name pi weeme täapume lica irecu lätumutanune, egä biname cina piba päpäname egä cane toraca ätyepäneji biname gäne. Yepä cane pui name pi weeme täapume irecu lätumutanune egä weene miiji mule bine wawenetnäjame, ngänu gyene biname cina liba apu jiiucusi, egä cane toraca ätyepäneji biname lica gäne.

⁸ Cine eei taatu mule bine jaawenimusi, lui gemi toraca, lica eei bine toraca gwidape bine lui cina sabe jaawenimusi.

⁹ Cine gege gemi, cine liba kokre cäco gemi, yepä weene kokre gemi. Siige cine irecu ätumutanininago egä weene epucäco me äbitame.

¹⁰ Cane ama cita ca naace täapume yoogärenine, egä cane liba pa lädepene peeyeme, cane piba lica pagege drämä cama weebibine wawena, lui täapume cäme conocäco pisi nyene, Acejiyame lui conocäco itu näcäruji cane weebibine ablawejame. Pui conocäco lui eei tääpu myene weebibine cabu me wawename, lica gawe me wawename.

¹¹ Yoo, cäme ätrunga binamewale, yewo! Weeme mule bine eblawäjemepeye; cäme mene ibi jewenemepeye, yepä ngene atwa-na cama inajipi, poode cama. Siige Acejiyame lui te owecu niwenininuge piyepu poode nicäraninuge, tabe weene cama pagege lenaja.

¹² Weene miiji weemeweme ajecletnäjipeye ätrunga biname bime mule liiyepu!

¹³ Iyeta Acejiyame me binamewale cina ama cita ca jiwablininisi weebibine.

¹⁴ Yageyame Yeesu Keriso me miiji piyepu Acejiyame me singi teepi weeme cabu lenajame. Piiyepu Aceji Seemo te weebibine wawename weene yepä äbitame!

Cane ngii Paulo. Cäme mene ngälu peese.

PAULO ME LETA GALATIYA PROBINS ÄTRUNGA BINAME BIME BAU ME

¹ Cane säne Paulo, Yeesu Keriso me ätyepäneji biname gäne. Biname cina cebine lica nätyepepesi, cuta piyepu cane lica biname bime singi cabu otni, yepä cane Yeesu Keriso bau ca ätyepäneji gäne piyepu mime Aceji Babe bau ca, lui te Keriso ne erpinantuji budre cabu ca.

² Iyeta cine lui ama abasecretnäneji gemi, cine gigri jiicepesi egä, “Sebore iyeta ätrunga ingle cewe maramara cabu ta Galatiya Probins ngalebora.”

³ Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi weebibine poode ceerame.

⁴ Yoo, Aceji Babe me singi cabu Keriso te budre äbituji mibibine mime niya mule cabu ca äsecerame, naace täápume mine piba niyaniya mule bine abmaläcemame, piyepu lica ai gawecewe me gwidape täápume singisingi äbitename.

⁵ Mine miiji Acejiyame ne awepyeräja iyeteta ngälu cäco. Pepu pa yaanajege!

Pisi Nyene Yepä Taatu Miiji Mene

⁶ Cane cälu te nätige mene ätecijame weeme poto cidi me. Matikolä padare te liba apirige, weene piba Acejiyame ne ehmaleniye, lui te weebibine itu ala tisoglicipi Keriso me miijirage owecu mule ca. Page weene nuuja mene itecijenininige lui ne yaainusi “miiji mene” ca,

⁷ yepä peei lui miiji mene lica gyene. Cane ai mene jiičenine, ingle naace gyene poto biname piti nemi weene cama lui cina weebibine maramara ngene atwanename jiwenininisi. Teepi singi Keriso me Miiji Mene mara me wawename.

⁸ Yepä, ngänu gyene liba cine coo cabucewe ca mename seemo te weebibine mene birige jajanena, lui mara gyene Miiji Mene cabu ca, weene lui ituge ätecija cime bau ca, tabe miiji teeme mäpu daremu päpäna muye puupu cabu iyeteta.

⁹ Cine pepu itu jijipago, cuta page cane weebibine cääri jijenininine egä, liba nuuja te weebibine mene jijanininige lui mara gyene Miiji Mene cabu ca, weene lui ne itu yaacatepeye, tabe miiji mäpu daremu päpäna muye puupu cabu iyeteta.

¹⁰ Nää, weene page apu jingenininige egä cane äbitenine biname cina singi cäme täápume lenajame? Licarage! Yepä, cane singi Acejiyame te cäme täápume singi lenajame. Weene pama apu jingenininige egä cane singi gäne biname cina cebine awepyeräjame? Eewe, cane liba peei täápume singi gäne, cane piba Keriso me toraca kaakesea biname lica birige.

Yeesu Keriso Lipu Eboclomtige Miiji Mene ne Paulo bau me

¹¹ Cäme ätrunga binamewale, cane singi weebibine umle wawename egä, lui Miiji Mene cane jaajanemune, biname bau ca lica gyene,

¹² ingle cane lica secatujine nuuja biname bau ca; coo piyepu nuuja biname te lica nabiberäjuji, yepä Yeesu Keriso te seboclomtuji pui Miiji Mene ne cäme täápume.

¹³ Yoo, weene mene ituge ätecijana cäme ireclota poto cidi me pui padare cabu, cane liba Acejiyame täápume nanajuji Israela biname bime irecu ätumuta mule cabu. Cane Yeesu me ätrunga ingle biname bine niya me owecu cäco jaawenimune, cuta piyepu singi ge peei biname bine budre me äyebलगame.

¹⁴ Pui padare cabu cane iyeta cäme kokre ca cängena tewenäjumene cime saarewale bime mule; cane niinäce gaabe biname ge cäme poto ceege cabu ca Israela biname bime mule waweneca cabu je.

¹⁵ Yepä, Acejiyame te babo owecu gyene cäme täápume, tabe cebine itu najuji, cane camuge piba aplimla, piyepu ala nasogluji naace me teeme biname me äbitame.

¹⁶ Ingwe ca tabe liba ngene jotwananuji teeme Bägrä Yeesu ne aboclomtame cäme täápume cane gawe maramara biname bine teeme poto cidi me jajanename, yoo pui padare cabu cane piba nuuja biname bau me lica ädujine abiberäja täápume,

¹⁷ cuta Yerusalema me lica ädujine cäme niinäce gaabe ätyepäneji biname cama mene abaitname. Yepä, cane conocäco ädujine Arabiya gawe cabu me, piyepu puma cita ca acenutujine Damaseko cewe me.

¹⁸ Nesae kämäge ingwe ca, cane piba Yerusalema me ädujine Peteru ne ädärame, piyepu fiftin bimü taatu ten cama nanajuji.

¹⁹ Cane puga lica jepänujine nuuja ätyepäneji biname ne, yepä Yakobu ne jepänujine, lui mime Yageyame me igane gyene.

²⁰ Acejiyame me opo gaabe je cane jijenininine egä ai mene, cane lui weeme bau yoogärenine, toraca gyene.

²¹ Pui Yerusalema me otni ingwe ca, cane otnujine poto cewe me Suriya piijepu Kilikiya gawe cabu.

²² Pui padare Keriso bau ätrunga ingle biname Yuudea gawe cabu, teepi căme täápume cāngena umle lica ge.

²³ Teepi ai taatu umle, poto cina lui naitnājujisi cebine egā, “Lui biname te cibibine niija cabu nicraninuge, page tabe biname bine jejanenemige Yeesu ne ätrugname. Yepā, niināce padare cabu tabe singi ge biname bine pui ätrunga cabu ca äyebļengājamel!”

²⁴ Yoo, teepi Acejiyame me ngii ewepāntujisi tabe lipu căme ireclota mara me nawenuji.

2

Paulo piijepu Nuuja Ätyepāneji Biname

¹ Footin kāmāge kaake poto ca, cane piba Banaba cama lacnenutepene Yerusalema me, piijepu Taitus piba cine cama ge.

² Cane naace name pi lacnenutepene, ingle Acejiyame te cebine umle itu nawenepi piijeme otnime. Puga ätrunga mope biname bime abasecretna cabu cane teeme täápume cāngena yaaboclomtepepe pui Mijji Mene, cane lui nuuja gawe biname bine jaajanane-mune. Cane peei ne jaawenepene, ingle naace gyene lui kaakesea cane ituge wawena piijepu lui kaakesea cane page jewenenine, cane singi lica gāne peei te papa me äbitame.

³ Taitus lui cine cama ge tabe Israela biname lica, yepā Griik biname gyene. Ätrunga mope biname cina cotre ne lica yaacitepesi teeme täāpe ne matikolā iirputame cewecu acatame Israela biname liijepu,

⁴ yepā poto puga ge, lui cina singi ge tabe peei ne wawename. Teepi walya mene jicemepesi egā teepi cime biname gemi. Teepi ogā pana itu yāābcānepesi ätrunga ingle cabu me cime mule ireme. Teepi singi ge umle äbitame egā Israela biname bime cotre cabu ca cine lipu äsecrēreji gemi cime Yeesu Keriso cabu lenaja name pi, ingle naace gyene teepi singi cine Israela biname bime cotre ngalebora cāāri cuta äbācname.

⁵ Yepā, cine lica teeme singi ne itu yaacatepesi, licarage matikolā padare cabu acata, ingle naace name pi cine singi ge Mijji Mene ne cāngena ire atwime weeme täápume egā peei toracarage mene te lica mara me äbitame.

⁶ Yepā, teepi lui cina epu pana mope biname ge, yoo cane pepu jicenene, ingle nuuja mara lica gyene căme täápume teepi ngena ngii cama ge. Acejiyame täápume modamoda biname lica mara gemi nuuja biname cabu ca. Yoo, pui mope biname cina cāngena lica najepesi Mijji Mene ne mara me wawename.

⁷ Yepā, teepi umle läbitipesi egā Acejiyame te cebine epu pana kaakesea itu nācāruji Mijji Mene jajanename nuuja gawe biname bine, lui cina Israela biname lica gemi, tabe lipu kaakesea Peteru ne itu ecāruji Mijji Mene jajanename Israela biname bine.

⁸ Yoo, Acejiyame lui me kokre puga ge Peteru me kaakesea cabu, tabe lui ätyepāneji biname gyene Israela biname bime täápume, teeme kokre cuta puga ge căme kaakesea cabu, cane lui ätyepāneji gāne nuuja gawe biname bime täápume.

⁹ Yakobu, Peteru, cuta Yoane lui cina epu pana egā teepi ätrunga mope biname gemi, teepi liba opo yaawatnāpesi egā Acejiyame te singi gyene cane peei kaakesea ne wawename, teepi Banaba piijepu cane cama ime lacranāpogo, awabame egā cine iyeta yepā kaakesea ne jewenenisi. Cine mene jaatranepesi egā Banaba piijepu cane gawe maramara biname bine Mijji Mene jajanename, piijepu teepi Israela biname bine jajanename.

¹⁰ Puga ge teeme yepā singi taatu egā cine mijji owecumete biname bine ätityerame, siige pepu ätityera ne cane babo singi ge ceerame.

Paulo Peteru ne Jicnecige Antiyoka je

¹¹ Peteru liba Antiyoka ätrunga biname bine yāādāremepi, cane teebine mene jaajepene ätrunga biname bime opo gaabe egā tabe conocono ne jewenige, ingle teeme conocono mule lui pajecurage ge.

¹² Puma cita ca poto Israela biname cina tataripesi piijeme Yakobu bau ca Yerusalema ca. Yoo, teeme atyara niināce gaabe ca, Peteru gigri deedei itu läbitanepi ätrunga biname cama lui Israela biname lica gemi, yepā teeme atyara ingwe ca, tabe gije labacitepi teeme bau ca äyebļingtame piijepu nuuja gawe ätrunga biname cama lica deedei loolo, ingle tabe wālu ge pui biname bime täápume, lui cina jicēpesi egā: “Cutā nuuja gawe ätrunga biname cina mijji teeme täāpe matikolā iirputame Israela biname pana äbitame.”

¹³ Siige, poto ätrunga biname lui cina Israela biname ge, teepi cuta Peteru cama yepā pana walya mule jaawenanepesi, siige teeme pui walya mule te Banaba ne cuta joomlepi, walya gaabe cabu me yaacanepi.

¹⁴ Cane liba teebibine jāāpānemepene egā teepi lica Mijji Mene me toraca mule cabu yaacrajuge, cane piba Peteru ne jaajepene iyeta biname bime opo gaabe je egā, “Toraca,

maane Israela biname gäte, yepä maane nuuja gawe ätrunga biname bime mule cabu naanajenige, lica Israela biname bime mule cabu. Yoo, maane gone läyebingtute deedei äbitame nuuja gawe ätrunga biname cama, lui määme Israela biname lica gemi. Gone teebibine pepu giri jaacranimute Israela biname bime mule cabu lenajame!”

Biname, cina Conocäco Äbitena Yeesu ne Ätrunga name pi

¹⁵ Yoo, cine lui Israela biname gemi aplimla cabu ca, piijepu lica nuuja gawe cabu ca niija mule biname liijepu,

¹⁶ cine umle gemi egä biname te conocäco läbituge Acejiyame me opo gaabe je lica cotre wawena cabu ca, yepä tabe liba Yeesu Keriso ne jääntrunguge. Cine cuta piijepu Keriso Yeesu cabu itu jääntrungujisi naace täöpume cine conocäco äbitame Acejiyame me opo gaabe je ätrunga name pi, lica cotre wawena name pi. Ingle naace gyene nuuja te äblicäco birige Acejiyame me opo gaabe je conocäco äbita cotre wawena cabu ca.

¹⁷ Yoo siige, cine gaabe ne jepänujisi Acejiyame me opo gaabe je conocäco äbitame Yeesu Keriso cabu ätrunga miji pi lica cotre wawena name pi. Piba peei gaabe cabu cine liba jäänpanusi egä cine conocono gemi Israela biname bime cotre mule poto cidi me, cine nää piba miiji ge iicana egä, “Cime Yeesu ne ätrunga name pi cine conocono gemi?” Licarage!

¹⁸ Yepä, cane liba cääri labacitune pui cotre wawena gaabe cabu me, cane lui ne itu sebmajijine, cane piba lawabudnitune egä cane conocono biname gäne pui cotre mule täöpume.

¹⁹ Ingle naace gyene cotre mene te cebine nawabudnituge egä cotre wawena ca cane äblicäco Acejiyame me opo gaabe je conocäco äbita iyeteta ireclota päpäname. Siige, cane cotre miji pi budre gäne, cuta peei budre cabu ca ireclota gäne Acejiyame täöpume lenajame.

²⁰ Keriso liba baarge uli cabu budre äbituji, peei lui epu gyene egä cebine ten cama ituge budre wawena. Siige, page peei lui cane säne lica lui te ireclota, yepä Keriso te ireclota gyene cäme cabu. Piijepu ai kirece ireclota cabu cane lica cäme kokre cama nanajenige, yepä Keriso me kokre pisi nyene äme trupa cabu. Page cane Acejiyame me Bägrä Keriso ne jitrungenine cebine ätityerae ai gawecewe ireclota cabu, lui te cebine epu singi ge egä tabe teeme ireclota ecäruji cäme täöpume.

²¹ Yoo, cane Acejiyame me owecu mule ne papa me lica jaawenune cotre mule äcwetna ca, ingle biname te liba ibibi gyene conocäco äbitame Acejiyame me opo gaabe je cotre wawena cabu ca, piba Keriso me budre lui ingle cäco gyene.

3

Cotre Mule piijepu Ätrunga Mule

¹ Galatiya gawe biname weene buduma gemi! Luma cita ca gemi weeme buduma ngene atwanena? Cane weebibine cängena itu jijananiipene Yeesu Keriso me budre poto cidi me baarge uli cabu. Weene peei ne itu joomlepeye, irecu ca päpäna pana weene itu jäänäpepeye, siige pajecu ge weeme täöpume.

² Yoo, page cebine najepeye yepä gwidape poto cidi me. Ngena name pi Aceji Seemo te weeme yepäyepä trupa cabu labacitanepi? Nää, naace name pi labacitanepi, ingle weene cängena jaawenanepeye iyeta Israela biname bime cotre mene? Licarage! Yepä, tabe naace name pi labacitanepi weeme yepäyepä trupa cabu, ingle weene Miiji Mene itecijipi piijepu jääntrungepeye.

³ Weene lipulipu pepu buduma gemi? Aceji Seemo te weebibine icranipi kirece ireclota cabu me; page nää weene ngene jotwananininiye egä weene ibibi gemi weemerage kaakesea ca peei ireclota cabu cängena lenajame ngälugaabe oomlaname? Weene äblicäco gemi!

⁴ Weene ngene jitrimalenige egä Aceji Seemo te ituge ätityera weebibine iyeta weeme mäpu cabu ca. Nää, papa gyene peei ätityera? Weene nää page singi gemi ätrunga gaabe ne abmalame?

⁵ Nää, Acejiyame te Aceji Seemo ne weeme cabu me täätpepäjepi piijepu ciitaca mule bine weeme täöpume saboclomäjemepi, ingle naace popi weene Israela biname bime cotre bine jaawenemuye, coo ingle weene Miiji Mene itecijinuge piijepu jääntrunguye?

⁶ Abrahamo poto cidi me ngene jotwananineye, tabe lipu mule uja jewenemuji. Oogäräneji Mene te jicenige egä, “Abrahamo Acejiyame ne jitrungige, siige teeme ätrunga name pi Acejiyame teebine einige conocäco ca.”

⁷ Weene miiji opo awatna egä lui cina Acejiyame ne jääntrungusi, teepi Abrahamo me toraca kaakesaare gemi.

⁸ Oogäräneji Mene cabu ciige poto cidi me mene pisi nyene egä Acejiyame te gawe maramara biname bine ten cama cire conocäco jaawenemepi teeme ätrunga name pi. Yoo, pepu pana Miiji Mene pisi nyene Oogäräneji Mene cabu, Acejiyame luma Abrahamo

ne niinäce gaabe me jejuji egä, “Mämiji pi cane cire miiji jaawenemepene iyeta gawe maramara biname bine.”

⁹ Siige, Abrahamo Acejiyame ne jitrunguji, jepänuji miiji ne teeme bau ca. Pepu pana Acejiyame cuta miiji jaawenemuge iyeta biname bine lui cina teebine jäätrungusi, tabe Abrahamo ne lipu miiji jewenanuji.

¹⁰ Yoo, Oogäräneji Mene te jiićenige egä, “Laati te iyeta Israela biname bime cotre cängena lica jaawenemuge iyeta padare, Moose lui cotre bine soogäremuji, tabe niüya daremu cirege päpäna Acejiyame bau ca!” Peei name pi laati te walya jiićuge egä, “Cane iyeta cotre bine cängena jaawenemune, Acejiyame ngenecu miiji wawename căme täápume,” pui biname te mäpu daremu cabu ca lica birige asata, ingle biname te äblicăco iyeta cotre bine cängena wawenetnäja.

¹¹ Yoo, pajecu gyene egä nuuja te lica Acejiyame me opo gaabe je conocăco läbituge cotre wawena ca, ingle naace gyene Oogäräneji Mene te cuta jiićenige egä, “Pui biname me ireclota iyeteta gyene, Acejiyame lui ne conocăco me jaawenuge teeme ätruna cabu ca.”

¹² Yepä, cotre wawena lui mara ge ätrunga cabu ca; teepi gigri lica gegi, ingle Oogäräneji Mene te cotre poto cidi me apu jiićenige egä, “Laati te cängena jaawenemuge iyeta gwidape lui poto cidi me cotre mene te jiićenige, tabe peei cabu ca iyeteta ireclota cirege päpäna.” Yepä, biname cina äblicăco ge peei ne wawena.

¹³ Yoo, Oogäräneji Mene cuta nuuja poto ca jiićenige egä, “Lui biname ne uli cabu yaatecwamtusi budre me, tabe niiyarage daremu jääpänuge Acejiyame bau ca.” Siige, Keriso pepu pana mäpu daremu itu jepänuji mime täápume mibibine äsecerame daremu cabu ca lui te tädenige ingle naace gyene mine äblicăco cotre mene cängena wawena.

¹⁴ Keriso mibibine nisećräripi naace täápume egä lui miiji Acejiyame Abrahamo ne ecäruji, peei miiji ne cuta nuuja gawe biname lui Israela biname lica gemi, teepi te päpäname Keriso Yeesu cabu ca, cuta naace täápume Aceji Seemo mime yepäyepä trupa cabu abacitaname, Acejiyame lipu ituge jaji ceerame mime ätrunga cabu ca.

Lui Mene Acejiyame Ituge Jaji, Cotre Mene te Äblicăco Mara me Wawena

¹⁵ Căme ätrunga binamewale, cane etonärenine căme mene ne nuuja mule cabu: Neeneni biname liba mene ne conocăco yaacităsi, siige peei mule lui klaje pana gyene, piiyepu nuuja biname te äblicăco peei jajeji mene ne mara me wawena coo piiyepu äyebingta.

¹⁶ Yoo, Acejiyame te mene jejanuji Abrahamo ne cuta teeme yepä kaakesaare ne ciige miiji poto cidi me. Peei mene pisi nyene Oogäräneji Mene cabu apu egä, “yepä teeme kaakesaare,” lica gyene epu egä, “teeme kaakesaare iyeta,” piiyepu peei yepä kaakesaare lui Yeesu Keriso sine.

¹⁷ Cane naace me jiićenine egä Acejiyame Abrahamo ne mene jejuji, piba cuta jejuji egä, “Cane te ingwe ca conocăco cirege wawena.” Siige, fooa hanred teeti kămäge ingwe ca tabe biname bine Cotre Mene ecäremuji, Moose lui bine soogäremuji, yepä peei mene te äblicăco teeme niinäce jajeji mene ne mara me wawena. Siige, cotre mene te äblicăco pui mene ciige miiji poto cidi me äyebingta.

¹⁸ Yoo, biname te liba Acejiyame me ciige miiji ne jääpänuge cotre wawena name pi, tabe piba peei miiji ne lica jääpänuge Acejiyame me jajeji mene name pi. Yepä, Acejiyame peei ciige miiji Abrahamo ne ecäruji naace täápume tabe teebine mene ituge jaji pepu wawename.

¹⁹ Yoo, piba ngena tääpu myene peei Cotre Mene? Abrahamo me padare ingwe ca Acejiyame Cotre Mene Israela biname bine ecäremuji teebibine umle wawename egä teeme niüya mule lui toraca conocono gemi. Acejiyame cuta ngälugaabe ne ecituji Israela biname cina Cotre Mene cabu lenajame, siige peei ngälugaabe lui Abrahamo me yepä kaakesaare Keriso te liba atyaramta, lui ne tabe peei mene jejuji ciige miiji poto cidi me. Yoo, Acejiyame Cotre Mene lica conocăco gaabe ca ecäremuji biname bine, yepä teeme mename seemo bine ecäremuji, piba mename seemo cina Moose ne ecärujisi, piiyepu Moose lui menameyame ge, tabe iyeta Israela biname bine ecäremuji.

²⁰ Yoo, menameyame biname me kaakesea pisi nyene liba neeneni poto biname cina singi ätiyera täápume, yepä jajeji mene poto cidi me, Acejiyame taatu ge, tabe singi lica ätiyera biname, yepä tabe mene Abrahamo ne conocăco jejuji.

Acejiyame me Cotre Mene Ngeno Myene

²¹ Cotre Mene te nää jisădenige Acejiyame me jajeji mene bine? Eewe, licarage ge, ingle cotre mene liba ibibi gyene iyeteta ireclota ceerame, piba cotre gaabe ca biname cina conocăco läbitininusi Acejiyame me opo gaabe je,

²² yepä cotre mene te jiićenige egä, “Niüya mule me kokre te joomlenemige iyeta ai gawecewe biname bine,” peei name pi Acejiyame Abrahamo ne mene jejuji teeme ätiyera ceerame pui biname bine lui cina Acejiyame ne jäätrungusi. Page lui cina Yeesu Keriso ne

jitrungenisi, tabe teebibine itityärenenemige, ingle Acejiyame te singi gyene toraca ireclota ceerame biname bine teeme ätrunga name pi.

²³ Acejiyame me Cotre Mene, Moose lui soogäruji, peei te äbituji awamuta biname pana me, lui te biname bine joomlemuge ngälu ätrunga padare te tatyaramtepi. Siige, biname cina piba Acejiyame bau ca umle läbitipesi Yeesu Keriso poto cidi me teebine ätrungame.

²⁴ Yoo, Cotre Mene te epu pana gyene ire atwi biname liiyepu mime tääpume mibibine conocäco gaabe cabu waadename ngälu Keriso te tatyaramtepi, naace tääpume mine teebine ätrungame mibibine conocäco me wawename Acejiyame me opo gaabe je.

²⁵ Siige, ai padare cabu biname cina miiji Yeesu ne ätrungame, ingle itu lapirepi Cotre Mene me ire atwi padare te.

²⁶ Weene Keriso Yeesu ne jäätrunguye, peei name pi weene iyeta Acejiyame me bägräwale gemi.

²⁷ Weebibine niye ca itu jicisäjipesi Yeesu me ngii cabu teta cama yepä äbitame piyepu teeme pana miiji mule bine waadename.

²⁸ Yoo, mime Yeesu cama yepä äbita name pi Israela biname piyepu nuuja gawe biname teepi mara lica gemi; cuta lui bine jaaletnemusi kaakesea cabu lenajame piyepu lui cina äsecräreji teeme singi gaabe cabu otnetnejame, teepi mara lica gemi; cuta rooriye piyepu magebi teepi mara lica gemi, ingle mine iyeta yepä gemi Keriso Yeesu cama yepä äbita miiji pi.

²⁹ Mine liba Keriso me binamewale gemi, mine piba cuta Abrahamo me kaakesaare gemi, siige mine cirege päpäna Acejiyame ngena tääpume mene ituge jaji ceerame.

4

¹ Cane cerämu jicenenemine mine lui cina Acejiyame me bägrä gemi mime poto cidi me. Agesa ngene ca agli mene. Imäbägrä lui te teeme babe me gawe piyepu gwidape bine cirege waadana, tabe liba bägrä yaanajuge tabe papa kaakesea biname pana birige, äblicäco tabe mene iicana biname bime abasecretna cabu je; ngänu gyene tabe yageyame gwidape tääpume, yepä tabe mene äblicäco iicana, ingle tabe lui bägrä gyene.

² Cuta piyepu tabe liba bägrä gyene, nuuja biname cina piba ire jaatwusi teebine, piyepu teeme gawe piyepu gwidape cina nuuja biname bime ime cabu yaacrajuge ngälu babe te lui padare ne ituge acita, peei te atyaramtuge.

³ Mine peei bägrä pana ituge lenaja nuuja biname bime singi wawename, ingle naace gyene cotre pana mule cina mibibine noomlinujisi. Mime poto cina lui Israela biname bime cotre mule cabu ninajininuge; cuta piyepu mime nuuja poto cina lui uuje bime mule cabu ninajininuge.

⁴ Yepä, Acejiyame me padare te liba tatyaramtuji, tabe teemerage Bägrä ne tityepuji gawecewe me. Tabe magebi cabu ca eplimluji, Israela biname bime cotre ngalebora senajenäjumi.

⁵ Yeesu Keriso täduji äsecrera gaabe ne wawename biname bime tääpume, lui bine cotre mule te tewamutemäjemumi, naace tääpume mine Acejiyame me jäjäcräneji bägrä me läbitipago.

⁶ Yoo, Acejiyame teeme Bägrä me Seemo ne ituge ätyepa mime yepäyepä trupa cabu, mibibine umle wawename egä mine teeme bägrä gemi. Siige, Aceji Seemo te mibibine niwenininige Acejiyame ne awejename egä, "Cime Babe."

⁷ Yoo siige, page cotre mene te weebibine lica iwadininige. Page weene lui Acejiyame me bägräwale gemi. Acejiyame te weebibine iyeta gwidape cirege ceera, tabe lui poto cidi me Abrahamo ne jejuji, ingle weene iyeta lui Acejiyame me bägräwale gemi.

Paulo Ngenecu Mäpu Ge Galatiya Ätrunga Biname bime tääpume

⁸ Uja weene liba camuge Acejiyame poto cidi me umle äbita, weene piba uuje bime singi bine jaawenenanemepewe, lui cina toraca ire atwi biname lica gemi.

⁹ Yepä, page weene umle gemi Acejiyame. Yoo cäro, cane miiji iicana aipu egä, page Acejiyame te umle gyene weene. Siige, weene ngeno memi singi atatrongärame cuta pui uuje bime singi cääri wawenecame, lui cina kokre cäco piyepu äblicäco weebibine toraca ireclota ceera? Weene ngeno memi singi cääri cuta teeme ire atwi cabu me äbäcname teeme singi piyepu cotre bine wawenecame?

¹⁰ Cuta page weene poto bimü bine yaacranemuye weeme iiwäreja mule wawenecame conocäco äbitame, cuta piyepu poto trii mule teeme mabye coo kämäge padare cabu jaawenemuye. Weene cuta poto kämäge cabu pui mule bine babo jaawenemuye.

¹¹ Cäme ngene atwanena lui baborage mäpu gyene weeme tääpume! Ingle naace gyene cane singi licarage gäne cäme kaakesea te weeme cabu papa me äbitame.

¹² Yoo, căme ätrunga binamewale, cane kokre cama weebibine jijananine egä weene mene jitranepeye iyeta maramara cotre mule bine abmaläcemame, cane lipu Israela biname bime cotre mule ituge abmala weerne täápume, ingle weene äblicäco cotre wawena ca conocäco me äbita. Yoo, weene nuuja niya ne lica căme täápume itu jaawenepeye, niinäce padare cabu ca ngälu page.

¹³ Weene umle gemi, peei lui căme pita name pi cane uja weene cama nanajepi, puga Mijji Mene weebibine jijanapene.

¹⁴ Căme pita te weebibine mäpu icäripi, yepä weene lica cebine kaake ca näcelyärepeye căme pita bleela cabu; weene lica căme mene nägyepeye. Yepä, weene cebine cängenarage ire natwepeye, epu pana weene cabucewe mename seemo ne liiyepu mijjirage ire atwi; coo epu pana Yeesu Keriso ne lipu ire atwi, tabe liba weeme bau me otni je.

¹⁵ Pui padare cabu weene gege ge căme mene ätecijame. Nää, ngena te täbitumi weeme ireclota ne mara me wawename? Cane weeme owecu poto cidi me jücenine egä, pui padare cabu weene lica nuuja gwidape ne jaainuye lui căme mijji täápume. Weene cuta weeme irecu cebine näcäruye, weene liba ibibi ge ceerame.

¹⁶ Yepä, page weeme ngene atwanena căme täápume pama mara gyene. Cane nää pama cubuyame pana täbitumene weeme täápume, ingle cane Acejiyame me toraca mene weebibine conocäco itu jijanapene?

¹⁷ Pui biname lui cina singi gemi toraca mene mara me wawename, teepi cuta babo singi gemi weebibine teeme biname täápume wawename, yepä teeme mara ingle pisi nyene lui lica weeme mijji täápume. Teepi weebibine opire mara cewe me jiweninini căme bau ca, ingle teepi singi gemi weene cebine abmalame puma cita ca weene babo singi äbitame teeme mene ätecijame.

¹⁸ Yoo, weeme babo singi poto cidi me, peei mule cabu nuuja niya lica gyene, liba mijji ingle pisi nyene peei singi täápume. Pepu singi mijji ge iyeteta lenajame, peei name pi gone abmala cane liba weene cama lica ge.

¹⁹ Cămerage bägräwale, mage te bägrä aplimla pita ne lipu jääpänuge, pepu pana pita cama cane cääri asicnantenine weeme täápume, ngälu weeme mule te toraca conocäco Keriso pana läbituge.

²⁰ Căme toraca singi gyene page weene cama lenajame; cane pama piba umle gäne lipulipu mene weebibine jajime, ingle cane ngenecu mäpu gäne weeme poto cidi me.

Mine Hagara Saara naabibime Ireclota cabu ca Etonärenisi Toraca Mene ne

²¹ Căme ätemla pisi nyene weeme täápume lui cina singi gemi Israela biname bime cotre mule cabu lenajame: Nää, Acejiyame me Cotre Mene Moose lui bine soogäremuji, weene pama umle gemi peei te lipu jijeninige?

²² Ai Cotre Mene ngalebora mine mene ecnenenemisi Abrahamo piyepu teeme neeneni imäbägrä poto cidi me. Teeme yepä imäbägrä aplimläneji ge ngulebägrä cabu ca. Pui ngulebägrä ngii Hagara ne teepi ituge aletna Abrahamo me coga me kaakesea wawename. Nuuja imäbägrä lui igane ge, tabe Abrahamo me coga Saara cabu ca aplimläneji ge.

²³ Yoo, Abrahamo me yepä imäbägrä ngii Ismaela, lui pui aletnäneji ngulebägrä cabu ca eplimlujji, teeme aplimla lui mara lica ge poto bägrä bime aplimla cabu ca, yepä Abrahamo Isacako ne jepänige teeme bägrä căco coga Saara cabu ca, ingle Acejiyame uja mene itu jejuji bägrä teebine ceerame.

²⁴ Lipu itu äbituji Abrahamo me neeneni imäbägrä bime täápume, peei mule cabu ca mine neeneni jajeji mene bine opo aawatnenisi. Cotre mene piyepu lui mene Acejiyame Abrahamo ne jejuji lui epu pana gegi pui neeneni imäbägrä bime mage liiyepu. Yepä mage, Hagara tage, aletnäneji ge kaakesea cabu iyeteta lenajame, peei name pi biname bime cotre te teebine teeme bägrä cama joomluge. Hagara piyepu teeme bägrä bime ireclota cabu ca mine opo ewatnenisi pui cotre mene Acejiyame te Sinai podo cabu je secäruji Moose ne, biname bine waadename.

²⁵ Yoo, Hagara piyepu teeme bägrä cabu ca mine opo ewatnenisi mule lui te täbituji Sinai podo cabu je, Sinai podo lui Arabiya gawe cabu sine. Piyepu mine cuta opo ewatnenisi Yerusalema ne piyepu lui cina page icrajnige pui babo cewe cabu. Page Yerusalema cewe biname lui epu pana gemi Hagara me bägrä liiyepu, ingle cotre mene te teebibine joomlemuge.

²⁶ Yepä, Acejiyame Abrahamo ne lui mene jejuji, tabe peei mene cuta jejuji biname bime täápume lui cina cabucewe je kirece Yerusalema cabu cirege lenaja. Biname cina puma lica icrajnige maramara cotre mene ngalebora, piyepu teepi äsecräreji icrajnige iyeta niyaniya mule cabu ca. Cabucewe Yerusalema lui mime täápume mage pana gwene, mine iyeta lui cina Yeesu ne jitrungenisi.

²⁷ Pisi nyene mene Oogäräneji Mene cabu pui neeneni Yerusalem poto cidi me egä teepi lui neeneni magebi pana gegi. Yepä magebi lui Cabucewe Yerusalem pana gwene, lui te ätrunga biname bime mage. Niinäce tabe bägrä cäco onajige, yepä ingwe ca teeme bägrä bucurage gemi pui nuuja magebi cabu ca, lui te ai gawecewe Yerusalem pana gwene. Agesa peei Oogäräneji Mene:

“Bägrä cäco magebi, lui te lica bägrä aplimla pita itu jepänuji,
maane müji gege, uupera cama naanajuge!

Ingle maane lui ne abmaläneji gäte,
mäame bägrä bucurage cirege äbita pui nuuja magebi cabu ca,
lui ne teeme rooriye te lica twaabmaluge.”

²⁸ Yoo, cäme ätrunga binamewale, mine Acejiyame me bägrä gemi, ingle Acejiyame mene itu jejuji pepu cirege äbita. Mine epu pana Isacako liiyepu, ingle naace gyene Acejiyame Abrahamo ne mene itu jejuji egä pui bägrä te pagege äbita.

²⁹ Yoo, pui sasa padare cabu Abrahamo me bägrä lui Hagara cabu ca aplimluji, teeme ngii Ismaela, tabe niija jaawenuge Isacako ne lui me aplimla poto cidi me Aceji Seemo mene ituge jaji. Cuta page piyepu, Israela cotre cabu lui biname cina, teepi niija jaawenemusi biname bine lui cina Acejiyame me mene ne jäätrungusi piyepu lica Israela biname bime cotre mene cabu icrajenige.

³⁰ Yepä, Oogäräneji Mene te lipu jiičenige? Peei te jiičenige apu egä: “Pui aletnäneji kaakesea magebi ne jutypei teeme bägrä cama, ingle naace gyene aletnäneji magebi me bägrä tabe lica teeme babe me miijimiji gwidape pa yaawademepi; yepä pui bägrä lui babe me cogarage cabu ca ge, tabe te iyeta pa yaawademepi.”

³¹ Yoo, cäme ätrunga binamewale, mine lica epu pana gemi aletnäneji kaakesea magebi me bägrä liiyepu, ingle cotre mene te mibibine lica noomlenininige, yepä mine Saara me bägrä pana gemi, ingle mine Acejiyame me jajeji mene jäätrungusi mibibine äsecrera me.

5

Keriso te Mibibine Itu Nisecräripi

¹ Keriso te mibibine itu nisecräripi, siige tabe singi mine äsecräreji lenajame. Weene kokre cama jiclajutipi! Gone cotre mule ne cuta cääri yaacatu ye peei cabu lenajame!

² Ai mene iteciñeje! Cane Paulo te weebibine jijenininine egä weene liba Israela biname bime cewecu yaawademuye tääpe iirputa ca, ingle naace popi weene pepu singi gemi conocäco äbitame Acejiyame me opo gaabe je, weene peei mule ca Keriso me ätiyera ne jäägyuye.

³ Yoo, cane cuta cääri jijenininine egä nuuja biname te liba Israela biname bime cewecu yaacatuge tääpe iirputa ca, tabe pepu pi Israela biname bime cotre mule cabu labacituge, siige tabe piba müji iyeta cotre bine cängena jaawenemuge.

⁴ Weene liba singi Acejiyame me opo gaabe je conocäco äbitame weeme cotre waweneca cabu ca, weene piba weemämu läyebblinginuye Keriso bau ca cuta piyepu Acejiyame me müji cabu ca.

⁵ Yepä, cine ätrunga ca Acejiyame ne jewagrijenisi teeme Seemo ca cibibine teeme opo gaabe je conocäco me cire wawename, lui tääpume cine ngene atwanena bine icranenemisi.

⁶ Ingle mine liba Yeesu Keriso cama yepä me läbitinago, piba biname lui me tääpe pui cewecu cama ge piyepu biname lui me tääpe pui cewecu cäco, teepi nuuja mara lica gemi, yepä Yeesu ne ätrunga lui teeme tääpume babo gwidape gyene, piyepu ai ätrunga te laboclomtuge nuuja biname ne owecu wawena cabu ca.

⁷ Pui niinäce padare cabu weeme ireclota müjirage ge, weene Yeesu ne cängena jäätrungepeye. Weebibine laati te tiibinige toraca gaabe cabu otinime? Tabe lipulipu ngene atwanena bine biyebngemige toraca gaabe cabu ca?

⁸ Licarage Acejiyame pa jiihipi, ingle tabe te weebibine ituge ala asogleca teeme biname me äbitame.

⁹ Yoo, mene pisi nyene egä: “Matikolä uutneca gwidape taatu te baborage buluduu ne juutnecuge.” Walya mene pepu pana gyene. Matikäli conocono te wata baborage me läbituge.

¹⁰ Yepä, mine yepä me ituge äbita mime Yageyame Yeesu Keriso cama, peei name pi cane umle gäne egä weene lica mara ngene atwanena ne pa pecatepeye. Acejiyame mäpu daremu pagege ceera pui biname ne lui te weebibine walya ngene atwanena itu nicäripi, ngänu gyene tabe laasi nyene.

¹¹ Cäme ätrunga binamewale, cäme poto cidi me poto cina walya jiičenisi egä, “Paulo te biname bine yaabiberäjemuge Israela biname bime cewecu ne teeme tääpe iirputa ca

acatename.” Peei mene toraca lica gyene. Liba toraca ge, ngena täápume biname cina singi gemi cebine jäje niiya cabu acitename? Yepä, poto Israela biname cina cebine niiya nawenusi, ingle teepi singi lica ai mene ätecijame egä Keriso te budre äbituji baarge uli cabu mibibine Acejiyame me opo gaabe je conocäco wawenname tääpe cewecu cäco.

¹² Pui biname lui cina weeme ngene atwanena maramara jiwenininisi, cane singi gäne teepi teeme tääpe ne ablitame!

¹³ Cäme ätrunga binamewale, Acejiyame weebibine tisoglicipi niiya cabu ca äsime, siige weene äsecräreji gemi. Yepä, gone weene äsecrera name pi apu jinginuge egä miiji gyene weeme tääpe me singisingi cina weebibine waadena. Pätä Acejiyame me singi cabu ca weeme nuuja bine itityeräjemey!

¹⁴ Yoo, Moose lui cotre bine soogäremuji, iyeta peei cotre piti nemi yepä taatu cotre ngalebora. Agesa peei cotre: “Maane miiji biname bime täápume singi lenaja, maane lipu mäame täápume singi birige.”

¹⁵ Yepä, weene liba weemeweme jääceluye piyepu labajininuye, piba ire! Weene weeme binamewale cama piba pagege iyeta weene papiripeye.

Aceji Seemo cama Ireclota

¹⁶ Cane ngena täápume jicenne age sena: Aceji Seemo te weebibine iwecetnärininige; teeme singi ne weene jeweneye, piyepu gone weeme tääpe me singisingi bine jaawenemuy!

¹⁷ Ingle naace gyene biname bime tääpe me singisingi te jääsäduge Aceji Seemo me singi ne, piyepu Aceji Seemo me singi te biname bime tääpe singisingi bine jääsädemuge. Peei neenen singi cina cubuyame pana gegi, peei name pi mine äblicäco mime singi waweneca.

¹⁸ Yoo, Aceji Seemo liba weebibine iwecetnäjininunge, piba cotre mule te weebibine lica birige waadena.

¹⁹ Yoo, mine tääpe me singisingi bine opo yaawatnemusi apu mule ca: Biname cina sargi ero mule bine jaawenemusi; biname cina jugijugi ngene atwanena piyepu mene cama yaacrajuge; teemeteme singi laglanininusi.

²⁰ Biname cina uuje bine yiwäräjemusi, cuta piyepu maramara angodnera piyepu mowä mule bine jaawenemusi. Biname cina cubuyame me läbitininusi, labajininusi; teepi nuuja biname bime gwidape täápume ire patre yaaglusi, piyepu claaberge te teebibine joomlemuge. Teepi nuuja biname bime täápume lica laatadrongäjininusi, yepä teeme miiji taatu ne jäärngusi. Teepi maramara tomi läbitininusi, piba läingäjinusi.

²¹ Nuuja biname te liba miiji jääpänuge, peei te teebibine claabe me jaawenemuge. Teepi sice buduma yaacrajuge, piba lui niiya mule täápume singi, teepi peei bine oräre jaawenemusi. Teepi iyeta ai bine jaawenemusi cuta poto cerämu. Cane page weebibine umle jiwenininine, cane lipu niinäce itu jijipene egä: Lui cina ai mule bine jaawenemusi, Acejiyame te lica teebibine cire yaawademepi.

²² Yepä, Aceji Seemo te biname bine jaawenemuge teepi singi cama, gege cama, piyepu poode cama lenajame. Tabe biname bine jaawenemuge mäpu cabu bojäcu lenajame, teeme nuuja biname ne owecu cama ätityerame, piyepu conocäco piyepu toraca mule cama lenajame.

²³ Tabe cuta biname bine jaawenemuge teeme nuuja ne niinäce gaabe me acraname; cuta piyepu teemämu awesongärame. Yoo, biname lui cina pepu jaawenemusi, nuuja cotre te lica teebibine joomlemuge.

²⁴ Laati bemi Yeesu Keriso me biname, teepi teeme tääpe me niyarage singisingi piyepu niyarage ngene atwanena bine Keriso me baarge uli cabu ituge abmaleca.

²⁵ Yoo, Aceji Seemo mibibine toraca ireclota nicärininuji, peei name pi mine miiji mime ai ireclota ne teeme ime cabu acitame iyeta teeme singi wawename.

²⁶ Mine gone mimämu lawepyeräjinago, gone mime nuuja ne claabe me jaawenusi, piyepu gone mime nuuja biname ne ire patre yaaglusi, tabe liba miiji ne jääpänuge.

6

Ätrunga Biname bime Miiji Mule

¹ Cäme ätrunga binamewale, lui bime trupa cabu Aceji Seemo te enajenige, weene nuuja biname ne conocono mule cabu liba jääpänuye, teebine owecu cama umle mene jaajanuye. Piyepu weene ire! Weene liba cängena lica gemi, weene cuta singi ne pa jepänepewe conocono mule ne wawename.

² Weeme nuuja te liba mäpu jääpänuge, teebine yäätityäruye, piyepu weene pepu jaawenuye Keriso me cotre ne.

³ Yoo, liba biname te apu jaangenuge egä tabe baborage gyene, yepä tabe lica, tabe teemämu langletnäjuge.

⁴ Iyeta yepäyepä biname cina miiji teemämu ireclota mule bine jaatranemusi egä miiji gemi, coo niija gemi. Liba miiji gemi, tabe piba ngenecu miiji läbituge. Yepä, tabe miiji lica gyene nuuja biname me ireclota mule poto cidi me iicana egä: “Teeme niija gyene, căme miiji gyene.”

⁵ Ingle naace gyene iyeta biname bime ireclota cabu poto mäpu piti nemi.

⁶ Weene miiji deedei ecäremepeye piiyepu nuuja miijimiji gwidape pui biname bine lui cina weebibine ibiberäjininusi Acejiyame me Mene poto cidi me.

⁷ Buduma ngene atwana gone, inge weene äblicăco Acejiyame ne angletneja. Biname te lipu gije bine yäätémuge, tabe pepu kuu täápume ire yaacituge.

⁸ Biname me ireclota lui epu pana ge calwacupi gweeti liiyepu. Tabe teeme tääpe me singisingi bine gije pana liba yäätémuge, tabe peei cabu ca kuu cirege päpäna, lui teeme budre gyene. Nuuja calwacupi biname te teeme miiji mule bine gije pana yäätémuge Aceji Seemo me ätityera ca. Tabe cuta kuu cirege päpäna Aceji Seemo bau ca. Peei lui iyeteta ireclota gyene.

⁹ Yoo, mine gone gloose me läbitinago miiji mule wawename, inge naace gyene padare te cire tädepi mine pui cabu ca miiji kuu päpäname, mine liba wata lica birige äyebenga.

¹⁰ Peei name pi iyeta mime padare liba piti nemi, mine iyeta biname bine miiji jaawenemusi, cuta toraca teebibine lui mime ätrunga binamewale gemi.

Paulo Teeme Leta ne Umla Mene ca Ermuji

¹¹ Weene ire căme oogăra lipu baborage gyene, cane lui bine cămerage ime ca yoogărenine.

¹² Yoo, pui biname lui cina weebibine giri jicranininisi tääpe cabu cewecu ne acatename, teepi singi gemi biname bine ngenecu miiji me wawename teeme täápume, inge teepi wălu gemi egä pama mäpu ne jăăpănusi poto biname bime bau ca, liba Israela biname bime mule yaabmalusi piiyepu mene jaajanemusi egä cewecu ngănu gyene, inge Keriso te budre äbituji baarge uli cabu mime niija mule bine äyebengame.

¹³ Lui cina puu cewecu itu ewademujisi tääpe iirputa ca, teepi lica Cotre Mene bine jaawenemusi. Teepi singi gemi weene pui yepä mule taatu wawename, piba teepi miiji gemi teemämu awepyerăja egä, “Cine te Israela biname pana me tewenimumesi teebibine.”

¹⁴ Yepä, cane te singi lica pepu awepyerăja täápume. Cane singi găne mime Yageyame Yeesu Keriso me ngii awepentame, tabe lipu budre äbituji baarge uli cabu mime täápume. Iyeta căme ngene atwanena lui teeme cabu, peei name pi ai gawecewe me mule piiyepu gwidape căme täápume papa gemi. Epu pana budre biname liiyepu lui nuuja singi lica birige gawecewe gwidape täápume, peei mule piiyepu gwidape baborage lica gemi căme täápume.

¹⁵ Yoo, lui biname cina tääpe cabu cewecu ne ituge acata, coo lui cina lica ituge acata, teepi nuuja mara lica gemi, inge peei cewecu lui babo gwidape lica birige. Agesa babo gwidape: Biname te kirece ireclota ne ätrunga ca yaacatuge Acejiyame bau ca.

¹⁶ Laati te yăăcwetnuge ai gaabe ne teeme ireclota cabu, poode piiyepu owecu teeme cabu lenaja. Cane pepu ewejanenine iyeta Acejiyame me biname bime täápume. Teepi temi Acejiyame me toraca Israela biname.

¹⁷ Yoo siige, epu pana aletnăneji kaakesea biname teeme yageyame me cewecu lipu pisi nyene teeme tääpe cabu, cuta căme tääpe cabu dupe ngabu piti nemi, inge biname cina cebine naglumesi, cane liba Miiji Mene căme Yageyame Yeesu poto cidi me jaajanemune. Peei name pi ingwe ca gone nuuja biname te cebine căări mäpu năcăruge!

¹⁸ Căme ätrunga binamewale, mime Yageyame Yeesu Keriso me miiji te weeme seemo bime cabu lenajame. Yoo siige, pepu yaanajepi!

Cane ngii Paulo. Siige căme mene ngălu peese.

PAULO ME LETA EPESO ÄTRUNGA BINAME BIME BAU ME

¹ Cane, Paulo, Yeesu Keriso me ätyepäneji biname gäne Acejiyame me singi miji pi. Cane yoogärenine Acejiyame me binamewale bime bau me Epeso cewe je, lui cina toraca ngenecu cama iyeta padare cabu Keriso Yeesu cabu inajininuge.

² Acejiyame mime Babe piyepu Yageyame Yeesu Keriso, teeme miiji te lenajame weeme cabu piyepu teepi poode ceerame weebibine.

Keriso Mime Seemo bine Miiji Jewenenemige

³ Mine eso yääcäranesi Acejiyame ne, lui gyene mime Yageyame Yeesu Keriso me Acejiyame piyepu Babe. Ingle naace popi mine Keriso cama yepä gemi, tabe ituge mibibine miiji wawena mime seemo ireclota cabu iyeta maramara mule ca cabucewe ca lui cina totneninisi.

⁴ Keriso cama yepä äbita miji pi Acejiyame te agedna me niinäce gaabe ca uja itu ngene ca niglinuji mibibine teeme binamewale me äbitame, naace name pi egä mine teeme täापume mara me äbitame piyepu teeme opo gaabe je conocäco lenajame. Ingle Acejiyame babo singi ge mime täापume,

⁵ peei name pi tabe ngene uja itu jotwananuji mibibine äjäcrame teeme bägrä täापume lenajame ingle Yeesu Keriso me kaakesea miji pi. Ai lui teeme singi ge, teebine ngenecu miiji me jewenuji.

⁶ Siige mine Acejiyame ne yaawepyeräjesi teeme babo owecu name pi, tabe lipu teeme ngenecurage Bägrä papa itu nicärininuji, daremu cäco.

⁷ Keriso me uudi te lipu itu tapiruji, mime niija mule daremu ne ecatuji, siige Acejiyame te mime niija mule niisibrecäjimuge. Lipu baborage gyene Acejiyame me owecu,

⁸ tabe lui ne ituge aboclomäja mime täापume.

Ingle Acejiyame babo umle gyene iyeta mule poto cidi me,

⁹ tabe jewenuji tabe ngena täापume ngene itu jotwanuji wawename. Tabe teeme ogä ngene atwana ne seboclomtuji cime täापume, tabe lui poto cidi me ngene uja jotwanuji toraca me wawename Keriso cabu ca.

¹⁰ Acejiyame me pui ogä ngene atwana, tabe lui ne toraca me cire jaawenepi toracarage padare cabu, apu gyene egä tabe lui gwidape bine ituge waweneträja cabucewe piyepu gawecewe je, tabe pui bine iyeta cire jaawenemepi yepä me äbitame piyepu Keriso teeme mope biname me lenajame.

¹¹ Acejiyame lui te iyeta gwidape bine teeme ngene atwanena piyepu singi ibi jaawenimuge, tabe te mibibine nijäcrininuji teeme binamewale täापume lenajame ingle Keriso cama yepä äbita name pi. Tabe ujarage ngene jotwanuji apu wawename, ingle ai lui teeme singi ge.

¹² Peei name pi cine lui cina niinäce biname gemi ngene atwanena singi Keriso cabu me acraname, cine Acejiyame ne yaawepyeräjesi, egä tabe lipu miijirage gyene.

¹³ Cuta weene piyepu liba itecijinuji toraca mene, peei Miiji Mene lui te ireclota ne secanuji weeme bau me, weene piba ätrunga ne ecitujiye Keriso bau me. Piba Acejiyame ecituji Aceji Seemo ne weeme cabu me cewecu täापume, egä weene teemi nemi, tabe lipu ituge jaji wawename.

¹⁴ Ingle Aceji Seemo pisi nyene mime cabu, peei name pi mine umle gemi egä mine cirege päpäna, Acejiyame ngena ituge jaji teeme bägräwale bine ceerame. Ai te niwabininige, egä Acejiyame te iyeta mäpu cabu ca kälyä cirege wawena pui biname bine, lui cina teemi nemi. Mine teebine yaawepyeräjesi teeme miiji name pi!

Irecu Ätumuta Mene Acnema Biname bime täापume

¹⁵ Cane liba nätecijepi, egä weene Yageyame Yeesu ne jitrunge-niye, cuta piyepu weene singi gemi iyeta Acejiyame me binamewale bime täापume,

¹⁶ cane lica ituge ätecita Acejiyame ne eso ceeraname weeme poto cidi me. Cäme irecu ätumuta ngalebora cane weeme poto cidi me jaajanamemune,

¹⁷ cane yäätinärune mime Yageyame Yeesu Keriso me Acejiyame, jamyacu apaclyera cama Babe ne tabe weebibine eei Seemo ceerame, lui Seemo te weebibine umle biname me jiwenininuge piyepu Acejiyame ne weeme bau me yaaboclomtuge, siige weene piba umle läbitininuye tabe.

¹⁸ Cane irecu lätumutanune, egä Acejiyame te weeme mopemuli apatname teeme apaclyera ne päpäna täापume, piba weene umle läbitininuye, egä ngena cabu me tabe weebibine ituge ala asogleca weene weeme ngene atwanena singi bine acraname; piyepu cuta lipu

bucurage miijimiji mule poto cidi me tabe ituge teeme bägräwale bine jaji teepi teeme bau ca päpäname;

¹⁹ piiyepu cuta lipu baborage gyene teeme kokre, lui te kaakesea äbitenige mine ätrunga biname bime cabu. Ai lui pui yepä baborage kokre gyene,

²⁰ lui ca Acejiyame te Keriso ne itu erpinantuji budre cabu ca, siige ecanuji cabucewe me, ecituji teeme camu poto cidi me.

²¹ Tabe caburage gyene iyeta seemo bime bau ca, cabu je lui cina mopeyame gemi piiyepu kokreyame gemi. Teeme ngii baborage gyene iyeta ngii cabu ca ai gawecewe cabu je. Cuta ciige padare cabu teeme ngii te baborage cire saanajepi.

²² Acejiyame te iyeta gwidape bine teeme ernge gawe me ituge acrana, piiyepu tabe ätrunga biname bine Keriso itu yääcäremepi tabe teeme mope biname me lenajame.

²³ Ätrunga biname lui Yeesu Keriso me tääpe gemi. Teepi te Keriso ne camlecamle me jewenenisi. Cuta tabe te iyeta gwidape bine iyeta poto ta camlecamle me jewenenemige.

2

Budre cabu ca Ireclota me

¹ Padare puga ge, weene liba seemo ireclota cabu budre ge inge weeme niiyaniya mule piiyepu ätecija cäco mule name pi.

² Pui padare cabu weene icwetnimujiye ai gawecewe me niiyaniya mule bine; weene jitecijujiye laasi nyene mopeyame niiyaniya seemo bime täápume, lui cina buuwemope cabu otneninisi. Tabe eei seemo gyene, page lui te ewadenemige Acejiyame ne lui biname cina lica birige ätecija.

³ Niinäce mine iyeta pepu ituge lenaja, ätecija cäco. Mine biname bime singisingi mule bine icwetnimujisi. Mine jewenimujisi mime tääpe cina piiyepu ngene atwanena cina ngena täápume singi. Peei name pi Acejiyame me claabe te pui padare cabu piba enajuji mime täápume, eei biname bime täápume lipu page enajenige, lui cina camu binamerage bime singisingi mule bine icwetnenemisi.

⁴ Yepä Acejiyame epu baborage owecu ge piiyepu singi ge mime täápume,

⁵ egä mibibine, lui cina mime niya mule cabu budre ge, tabe ireclota me niweninuji Keriso me cabu ca. Peei lui teeme owecu name pi egä Acejiyame te weebibine ituge äsecrera niya cabu ca.

⁶ Inge mine Keriso Yeesu cama yepä gemi, pui name pi Acejiyame te mibibine ituge ten cama budre cabu ca arpineräja naace täápume mine ten cama iyeta gwidape bine waadename cabucewe je.

⁷ Acejiyame ai ne naace täápume ituge wawena iyeta biname cina iyeta padare cabu päpäname teeme babo miijirage ätityera ne, tabe lipu teeme singi ne seboclomtuji mime täápume Keriso Yeesu cabu ca.

⁸ Inge Acejiyame babo singi gyene ätityerame, tabe weebibine niya cabu ca itu isecrärinuji inge weeme ätrunga name pi. Ai lui wemiji wawenäneji lica gyene, yepä Acejiyame me owecu gyene weeme täápume.

⁹ Ai lui weeme kaakesea daremu lica gyene, peei name pi nuuja te äblicäco teemämu awepyeräja.

¹⁰ Acejiyame te niweninujuji page mine lipu gemi. Tabe itu niweninujuji mine Keriso Yeesu cama lenajame siige miijirage kaakesea wawename, tabe lui kaakesea ituge amaceträja mime täápume.

Keriso me Binamewale Ten cama Yepä Gemi

¹¹ Weene Israela biname bime cabu ca ärngecäneji lica gemi, piiyepu Israela biname, lui cina lainininusi tääpe iirputäneji biname ca, * teepi weebibine iyinininusi tääpe iirputa cäco biname ca. Weene gone ngene jitrimalinuge, weene lipu biname ge niinäce.

¹² Weene cude padare ge Keriso bau ca, piiyepu weene cude padare ge Israela biname bime bau ca, Acejiyame lui bine jejäcrimuji teeme biname me. Jajeji mene Acejiyame lui ecäremuji Israela biname bine, pui lui weeme täápume lica ge. Weene Acejiyame umle cäco inajininuji, piiyepu weene nuuja ngene atwana lica ge, egä weene lipulipu miiji ne päpäname.

¹³ Pui padare cabu weene cude padare ge Acejiyame bau ca, yepä page weene lipu Keriso Yeesu cama yepä gemi, weebibine Acejiyame bau me ituge waadana, inge baarge uli cabu Keriso me uudi te tapiruji Acejiyame ne iiwärejame weeme niya mule äciseja täápume.

* **2:11:** tääpe iirputäneji biname: Israela biname bime mule apu egä imäbägrä te liba laplimluge, eit bimu ingwe gaabe ca teeme imäbägrä bime gwidape cabu ca matikäli tääpe jiiirputusi. Ai tääpe iirputa lui cewecu gyene, Acejiyame lui ecärimuji Israela biname bine, egä teepi teeme biname gemi.

14¹⁵ Siige Keriso taberage te poode ne secituji mime täápume, cine Israela biname piiyepu weene nuuja biname, tabe lipu niweninujuji mine yepä me äbitame. Mine niinäce claabeclabe ninajininujuji, ingle weene lica icwetnimujujiye cime Israela biname bime cotre bine, lui cotre cina birige jaji biname cina ngena wawename. Pui Cotre lui atreji pana ge, mübibine maramara me niweninujuji. Yepä Keriso me budre te pui Cotre ne iyeblingtuji naace täápume cine Israela biname piiyepu weene nuuja biname mine yepä äbitame ten cama kirece ingle wawename. Ai mule ca tabe poode ne secituji mine neeneni maramara siju biname bime täápume.

16 Tabe lipu budre äbituji baarge uli cabu, siige mime claabe mule bine peega epremale-muji. Tabe teeme budre ca niweninujuji yepä me, siige niwecnininujuji Acejiyame bau me.

17 Pípu pi Keriso täduji, poode mene secanuji iyeta biname bime täápume: cine Israela biname täápume, lui cina Acejiyame gome jage piiyepu weene nuuja biname täápume, lui cina niinäce cude padare ge teeme bau ca.

18 Keriso me kaakesea müji pi cine Israela biname, weene nuuja biname, mine iyeta ibibi gemi yepä Seemo me ätityera ca Babe bau me otnime.

19 Siige page weene catecewe biname coo idne cewe biname lica gemi, yepä weene Acejiyame me binamewale cama yepä gemi, teeme ingle cabu inajininige.

20 Weene uli gemi Acejiyame me mete raranga täápume. Caage lui Keriso me ätyepäneji biname piiyepu sasa menameyame biname gemi. Cunäcäpu caage lui Keriso sine.

21 Tabe te iyeta ai caage piiyepu uli bine jitwetnecäjenemige naace täápume mete me äbitame, Acejiyame täápume lui mete te mara me äbitenige.

22 Weene liba Keriso cabu inajininuge, Aceji Seemo te cuta weebibine jitwetnecäjininuge potu biname cama mete ne awejengtame, Acejiyame te luma enajenige.

3

Keriso me Ätyepäneji Biname me Kaakesea

1 Acejiyame te lipu Israela biname piiyepu nuuja gawe biname bine yepä me ituge wawena, cane Paulo te pui name pi irecu ätumutenine weeme täápume, lui Israela biname lica gemi. Cane krokeciye mete cabu säne, ingle cane Keriso Yeesu me kaakesea ne jaawenune weeme müji täápume.

2 Weene ituge ätecija Acejiyame lipu müji ge cäme täápume, siige ai kaakesea näcäruji cane te wawename weeme müji täápume.

3 Acejiyame te sebo-clomtuji teeme ogä ngene atwanena ne, siige cebine umle nawenuji. Cane ai leta cabu matikäli uja bii byoogärine pui potu cidi me.

4 Weene liba pecnepeye, weene umle päbitipeye, egä cane toraca umle gäne Acejiyame me ogä ngene atwanena Keriso potu cidi me.

5 Niinäce padare cabu biname bine umle lica ituge wawena pui potu cidi me, yepä page siige Aceji Seemo te umle itu jaawenemepi Keriso me ätyepäneji biname piiyepu Acejiyame me mename biname bine, lui cina teeme ireclota yaacranepesi Acejiyame me kaakesea wawename.

6 Pui ogä ngene atwanena lui naace gyene, egä laati bemi Israela biname lica, teepi liba yaacatusi Müji Mene ne Yeesu Keriso potu cidi me, teepi piba yaawadimusi cine Israela biname cama yepä Acejiyame ngena ceera teeme bägräwale bine. Teepi Israela biname cama yepä birige, siige gigri yaawadimusi Acejiyame ngena ituge jaji Keriso Yeesu cabu ca ceerame.

7 Acejiyame te cebine nawenuji Müji Mene acenename, siige teeme kokre ne secituji cäme cabu kaakesea wawename piiyepu cebine umle ceerame ai kaakesea täápume.

8 Cane puu matikolärage gäne iyeta Acejiyame me binamewale bau ca, yepä tabe müji mule nawenuji, näcäruji ai kaakesea cane Müji Mene Keriso me ngälu cäco dogwe potu cidi me jajanename biname bine, lui Israela biname lica gemi.

9 Cäme kaakesea gyene iyeta biname bine umle wawename, egä Acejiyame me ogä ngene atwana te toraca me lipu cirege äbita. Acejiyame lui iyeta gwidape bine itu jewenimujuji, tabe ai ne niinäce lui padare cabu imlituji.

10 Tabe naace täápume imlituji, mope mename seemo cina piiyepu cabu je lui teeme pana kokreyame gemi, teepi ai padare cabu ätrunga ingle biname bime cabu ca umle äbitame, egä Acejiyame me umle lipu baborage gyene.

11 Acejiyame te ai ne jewenuji teeme ngene atwana ibi, teeme lui puga ge padare me niinäce gaabe me, tabe lui ne toraca me jewenuji mime Yageyame Yeesu Keriso cabu ca.

12 Mine liba Keriso cama yepä gemi, piiyepu teebine jitrungenisi, mine siige temiji pi ajiri wälu cäco nacluge Acejiyame bau me.

¹³ Peei name pi cane jijenininine, weene ngenecu mäpu gone, egä cane weeme täápume aga mäpu cabu nanajinige. Cäme ai mäpu te weeme miiji täápume äbitenige.

Paulo Irecu Ätumutenige Epeso Biname bime täápume

¹⁴ Cane liba ngene jotwananenine Aceji Babe te lipulipu biname bine awecna teeme bau me, cane kokorare ca ääpednutenine teeme opo gaabe je.

¹⁵ Tabe lui toraca Babe gyene. Tabe lui iyeta ingle bime Acejiyame gyene lui cabucewe je coo piyepu gawecewe cabu je.

¹⁶ Cane irecu ätumutenine Acejiyame bau me, egä teeme bucurage miijimiji mule cabu ca Aceji Seemo te weebibine kokre ceerame naace täápume weene piba ngenecu kokre cama lenajame.

¹⁷ Piiyepu cane irecu ätumutenine, egä weeme ätrunga ca Keriso te lenajame weeme cabu. Piiyepu cuta cane irecu ätumutenine, egä weene iyeta gwidape naace popi wawename, ingle weeme singi pisi nyene Acejiyame piiyepu biname bime täápume.

¹⁸ Piba weene Acejiyame me binamewale cama ibibi birige cängena umle äbitame, Yeesu me singi luma ngälu leca gyene, luma ngälu daamle gyene, luma ngälu caburage gyene, lipu uugle gyene;

¹⁹ cuta weene teeme peei singi cabu lenajame, ngänu gyene weeme ngene atwana tuube gemi iyeta teeme peei singi ne oomlaname, siige weene piba cängena Acejiyame pana läbitininuye iyeta weeme ireclota cabu.

²⁰ Acejiyame me kokre lui te mime cabu kaakesea jaawenuge, tabe pui kokre ca miiji gyene baborage wawena, mine lui täápume yäätinärsi coo ngene jwaatwananinusi ätinerame.

²¹ Mine lui cina ätrunga ingle biname gemi piiyepu Keriso Yeesu cama yepä gemi, mine teebine yaawepyeräjesi, yepä padare me biname cina cuta nuuja padare me biname cina, iyeteta. Ai mene toraca gyene.

4

Ätrunga Biname Miiji Yepä

¹ Cane lui te krokeciye mete cabu nanajinige, ingle cane Yageyame me kaakesea jaawenune, cane jijenininine weene epu lenajame, Acejiyame lipu ituge jaji, tabe liba weebibine ala tisoglicinuji.

² Mope modamoda me gone läbitininuye, miiji owelaamelame piiyepu cängena lenaja. Worämu te gone iglinuge weeme poto biname bime mule name pi, yepä weene miiji weenämu singi äbitanipeye.

³ Acejiyame me Seemo te icärininuge poode. Peei poode te jiwenninuge yepä äbitame, siige weene kokre äbitipeye yepä lenajame.

⁴ Tääpe yepä gyene, Seemo yepä gyene epu pana, yepä taatu gwidape lipu pisi nyene Acejiyame lui cabu ituge ala asogleca weene ngene atwana singi acraname.

⁵ Yepä taatu Yageyame gyene, yepä taatu ätrunga gyene, yepä taatu biname gyene lui me ngii cabu biname bine niije ca jääcisäjemusii.

⁶ Yepä taatu Acejiyame gyene, lui sine iyeta biname bime Babe. Tabe iyeta biname bine yaawadimuge, teeme cabu kaakesea jaawenuge piiyepu teeme cabu yaanajuge.

⁷ Keriso mine yepäyepä bine kokre itu nicäranipi maramara kaakesea wawenetnäjame. Mine teeme baborage kokre cabu ca maramara pargi bine ituge waadenena.

⁸ Oogäräneji mene te ai poto cidi me jüicenige egä,

“Tabe äduji caburage me,
teeme cubuyame bine ätäyäneji ewadimuji ten cama.
Tabe biname bine owecu gwidape ecäranemuji.”

⁹ Ai mene egä “Tabe caburage me äduji” jewabenige, egä tabe niinäce ituge gawe cabu me äina.

¹⁰ Siige lui te täinuji gawe me, tabe peese nyene, lui te äduji cabu me, iyeta caburage puupu bime cabu me naace täápume tabe piba iyeta poto ta lenajame iyeta gwidape cabu.

¹¹ Peei lui tabe sine, lui te “biname bine owecu gwidape ecäranemuji.” Pui owecu gwidape lui naace myene, egä tabe kokre ecäranemuji teepi maramara kaakesea wawenecame. Tabe poto bine jewenimuji teeme ätyepäneji biname me, poto bine jewenimuji Acejiyame me tagepogogo mene icemame, poto bine Miiji Mene acenename iyeta poto ta, poto bine ätrunga ingle mope biname me lenajame piiyepu teebibine abiberäjame.

¹² Tabe ai ne naace name pi jewenuji Acejiyame me binamewale bine amacetnäjame teepi kaakesea wawename naace täápume ätrunga biname, lui Keriso me tääpe gemi, teebibine kokre wawename.

¹³ Ciige mine iyeta piba yepä me läbitininago yepä ätrunga cabu ca piyepu eei cabu ca, egä mine umle gemi Acejiyame me Bägrä. Mine modamoda biname bime ngena atwanena cama ninajininuge, epu pana Yeesu lipu enajuji.

¹⁴ Ingwe ca piba mine bägrä bime pana lica gemi, lui bine angletneja biname bime maramara abiberäja cina yaawedanemusi buuwe pana coo malu pana. Pui angletneja biname cina lui teeme walya mene ca poto bine yaangletnäjemusi conocono gaabe cabu otnime.

¹⁵ Mine pätä miiji biname bine jajanena ngena gyene toraca piyepu mine miiji mimemime singi lenaja, piba mine läbitininago iyeta mule cabu Keriso cama yepä äbitame, lui sine ätrunga biname bime moyeyame.

¹⁶ Tabe liba mope yaanajuge, tääpe me maramara piicwa teemerage puupu cabu lacranuge, piyepu piicwa maramara cina yepä mage ne jaawenusi, umeli cina liba teebibine yaatengecäjimusi. Siige iyeta maramara piicwa liba teeme kaakesea jaawenusi, teepi lipu miiji birige wawena, piba tääpe te cängenarage luutuge, kokre me läbituge, piicwa bime singi te liba teemeteme babo läbituge.

Yeesu cabu Lui Kirece Ireclota Gyene

¹⁷ Mime Yageyame me ngii cabu cane jijenininine weebibine umle wawename, egä ingwe ca gone cääri lenaja Acejiyame umle cäco biname pana, lui cina papa gwidape poto cidi me ngena jwaatwananinusi,

¹⁸ piyepu lui bime mopemuli cabu krokeciye birige. Teepi cude padare gemi ireclota cabu ca, Acejiyame te lui ireclota ceera, inge teepi umle cäco piyepu ätecija cäco gemi.

¹⁹ Nuuja gwidape te äblicäco teebibine ajiri me wawena. Teepi nuuja gwidape wawena täápume singi lica yepä sice buduma äbitename piyepu sargi ero mule wawenecame. Teepi ätecita cäco iyeta jugijugi mule bine jaawenimusi.

²⁰ Yepä weene Keriso bau ca pepu mule lica itu labiberäjiyepu.

²¹ Egäsu weene itu itecijipi teeme poto cidi me, piyepu inge weene teeme ingwe äcwi biname gemi, peei name pi weebibine ituge abiberäja toraca mene poto cidi me, Yeesu cabu lui pisi nyene.

²² Peei name pi weene miiji weeme sasa ngena atwanena bine abmaläcemame, lui cina jiweninujisi epu lenajame, weene lipu niinäce ituge. Pui sasa ngena atwanena bine teemerage angletneja singisingi cina sabe jaawenimusi.

²³ Weene pätä miiji kirece singi piyepu kirece ngena atwana cama lenaja.

²⁴ Weene miiji kirece muleyame biname me äbitame, Acejiyame lui bine ituge wawena teeme pana me naace täápume weene toraca conocäco lenajame piyepu Acejiyame täápume mara me äbitame.

²⁵ Peei name pi ingwe ca walya mene gone otrometnäja, yepä toraca mene ajanipeye weemämu, inge naace popi mine iyeta piicwa gemi Keriso me tääpe cabu.

²⁶ Weene liba claabe läbitininuye, peei claabe te gone iwadininuge niiya mule wawename. Weene niinäce claabe cabu ca etecrutepeye, ingwe ca bimu te piba läpulepi.

²⁷ Gone Satani ne padare yääcäruye tabe weebibine angletnejame niiya mule wawename.

²⁸ Laati te läbituge gwidape ero me, tabe miiji peei mule ne abmala, gije abacita kaakesea wawename teeme lenaja täápume piyepu owecumete biname bine ätityerame.

²⁹ Gone niiya mene iicana, yepä epu mene jicemuye, lui te miiji gyene biname bine ätityerame teeme ngena singi pisi nyene, siige piba weeme mene te ngenecu miiji me jaawenimuge laati bi yäätacijemuge.

³⁰ Piyepu gone Aceji Seemo ne ngenecu mäpu me jaawenuye, inge tabe lui cewecu gyene, egä weene Acejiyame memi. Tabe klaje jiwenininuge weebibine naace täápume Acejiyame te weebibine kälyä wawename iyeta mäpu cabu ca, peei bimu te liba cire tädepi.

³¹ Gone niyaniya ngena jwaatwananinuye poto biname bime poto cidi me. Gone claabe te weebibine ätucera, ämugetna gone. Drämä gone piyepu niiya mene gone biname bine jaji, coo poto claabeclabe mule gone.

³² Weene pätä miiji weemeweme owelaamelame lenaja piyepu owecu cama. Piyepu weene miiji weemeweme niiya mule ngena ätrimela, Acejiyame te lipu weeme niiya mule bine itu yääyebhengemepi Keriso name pi.

5

Apaclyera cabu Miiji Lenaja

¹ Inge weene Acejiyame me ngenecurage bägrä gemi, weene miiji äbitipeye teeme pana lenajame.

² Weene weemämu singi äbitanipeye, epu pana Keriso lipu singi mime täápume, siige teeme ireclota ne iyemaluji mime täápume. Teeme ireclota epu pana ge owecu gwidape Acejiyame ne ceerame coo piiyepu miijirage gwidape lui ca yiwäräjusi Acejiyame ne teebine ngenecu miiji me wawename.

³ Weene gone nuuja biname täápume singi äbita liba mäáme coga coo rooriye lica teta cama sargi mule wawename; cuta iyeta jugijugi mule wawena gone. Piiyepu weene gone singi ädri nuuja gwidape coo mule poto cidi me. Ai mule bine gone waweneca, cuta apu mule poto cidi me gone iicema, inge weene Acejiyame me binamewale gemi.

⁴ Gone iicetneja ajiri mule poto cidi me, niyarage ceepe gone coo nuuja budubuduma mene gone iicetneja, yepä weene pätä miiji Acejiyame ne awepyeräja.

⁵ Weene miiji umle äbita, egä lui te sargi mule jaawenuge coo lui te nuuja jugijugi mule jaawenuge, tabe lica läbituge biname me Keriso piiyepu Acejiyame lui ne yaacanäsi. Singi ädri biname te cuta äblicäco pepu biname me äbita, inge tabe lui täápume singi yäädruge, pui te yaacatuge Acejiyame me puupu ne teeme ireclota ngalebora.

⁶ Gone ire taatu jaacituye nuuja biname te weebibine budubuduma mene ca angletne-jame, inge apurage mule name pi Acejiyame te pagege claabe me äbita, lui cina teebine lica jäätecijusi.

⁷ Peei name pi pipu biname cama gone abasuta.

⁸ Niinäce weene krokeciye cabu jage, yepä page weene siige apaclyera cabu temi, inge weene mime Yageyame memi. Weene miiji epu lenaja, apaclyera cabu biname cina lipu yaacrajuge,

⁹ inge apaclyera luma, puma miijimiji mule, conocäco mule piiyepu toraca mule piti nemi.

¹⁰ Weene miiji äbitipeye abiberäjame, egä ngena te Yageyame ne ngenecu miiji me jaawenuge.

¹¹ Weene gone krokeciye mule cabu abasutana, lui cabu ca nuuja miiji ne lica päpäna, weene pätä apaclyera cabu me pepu mule bine isemepeye.

¹² Teepi lui mule bine jaawenimusi krokeciye cabu, babo ajiri cama mule gemi, lica wawena taatu cuta iicema piiyepu ajiri cama gyene.

¹³ Yepä iyeta mule bine liba apaclyera cabu me yaawadimusi, siige apaclyera te jaawabudne-muge, lipu mule gemi; piiyepu apaclyera te liba krokeciye ne yaapaclyäruge, siige apaclyera me läbituge.

¹⁴ Peei name pi apu ituge iicana egä,

“Arpinanti ute cabu ca,

alotnanti budre cabu ca,

piba Keriso te meebine naapaclyäruge.”

¹⁵ Pipu pi weene miiji ire, egä weene lipulipu inajininuge. Weene miiji cängena lenaja lica budubuduma.

¹⁶ Weene liba padare ne jääpänuye miiji mule wawename, weene jewenepeye, inge ai bimu cina niyarage gemi.

¹⁷ Peei name pi weene buduma gone lenaja, yepä umle äbitipeye, Acejiyame me singi ngena gyene.

¹⁸ Weene sice buduma gone läbitininuye, inge weeme ireclota ne sabe jaawenuge, Aceji Seemo te pätä miiji weeme cabu babo äbitame.

¹⁹ Weene weemeweme etangemepeye salamo uupera bine, poto irecu ätumuta uupera bine piiyepu Aceji Seemo te ngena uupera icärininuge. Weene weeme iyeta ngenecu cama uupera bine piiyepu salamo bine etangemepeye Yageyame täápume teebine awepyeräjame.

²⁰ Weene miiji eso ceeraname Aceji Babe ne iyeta padare cabu iyeta gwidape poto cidi me mime Yageyame Yeesu Keriso me ngii cabu.

Mene Coga Rooriye bime täápume

²¹ Weene miiji weemeweme ätecijana, inge Keriso lui weeme Yageyame gyene.

²² Coga cina miiji rooriye bine ätecija, teepi lipu Yageyame ne jäätecijusi,

²³ inge rooriye sine mope biname coga täápume epu pana, Keriso lipu mope biname ge ätrunga inge biname bime täápume. Tabe peese nyene, lui te niija cabu ca ituge äsecrera ätrunga inge biname bine, lui gemi teeme tääpe.

²⁴ Peei name pi ätrunga inge biname cina lipu Keriso ne jäätecijusi, coga te miiji teeme rooriye ne iyeta mule cabu pepu ätecija.

²⁵ Piiyepu rooriye cina miiji teeme coga bime täápume singi epu pana, Keriso lipu singi ätrunga inge biname bime täápume, siige teeme ireclota ne iyemaluji teeme täápume.

²⁶ Tabe ai ne naace täápume jewenuji teebibine mara me wawename Acejiyame täápume Miiji Mene abiberäja ca, niije ca liba teebibine niinäce juji cäco ituge äciseja.

²⁷ Tabe singi ge ätrunga ingle biname cina teeme täापume lenaja teeme Keriso me miijirage jamyacu cama, jugi cäco, epucäco. Teeme cabu nuuja pläpu coo acalomla lica gyene, coo nuuja pepuyame.

²⁸ Yoo, rooriye cina miiji singi teeme coga bime täापume, teepi lipu singi teemerage täape täापume. Rooriye te liba singi teeme coga täापume, pui lui tabe cuta singi birige teeme täापume, ingle teepi yepä gegi.

²⁹ Nata nuuja te lica teeme täape ne ägyi, yepä cängenarage deedei yäacäranuge, ire jaatwuge, Keriso lipu ätru-nga ingle biname bine cängena ire jaatwemuge.

³⁰ Mine umle gemi ai poto cidi me, ingle mine teeme täape me piicwa gemi.

³¹ Oogäräneji mene te jüicenige egä, “Yoo, rooriye te miiji teeme mage babe bine abmala coga cama atejäclmutame, siige teepi yepä me läbitäsi.”

³² Ai mene te baborage gwidape ne eboclomtenige. Cane ngene ca begline, egä ai mene lui Keriso piyepu ätrunga ingle biname bime poto cidi me.

³³ Yepä ai mene cuta weeme täापume. Rooriye cina, weene miiji singi weeme coga bime täापume, weene lipu singi weeme täापume. Coga cina, weene cuta miiji weeme rooriye bine ätecija.

6

Mene Bägrä piyepu Mage Babe bime täापume

¹ Bägrä, weene miiji weeme mage babe bine ätecija, ingle ai lui conocäco mule gyene.

² “Weene miiji mage babe bine opo gaabe me acrana.” Ai lui niinäcerage cotre gyene ten cotre cabu ca, Acejiyame te lui cama mene ecituji egä,

³ “Piba iyeta gwidape cina miijirage yaacluge weene cama, piyepu weene lecaleca ireclota ne jääpänuye ai gawecewe cabu.”

⁴ Mage babe, weene gone bägrä bine epu mule ca ire atwi, lui te teebibine claabe me jaawenimuge. Yepä weene teebibine yaabiberäjimuye teepi cängena lenajame piyepu yaablawäjemuye Yageyame me singi ibi.

Mene Aletnäneji Biname piyepu Teeme Modamoda Biname bime täापume

⁵ Aletnäneji biname, weene miiji weeme modamoda biname bine toraca ngenecu cama, wälu cama ätecija. Weene peei ne yepä ngene atwana cama jeweneye, epu pana Keriso ne lipu jäateciyuje yepä ngene atwana cama.

⁶ Weene teeme irewale taatu cabu gone apu äbitena naace name pi teepi piba ngenecu miiji cama lenajame weeme täापume. Yepä weene miiji iyeta weeme ngenecu ca wawena, Acejiyame ngena täापume singi, ingle weene Keriso me aletnäneji biname gemi.

⁷ Weene gege cama weeme kaakesea jaawenuye, epu pana egä weene biname bime täापume taatu lica jaawenuye, yepä weene cuta Yageyame täापume jaawenuye.

⁸ Gone ngene ätrimela, egä biname bime miijirage kaakesea name pi Yageyame te daremu yäacäranemuge, ngänu gyene teepi aletnäneji biname coo nuuja biname.

⁹ Modamoda biname, weene cuta pepu miiji weeme aletnäneji biname bine cängena ire atwime. Weene cerämu opo cabu gone yäärmäjimuye. Weene gone ngene ätrimela, egä weene piyepu weeme kaakesea bägrä weeme yepä Yageyame gyene cabucewe je, lui te iyeta biname bine yepä ibi cire jitraniipi.

Ngena Gwidape ca Cubu Iicaname Niiyaniya Cable cama

¹⁰ Yoo siige, weene kokre äbitipeye Yageyame miiji ba-borage kokre ca piyepu ten cama lenaja name pi!

¹¹ Cubu gwidape iyeta asi-gräripeye Acejiyame te lui icärininuge, piba weene lica itrametinuge Satani me angletneja cabu.

¹² Mine bi-namerage cama cubu lica jüicenis, yepä mine cubu jii-cenis niiyaniya cable cama, lui cina mopeyame gemi, pii-yepu lui cina kokreyame gemi, cuta lui cina ai gawecewe ne ecanenis ai krokeciyie padare cabu piyepu cuta buuwemope cabu lui cina otnenininisi.

¹³ Peei name pi cubu gwidape asigräripeye, Acejiyame lui icärininuge. Niiya padare te liba täduge, weene piba ibibi birige weeme cubuyame bine daremu wawename, piyepu cubu liba siige, weene piba camu ämyemuteji inajininuge.

¹⁴ Weene miiji iyeta padare cabu amacetnäjäneji lenajame. Acejiyame poto cidi me lui toraca mene, weene peei ne ecatepeye baagi täापume weeme ibi cabu asigrame. Conocäco mule ne ecateye weeme moobe täापume dare älyengame.

¹⁵ Cuta weeme singi Miiji Mene jajanename poode poto cidi me lui weeme ernge gwidape gemi.

¹⁶ Weene iyeta padare cabu ätrunga ne ecateye, ime cabu lipu älyenga gwidape ne yaacenanute, siige weene peei ca yäätumimuye Satani me muye cama biigu bine.

¹⁷ Acejiyame lipu weebibine niya cabu ca ituge äsecrera, pui lui mope älyenga gwidape gyene weeme täápume. Acejiyame me Mene ecatepeye, Aceji Seemo lui Mene icärininuge. Peei lui weeme cubuturikä gyene.

¹⁸ Weene iyeta ai mule bine irecu ätumuta cama jaawenimuye, Acejiyame ne yaawejanuye tabe weebibine ätityerame. Iyeta padare cabu irecu lätumutanininuye, Aceji Seemo te lipu opo jiwenaninuge. Peei name pi weene gone lätecitinuye, ngänu gyene ngena te läbituge, yepä irecu lätumutanininuye iyeta padare cabu Acejiyame me iyeta binamewale bime täápume.

¹⁹ Cäme täápume cuta irecu ätumutanipeye, egä mene iicana padare cabu Acejiyame te ngene atwana ceerame cane piba wälu cäco biname bine umle wawename teepi lui potocidi me niinäce umle lica ge, egä Miiji Mene cabu pisi nyene.

²⁰ Ai Miiji Mene ne acanename Keriso te cebine nätyepuji, siige cane page age säne krokeciye mete cabu. Weene irecu ätumutanipeye, egä cane wälu cäco jajanename Miiji Mene, cane lipu miiji jajanena.

Paulo me Yewo Mene Epeso Biname bime täápume

²¹ Tukikus, mime miijirage ätrunga biname gyene, mime Yageyame me kaakesea lui te toraca jewenenige, tabe pa lädepi peeyeme weeme bau me. Weene teeme cabu ca pitecijipi iyeta, egä cane ama lipu nanajinige piiyepu ngena jewenenine.

²² Yoo, cane teebine naace täápume jityepenine weene teeme bau ca ätecijame, egä cine iyeta lipu gemi ama piiyepu cuta tabe weebibine kokre ceerame.

²³ Acejiyame mime Babe piiyepu Yageyame Yeesu Keriso teepi iyeta ätrunga biname bine poode piiyepu singi ceerame ätrunga cama.

²⁴ Acejiyame me miiji te lenajame iyeta eei biname bime cabu je, lui cina singi mime Yageyame Yeesu Keriso täápume apira cäco singi cama.

Cane ngii Paulo. Siige cäme mene ngälu peese.

PAULO ME LETA PILIPI ÄTRUNGA BINAME BIME BAU ME

¹ Cane Paulo säne lui te yoogärenine ai leta ne. Timoti agesa cane cama; cine lui Yeesu Keriso me kaakesea bägrä gegi.

Agesa căme mene iyeta Pilipi cewe ätrunga ingle biname bime bau me, weene lui cina Keriso Yeesu cabu inajininige, piiyepu ai mene cuta ätrunga ingle mope biname piiyepu nuuja ätityera biname bime bau me.

² Acejiyame mime Babe piiyepu Yageyame Yeesu Keriso, teeme miiji te weeme cabu lenajame piiyepu teepi weebibine poode ceerame.

Paulo Ireçu Ätumutige Pilipi Cewe Ätrunga Ingle Biname bime täápume

³ Iyeta padare cane liba weeme täápume ngene jwaatwananune, cane Acejiyame ne eso yääcărune weeme täápume.

⁴ Cuta piiyepu iyeta padare cane liba iyeta weeme täápume ireçu lätumutanune, cane ngenecu gege cama jaawenune,

⁵ ingle weene cebine lipu nätiyărüye Miiji Mene cängena jajanename pui bimu cabu ca weene liba niinäce itu jitrungujiye ngälu page. Eso!

⁶ Yoo, cane toraca umle gäne egä Acejiyame lui te jegednuji ai miiji kaakesea ne weeme cabu, tabe cuta Jewenenige ngälu teeme apira Yeesu Keriso me acnenuta bimu cabu.

⁷ Weene căme ngenecurage binamewale gemi, cuta cane miiji gyene pepu asicnentame weene iyeta poto cidi me, ingle weene ai miijirage kaakesea ne cane cama gıgri jaawenanuye, Acejiyame lui kaakesea cebine ituge ceera page wawename krokeciye mete cabu, cuta piiyepu niinäce padare cabu, cane liba waatnetnäjepene Miiji Mene ne toraca me awabu-dnitame biname cina cängena ätrungame.

⁸ Acejiyame umle ai mene lui toraca gyene egä căme singi iyeta weeme täápume lui Yeesu Keriso me singi pana gyene.

⁹ Cane weeme täápume ireçu lätumutanune egä weeme owecu te baborage äbitame, piiyepu umleumle cama egä lui mule gemi toraca conocăco,

¹⁰ naace täápume weene piba ibibi läbitinuye mule bine cängena atraname. Weene piba conocăco cirege aclajuta Keriso me acnenuta bimu padare cabu,

¹¹ cuta piba weeme cabu piti nemi toraca miijirage mule Yeesu Keriso taatu lui bine weeme ireclota cabu yaacranemuge, naace täápume biname cina Acejiyame ne awepeyeräjame piiyepu teeme jamyacu apacıyera peei mule cabu päpăname.

Toraca Ireclota Agesa Keriso me Kaakesea Wawename

¹² Căme ätrunga binamewale, cane singi gäne weene umle äbitame egä iyeta gwidape lui cina căme bau ituge äbita, Miiji Mene te peei cabu ca babo itu läbitepi.

¹³ Siige, peei name pi iyeta awamuta biname piiyepu iyeta nuuja biname lui ama, teepi umle gemi egä cane krokeciye mete cabu säne, ingle cane Keriso täápume kaakesea Jewenenine.

¹⁴ Yoo, căme krokeciye mete lenaja cabu ca mime bucurage binamewale cina Yageyame cabu ngenecu kokre itu läbitipesi, siige teepi wälu căco äbitininisi Acejiyame me mene iicaname.

¹⁵ Yoo toraca, poto cina mene jaajanemusı Keriso poto cidi me teeme niiyarage asicnenta cabu ca, ingle teepi gege lica căme kaakesea lipu baborage itu läbitepi, piiyepu teepi mene ca läsädanınusi. Yepă, nuuja cina asicnenta miiji cabu ca teeme mene jaajanemusı.

¹⁶ Teepi miijirage singi cabu ca jaajanemusı, ingle teepi umle gemi egä Acejiyame te cebine ama itu nacitepi Miiji Mene ne toraca me awabudnitame.

¹⁷ Yoo, pui asicnenta niıya biname poto cidi me, teepi Keriso poto cidi me mene jaajanemusı conocono ngene atwanena cama. Teepi singi lica nuuja biname te awepeyeräja ne päpăname, yepă teepi taatu. Teepi apu jaangemuge egä teeme peei mule cabu ca, cebine ngenecu mäpu me pa nawenepi, cane liba ama krokeciye mete cabu säne.

¹⁸ Yepă, pepu lica gyene. Cane gege gäne teeme kaakesea poto cidi me, ingle cane singi gäne bucurage biname cina mene jajanena Keriso poto cidi me, ngănu gyene conocono liba pisi nyene teeme mule cabu. Yoo, cane gege cama pa nanajepene,

¹⁹ ingle cane umle gäne weeme ireçu ätumuta name pi, cuta piiyepu pui ätityera name pi lui tädenige Yeesu Keriso me Seemo cabu ca, cane pa lasatepene.

²⁰ Yoo, căme toraca singi agesa căme kaakesea cängena wawename, piiyepu airage padare piiyepu iyeta padare cane kokre cama wälu căco lenajame, naace täápume iyeta căme mule name pi biname cina Keriso ne awepeyeräjame, căme ireclota cabu ca, coo căme budre cabu ca.

²¹ Yoo, ireclota ngena gyene? Cäme täápume toraca ireclota lui Keriso gome lenajame, cuta cäme budre lui abacita gaabe ten cama iyeteta lenajame.

²² Yepä, cane liba ireclota cama nanajenige cäme cerämu padare piba pisi nyene teeme miiji kaakesea wawename. Yoo, cane ngena täápume singi gäne?

²³ Cäme singi neeneni gegi. Cane baborage singi ai ireclota cabu ca asatame Keriso cama iyeteta lenajame, ingle peei lui cäme täápume babo miijirage gyene.

²⁴ Yepä, cane cuta singi gäne weebibine ätityerame, peei name pi cäme singi gyene ireclota cama lenajame.

²⁵ Yoo, cäme ätityera pisi nyene weeme täápume, peei name pi cane umle gäne egä cane ireclota cama pa nanajepi. Cane weene cama nanajenige weebibine ätityerame weeme ätrunga babo äbitame piiyepu peei ätrunga cabu ca weene ngenecu gege äbitame.

²⁶ Yoo, cane liba weene cama pa nanajepi, weeme cuta nuuja ingle piba pagege Yeesu Keriso ne awepyeräjame teeme ätityera täápume cäme bau me.

²⁷ Agesa babo gwidape, weene cängena inajininige Keriso poto cidi me Miiji Mene te lipu jiičenige. Weene piba cängena ätrunga cama jicljajutenininige, weeme ngene atwanena yepä egä iyeta weeme kokre cama weene Miiji Mene cabu cängena ätrungame. Cane singi pepu pana mule weeme poto cidi me ätecijame, ngänu gyene cane otni weeme bau me, coo otni lica.

²⁸ Wälu gone pui biname bime täápume lui cina weebibine mäpu cabu icranininusi, yepä weene miiji ngenecu kokre cama inajipi. Pepu cabu ca pui biname cina ngene ca pa yaaglepesi egä teepi te cirege apesera, yepä weene te weeme mäpu cabu ca cirege äsecrera, ingle Acejiyame weene cama gyene.

²⁹ Pepu cirege äbita, ingle Keriso name pi tabe weebibine miijirage padare ne ituge ceera, lica teebine ätrunga taatu me, yepä cuta teeme täápume mäpu cabu lenajame.

³⁰ Yoo, weene piiyepu cane, cine yepä mäpu cabu cewe oocananenago, weene lui cabu cebine ituge päpäna, piiyepu lui cabu cane cuta page nanajenige, weene lipu itecijenininige.

2

Iyeta Biname cina Keriso ne Cire Yaawepyeräjepesi

¹ Weeme ngenecu kokre liba pisi nyene, ingle weene Keriso me singi yaacatanuye weeme ireclota mule cabu; cuta weeme ngenecu miiji liba pisi nyene, ingle weene umle gemi teeme owecu päpäname; Aceji Seemo te weeme cabu liba enajenige; cuta piiyepu weene liba weeme nuuja bine owecu jaawenemuye;

² piba page cäme gege ne babo jeweneye. Weene yepä ngene atwanena piiyepu yepä owecu cama inajinege. Yoo, weeme singi piiyepu ngenecu yepä me äbitineye.

³ Nuuja mule ne gone jaawenuye weeme taatu miiji täápume, coo weemämu babo me äbita täápume. Nuuja biname bine niinäce gaabe me icranemeye, piba weemämu teeme ingwe gaabe me äbitineye.

⁴ Weeme nuuja biname bime miiji täápume ire cängena, gone singi weeme taatu miiji täápume.

⁵ Weene Keriso Yeesu pana mule ne ecateye egä:

⁶ Niinäce cabu ca tabe Acejiyame cama yepä ge,

yepä tabe pui Acejiyame cama ibibi ne lica noomluji.

⁷ Pui name pi tabe teeme caburage puupu ne teeme singi ca ebmaluji,

ätityera biname me äbitame biname bime täápume.

Taba ai gawecewe biname pana äbituji, biname pana tääpe cama lenajame.

⁸ Tabe teemämu gawe me äbituji,

Acejiyame me singi gaabe cabu otnuji,

teeme ireclota piba ecäruji baarge uli cabu me budre äbitame.

⁹ Peei name pi Acejiyame teebine ewepäntuji caburage puupu cabu me, cuta piiyepu teebine babo ngii ecäruji.

Teeme peei ngii lui baborage gyene iyeta poto ngii cabu ca.

¹⁰ Piba iyeta lui cina cabucewe je, lui cina ai gawecewe cabu je, piiyepu lui cina gawe ngalebora je,

teepi kokorare cire yääpednäremepesi Yeesu me ngii ne awepyeräjame,

¹¹ piiyepu iyeta cina cire jiičepesi egä Yeesu Keriso lui Yageyame gyene.

Aceji Babe siige jamyacu apacyera ne cire jääpänepi peei cabu ca.

Weene Ngale pana Gemi Ai Gawecewe Biname bime täápume

¹² Cäme ngenecurage binamewale, weene cäme singi lipu itu nacatepeye, cane liba weene cama ge, yoo, cuta page cäme singi mene ne weene ecateye, cane liba weene cama lica gäne.

Acejijame lui caburage gyene, peei name pi weene cängena teeme täápume inajipi, pui mule taatu jaawenemuye lui cina iyeteta ireclota gaabe cabu weebibine iwadininusi.

¹³ Ingle naace gyene Acejijame me kaakesea pisi nyene weeme cabu, weebibine singi piijepu kokre ceerame teeme singi ne cängenarage waweneme.

¹⁴ Weene weeme kaakesea ngenecu miiji cama jeweneye, äcela piijepu äciseräja cäco.

¹⁵ Weene pepu Acejijame me jamyacu bägrä me pa äbitipeye, lui cina ibibi gemi ai gawecewe niuya conocono mule biname gome epucäco conocäco lenajame. Weene miiji teeme täápume wale pana uungepmeläja teeme krokeciye ne äyeblyngtame,

¹⁶ weene liba teebibine mene jaajanenemuye ireclota gaabe poto cidi me. Weene liba pepu jaawenuye, Keriso me acenuta bimucabu, cane piba ngenecu gege cama cire nanajepi weeme poto cidi me, inge piba awabudnita cirege egä cäme kaakesea papa me lica ituge äbita.

¹⁷ Cane gege gäne, ngänu gyene cebine liba pama budre me naglumi, siige cäme uudi te tapiruge kau bime liijepu Acejijame ne iiwärejame. Cäme uudi te piba weeme ätrunga cama yepä läduge Acejijame bau me teebine iiwärejame. Yoo, apu liba wawena je, cane gege birige äbita, cane iyeta weene cama gege birige.

¹⁸ Piba weene cuta miiji gege läbitininuye, weene cane cama gege läbitininuye.

Cane Epaproditus naabi Timoti Pa Jäätyepene Weeme bau me

¹⁹ Cane cäme ngene atwanena Yageyame Yeesu cabu me itu yaacitepene egä cane ibibi pa läbitepene Timoti ne weeme bau me wata ätyepame, naace täápume cane piba teeme bau ca mene päpäname weeme poto cidi me cebine ngenecu plowa me waweneme.

²⁰ Cäme nuuja biname lica gyene lui te cane cama yepä ngene atwanena cama gyene, piijepu lui te toraca singi weebibine ätityerame.

²¹ Iyeta nuuja biname cina singi gemi teeme taatu miiji täápume, lica Yeesu Keriso me kaakesea täápume.

²² Yepä, Timoti me miiji mule poto cidi me weene umle gemi. Tabe cane cama kaakesea jaawenuge, epu pana bägrä te teeme babe ne lipu yäätyärüge, inge cine singi bucurage biname cina Miiji Mene ne ätrungame.

²³ PEEI name pi cane singi gäne teebine weeme bau me ätyepame, yepä tabe cäme trämä pa yaanajepi ngälu cine umle pa läbitipago cäme täápume lipu pa läbitepi.

²⁴ Cane umle gäne egä Acejijame liba singi gyene, cane cämämu mameta gäne weeme bau me otni.

²⁵ Page cane jitränutenine mime ätrunga biname Epaproditus ne weeme bau me ätyepame. Tabe cane cama kaakesea cängena jewenenige cuta cubu jücenige Miiji Mene täápume. Tabe weeme bau ca ätyepäneji gyene cebine ätityerame.

²⁶ Tabe haborage singi gyene iyeta weebibine cääri päpäname, piijepu tabe ngenecu mäpu cama gyene, inge mene weeme bau me itu lädepi egä tabe pita cama ge.

²⁷ Toraca gyene egä tabe pita cama ge, budre mameta, yepä Acejijame te owecu ge teeme täápume, piijepu owecu ge cäme täápume, peei name pi teebine miiji itu jaawenepi, peei ngenecu mäpu ne cäme bau ca äyeblyngtame.

²⁸ Cane peei name pi babo singi gäne teebine weeme bau me ätyepame egä weene piba ngenecu gege cääri pa äbitipeye, teebine liba pa jepänepeye, cuta piijepu cäme ngenecu mäpu te teeme poto cidi me piba pa läyeblyngtepi.

²⁹ Miiji weene teebine babo gege cama pa ecatepeye mime Yageyame me ngii cabu, piijepu opo gaabe me icraneye iyeta biname bine lui cina teeme pana mule bine jaawenemusi,

³⁰ inge tabe teeme ireclota taatu me lica ngene jotwananige, yepä mameta ge budre päpäna Keriso me kaakesea name pi. Tabe apu läbitepi, weeme puupu ne liba yaacatepi cebine ätityerame, inge weene pui ne äblicäco ge waweneme.

3

Acejijame Mibibine Teeme täápume Conocäco Niwenininuge

¹ Cäme ätrunga binamewale, cane singi cerämu mene jajime egä weene Yageyame cabu gege inajininege. Cane gloose lica gäne gwidape poto cidi me oogärame, cane lui bime poto cidi me ituge oogära, weene piba cängenarage lenajame cane liba ai mene cääri jjenininine.

² Cängena ire biname bime poto cidi me lui cina niuya mule bine jaawenemusi, peei drego bime täápume lui cina singi gemi nuuja ätrunga biname bime tääpe matikolä iirputame Acejijame me cewecu acatame. Teepi walya jücusi egä lui biname me tääpe cabu cewecu lica birige, tabe äblicäco Acejijame me biname me äbita.

³ Yepä, mine lui cina Acejijame ne ngene jepecnäjenisi Aceji Seemo me ätityera ca, piijepu babo gege cama Keriso Yeesu ne jitrungenisi mibibine waadename, mine age temi

Acejiyame me toraca binamewale. Tääpe cabu lui cewecu ngänu gyene, ingle peei cabu ca mine äblicäco Acejiyame me binamewale me äbita, ingle mine äblicäco mime tääpe mule bine ätrunga mibibine Acejiyame bau me waadename.

⁴ Yoo, niinäce cane liba Yeesu ne lica jitrungujine, pui padare cabu cane căme tääpe mule cabu me ätrunga ecitujine. Pui sasa padare cabu cane pepu mule bine baborage jitrungemujine nuuja biname bime cabu ca,

⁵ ingle naace popi cane liba aplimlujine seben bimu liba nanajuji, căme tääpe matikolä nirputujisi cewecu waweneme. Cuta căme mage babe Israela biname ge Benjamina me ingle cabu ca, piyepu căme kaakesaare iyeta lui Heberu mene jüicemusi. Cuta piyepu cotre bine cane Parisea biname bime mäpu gaabe ca jewenemujine.

⁶ Căme singi baborage ge Acejiyame me kaakesea waweneme, siige cane Yeesu me ätrunga biname bine mäpu me jaawenemune. Yoo, cane iyeta mule cotre mene ibibi ituge wawena, naace tääpume cane peei gaabe ca conocăco äbitame Acejiyame me opo gaabe je.

⁷ Yepä, iyeta peei mule bine cane lui poto cidu me apu nangenuji egä miijirage gemi căme tääpume, page cane opo ewatnenine egä teepi nuuja miiji lica gemi, Keriso me ätityera name pi.

⁸ Toraca cane opo ewatnenine egä iyeta papa ge, yepä taatu gwidape baborage gyene. PEEI babo gwidape lui naace gyene cane umle gäne Yeesu Keriso căme Yageyame. Yoo, Yeesu Keriso name pi iyeta căme sasa mule bine domäji pana cane itu ebmalemujine Keriso me ingle cabu me abacitame,

⁹ ten cabu lenajame. Page cane licarage căme miiji mule piyepu cotre waweneca bine jitrungenemine Acejiyame tääpume conocăco äbitame, yepä cane Keriso ne jitrungenine cebine Acejiyame tääpume conocăco waweneme. PEEI ätrunga gaabe Acejiyame cama conocăco äbitame lui teeme bau ca gyene, piyepu biname cina peei ne jääpänusi, Keriso ne liba jäätrungusi.

¹⁰ Page căme nuuja singi lica gyene, yepä Keriso tääpume toraca umle äbitame, piyepu lui babo kokre te teebine budre cabu ca itu erpinantuji, peei te căme ireclota cabu lenajame. Cane singi gäne teeme pana ngene cewe oocanena päpäname ireclota cabu piyepu teeme pana äbitame tabe lipu teeme budre padare cabu ge,

¹¹ ingle cane singi gäne Acejiyame te piba cuta cebine budre cabu ca arpinentame iyeteta ireclota me.

Acejiyame te Mibibine Ituge Asogleca Yeesu pana Mule Waweneme

¹² Cane lica jüicenine egä cane uja conocăco me ituge äbita; camu gyene căme ireclota mule toraca miiji me äbita. Yepä, cane cängena apicetnärenine conocăco ireclota mule ne oomlaname, ingle Yeesu Keriso te cebine teeme tääpume ituge oomlana.

¹³ Yoo, căme ätrunga binamewale, cane apu lica nangeninige egä cane conocăco ireclota cama gäne, yepä cane apu jewenine: iyeta poto cidu me lui ituge niinäce äpletnera, cane singi ngene ätrimela, pui ne oomlaname lui te niinäce gaabe gyene.

¹⁴ Cane uuwama bääclena biname pana gäne. Cane niinäce gaabe me ire nacijinige ngälu gaabe ne oomlaname, naace tääpume căme miiji daremu ne acatame. PEEI daremu lui iyeteta ireclota gyene cabucewe je, Acejiyame lui tääpume cebine ituge ala asogleca cane Yeesu Keriso bau ca päpäname.

¹⁵ Yoo, mine iyeta lui cina Seemo ireclota cabu ninajininige, mine miiji pepu pana ngene atwana cama lenajame, piyepu weene liba mara ngene atwana cama gemi yepä gwidape poto cidu me, Acejiyame cuta peei ne pajecu me pa jaawenepi weeme tääpume.

¹⁶ Yoo siige, mine niinäce gaabe me naclege pui umle cabu lui pisi nyene page.

¹⁷ Căme ätrunga binamewale, căme pana mule weene gigri jewenemeye. Teeme mule abiberäjinneye lui cina toraca gaabe cabu otni, cine lui gaabe weeme tääpume ituge awabudnita.

¹⁸ Cane lui tääpume weebibine bucurage padare ituge jajanena, cuta page ele mäcu cama cääri jijenininine egä bucurage biname piti nemi lui cina cubuyame gemi Keriso me budre tääpume baarge uli cabu teeme conocono ireclota name pi.

¹⁹ Teepi niija puupu me cirege otni, ingle teeme yepä taatu ngene atwanena pisi nyene, teeme tääpe me singi bine wawenecame. Teepi gege gemi mule poto cidu me, teepi lui poto cidu me ajiri cire läbitinejsi. Iyeta teeme ngene atwanena lui singi taatu ai gawecewe me gwidape tääpume.

²⁰ Yepä, mime tääpume ireclota mara gyene. Mime toraca cewe lui cabu sine. Mine mime niija cabu ca äsecrera biname ne cängena jewagrijenisi cabucewe ca mime bau otnime, peei lui Yageyame Yeesu Keriso sine.

²¹ Tabe te mime gawecewe tääpe bine cirege atep lengäja teeme jamyacu apaclyera cama tääpe pana äbitame, pui kokre ca tabe lui ca ibibi gyene iyeta gwidape bine teeme ime cabu acraname.

4

Paulo te Bäärmı Mene Jegednemige

¹ Cäme ngenecurage binamewale, cane baborage singi weeme tääpume weene cama lenajame. Weene cebine ngenecu gege me naweneniye, piyepu cane awepyeräja ne jepänenine weene name pi. Yoo, cäme ätrunga binamewale, weene miiji kokre aclajutame Yageyame cabu.

² Yoo, neeneni magebi Ewodiya piyepu Suntukeye, owecu, cäme singi weene ecateye yepä ngenecurage atwanena cama Yageyame cabu lenajame.

³ Yoo, piyepu Sujugu, lui cane cama miijirage kaakesea ituge wawena, cane singi gäne maane ai neeneni magebi bine ätityerame teeme miise mule ne abmalame, teepi lui cina cane cama baborage kaakesea ituge wawena bine miiji Mene jajanenime. Teepi gigri kaakeseayame gegi Klemente cama piyepu iyeta nuuja biname cama lui cina cane cama kaakesea ituge jaawenemepesi, lui bime ngii Acejiyame bau oogäräneji gemi teeme peba cabu, iyeta lui cina kirece ireclota Keriso bau ca cire jääpänepesi.

⁴ Ngenecu gege äbitineye weeme Yageyame cabu ireclota tääpume. Cane cääri jijenine, weene ngenecu gege!

⁵ Weene miiji owelaamelame lenaja iyeta biname bime tääpume. Yageyame me acnenuta lui mameta gyene.

⁶ Gone ngenecu mäpu läbitininuye nuuja gwidape tääpume, yepä weene liba Acejiyame ne yaawejanuye, teebine yäätinäruye iyeta weeme singi gwidape tääpume, piyepu ngenecub-ora ca teebine eso yääcäruye.

⁷ Piyepu weene liba ngenecu poode Acejiyame bau ca jääpänuye, piba weeme ngenecurage atwanena piyepu weeme singi Yeesu Keriso cabu cängenarage birige. Yoo, biname cina äblicäco gemi cängena umle äbita pepu ngenecu poode ne.

⁸ Ceräcerägäabu bäärmı mene age sena. Cäme ätrunga binamewale, weene ai gwidape poto cidi me ngenecurage jwaatwa-naninuye: iyeta lui toraca gemi, lui bine opo gaabe me yaacranemusı, lui gwidape conocäco gemi, lui bine jugi cäco ngenecurage atwana cama gemi, lui jamyacu gemi, lui bine jääpänemusı egä miijirage gemi, lui epucäco gemi, piyepu lui bine ibibi gemi awepyeräja tääpume.

⁹ Cane lui abiberäja weebibine ituge ceera cäme mene piyepu cäme mule cabu ca, weene pepu jaawenemuye. Piba Acejiyame, lui te mibibine ngenecu miiji niwenininige, mine cama pa yaanajepi.

Paulo te Pilipi Ätrunga Ingle Biname bine Eso Jejemige Teeme Ätityera tääpume

¹⁰ Cane ngenecu gege gäne piyepu cane Yageyame ne ewepyeräjenine egä padare te tatyaramtumi weene cebine cääri ätityerame. Weeme puu singi puga ge pui ne wawenime, yepä leca padare cabu weeme gaabe ätityerame lica ge.

¹¹ Cane ai mene naace name pi lica jijenininine ingle cane gwidape tääpume singi gäne. Pepu lica ge, ingle cane umle ituge äbita ngenecu gege cama lenajame, ngänu gyene cäme gwidape liba nesae.

¹² Cane umle gäne owecumete pana lenajame piyepu cane cuta nuuja taje umle gäne bucuratione gwidape cama lenaja. Cane umle gäne iyeta padare iyeta poto ta ngenecu gege cama lenajame. Ngänu gyene cäme deedei liba bucuratione, coo cäme deedei liba nesae; cäme gwidape liba bucuratione, coo cäme singi gwidape liba lica gemi, cäme ngenecu gege cuta pisi nyene.

¹³ Keriso te cebine kokre me nawenenige iyeta gwidape tääpume.

¹⁴ Yepä, weeme mule babo miijirage gyene cebine cäme mäpu cabu ätityerame.

¹⁵ Yoo, weene Pilipi biname umle gemi egä lui padare cabu cine gije jebacitujisi Miiji Mene jajanenime, cane pui padare cabu liba Makedoniya probins ne sebmälujine pui Miiji Mene nuuja poto jajanenime, weeme ätrunga ingle te taatu nätiyäruiji cebine, weene liba rarekaake näcärujiye.

¹⁶ Cane liba Tesalonika cewe cabu je, weene cuta piba cebine nätiyäruijiye lica yepä gäabu taatu, yepä cuta nuuja taje weene nätiyäruijiye.

¹⁷ Yoo, cäme singi lui lica gyene owecu gwidape päpäna taatu me, yepä cane singi gäne weene pepu mule wawenecame, piba miiji daremu peei cabu ca päpäname.

¹⁸ Yoo, cane age eso mene ne yoogärenine iyeta weeme ätityera täápume. Peei ätityera lui ibibi gyene. Cäme singi gwidape ibi piti nemi page, ingle Epaproditus te bii sewadene-mige wemiji gwidape bine. Weeme ätityera gwidape lui epu pana iiwäreja mule liiyepu Acejiyame täápume. Tabe baborage singi gyene pepu ätityera mule päpäname.

¹⁹ Yoo, Yeesu Keriso me kaakesea name pi mime täápume, Acejiyame te iyeta weeme singi gwidape bine icärininuge teeme jamyacu dogwe cabu ca.

²⁰ Mine miiji Acejiyame mime Babe ne awepyeräja iyeteta ngälu cäco teeme jamyacu apaclyera täápume. Pepu pa yaanajege!

Ai Peba me Apira Mene

²¹ Cane sebore jiwenininine iyeta Acejiyame me biname bine lui cina Yeesu Keriso memi. Mime ätrunga binamewale lui cina age temi cane cama, teepi te weebibine sebore jiwenininisi.

²² Iyeta Acejiyame me biname cina weebibine sebore jiwenininisi, yepä toraca teepi lui gemi Rooma Babo Mopeyame me mete cabu kaakesea jewenenisi.

²³ Yageyame Yeesu Keriso me miiji te weeme seemo bime cabu lenajame. Cane ngii Paulo; cäme mene ngälu peese.

PAULO ME LETA KOLOSE ÄTRUNGA BINAME BIME BAU ME

¹ Cane Paulo säne. Acejiyame te cebine Yeesu Keriso me ätyepäneji biname me itu nawenuji. Mime biname Timoti lui cane cama gyene.

² Cine weeme bau yoogärenago, lui cina Acejiyame me biname gemi Kolose cewe cabu je piyepu cime ätrunga binamewale Keriso cabu.

Acejiyame mime Babe me müiji te weeme cabu lenajame piyepu tabe weebibine poode ceerame.

Paulo naabi Ireçu Ätumutini Kolose Ätrunga Ingle täöpume

³ Iyeta padare cine liba weeme täöpume ireçu lätumutinago, cine cuta Acejiyame ne eso yääcärsi. Tabe lui Babe gyene mime Yageyame Yeesu Keriso täöpume.

⁴ Yoo, cine mene niteciinininige egä weene Yeesu Keriso ne lipu jitrungeniye, cuta piyepu niteciinininige egä weeme singi lipu baborage gyene iyeta Acejiyame me biname bime täöpume.

⁵ Pepu ätrunga piyepu singi cina taacluge weeme müiji ngene atwanena cabu ca, inge weene cängena umle gemi egä ingwe ca babo müiji pisi nyene weeme täöpume cabucewe je. Peei umle weene ituge oomlana Acejiyame me Müiji Mene niinäce liba itu iteciiji.

⁶ Page peei toraca mene te otnenige iyeta poto ta, biname bime ireclota bine eboclomäjenemige müiji me, epu pana weeme ireclota lipu laboclomtepi pui niinäce bimu, weene liba iteciiji piyepu ngene ca yaaglepeye egä Acejiyame te biname bine babo owecu cama yäätityäremuge.

⁷ Yoo, Epapras te weebibine itu jiji Acejiyame me owecu cama ätityera poto cidi me. Tabe cime ngenecurage biname gyene, lui te Keriso me kaakesea weeme gome cängena jevenenige cime täöpume.

⁸ Yoo, tabe cibibine hü ninjinige weeme müijirage singi poto cidi me, Aceji Seemo te lui itu icäripi.

⁹ Yoo, peei name pi pui padare cabu ca, cine niinäce weeme poto cidi me mene liba niteciiji, ngälu page, cine weeme täöpume ireçu lätumutinago. Cine Acejiyame ne ewejanenisi weebibine tora-ca umle ceerame teeme singi poto cidi me teeme Seemo te weeme gaabe ne cängena awa-bame.

¹⁰ Weene peei cabu ca ibibi äbitinininiye mime Yage-yame me gaabe cabu otnime iyeta teeme singi wawenecame. Piba weeme ireclota cabu ca müijimiji mule cina twaatni-nusi. Cuta piba weeme umle Acejiyame poto cidi me babo pa läbitepi.

¹¹ Cine teebine cuta ewejanenisi weebibine kokre ceerame teeme mararage kokre cabu ca, weene mäpu cabu cäng-ena ngenecu müiji cama lenajame,

¹² piyepu weene mime Aceji Babe ne gege cama eso ceerame, tabe mibibine lipu ibibi itu niwenipi iyeta päpäname, tabe lui ne ituge jaji teeme biname bine ceerame, lui bine teeme apaclvera cabu yaawademuge.

¹³ Tabe mibibine ituge äsecrera krokeciye me kokre cabu ca, piyepu itu niwadipi teeme ngenecurage Bägrä te luma mibibine cängena niwadininuge,

¹⁴ lui me kaakesea ca mine äsecräreji gemi, egä mine kälyä gemi mime niya mule cabu ca.

Yeesu Keriso me Kaakesea poto cidi me

¹⁵ Keriso cabu biname cina Acejiyame me opo ituge päpäna, lui cina Acejiyame ne äblicäco päpäna. Keriso lui Acejiyame me uuge Bägrä gyene; tabe sine caburage iyeta wawenäneji gwidape cabu ca.

¹⁶ Bägrä cama Acejiyame iyeta gwidape itu jevenemüjäsi, cabucewe je lui gwidape piyepu gawecewe cabu lui gwidape gemi; iyeta gwidape mine lui bine ibibi gemi päpäname piyepu lui bine mine äblicäco päpäna, cuta peei ngalebora iyeta cable, iyeta kokre, iyeta mope biname, piyepu iyeta ire atwi puupu bine. Yoo, Acejiyame iyetarage Keriso cama ituge wawena, cuta iyeta cina teeme täöpume icrajenige.

¹⁷ Yoo, agedna cabu Acejiyame gwidape bine liba camuge waweneca, Keriso piba puga ge, cuta page temiji pi iyeta gwidape cina puupu cabu cängena icrajenige.

¹⁸ Tabe mopeyame gyene iyeta ätrunga inge biname bime täöpume. Yoo, epu pana biname bime piicwa maramara cina teeme ireclota ne lipu mope cabu ca yaacatusi, ätrunga biname cina teeme ireclota Keriso bau ca pepu pana yaacatusi. Tabe Acejiyame me uuge Bägrä gyene; Acejiyame te teebine itu erpinantuji budre cabu ca niinäce me äbitame iyeta gwidape täöpume.

¹⁹ Yoo, Acejiyame me singi name pi Aceji Băgră lui toraca teeme pana Acejiyame gyene.

²⁰ Teeme Băgră me kaakesea ca tabe gaabe ne itu jewenuji teeme bau me awecname iyeta lui cabucewe je yaacrajemuge piiyepu gawecewe cabu lui biname piiyepu gwidape yaacrajemuge. Keriso me budre baarge uli cabu, teeme uudi liba tapiruji, peei te mibibine poode itu nicărininuji Acejiyame cama.

²¹ Yoo, weene cuta piiyepu, weene liba camuge Keriso ne âtrunga, piiyepu weene liba cudecewera ge Acejiyame bau ca, pui padare cabu weene cubuyame pana ge Acejiyame tăăpume weeme niiyaniya ngene atwanena piiyepu waweneca name pi.

²² Yepă, page tabe weebibine teeme biname me itu jiwenipi teeme Băgră Keriso liba biname pana tăăpe cama budre âbituji, naace tăăpume weene teeme opo gaabe je aclajutame epucăco, jugi căco, piiyepu conocăco.

²³ Weene apu lâbitininuye liba âtrunga cabu cângena umle cama inajininige. Yoo, weene niinăce liba itecijinuji Miiji Mene Yeesu me âtityera poto cidi me, weene puma cita ca weeme ngene atwanena ecitujiye pui ingwe ca miiji ireclota cabu je. Peei mule gone yaabmaluye! Yoo, Miiji Mene weene lui ituge âtecija, page jajanăneji gyene iyeta biname bine ai gawecewe cabu. Cane Paulo căme kaakesea cuta pisi nyene Miiji Mene jajaneneme.

Paulo me Kaakesea Âtrunga Ingle Biname bime tăăpume

²⁴ Yoo, cane ngenecu gege gâne căme măpu ireclota poto cidi me weeme tăăpume, ingle căme ireclota cabu lui cewe oocanena piti nemi, peei lui cerămu măpu Keriso lipu ituge păpăna teeme tăăpe cabu, cuta peei tăăpe lui teeme âtrunga ingle gyene.

²⁵ Yoo, Acejiyame te cebine ai miiji kaakesea năcărui teeme âtrunga ingle biname bine âtityerame, iyeta teeme mene cângena iicetnejame, cuta weeme bau jajaneneme.

²⁶ Ai mene tabe sasa padare cabu ca iyeta biname bime bau ca imlITUJI, ngălu ai padare teeme biname bime tăăpume seboclomtenige.

²⁷ Page tabe singi gyene teeme biname bine iyeta gawe cabu umle waweneme ai toraca miijirage mene poto cidi me. Agesa peei mene: Ingle naace popi Keriso lui weene cabu enajenige, peei name pi weene teeme jamyacu apacyera cabu cirege lenaja.

²⁸ Yoo, ai umle name pi cine iyeta biname bine mene jajanenenemisi Keriso poto cidi me, piiyepu iyeta cime umle cama teebibine eblawăjenemisi conocono mule abmalame, piiyepu ebiberăjenemisi toraca mule poto cidi me. Cine singi iyeta biname cina conocăco me âbitame Acejiyame me opo gaabe je, teepi liba Yeesu Keriso me kaakesea teeme tăăpume yaacatusi.

²⁹ Yoo, peei tăăpume cane kaakesea jaawenune Keriso miji babo kokre ca, tabe lui ne căme cabu yaacituge.

2

¹ Cane singi weebibine umle waweneme cane lipu babo kaakesea jaawenune weebibine âtityerame, cuta piiyepu weeme âtrunga binamewale bine lui Laodikea cewe cabu je, cuta piiyepu iyeta âtrunga biname bine lui cina camu gemi cebine păpăna.

² Cane pui lui irecu âtumuta kaakesea jaawenune weene piiyepu teepi ngenecu kokre âbitame, piiyepu weene iyeta yepă me âbitame weene liba weemeweme singi lâbitininuye, piiyepu iyeta weeme ngene atwanena bine weene toraca umle cabu acraname. Piba pepu pana ireclota cabu weene cângena umle păbitipeye lui ngene atwanena ne Acejiyame te eboclomtenige, lui Keriso sine.

³ Yoo, iyeta toraca umle piiyepu toraca ngene atwanena lui Keriso me ireclota cabu yaaboclomtuge.

⁴ Peei name pi gone nuuja biname ne ire taatu jaacituye walya mene ca weebibine angletneja.

⁵ Yoo, ngănu gyene cane cudecewe gâne weeme bau ca, căme ngene atwanena pisi nyene weeme cabu. Cane ngenecu gege cama umle âbitine weeme âtrunga te lipu kokre gyene, cuta piiyepu weene lipu yepă pana jăătrunguye Keriso ne.

Weeme Keriso cama Ireclota te Lipu Pagege Lenaja

⁶ Yoo, weene Yeesu Keriso weeme Yageyame tăăpume ituge acata, siige ten cama cângena inajininige!

⁷ Epu pana apineca căco uli me braju te lipu gawe ngaleboraage me labacituge, weeme âtrunga miiji pepu pana Keriso cabu lenaja! Epu pana biname te mete ne miijirage caage cabu lipu yaaranguge, weeme ireclota Keriso cabu pepu icranemeye teeme bau ca iyeta bimu gaabegabe weeme gaabe ne păpăneneme. Piba weeme Keriso cabu âtrunga te kokre pa lâbitepi pui mene cabu, weebibine lui mene ituge abiberăja. Piba Acejiyame ne ngenecu cabu ca eso yăăcăranyue.

⁸ Yoo, weene cängena ire egä nuuja biname te lica weebibine waadena teeme angletneja mene ca. Pepu walya umle lui piti nemi, lica gemi Keriso bau ca, yepä biname bime sasa mule cabu ca saacluge. Cuta piyepu niya cable lui cina ai gawecewe ne ire jetwenisi, teepi biname bine mara walya ngene atwanena ecäranenemisi.

⁹ Yepä, Keriso cabu piti nemi iyeta toraca umle piyepu iyeta kokre, ingle tabe lui Acejiyame gyene binamerage me trupa cabu sine.

¹⁰ Yoo, toraca umle piyepu toraca ireclota cuta weeme bau piti nemi, ingle Keriso lui weeme cabu sine. Tabe caburage gyene iyeta ire atwi seemo piyepu kokre cabu ca.

¹¹ Mine liba Keriso ne ituge ätrunga, tabe te mime ngencu me niyaniya singi bine ituge äyeb Benga mime trupa cabu ca. Tabe lica Israela biname bime cewecu mule ca yäyeb Benga, teepi imäbägrä bime matikolä tääpe ne liba iirputa, ingle Keriso me mule mara gyene.

¹² Yoo, mine liba niye ca äciseja ne ituge acatena Keriso me ngii cabu, peei cabu ca mine teeme budre piyepu arpinenta cuta mime tääpume ituge acata. Mime niya mule ireclota ne budre pana me ituge wawena, piyepu kirece ireclota te teeme arpinenta pana ituge gije abacita, mine liba Acejiyame ne itu jitrungujisi mibibine pepu pana ätityerame, tabe lui te Keriso ne budre cabu ca itu erpinantuji.

¹³ Niinäce weene epu pana ge budre biname liiyepu weeme niyaniya mule name pi, piyepu weeme tääpe me niyaniya singi bine camuge äyeb Benga. Yepä, page Acejiyame weebibine ituge arpinera kirece ireclota cabu me Keriso cama lenajame. Tabe iyeta mime niya mule bine ituge äyeb Benga.

¹⁴ Tabe pui cotre mene ne yisibrecmuji, lui te mibibine noomlinge, ingle peei te singi daremu mime niya mule tääpume. Yepä, Acejiyame pui mene ne iyebingtuji mime tääpume, ingle naace popi Keriso me budre baarge uli cabu peei te mime daremu ituge apira. Mime tääpume cotre mene siige kokre lica gyene.

¹⁵ Yoo, Keriso lui budre äbituji baarge uli cabu, tabe peei cabu ca ai gawecewe me niyarage ire atwi seemo bine piyepu kokre bine itu epremalemuji. Biname bime opo gaabe je tabe peei iyeta cabu ca yuutrutuji, egä teeme kokre ibibi lica ge.

¹⁶ Yoo, peei name pi weene gone nuuja biname ne padare yäacärüye jajime egä weene ngena loolome piyepu nänäjame, coo weene lui bimu bine baborage me wawename kämäge gaabegabe irecu ätumuta tääpume, piyepu kirece mabye me bimu ne babo me wawename, coo weene lipulipu mule wawename Sabade bimu cabu.

¹⁷ Iyeta pepu mule lui owowä pana gemi Keriso me toraca mule tääpume. Peei name pi gone pepu mule bine cotre me wawena. Babo gwidape lui eei gyene egä weene Keriso ne cängena jitrungeniye.

¹⁸ Yoo, nuuja taje biname te jicuge egä tabe baborage gyene Acejiyame me opo gaabe je, ingle tabe mule bine wama pana jäapänemuge. Pepu biname me mene gone jätəcijuye, tabe liba biname bine yaabiberäjemuge egä teepi miiji teemämu gawe me äbita peei cabu ca awepyeräja ne päpäname. Coo, tabe liba biname bine yaabiberäjemuge mename seemo bine awejename, teeme mene gone jätəcijuye. Pepu biname te apu jaangenuge egä tabe babo umle cama gyene, yepä teeme ngene atwanena lui papa gemi, biname bime ngene atwanena gemi, peei name pi gone yaawademuye.

¹⁹ Pepu biname te teeme ngene atwana ne lica Keriso cabu ca yaacatuge. Yoo, Keriso lui mopeyame gyene iyeta ätrunga ingle bime tääpume, epu pana biname me mope te liiyepu iyeta teeme tääpe piicwa bine ire jaatwemuge. Ätrunga biname cina miiji teeme kokre, teeme ireclota, piyepu teeme mule Keriso bau ca yaawadanemusi. Mine piba yepä tääpe pana gigri luutinago, yepä pana läbitinago Acejiyame te lipu mibibine niwadininge.

Keriso me Budre piyepu Arpinenta Lipu Gemi Mime tääpume

²⁰ Keriso liba budre äbituji, weeme sasa ireclota ten cama budre ge, siige weene äsecrera gemi ai gawecewe me mule cabu ca. Cije piba weene ngena tääpume cerämu inajininige ai gawecewe me ireclota mule cabu? Weene ngena tääpume gawecewe me cotre bine singi gemi wawename apu egä,

²¹ “Gone ai gwidape ne ime ca oomlana,” coo piyepu, “Gone ai deedei äbita”, coo, “Gone sui acata”.

²² Iyeta pepu cotre lui deedei piyepu gwidape poto cidi me, lui bime lenaja leca lica gyene, yepä watata lapirininusi, biname cina liba yäärwäjusi. Binamerage cina pui cotre bine jaawenemusi piyepu yaabiberäjemusi.

²³ Yoo, poto biname cina apu jengenemuge egä pepu cotre pana miiji gemi, ingle peei cina biname bine yaabiberäjemuge teeme bucurage irecu ätumuta mule wawenecame, piyepu yaabiberäjemuge sinäme teemämu matikolä me äbitame, cuta piyepu

yaabiberäjemuge teeme tääpe bine niiya me wawename. Yepä, pepu cotre cina äblicäco biname bine ätityera teeme tääpe me niiya singi bine ägyemame.

3

¹ Yoo, Acejiyame liba Keriso ne budre cabu ca itu erpinantuji, tabe ten cama weebibine cuta irpinäripi weeme sasa ireclota cabu ca kirece ireclota ne päpäname. Peei name pi weeme ngene atwanena icranemeye pui gwidape cabu me lui piti nemi cabucewe je. Keriso te adnatäneji enajenige puma Acejiyame me camu poto ime ca iyeta gwidape bine waadename.

² Yoo, weene cabucewe gwidape poto cidi me ngene jotwananineye, gone ai gawecewe gwidape poto cidi me ngene atwanena,

³ ingle weeme sasa gawecewe ireclota te budre gyene. Siige, weeme toraca ireclota lui cabucewe sine, Acejiyame cabu ämlitäneji gyene Keriso cama.

⁴ Yoo, tabe lui weeme toraca ireclota gyene, piipepu tabe liba gawecewe me cire tacnenutepi, weene piba teeme jamyacu apaclyera cabu cirege lenaja.

Sasa Ireclota piipepu Kirece Ireclota poto cidi me

⁵ Ai gawecewe me niyarage singisingi bine iyecräjemeye weeme ireclota cabu ca. Cane naace me jicenine egä sargi mule gone, jugijugi mule gone, niiya singisingi gone äbitena, gone conocono mule täápume singi, piipepu gone baborage singi äbita ai gawecewe me gwidape täápume egä weene Acejiyame täápume singi cäco äbitame.

⁶ Acejiyame te singi lica gyene iyeta peei mule täápume. Teeme mäpu daremu pisi nyene teeme täápume lui cina singi lica teeme mene wawename.

⁷ Yoo, niinäce padare cabu weene pepu mule tewenenäjenumumeye, cuta peei niyarage ngene atwanena cina piba weeme ireclota bine ewademujisi.

⁸ Yepä, page iyeta ai mule bine iyebhengemeye. Gone claabe cama lenaja, piipepu gone wata drowä me läbitininuye, cuta piipepu gone nuuja biname bine ämugetna. Äcela piipepu jugijugi mene weeme tage cabu ca yääyebhengemuye.

⁹ Walya mene gone jajanena, ingle weene weeme sasa ireclota mule bine ituge abmaläcema,

¹⁰ kirece ireclota mule ne ituge acata. Yoo, Acejiyame lui te weebibine kirece me itu jiwenipi, tabe weebibine cuta teeme pana me imacetnäjininige weene teebine cängena umle äbitame.

¹¹ Apu ireclota cabu nuuja gawe biname cina mara lica gemi Israela biname bime cabu ca, piipepu lui biname cina ituge acata Acejiyame me cewecu teeme tääpe cabu, teepi mara lica gemi biname cabu ca lui cina cewecu cäco gemi. Maramara mene biname cuta piipepu glunubororage biname Acejiyame me opo gaabe je teepi mara lica gemi. Cuta epu biname mara lica gemi lui cina aletnäneji gemi kaakesea daremu cäco wawename piipepu biname lui teemämu ire latwinusi. Teepi iyeta lui yepä gemi Acejiyame me opo gaabe je. Keriso taatu baborage gyene, piipepu tabe iyeta teeme biname cina enajenige.

¹² Yoo, weene Acejiyame me biname gemi. Tabe baborage singi ge weeme täápume, weebibine itu jijäcrininuji teeme biname me äbitame. Peei name pi weene miiji weeme nuuja bine owecu jaawenemuye, teebibine yäätityäremuye. Weene weemämu matikolä me läbitininuye, gaawida me läbitininuye, cuta piipepu wata durau me gone äbita.

¹³ Nuuja biname te liba matikolä conocono jaawenuge weeme yepä ne, gone peei ne babo me wawena. Nuuja biname te liba meebine niiya mule naawenuge, peei täápume gone niiya ngene jwaatwananute, yepä ngene jaape-cnute Keriso lipu mäame niiya mule bine teeme cabu ca itu iyebhengemuji, piba cuta pui biname poto cidi me niiya ngene atwanena ne yääyebhngtute.

¹⁴ Piipepu iyeta peei mule cabu weene biname bime täápume singi läbitininuye, ingle singi te iyeta gwidape bine toraca yepä me jaawenemuge.

¹⁵ Keriso bau ca lui poode ne weene padare yääcärye weeme ngenecu cabu cängena lenaja weebibine waadename, ingle Acejiyame te weebibine ituge ala asogleca weene peei poode cabu yepä tääpe pana gigri lenajame. Yoo, Acejiyame ne eso yääcärye.

¹⁶ Miiji Mene ne Keriso me miiji ätityera poto cidi me, weeme ngenecu cabu yaacituye puma lenajame. Piba umle cama weeme yepäyepä bine yaabiberäjemuye piipepu toraca gaabe jaawabäjemuye. Uupera bine yaatangemuye: poto Salamo peba cabu ca, poto irecu ätumuta uupera, piipepu Aceji Seemo te ngena uupera icärininuge. Weene uupera bine yaatangemuye iyeta weeme ngenecu cama Acejiyame ne eso ceerame.

¹⁷ Piba weene ngena jicuye, coo ngena jaawenuye, iyeta Yageyame Yeesu me ngii cabu jaawenemuye, piipepu teeme ätityera cama weene eso yääcärye Acejiyame mime Babe ne.

¹⁸ Magebi, maane määme rooriye ne yäätecijuge teeme singi wawename, ingle naace popi Keriso me biname cina miiji pepu pana lenaja.

¹⁹ Rooriye, maane coga ne owecu jwaawenute, cuta teeme täápume gaawida pana naanajuge.

²⁰ Bägä, iyeta padare weene weeme mage babe mene cängena jäätecijemuye, ingle naace popi Acejiyame singi gyene teeme biname cina pepu lenajame.

²¹ Mage babe, gone weeme bägä bine ngenecu niya me jaawenemuye, ingle miiji lica teepi ocinyerame äbita.

²² Aletnäneji biname, weeme ai gawecewe yageyame me mene jäätecijuye iyeta padare cabu, lica eei taatu padare teepi liba weebibine jipänininsi, teebibine ngenecu miiji me wawena täápume, yepä iyeta padare weeme kaakesea iyeta ngenecu cama jaawenuye mime cabucewe Yageyame ne pepu opo gaabe me acitame.

²³ Yoo, iyeta weeme kaakesea weene miiji cängena jaawenemuye, ingle weene mime cabucewe Yageyame täápume jaawenemuye, lica gawecewe biname täápume taatu jaawenemuye.

²⁴ Weene ngene jwaatwinuye egä mime Yageyame me miijirage daremu pisi nyene, tabe lui teeme biname bine cirege ceera. Yoo, weeme toraca Yageyame lui Keriso peese nyene.

²⁵ Piipepu lui biname te conocono jaawenuge, tabe cuta teeme mäpu daremu cirege acata, ingle Acejiyame iyeta biname bine yepä pana cire jaatranemepi.

4

¹ Yoo, aletnäneji biname bime yageyame, weene miiji conocäco piipepu toraca mule cama ire jaatwemuye weeme aletnäneji kaakesea me biname bine, ingle weene umle gemi egä cuta weeme Yageyame pisi nyene cabucewe je.

Poto Umleumle Mene

² Weeme irecu ätumuta mule ne gone yaabmaluye, yepä Acejiyame ne mene cängena jaajananye, piipepu teebine eso mene yääcäranuye.

³ Weene liba irecu läutumutinuye, Acejiyame cuta cime täápume ewejanineye egä tabe cibibine miijirage gaabe ceerame teeme mene Keriso poto cidi me cängena biname bine jajanename, lui mene ai padare cabu aboclomteji gyene jajanena täápume, piipepu lui mene jajanena name pi cane krokeciye mete cabu nanajenige.

⁴ Yoo, Acejiyame ne yaawejanusi cane peei mene cängena, pajecurage iicaname, cane lipu miiji cirege iicana.

⁵ Umleumle inajipi biname gome lui cina ätrunga biname lica gemi, piipepu cängena ire padare täápume teebibine umle mene jajanename Keriso poto cidi me.

⁶ Weeme mene cabu ca teebibine miiji ngene atwanena piipepu ngenecu miiji yääcäremuye; weene liba teeme yepäyepä bine toraca ätityera cama mene jaawecnistemye.

Sebore Mene Poto Biname bime täápume

⁷ Cime ngenecurage biname Tukikus te weebibine iyeta mene pa jijanepi cime lenaja poto cidi me. Tabe te kaakesea cine cama cängenarage jaawenuge mime Yageyame täápume.

⁸ Cane naace name pi teebine weeme bau me jityepenine weebibine ngenecu miiji wawename cime poto cidi me.

⁹ Onesimus ten cama ädenige weeme bau me. Tabe mime cängena piipepu ngenecurage biname gyene; lui gyene weeme ätrunga ingle cabu ca. Teepi mene pa jijanepäsi iyeta gwidape poto cidi me ama lui cina äbitinisi.

¹⁰ Aristakus lui cane cama krokeciye mete cabu sine, tabe weebibine sebore jiweninige. Mareko cuta piipepu sebore jiweninige. Ai Mareko lui Banaba me ingle cabu ca gyene. Yoo, weene mene ituge ätecija Mareko ne cängena ire atwime, tabe liba weeme bau me läduge.

¹¹ Yosua, teeme nuuja ngii lui Yuustus, tabe cuta weebibine sebore jiweninige. Pei nesae taatu Israela cabu ca biname cina cane cama kaakesea jewenenäni naace täápume egä Acejiyame te biname bine ama waadename. Teepi cebine baborage nätityeräni.

¹² Epapras te weebibine sebore jiweninige. Tabe sine weeme ätrunga ingle cabu ca, piipepu Yeesu Keriso täápume kaakesea jewenenige. Tabe Acejiyame ne iyeta ngenecu cama yaawejanuge weeme täápume egä tabe weebibine itityärininige weene cängena aclajutame ätrunga cama. Tabe singi lica gyene nuuja te weebibine waadename weeme ätrunga cabu ca, yepä weene te conocäco Keriso me singi cabu lenajame.

¹³ Cane cämämu itu tepänumene, tabe cängena kaakesea lipu jewenenige weeme täápume piipepu weeme binamewale täápume, lui cina Laodikea piipepu Hirapoli cewe mameta cabu gemi.

¹⁴Yoo, Luuka cime miijirage dokta piyepu Deemas teepi cuta weebibine sebore jiwenin-inäsi.

¹⁵Weene mime ätrunga binamewale bine Laodikea cewe cabu jejemepeye egä cine miiji gemi teeme täápume, cuta piyepu mime ätrunga ingle binamewale lui cina Numpa me mete cabu tabasecretnige irecu ätumutame, pepu cuta teebibine jejemepeye.

¹⁶Weene liba ai mene ne weeme ätrunga ingle cabu niinäce pagege acnema, piba Laodikea cewe ätrunga ingle cabu me ecanepeye teepi puma cuta acnemame. Cuta pepu weene pui mene weeme ätrunga ingle cabu ecnemepeye, Laodikea cewe binamewale cina lui ne weeme bau me tityepumesi.

¹⁷Cuta Arkipus ne jejepeye egä, "Maane miiji mäame kaakesea mime Yageyame täápume cängena apirame."

¹⁸Cane cämerage ime ca ai mene ne yoogärenine egä cane PAULO te weebibine jiw-ablininine. Gone ngene jitrimalinuge egä cane krokeciye mete cabu nanajenige, yepä Acejiyame ne cäme täápume ewejaneye weene.

Acejiyame me miiji te weeme cabu lenajame.

Cane ngii Paulo, siige cäme mene ngälu peese nyene.

PAULO ME NIINÄCE LETA TESALONIKA ÄTRUNGA BINAME BIME BAU ME

¹ Cane Paulo, Siila piyepu Timoti cama, yoogärenänogo weeme bau me lui cina inajininige Keriso me ätrunga biname bime ingle cabu Tesalonika babo cewe je. Weene mime Aceji Babe me biname gemi, cuta piyepu Yeesu Keriso weeme Yageyame gyene. Acejiyame me miiji te weeme cabu lenajame piyepu tabe weebibine poode ceerame.

Tesalonika Cewe Ätrunga Biname bime Ireclota Apu Gyene

² Iyeta padare cine liba Acejiyame bau irecu läutumutänogo, cine cuta weeme täápume yaawejänogo, piyepu teebine eso mene yäacäränogo weeme täápume.

³ Cine weebibine ngene jipecni-ninago Acejiyame mime Babe me opo gaabe je, weeme ätrunga te lipu laboclomtuge miiji mule cama. Cine ngene jipecninino weeme singi lipu gyene Yeesu Keriso täápume, ingle weene baborage kaakesea ituge wawena teeme täápume, piyepu teeme acnenuta ne cängena jewagrieniye.

⁴ Cime binamewale, cine umle gemi egä Acejiyame te singi gyene weeme täápume, piyepu weebibine itu jijäcripi teeme binamewale me äbitame.

⁵ Cine Miiji Mene Yeesu Keriso poto cidi me weeme bau me saacanepesi, lica mene taatu ca, yepä cuta kokre cama piyepu Aceji Seemo cama. Pepu pi cine pui mene ne yaaboclomtusi weeme bau me egä toraca gyene. Weene umle gemi cime ireclota lipu ge cine liba weene cama ituge lenaja, peei lui weeme miiji täápume.

⁶ Weene cime mule piyepu Yageyame me mule bine itu jätutanemepeye. Weene Miiji Mene ne Aceji Seemo miiji gege cama itu yaacatepeye, ngänuge weene mäpu bine peei cabu ca jääpänemepeye.

⁷ Weeme miijirage ireclota cabu ca weene toraca ireclota gaabe ne yaaboclomtuye iyeta Makedoniya piyepu Akaya gawe ätrunga biname bime bau me.

⁸ Yoo, lica Makedoniya piyepu Akaya probins cabu taatu, yepä iyeta poto ta biname cina umle läbitininusi Miiji Mene Yageyame poto cidi me weeme miijirage mule name pi. Biname cina mene ituge ätecija weeme Acejiyame bau me ätrunga poto cidi me, peei name pi cime nuuja mene lica gyene peei täápume.

⁹ Iyeta pui biname cina mene jaajananusu weene lipu cibibine itu niwablipyey, siige weeme uuje cabu ca latatrongäripeye Acejiyame bau me, naace täápume weene Acejiyame ne awejename, lui gyene toraca piyepu ireclota cama,

¹⁰ piyepu teeme Bägrä ne awagriame cabucewe ca äiname. Peei lui Yeesu Keriso sine, tabe lui ne erpinantuji budre cabu ca. Yoo, Keriso te mibibine nisechrärenininige mäpu cabu ca lui te cire tädepi, Acejiyame liba niija mule biname bine cirege ablaweja.

2

Paulo me Kaakesea poto cidi me Tesalonika Cewe cabu je

¹ Cime binamewale, weene weemämu umle gemi egä cime otni weeme bau me papa me lica läbitepi.

² Weene umle gemi cine mäpu ireclota piyepu äcneca lipu itu jääpänepesi Pilipi babo cewe cabu je. Cine puma cita ca weeme bau me naclepi. Yoo, puma poto biname cina singi ge cime mene iibaname, yepä mime Acejiyame te cibibine kokre itu nicäripi Miiji Mene weebibine jajanename.

³ Yoo, cine liba biname bine jaajanemususi Miiji Mene ne acatame, cine walya mene lica jiiemususi. Cime ngenecu muge lica piyepu toraca birige, piyepu cine lica äbitenänogo nuuja biname ne angletnejame.

⁴ Iyeta padare cine jiiemususi Acejiyame lui mene täápume singi, ingle tabe cibibine ituge apicetnera, piyepu cime toraca ngene atwana itu jepänuji, piba ai kaakesea nicärininuji Miiji Mene Yeesu Keriso poto cidi me jajanename. Cine mene lica jaajanemususi biname cina singi äbitame cime täápume, yepä Acejiyame te singi äbitame, lui te cime ngenecu nipicnantinuge.

⁵ Yoo, weene umle gemi egä cine weebibine lica itu owe iswipago, piyepu Acejiyame umle gyene egä cine lica Miiji Mene jaajanemepesi gwidape päpäname weeme bau ca.

⁶ Cine nuuja singi lica ge awepyeräja päpäname weeme bau ca, coo nuuja biname bime bau ca.

⁷ Cine Keriso me ätyepäneji biname gämi, peei name pi cine miiji ge weebibine jaji cime singi gwidape ceerame, yepä cine pepu ätinera lica birige. Cine weebibine owelaamelame itu itityäripago, epu pana mage te lipu teeme bägrä ne cängena ire jaatwuge.

⁸ Peei weeme tääpume baborage singi name pi, cine gege ge weebibine lica Acejiyame me Miiji Mene jajanename taatu, yepä iyeta cime ireclota cama jajanename. Cine pepu baborage singi ge weeme tääpume.

⁹ Cime binamewale, weene ngene nipecniniye cine lipu ime ca kaakesea ne itu jaawenepesi kokre cama. Ciiye bimu cine kaakesea bine cängena jaawenemusi cime lenaja tääpume, ingle cine singi lica ge weeme nuuja ne mäpu ceerame peei poto cidi me, pui padare cine liba Acejiyame me Miiji Mene weebibine jijananiusi.

¹⁰ Weene weemämu umle ituge piyepu Acejiyame umle gyene egä cime mule weeme bau me lui conocäco ge. Weene lui cina Acejiyame ne jäätrunguye, cime mule weeme tääpume toraca piyepu cängena ge.

¹¹ Weene umle gemi egä epu pana babe te teeme bägrä bine lipu yäätityäremuge, cine weebibine iyeta pepu itu itityäripago.

¹² Cine weebibine ngenecu kokre itu jiwenipago piyepu nuuja taje ngenecu plowa me jiwenipago. Cine jijananiyago weene epu cängena lenajame Acejiyame lipu ireclota tääpume singi, tabe lui weebibine ituge jäjäcra teeme jamyacu apacyera cabu lenajame piyepu tabe te weebibine waadename.

¹³ Yoo, cine liba Acejiyame me mene weebibine jijanipago, weene cängena piba itecijipi, siige yaacatepeye. Cine peei tääpume Acejiyame ne eso yäacärusi. Weene peei mene ne itu yaacatepeye egä Acejiyame me toraca mene gyene, lica biname bime mene. Peei te kaakesea weeme cabu jaawenanuge, lui cina ätrunga biname gemi.

¹⁴ Cime binamewale, ngena te itu läbitepi Acejiyame me ätrunga ingle biname bime tääpume Yuudea gawe cabu, peei te cuta weeme tääpume ituge äbita, ingle weene iyeta lui Yeesu Keriso me biname gemi. Poto weemerage biname cina weebibine mäpu ituge ceera, epu pana Israela biname cina lipu Yuudea gawe ätrunga biname bine mäpu padare ituge ceera.

¹⁵ Yoo, sasorage poto Israela biname cina Acejiyame me mename biname bine eglecimujisi; ingwe ca nuuja cina Yageyame Yeesu ne agli me jewenujisi; piyepu page poto cina cibibine mage mäpu nicäraninusi. Teepei Acejiyame me singi cäco mule bine jaawenemusi, cuta piyepu cubuyame me läbitininusi iyeta biname bime tääpume.

¹⁶ Teepei cuta cibibine iibaname läbitininusi, cine liba gawe maramara biname bine jaajanemusi teepei lipulipu teeme niya cabu ca äsecrera. Pepu pi teepei teeme niya mule bine babo jaawenemusi, siige page teeme mäpu daremu te tädenige Acejiyame bau ca.

Paulo Singi Ge Teebibine Ängrärame

¹⁷ Yoo binamewale, cine liba weebibine itu ibmalipago matikolä padare poto drowä biname name pi, cine mage ngene jipecnipago, piyepu bucurage padare cine lapicnantipago weebibine ängrärame, yepä äblicäco ge. Ngänuge cine cudecewe weeme bau ca, cime ngene atwana lui weeme cabu sine.

¹⁸ Cine baborage singi puga ge weebibine ängrärame. Bucurage gääbu cane Paulo te lapicnantune weeme bau otnime, yepä Satani te cime gaabe cabu larmenutanuge.

¹⁹ Yoo, weeme bau ca cine ngenecu gege jääpänusi. Weene peete nemi lui poto cidi me cine mene cire jiicepesi mime Yageyame Yeesu me opo gaabe je, tabe liba cire tacnenutepi, egä, "Cime kaakesea cabu ca biname age temi." Weene peei abasecretna cabu cirege.

²⁰ Toraca, weene peete nemi cibibine ngenecu gege me lui cina niweninininuye. Weeme ätrunga cabu ca cime kaakesea te miiji me läbituge.

3

¹ Yoo, cime singi te baborage itu läbitepi mene ätecijame weeme poto cidi me. Peei name pi cine mene jaatranepesi cine neeneni cina ama lenajame Atena cewe cabu je,

² piba Timoti ne ätyepame peeyeme weeme bau me. Timoti mime biname gyene. Tabe lui Acejiyame me kaakesea cine cama jaawenuge Miiji Mene Keriso poto cidi me jajanename. Yoo siige, cine teebine itu jättyepesi weebibine ätityerame weeme ätrunga kokre wawename,

³ piba weeme nuuja te ätrunga gaabe ne lica abmala, mäpu ne liba jääpänuge. Yoo, weene umle gemi egä Acejiyame te singi mine mäpu cabu matikolä lenajame mime ätrunga ne kokre wawename.

⁴ Cine liba weene cama ituge lenaja, cine niinäce gaabe itu jijipago egä mine mäpu padare ne pagege päpäna. Siige, weene page umle gemi egä pepu pana ituge äbita.

⁵ Peei name pi cane Timoti ne itu jättyepene, ingle cane baborage singi ge mene ätecijame weeme ätrunga poto cidi me. Cane ngenecu mäpu ge egä pui angletnaja biname

Satani te pama weebibine itu ingletnäjipi iyeta cime kaakesea weeme cabu sabe wawename.

⁶ Yoo siige, Timoti bii tacnenutige gege mene cama, egä weene Acejiyame ne camu jitrungeniye, cuta piiyepu weemeweme owecu läbitaniniye. Tabu cuta nijinige egä weene cibibine gege cama ngene nipecnininuye. Tabu nijinige egä weeme singi cibibine opo päpäname lui epu gyene cine lipu singi opo päpäname weebibine.

⁷ Binamewale, iyeta cime mäpu piiyepu ngene cewe oocanena cabu, page cine ngenecu plowa bii jepänisi weeme poto cidi me, ingle weeme Keriso bau ätrunga müji pi.

⁸ Yoo, page cime ireclota toraca müjirage gyene, weene liba Yageyame cabu kokre cama imyemutenininige.

⁹ Yoo, cine lipulipu Acejiyame ne ibibirage eso ceerame, ingle page cime ngenecu gege baborage gyene teeme opo gaabe weeme name pi!

¹⁰ Ciye bimu cabu cine Acejiyame ne ewejanenisi egä cine weebibine päpäname piiyepu ceerame weene lui täápume singi weeme ätrunga kokre me wawename.

¹¹ Mime Aceji Babe piiyepu mime Yageyame Yeesu, cine teebibine aawejanenisi gaabe amacetnäjame cine weeme bau otni-me.

¹² Cine singi gemi Yageyame te weeme singi ne baborage wawename weeme yepäyepä bime täápume cuta piiyepu iyeta nuuja biname bime täápume. Weeme singi nuuja biname bime täápume piba yepä pana pa läbitepi cime singi te lipu baborage gyene weeme täápume.

¹³ Tabu ngenecu kokre pa icäripi, piba mime Yageyame Yeesu te liba cire tacnenutepi iyeta teeme conocäco biname cama, weene piba epu cäco piiyepu conocäco cirege, weene liba mime Aceji Babe me opo gaabe je cire niclajutipi.

4

Acejiyame Apu Ireclota Tääpu Myene Singi

¹ Cime binamewale, cine weebibine ituge jaji Acejiyame te lipu ireclota mule täápume singi, piiyepu cine umle gämi egä weene pepu mule ne ituge acata. Page cine weebibine cängena itemli-ninago piiyepu jijaninago Yageyame Keriso me ngii cabu, weene pui ireclota mule ne cerämu babo me wawename.

² Ingle weene umle gemi lui mene cine weebibine ituge jaji ireclota mule poto cidi me, egä peei mene lui Yageyame Yeesu bau ca gyene.

³ Agesa Acejiyame me singi weeme täápume: Tabu singi gyene weene weeme ireclota iyeta teeme cabu acraname, piiyepu iyeta sargi mule bine ägyemame.

⁴ Weene yepäyepä cina müji umle äbitineye lipu gyene coga awadrecä conocäco piiyepu ajiri cäco mule ca,

⁵ piba weene nüya singisingi lica läbitininuye, epu pana biname liiyepu lui cina Acejiyame umle lica gemi.

⁶ Weeme nuuja te gonerage teeme ätrunga biname ne nüya jaawenute teeme coga awepläcäta ca, ingle Yageyame te mäpu daremu cirege ceera biname ne lui te pepu mule ne jaawenuge, cine lipu weebibine ituge umle cama jaji.

⁷ Yoo, Acejiyame mibibine lica ituge äjäcra sargi mule wawename, yepä teeme conocäco biname lenajame.

⁸ Peei name pi lui te ai mene jäägyuge, tabu lica biname ne ägyi, yepä Acejiyame ne jäägyuge, lui te weebibine Aceji Seemo icärinininuge.

⁹ Yoo, cine lica mene yoogärenago owecu poto cidi me weeme ätrunga binamewale bime täápume, ingle weene peei abiberäja ituge acata Acejiyame bau ca.

¹⁰ Piiyepu toraca gyene egä weene owecu cama jaawenemuye iyeta weeme ätrunga binamewale bine ai Makedoniya probins cabu je. Page cine singi gemi weene weeme owecu mule ne cerämu babo me wawename.

¹¹ Weene müji ngene atwanena bojäcu lenajame, poto bime mule cabu gone papa labrabicininuye, cuta piiyepu weeme singi gwidape bine weemämu kaakesea cabu ca jääpänemuye, cine lipu weebibine ituge jaji.

¹² Piba weene lica nuuja biname bine ätineräja, cuta piba nuuja biname lui ätrunga biname lica gemi, teepi weebibine opo gaabe me icranininusi.

Mime Yageyame me Acnenua poto cidi me

¹³ Cime binamewale, cine singi weebibine toraca umle wawename biname poto cidi me, lui cina ai ireclota cabu ca ituge apira. Piba weene ngenecu mäpu lica birige, epu biname liiyepu lui cina lica jewagrijenisi ingwe ca ireclota ne.

¹⁴ Mine jäätrungusi egä Yeesu tabu budre ge, piiyepu budre cabu ca itu arpinantuji, peei name pi mine cuta jäätrungusi egä lui biname cina ätrunga cama ituge budre äbita, Acejiyame teebibine Yeesu cama gigri cire yaawademepi teeme acnenua padare cabu.

¹⁵ Ai lui Yageyame me abiberäja mene gyene cine lui jijenininago. Mine lui cina ireclota cabu ninajininige Yageyame me acnenuta bimu cabu, lica niinäce gaabe me äbita mime ätrunga binamewale cabu ca lui cina ai ireclota cabu ca ituge apira.

¹⁶ Yoo, pui bimu cabu Yageyame te babo tage ca mene cirege jaji, cuta piyepu babo mename seemo me tagepogogo puma cirege, piyepu Acejiyame me moole pana gwidape te cirege angi, piba Yageyame te teemämu cire täinepi cabucewe ca gawe mameta me. Piba Keriso ne ätrunga biname lui cina ai ireclota cabu ca ituge apira, teepi budre cabu ca cire tarpinäripesi.

¹⁷ Piba mine lui cina ireclota cama cirege, Acejiyame te mibibine piyepu teebibine iyeta cire niwadipi carbe cabu me mime Yageyame cama opopa äyime puma lamlecu je buuwemope cabu. Siige, mine Yageyame cama piba gigri ninajininuge iyeteta ngälu cäco.

¹⁸ Yoo, weene peei mene lajananinuye ngenecu müiji me äbitame.

5

Weene Müiji Amacetnäjäneji Lenaja Mime Yageyame me Acnenuta täápume

¹ Binamewale, cine bucurage mene lica yoogärenisi mime Yageyame me acnenuta bimu piyepu padare potu cidi me,

² Ingle weene umle ituge äbita egä mime Yageyame liba cire tacnenutepi biname cina cälu te cirege äti, epu pana teepi cälu te lipu jättemuge ero biname te liba krokeciye cabu tatyaramtuge.

³ Yoo, biname cina liba cire jüicepesi egä, “Cewe bojäcu gyene, mine cängena gemi,” piba taatu teepi baborage mäpu ne cirege päpäna. Pui mäpu te cire tatyaramtepi, epu pana pita te lipu tatyaramtuge magebi te iigyärame liba läbituge. Biname cina licarage uucratna peei mäpu cabu ca.

⁴ Yepä, cime binamewale, weene lica krokeciye cabu inajininige, peei name pi pui bimu te weebibine lica epu pana cälu te jitinuge ero biname te liyepu.

⁵ Yoo, mine lica gemi epu biname pana lui cina ciye me krokeciye cabu yaacrajuge, yepä mine iyeta lui epu pana gemi bimu me apaclyera cabu lui cina ninajininige.

⁶ Peei name pi mine müiji cängena ireclota lenaja conocäco ngene atwana cama, piyepu lica nuuja biname pana liyepu lui cina ute pana lenaja.

⁷ Yoo, ciye cabu biname cina ute waagraruge, cuta piyepu ciye cabu nuuja cina sice buduma pana waatninusi.

⁸ Yepä, mine bimu me apaclyera cabu waatninago, peei name pi mine müiji cängenarage lenaja. Mine mime singi yaacranusi Acejiyame bau me piyepu teebine cängena jättrungusi. Peei lui mime seemo täápume epu pana älyenga gwidape birige mime tääpe täápume. Mine cängena jewagrijenisi pui padare ne Acejiyame liba mibibine cirege waadena. Peei awagrija lui mime täápume epu pana älyenga gwidape birige mope täápume.

⁹ Acejiyame te mibibine nijäcrininuji lica mäpu daremu päpäname, yepä iyeteta ireclota päpäname mime Yageyame Yeesu Keriso me ätityera name pi.

¹⁰ Tabe te budre ituge päpäna piba arpinantuji ai ingle name pi mine ten cama ngälu cäco lenajame. Mara pana lica gyene mine liba ireclota cama, coo, mine liba ireclota ituge apira teeme acnenuta padare.

¹¹ Yoo, peei name pi weene yepäyepä bine itityäremeye piyepu ngenecu kokre ecäremeye, page lipu jeweneneniye.

Paulo Teeme Leta ne Umleumle Mene ca Ermuji

¹² Cime binamewale, cine cängena jijinago weene teebibine niinäce gaabe me wawename lui cina Acejiyame me kaakesea weeme ätrunga ingle cabu cängena jaawenusi, lui cina weebibine iwadininusi piyepu ibiberäjininusi Keriso me ireclota gaabe cabu lenajame.

¹³ Yoo, teebibine opo gaabe me yaacranemuye piyepu baborage singi läbitininuye teeme täápume, teeme kaakesea name pi. Weene iyeta poode cama inajininuge.

¹⁴ Cime binamewale, cine weebibine cängena jijinago egä ai mule bine wawenecame: Biname bine yaablawäjemuye lui cina singi lica kaakesea wawename; wäluwälu mule biname bine kokre me jaawenuye; laatibi ätrunga cabu bleela birige, teebibine yäätityäremuye; piyepu iyeta biname bine owelaamelame jaawenemuye.

¹⁵ Weene ire egä nuuja te gone niya ne jaawenute daremu awecnistame, teebine liba niya mule jaawenusi, yepä iyeta padare weene lapicnantinuye weeme yepäyepä bine müiji mule wawenecame cuta piyepu iyeta biname bine pepu müiji wawenecame.

¹⁶ Ngenecu gege inajininuge iyeta padare cabu;

¹⁷ piyepu iyeta padare weene müiji Acejiyame bau me mene iicemame;

¹⁸ cuta piyepu ngänuge weene lipu ireclota cabu inajininuge, weene eso yääcäruye Acejiyame ne. Yoo, Acejiyame te singi gyene weene peei mule bine weeme ireclota cabu wawenecame, ingle weene Yeesu Keriso me binamewale gemi.

¹⁹ Aceji Seemo lui kaakesea ne weeme cabu jaawenuge, gone iibana teebine.

²⁰ Biname te liba Acejiyame me tagepogogo mene jüicemuge, gone teeme mene wata ägyi, yepä jäätecijuye,

²¹ jaatranuye egä nää toraca Acejiyame bau ca gyene, coo lica. Lui müiji gyene, weene peei ne joomluye,

²² yepä iyeta lui nüiya gyene, peei bine jäägyemuye.

²³ Acejiyame lui te mibibine poode nicärininuge, cine teebine ewejanenisi tabe weebibine teeme täapume mara me wawename iyeta weeme ireclota ngalebora, piyepu tabe weeme seemo, trupa, piyepu täape bine cängena ire atwime weene epu cäco äbitame mime Yageyame Yeesu Keriso me acnenuta padare cabu.

²⁴ Yoo, Acejiyame lui te weebibine ala tisogleceninuge, tabe ai mule bine pa jaawenemepi, ingle iyeta teeme mene tabe toraca jaawenemuge.

²⁵ Ätrunga binamewale, cine singi weene Acejiyame ne awejena cuta cime täapume.

²⁶ Iyeta cime binamewale peema sebore mene cama jajecletnäjäineye.

²⁷ Cane Paulo weebibine jjenininine Yageyame me ngüi cabu ai leta ne acnemame iyeta ätrunga binamewale bime bau me.

²⁸ Mime Yageyame Yeesu Keriso me müiji te weeme cabu lenajame.

Cane ngii Paulo, cäme mene ngälu peese.

PAULO ME NEENENI MANU LETA TESALONIKA ÄTRUNGA BINAME BIME BAU ME

¹ Cane Paulo, Siila piyepu Timoti cama cane yoogärenänogo weeme bau me, lui cina inajininige Keriso me ätrunga biname bime ingle cabu Tesalonika babo cewe je. Weene mime Aceji Babe me biname gemi cuta piyepu Yeesu Keriso weeme Yageyame gyene.

² Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi weebibine poode ceerame.

Acejiyame te Biname bine Toraca Cirege Atrana

³ Cime ätrunga binamewale, iyeta padare cine miiji Acejiyame ne eso ceera weeme potocidi me. Conocäco gyene cine peei ne wawename, ingle weeme ätrunga baborage me äbitenige piyepu weeme singi weeme yepäyepä täápume cuta äbitenige baborage me.

⁴ Peei name pi cine liba Acejiyame me ätrunga ingle maramara cabu wäänänogo, cine biname bine jejananemisi weeme potocidi me egä weene lipu ngenecu kokre cama inajininige weeme ätrunga cabu. Biname cina liba weebibine niya jiwenninusi piyepu weene liba mäpu padare jääpänuye, peei te weeme ätrunga ne licarage yääyeblyngtuge.

⁵ Peei iyeta cina jaawabusi egä Acejiyame me atrana lui conocäco gyene, ingle peei cabu ca weene miiji me pa läbitiye teeme waadena cabu äbäcname, lui täápume weene mäpu cabu page ngenec oceaniniye.

⁶ Yoo, Acejiyame iyeta gwidape conocäco cire jaawenemepi. Lui biname cina weebibine mäpu jiwenninisi, tabe teebibine mäpu cabu cire yaacranemepi.

⁷ Piyepu tabe weebibine weeme mäpu cabu ca cire isecräripi, cuta cibibine cime mäpu cabu ca cire nisechräpi, Yageyame Yeesu liba cire tabo-clomtepi cabucewe ca teeme kokre mename seemo cama.

⁸ Muye wädräji ca tabe biname bine mäpu daremu cire yäacäremepi lui cina umle lica gemi Acejiyame, piyepu Miiji Mene ne mime Yageyame Yeesu potocidi me lica yaacatusi.

⁹ Pui mäpu daremu lui egä teepi Yageyame bau ca cirege äyeblyngä niya puupu cabu lenajame iyeteta. Teepi piba äblycäco Yageyame gome lenajame, coo piyepu teeme jamyacu kokre päpäname,

¹⁰ tabe liba cire tacnenutepi ai gawecewe me ceräcerägäabu bimucabu, teeme apacyera te aboclomtame iyeta teeme binamewale cabu ca, piyepu iyeta lui cina teebine jäätrungusi teepi teebine awepyeräjame. Weene cuta piyepu pui biname cama cirege, ingle weene jäätrunguye cine lui mene weebibine ituge jaji.

¹¹ Peei name pi cine Acejiyame ne weeme täápume yaawejanusi tabe te weebibine peei ireclota täápume miiji me wawename lui täápume weebibine ituge jäjäcra. Cine teebine ewejanensi tabe teeme kokre ca iyeta weeme singi bine miiji mule täápume wawenecame, piyepu weeme ätrunga mule ne babo me wawename.

¹² Pepu pi mime Yageyame Yeesu me ngii te jamyacu apacyera cama laboclomtuge weeme cabu ca, cuta piyepu weene jamyacu apacyera ne cirege päpäna teeme cabu ca. Peei te cire läbitepi mime Acejiyame piyepu Yageyame Yeesu Keriso bime owecu cabu ca.

2

Ai Mene Lui Babo Niyyarage Biname potocidi me

¹ Yoo, cane singi mene jajime mime Yageyame Yeesu Keriso me acnenuta potocidi me, piyepu tabe mibibine lipu waadena ten cama lenajame peei potocidi me. Cäme binamewale, owecu, cane weebibine jijenininine egä

² gonerage ai walya mene ne padare yäacäruye weeme ngenec atwana ne atatrongärame piyepu weebibine ngenecu mäpu me wawename, lui mene egä, "Mime Yageyame me acnenuta bimute ituge atyaramta." Biname te liba Acejiyame me tagepogogo mene iicema cabu pepu jicuge, coo bääirmi mene cabu liba jicuge, coo liba jicuge egä cine te pepu mene ituge oogära weeme bau me, gone jäätrunguye.

³ Nuuja biname bime walya mene weene papa gone yaacatuye, yepä page umle äbitenye egä mime Yageyame me acnenuta bimute lica atyaramta ngälu bucurage biname cina liba niinäce cire latatrongäripesi Acejiyame bau ca, piyepu babo niyyarage biname te cire taboclomtepi. Peei ingwe ca Acejiyame teebine mäpu daremu cirege ceera tabe muye puupu cabu iyeteta lenajame.

⁴ Peei babo niyyarage biname te iyeta uuje bine cire yäaciseräjemepi piyepu iyeta lui bine acejiyame ca yaainemusi, iyeta biname cina lui bine yaawejanemusi. Tabe cire jiccepi egä

tabe baborage gyene iyeta peei cabu ca. Tabe cuta Acejiyame me iiwäreja mete me cire labacitepi puma adnatame walya mene cama egä, "Cane age säne Acejiyame."

⁵ Nää, weene ngene lica jotwiniye egä cane weebibine ituge jaji peei poto cidi me, cane liba puga ge weene cama.

⁶ Yepä, peei mule te camuge äbita, ingle weene umle gemi ngena pisi nyene peei niya mule ne iibaname ai padare cabu. Pui babo niyarage biname te cirege aboclomta Acejiyame me singi padare cabu, piba taatu.

⁷ Yoo, pui niya mule te uja ituge gije abacita ogä pana, yepä peei mule te lica babo cire läbitepi ngälu Acejiyame teeme biname ne cire yääyebingtepi lui te peei babo niya mule ne page jiibenige.

⁸ Piba taatu pui babo niyarage biname te cire taboclomtepi, piyepu Yageyame Yeesu teebine budre me cire yaaglepi. Yoo, Yeesu me buuwemope piyepu teeme jamyacu apacyera cama opo cina teebine cire yiisibrecepi.

⁹ Pui babo niyarage biname teeme kokre ne Satani bau ca cire jääpänepi maramara ciitaca mule, piyepu walya owowä, piyepu calu täti gwidape bine wawenecame.

¹⁰ Tabe babo niyarage mule bine cire jaawenemepi egä biname bine baborage cire yaangletnäjemepi, lui cina niya puupu me cirege otni. Teepi niya puupu cabu me otni, ai ingle naace popi teepi singi lica ge acatame pui toraca mene Yageyame Yeesu poto cidi me Acejiyame teebibine piba waadename.

¹¹ Naace name pi teepi singi lica toraca mene tääpume, ingle Acejiyame te teebibine kokre singi yäcäremuge walya tääpume teepi piba walya mene ätrungame.

¹² Piba iyeta lui cina babo singi ituge äbita niyaniya mule tääpume, piyepu toraca mene ne Yeesu poto cidi me lica jäätrungusi, Acejiyame te teebibine cirege jaji egä, "Weene niya conocono biname gemi, siige äyebinginey!"

Acejiyame te Weebibine Ituge Jäjäcra Toraca Ireclota Päpäname

¹³ Binamewale, cine miiji Acejiyame ne eso ceera weeme tääpume, tabe lui bime tääpume singi, ingle agedna cabu ca tabe weebibine itu jihinuji toraca ireclota päpäname. Tabe weebibine teeme miiji binamewale me ituge wawena Aceji Seemo me ätityera ca, weene liba toraca mene ne jitrungujiye.

¹⁴ Cine liba Miiji Mene Yeesu Keriso poto cidi me weebibine itu jijanininujago, Acejiyame te peei cabu ca weebibine ala tisoglicinuji mime Yageyame Yeesu Keriso me jamyacu apacyera cabu lenajame.

¹⁵ Peei name pi, cime binamewale, peei ätrunga cabu weene kokre cama jiclajutepi, piyepu cängena joomlemepye cine lui poto cidi me weebibine ituge abiberäja cime bäärmi cabu piyepu cime oogära mene cabu.

¹⁶⁻¹⁷ Mime Aceji Babe te mibibine baborage owecu cama ituge ätityera. Tabe mibibine iyeteta ngenecu kokre itu nicärininuji ciige poto cidi me, piyepu ngenecu kokre pui padare ne cängena awagriyame. Cine teebine ewejanenisi, piyepu mime Yageyame Yeesu Keriso taberage ne ewejanenisi, teepi weeme ngenecu kokre me wawename piyepu weebibine kokre ceerame iyeta miijimiji mene piyepu mule wawenecame.

3

Paulo Singi Gyene Teepi Ireclu Ätumutame Teeme tääpume

¹ Yoo, cime ätrunga binamewale, Acejiyame ne ewejaneye cime tääpume egä Yageyame me Miiji Mene wata babo me äbitame iyeta poto ta piyepu biname cina peei mene opo acitame, weeme gome lipu ituge äbita.

² Cuta ewejaneye tabe cibibine ätityerame niya conocono biname bime cabu ca äsecraram, ingle naace gyene poto biname cina singi lica gemi ätrungame.

³ Yepä, Yageyame toraca gyene. Tabe weeme ngenecu kokre icärininige piyepu weebibine iwärintininige Satani cabu ca.

⁴ Yoo, Yageyame me ätityera name pi cine umle gemi egä weene page piyepu ingwe padare cabu jeneneniyeye cine ngena jijenininisi weene wawename.

⁵ Cine Yageyame ne ewejanenisi tabe weeme ngenecu bine waadename Acejiyame me singi cabu me piyepu Keriso me ngenecu kokre cabu me lenajame.

Iyeta Biname cina Miiji Kaakesea Waweneca

⁶ Cime binamewale, cine weebibine jijeninago Yageyame Yeesu Keriso me ngii cabu weene cudecewe padare lenajame iyeta weeme ätrunga biname cabu ca lui cina singi lica kaakesea wawename piyepu singi lica cime abiberäja ngalebora lenajame.

⁷ Weene cängena umle gemi egä weene miiji cime pana mule wawena. Cine liba weene cama ninajininuji, cine durau lica birige kaakesea me.

⁸ Cine nuuja biname bau ca daremu căco deedei piyepu gwidape lica ewademujago, pätä cine mage kaakesea ituge wawena. Ciye bimu cine kaakesea jenuujago ngălu ciye duusa, ingle cine singi lica ge weeme nuuja ne măpu ceera.

⁹ Cime conocăco pisi nyene weebibine ätinerame cime deedei piyepu ute puupu täápume cime abiberăja kaakesea daremu täápume, yepă cine pepu lica jenuujisi, ingle cine singi ge weene cibibine ingwe äcwime.

¹⁰ Yoo, cine liba weene cama ninajininuji, cine piba weebibine jijanininujago egă, 'Lui te liba singi lica kaakesea wawename, tabe cuta gone deedei äbita.'

¹¹ Cine ai mene weebibine jijenininago, ingle mene ituge ätecija egă weeme poto biname cina durau gemi kaakesea täápume. Teeme nuuja kaakesea lica gyene, yepă teepi nuuja biname bime kaakesea täápume labrabicininusi.

¹² Pui biname täápume cine weebibine kokre jijenininago Yageyame Yeesu Keriso me ngii cabu teepi cängena lenajame piyepu teeme singi deedei piyepu gwidape bine kaakesea gaabe cabu păpăname.

¹³ Yoo, cime binamewale, gloose me gone äbita miijimiji mule wawenecame.

¹⁴ Liba biname pisi nyene weene cama lui te singi lica gyene ai oogăra mene acatame, weene teebine opo ewatneniye, piba ten cama gone abasuta teebine ajiri me wawename egă teeme mule conocono gyene.

¹⁵ Yepă, gone pui biname ne cubuyame pana jaawenuye, pätä teebine cängena umle jewenepeye teeme cono-cono mule abmalame.

Paulo Teeme Leta ne Ai Mene ca Ermuji

¹⁶ Mime poode te tädenige Yageyame bau ca, peei name pi cine teebine ewejanenago weebibine poode ceerame iyeta padare piyepu iyeta mule cabu. Yoo, Yageyame te weeme iyeta bime cabu lenajame.

¹⁷ Cane cămerage ime ca ai mene ne yoogărenine egă cane PAULO te weebibine jiwablini-nine. Iyeta căme leta cabu cane apu căme ngii yoogărune; căme oogăra apu gyene.

¹⁸ Yoo, cane mime Yageyame Yeesu Keriso ne ewejanenine weebibine owecu cama ätityerame.

Cane ngii Paulo. Căme mene ngălu peese.

PAULO ME NIINÄCE LETA TIMOTI BAU ME

Paulo Timoti ne Jewablenige

¹ Cane, Paulo, Keriso Yeesu me ätjepäneji biname gäne. Acejiyame, lui te mibibine niiya cabu ca nisechräinuge, piyepu Yeesu Keriso, mine lui cabu me ngene atwana singi yaacranimusi, teepi te najujäsi cane ai kaakesea wawename.

² Timoti, ätrunga cabu ca lui căme bägrä gäte, cane mäame bau me yoogärenine. Acejiyame mime Babe piyepu Keriso Yeesu mime Yageyame, teeme miiji te mäame cabu lenajame, teepi owecu äbitame mäame täapume piyepu poode ceerame meebine.

Ire Cängena Walya Abiberäja täapume

³ Cane cääri naajenine maane Epeso babo cewe je lenajame, cane lipu uja naajepene, Makedoniya probins me liba lädepene. Poto biname cina peema Epeso je walya abiberäja ne ecenanenisi, maane miiji jübbemepi teebibine.

⁴ Jjemepi teepi abmaläcemame teeme singi gidä mene täapume piyepu uuje saare bime ngii täapume, ingle naace popi teepi biname bine jaawenimusi pui poto cidi me mene atraname. Teepi puma cita ca lica jääpänusi Acejiyame me singi ne mime täapume, mine lui ne ätrunga taatu ca jääpänusi.

⁵ Cane ai mene naace name pi jüicenine, egä mine miiji mimämu singi äbitename epu singi cama, lui te täduge jugi cäco ngene atwana cabu ca, ngenecu poode cabu ca piyepu toraca ätrunga cabu ca.

⁶ Poto biname cina kaake ca itu sicelyäremumesi ai mule bine, siige kuu cäco mene bine jütranenemisi.

⁷ Teepi puu singi abiberäja biname me äbitame Acejiyame me cotre ngalebora, nuuja gwidape teepi umle lica gemi, teepi ngena täapume jüicemusi. Teepi supra cäco jüicemusi, yepä teepi mene me ingle umle cäco.

⁸ Mine umle gemi, egä Moose me Cotre lui miiji gyene liba cängena yääcwetnusi.

⁹ Mine gone ngene ätrimela, egä cotre cina lui miiji mule biname bime täapume lica gemi, yepä eei bime täapume lui cina cotre bine jaatropengäjimusi, ätecija cäco biname bime täapume, Acejiyame umle cäco piyepu niiyaniya muleyame biname bime täapume, cuta eei bime täapume lui cina Acejiyame ne piyepu teeme gwidape opo gaabe me lica yaacitusi, cuta eei bime täapume teeme mage babe bine lui cina budre me yaaglecimusi coo poto biname bine lui cina yaaglecimusi budre me,

¹⁰ cuta eei bime täapume lui cina magebi rooriye bime mule yaacnusi nuuja biname cama lui teeme coga coo rooriye lica birige. Cotre cina cuta rooriye imäbägrä bime täapume lui cina teemeteme laccaninusi, piyepu magebi ngulebägrä bime täapume lui cina peei yepä mule jaawenusi, cuta eei bime täapume lui cina biname bine aletname yaawadimusi, cuta lui cina walya waatromininusi, lui cina walya aitneja ne jüicusi, piyepu iyeta lui cina poto mule jaawenimusi, lui mara gemi toraca abiberäja cabu ca.

¹¹ Weene toracarage abiberäja ne Miiji Mene cabu ca jääpänuye, Acejiyame lui Mene näcäruji cane jajanemame. Miiji Mene lui babo jamyacu gyene, epucäco Acejiyame bau ca tädenige.

Acejiyame ne Eso Yääcäresi Teeme Owecu name pi

¹² Cane eso ecärenine Keriso Yeesu mime Yageyame ne, lui te kokre ituge ceera cane ai kaakesea wawename. Tabo nacatuji, egä cane toraca biname gäne, siige najuji teeme kaakesea wawename.

¹³ Cane puu niinäcerage niiya mene tiicemäjenumene teeme poto cidi me, teeme biname-wale bine sabe tewenenanenumene piyepu seglecenanenumene, yepä Acejiyame te cebine owecu nawenuji, niiya daremu lica näcäruji, ingle pui padare cabu căme ätrunga lica ge, peei name pi cane umle lica ge, cane ngena ne jewenujine.

¹⁴ Mime Yageyame babo owecu ge căme täapume, siige teeme pui owecu cabu ca cane kokre äbitujine Keriso ne ätrungame piyepu singi äbitame iyeta ätrunga biname täapume. Ätrunga piyepu singi lui eei biname bime täapume myene, Keriso Yeesu cama lui cina yepä gemi.

¹⁵ Ai lui toraca mene gyene, biname cina miiji acata, egä Keriso Yeesu lui täduji ai gawecewe cabu me niiya mule biname bine äsecerame teeme mäpu cabu ca. Cane age säne baborage iyeta niiya mule biname bime cabu ca.

¹⁶ Yepä Acejiyame te owecu nawenuji cebine, lui tage babo niiyarage biname, naace täapume Yeesu Keriso te căme cabu ca aboclomtame, egä teeme owecu lipu baborage gyene.

Yoo, lui biname cina pagege átrunga acita Yeesu cabu siige iyeteta ireclota ne pápána, teepi cáme cabu ca pa jáápánepesi Yeesu me owecu ne.

¹⁷ Tabe lui te iyeteta enajenige mope biname me, lui gyene yepá taatu Acejiyame, budre cáco piyepu pápána cáco, mine miiji teebine opo gaabe me acita piyepu awepyerája iyeta padare cabu. Ai mene lui toraca gyene.

¹⁸ Timoti, cáme bágrá, mááme kaakesea gyene biname bine abiberájame, cane ai leta cabu ngena yoogárinine. Maane liba ai ne jewenenite, piba toraca me ábitenige, biname cina lui Acejiyame me tagepogogo mene niináce gaabe me jicemepesi mááme poto cidi me. Maane miiji teeme pui mene kokre cama oomlaname, siige piba maane miiji gáte cángena cubu iicaname walya abiberája biname bine apremelame.

¹⁹ Kokre cama joomlepi átrunga ne piyepu niya mule gone jaawenute mááme ngenecu poode ne sabe wawename. Poto biname cina teeme ngenecu niya me ingle bine lica jáárngemusi ngena ca aglime, egá cine ngena niya ne ituge wawena, siige teepi teeme átrunga bine yaabmalimusi.

²⁰ Ai mule te itu lábítepi Humenus piyepu Aleksanda táápume. Cane teebibine itu lááyebingtepene átrunga ingle cabu ca, Satani me ime cabu laacitepene teepi piba abiberájame, egá teepi niyaniya mene gone iicema Acejiyame poto cidi me.

2

Irecu Átumutipeye Iyeta Biname bime táápume

¹ Yoo siige, cane baborage singi gáne weene Acejiyame bau me irecu átumutame, teebine awejename cuta eso ceerame iyeta biname bime táápume.

² Weene miiji irecu átumuta gawe mope biname bime táápume piyepu poto modamoda biname bime táápume mine piba bojácu lenajame piyepu poode cama. Mine piba miiji Acejiyame ne cabu me wawena piyepu biname bine opo gaabe me acrana.

³ Apu irecu átumuta lui miiji gyene, piyepu Acejiyame mime Ásecrerayame ne ngenecu miiji me jaawenuge.

⁴ Tabe singi gyene iyeta biname bine niya cabu ca ásecrerame piyepu teepi umle ábitame, egá ngena gyene toraca.

⁵ Yepá taatu Acejiyame pisi nyene, piyepu yepá taatu gyene, lui te biname bine teeme bau me ewadenemige. Pui lui biname gyene, Keriso Yeesu.

⁶ Tabe teeme ireclota ne iyemaluji iyeta biname bine kályá wawename teeme niya mule cabu ca. Siige ai mule ca tabe toraca padare cabu jewabudnituji, egá Acejiyame singi gyene iyeta biname bine niya cabu ca ásecrerame.

⁷ Peei name pi Acejiyame te cebine najuji átyepáneji biname táápume cane Miiji Mene ne acaname biname bime bau me, lui Israela biname lica gemi, piyepu teebibine abiberájame, egá toraca átrunga lipu gyene. Cane toraca mene jijenininine, walya lica otrominine.

⁸ Cane singi gáne rooriye cina iyeta átrunga maramara ingle cabu irecu átumutame Acejiyame bau me; cane singi teepi ime awepengájame toraca ngenecu cama irecu átumutame, claabe cáco piyepu niyarage ngena atwanena cáco.

⁹ Cuta piyepu átrunga magebi cina gone oráre abasogára. Teepi miiji cángena cábletáápe asigrera. Teepi gone abasogára bucurage kusa piyepu oplacmelája gwidape ca, poto edingáli abasogára gwidape ca coo babo daremu cábletáápe ca.

¹⁰ Pátá átrunga magebi cina miiji miijimiji mule waweneca, siige peei te teebibine jamyacu me jaawenimuge piyepu peei lui conocáco gyene magebi bime táápume, lui cina Acejiyame táápume mara me ituge ábita.

¹¹ Magebi cina miiji bojácu lenaja abiberája padare cabu piyepu teepi miiji átrunga ingle modamoda biname bine átecija.

¹² Cane singi lica magebi te irecu átumuta ngalebora abiberájame coo mope biname me ábitame rooriye bime táápume, yepá tabe miiji bojácu lenaja.

¹³ Ingle naace popi Acejiyame te Adamu ne niináce jewenuji, Eeba ne ingwe ca jowenuji, peei name pi rooriye te miiji mope biname me lenaja.

¹⁴ Cuta Adamu ne lica engletnájuji Satani te, yepá Eeba ne ongletnájui, siige tabe te Acejiyame me cotre ne jetropangtují.

¹⁵ Yepá, biname lui te ai gawecewe me niya ne ecatuji, tabe magebi me cabu ca gyene, peei name pi magebi cina teeme cabu ca ireclota ne birige pápána, teepi liba átrunga cama, owecu cama, epucáco piyepu cángena ngena atwana cama.

3

Mene Átrunga Ingle Mope Biname táápume

¹ Ai iicana lui toraca gyene egä, “Laati te liba singi ätrunga ingle mope biname me äbitame, tabe singi miijirage kaakesea tääpume.”

² Teeme cabu gone nuuja niya ne päpäna. Tabe miiji yepä taatu coga cama biname, tabe miiji teemämu awesongära piyepu miijirage ngene atwanena cama lenaja, tabe miiji miijirage muleyame biname, tabe miiji biname bine mogobi waweneca piyepu tabe miiji miijirage abiberäja biname.

³ Tabe gone bucurage sice nänäja biname piyepu arngi biname coo trängäli cama biname, yepä tabe miiji owecu cama piyepu poode cama. Tabe rarekaake singisingi gone.

⁴ Tabe miiji teeme mete biname bine cängena ire atwi, cuta teeme bägrä bine wawena teebine äteciyame piyepu opo gaabe me acitame.

⁵ Roooriye te liba äblicäco teeme mete biname bine ire atwi, tabe piba lipulipu Acejiyame me ätrunga ingle ne ire atwi.

⁶ Tabe gone kirece ätrunga biname, ingle naace popi pepu biname te liba läbituge ätrunga ingle mope biname me, tabe mope babo läbituge, siige teebine Acejiyame te jaatranuge, Satani ne lipu jitranuji, tabe liba mope babo me äbituji.

⁷ Cuta tabe miiji epu lenaja, egä ätrunga cäco biname cina teebine opo gaabe me yaacitusi. Tabe liba cängena lica lenaja, piba niya mene jicemusi teeme poto cidi me, siige Satani me dici te joomluge.

Mene Ätrunga Ingle Ätityera Biname bine tääpume

⁸ Ätrunga ingle ätityera biname cina miiji miijirage muleyame lenaja ätrunga ingle mope biname te liyepu. Teepi miiji toraca ngenecu cama biname. Teepi gone bucurage sice nänäja, gone rarekaake singisingi.

⁹ Teepi miiji yepä taatu ngene atwana cama oomlana toraca mene ne, Acejiyame te lui ne tewabudnituji ätrunga poto cidi me.

¹⁰ Teebibine miiji niinäce apicetnära. Teepi liba äsi pui cabu ca, siige teepi piba miiji birige peei kaakesea ne waweneme.

¹¹ Teeme cogawale cina cuta miiji miijirage muleyame cängena biname, conocäco taatu iyeta mule cabu. Teepi gone iicetna mule wawena.

¹² Ätrunga ingle ätityera biname cina miiji yepä taatu coga cama. Teepi miiji cängena ire atwi teeme bägrä bine piyepu iyeta mete biname bine.

¹³ Lui ätityera biname cina teeme kaakesea cängena jaawenusi, biname cina teebibine opo gaabe me yaacranimusi, teepi siige piba wälu cäco birige mene iicema Yeesu Keriso ne ätrungame.

Toraca Mene Ätrunga poto cidi me

¹⁴ Cane ai mene liba yoogärenine, cäme ngene atwana singi pisi nyene määme bau me watawata otnime.

¹⁵ Yepä cäme otni liba däägudägu gyene, ai leta te piba meebine umle naawenenige egä mine Keriso me binamewale lipu lenajame. Mine ireclota Acejiyame me binamewale gemi, teeme ätrunga ingle gyene, lui te jibyetrininige piyepu ewärimtenige toraca mene ne Acejiyame poto cidi me.

¹⁶ Mine iyeta umle gemi, lipu baborage gyene ai toraca mene Acejiyame lui ne seboclomtuji mime ätrunga poto cidi me egä,

Keriso biname me tääpe ne ecatuji,

teeme budre cabu ca arpinenta te jewabudnituji,

egä tabe Yageyame gyene.

Acejiyame me mename seemo cina teebine jepänanujisi.

Teeme poto cidi me mene jejananemujisi iyeta poto ta.

Bucurage biname cina teebine jitrungujisi

iyeta poto ta ai gawecewe cabu.

Acejiyame te teebine ecatuji cabu me.

4

Walya Abiberäja Biname

¹ Aceji Seemo te pajecurage jicenige, egä ceräcerägäabu padare cabu poto biname cina teeme ätrunga bine cire yaabmalecmepesi, siige gije cire labacitipesi walya seemo bine ätecijaname piyepu niya cable bime abiberäja ne ingwe äcwime.

² Apu abiberäja ne cire yaacenanesi walya angletnejayame biname, lui cina ngene ca lica yaaglusi, egä teepi niya mule biname gemi.

³ Teepi biname bine cire jibananemepesi coga rooriye awadrecame cuta cire jaawenemepesi poto deedei cibi cude me. Yepä Acejiyame te iyeta deedei cibi bine ituge wawena

loolo piyepu cibü tääpume. Mine lui cina ätrunga biname gemi piyepu umle ituge äbita toraca mene poto cidi me, mine eso cama ärngäjame piyepu ärwäjame,

⁴ingle iyeta, Acejiyame lui bine ituge wawenetnäja, miiji gemi. Nuuja ne gone ägyi, yepä miiji eso cama iyeta waadena.

⁵Acejiyame te lipu ituge cude cäco me wawena iyeta cibü deedei bine piyepu mine liba eso yäcärusi, ai neeneni ingle name pi iyeta cibü deedei miiji gemi cibü me piyepu loolo me.

Umle Mene Timoti bau me

⁶Timoti, maane liba umleumle jaawenimute ai walya abiberäja poto cidi me ätrunga biname bine peema, piba maane Keriso Yeesu me miijirage kaakesea bägrä gäte. Maane miiji cängena abiberäjepi Keriso bau ätrunga lipu gyene piyepu kokre joomlepi, maane lui toraca abiberäja ne ituge äcwetna, siige piba maane seemo ireclota cabu miiji naanajepi.

⁷Maane gone emä, gidä mene luma jücemimusi, ingle Acejiyame cäco papa mene gemi. Yepä maane miiji eei mule bine waweneca, lui cina mäame ätrunga ne babo jaawenusi.

⁸Biname te teeme täape ne liba jaapinicuge, peei lui miiji birige ai ireclota tääpume. Yepä tabe liba eei mule bine waweneca, lui cina teeme ätrunga ne babo me jaawenusi, pui lui iyeteta miiji gyene, ingle peei te ireclota yäcärüge page padare tääpume piyepu ciige padare tääpume.

⁹Ai mene lui toraca gyene, miiji acata.

¹⁰Mine lagletnäjinago, mage kaakesea jaawenusi, ingle mine ituge mime ngene atwanena singi bine acrana ireclota Acejiyame bau me, lui te iyeta biname bine birige äsecrera niija cabu ca, yepä toraca eei bine lui cina ätrunga cama gemi.

¹¹Jejananemepi, ebiberäjemepi ai poto cidi me.

¹²Nuuja te gone meebine mamye biname name pi äsädena. Pätä maane mäame ireclota cabu ca eboclomtepi teepi ngena iicaname piyepu wawename, teepi lipu owecu äbitame, ätrungame piyepu epucäco lenajame.

¹³Maane mäame kaakesea cabu ngenecu ecitepi, Oogäräneji mene ecnemepi ätrunga biname bime cabu me, bääirmi mene jegednemepi, ebiberäjemepi, ngälu cane pa lädepene peeyeme.

¹⁴Gone ai kaakesea ne yaabmalute, Aceji Seemo lui tääpume umle piyepu kokre näcärepä, niinäce gaabe ätrunga biname cina liba ime yaacranepesi mäame papa cabu me piyepu Acejiyame me tagepogogo mene iicana biname cina liba jücemepesi ai poto cidi me.

¹⁵Maane gone durau läbitute iyeta ai kaakesea wawename, yepä maane toraca ngenecu cama jewenepi, piba biname cina päpäname egä maane babo äbitenite.

¹⁶Maane ire, egä maane cängena naanajenige piyepu toraca mene ebiberäjenemite biname bine. Maane liba ai ne jaawenute iyeta padare cabu, maane ngälu cäco ireclota ne cire jepänepi piyepu lui cina mäame mene yäätcejemuge, teepi cuta ngälu cäco ireclota ne ire jääpänesi.

5

Timoti Lipu Lenajame Ätrunga Biname cama

¹Moda ne gone drämä cama ablawa, yepä cängenarage eblawepi, epu mäame babe ne lipu yaablawute. Mamye rooriye bine epu jewenemepi mäame naane igane bine liiyepu,

²molyege bine mäame mage ne liiyepu, mamye magebi bine mäame ngulewale bine liiyepu, epucäco.

³Maane itityäremepi cuublacubla bine, lui bime binamewale lica gemi.

⁴Yepä liba cuubla me bägräwale coo daadewale piti nemi, teepi miiji abiberäja teeme inglewale bine ire atwime, Acejiyame te lipu ituge jaji. Mage babe cina lipu bägrä bine ire jaatwemusi, teepi cuta miiji peei ne daremu wawena teebibine ire atwime, ingle ai lui Acejiyame me singi gyene.

⁵Lui cuubla me binamewale lica gemi teebine ire atwime, tabe teeme ngene atwanena Acejiyame bau me yaacituge, siige iyeta padare, ciye bimu, irecu lätumutanuge Acejiyame bau me ätityera ne päpäname.

⁶Yepä lui cuubla teeme singisingi tääpume waanajuge, tabe puu ireclota onajenige, yepä seemo ireclota ngalebora tabe budre gwene.

⁷Maane ai mene jejananemepi teebibine, piba nuuja te äblicäco niija mene iicana teeme poto cidi me.

⁸Laati te liba lica ire atwema teeme inglewale bine, toraca eei bine teeme mete cabu lui cina icrajenige, tabe teeme ätrunga ne jäägyuge, siige teeme mule niyarage gyene ätrunga cäco biname bime mule cabu ca.

⁹Maane epu cuubla bine ngii acranecame ätityera päpäname, lui cina siksti kāmäge cama piyepu yepä taatu rooriye cama ituge.

¹⁰Teepi miiji epu magebi, lui bime poto cidi me jicusi, egä teepi miijirage mule bine ituge waweneca, teeme bāgrā bine cāngena ituge waadena, cuta miijirage mogobiyame, gloose cāco owecu mule ituge waweneca poto ätrunga biname bime tääpume, cuta ituge ätityera lui cina mäpu cabu yaacrajuge. Teepi siige epu cuubla gemi, lui cina teeme ireclota yaacranepesi iyeta miijimiji mule bine wawenecame.

¹¹Yepä gone mamye cuubla bine ngii yaacranimute ätrunga ingle cabu ca ätityera ne päpäname, ingle singisingi ngene atwa-nena te liba joomlemuge, teepi Keriso ne kaake ca yäacelyärusi, siige latejeclājiniinusi.

¹²Teepi apu kaake me jaawenusi teeme niinäce mene Keriso me kaakesea wawenecame piyepu rooriye cāco lenajame, siige teebibine cirege ablaweja.

¹³Teepi cuta mete bine yaacnemusi, papa lenaja ca padare ne yaapirusi. Cuta peei taatu lica, teepi iicetna mule yaacnusi, poto biname bime mule cabu labrabinininusi. Piiyepu teepi mene jicemusi, lui bine teepi lica cirege iicema.

¹⁴Peei name pi cane singi gāne mamye cuubla cina cāäri rooriye awadrecame, bāgrā ärngecame piyepu mete gwidape bine ire atwime, piba mime äciseräjayame biname cina äblicāco mibibine aitneja.

¹⁵Cane ai naace name pi bii jicine, ingle poto cuubla cina uja ituge teeme ätrunga bine abmalācema, siige Satani ne icwetnenisi.

¹⁶Liba ätrunga magebi yepä me coo ätrunga rooriye yepä me cuublacubla piti nemi teeme ingle cabu, teepi miiji teebibine ire atwema. Ai mäpu gone ätrunga ingle biname bine ceera, piba teepi kälyä gemi ire atwemame lui cuublacubla taatu gemi.

¹⁷Niināce gaabe ätrunga biname lui cina miijirage mope biname me yaacrajuge, teepi ibibi gemi neeneni gāābu daremu acata, toracarage eei biname lui cina bääämi jaagednane-musi piyepu yaabiberājimusi.

¹⁸Oogārāneji mene te nata jicenige egä, “Lui kau te wiiti kuu bine jäämungājemuge, gone tage jäätäyuye tabe loolo cāco kaakesea wawename,” piyepu cuta jicenige egä, “Kaakesea biname te miiji ge teeme daremu ne päpäna.”

¹⁹Lui biname te ätrunga ingle babo biname ne jaaitnājuge, gone teebine ätecija, liba neeneni coo nesae biname lica gemi aitnejame, egä toraca gyene.

²⁰Lui biname cina niija mule jaawenimusi, biname bime sobe cabu yaablawimute, piba poto cina wālu läbitininusi.

²¹Acejiyame piyepu Keriso Yeesu piyepu äjäcrāneji mename seemo, teeme opo gaabe cane naajenine maane cāme mene ibi wawename. Gone nuuja ne owelale jaawenute, yepä maane miiji iyeta ätrunga biname bine yepä ibi yaablawājemute.

²²Gone naalocnicuge ime acitame biname cabu me teebine babo biname me wawename. Gone lalenglecājute nuuja biname bime niija mule cama, yepä maane epucāco naanajepi.

²³Niije taatu gone yāänājimute, waina niije cuta mati yaanute määme came niija name pi piyepu pitapita name pi.

²⁴Bucurage biname cina pajecurage niija mule yaacnemusi, siige teeme niija mule bine niinäce gaabe me jaatranimusi. Lui cina niija mule ogä yaacnemusi, ingwe ca pajecu me läbitininusi atrana tääpume.

²⁵Cuta pepu gyene, poto biname bime miiji mule bine pajecurage jääpānimusi, cuta lui cina päpäna cāco gemi page, teepi äblicāco ämlitāneji lenaja.

6

Mene Aletnāneji Biname bime poto cidi me

¹Ätrunga biname lui cina aletnāneji biname gemi, teepi miiji teeme modamoda biname bine opo gaabe me acrana, piba nuuja te äblicāco niija mene iicana Acejiyame poto cidi me piyepu mime abiberāja poto cidi me.

²Laati bime modamoda biname ätrunga biname, teepi gone ätecija cāco äbita teeme tääpume, ingle teepi yepä ätrunga cama gemi. Pätä teepi miiji teeme kaakesea cāngena wawena, ingle teeme modamoda biname teeme kaakesea cabu ca lui daremu jääpānusi, teepi teeme miijirage ätrunga binamewale gemi.

Maane miiji biname bine apu ebiberājemepi, kokre ecāremepi teepi wawenetnājame.

Walya Abiberāja piyepu Toraca Dogwe

³Laati te liba yaabiberājimuge mara abiberāja, lui yepä lica gyene mime Yageyame Yeesu Keriso me toraca mene cama cuta mime abiberāja cama ätrunga poto cidi me,

⁴ tabe mope babo me läbituge piyepu tabe umle cäco biname birige. Teeme niyarage singi pisi nyene mene poto cidi me äcelame piyepu mene abajame. Ai te biname bine jaawenimuge ire patre aglime, arngi me, niyaniya mene nuuja biname ne jajime, niyarage ngene atwa-name,

⁵ äcelename. Apu muleyame biname cina mopemuli cäco gemi; teepi toraca mule ne ituge abmala. Teepi apu angi ge, egä ätrunga lui gaabe gyene dogwe päpäna täapume.

⁶ Yoo, ätrunga gaabe te biname ne toraca dogwe me jaawenuge, tabe liba ngene ca jaagluge, teeme ngena pisi nyene.

⁷ Mine liba aplimla, mine nuuja gwidape cama lica otni; mine liba budre pagege, mine nuuja gwidape ne lica acana,

⁸ peei name pi mime liba deedei piyepu cäbletääpe piti nemi, mine miiji bojä agi.

⁹ Yepä lui cina singi bucurage gwidape täapume, teebibine birige angle-tneja piyepu Satani me dici te jaabaletnecimuge. Budubuduma piyepu niyarage singi cina teebibine joomlemimusi, ngälu siige iyeta niya cabu yaacranuge.

¹⁰ Rarekaake singisingi lui ingle gyene iyeta maramara niya mule bime täapume. Rarekaake ärngema cabu bucurage cina ituge teeme ätrunga bine apesera, siige bucurage mäpu cina teeme ngenecu bine jaagadäjemusi.

Ätrunga Biname me Ireclota

¹¹ Timoti, maane lui Acejiyame me biname gäte, cude padare naanajepi apu mule cabu ca. Maane ecrinäjemepi conocäco lenajame, Acejiyame ne opo gaabe me acitame, Keriso ne ätrunga-me, owecu me, ämyemutaname cewe oocana cabu, owelaamelame biname me lenajame.

¹² Maane ätrunga gaabe cabu cängena uuwamepi, siige iyeteta ireclota ne ecatepi, lui ireclota täapume meebine ituge ala asogleca, maane liba biname bime sobe cabu mäame ätrunga ne cängena eboclomtujite.

¹³ Acejiyame lui te iyeta gwidape bine ireclota ecäranenenemige, piyepu Yeesu Keriso lui te Pontio Pilato me opo gaabe ätrunga ne jewabudnituji, cane teeme opo gaabe naajenine

¹⁴ egä maane äteciyame, meebine ngena ituge jaji. Gone naatramuge ai cängena wawenecame ngälu mime Yageyame Yeesu Keriso te cire tacnenutepi.

¹⁵ Acejiyame lui te miiji gyene, lui yepä taatu gyene biname bine waadename, iyeta mope biname bime Mopeyame gyene, iyeta yageyame bime Yageyame gyene, tabe lui padare ne ecituji, tabe piba cirege teebine cääri ätyepa.

¹⁶ Acejiyame, tabe taatu gyene budre cäco. Tabe epu apaclyera cabu enajenige, egä nuuja te äblicäco teeme gome otni. Nuuja biname te lica ituge teebine päpäna cuta äblicäco päpäna. Mine miiji teebine opo gaabe me acitename, piyepu tabe kokre cama lenajame iyeteta. Ai lui toraca mene gyene.

¹⁷ Jejemepi ätrunga ingle cabu lui gwidape dogweyame gemi, teepi gone mope modamoda me äbita piyepu gone ngene atwa-nena acrana watawata dogwe cabu me. Pätä teepi miiji teeme ngene atwana acrana Acejiyame cabu me, lui te nicäraninuge iyeta, mine lui täapume singi mine gege lenajame.

¹⁸ Maane jejemepi teepi miijimiji mule wawenecame, siige piba pui miijimiji mule lui teeme dogwe gemi. Teepi miiji ceera biname lenaja, temiji kupae wawena poto biname bine.

¹⁹ Teeme apu mule lui dogwe pana gemi teeme ciige lenaja täapume, siige teepi toraca ireclota ne jääpänusi.

²⁰ Timoti, maane kokre joomlepi meebine ngena ituge ceera maane ire atwime. Maane cude padare lenajame budubuduma mene cabu ca piyepu cuta walya abiberäja cabu ca, lui täapume biname cina jaangemuge, egä umle mene gemi.

²¹ Poto cina ituge iicana, egä teeme pui umle puga ge, yepä teepi siige teeme ätrunga bine ituge apesera. Acejiyame me miiji te weeme cabu lenajame.

Cane ngii Paulo. Siige cäme mene ngälu peese.

PAULO ME NEENENI MANU LETA TIMOTI BAU ME

Paulo Jewablenige Timoti ne

¹ Cane, Paulo, Keriso Yeesu me ätyepäneji biname gäne Acejiyame me singi miji pi. Cane ätyepäneji gäne ireclota poto cidi me mene jajanenane, lui ireclota Acejiyame te ituge jaji ceerame piyepu lui ireclota mime yene, mine liba Keriso Yeesu cama yepä gemi.

² Timoti, ätrunga cabu ca lui căme mijirage bägrä gäte, cane mäame bau me yoogärenine. Acejiyame mime Babe piyepu Keriso Yeesu mime Yageyame, teeme miji te mäame cabu lenajame, teepi owecu äbitame mäame täapume piyepu poode ceerame meebine.

Paulo me Eso Mene piyepu Kokre Ceera Mene

³ Cane Acejiyame ne eso yääcărune, cane lui täapume kaakesea jewenenine toraca ngenecu piyepu mijirage asicnenta cama epu pana căme saarewale cina liyepu. Cane teebine eso yääcărune iyeta padare, ciye bimu, căme irecu ätumuta ngalebora liba meebine ngii naajanane.

⁴ Cane ngene jotwine mäame ele mäcu poto cidi me, siige cane baborage singi gäne meebinerage päpänane, piba cane baborage gege lenajame.

⁵ Cane cuta ngene jotwine mäame toraca ätrunga poto cidi me, epu ätrunga mäame daade Loisi me piyepu mäame mage Yuunis me ätrunga liyepu. Cane umle gäne, egä mäame cuta pepu ätrunga pisi nyene.

⁶ Peei name pi cane naajenine, maane gone yaabmalute pui kaakesea ne, Acejiyame lui näacärepi meebine, cane liba ime laacitepene mäame papa cabu me.

⁷ Ingle Acejiyame te lui Seemo itu nicärininuji mibibine, lica niwenininuge wälu me, pätä maane cane cama mäpu cabu näamyemutepi Miji Mene name pi. Acejiyame te kokre näacärenige maane peei ne wawenane.

⁸ Peei name pi wälu ajiri gone läbitumi mime Yageyame ne aitnejame, cuta căme täapume ajiri gone, lui te krokeciye mete cabu nanajinige inge teeme kaakesea name pi. Eewe, pätä maane cane cama mäpu cabu näamyemutepi Miji Mene name pi. Acejiyame te kokre näacärenige maane peei ne wawenane.

⁹ Tabe niiya cabu ca niseärarinuji mibibine, siige nisoglicninuji teeme binamewale täapume, lica mime kaakesea name pi yepä teeme singi piyepu owecu name pi. Agedna me niinäce gaabe me tabe uja ngene jotwananuji mibibine owecu wawenane Yeesu Keriso me cabu ca.

¹⁰ Siige page ai padare cabu mine teeme pui owecu ne ituge päpäna, Keriso Yeesu mime ireclota ceera biname te lipu täduji. Miji Mene cabu ca mine umle gemi, egä Keriso ituge budre me kokre ne agli piyepu ngälu căco ireclota ne aboclomta mime täapume.

¹¹ Acejiyame te cebine itu najuji Keriso me ätyepäneji biname me lenajame cuta Miji Mene ne acenename cuta piyepu abiberäjame,

¹² peei name pi cane cewe oocaninine ai mäpu cabu. Yepä cane ajiri wälu lica gäne, inge cane umle gäne, cane laati cabu me ätrunga ne ituge acita; siige cane umle gäne, egä tabe lui Miji Mene näcäruji, teeme kokre pisi nyene pui mene ne ire atwime ngälu ngälugaabe me.

¹³ Cane lipu naabiberäjepene maane bäärmii agedname piyepu biname bine abiberäjame, maane pepu jewenepi. Kokre joomlepi ätrunga piyepu singi bine, lui mimi negi, mine liba Keriso Yeesu cama yepä gemi.

¹⁴ Aceji Seemo lui te mime cabu enajenige, maane teeme kokre ca Miji Mene ne joomlepi, meebine lui mene ituge ceera jajanenane.

¹⁵ Maane umle gäte, egä iyeta ätrunga biname cina Asiya probins ngalebora cebine ituge abmala, cuta Pugelus Hermogenes.

¹⁶ Yageyame te Onesiporus ne teeme inge cama owecu jaawenepi, inge tabe cebine bucurage gäabu ngenecu miji me itu naawenanepi. Ngänu gyene, cane krokeciye mete cabu nanajenige, tabe ajiri lica ge,

¹⁷ yepä tabe liba tatyaramtepi Rooma babo cewe me, tabe närngepi, ngälu näpänepi.

¹⁸ Yageyame te teebine owecu jaawenepi atrana bimu cabu! Maane iyeta umle gäte, tabe Epeso babo cewe je cebine lipu bucurage mule ca näityärepi.

2

Mäpu cabu Lipu Lenajame Wälu căco

¹ Timoti, ätrunga cabu lui căme bägrä gäte, maane kokre äbitepi Acejiyame me baborage miji cabu ca, lui mime yene, mine liba Keriso Yeesu cabu ninajininuge.

² Maane lui abiberäja ne ituge ätecija cäme bau ca biname bime irewale, ecäremepi toraca biname bine, lui cina miiji gemi poto bine abiberäjame.

³ Miijirage cubu biname te mäpu cabu lipu yäämyemutuge, maane cuta miiji mäpu cabu pepu näämyemutepi Keriso Yeesu miiji pi.

⁴ Cubu biname te eei taatu ne jaawenuge, teeme cubu mope biname te lui tääpume jaajuge. Tabe lica cewe kaakesea cabu labrubicuge, ingle tabe singi gyene teeme mope biname ne ngenecu miiji me wawenane.

⁵ Coo piyepu lui biname te luuwamuge daremu acatame, tabe äblicäco päpäna, liba bääclena me toracarage mule bine lica yääcwetnimuge.

⁶ Piiyepu lui calwacupi biname te baborage kaakesea birige wawena, tabe miiji niinäce kuu bine ärucna.

⁷ Maane miiji ngene jotwananepi ai poto cidi me, siige mime Yageyame te page naawenepi maane umle äbitame iyeta gwidape poto cidi me.

⁸ Yeesu Keriso, Acejiyame te lui ne erpinantuji budre cabu ca, lui tage Daawida me kaakesaare, cane lipu ituge abiberäja Miiji Mene cabu ca, tabe miiji puma määme ngenecu cabu.

⁹ Ingle naace popi cane Miiji Mene jaajanemune, peei name pi cane cewe oocanenine, ätäyäneji gäne niiyaniya mule biname bime pana. Yepä Acejiyame me Mene ätäyäneji lica gyene,

¹⁰ peei name pi cane nämyemutenige iyeta cewe oocanena cabu je Acejiyame me äjäcräneji biname bime name pi naace tääpume Keriso Yeesu teebibine niiya cabu ca äsecerame siige iyeteta ireclota ceerame.

¹¹ Ai lui toraca iicana gyene egä,
“Mine liba Keriso cama budre,
mine cuta teta cama ireclota lenaja.

¹² Mine liba mäpu cabu ämyemutana,
mine cuta teta cama biname bine waadena.
Mine liba teebine aina,
tabe cuta mibibine aina.

¹³ Ngänu gyene, mine liba toraca ngenecu cama lica teeme tääpume,
yepä tabe toracarage mime tääpume,
ingle tabe pipuyame gyene.”

Keriso me Toraca Kaakesea Bägrä

¹⁴ Määme ätrunga ingle biname bine cääri jejemepi ai poto cidi me. Acejiyame me opo gaabe je jejemepi teepi abmalame äcela mule ne mene poto cidi me. Teepi pui mule cabu ca nuuja miiji ne lica jääpänusi, yepä sabe jaawenimusi, lui biname cina yäätecijemuge.

¹⁵ Kokre äbitepi maane Acejiyame me opo gaabe je toracarage kaakesea bägrä lenajame, lui te ajiri lica birige teeme kaakesea tääpume, yepä conocäco yaabiberäjimuge toraca mene Keriso poto cidi me.

¹⁶ Gone emä lenaja, luma Acejiyame cäco budubuduma mene jaatranimusi, ingle biname bine cude padare jaawenimusi Acejiyame bau ca pui mene cina.

¹⁷ Pepu mene lui babo droobo pana gyene, tääpe ne lui te jaarwenuge. Pipu muleyame biname gegi lui Humenus piyepu Piletus.

¹⁸ Teepi toraca gaabe ne yaabmalepäsi, jicemenäsi, egä mine uja budre cabu ca ituge arpinera, siige nuuja biname bime ätrunga ne sabe jewenenäsi.

¹⁹ Yepä lui caage ingle bine Acejiyame te ituge ätecrea, akocneja lica. Pui cabu apu oogäräneji gyene egä, “Yageyame umle gyene, teeme binamewale laati bemi,” cuta apu oogäräneji gyene egä, “Laati te liba jicuge, egä tabe Yageyame me biname gyene, tabe miiji ätecita niiya mule wawena cabu ca.”

²⁰ Baborage mete cabu silba piyepu gol disi taatu lica gemi, yepä uli ca piyepu gawe ca wawenäneji disi cuta piti nemi. Poto lui modamoda mule tääpu memi, poto lui papa mule tääpu memi.

²¹ Lui biname te luucranuge walya abiberäja cabu ca, cane lui tääpume bii jicine, tabe ibibi birige toraca mule tääpume epu silba, gol disi liiyepu. Tabe ituge mara me äbita teeme Yageyame tääpume. Tabe miiji birige teeme tääpume, ireire yaanajuge iyeta miijimiji mule bine wawenetnäjame.

²² Jigyemepi mamye biname bime singisingi mule bine, ericnemepi conocäco lenajame, ätrungame, singi lenajame ätrunga biname tääpume piyepu teta cama lenajame poode cama. Maane ai mule bine gigrü jewenemepi biname cama, ätrunga cabu lui toraca gemi.

²³ Yepä emä gone, luma biname cina budubuduma piyepu ngene atwanena cäco mene jaatranimusi. Maane umle gäte, egä teepi mene abaja cabu me latyaruge.

²⁴ Yageyame me kaakesea biname te gone mene abaja, pätä tabe miiji owelaamelame lenaja iyeta biname bime täápume. Tabe miiji miijirage piyepu cängena abiberäja biname lenaja,

²⁵ cängena lui te yaablawäjemu teeme äciseräjayame bine. Acejiyame te pama teebibine pagege atatrongära teepi umle äbitame, ngena gyene toraca.

²⁶ Piba teepi täcnärinusi teeme mopemuli cabu me, luucratnininusi Satani bau ca, lui te teebibine itu jaabaletnecemepi teeme dici ca, siige itu jaawenemepi teeme singi ibi otnime.

3

Mene Ceräcerägäabu Padare poto cidi me

¹ Timoti, maane ngene gone ätrimela, egä ceräcerägäabu padare cabu mage mäpu cirege.

² Piba biname cina teeme täápume taatu singi cirege, piyepu rarekaake singisingi, mope modamoda, teemämu awepyeräja. Teepi niya mene ca nuuja biname bine sabe jaawenimusi, mage babe bime täápume ätecija cäco, eso mene umle cäco, ätrunga cäco,

³ asicnenta cäco, owecu cäco. Teepi niya mene jücemusi nuuja biname bime poto cidi me, cängena lenaja umle cäco, asabla cäco. Teepi jäägyemusi iyeta ngena gemi miiji.

⁴ Teepi angletnejayame birige, mage aglecayame, teepi teemämu babo läbitininusi. Teepi tääpe gwidape täápume magerage singi, lica Acejiyame täápume.

⁵ Teepi puu jüicusi, egä teepi ätrunga biname gemi, yepä teeme ireclota cabu ca jääpänusi, egä pui toraca lica gyene. Maane pepu muleyame biname bime cabu ca cude padare äbitepi.

⁶ Teeme poto cina biname bime mete cabu me yääbcnusi opo ire awename ngenecu onyaonya magebi bine, lui cina niya mule sigu cama, teeme singisingi cina lui bine ewadanemenisi.

⁷ Teepi pui magebi cina puu itecijanenemige abiberäja mene, yepä gwidape teepi äblicäco gemi umle äbita toraca mene piyepu mule poto cidi me.

⁸ Yanes Yambres naabi Moose ne lipu iciseräjüjäsä, pui rooriye cina pepu iciseräjinisi toraca mene ne. Teepi mopemuli cäco gemi, ätrunga bine ituge abmaläcema.

⁹ Yepä teepi äblicäco lecaleca padare pepu mule acnetneja, ingle nata iyeta biname cina teeme buduma ne jääpänusi, epu pana Yanes Yambres naabime buduma te lipu pajecu me äbituji.

Paulo me Ceräcerägäabu Umle Mene Timoti täápume

¹⁰ Timoti, maane cäme abiberäja ne piyepu ireclota mule ne ituge äcwetna. Cane liiyeme ericenine, maane cuta piyeme. Maane cebine ingwe ituge äcwi ätrunga mule cabu, cängena lenaja cabu, owecu mule cabu, mäpu cabu ämyemutana cabu,

¹¹ cewe oocanena cabu. Cebine lipu ituge sabe wawena meebine cuta piyepu. Maane umle gäte, ngena mule cina läbitipesi cäme täápume Antiyoka je, Ikoniya je, Lustra je, biname cina lipu mage sabe nawenanepesi puma, yepä Acejiyame te cebine nasatanepi iyeta cabu ca.

¹² Yoo iyeta laati bemi singi Acejiyame me singi ibi lenajame Keriso Yeesu cama alenglecäjame, teebibine pepu sabe wawena birige.

¹³ Yepä conocono biname piyepu walya angletne-jayame, teepi niya cabu ca iyeta niyyarage me läbitininusi. Teepi poto biname bine yaangletnäjemusi piyepu teemämu langletnäjinusi.

¹⁴ Yepä maane te gone toraca mene ne yaabma-lute, meebine lui mene ituge abiberäja, piyepu maane lui mene ne jäätrungepete. Maane umle gäte mäame abiberäja biname laati bage.

¹⁵ Maane ngene gone ätrimela, egä bägrä matikäli cabu ca maane umle äbitujite Oogäräneji mene. Teepi ibibi gemi meebine abiberäjame ireclota poto cidi me, lui ireclota ne biname cina jääpänusi, ätrunga ne liba yaacitusi Keriso Yeesu cabu me.

¹⁶ Iyeta Oogäräneji mene lui täápume Acejiyame te ituge ngene atwanena ceera, miiji gemi abiberäjame, niya mule awabudnitame, ablawejeame, gaabe awabame conocäco ireclota cabu me.

¹⁷ Siige lui biname te Acejiyame me kaakesea jaawenuge, tabe mage umle cama piyepu cängena amacetnäjäneji birige miijimiji mule bine wawenetnäjeame.

4

¹ Acejiyame piyepu Keriso Yeesu, lui te cirege budre biname piyepu ireclota biname bine atrana, cane teeme opo gaabe je ai umle mene naajenine! Ingle Keriso Yeesu te cire tacnenutepi biname bine waadename, cane peei name pi naajenine

² maane bäärmii aagedname, mene jajanename, ngänu gyene miiji padare coo lica. Maane biname bine ätrunga me jewenemepi, egä määme mene lui toraca gyene; maane teebibine eblawäjemepi, kokre ecäremepi, cängena ebiberäjemepi.

³ Padare te tädenige, biname cina liba singi lica ätecijame toraca mene ne Keriso poto cidi me, yepä teepi teeme singi bine pa yääcwetnemepesi, pa jäärngemepesi abiberäja biname bine, teeme singi ibi lui cina yaabiberäjimusi.

⁴ Teepi toraca mene ne kaake ca pa yääcelyärepesi, pa latatrongäripesi gidä mene ätecijame.

⁵ Yepä maane te ireire lenajame iyeta padare cabu; näämyemutepi cewe oocanena cabu, määme bäärmii kaakesea jewenepi, piiyepu Acejiyame me kaakesea bägerä te ngena bine waweneme, maane iyeta peei bine jewenemepi.

⁶ Padare te bii tatyaramtige cane uudi apirame, epu pana Acejiyame ne lipu gwidape ca yiiwärajusi. Siige padare age sena cane ai ireclota ne abmalame.

⁷ Cane miijirage cubu itu tiicumene, cäme uuwama ne itu tlimlitumene, ätrunga ne lica itu sebma-lumene.

⁸ Siige Acejiyame te cäme daremu ne itu secitumi, siige joomlenige. Pui lui niinäce manu daremu gyene, tabe lui yääcäranemuge iyeta biname bine, lui cina conocäco gemi Acejiyame me opo gaabe je Keriso me kaakesea name pi. Yageyame Yeesu Keriso lui te conocäco atrana biname gyene, tabe te cäme daremu cire näcärepi atrana bimü cabu piiyepu cuta cire yääcäranemepi pui yepä daremu iyeta eei bine, lui cina baborage singi gemi tabe acnenutame.

Mene Timotirage bau me

⁹ Ngena ne gone taawenumi, watata tädepi cebine päpäname.

¹⁰ Deemas singi läbitepi gawecewe mule tääpume, siige nabmalepi cebine, lädepi Tesalonika me. Kreskes lädepi Galatiya me, piiyepu Taitus lädepi Dalmatiya me.

¹¹ Yepä Luuka taatu sine cane cama. Toomlepi Mareko ne, secanepi aima, ingle tabe miijirage gyene cebine ätityerame.

¹² Yepä Tukikus ne cane ituge ätyepa Epeso me.

¹³ Maane liba tädepi, cäme gäbu gwidape nacanepi, Trooasi je lui saabmalepene Karpus cama. Cäme peba cuta nawademepi, cuta maamoi tääpe cabu lui oogäräneji nawademepi.

¹⁴ Aleksanda, laati te gwidape bine jaawenimuge kopa ayana ca, cebine mage niiyarage nawenumi. Yageyame te pagege ceera teeme peei niiji daremu.

¹⁵ Maane cängena ire teeme tääpume, ingle tabe magerage mime mene niciseräjipi.

¹⁶ Cebine liba ciitacorage atrana puupu me nacanepesi, nuuja te lica nätityärepi, yepä teepi iyeta nabmalepesi cebine. Cane irecu ätumutenine, egä Acejiyame te gone daremu jaawenimuge.

¹⁷ Yepä Acejiyame cane cama puga ge, kokre näcärepi cane Miiji Mene iyeta jajanename iyeta Acejiyame umle cäco biname bine, lui puga ge mene iiwana puupu cabu; siige Acejiyame te nasatepi budre cabu ca.

¹⁸ Piiyepu Yageyame te pa nasatepi iyeta niyaniya gwidape cabu ca, siige cängenarage cire nacanepi cabu me, tabe luma mope biname me enajenige. Teebine yaawepyeräjesi iyeteta, iyeteta. Ai mene toraca gyene.

Paulo me Yewo Mene Timoti bau me

¹⁹ Prisila teeme rooriye Akwila naabine jaawablepi. Cuta jewablepi Onesiporus ne teeme ingle cama.

²⁰ Eratus Korinito jage, yepä Tropimus ne cane saabmalepene Miletu je, ingle tabe pita cama ge.

²¹ Ngena ne gone taawenumi, watata tädepi aima, ingwe ca gäbu padare te page tädepi.

Ebulus naawablenige meebine, Pudenus, Linus, Klaudiya piiyepu iyeta poto ätrunga biname lui cina ama, teepi naawablenisi meebine.

²² Yageyame yaanajepi määme seemo cama. Acejiyame me miiji te weeme iyeta bime cabu lenajame.

Cane ngii Paulo. Siige cäme mene ngälu peese.

PAULO ME LETA TAITUS BAU ME

Paulo Taitus ne Jewablenige

¹ Cane Paulo Acejiyame me kaakesea bāgrā gāne, piyepu Yeesu Keriso me ätyepāneji biname gāne. Cāme kaakesea lui teeme jäjäcrāneji biname bine ätityerame Yeesu ne cāngena ätrungame, piyepu toraca mene poto cidi me teebibine cāngena umle wawename peei cabu teepi otnime,

² cuta piyepu teeme ngene atwanena bine Yeesu cabu acraname iyeteta ireclota täápume. Yoo, Acejiyame me mene iyeta lui toraca gyene; tabe lui agedna cabu ca mene jupu peei ireclota mibibine ceerame.

³ Piba teeme singi padare cabu ca tabe peei ne jewabudnituji Miiji Mene ca. Yoo, Acejiyame mime niya cabu ca Äsecerayame tabe te cebine ituge jaji egä Miiji Mene biname bine jajanename.

⁴ Taitus, cane yoogärenine määme bau me. Maane cāme toracarage bāgrā pana gāte, ingle mime ätrunga yepā gyene Acejiyame bau. Acejiyame mime Babe piyepu Keriso Yeesu mime niya cabu ca Äsecerayame, teeme miiji te määme cabu lenajame piyepu teepi poode meebine ceerame.

Taitus me Kaakesea poto cidi me Krete Curā cabu

⁵ Yoo, cane peema meebine itu naabmalepene Krete Curā cabu mime kaakesea ne cāngena apirame. Maane mope biname bine jejäcremepi iyeta ätrunga ingle täápume lui cewe maramara cabu ta teepi te ätrunga biname bine opo wawename. Pui mene cane meebine itu naajepene, pepu pana jeweneji.

⁶ Epu biname bine jejäcremepi ätrunga ingle mope biname me lenajame lui cina conocāco mule taatu jaawenemusi; biname lui te yepā taatu coga cama cāngena yaanajuge, piyepu lui me bāgrā ätrunga cama gemi, piyepu mage babe bime mene cāngena jäätēcijemusi.

⁷ Yoo, ai ingle naace gyene pepu opo wawena biname te Acejiyame täápume teeme kaakesea jaawenuge, tabe miiji conocāco lenaja, nuuja biname cina piba äblicāco teebine aitēja. Tabe miiji nuuja biname bime mene ätecija, lica teeme singi taatu wawena. Tabe miiji lica watata claabe me äbita, coo sice buduma lenaja, coo biname bine papa agleca. Tabe miiji lica conocono singi cama lenaja rarekaake täápume.

⁸ Yepā, tabe miiji catecewe biname bine cāngena ire jaatwemuge, piyepu iyeta nuuja miiji mule täápume singi. Tabe miiji cāngena ngene atwanena cama piyepu conocāco mule cama yaanajuge. Tabe miiji teeme ngenecu Acejiyame bau yaacituge teeme singi taatu ngenecu kokre cama wawename.

⁹ Tabe miiji toraca mene ne cāngenarage jäätzunguge, pui mene ne lipu ituge abiberāja. Peei ätrunga cabu ca tabe ihibi pa läbitepi poto bine kokre ceerame toraca abiberāja ca, cuta piyepu eei biname bime mule bine awabudnitame egä conocono, lui cina toraca mene ne jiciserājinisi.

¹⁰ Bucurage äciserāja biname piti nemi puma, maane lui bine miiji cāngena ablaweja. Teepi mene papapapa jicemusi, nuuja biname bine angletnejame. Bucurage pui angletnejame biname lui Israela biname bime sasa cotre mule cabu itu yaacrajepi, piyepu teeme täápume Acejiyame me täāpe cabu cewecu lui baborage gwidape gyene.

¹¹ Maane teebibine bojā jewenemepi, ingle teepi biname yepāyepā teeme bāgrāwale cama ngenecu māpu me jaawenemusi teeme abiberāja ca. Teepi ai ne naace name pi jaawenusi, ingle teepi singisingi gemi rarekaake pāpāname.

¹² Yoo, yepā Krete curā babo biname te toraca mene itu jicemuji teeme binamewale poto cidi me egä, "Krete biname lui babo walya biname gemi. Teepi niya girigale biname gemi. Ngānu gyene teepi kaakesea täápume durau gemi, yepā teepi baborage singi deedei täápume."

¹³ Yoo, peei mene toraca gyene, peei name pi Krete biname bine kokre cama eblawājemepi teeme ätrunga cāngena me wawename.

¹⁴ Teepi miiji Israela biname bime itemene bine abmala toraca mene taatu oomlaname, cuta piyepu pui biname bime cotre mene abmala, lui cina toraca gaabe ne ituge ägyi.

¹⁵ Yoo, biname lui te epucāco ngenecu cama birige, tabe miiji ne jäāpānuge iyeta gwidape cabu, yepā lui biname me ngenecu niya piyepu ätrunga cāco birige, tabe niya ne jäāpānuge iyeta gwidape cabu, ingle naace popi teeme niya ngene atwanena piyepu asicnenta cabu ca, tabe äblicāco miiji ne pāpāna.

¹⁶ Pepu biname cina jicusi egä, “Cine umle gemi Acejiyame,” yepä teeme niya ireclota cabu ca biname cina opo yaawatnusi egä teepi toraca umle lica gemi. Teepi niyarage piyepu ätecija cäco biname gemi, äblicäco nuuja miiji mule ne wawena.

2

Toraca Abiberäja Agesa

¹ Yoo, maane teebibine umle jewenemepi lui mule miiji gyene ätrunga biname bime tääpume.

² Modamoda rooriye bine maane ebiberäjemepi teepi sice buduma gone äbitame, yepä cängena ngena atwanena piyepu ngenecu kokre cama lenajame. Teebibine jejemepi egä toraca ätrunga cama cängena lenajame, biname bine owecu wawename, piyepu lica ätrunga gaabe ne abmala mäpu te liba teeme bau me täduge.

³ Pepu pana maane molyege bine jejemepi teepi Acejiyame me jäjäcräneji biname pana lenajame, lica niya mene iicemame nuuja biname poto cidi me, piyepu lica sice tääpume singi lenajame, yepä miijirage abiberäja biname tääpume lenajame. Teepi miiji mamye magebi bine abiberäjame

⁴ teeme rooriye piyepu bägrä bine teeme ngenecu cabu acraname,

⁵ piyepu cängena ngena atwanena cama lenajame. Teepi miiji teeme mene piyepu teeme mule ire atwemame ngenecu epucäco lenajame, teeme mete kaakesea cängenarage wawename, piyepu teeme bägrä bine cuta teeme nuuja binamewale bine cängena owecu cama ätityerame. Teepi miiji teeme rooriye bime singi ne jaawenusi. Piba nuuja biname te äblicäco niya mene iicema Acejiyame me mene poto cidi me.

⁶ Cuta pepu pana maane mamye rooriye bine jejemepi cängena ngena atwanena cama lenajame.

⁷ Yoo, teeme tääpume miiji gaabe ne maane mäame ireclota cabu ca eboclomtepi. Maane singi äbitepi toraca ngena atwanena tääpume, piyepu mäame abiberäja kaakesea ne cängenarage jewenepi.

⁸ Maane toraca umle cama mene jicemepi, siige nuuja biname te piba mäame mene äblicäco äsäda, piyepu lui te singi mäame kaakesea äseblecäjame, tabe opo yaanajuge ingle teeme nuuja aйна mene lica gyene mime poto cidi me.

⁹ Biname lui cina aletnäneji gemi daremu cäco kaakesea wawename, maane pui biname bine jejemepi ai gawecewe yageyame bime mene ätecijame, teebibine ngenecu miiji me wawename. Teepi miiji lica teeme mene äciseräja,

¹⁰ piyepu miiji lica teeme poto gwidape ero ca waadena, pätä teepi miiji teemämu awabudnita egä teepi miijirage gemi, piyepu toraca ngenecu cama kaakesea jaawenusi. Piba teepi Acejiyame mime niya cabu ca Äsecerayame me mule babo me jaawenusi iyeta teeme ireclota cabu ca.

¹¹ Acejiyame teeme miiji mule ne itu jewabudnituji Yeesu Keriso me kaakesea cabu ca, iyeta biname bine äsecerame niya mule cabu ca kirece ireclota ne päpäname.

¹² Peei miiji mule te mibibine nibiberäjininuge Acejiyame cäco lenaja ne piyepu niya singi bine ägyemame, piyepu nibiberäjininuge ai gawecewe me ireclota cabu toraca ngena atwanena cama conocäco lenajame Acejiyame tääpume.

¹³ Mine cuta pepu jewagrijenisi pui miijirage bimü ne, Yeesu Keriso mime caburage Acejiyame piyepu niya cabu ca Äsecerayame te liba cire tacnenutepi jamyacu apacljera cama.

¹⁴ Tabe teemämu mime tääpume äyemaluji naace tääpume mibibine iyeta conocono mule cabu ca äsecerame, piyepu ngenecu epucäco me wawename mine teeme tääpume lenajame, piyepu singi äbitame miiji mule bine wawename.

¹⁵ Yoo, maane biname bine cängena ebiberäjemepi peei mule poto cidi me, piyepu jejemepi pepu wawename. Wälu gone biname bine ablawejame piyepu nuuja bine ngenecu kokre ceerame, ingle Acejiyame te meebine ai kaakesea itu nääcärep, peei name pi biname cina miiji umle äbitame egä mäame kaakesea poto cidi me mene lui conocäco gyene.

3

Keriso me Biname cina Miiji Apu Mule Acata

¹ Yoo, maane biname bine puma cääri umle jewenemepi teepi mope biname piyepu teeme ätityera biname bime mene ätecijame piyepu wawename. Mope biname ngena miijimiji kaakesea tääpume singi, biname cina miiji peei ne ngenecu poode cama wawename.

² Teebibine jejemepi egä äingeja mene gone, nuuja biname ne uudunyera gone, yepä miiji owelaamelame lenajame, piyepu nuuja biname ne niinäce gaabe me acitame.

³ Yoo, ujarage mine cuta piyepu buduma, ätecija cäco, toraca gaabe umle cäco ge. Bucurage niya singi cina mibibine itu niwadininusi. Mine ngenecu niya cama cuta ninajininuge mime nuuja biname poto cidi me, piyepu teebine ire patre yaaglusi. Nuuja biname cina mibibine nimugetninusi piyepu mine teebibine cuta jäämugetne-musi.

⁴ Yepä, Acejiyame mime niya cabu ca Äsecrerayame me padare te liba tatyaramtuji mine teeme owecu piyepu ätityera cama lenajame,

⁵ tabe piba mibibine nisechräinuji pui niya ireclota cabu ca. Yoo, lica ge mime miiji waweneca name pi tabe mibibine nitityärinuji, yepä tabe owecu ge mime täápume. Tabe mime niya mule nicisäjinuji, mine piba kirece ireclota cabu me ebäcnujisi. Peei lui Aceji Seemo me kaakesea mime yepäyepä cabu.

⁶ Acejiyame te teebine mime bau me ituge ätyepa Yeesu Keriso mime Äsecrerayame me miiji kaakesea name pi,

⁷ naace täápume egä mine teeme owecu mule ca conocäco äbitame Acejiyame me opo gaabe je, piyepu iyeteta ireclota ne päpäname, lui ireclota täápume mine mime ngene atwanana teeme cabu ituge acrana.

⁸ Mine umle gemi egä peei mene toraca gyene.

Yoo, Taitus, cane singi maane mene cängena jajanenname iyeta peei gwidape poto cidi me. Piba lui cina Acejiyame ne jäätrungusi teepi teeme ireclota teebine yääcärusi miiji mule teeme täápume wawename. Piba teeme ai gawecewe ireclota lica papa me äbita, yepä peei cabu ca miiji te tädenige iyeta biname bime cabu me.

⁹ Papa äciseräja cabu gone abacita, piyepu bucurage mene gone ätecija Israela biname bime kaakesaare poto cidi me. Drowä mene piyepu äciseräja Israela biname bime cotre poto cidi me jigymepi, ingle naace gyene nuuja miiji te lica tädenige pepu mule cabu ca.

¹⁰ Biname lui te weeme ingle biname bine yääplegicmuge, maane teebine umle mene jejepi teeme peei mule ne abmalame. Yoo, tabe liba mäáme mene lica pa näätəcijepi, teebine cääri jejepi, siige tabe liba cerämu ätecija cäco yaanajuge, piba ingwe ca ten cama gone abasuta.

¹¹ Weene umle gemi egä pepu biname me mule baborage conocono gyene. Teeme niya mule te teebine jaawabudnituge egä conocono biname gyene tabe.

Ai Peba me Apira Mene

¹² Yoo, cane liba mime biname Artema, coo pama Tukikus ne, mäáme bau me pa jäätyepene, maane piba wata tädepi cäme bau me Nikopoli cewe me. Cane ngene bii jotwananine ai kämäge me buuwe padare puma lenajame.

¹³ Jenas, pui cotre abiberäja biname, cuta piyepu Apolo weene teebibine cängena äätityärepipi teeme kaakesea gaabe cabu otnime, piyepu teeme singi gwidape cängena ääcärepeye.

¹⁴ Yoo, mime ätrunga binamewale miiji amacetnäjäneji lenaja iyeta miiji mule wawenecame, biname lui cina singi cama icrajinige teebibine cängena ätityerame, ingle miiji lica gyene teepi kaakesea cäco lenaja.

¹⁵ Yoo, cane cama lui biname teepi iyeta meebine sebore naawenisi. Cuta piyepu cime ätrunga binamewale puma, maane cime täápume sebore jewenemepi.

Acejiyame me miiji te weeme iyeta bime cabu lenajame.

Cane ngii Paulo, siige cäme mene.

PAULO ME LETA PILIMON BAU ME

Sebore Mene

¹ Cane Paulo, lui te nanajinige krokeciye mete cabu Keriso Yeesu me name pi, piyepu mime yepä ätrunga biname Timoti, cine te yoogärenago ai mene ne cime biname Pilimon bau me, cine cama yepä kaakesea ne lui te jewenenige.

² Yoo Pilimon, ai mene cuta ätrunga ingle biname bime bau me, lui cina labasecretnuge mäame mete cabu piyepu cime yepä ätrunga magebi Apiya bau me cuta piyepu Arkipus bau me, lui te cine cama yepä cubu jiičenige Keriso täापume.

³ Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi meebine poode ceerame.

Pilimon me Singi piyepu Ätrunga

⁴ Pilimon, cane liba irecu läutumutanune, cane meebine ngii naajanane piyepu căme Acejiyame ne eso yăăcărane mäame täापume,

⁵ ingle cane itu nätecijumi, maane lipu baborage singi gäte Acejiyame me binamewale bime täापume piyepu maane lipu Yageyame Yeesu ne jitrungenite.

⁶ Cane irecu ätumutenine, egä weene lipu alenglecäjininiye cine cama yepä ätrunga cabu, peei te pa niwenipi mine cāngenarage umle äbitame iyeta miiji mule poto cidi me, lui cina saacluge Acejiyame bau ca, mine liba Keriso cabu ninajininige.

⁷ Căme ätrunga biname, maane lipu singi gäte ätru-nga biname bime täापume, peei te cebine babo gege me piyepu ngenecu kokre me nawenenige. Maane te iyeta Acejiyame me binamewale bine ngenecu miiji me itu jaawenemepete.

Paulo Pilimon ne Jejenige Tabe Onesimus ne Cāngena Acatame

⁸ Maane lipu singi gäte ätrunga biname bime täापume, peei name pi cane lui te weene cama yepä ätrunga biname gāne, cane miiji gāne meebine giri acita maane ngena wawename, yepä cane giri lica nacitenine.

⁹ Căme puu conocăco pisi nyene meebine giri acitame maane ngena wawename, ingle cane Keriso me mename biname gāne piyepu page cane age sāne krokeciye mete cabu teeme name pi, yepä cane giri lica naacitenine pätă cāngena naajenine, ingle cane mäame täापume singi gāne.

¹⁰ Yoo, cane meebine naajenine Onesimus poto cidi me, lui te ätrunga cabu căme băgră gyene. Cane ama krokeciye mete cabu teeme täापume epu pana läbitepene babe liiyepu.

¹¹ Niinäce padare cabu tabe nuuja miiji lica ge mäame täापume, yepä page tabe miiji gyene mäame täापume piyepu căme täापume.

¹² Cane teebine mäame bau me jityepenine piyepu tabe căme ngenecu nacanenige.

¹³ Căme singi pisi nyene tabe ama lenajame mäame puupu ne acatame cebine ätityerame, cane liba taatu nanajenige krokeciye mete cabu Miiji Mene name pi.

¹⁴ Yepä cane singi lica gāne meebine giri acitame cebine ätityerame, pätă căme singi pisi nyene maane mäame singi ca ätityerame. Yoo, cane mäame singi căco je nuuja gwidape ne lica jewenenine Onesimus täापume.

¹⁵ Pama Onesimus naace name pi matikāli padare taatu cabu mara me läbitepi mäame bau ca, egä tabe piba maane cama iyeteta lenajame.

¹⁶ Siige page tabe papa aletnäneji biname lica gyene, yepä tabe baborage gyene aletnäneji biname cabu ca: tabe page mäame ngenecurage biname gyene ätrunga cabu. Tabe puu babo miijirage gyene căme täापume, yepä tabe mäame täापume cerămu miijirage gyene, ingle tabe mäame aletnäneji biname gyene cuta tabe maane cama yepä Yageyame ne jitrungenige.

¹⁷ Peei name pi maane liba cebine nacatenite, egä cane maane cama yepä kaakesea jewenenine Yageyame täापume, maane Onesimus ne epu jewablepi, maane lipu cebine nawablute.

¹⁸ Tabe liba ngena niya itu naawenepi coo mäame bau ca nuuja gwidape itu yaacatepi, maane cebine piba najepi, cane pa naawecnistepene.

¹⁹ Cane ama cămerage ime ca yoogärenine egä: Cane Paulo te meebine pa naawecnistepene, Onesimus liba ngena ne itu yaacatepi mäame bau ca. (Yoo, nata cane nuuja singi lica gāne meebine jajime, egä maane căme bau ca yaacatepete Keriso cabu kirece ireclota ne.)

²⁰ Peei name pi căme yepä ätrunga biname, maane owecu nawenepi apu cabu cebine ätityerame ätrunga biname bime mule liiyepu. Maane lipu cane cama yepä ätrunga biname gäte, maane cebine gege me nawenepi.

²¹ Cane liba ai ne yoogärenine, cane umle gäne, egä cane ngena täápume naajenine, maane jewenenite. Cuta cane umle gäne, egä maane itucärenite cane lui wawena täápume naajenine.

²² Cane cuta nuuja gwidape täápume meebine näätinärenine: maane puupu emaceträjepi cäme täápume, ingle cane cäme ngene atwana ne Acejiyame bau me becitine, egä tabe weeme irecu ätumuta daremu jiwecnistenininige, siige cebine weeme bau me pa nawecnistepi.

²³ Epapras lui te cane cama krokeciye mete cabu enajenige Keriso Yeesu name pi, tabe weebibine jiwablininige.

²⁴ Cuta Mareko, Aristakus, Deemas piyepu Luuka, lui cine cama gigri kaakesea ne jewenenisi, teepi weebibine jiwablininisi.

²⁵ Yageyame Yeesu Keriso me miiji te mäame seemo cabu lenajame.

Cane ngii Paulo. Cäme mene ngälu peese nyene.

LETA ÄTRUNGA BINAME BIME BAU ME LUI CINA HEBERU MENE JIICEMUSI

Acejiyame me Mene Aboclomteji Gyene Teeme Bägrä me Ireclota cabu ca

¹ Sasa cabu ca Acejiyame te bucurage padare piyepu bucurage maramara gaabe ca mime kaakesaare bine mene jaajanenemuge teeme mename biname bime cabu ca.

² Yepä, ai ceräcerägäabu padare cabu tabe mibibine mene nijananinige teeme Bägrä cabu ca. Teeme Bägrä peese nyene lui me kaakesea ca tabe ai gawecewe piyepu iyeta cabucewe apaclyera gwidape bine itu tewenemuji. Piyepu teeme Bägrä peese nyene lui ne Acejiyame itu jejuji yageyame äbitame iyeta gwidape täápume ceräcerägäabu padare cabu.

³ Tabe saapaclyäruge Acejiyame me jamyacu apaclyera cama; cuta tabe Acejiyame cama yepä pana opo gyene. Tabe teeme kokrerage mene cama iyeta gawecewe piyepu cabucewe gwidape bine teeme maramara gaabe cabu ire jetwenenemige. Tabe biname bine kälyä jewenemuji teeme niyianiya mule cabu ca, piba cabucewe je adnatuji Iyeta Kokre cama Acejiyame me camu poto je.

Aceji Bägrä Lui Baborage Gyene Mename Seemo cabu ca

⁴ Aceji Bägrä pui name pi baborage äbituji iyeta mename seemo cabu ca, epu pana pui ngii Acejiyame lui teebine ecäruji lipu baborage gyene mename seemo bime ngii cabu ca.

⁵ Yoo, Acejiyame licarage nuuja mename seemo ne jejuji, yepä Bägrä ne taatu jejuji egä, “Maane cäme Bägrä gäte;

cane page mäame Babe me häbitine.”

Cuta piyepu tabe lica nuuja mename seemo poto cidi me jejuji, yepä Bägrä poto cidi me egä,

“Cane teeme Babe me pagege äbita; piyepu tabe cäme Bägrä me pagege lenaja.”

⁶ Yoo, padare liba mameta ge Acejiyame teeme uuge Bägrä ne ätyepame ai gawecewe cabu me, tabe piba jejuji egä,

“Iyeta Acejiyame me mename seemo cina miiji Bägrä ne awepyeräja.”

⁷ Siige, agesa Acejiyame me mene teeme mename seemo poto cidi me,

“Cane cäme mename seemo bine buuwemope pana me jaawenemune;

Yoo, teepi lui cäme kaakeseyame gemi,
cane teebibine muye wädräji pana me jaawenemune.”

⁸ Yepä, teeme Bägrä poto cidi me tabe jiicenige egä,

“Maane lui Acejiyame gäte, lui puupu ne jepänenite biname bine peema cita ca waadename, pei puupu lui mäame yene iyeteta ngälu cäco.

Maane biname bine conocäco yaawadanemute.

⁹ Maane toracarage singi conocäco mule täápume, yepä niija mule bine jäägyemute.

Pei name pi cane, mäame Acejiyame, meebine itu naajujine,
piyepu ngenecu gege nääcärujine,

cane liba caburage naawenujine iyeta weeme nuuja bime cabu ca.” Siige.

¹⁰ Acejiyame te Bägrä poto cidi me cuta nuuja taje jejuji egä,

“Maane lui Yageyame gäte, maane ai gawecewe ne itu jewenujite niinäce padare cabu.

Maane cuta cabucewe ne jewenujite mäamerage ime ca.

¹¹ Teepi iyeta cirege apesera, yepä maane taatu cire naanajepi.

Teepi iyeta sasa cire läbitipesi cäbletääpe pana.

¹² Maane teebibine cire iyeb lengemepi tuwängle täápume,

epu pana biname te cäbletääpe ne lipu yiiremutuge, yääclubicuge.

Yepä, maane iyeteta gäte; lica cirege sasa me äbita.”

¹³ Yoo, Acejiyame apu mene licarage jaajuge teeme nuuja mename seemo ne egä,

“Adnati cäme camu poto cidi ca,
ngälu cane mäame cubuyame bine

mäame ernge gawe me cire yaacranemepene.”

¹⁴ Yoo, mename seemo teepi ngena pana gemi? Teepi iyeta seemo gemi lui cina Acejiyame täápume kaakesea jewenenemisi. Tabe teebibine jäätyepemuge pui biname bine ätityeräjame lui cina niija cabu ca cirege äsecerä iyeteta ireclota teeme cabu ca cirege päpäname.

2

Mine Miiji Acejiyame me Mene ne Yaacatusi

¹ Yoo, mine miiji mime ngene atwanena cängena acrana peei toraca mene cabu mine lui ituge ätecija, naace täápume mine piba lica mime gaabe ne pagege abmala.

² Yoo, sasa mene cotre poto cidi me, mename seemo cina lui bine ituge waadena piyepu Moose lui soogäremuji, biname lui cina peei cotre mene lica itecijemuji wawename, teepi teeme mäpu daremu jepänemujisi.

³ Cuta page Acejiyame me nuuja mene pisi nyene tabe lipu owecu gyene biname bime täápume, teebibine äsecrera gaabe ituge wawena peei mäpu daremu cabu ca. Mine miiji peei mene ne ätrunga. Yepä, mine liba apu ningeninige egä peei mene lui papa gyene, piyepu lica yaacatusi, mine piba lipulipu äsecrera mime mäpurage daremu cabu ca, ingle mime nuuja äsecrera gaabe lica ge. Yoo, peei Miiji Mene Acejiyame me owecu poto cidi me, mime Yageyame Yeesu te biname bine niinäce jejemuji. Puga lui cina itecijemuji, teepi mibibine umle niweninujisi egä peei mene lui toraca ge.

⁴ Cuta Acejiyame peei mene toraca me jewabemuji liba kokre ecäremuji pui ire arbi biname bine teepi maramara kokre, ciitaca, piyepu owowä mule bine wawenecäjame, cuta piyepu Aceji Seemo me maramara kokre liba biname yepäyepä bine ecäranemuji, tabe laati bime täápume singi ceerame.

Yeesu Taatu Miiji Gyene Mibibine Äsecrera Gaabe Ceerame

⁵ Ai mene lui ciige gawecewe poto cidi me. Acejiyame teeme mename seemo bine lica icranemige ciige gawecewe ne acaname.

⁶ Yepä, mene pisi nyene Oogäräneji Mene cabu gawecewe ne acana biname poto cidi me egä,

“Acejiyame, maane caburage gäte. Maane ngenome biname bime täápume ngene jwaatwananenute?”

Ngenome papa biname bine yäängräremute?

⁷ Maane teebine jewenujite matikolä gawe me mename seemo bime cabu ca.

Maane piba jamyacu apacyera cabu teebine itu ecitujite miiji ngii päpäname.

⁸ Maane teebine mope biname me jewenujite iyeta gwidape täápume.”

Yoo, ai name pi peei mene te jüicenige egä Acejiyame biname ne mope biname me jewenuji iyeta ai gawecewe gwidape waadename, piba biname, gwidape, piyepu iyeta lui teeme ime cabu temi. Yepä, camu gyene page pui padare, biname te liba iyeta gwidape cirege waadena.

⁹ Yepä, peese nyene Yeesu lui te biname me äbituji. Tabe matikolä gawe me äbituji mename seemo cabu ca, pui matikolä padare liba ai gawecewe cabu enajuji, yepä page tabe jamyacu apacyera cabu enajenige piyepu teeme ngii caburage gyene, ai ingle naace popi tabe cewe itu oocananuji piyepu budre itu jepänuji. Yoo, peei cabu ca mine umle gemi lipu baborage gyene Acejiyame me owecu biname bime täápume, ingle Yeesu me budre lui iyeta biname bime niya mule äyebhengame.

¹⁰ Iyeta gwidape lui Acejiyame tääpu memi, piyepu teeme bau ca wawenäneji gemi. Peei name pi miiji gyene egä tabe cuta Yeesu ne mäpu cabu ecituji, ingle Yeesu liba conocäco asatuji peei mäpu cabu ca, tabe piba ibibi ge nuuja biname bine ätityerame teeme mäpu cabu ca äsecrera täápume. Tabe bucurage Acejiyame me bägräwale saawadanemuge teeme jamyacu apacyera cabu lenajame.

¹¹ Yoo, Yeesu lui te biname bine conocäco jaawenemuge, piyepu teepi lui cina conocäco pepu läbitininusi, teepi iyeta yepä ingle cabu temi. Peei name pi Yeesu ajiri lica gyene mibibine ainame egä, “cäme binamewale gemi.”

¹² Tabe Oogäräneji Mene cabu Acejiyame ne jejige egä,

“Cane mäame ngii poto cidi me cäme binamewale bine pa jaajananemepene.

Biname bime abasecretna cabu uupera bine pa yaatangemepene meebine awepeyeräjame.”

¹³ Tabe cuta jüicenige egä,

“Cane Acejiyame ne pa jääntrungene.”

Tabe cuta nuuja mene jüicige egä,

“Cane age säne igane bägrä cama Acejiyame te lui cebine itu näcärepi.”

¹⁴ Yoo, ingle naace popi peei bägrä lui binamerage tääpe cama ge, peei name pi Yeesu teeme pana tääpe ecatuji biname me äbituji, naace täápume egä biname pana tääpe cama tabe miiji ge budre päpäname. Peei budre ca tabe Satani ne epremaluji, Satani lui ingle gyene budre täápume,

¹⁵ piyepu biname bine isemuji lui cina wälu cama yaacrajanemuge budre poto cidi me.

¹⁶ Yoo, pajecu gyene egä teepi mename seemo lica gemi, tabe lui bine yäätityäremuge, yepä Oogäräneji Mene apu jüicenige egä, “Tabe Abrahamo me kaakesaare bine yäätityäremuge.”

¹⁷ Yeesu peese nyene ätityerayame teeme iganewale täápume, peei name pi tabe miiji ge teeme binamewale pana äbitame iyeta gwidape cabu, naace täápume tabe teebibine owecu cama waawename, ingle tabe cuta teeme mäpu ireclota cabu itu enajuji. Tabe epu pana gyene iiwäreja babo biname Israela biname bime irecu ätumuta mule ngalebora, lui teeme kaakesea cängenarage jaawenanuge Acejiyame täápume biname bine kälyä wawenecame teeme niia mule cabu ca.

¹⁸ Yoo, Yeesu umle ge biname bime mäpu ireclota cabu lenaja. Tabe miiji gyene biname bine ätityerame, Satani liba teebibine giri jaacitemuge niia mule wawename, ingle Satani cuta teebine itu giri jecituji, yepä tabe kokre ge.

3

Yeesu Baborage Gyene Moose cabu ca

¹ Yoo, căme ätrunga binamewale lui Acejiyame miiji jäjäcräneji gemi, weeme ngene atwanena ecitepeye Yeesu bau me! Acejiyame teebine jityepuji iiwäreja mope biname pana äbitame mime ätru-nga mule cabu.

² Tabe teeme kaakesea cängenarage jewenuji Acejiyame täápume, lui te teebine itu jejuji peei kaakesea wawename. Moose cuta piyepu teeme kaakesea cängena jewenuji, tabe liba iyeta Acejiyame me biname bine ewademuji.

³ Yoo, mete raranga biname me ngii ne lipu baborage yaawepyeräjujisi mete cabu ca, pepu pana Yeesu me ngii baborage gyene Moose me ngii cabu ca.

⁴ Iyeta mete lui biname cabu ca wawänäneji ge, yepä Acejiyame te iyeta gwidape bine jewenemuji.

⁵ Yoo, Moose teeme kaakesea cängenarage jewenemuji Acejiyame me binamewale täápume, lui cina epu pana Acejiyame me mete gemi, piyepu Moose lui epu pana kaakesea bägrä gyene pui mete täápume. Cuta lui gwidape poto cidi me tabe jücemuji, Acejiyame ingwe padare cabu babo mene peei poto cidi me jücemuji.

⁶ Yepä, Acejiyame me miijirage Bägrä, mime Keriso, tabe epu pana gyene mete yageyame liyepu, mime täápume lui gemi Acejiyame me mete. Yeesu mime yepäyepä cabu enajenige, mine liba ngenecu kokre cama mime ätrunga cabu cängena ninajininige piyepu ngenecu miiji cama jewagrijenisi teeme padare täápume.

Weene Gone Gloose Läbitininuye Acejiyame me Mene täápume

⁷ Aceji Seemo te Oogäräneji Mene cabu jücenige egä,
“Page weene liba Acejiyame me tagepogogo itecijinuge,

⁸⁻⁹ ätecija căco gone läbitininuye,

epu pana weeme kaakesaare lipu singi căco äbitininujisi Acejiyame poto cidi me.

Puga ge pui daapo taatu cewe cabu je weeme kaakesaare cina căme ngenecu miiji teeme täápume napicetnärujisi.

Ngänu ge teepi căme miijirage kaakesea teeme täápume tepänäjumesi footi kämäge ngalebora,

yepä cuta pui padare cabu napicetnärujisi.

¹⁰ Peei name pi cane claabe me äbitujine, jücujuine egä,

‘Iyeta padare teepi ätecija căco gemi;

teepi singi lica căme mene acatame!’

¹¹ Pui padare cane claabe me äbitujine, puma cita ca teebibine căme kokre ngii ca jejemujine egä,

‘Weene licarage ai miiji gawe cabu me ebäcniniye cane cama lenajame!’ ”

¹² Yoo, căme binamewale, weene cängena ire egä weeme yepä me ngene atwanena te lica niyarage me läbituge, siige tabe piba ätrunga căco me läbituge, puma cita ca lapesaruge mime Ireclota Acejiyame bau ca.

¹³ Miiji lica weeme nuuja me niia mule te teebine yaangletnäjuge, tabe piba ätecija căco läbituge, peei name pi weene miiji weemeweme ätityeräjipeye iyeta bimu gaabegabe, ingle pui mene egä “page” Oogäräneji Mene cabu lui cuta mime tääpu myene ai padare cabu.

¹⁴ Mine liba kokre cama jäätungusi ngälu gaabe oomlaname, epu ätrunga cama mime lui niinäce padare cabu puga ge Acejiyame täápume, mine piba Acejiyame me miiji ne Keriso cama jääpänusi.

¹⁵ Weene ai Oogäräneji Mene gone ngene jitrimalinuge egä,

“Page weene liba Acejiyame me tagepogogo itecijinuge,

ätecija căco gone läbitininuye,

epu pana weeme kaakesaare lipu singi căco äbitininujisi Acejiyame poto cidi me.”

¹⁶ Nää, laatibi Acejiyame me tagepogogo yäätecijemuge, piba teeme täápume singi cäco äbitininujisi? Teepi peete nemi iyeta pui biname Moose lui bine ewadimuji Aikupito gawe cabu ca.

¹⁷ Acejiyame nää laati bime täápume ngenecu niyya me täbitenäjumi footi kämäge ngaleb-ora? Teepi peete nemi pui biname lui cina niyya mule cabu icrajuji. Siige, teepi pui daapo taatu cewe cabu puga budre äbitininujisi.

¹⁸ Cuta laati bime poto cidi me Acejiyame te kokre cama jiiucuji egä, “Weene licarage ai miiji gawe cabu me ebäcniniye cane cama lenajame?” Tabe eei bime poto cidi me jiiucuji lui cina ätecija cäco ge.

¹⁹ Yoo, pajecu gyene egä teepi äblicäco ge peei miiji gawe cabu äbäcna, inge teepi ätrunga cäco gemi.

4

¹ Yoo, Acejiyame umle mene itu ecituji mine lipu ten cama miiji lenaja cirege. Pisi nyene pui mene. Mine miiji peei mene poto cidi me cängena ngene jwaatwananinago, piba Acejiyame te lica mime yepä ne cire jaajepi egä, “Maane lica cäme miiji lenaja cewe me abacitame.”

² Mine ituge ätecija peei Miiji Mene, sasa Israela biname liiyepu teeme padare cabu, yepä teeme täápume nuuja miiji lica ge, inge lui cina itecijemuji, teepi lica ätrunga cama ecatuji.

³ Yepä, mine ätrunga cama peei mene ne ituge acata Acejiyame bau me äbäcname miijirage lenaja täápume, inge mine umle teeme mene pui ätrunga cäco biname bime poto cidi me egä,

“Cane claabe me äbitujine, puma cita ca teebibine jejemuji egä,

“Weene licarage ai miiji gawe cabu me ebäcniniye cane cama lenajame!”

Yoo, tabe pepu jiiucuji, ngänu ge pui lenaja gawe puu puga wawenäjeneji ge ai gawecewe agedna padare cabu ca.

⁴ Oogäräneji Mene pisi nyene peei poto cidi me egä, “Acejiyame seben me lui bimu cabu ngene ocuji, inge siige teeme iyeta pui kaakesea.”

⁵ Yepä, ngänu ge iyeta gwidape amacetnäjäneji icrajemuji, pui Israela biname cina licarage äbäcnujisi pui gawe cabu lenajame, inge Acejiyame peei mene itu jiiucuji egä, “Weene licarage ai miiji gawe cabu me ebäcniniye cane cama lenajame.”

⁶ Acejiyame me Miiji Mene cuta page pisi nyene biname cina ätrungame, äbäcname Acejiyame me miijirage lenaja cewe cabucewe me. Yoo, pui biname lui cina Miiji Mene ne niinäce gaabe je ituge ätecija, teepi puma lica ebäcnujisi teeme ätecija cäco mule name pi.

⁷ Yoo, Acejiyame peei name pi nuuja padare ecituji biname cina äbäcname, piyepu agesa peei padare. Pui biname lui cina äblicäco äbäcna, teeme ingwe ca Acejiyame biname bine umle jebenemuji Mopeyame Daawida me tagepogogo ca kirece padare poto cidi me. Cane uja bii jicine teeme mene egä,

“Page, weene liba Acejiyame me tagepogogo itecijinuge,

ätecija cäco gone läbitininuue!”

⁸ Yoo, pui miiji lenaja cewe Acejiyame cama lica gyene Israela gawe cabu, inge ujarage Yosuwä biname bine ewademuji pui gawe cabu me, yepä Yosuwä me padare ingwe ca Acejiyame me mene cuta pisi nyene pui äbäcna padare poto cidi me pui miiji lenaja cewe täápume.

⁹⁻¹⁰ Yoo, miiji lenaja cewe Acejiyame cama cuta page pisi nyene teeme binamewale täápume. Mine pui ne cirege päpäna, cuta puma ngene cirege oocana ai gawecewe me kaakesea poto cidi me, epu pana Acejiyame te lipu ngene itu oocuji pui seben me lui bimu cabu, tabe liba iyeta teeme pui kaakesea epiremuji.

¹¹ Yoo siige, mine miiji kokre ngenecu cama teeme mene toracarage ätrungame, naace täápume mine pui miiji lenaja cewe cirege äbäcna Acejiyame cama lenajame. Mine gonerage mime yepä te ätecija cäco läbituge pui sasa biname liiyepu, lui cina lica ebäcnujisi.

¹² Yoo, weene cängena inajipi! Acejiyame me mene lui ireclota cama piyepu kokre gyene. Äsweji turikä lipu girirage gyene, teeme mene pepu gyene. Turikä te lipu mäju jäläcnutuge kaake piyepu umeli oomlaname, Acejiyame me kokre mene pepu jäläcnutuge biname bime trupa piyepu seemo maramara wawename. Teeme mene te biname bime singi piyepu ngene atwanena bine jaatranemuge.

¹³ Biname te äblicäco nuuja gwidape coo piyepu nuuja ngene atwanena ämlita Acejiyame bau ca. Iyeta lui acwaba cäco, pajecu taatu gemi Acejiyame me opo gaabe je, lui bau me biname cina teemämu cire laitnäjipesi.

Yeesu Lui Mime täápume Iiwäreja Babo Mope Biname Gyene

¹⁴ Yepä, mime täápume pisi nyene ätityerayame. Yeesu Acejiyame me Bägrä itu acnenuuji cabucewe me, Babe ne awejename mime kälyä täápume. Peese nyene teeme iiwäreja mule biname pana kaakesea mime täápume. Peei name pi mine miiji ai ätrunga cabu cängena lenaja.

¹⁵ Yeesu mime kälyä wawena biname te umle gyene mine lipu ngenecu onyaonya gemi, Satani te liba mibibine ningletnäjinuge. Teeme owecu pisi nyene, ingle Satani cuta singi ge teebine angletnejame iyeta mule cabu, mibibine liiyepu, tabe ai gawecewe cabu liba enajuji, yepä tabe lica Satani me singi bine jewenemuji; tabe conocäcorage enajuji.

¹⁶ Yoo, mine miiji wälu cäco Acejiyame bau me otni teeme babo owecu päpäname cuta piyepu teeme ätityera, mine liba mäpu cabu ninajininuge.

5

¹ Yoo, Israela biname bime iiwäreja mope biname tabe lui yepä ge teeme binamewale cabu ca. Teeme kaakesea lui Acejiyame ne mene jajanena teeme binamewale täápume. Tabe owecu gwidape Acejiyame ne yäcäruge cuta piyepu cibi gwidape ca Acejiyame ne yiiwärajuge biname bine kälyä wawename teeme niiya mule cabu ca.

² Ai ingle naace popi tabe lui binamerage gyene, nuuja taje tabe ngenecu onya birige. Peei name pi tabe teeme binamewale bine liba jääpänemuge buduma piyepu niiya mule cabu, tabe teebibine owecu cama jaasicnantemuge, ngene jwaatwanuge egä, “Nuuja taje cane pepu ngenecu onya cama birige.”

³ Cuta peei name pi tabe liba cibi ca Acejiyame ne yiiwärajuge biname bime niiya mule äyebngame, tabe cuta teeme niiya mule äyebngame yiiwärajuge.

⁴ Cuta piyepu nuuja biname te äblicäco peei miiji kaakesea ngii ne teemämu acata, yepä Acejiyame te biname ne jaajuge iiwäreja mope biname me äbitame, Aarona ne lipu ituge jaji iiwäreja mope biname ne kaakesea acatame.

⁵ Cuta pepu gyene, Keriso iiwäreja mope biname me miiji ngii ne lica teemämu ecatuji, yepä Acejiyame teebine itu jejuji acatame. Tabe apu jejuji egä,

“Maane cäme Bägrä gäte;
cane page mäame Babe me häbitine.”

⁶ Cuta nuuja gome Acejiyame teebine jejuji egä,
“Maane iiwäreja biname gäte epu pana Melkisideke liiyepu,
piyepu mäame kaakesea lui ngälu cäco gyene.”

⁷ Yoo, pui padare Keriso liba biname ge ai gawecewe cabu, tabe Acejiyame ne yaawejanuge nuuja taje ele cama. Nuuja taje babo tagepogogo cama ala labayanuge teeme bau me lui te ibibi gyene teebine asatame budre cabu ca. Acejiyame teebine jitecijuji, ingle iyeta padare Keriso singi ge teeme Babe me singi ne acatame.

⁸ Yeesu Acejiyame me Bägrä ngänu ge, ai gawecewe cabu tabe umle äbituji Acejiyame me singi wawename teeme mäpu ireclota cewe oocanena cabu ca.

⁹ Peei mäpu lenaja cabu ca tabe liba tasatuji conocäcorage, lui biname cina teebine jäätecijusi, teepi teeme cabu ca iyeteta ireclota ne jääpänusi.

¹⁰ Acejiyame teebine iiwäreja mope biname ngii ecäruji, epu pana tabe Melkisideke ne yepä kaakesea ngii lipu ituge ceera.

Acejiyame me Mene Gone Abmala

¹¹ Mime mene cerämu pisi nyene peei poto cidi me, yepä mäpurage gyene weeme täápume aboclomäjame, ingle weeme umle däägurage gyene.

¹² Weeme padare bucurage ituge Acejiyame me Mene ätecijame, weene umle cire läbitinejiye, weene nuuja bine cire yaabiberäjemejiye, yepä weene cuta cängena umle lica gemi. Biname te miiji weebibine cääri abiberäja peei niinäce mene Acejiyame poto cidi me. Weene epu pana bägrä matimati gemi lui cina ngame migi yäänäjimusi, camu gemi teeme deedeirage padare.

¹³ Yoo, lui cina ngame migi yäänäjimusi, teepi matimati hägrä gemi. Camu gemi teepi umle äbitena conocäco mule poto cidi me.

¹⁴ Yepä, deedeirage lui modamoda biname bime täápume. Peei lui epu pana mäpu cama abiberäja liiyepu biname bime täápume lui cina geäji gemi Acejiyame me singi wawename. Teepi ibibi gemi opo awatname lui mule gyene miiji, lui gyene niiya.

6

¹ Yoo, peei name pi mine gone leca padare lenaja mime niinäce abiberäja cabu taatu, yepä mine miiji cuta mäpu cama abiberäja ne acata. Miiji lica mine jäje abiberäja ai niinäce gwidape poto cidi me egä: miiji Acejiyame ne taatu ätrunga, cuta miiji atatröngära niiya mule cabu ca, piyepu lica mime kaakesea cabu ätrunga mime äsecrera täápume.

² Mine miiji lica jāje abiberāja maramara niye ca äciseja mule poto cidi me, coo ime acita poto cidi me biname bime papa cabu Aceji Seemo teeme trupa cabu piba abacitaname. Uja ge mime abiberāja budre biname bime arpinera poto cidi me, piyepu ceräcerägäabu bimu me atrana poto cidi me.

³ Acejiyame liba singi gyene, mine cuta mäpu cama mene pa yaabi-beräjemepesi.

⁴ Yoo, mine äblicäco peei niinäce abiberāja cabu lenaja iyeta padare peei cabu ca biname bine ätityerame lui cina teemämu ituge äyeb Benga Acejiyame bau ca. Teepe licarage cääri latatrongäruge pui niinäce mene lipu yaabiberäjemuge. Pui biname cina umle ituge pui Miiji Mene Yeesu me ätityera poto cidi me. Teepe Acejiyame me miiji cabu ituge lenaja, piyepu Aceji Seemo teeme trupa yepäyepä cabu ituge abacitena.

⁵ Teepe ituge umle äbitena Acejiyame me mene poto cidi me egä peei lui babo miijirage gyene, teepe piyepu Acejiyame me kokre ne teeme biname bine waadena mule cabu ituge päpänä.

⁶ Yoo, biname te pepu umle cama liba teemämu läyeb lingtonge Acejiyame bau ca, tabe äblicäco cääri atatrongära. Teeme äyeb lingtonge lui epu pana niyarage gyene tabe liba Aceji Bägrä ne baarge uli cabu cääri acita liyepu, piyepu teebine jäägyuge biname bime opo gaabe.

⁷ Yoo, mine biname bime mule opo pa yaawatnipesi ai gawe poto cidi me mene cabu ca. Poto gawe te ngupe niye ne yaanuge, piba miijirage gije bine uutaname jaawenemuge teeme gije liteta biname täapume. Siige, Acejiyame peei gawe ne miiji jaawenuge.

⁸ Yepä, nuuja gawe lui gaalegale seeasea bine uutaname jaawenemuge, siige gije liteta biname te peei gawe ne yaainuge niyarage gawe ca, cuta pagege uubudera. Yoo, pepu pana cirege äbita miiji mule biname piyepu niya mule biname bime täapume.

⁹ Cime miiji binamewale, cine peei mene jijenininago weebibine umle ceerame, yepä cine umle gemi egä Acejiyame weene cama gyene. Cine weeme miijirage mule pagege päpänä, epu pana mule biname te jaawenemuge lui äsecräreji ge niya mule cabu ca.

¹⁰ Yoo, Acejiyame lui cängenarage gyene. Tabe lica pagege ngene ätrimela weeme kaakesea piyepu weeme singi poto cidi me teeme täapume, weene liba teeme binamewale bine ituge ätityera cuta piyepu page itityeräjenemiye.

¹¹ Peei ätityera mule miiji gyene, piyepu cine babo singi weene yepäyepä pepu cängenarage lenajame ngälu pui miiji gwidape weene lui täapume jewagrijeniyeni liba weeme täapume cirege äbita.

¹² Weene durau gone, yepä niinäce ätrunga biname bime mule jitungemeye. Teeme ätrunga baborage birige piyepu teepe cängena umle cama jaawagrijenusi Acejiyame lui täapume ituge jaji teebibine ceerame, siige teepe peei name pi Acejiyame me Mene teeme täapume toraca jääpänusi.

Acejiyame me Toraca Mene name pi Mine Gone Umle cäco Lenaja

¹³ Niinäce gaabe ätrunga biname Abrahamo lui teeme yepä ge. Acejiyame liba umle mene Abrahamo ne jejuji, tabe teemerage ngii cama jejuji peei mene ne kokre me waweneme. Ai ingle naace popi nuuja te lica birige caburage Acejiyame cabu ca, tabe peei name pi teemerage ngii cama peei mene jejuji.

¹⁴ Tabe Abrahamo ne jejuji egä, “Cane meebine umle mene nääcärenine. Cane meebine baborage miiji cire naawenepene, cuta piyepu mäame kaakesaare bucurage cirege äbita.”

¹⁵ Yoo, Abrahamo ngenecu kokre cama tewagrijäjumi, siige Acejiyame me mene teeme bau me ibibi äbituji.

¹⁶ Yoo, biname te liba singi teeme mene kokre waweneme, tabe babo biname me ngii cabu jaajuge, piba äcela mene ingwe ca äblicäco.

¹⁷ Acejiyame teeme caburage ngii cama pui mene jejuji, peei name pi tabe lui biname bine pui miiji mene jejemuji, teepe toraca umle ge egä tabe licarage teeme mene mara me wawena.

¹⁸ Peete negi neeneni baborage gwidape: Acejiyame me jajeji mene piyepu teeme caburage ngii, cuta peei neeneni tabe äblicäco mara me wawena piyepu peei poto cidi me tabe äblicäco walya mene iicana. Peei gwidape cabu ca mine umle gemi egä cuta mime täapume Acejiyame me Mene toraca gyene iyeteta. Mine lui teeme bau otni äsecrära täapume, mine umle egä tabe mibibine lica abmala ätityera cäco, yepä ciige cire nisecräripi. Peei name pi mime ätrunga teeme bau lui kokre gyene.

¹⁹⁻²⁰ Peei umle lui epu pana cängka ne liyepu yaajarusi mime ngene atwanena cabu. Mine äblicäco apu iicana egä, “Teeme mene pama toraca gyene mime täapume,” yepä mine umle gemi egä peei mene lui toraca gyene. Mine umle egä Yeesu pisi nyene cabucewe je Babe ne awejeneme mime miiji täapume. Yeesu me Aceji Babe bau me otni lui epu gyene iiwäreja mope biname te iiwäreja mete lui cabucewe je pui me cudorage puupu cabu

me lipu abacita Acejiyame ne awejename biname bime miiji täápume. Yoo, Yeesu mime niinäce gaabe me Babe bau äduji, pui cabucewe iiwäreja mete cabu peei babo cäbletääpe ne cuderage puupu gome tabe itu iyeblingtuji, peei name pi mine ibibi gemi teeme ingwe ca Babe bau otnime. Yoo, Yeesu iiwäreja mope biname me ituge äbita mime täápume piyepu teeme kaakesea iyeteta gyene, Melkasideke me liiyepu.

7

Mene Iiwäreja Biname Melkasideke poto cidi me

¹ Melkasideke lui Mopeyame ge babo cewe Salema täápume. Tabe cuta iiwäreja biname ge mime Caburage Acejiyame täápume. Ujarage, Abrahamo cubu cabu ca liba tacnenutuji, lui cubu cabu je tabe fooa gawe maramara mopeyame cabu ca yuutrutuji, Melkasideke teebine gaabe cabu piba opopa jewenuji, jejuji egä, “Acejiyame te meebine baborage miiji pa naawenepi.”

² Abrahamo piba cubu cabu ca gwidape bine setomlecmuji ten kupae jewenemuji, siige yepä kupae Melkasideke ne ecäruji. Yoo, Melkasideke me ngüi poto cidi me, aboclomta lui “Conocäco Mopeyame” ge. Biname cina teebine nuuja taje yaainusi “Poode me Mopeyame” ca, ingle tabe Mopeyame ge Salema cewe täápume, piyepu Salema me aboclomta lui “poode”.

³ Mime nuuja mene lica teeme mage babe poto cidi me, cuta mene lica ge teeme niinäce kaakesaare poto cidi me. Peei name pi mine umle lica gemi teeme aplimla, teeme budre. Epu pana Aceji Bägärä liiyepu, tabe Acejiyame me iiwäreja biname gyene iyeteta.

⁴ Mine ngene jwaatwananinago Melkasideke lipu baborage ge. Tabe baborage ge Abrahamo cabu ca, lui Israela biname bime ingle kaakesaare ge, peei name pi Abrahamo te yepä kupae teebine ecäruji, lui gwidape bine sewademuji cubu cabu ca.

⁵ Yoo, Abrahamo me kaakesaare bägärä Leebi me kaakesaare bägärä lui cina iiwäreja biname ge Acejiyame täápume, sasa cotre mene te jüicenige egä teepi owecu gwidape bine miiji waadena teeme Israela binamewale cabu ca. Mule apu ge: iyeta Israela biname lui cina gwidape piyepu deedei jääpänemusi teeme kaakesea cabu ca, teepi miiji iyeta ten gwidape cabu ca yepä ceera. Iiwäreja biname cina miiji pui gwidape waadena, ngänuge teepi piyepu teeme binamewale iyeta lui Abrahamo me kaakesaare gemi.

⁶ Yoo, Melkasideke lica Leebi me ingle cabu ca, yepä Abrahamo teebine yepä kupae ecäruji. Melkasideke piba Abrahamo ne mene jejuji teeme miiji täápume, Acejiyame lui ne temiji jajeji mene ituge ceera.

⁷ Yoo, Melkasideke lui baborage ge Abrahamo cabu ca, ingle mine umle gemi egä lui te ibibi birige Acejiyame me miiji ne ceera, tabe baborage gyene teeme cabu ca lui te peei miiji ne yaacatuge.

⁸ Age nuuja mene Melkasideke poto cidi me. Israela biname bime iiwäreja biname lui cina kupae yaawadanemusi teeme binamewale cabu ca, teepi binamerage gemi; teeme lenaja lica iyeteta. Yepä, Melkasideke poto cidi me, Abrahamo lui ne teeme kupae ecäruji, Oogäräneji Mene te jüicenige egä teeme cuta pisi nyene ireclota.

⁹ Yoo, apu pana gyene: Leebi, lui me kaakesaare bägärä cina kupae yaawadanemusi Acejiyame täápume, tabe te kupae ecäruji Melkasideke ne pui yepä padare Abrahamo liba kupae teebine ecäruji,

¹⁰ ingle ngänu ge puu pui padare Leebi lui camuge aplimla, yepä tabe puga ge teeme kaakesaare Abrahamo me tääpe cabu. Yepä, Melkasideke taatu tabe lica nuuja biname ne kupae yäacäruge. Yoo, peei name pi Melkasideke cuta baborage gyene iyeta nuuja iiwäreja biname cabu ca.

¹¹ Acejiyame teeme cotre mene Israela biname bine ecäremuji, peei cabu biname cina iiwäreja biname bime ätityera cabu ca conocäco me äbitame, yepä Israela iiwäreja biname cina äblicäco biname bine toraca conocäco me wawena. Peei name pi Acejiyame Keriso ne tityepuji biname bine toraca ätityerame, ingle mime iiwäreja mope biname Keriso lica peei nuuja iiwäreja biname pana gyene, lui cina Leebi piyepu teeme kaakesaare bägärä Aarona me ingle cabu ca ge. Keriso baborage gyene iyeta teeme cabu ca Melkasideke liiyepu.

¹² Yoo, Keriso lui mara iiwäreja biname gyene, peei name pi Acejiyame cuta cotre mene mara me jewenuji iiwäreja poto cidi me.

¹³⁻¹⁴ Yoo, pajecu gyene egä mime Yageyame Keriso tabe lica Leebi me ingle cabu ca ge. Mine iyeta umle gemi egä tabe Yuuda me ingle cabu ca ge, piyepu Yuuda me inglewale cina iiwäreja kaakesea lica ituge wawena, ingle nuuja mene lica ge Acejiyame bau ca Moose bau me peei kaakesea teebine ceerame.

Yeesu me Kaakesea Lui Melkasideke pana Gyene

¹⁵ Yoo, pajecurage gyene egä Acejiyame te kirece mara iiwäreja biname ne ituge acata. Page Yeesu pisi nyene mime iiwärejayame. Tabe lui Melkasideke pana gyene,

¹⁶ lica Leebi me inglewale cabu ca sasa mule liiyepu. Tabe teeme iiwäreja biname me ngii piyepu teeme kokre lica yaacatuge pui sasa cotre mule cabu ca, lui gyene biname bime ingle poto cidi me, yepä teeme kokre pisi nyene teeme ngälu cäco ireclota cabu ca.

¹⁷ Oogäräneji Mene te teeme poto cidi me jüicenige egä,
 “Maane iiwäreja biname gäte epu pana Melkasideke liiyepu,
 piyepu mäame kaakesea lui ngälu cäco gyene.”

¹⁸ Yoo, siige gyene pui sasa cotre mene iiwäreja poto cidi me, ingle kokre cäco

¹⁹ piyepu ibibi lica gyene biname bine toraca conocäco wawenname Acejiyame me opo gaabe je. Page mime ätrunga pisi nyene Yeesu me kaakesea cabu, lui te ibibi gyene mibibine cängena waadena Acejiyame bau me.

²⁰ Yoo, Acejiyame teeme iiwäreja kaakesea lica papa ecäruji Yeesu ne, yepä pui padare tabe cuta teeme caburage ngii jüicuji teeme mene kokre me wawenname. Pui nuuja iiwäreja biname cina lica pepu kokre mene cabu ca yaawadanemusi teeme kaakesea bine.

²¹ Yeesu taatu iiwäreja biname me äbituji pepu ngii cama mene cabu ca, Acejiyame liba teebine jejuji egä,

“Cane lui Yageyame gäne, cane cäme ngii cama ai mene pa nääcärene,
 piba ai mene licarage mara me wawena.

‘Maane iiwäreja biname gäte iyeteta ngälu cäco.’”

²² Siige, ai Acejiyame me ngii cama mene name pi, Yeesu ibibi gyene iiwäreja kaakesea wawenname, peei name pi tabe cuta ibibi gyene kirece jajeji mene toraca me wawenname niya mule cabu ca äsecrera poto cidi me.

²³ Yoo, nuuja iiwäreja biname teepi bucurage ge pui sasa mule cabu, ingle teeme ireclota ngälu cama ge. Nuuja cina teeme niinäce me puupu ne jaacatanusi.

²⁴ Yepä, Yeesu me ireclota lui ngälu cäco gyene, piyepu teeme iiwäreja kaakesea nuuja te lica cire juutecrepi.

²⁵ Yeesu peei name pi ibibi gyene biname bine iyeta cängena äsecrera teeme niya mule daremü cabu ca, lui cina Yeesu me kaakesea miji pi Acejiyame bau me otni, ingle tabe puma enajenige iyeteta Acejiyame ne awejenname teeme miiji täapume.

²⁶ Yeesu peese nyene miijirage iiwäreja babo biname lui mime singi ibibi nityärininuge. Tabe conocäco gyene, epucäco, piyepu mara gyene iyeta biname cabu ca, lui cina niya mule jaawenemusi. Page tabe pisi nyene cabucewe je, cuta teeme ngii cabu me awepänteji gyene.

²⁷ Tabe lica gyene nuuja iiwäreja biname liiyepu lui cina miiji iyeta bimü gaabegabe cibi gwidape ca yiwäräjemusi niinäce teeme niya mule täapume, piba cuta iyeta biname bime niya mule täapume. Tabe yepä gäabu taatu yiwäräjuji, tabe liba teeme tääpe ecäruji budre täapume. Siige, peei lui ibibi gyene biname bine kälkä wawenname iyeteta.

²⁸ Yoo, Acejiyame me cotre mene Moose lui bine sewademuji, peei te iiwäreja kaakesea poto biname bine yäcäremuge, lui cina iyeta binamerage gemi, piyepu kokrecäco gemi, yepä pui cotre mene ingwe gaabe ca Acejiyame te kirece mene jejuji, piba teeme ngii cama pui mene ne babo kokre me jewenuji. Tabe peei mene cabu teeme Bägrä ne iiwäreja kaakesea ecäruji, tabe lui epucäco piyepu ibibi gyene ai kaakesea wawenname iyeteta.

8

Yeesu me Iiwäreja Kaakesea Mime täapume Apu Gyene

¹ Yoo, iyeta mene cabu ca cine weehibine bii jjinago, ai ngene atwanena baborage gyene egä mime täapume pisi nyene cabucewe je iiwäreja babo biname lui te adnatäneji enajenige Acejiyame me camu poto teeme miiji puupu cabu.

² Tabe iiwäreja biname gyene Acejiyame ne awejenname mime täapume pui cabucewe puupu cabu. Peei lui Acejiyame me toraca iiwäreja puupu, ingle peema pisi nyene Acejiyame me toraca mete, lica biname bime ime ca wawenäneneji, yepä Acejiyame miji wawenäneneji gyene peei mete.

³ Yoo, iyeta iiwäreja babo biname teeme kaakesea lui cibi mäju ca Acejiyame ne yiwäräjusi piyepu nuuja owecu gwidape teebine yäcärusi. Pui name pi cuta Yeesu mime Iiwäreja Babo Biname te miiji Acejiyame täapume owecu gwidape ceera, siige tabe teeme tääpe ne ecäruji.

⁴ Yoo, Yeesu liba ai gawecewe cabu enajuji, tabe iiwäreja biname lica ge, ingle ama ibibi iiwäreja biname piti nemi, lui cina Israela biname bime cotre mene cabu ca yiwäräjemusi.

⁵ Pui iiwäreja biname bime kaakesea lui owowä pana gyene Yeesu me toraca iiwäreja kaakesea täapume lui gyene cabucewe je. Teeme iiwäreja mete cuta piyepu owowä

pana gyene toracarage mete cabu ca lui cabucewe je. Pui name pi Moose liba gwidape jebasecretnemuji mete wawename Acejiyame täápume, lui mete cibi tääpe ca wawenäneji ge, Acejiyame piba teebine jejuji egä, “Maane iyeta gwidape pui ootonuta pana cängena jewenemepi, cane lipu meebine itu naawabepene Sinai Podo cabu.” Yoo, peei mene cabu ca mine umle egä pui mete lui owowä pana ge cabucewe mete täápume.

⁶ Yepä, Yeesu me kaakesea lui baborage gyene Israela iiwäreja biname bime kaakesea cabu ca, piyepu kirece jajeji mene Yeesu lui ne mime täápume toraca me jaawenuji, baborage gyene sasa mene cabu ca, ingle pui mene toraca ibibi gyene egä Yeesu te mibibine niiya mule cabu ca nisechränuge ten cama iyeteta lenajame.

⁷ Sasa jajeji mene, cotre waweneca piyepu jäje iiwäreja poto cidi me, ibibi lica ge biname bine kälyä wawenecame. Peei liba ibibi gyene, Acejiyame piba singi lica kirece jajeji mene ceerame.

⁸ Yepä, sasa mene ibibi lica ge, ingle biname bime niiya mule cuta piti nemi. Acejiyame peei poto cidi me jüicuji Oogäräneji Mene cabu egä,

“Cane lui Yageyame gäne, cane jijenininine egä, ‘Padare te pa tädepi,

cane piba kirece jajeji mene cire jaawenepene

Israela biname bime kaakesaare täápume,

cuta piyepu Yuuda me ingle biname täápume.”

⁹ Ai kirece jajeji mene mara gyene sasa jajeji mene cabu ca, cane lui ne jewenujine teeme niinäce kaakesaare täápume, cane liba teebibine ime ca sewecnemujine Aikupito gawe cabu ca.

Yepä, teepi cäme jajeji mene lica cängena acata wawenecame.

Cane peei name pi teebibine kaake me jewenemujine.”

¹⁰ Mime Yageyame cuta jüicenige egä,

“Yoo, agha kirece jajeji mene cane ingwe ca cire jaawenepene Israela biname bime täápume.

Cäme cotre bine cane cire yoogäremepene teeme ngenecu bora; teeme ngene atwanena cabu cire yaacitepene.

Cane teeme täápume Acejiyame cirege äbita,

cuta teepi cäme biname cirege lenaja.

¹¹ Pui padare cabu piba nuuja te lica teeme binamewale bine,

coo teeme naniganewale bine cire yaabiberäjemepesi egä,

‘Acejiyame täápume umle äbitepeye,’

ingle matimati cabu ca modamoda biname me

teepi iyeta cäme täápume umle cama cire yaacrajemepi.

¹² Yoo, cane teebibine kälyä cire jaawenemepene;

cane ingwe ca lica teeme niiya mule bine ngene jaapecnemepene.”

¹³ Siige, peei mene cabu Acejiyame jüicenige egä teeme kirece jajeji mene tuwängle gyene sasa jajeji mene täápume. Page pui sasa mene te mameta ge ämlita.

9

Sasa Iiwäreja Mule Mara Gyene Yeesu me Iiwäreja Mule cabu ca

¹ Niinäce jajeji mene cabu puga ge cotre mene irecu ätumuta mule täápume. Cuta piyepu puga ge cäbletääpe ca wawenäneji mete teeme maramara irecu ätumuta piyepu iiwäreja mule täápume.

² Pui iiwäreja mete ngalebora neeneni puupu puga ge. Pui niinäce puupu lui ne yaainusi Cude Puupu ca, peei ngalebora nesae gwidape puga ge: ngale me atecwamta puupu, piyepu dade, cuta piyepu buluduu pui dade papa cabu. Peei buluduu ceerajäneji ge Acejiyame ne.

³ Pui mete cole je jeclänutujisi baborage cäbletääpe ca atri täápume. Pui cäbletääpe nuuja poto ca lui puupu ne yaainusi Cuderage Puupu ca.

⁴ Cuderage Puupu ngalebora puga ge dade lui gol ca acwabäneji ge. Pui cabu iiwäreja babo biname te miiji lengo gwidape bine juubudäremuge Acejiyame täápume. Cuta puga ge gwidape niinäce jajeji mene täápume jamyacurage uli boks ngalebora. Peei boks lui gol ca acwabäneji ge. Boks ngalebora me laacitisi neeneni kula lui papa cabu Acejiyame me ten cotre mene oogäräneji ge. Jajeji mene täápume boks ngalebora cuta puga ge gol karpu. Peei karpu bora je buluduu pana gwidape ge teepi yaainusi “maana” ca, lui deedei ca Acejiyame biname bine engäremuji deedei cäco gawe cabu. Peei boks ngalebora cuta puga ge Aarona me otnetneja suru lui te laame bine itu sisemuji awabejame egä Aarona lui Acejiyame me singi biname ge iiwäreja babo biname täápume.

⁵ Peei boks papa cabu puga ge neeneni owowä pana gwidape lui mename seemo pana opo cama, cuta taame cama ge. Teepi boks ne cängena jaawabäsi egä agesa Acejiyame ne lenaja puupu. Iiwäreja babo biname te peei puupu ne cibi uudi ca yää-trupicuge Acejiyame ne awejename biname bime niyya mule äcise-jame. Yoo siige, page lui miiji padare lica gyene peei gwidape poto cidi me cängena-cängena aboclomäjame.

⁶ Iyeta gwidape pepu ge pui sasa mete cabu, teepi luma irecu lätu-mutunusi Acejiyame ne awejename. Iiwäreja biname cina peei nii-näce puupu cabu me yääbäcnusi cuta täsuge iyeta bimu gaabegabe teeme kaakesea wawename.

⁷ Yepä, iiwäreja babo biname te taatu labacituge pui ngaleborarage puupu me. Tabe yepä taatu padare cabu kämäge gaabegabe labacitanuge. Tabe miiji cibi uudi acana ten cama, pui ca niinäce teeme niyya mule äcisejame, piba cuta iyeta biname bime niyya äcisejame.

⁸ Yoo, pajecu gyene Aceji Seemo me abiberäja cabu ca egä gaabe camuge iitnana toraca mete me toraca Cuderage Puupu cabu me abacitame teeme tääpume lui cina pui sasa gawecewe iiwäreja mete cabu cuta yiiwärajusi.

⁹ Mine piba peei cabu ca umle läbitinago egä owecu gwidape piyepu cibi mäju Acejiyame tääpume acrejetame, peei cina äblicäco biname bime ngenecu conocäco piyepu plowa me wawename.

¹⁰ Peei iiwäreja mule lui deedei äbita piyepu niyye nänäja poto cidi me taatu, cuta piyepu maramara äciseja mule tääpume. Iyeta peei mule lui tääpe poto cidi me, cuta lica ngenecu poto cidi me. Mime saarewale cina miiji peei mule bine waweneca kälä me äbitame Acejiyame me opo gaabe je. Teeme ngälu lui Acejiyame liba kirece ireclota pa yääcäremepi.

¹¹ Siige, Yeesu itu täduji, iiwäreja babo biname me itu äbituji miijirage kirece mule ne aboclotame. Yepä, page tabe kaakesea lica jewenenige ai gawecewe mete cabu, lui ne biname cina erangujisi, piyepu lui ge gawecewe gwidape ca wawenäneji. Page tabe kaakesea jewenenige toraca miijirage puupu cabu, lui gyene cabucewe je.

¹² Yeesu Acejiyame me Cuderage Puupu cabu me yepä gäabu abacituji, lica gouti piyepu kau plongo bime uudi cama, yepä teemerage uudi ca Acejiyame ne yiiwärajusi mibibine kälä me wawename niyya mule daremu cabu ca iyeteta ireclota cabu äbäcname.

¹³ Sasa mule cabu biname liba traci lica ge, piba iiwäreja biname te teebine yäätrupicuge gouti piyepu rooriye kau bime uudi ca, cuta piyepu tabe kau plongo ne juubudäruge. Cuta pui me tuuwe mriibe ca piba jääsimaluge. Peei ca biname te miiji me läbituge Acejiyame me binamewale cama abasutame piyepu Acejiyame bau me irecu ätumutame.

¹⁴ Peei mule te biname me tääpe ne taatu jugi cäco me jaawenuge, yepä Keriso me uudi ibibi gyene mime trupa ngalebora ne äcisejame. Piba mime ngene atwanena lica mime niyya mule daremu cabu, yepä mime ngene atwanena iyeta lui Acejiyame cabu gyene teeme singi wawename. Yoo, Aceji Seemo lui iyeteta gyene, teeme ätityera ca Keriso teemämu owecu gwidape pana ituge ceera Acejiyame ne. Tabe budre me äbituji mime niyya mule bine äyebblängäme, tabe lui epucäco gyene piyepu teeme nuuja niyya mule lica ge.

¹⁵ Yoo, Keriso gaabe jiitnuji kirece jajeji mene tääpume, ai ingle naace popi lui biname cina ala asogläcneji gemi, teepi piba ibibi gemi miijirage iyeteta ireclota cabu lenajame, Acejiyame te lipu itu jiiucuji, ingle Keriso me budre pisi nyene teeme niyya mule bime daremu äyebblängame, lui wawenäneji gemi sasa jajeji mene padare cabu.

¹⁶⁻¹⁷ Yoo, iyeta modamoda biname cina teeme budre niinäce gaabe, teepi mene jaajemusi teeme gwidape poto cidi me egä lui te pagege waadena. Peei budracame me mene ibibi läbituge teeme budre ingwe gaabe ca taatu.

¹⁸ Peei name pi cuta Acejiyame me niinäce jajeji mene poto cidi me teepi miiji cibi eglujisi, piba cibi uudi ca peei mene ne ibibi me wawename.

¹⁹ Cuta peei name pi Moose liba iyeta Acejiyame me cotre mene biname bine jejananemuji, peei ingwe gaabe ca tabe kau plongo me uudi piyepu gouti me uudi niyye cama elenglecäjemuji, piba maamoi ngäli bine uli ciipe cabu jesoplecäjemuji. Pui ududi ngäli ca Oogäräneji Cotre Mene bime uudi ca itrupecmuji, piba iyeta biname bine cuta itrupecmuji.

²⁰ Tabe jejemuji egä, "Ai uudi te Acejiyame me jajeji mene toraca kokre me jewenenige, peei name pi weene miiji ai mene ne wawename."

²¹ Yepä pana mule ca Moose te iiwäreja mete ne, iyeta iiwäreja kwäye piyepu nuuja gwidape cama, uudi ca cuta itrupecmuji.

²² Yoo, sasa cotre mene cabu, pama iyeta gwidape uudi ca äcisäjeji ge kälä me wawename. Niyya mule cuta pepu gyene, miiji uudi asata peei cabu ca kälä päpäname.

Yeesu Keriso me Budre Ibibi Gyene Mime Niyya Mule Äyebblängame

²³ Lui gwidape owowä gemi toraca cabucewe gwidape tääpume, miiji peei bine kälä me wawena sasa iiwäreja mule ca, yepä pepu gawecewe iiwäreja mule ibibi lica gemi

cabucewera ge gwidape täápume. Mara jamyacu iiwäreja mule taatu ibibi gyene cabucewe gwidape täápume.

²⁴ Peei name pi Keriso lica gawecewe Cuderage Puupu cabu abacituji, inge peei biname biji rarangäneji mete lui owowä taatu ge Acejiyame me toraca puupu täápume. Yepä, Keriso cabucewe puupu me abacituji. Tabe puma enajenige Acejiyame me opo gaabe teebine awejename mime täápume.

²⁵ Tabe cabucewe puupu me licarage jäje abacitanuge teeme tääpe bucurage gääbu ceerame, epu pana Israela iiwäreja babo biname te gawecewe mete Cuderage Puupu cabu me lipu kämäge gaabegabe labacitanuge uudi cama, lui teeme uudi lica ge.

²⁶ Eewe, inge pepu liga cirege äbita, Keriso pita piyepu budre cire läbitaneji bucurage gääbu ai gawecewe me agedna cabu ca, yepä pepu lica gyene. Ai gawecewe liba mameta ge apira, piba tabe yepä gääbu taatu äduji iyeta niya mule bine äyebhengame, teeme tääpe liba budre me äbituji.

²⁷ Yoo, biname cina lipu yepä gääbu taatu budre äbita, siige Acejiyame peei ingwe gaabe ca teebibine cirege atrana,

²⁸ Keriso cuta piyepu yepä gääbu taatu budre äbituji daremu ceerame iyeta biname bime niya mule täápume, siige tabe cire tacnenutepi, yepä tabe lica cääri biname bime niya mule bine äyebhengame. Tabe cire tacnenutepi biname bine waadename iyeteta ten cama lenajame, lui cina teebine jewagrijenisi teeme äsecrera täápume.

10

¹ Yoo, Israela biname bime cotre mene lui cuta owowä pana ge. Peei te läbitanuge aboclomtame Keriso te lui miiji mibibine cire nicäripi. Sasa mule cabu iiwäreja bucurage ge iyeta kämäge gaabegabe, yepä peei iyeta ibibi lica ge biname bine kälyä wawenname lui cina singi Acejiyame bau otnime.

² Teeme iiwäreja liga ibibi cirege teeme niya mule poto cidi me kälyä ceerame, biname cina piba lica ingwe ca asicnenta teeme niya ne; cuta siige piba iyeta iiwäreja.

³ Yepä, teeme ngenecu bora asicnenta lui miiji lica ge, peei name pi teeme iiwäreja iyeta kämäge gaabegabe lui teeme täápume ngenecna pana ge teeme niya mule poto cidi me,

⁴ inge naace gyene uudi rooriye kau piyepu gouti cabu ca äblicäco niya mule toraca äyebhengame.

⁵ Peei name pi Keriso me gawecewe cabu me otni padare liba mameta ge, tabe Acejiyame ne mene jejuji egä,

“Maane singi lica gäte cibi mäju, cibi uudi, piyepu nuuja iiwäreja gwidape täápume, yepä maane singi gäte cane cäme binamerage tääpe ne ceera budre me.

⁶ Maane ngenecu miiji lica gäte teepi liba camlecample cibi bine kula dade cabu jubudäremusi teeme niya mule daremu täápume.

⁷ Cane peei name pi meebine naajenine egä,

‘Cane age säne otnime mäame singi wawenname; cäme poto cidi me lipu oogäräneji ge.’”

⁸ Siige, peei mene cabu Keriso niinäce jejuji egä, “Maane singi lica gäte maramara iiwäreja mule täápume; maane gege lica gäte iingäja cibi täápume coo piyepu iyeta nuuja mule niya mule bine äyebhengame täápume.” Tabe pepu jejuji, ngänu gyene puu cotre mene te jicenige peei bine wawenecame.

⁹ Keriso piba jejuji egä, “Cane age säne otnime mäame singi wawenname.” Siige, Acejiyame iyeta sasa iiwäreja mule bine iyebhengemuji, piba Keriso ne tuwängle ecituji teeme puupu cabu.

¹⁰ Ai inge naace popi Yeesu Keriso itu jewenuji Acejiyame me singi bine, mine iyeta kälyä gemi mime niya mule cabu ca. Tabe liba teemämu iiwäreja pana ecäruji budre täápume pui yepä padare, peei lui ibibi gyene iyeteta ngälu cäco.

¹¹ Israela iiwäreja biname cina yepä pana iiwäreja birige waweneca iyeta bimu gaabegabe, yepä pui iiwäreja äblicäco niya mule bine toraca äyebhengame.

¹² Keriso yepä taatu padare yepä gwidape, teeme tääpe ne, ecäruji. Siige, peei lui ibibi gyene niya mule äyebhengame ngälu cäco. Tabe piba adnatuji Acejiyame me camu poto ime cabu.

¹³ Page tabe puma jewagrijenige Acejiyame te teeme cubuyame bine teeme ernge gawe me acraname.

¹⁴ Peei yepä wawena ca tabe biname bine epucäco me jenenemuji iyeteta, tabe lui bine mara me jenenemige teeme pana äbitame.

¹⁵ Mine umle gemi egä peei mene toraca gyene, inge Aceji Seemo te Oogäräneji Mene cabu itu jicujuji egä,

¹⁶ “Yageyame te apu jicenige, ‘Cane ai jajeji mene cäme biname täápume cire jaawenepene.

Cāme cotre bine cane cire yoogāremepene teeme ngenecu bora,
cuta teeme ngene atwanena cabu cire yaacitanepene.”

17 Tabe cuta jiicuji egā, “Cane lica teeme niya conocono mule bine cire ngene jaapecne-
mepene.”

18 Pui name pi page siige, nuuja ingle lica gyene gwidape cāari cuta iiwārejame niya mule
äyblengame.

Mine Miiji Acejiyame bau Otni Peei Kälyä Acatename

19 Cāme ätrunga binamewale, mine miiji gemi wālu cāco Acejiyame me Cuderage Puupu
cabu äbācname teeme opo gaabe aclajutame, ingle Yeesu teeme uudi ituge apira mine
Acejiyame me biname me äbitame.

20 Teeme tääpe liba budre, peei te Acejiyame me Cuderage Puupu ne jiiuuiji mime
tääpume. Teeme budre padare cabu pui babo cābletääpe, lui te iiwāreja mete cabu Cuderage
Puupu ne jäälyenguge, peei te cole je äderāruji. Siige, mime kirece Acejiyame bau me otni
gaabe peese nyene Yeesu, lui te page ireclota cama enajenige cabucewe je.

21 Tabe mime tääpume iiwāreja babo biname gyene Acejiyame me mete ne ire atwime.

22 Peei name pi mine miiji wālu cāco otni Acejiyame bau yepā taatu ngene atwanena
cama, teebine toraca ätrunga cama, plowa ngenecu cama lui niya mule cabu ca äcisäjeji
gemi, piyepu jugi cāco tääpe cama lui miijirage niye ca äcisäjeji gemi.

23 Mine ätrunga cama cāngena ninajininuge, ingle mine umle gemi iyeta Acejiyame me
mene toraca me läbituge.

24 Mine mime nuuja bime poto cidi me ngene pa jwaatwananinago lipu teebibine ätityera
ceerame teepi owecu cama lenajame piyepu miiji taatu mule wawename.

25 Mine gonerage yaabmalusi mime abasecretna mule ne, poto cina liyepu, yepā
mine mimemime cerāmu kokre läcāraninago, ingle mine umle gemi egā Acejiyame me
cerācerägāabu bimu cudecewera lica gyene.

26 Yoo, biname te liba Acejiyame me Miiji Mene äsecrera poto cidi me yäätēcijuge, piba
ingwe ca teeme niya singisingi mule cāari jaawenemuge, teeme tääpume nuuja mara
ätityera coo piyepu iiwāreja lica gyene teeme niya mule daremu äyblengame.

27 Yepā, pepu biname lui cina Acejiyame ne jäägyusi, teepi miiji wālu cama lenaja, ingle
teeme tääpume pisi nyene atrana piba muye puupu cabu otnime puma iyeteta lenajame.

28 Yoo, sasa mule cabu apu gyene: Cotre bine Moose lui sogāremuji, lui biname te
jaatropangtuge, tabe budre jepānuji owecu cāco, liba piti negi neeneni coo nesae ire arbi
biname teebine aitnejame.

29 Peei cabu ca baborage gyene māpu daremu biname tääpume lui te Aceji Seemo me
ätityera ne jäägyuge, lui te gawe me yaacituge Aceji Bägrā ne, piyepu papa me jaawenuge
Yeesu me uudi ne, lui uudi te teeme niya mule bine ituge äyblenga Acejiyame me jajeji
mene name pi. Pepu biname tääpume māpurage daremu pisi nyene.

30 Mine umle gemi Acejiyame lui te jiicuji egā, “Niya mule daremu lui cāme ime cabu
sine; cane te cirege ceera,” tabe cuta jiicuji egā, “Yageyame te biname bine cirege atrana.”

31 Yoo, magerage māpu teeme tääpume lui cina niya mule daremu cirege pāpāna mime
Ireclota Acejiyame bau ca.

32 Siige, weene ngene jepecneye pui niināce padare, weene Acejiyame me Miiji Mene liba
ngale pana ecatujiye. Weeme ireclota māpu ge pui padare, yepā weene lica weeme ätrunga
ne ebma-lujiye.

33 Nuuja taje biname cina weebibine niyarage jicnecininusi piyepu niya jiiwenininusi.
Nuuja taje weeme binamewale bine liba jääpānemuye pepu māpu cabu, weene wālu lica
birige ten cama peei māpu cabu gigri lenajame.

34 Weene owecu jaawenemuye lui bine yaacranemusi krokeciye mete bora. Weeme
gwidape liba weeme bau ca yāäyēblingusi, weene cuta ngenecu miiji birige, ingle weene
umle gemi teepi äblicāco weeme bau ca äyblenga weeme toraca miiji cabucewe je puupu
ne, peei lui weemi nemi iyeteta.

35 Yoo, cuta ai padare cabu weene wālu gone! Weene miiji cāngena kokre cama
inajininuge weeme ätrunga cabu, piba weeme babo miiji daremu cirege pāpāna.

36 Weene miiji ngenecu kokre cama lenajame, naace tääpume Acejiyame me singi ne
wawename, piba teeme mene weeme tääpume toraca me cire läbitepi.

37 Oogārāneji Mene te jiićenige egā,

“Matikolā taatu padare piyeme,
piba lui te otnime äbitenige, tabe pa tädepi,
lica dāägudāgu äbita otnime.

38 Cāme conocāco biname cina teepi pa jäätrungepesi, piba peei cabu icrajenige iyeteta.
Yepā, liba nuuja te latatrongärüge, cane lica ngenecu miiji teeme tääpume.”

³⁹ Siige, mine lica gemi pui biname lui cina gaabe cabu ca täcnäruge cuta lapesarinusi, yepä mine jäärungusi, piba miiji ireclota ne ten cama cirege päpäna iyeteta.

11

Mime Niinäce Kaakesaare cina Miiji Ireclota ne Cire Jääpänepesi Teeme Ätrunga cabu ca

¹ Ngena gyene ätrunga? Yoo, ätrunga lui apu pana gyene: Mine jaawagrijsi toraca umle cama egä mine lui gwidape täöpume singi, peei te pagege äbita. Mine toraca umle gemi egä mime singi gwidape pisi nyene niinäce gaabe je, mine pagege oomlana, ngänuge puu ai padare cabu mime cudecewe name pi mine äblicäco päpäna.

² Yoo, Acejiyame te sasa ätrunga biname bine ewepyeräjemuji teeme ätrunga täöpume.

³ Ätrunga ca mine umle läbitinago egä ai gawecewe piijepu cabu je wale bine, iyeta Acejiyame te mene ca jewenemuji, yepä lui cabu ca tabe jewenemuji, mine pui bine äblicäco gemi päpäna.

⁴ Ujarage Abela me iiwäreja Acejiyame täöpume lui miiji ge teeme naane Kaino me iiwäreja cabu ca teeme ätrunga name pi. Acejiyame Abela me iiwäreja gwidape bine ewademuji awabejame egä Abela me ätrunga mule miiji ge. Yoo, Abela uja ge budre, yepä mine teeme bau ca pa labiberäjipesi.

⁵ Eenoka Acejiyame ne jitrunguji, peei name pi Acejiyame teebine cabu me ecituji budre cäco; tabe papa apesaruji. Biname cina liga teebine jirnganujisi, teepi äblicäco ingwe ca päpäna, ingle Acejiyame itu ecatuji teebine. Acejiyame me Oogäräneji Mene te jüicenige egä, Eenoka me acatäneji niinäce gaabe me tabe Acejiyame ne ngenecu miiji me jewenuji.

⁶ Yoo, biname te äblicäco Acejiyame ne ngenecu miiji me wawena ätrunga cäco. Ingle naace gyene lui cina singi Acejiyame bau otnime, teepi miiji jäärungusi egä pisi nyene Acejiyame piijepu tabe babo miiji daremu teebibine yääcäremuge, lui cina toraca jäärngusi teebine.

⁷ Nooa peese nyene nuuja biname lui te Acejiyame ne jäärü-nguge. Acejiyame teebine umle mene jejuji ingwe gwidape poto cidi me. Nooa teeme mene jecatuji. Ngänuge tabe lica igi niye ne jepänuji, tabe babo poo ne eranguji, teeme coga bägrä cama peei ca isecräremuji babo niye cabu ca. Nooa me ätrunga mule mara ge nuuja teeme binamewale bime ätecija cäco mule cabu ca. Acejiyame teebine teeme biname me jewenuji teeme ätrunga name pi.

⁸ Abrahamo Acejiyame ne jäärunguge. Acejiyame teebine jejuji cewe ne abmalame cudecewe gawe cabu otnime, tabe lui gawe teebine cirege ceera. Abrahamo peei mene jecatuji otnime. Tabe gaabe cabu äduji, yepä umle lica ge liiyeme ädenige.

⁹ Tabe lui gawe cabu enajuji catecewe biname pana, Acejiyame me mene peei poto cidi me jäärunguge egä tabe pui gawe teebine cirege ceera. Tabe cäbletääpe ca wawenäneji mete bine sewademäjemumi, peei cabu senajenäjumi tabe, piba Isacako, cuta ingwe ca Yakobu. Teepi iyeta yepä mene ne ecatanujisi Acejiyame bau ca.

¹⁰ Abrahamo lica babo cewe cabu yaanajuge, yepä tabe ngene jwaatwananuge iyeteta lenaja cewe poto cidi me, lica ai gawecewe cabu, yepä Acejiyame lui cewe ne yootonutuji piijepu eranguji cabucewe je.

¹¹ Abrahamo babe me äbituji tabe liba sasara ge, cuta piijepu teeme coga Saara te bägrä ne jepänuji, lui te ngälu pui padare äblicäco ge bägrä päpäna. Abrahamo Acejiyame ne jitrunguji teeme mene bägrä poto cidi me toraca me äbitame, siige teeme kokre te tacnenutuji, tabe imäbägrä ne jepänuji.

¹² Peei name pi Abrahamo, lui te mameta ge bägrä cäco budre, teeme bau ca secluji bucurage kaakesaare, epu pana bucurage cabu je wale lipu gemi. Secre pana bucurage gemi teepi, biname te äblicäco acnema.

¹³ Iyeta peei biname cina teeme ätrunga cama budre. Acejiyame me mene camuge toraca me äbita teeme täöpume, yepä teepi umle ge egä miiji pisi nyene ingwe ca, peei name pi ngenecu miiji cama budre. Teepi jüicujisi egä, "Cime toraca cewe ama lica gyene; cine catecewe biname pana ninajinige ai gawecewe cabu."

¹⁴ Peei mene cabu ca mine umle gemi egä teepi singi toraca cewe täöpume lui gyene cabu je.

¹⁵ Teeme ngene atwanena lica teeme sasa cewe cabu je, lui ne ituge abmala. Teepi liba singi cirege peei täöpume, teeme padare puga ge äcnärame,

¹⁶ yepä teepi singi lica. Iyeta teeme singi lui cabucewe täöpume, lui miijirage gyene iyeta nuuja cewe cabu ca. Peei ätrunga name pi Acejiyame ajiri lica gyene teeme täöpume, yepä tabe singi egä ätrunga biname cina teebine yaainusi teeme Acejiyame ca, ingle naace gyene tabe miijirage cewe ne itu emacetnäjuji teeme täöpume.

¹⁷ Acejiyame liba Abrahamo me ätrunga epicnantuji, Abrahamo teeme mene cuta jitrunguji, teeme yepä taatu bägrä Isacako ne kula dade cabu etecwantuji Acejiyame ne ceerame.

¹⁸ Tabe ngene jotwananuji Acejiyame me mene poto cidi me egä, “Määme toraca kaakesaare eei gemi lui mäame bägrä Isacako bau ca,”

¹⁹ piba ngene ca egluji egä Acejiyame ibibi ge Isacako ne budre cabu ca awecnistame. Pepu pana äbituji. Acejiyame Isacako ne Abrahamo bau me secwenistuji, Isacako liba mameta ge budre päpäna.

²⁰ Ingwe ca Isacako ätrunga cama teeme bägrä Yakobu piyepu Esau naabibine jaajuji teeme miiji poto cidi me ciige padare cabu.

²¹ Cuta Yakobu teeme budre mameta, tabe mene jaajuji teeme neeneni saare bine, Yoosepa me bägrä. Tabe ätrunga ca jaajuji teeme miiji poto cidi me ciige padare cabu. Tabe suru cama arpinantuji, irecu ätutumuji Acejiyame ne awepyeräjame.

²² Yoosepa cuta piyepu teeme budre mameta mene jiicuji egä Acejiyame te Israela biname bine cire yaawademepi Aikupito gawe cabu ca. Teeme ätrunga baborage ge, pei name pi mene jejemuji egä, “Ingwe ca căme kaake bine ama cita ca cire ewecnemepeye piyeme mime Kanana gawe cabu me.”

²³ Yoo, Moose me mage babe Acejiyame ne cuta jitrungujäsi. Teepi jamyacu opo bägrä ne jepänujäsi, piba ätrunga ecitujäsi Acejiyame bau me teeme bägrä asatame Aikupito gawe Mope Biname me cotre cabu ca, lui cotre imäbägrä agleca täapume. Teepi wälu lica ge Moose ne ämlitame nesae mabye cama.

²⁴ Moose liba uutige, tabe singi lica ge Aikupito gawe Mope Biname me ingle cabu lenajame,

²⁵ pätä tabe singi ge Acejiyame me biname cama abasutame teeme mäpu ireclota cabu lenajame, lica ge pui niya mule biname cama matikolä padare otnetneja teeme miiji ireclota cabu.

²⁶ Tabe ngene ca egluji egä miijirage cirege, tabe liba iicetna päpäna teeme äsecrera biname Keriso name pi. Peei name pi tabe Aikupito gawe biname bime miijimiji gwidape iyeta jigymuji, ätrunga cama jewagrijuji miiji daremu ne päpäname ciige.

²⁷ Tabe Acejiyame ne jitrunguji ätityerame teebine. Aikupito gawe ne liba sebmaluji, tabe wälu lica Mope Biname me claabe täapume. Tabe licarage tacnenutuji, yepä Acejiyame cama äduji epu pana tabe teebine opo awatna ten cama lui ne biname cina äblicäco päpäna.

²⁸ Moose Acejiyame ne jäätrunguge teeme binamewale äsecrera teeme mäpu ireclota cabu ca Aikupito gawe je. Tabe peei name pi biname bine jejemuji maamoi plongo ne agli Äsuplengta deedei wawename, piba pui me uudi ca mete grana bine apyacame. Piba Acejiyame me agleca mename seemo te teeme mete bine isuplengemuji, uuge bägrä bine lica eglecimuji peei mete cabu, yepä Aikupito gawe biname bime mete cabu taatu.

²⁹ Israela biname cina Acejiyame me ätityera cabu jitrungujisi, teepi conocäco yuurujisi malu lui ne yaainusi Ududi Malu ca. Peei lui epu pana teepi doro gawe cabu ecluji. Yepä, Aikupito gawe biname cina liga yuurujisi Israela biname bine äcwetname, teepi iyeta abumitnuji, siige.

³⁰ Israela biname bime ätrunga name pi babo cewe Yeriko me kula caale te itramuji. Camuge atrama, Israela biname cina peei caale ne piba jewaclomäjenujisi iyeta seben bimu cama, Acejiyame lipu teebibine itu jejemuji.

³¹ Yepä ero magebi teeme ngii Rahaba, tabe lica budre ne jepänuji nuuja Yeriko cewe biname cama. Teepi te singi lica ge Acejiyame me mene ätecijame, yepä Rahaba jitrunguji Acejiyame ne. Israela biname cabu ca neeneni ire täapume biname bine tabe te jaawabuji piyepu äätityäruji.

³² Yoo siige, cerämu biname piti nemi pepu pana, yepä padare ibibi lica gyene mene jaajanename Gideona, Baraka, Samson, Yepeta, Daawida, Samwela, piyepu iyeta sasa mename biname poto cidi me.

³³ Peei biname iyeta Acejiyame ne jäätrungusi tabe te teebibine ätityerame. Teepi yuutrutuji nuuja gawe cubuyame biname cabu ca, teeme biname bine cängena ire jetwemuji, piyepu pui miiji bine jepänanemuji, Acejiyame lui poto cidi me ituge jaji. Layani cina äblicäco teebibine agleca,

³⁴ muye wädräji äblicäco oomlana teebibine, cuta piyepu teepi cubu turikä budre cabu ca äsecräruji. Poto cina teeme täape liba bleela, teepi cuta cääri kokre jääpänuusi. Poto cina cubu me kokre cama yaacluge, piba nuuja gawe cabu ca biname cina temiji pi luucratnuge.

³⁵ Poto magebi ätrunga name pi teeme budre biname ewademujisi ireclota cama.

Nuuja pui biname cina mage pita piyepu budre jepänujisi, ingle teepi singi lica ge Acejiyame bau ca äyebengame peei pita piyepu budre cabu ca äsecrera, yepä teepi

Acejijame ne jäätrungusi tabe te teebibine cirege arpinera miijirage cabucewe ireclota tääpume.

³⁶ Teeme poto bine niijarage bääclena me jaawenemusi, jidnanininusi, nuuja bine jaamlemeläjemusi, siige krokeciye mete bora me yaacranimusi.

³⁷ Poto bine kula ca eglecimujisi, poto bine cole je jeclanimujisi, cubu turikä ca teepi budre jepänujisi. Poto cina cäbletääpe cäco, maamoi piijepu gouti tääpe bine asigrärinujisi. Teeme deedei piijepu gwidape lica ge; poto cina pita piijepu mäpurage ireclota jepänujisi nuuja biname cabu ca.

³⁸ Teepi uucratnujisi daapo taatu cewe cabu me piijepu podo cabu me, kula waja piijepu cupicu bora je ämleträrinujisi. Pui biname iyeta Acejijame ne jäätrungusi, yepä ai gawecewe me ireclota lui miiji lica ge teeme tääpume.

³⁹ Acejijame teebibine iyeta ewepyeräjemuji teeme ätrunga tääpume, yepä teepi camuge päpäna iyeta pui miiji ne Acejijame lui ituge jaji teebibine ceerame,

⁴⁰ Ingle Acejijame singi gyene teepi mime ireclota padare ne awagrijame, piba teepi mine cama gigri cirege päpäna pui iyeteta epucäco ireclota ne.

12

Acejijame Iyeta Teeme Bägrä bine Yaablawäjemuge

¹ Yoo siige, bucurage ätrunga biname cina ituge uutruta. Mine epu pana uuwamena biname gemi liijepu teeme sobe cabu. Miiji mine iyeta mime mäpu äyebenga piijepu poto niija mule lui cina mibibine cuta noomlenininisi. Mine piba gaabe cabu cängena uuwametna.

² Mine irecu yaacranemesi Yeesu bau me. Tabe mibibine niwadanenininige mime ätrunga cabu, ngälu peei te epucäco me cire läbitepi cabucewe je. Tabe teeme gaabe ne lica ebmaluji baarge uli cabu budre äbita name pi, yepä tabe baarge uli ne ecatuji, ajiri ngänuge tabe budre äbituji mime tääpume, ingle tabe budre gaabe cabu ngene jotwananuji egä teeme niinäce gaabe me babo gege pisi nyene. Siige, tabe budre cabu ca arpinan-tuji, page tabe pisi nyene adnatäneji Acejijame me camu poto ime cabu je.

³ Mime gaabe liba mäpu, liba worämu me läbitinago, mine piba ngene pa jwaatwananinago Yeesu me mäpurage ireclota poto cidi me. Niija mule biname liba teebine jimuetnujisi, tabe cängena enajuji. Mine cuta gone worämu name pi toraca gaabe ne yaabma-lusi.

⁴ Toraca, weene niija mule cama läciseräjininuye, yepä peei cabu ca weene lica budre ne ituge päpäna.

⁵ Nää, weene pama ngene jitrimalinininige Acejijame me miiji mene weeme tääpume egä,

“Cäme bägräwale, imyemutinege weeme Yageyame me ablaweja mene ätecijame.

Cane liba weeme niija mule yaaboclomäjimune, gone mäpu ngene atwanena yaacatuye.

⁶ Ingle naace gyene cäme singi biname bine cane yaablawäjemune.

Cane bägräwale bine poto mäpu cabu yääbäcnimune, cuta yääsecräremune.”

⁷ Weene ablaweja yaacatuye Acejijame bau ca, ingle tabe epu pana weebibine jiwenninunge bägrä bine liijepu. Yoo, iyeta bägrä yepäyepä teeme babe te yaablawäjuge.

⁸ Acejijame liba weebibine lica iblawäjinininuge, teeme nuuja bägrä bine lipu yaablawäjemuge, piba weene lica gemi teeme toraca ingle biname.

⁹ Mime uudi babe cina mibibine niblawäjiniusi, piijepu mine teebibine opo gaabe me yaacranimusi. Piba mine miiji cuta mime Aceji Babe me ablaweja ne ngenecu miiji cama acata cuta peei cabu ca miijirage ireclota ne päpäname.

¹⁰ Mine liba bägrä je, mime babe cina piba nibiberäjininujisi teepi lipu ngene jwaatwanimusi egä miiji ge, yepä Acejijame me ablaweja lui iyeta padare conocäco gyene piijepu mime miiji tääpume. Tabe singi mine teeme pana mara conocäco me äbitame.

¹¹ Ablaweja padare cabu mine gege lica birige, yepä ngenecu mäpu, yepä ingwe ca mine ngenecu poode birige piijepu miiji mule cabu ninajininuge.

Gone Acejijame me Mene Ägyi

¹² Yoo, kaakesea biname te liba gloose me läbituge, tabe miiji teeme kaakesea gwidape teeme ime ca cängena oomlana, piijepu teeme ernge liba diibe läbituge, tabe piba miiji cängena aclajuta, pepu pana mine miiji cängena lenaja gloose cäco.

¹³ Weene conocäco gaabe cabu pa naaclepi, piba lui kokre cäco biname cina weeme ingwe ca otni, teepi lica weeme conocono gaabe name pi atrametna niija päpäname, yepä conocäco gaabe cabu teepi miiji me läbitininusi.

¹⁴Weene singi läbitininuye iyeta biname cama poode lenajame. Weene conocäco ireclota yaabiberäjimuye, ingle laati te conocäco ireclota ne jäägyuge, tabe lica mime Yageyame ne cirege päpána.

¹⁵Weene iyeta weemeweme cängena ire atwipewe, piba weeme nuuja te lica pagege atatröngära Acejiyame me miiji cabu ca. Weene cuta cängena ire egä gonerage ngenecu niija me äbita. Gonerage weeme yepä te peei mule ne gije jaabacituge, ingle peei mule te wata birige babo äbita. Ngenecu niija te mime nuuja biname bime ätrunga mule ne sabe jaawenuge.

¹⁶Cuta cängena ire sargi mule poto cidi me. Gonerage acata peei mule ne. Piiyepu gone Acejiyame ne kaake me wawena, Esau liiyepu. Yoo, teeme yene Acejiyame me babo miijirage mene uuge bägrä täápume, yepä tabe liba loolomecewe te joomluji, piba teeme singi deedei täápume lui baborage ge, yepä teeme singi Acejiyame me miiji täápume matikolä ge. Tabe Acejiyame me babo miiji uuge bägrä täápume igane ne ecärige yepä deedei päpäname.

¹⁷Weene umle gemi egä ingwe ca tabe lipu baborage singi äbituji uuge bägrä me babo miiji ne päpäname, yepä lica jepänuji, ingle tabe äblicäco teeme niinäce singi cäco mule ne mara me wawena. Tabe däbume ele engenuji.

Sasa Jajeji Mene Lui Sinai Podo cabu ca piyepu Kirece Jajeji Mene Lui Siiyona Podo cabu ca

¹⁸Yoo, sasa Israela biname poto cidi me weene ngene jotwa-nanineye. Teepi liba Sinai podo wajwa jeclajutemuji Acejiyame me cotre mene baborage wälu cama ätecijame, puga muye kloka te wädräji cama tasatuji. Piba krokeciye me äbituji; babo buuwe te tipwäjuji.

¹⁹Baborage ala sengenuji moole pana gwidape cabu ca. Puma cita ca babo tagepogogo tasatuji epu mage mäpu mene cama egä lui cina itecijemuji, teepi jejujisi ätecitame.

²⁰Teepi baborage wälu ge Acejiyame me mene täápume egä, "Laati te podo ne joomluge, ngänu gyene biname coo cibu gwidape, peei ne miiji kula ca budre me agli."

²¹Peei iyeta epu babo wälu cama ge Moose te jiuuji egä, "Cane naclonecnige piyepu babo wälu gäne."

²²Yoo, weene lica Sinai podo gome wälu cama naaclige, yepä weene wälu cäco ituge otni Acejiyame me puupu mameta me, lui puupu epu pana gyene Siiyona podo liiyepu. Weene naaclige Ireclota Acejiyame me cewe mameta me, lui Cabucewe Yerusalema. Puma teeme toraca bucurage mename seemo babo gege cama abasecretnige.

²³Weene ituge otni Acejiyame me ätru-nga ingle cabu abasecretname, luma iyeta biname uuge bägrä pana gemi, lui bime ngii oogäräneji gemi cabucewe je. Weene Acejiyame bau ituge otni, lui te jaatranemuge iyeta biname bine. Peema weene abasecretnige conocäco biname bime seemo cama, Acejiyame lui bine epucäco me ituge wawena.

²⁴Peema Yeesu pisi nyene, lui te gaabe ne jittnuji kirece jajeji mene täápume, teeme uudi ne liba yiwäräjuji weeme niija mule bine äcisejame. Yoo, Yeesu me uudi lica ge epu pana Abela me uudi liiyepu. Abela me uudi te singi ge budre daremu täápume, yepä Yeesu me uudi te biname bime budre daremu ne yääyebtingtuge.

²⁵Ai ätiyera name pi, weene cängena ire inajipi. Acejiyame me mene täápume gone ätecija cäco läbitininuye. Yoo, kui sasa Israela biname lui cina singi lica ge Acejiyame me cotre mene ätecijame gawecewe podo cabu ca, teeme täápume äsecrera gaabe lica ge. Mine piyepu, mime äsecrera gaabe lica gyene, mine liba Acejiyame me mene ne kaake me wawena, lui mene te twaatnuge cabucewe cabu ca.

²⁶Yoo, Acejiyame liba mene jejemuji Sinai podo cabu ca, teeme tagepogogo te ai gawe ne jekocnäjuji, yepä page ai ingwe ca padare cabu tabe jiuuji egä, "Cäro, cane nuuja taje ai gawecewe cuta piyepu cabucewe cääri cire jaakocnäjepene."

²⁷Teeme "nuuja taje" mene me aboclomta agesa: Lui gwidape Acejiyame jewenemuji, nuuja taje tabe peei bine cire yääyebenge-mepi akocneja ca, piba lui gwidape äblicäco akocneja, peei cina cire yaacrajepi.

²⁸⁻²⁹Yoo, mime cabucewe puupu, Acejiyame luma mibibine cirege waadena ten cama lenajame, peei ne äblicäco akocneja coo äyebtingta, peei name pi mine miiji Acejiyame ne baborage eso yäacäresi. Yoo, Acejiyame me kokre baborage gyene, epu pana budni me kokre te biname bine lipu yaabemuge. Peei name pi mine miiji teebine wälu piyepu cängena cama awepyeräja teeme singi mule ca.

13

Acejiyame te Singi Ai Mule täápume

¹Mimemime singi läbitininago Keriso me toraca nanigane pana.

² Mine cuta miiji ngene jaapecnimusi catecewe biname bine awablame cuta deedei piyepu ngene oocana puupu ceerame. Yoo, poto cina pepu ituge wawena Acejiyame me mename seemo tääpume, yepä teepi pui bine cängena opo lica awatnujisi.

³ Krokeciye mete biname mine gone ngene nitrimalinuge teebibine ire atwemame. Mime owecu teeme tääpume miiji epu baborage äbita mine lui owecu ne singi birige päpäna, mine liba ten cama krokeciye mete cabu ninajininuge. Nuuja biname lui cina niija jääpänusi biname bau ca, mine miiji teebibine owecu jaawenemusi, epu pana mine pui mäpu cabu cewe loocaninusi teepi liiyepu, ingle mine iyeta yepä tääpe gemi.

⁴ Magebi rooriye me gigri ireclota miijirage gyene Acejiyame me opo gaabe je. Peei gigri lenaja ne gone sabe wawena. Acejiyame te mäpu daremu cirege ceera biname lui te ero jaawenuge nuuja magebi coo rooriye cama, coo lui cina nuuja sargi mule bine jaawenemusi.

⁵ Mime ireclota cabu gone singi äbita baborage rarekaake tääpume, yepä mime ibibi gwidape cama ngenecu gege cama ninajininuge, ingle Acejiyame mibibine itu ninujujisi egä, "Cane licarage weebibine abmala; cane age säne weebibine ätityerame."

⁶ Peei name pi mine wälu cäco jicemusi, "Yageyame lui cäme ätityerayame gyene.

Cane lica wälu pa läbitepene biname bime tääpume."

⁷ Mine niinäce gaabe mope biname bime tääpume ngene jaape-cnemusi, lui cina Acejiyame me mene mime tääpume seboclomtujisi. Teepi ätrunga cama icrajemuji piyepu ätrunga cama budre. Mine miiji teeme pana ätrunga ne yaacatesi.

⁸ Yoo, Yeesu Keriso lica mara me läbituge; teeme mule yepä pana cema, page, piyepu iyeteta.

⁹ Gone maramara kirece abiberäja cina padare ceera weebibine mara gaabe cabu waadename. Mine miiji mime ngenecu kokre päpäna Acejiyame me miiji cabu ca, piyepu miiji lica gyene apicetnera mime ngenecu kokre päpäname maramara deedei mule cabu ca. Lui cina peei mule bine jaawenemusi, teepi lica miiji päpäna peei cabu ca.

¹⁰ Yeesu me baarge uli lui mime tääpume epu pana iiwäreja dade liiyepu, yepä lui cina Israela biname bime cäbletääpe mete cabu yiwäräjusi, teeme conocäco lica gyene mime dade cabu ca teeme kälyä päpäname.

¹¹ Pui Israela biname bime mule ca, iiwäreja babo biname te cibi uudi yaacanuge iiwäreja mete Cuderage Puupu ngalebora me iiwärejame niija mule bine äyebhengame, yepä peei cibi kaake bine juubudäremusi cewe cidecärä je.

¹² Peei name pi Yeesu budre äbituji cewe kaake poto ca biname bime niija mule teeme uudi ca puma äcisejame.

¹³ Yoo, mine miiji mime sasa iiwäreja mule abmala teeme bau otnime, ingle tabe lui Israela biname bime iiwäreja mule kaake poto ca gyene. Tabe mage äcneca mene ituge ätecija teeme mara mule name pi. Mine cuta piyepu teeme pana äcneca mene nitecijnuge.

¹⁴ Peei ngänu gyene, ingle mime iyeteta lenaja cewe lica gyene ai gawecewe cabu je, yepä mine ama jewagrijenisi lui cewe ne mine cabu je cirege päpäna.

¹⁵ Peei name pi mine miiji iyeta padare cabu Acejiyame ne awepyeräjame Yeesu me ätityera cabu ca. Pepu pana awepyeräja mime tagepogogo cina liba Yeesu me ngii jajanena, peei lui Acejiyame me singirage iiwäreja mule gyene.

¹⁶ Mine gone yaabmalusi miiji mule wawenecame piyepu ätityera ceerame mime yepäyepä, ingle naace popi cuta peei mule lui Acejiyame me singi iiwäreja gemi.

¹⁷ Weeme ätrunga mope biname bime mene itecijipi teeme singi wawename, ingle weeme seemo ireclota lui teeme ire atwi cabu gemi. Teepi miiji Acejiyame bau me teeme kaakesea poto cidi me aboclomtame. Teeme mene weene liba yaacatuwe, teepi piba ngenecu gege cama teeme kaakesea jaawenemusi, yepä weene liba ätecija cäco läbitininuye, teepi piba ngenecu mäpu cama teeme kaakesea jaawenemusi. Pepu cabu ca weene lica ätityera ne jääpänuye.

¹⁸ Cuta weene irecu lämututinuye cime tääpume. Cine ngene ca eglenisi egä cime ngenecu pajecu gemi, ingle cine toraca singi gemi miiji mule taatu wawenecame.

¹⁹ Cane baborage singi gäne weene apu irecu ätutumame egä cane wata acenutame weeme bau me.

²⁰ Acejiyame mime Yageyame Yeesu ne budre cabu ca serpinan-tuji. Teeme budre cabu ca tabe itu asatuji mime miijirage Ire Atwi Biname tääpume, mine lui epu pana teeme maamoi gemi. Teeme uudi liba tapiruji peei te jajeji mene ne ngälu cäco ibibi me jewenuji.

²¹ Mime Poode cama Acejiyame cane teebine ewejanenine iyeta weeme singi gwidape ceerame teeme singi cängena wawename. Cane teebine cuta ewejanenine tabe teeme singi ne acitename weeme yepäyepä trupa cabu. Tabe Yeesu Keriso me kaakesea ca peei ne jaawenuge. Yoo, jamyacu apaclära lui teeme yene iyeteta ngälu cäco. Eso!

Ceräcerägääbu Mene

²² Cäme binamewale, weene iyeta cäme umle mene cängena iteciiji weeme ngenecu kokre wawename, ingle cäme bucurage mene lica gemi.

²³ Cane weebibine umle jiwenininine egä mime biname Timoti basatige krokeciye mete cabu ca. Tabe liba wata atyaramta aima, piba yepä pa niclege weeme bau me.

²⁴ Cane sebore jiwenininine iyeta weeme mope biname cuta piyepu iyeta Acejiyame me binamewale. Italiya gawe cabu ca ätrunga binamewale cina weebibine cuta sebore jiwenininisi.

²⁵ Yoo, Acejiyame me miiji te weeme iyeta bime cabu lenajame. Siige cäme mene.

YAKOBU ME LETA

¹ Cane Yakobu sâne, Acejiyame piyepu mime Yageyame Yeesu Keriso teeme kaakesea bāgrā gāne.

Sebore iyeta Acejiyame me binamewale! Weene lui weeme gawe ne ituge abmala, page gawe maramara cabu inajininige, agesi cāme mene weeme tāāpume.

Weene Apicetnera ne Ngenecu Miiji cama Jāāpānuyē

² Cāme ātrunga binamewale, maramara apicetnera bine liba jāāpānemuyē, piba ngenecu gege lābitininuyē,

³ ingle weene umle gemi egā weene liba pui māpu cabu ca lāsecrārinuyē, weeme ātrunga te peei cabu ca kokre me lābituge māpu cabu āmyemutaname.

⁴ Peei name pi ngenecu kokre cama imyemutepi ngālu pui māpu cabu ca āsecrera. Weene piba amacetnājāneji inajininuge, piyepu kokre ātrunga cama weene miiji gemi nuuja apicetnera cabu ca cuta āsecrera.

⁵ Weeme yepā te liba singi umle ābitame Acejiyame me singi poto cidi me, tabe miiji Acejiyame ne ātemla, lui te baborage singi gyene iyeta biname bine umle ceerame. Tabe peei umle ne owecu cama papa yāācāruge.

⁶ Apu gone ngene jwaatwananinuyē egā, “Acejiyame pama singi lica gyene cebine ātityerame,” yepā Acejiyame ne toraca jāātrunguyē, piba taatu yāātemluyē teebine. Lui te liba ātrunga cāco, teeme ngene atwanena piba epu pana yaanajuge malu cabu uule baawe liiyepu. Gobe te yaacenanuge puma cita ca cuta saawecnistuge.

⁷⁻⁸ Pui biname me ngene atwanena āblicāco cāngenarage ābita. Tabe ngene jwaatwananuge egā, “Pama toraca gyene, coo piyepu pama walya gyene.” Pepu ngenecu onya biname te āblicāco Acejiyame bau ca teeme singi ne pāpāna.

⁹ Yoo, ātrunga biname lui cina babo lica gemi ai gawecewe biname bime ngene atwanena cabu, teepi miiji ngenecu gege cama yaacrajuge, ingle naace popi teepi matimati lica gemi Acejiyame me opo gaabe je.

¹⁰ Cuta piyepu ātrunga biname lui cina dogwe yaacrajuge gwidape tāāpume, teepi miiji umle cama lenajame egā teeme bucurage rarekaake piyepu gwidape iyeta lui papa gemi Acejiyame me opo gaabe. Peei ngene atwana te miiji teebibine ngenecu gege me wawena. Dogwe biname bime lenaja lui epu pana tuube birige baace popo me liiyepu.

¹¹ Yoo, liba bimu te nuunu cama tuungenutuge, gije ne jaadaromtuge, popo cina tamyānuge, piba teeme miihirage opo lica birige, siige. Dogwe biname cuta pepu gemi; teeme ai gawecewe cabu ireclota lui lecarage lica gyene. Teepi budre pa lābitipesi teeme kaakesea gaabe cabu liba waatni-nusi rarekaake pāpāname.

¹² Baborage ngenecu miiji pisi nyene pui biname bime tāāpume, lui cina toraca gaabe ne lica yaabmalusi niiya mule wawename, teepi liba apicetnera cabu je. Teepi iyeteta ireclota ne cirege pāpāna, Acejiyame lipu ituge jaji eei bine ceerame, lui cina babo singi gemi teeme tāāpume.

¹³ Apicetnera cabu ca, liba biname te angletneja jāāpānuge niiya mule wawename, tabe āblicāco piba apu iicana egā, “Ai angletneja lui Acejiyame bau ca gyene.” Acejiyame pepu muleyame lica gyene. Niiya mule te āblicāco teebine angletneja, cuta piyepu tabe licarage nuuja biname ne yaangletnājuge.

¹⁴ Yepā, angletneja te tāduge biname me ngene atwanena cabu ca, biname me niyarage singi te liba teebine toraca gaabe cabu ca yāāyeblyntuge.

¹⁵ Peei niyarage ngene atwana cama biname te puma cita ca niiya mule bine jaawenemuge. Pui niiya mule bime daremu lui budre gyene, cuta peei ingwe ca pui biname te niiya puupu cabu me lāduge.

¹⁶ Yoo, cāme ngenecurage ātrunga binamewale, gone weemāmu langletnājinuyē egā, “Acejiyame bau ca gyene ai niiya.” Eewe, mine iyeta umle gemi egā Acejiyame pepu muleyame lica gyene.

¹⁷ Lui gwidape gemi miiji piyepu epucāco, peei cina saacluge cabu ca Acejiyame bau ca. Tabe lui te iyeta cabucewe apacliyera gwidape bine itu tewenemuji, tabe āblicāco mara pana ābita. Tabe cuta āblicāco mibibine kaake ca ācelyerame.

¹⁸ Teeme singi cabu tabe mibibine teeme bāgrāwale tāāpume ituge wawena, mine liba teeme toraca mene nitēcijinininuju. Mine lui niināce gaabe temi iyeta teeme nuuja waweneca gwidape cabu ca teeme singi pana ābitame.

¹⁹ Yoo, cāme ngenecurage ātrunga binamewale, weene ai mule ne ecateye egā, iyeta biname cina miiji mene wata ātecijame, yepā gone mene wata jiicemusi, cuta piyepu gone claabe me wata lābitininusi,

²⁰ Ingle naace popi claabe biname te äblicäco Acejiyame me singi ne conocäco wawena.

²¹ Peei name pi iyeta jugijugi mule piiyepu iyeta niyya mule weene iyebhengemeye. Ngenecu plowa cama teeme mene yaacatuwe, tabe lui mene singi gyene weeme ngenecu cabu acitame, inge pui mene te piba weebibine niyya cabu ca äsecrera gaabe jiwabininuge.

²² Mine umle gemi egä mine miiji pui mene ibi jaawenesi, lica ätecija taatu. Gone weemämu langletnäjinuwe egä ätecija taatu lui ibibi gyene.

²³ Pui biname lui te ätecija taatu läbituge, yepä lica jaawenuge, tabe epu pana biname te opo lipu mäali cabu läpänuge.

²⁴ Tabe liba nuuja gome me läduge, piba wata ngene jäätrimaluge teeme opo lipu gyene. Yoo, biname lui te mene yäätəcijuge, yepä tabe singi lica wawename, tabe piba peei opo pana pui mene ne wata ngene jäätrimaluge.

²⁵ Yepä, lui biname te conocäco cotre cabu cängenarage läwecetnäruge lui cotre te biname bine yääsecräremuge, piiyepu tabe pui mene jäje labiberäjemuge, tabe piba lica ingwe ca ngene jäätrimaluge, yepä peei mene pa jaawenepi. Acejiyame teebine pa yäätityärepi iyeta teeme miiji waweneca cabu.

²⁶ Lui te jiiucuge egä, “Cane Acejiyame me biname gäne,” yepä lica teeme tage mene cängena ire, tabe teemämu langletnäjuge; teeme mule toraca lica gyene.

²⁷ Mime Aceji Babe me opo gaabe lui mule toraca gyene piiyepu conocäco agesa: emlame bägrä piiyepu cuublacubla bine teeme mäpu cabu ca ätityerame, cuta piiyepu ai gawecewe lenaja cabu ngenecu iyeta Acejiyame bau me acitame.

2

Iyeta Biname bine Yepä pana Ire Jaatwemuye

¹ Cäme ätrunga binamewale, lui cina mime jamyacu apaclyera cama Yageyame Yeesu Keriso ne jitrungeniwe, weene iyeta biname bine yepä pana ire jaatwemuye.

² Apu mule gone. Dogwe biname te weeme abasecretna mete cabu me liba labacituge, miijimiji cäbletääpe cama piiyepu oplacmeläja gwidape cama teeme ime kukluta cabu; piiyepu nuuja biname te liba ränderände cäbletääpe cama labacituge,

³ weene liba dogwe biname ne cängena ire jaatwuye, teebine jaajuye egä, “Agesa miiji puupu adnatame,” yepä pui gwidape cäco biname ne jaajuye egä, “Miiji adnata puupu ibibi lica gyene, maane nää äblicäco peema aclajuteji lenajame, coo gawe cabu adnatame cäme ernge gome?”

⁴ Weene liba pepu mule jaawenuye, weene biname bine piba maramara tomi me jaabelanemuye. Pepu mule lui miiji lica gyene. Weene gone biname bine jaatranimuye teeme gwidape poto cidi me. Pepu ngene atwanena lui conocono gyene.

⁵ Cäme ätrunga binamewale, cäme mene nätecijeye. Lui biname cina ai gawecewe poto cidi me dogweyame lica gemi, Acejiyame teebibine ituge jājäcra ätrunga cabu dogwe ne pa jääpänepesi. Teepe miiji puupu cabu Acejiyame cama cirege lenaja, tabe lipu ituge jaji ceerame iyeta lui cina teeme täapume singi.

⁶ Yepä, weene poto biname bine gawe me ituge acrana, inge teepi gwidape cäco gemi. Pepu mule lui conocono gyene. Yoo, weene babo singi gemi dogwe biname täapume, yepä teepi laati bemi, lui cina weeme ireclota ne mäpu me jaawenusi? Cuta teepi laati bemi, lui cina weebibine atraname iwadininusi rarekaake awecna poto cidi me? Teepe lui dogwe biname gemi!

⁷ Teepe peete nemi lui cina niyya mene jicemusi weeme Yageyame me miiji ngii poto cidi me.

⁸ Yoo, toraca mule pisi nyene Oogäräneji Mene cabu egä, “Maane miiji biname bime täapume singi lenaja, maane lipu mäame täapume singi birige.” Weene peei cotre mene cängena liba jaawenuye, peei lui miijirage gyene,

⁹ yepä weene biname bine liba jaabelanemuye miijimiji cäbletääpe poto cidi me, weene peei cotre mene ne jaatropangtuye. Pui lui niyya mule gyene.

¹⁰ Pui yepä matikolä cotre atropangta name pi, weene epu pana gemi egä weene iyeta cotre bine jaatropangtemuye,

¹¹ Ingle Acejiyame lui te itu jiiucuji egä, “Sargi mule gone,” tabe cuta jiiucuji egä, “Gone biname ne budre me yaagluye.” Weeme nuuja lui te licarage sargi mule jaawenuge, yepä tabe liba nuuja biname ne yaagluye, tabe peei lui cotre ne jaatropangtuye.

¹² Yoo, weeme atrana cirege pui cotre cabu me lui te biname bine yääsecräremuge. Peei name pi cängena ire weene ngena ne jaawenuye piiyepu ngena jiiucuye.

¹³ Ingle naace popi laati te biname ne owecu liba lica jaawenuge, pui te owecu ne lica cirege päpäna atrana padare cabu. Yepä, lui cina nuuja biname bine owecu jaawenemusi, Acejiyame me owecu cuta pisi nyene teeme täapume.

Ätrunga Aboclomtäneji Gyene Miiji Waweneca cabu ca

¹⁴ Cäme ätrunga binamewale, ngena miiji gyene biname te iicaname egä, “Cane ätrunga biname gäne,” teeme waweneca liba miiji lica gemi? Ätrunga liba mene taatu, pepu ätrunga ibibi lica gyene biname ne niiya cabu ca asatame.

¹⁵ Yoo, mime ätrunga watewale piyepu ngulewale liba piti nemi deedei piyepu cäbletääpe cäco,

¹⁶ ngenome weeme yepä te teebibine jaajemuge egä, “Yewo! Acejiyame weene cama gyene. Weene deedei cängena läbitininuye, cängena inajininuge,” yepä tabe te lica yäcäremuge cäbletääpe piyepu deedei? Peei nuuja miiji lica gyene.

¹⁷ Yoo, lui biname te Acejiyame potu cidi me jaatrunguge, yepä teeme mene lica jaawenuge, teeme peei ätrunga papa gyene, toraca lica gyene.

¹⁸ Gone apu jicemuye egä, “Yepä biname teeme miiji ätrunga pisi nyene, yepä nuuja teeme miijirage wawena pisi nyene.” Eewe, weene äblicäco ätrunga ne aboclomta waweneca cäco ca. Siige, cane cäme ätrunga ne weeme täapume eboclomtenine cäme miijirage waweneca cabu ca.

¹⁹ Weene jäätrunguye egä, “Yepä taatu Acejiyame pisi nyene.” Yoo, peei miiji gyene. Niiyaniya cable cina cuta peei umle cama icrajinige, siige teepi wälu gemi, yepä nuuja singi lica gemi Acejiyame me singi waweneca.

²⁰ Weene buduma gone! Nää, pajecu lica gyene egä wawena cäco ätrunga lui papa gyene?

²¹ Weene mime kaakesaare Abrahamo potu cidi me ngene jotwananineye, tabe lipu Acejiyame me singi ne jewenuji, siige piba conocäco me äbituji Acejiyame me opo gaabe je. Tabe teeme bägrä Isacako Acejiyame ne ecäruji, kula dade papa cabu ecituji.

²² Abrahamo Acejiyame ne toraca jitrunguji, peei name pi Acejiyame me mene ne ecatuji teeme singi waweneca. Teeme ätrunga epucäco me äbituji teeme wawena cabu ca.

²³ Pipu pi toraca me äbituji Oogäräneji Mene lui jicenige egä, “Abrahamo Acejiyame ne jitrunguge, siige teeme ätrunga name pi Acejiyame teebine einige conocäco ca.” Yoo, biname cina teebine yaainusi “Acejiyame me biname” ca.

²⁴ Piba mine umle egä biname cina Acejiyame täapume kälyä läbitininusi teeme waweneca cabu ca. Mine äblicäco waweneca mime ätrunga cabu ca äyebhengta.

²⁵ Cuta pepu äbituji ero magebi Rahaba täapume. Tabe Acejiyame me opo gaabe conocäco äbituji teeme wawena cabu ca, tabe liba Israela biname bime neeneni cubu ire biname bine teeme mete cabu me aacanuji ämlitame, piba teebibine teeme cubuyame bau ca aasatuji, jäätyepuji nuuja gaabe cabu.

²⁶ Yoo, biname me tääpe liba seemo cäco gyene, pui biname te budre. Cuta pui biname me ätrunga liba miiji waweneca cäco gyene, peei ätrunga te budre.

3*Mage Mäpu Gyene Wätä ne Cängena Ire Atwime*

¹ Cäme ätrunga binamewale, miiji weeme nesae biname taatu abiberäja kaakesea pa yaacatepesi, inge cine lui abiberäja biname gemi, cine toraca mule umle cire läbitinjago. Peei name pi cine liba nuuja mule wawena, cime mäpu daremu baborage cirege nuuja biname bime daremu cabu ca.

² Yoo, mine iyeta conocono jaawenemusi. Biname lui te conocono mene lica jicemuge, tabe conocäco gyene, piyepu ibibi gyene teeme tääpe iyeta cängena ire atwime.

³ Yoo, mine matikolä ayana gwidape ne cooso me tage cabu yaacitusi, amlemanteji neeneni seea ca. Mine peei seea bine joomlemusi cooso ne pui ca yaablawäjusi. Cooso te piba mime singi gaabe ne yaacatuge otnime.

⁴ Cuta poo potu cidi me ngene jwaatwananinago. Poo lui babo-rage gwidape gyene, cuta babo buuwe te poo ne yaacananuge, yepä pisi nyene waapo wärega. Peei matikolä gwidape ca waapo biname te baborage poo ne yaablawäjuge teeme singi gaabe cabu otnime.

⁵ Biname me wätä pepu pana gyene. Ngänuge matikolä gwidape, teeme kaakesea lui baborage gyene.

Yoo, muye wiiryere cuta matikolärage gwidape gyene, yepä ibibi gyene babo glunu ne uubuderame.

⁶ Nuuja taje mime wätä lui muye wädräji pana gyene. Mime wätä cabu ca tasatanuge bucurage niiyaniya mene. Yoo, epu pana muye wädräji lipu pisi nyene muye ngalebora, mime wätä cuta pisi nyene mime trupa ngalebora. Mine äblicäco uucratna teeme niiyaniya mene cabu ca. Niiya mene te iyeta mime ireclota ne sabe jaawenuge, epu pana budni te iyeta gwidape bine lipu teeme gaabe cabu yaabemuge. Satani mage umle gyene biname bime wätä oomlaname teeme niiya kaakesea waweneca.

⁷ Iyeta maramara opoyame cibü piiyepu ele, piiyepu biicwale, biname cina umle peei bine oomlajeca teeme singi wawename,

⁸ yepä biname te licarage teeme wätä ne cängena ire atwi. Mine ibibi lica gemi mime wätä mene bine iibaname. Mime niya mene te mime nuuja biname bine ngenecu mäpu me jaawenemuge.

⁹ Nuuja taje mine wätä mene ca mime Yageyame Babe ne eso yäacärsi. Piba nuuja taje mine peei yepä wätä ca mime binamewale cama jääcelusi, Acejiyame lui bine teeme pana me itu jwenemuji.

¹⁰ Miijimiji mene niyaniya mene yepä tage cabu ca täsuge. Cäme binamewale, peei mule miiji lica gyene.

¹¹ Mite niye piiyepu cärmecärme niye licarage yepä waja cabu ca tasatäsi.

¹² Mine äblicäco neeneni maramara opo kuu bine yepä uli cabu ca päpäna. Mine äblicäco uli kuu ne seeasea cabu ca äwäcuta. Piiyepu mine äblicäco mite niye ne iitana malu cabu ca caapereniye luma. Yoo, miiji lica gyene miiji mene piiyepu niya mene yepä tage cabu ca äscreera.

Toraca Umle Lui Apu Gyene

¹³ Weene liba toraca umle cama gemi, cängena inajipi miiji mule taatu wawename. Cuta piiyepu weene liba lica nuuja biname bine jaajanemuye weeme miiji waweneca poto cidi me, weene piba toraca umleumle biname gemi.

¹⁴ Yepä, weene liba claabe läbitininuye nuuja biname me miiji täapume, coo weene liba jäje ngene jwaatwananinuye weeme taatu miiji täapume, piba weene gone apu jicuye egä, "Cine temi umlerage biname." Peei lui walya gyene.

¹⁵ Pepu umle te lica täduge cabucewe ca, yepä peei lui ai gawecewe me ngene atwanena gyene. Pepu umle lica gyene Aceji Seemo bau ca, yepä Satani bau ca gyene.

¹⁶ Yoo, pui cewe cabu luma biname cina claabe piiyepu ämugetna läbitininusi teeme nuuja biname te liba miiji jääpänuge, piiyepu iyeta biname bime ngene atwanena luma teeme poto cidi me yaacrajuge, äcela puma birige piiyepu iyeta nuuja niyaniya mule.

¹⁷ Yepä, pui umle lui Acejiyame bau ca conocäco gyene. Peei umle te singi gyene biname cina poode cama lenajame, peei umle te owecu gyene nuuja biname bime täapume, cuta peei umle te nuuja biname bime mene yäätacijemuge, nuuja biname ne owecu cama yäätityärüge, miijimiji mule jaawenemuge. Peei toraca umle te lica biname bine maramara ire jaatwemuge teeme täape liba mara coo teeme gwidape liba nesae. Peei toraca umle te lica mara ngene atwanena yaacwabuge mene mitemite ca.

¹⁸ Biname lui cina singi poode cama lenajame teepi nuuja biname bine owecu jaawenimusi, piba pui biname bime bau ca miiji mule ne jääpänusi.

4

Gone Ai Gawecewe ne Biname me Jaawenuye

¹ Ngena gyene inge weene claabeclabe lenajame piiyepu mene abajame? Peei mule cina saacluge weeme ngene atwanena cabu ca, iyeta lui gemi weeme singi cabu je. Cuta peei cina laglinusi weeme cabu.

² Weeme poto biname cina singi gemi gwidape täapume, yepä äblicäco waadena, peei name pi teepi singi nuuja biname ne aglime. Poto biname cina gwidape täapume baborage singi läbitininusi, yepä teeme täapume gaabe lica birige päpäname. Teepi piba claabe cama yaacrajuge, nuuja cama jääcelusi. Yoo, teepi teeme singi gwidape ne lica jääpänusi, inge teepi peei täapume Acejiyame ne lica yäätineräjusi.

³ Nuuja taje teepi Acejiyame ne yäätineräjusi, yepä cuta lica jääpänusi, inge teeme ngene atwanena lui conoconorage gemi, teeme taatu singi cabu yaacrajuge.

⁴ Weene liba pepu mule bine jaawenemuye, weene piba epu pana gemi ätecija cäco magebi liiyepu lui te baborage singi gwene teeme rooriye ne abmalame nuuja ne acatame. Näa, weene umle lica gemi egä lui biname te ai gawecewe ne biname me jaawenuge, tabe cuta pui padare cabu Acejiyame ne cubuyame me jaawenuge. Inge lui te baborage singi gyene ai gawecewe me mule täapume, tabe äblicäco cuta Acejiyame me biname me lenaja.

⁵ Coo, weene pama apu jingenige egä Oogäräneji Mene te papa jicenige egä, "Lui seemo ne Acejiyame mime trupa ngalebora itu secituji, pui te kokre singisingi cama gyene."

⁶ Yepä, teeme babo miiji, lui nicärininige, kokre gyene cuta peei cabu ca. Oogäräneji Mene apu jicenige egä, "Lui biname te singi teemämu babo me äbitame, Acejiyame teebine jäägyuge, yepä lui biname te Acejiyame ne opo gaabe me yaacituge, Acejiyame teebine yäätityärüge."

⁷ Yoo, peei name pi weene Acejiyame ne weeme trupa ecäreye teeme singi wawename. Satani ne kaake ca icelyäreye, tabe piba weeme bau ca pa luucреpi. Weene Acejiyame gome me naaclege, Acejiyame piba weeme bau pa yaanajege.

⁸ Yoo, niya mule biname, weene weemämu äcisäjipeye! Lui cina neeneni ngene atwanena cama gemi, weeme ngenecu emacetnäjemeye Acejiyame täápume singi äbitame.

⁹ Weeme niya mule name pi weene miiji ngenecu mäpu äbitipeye, ele ingenitninege. Weeme papa ngange äwäcna ebmaleye, mäpu ngene atwanena täápume ngene jotwanin-eye. Weeme gege siige, ingle babo mäpu pisi nyene.

¹⁰ Weene umle äbitineye egä Yageyame me opo gaabe je weene miiji lica gemi, tabe puma cita ca weebibine toraca ngenecu miiji me pa jiwenipi, toraca gege piba picäripi.

Mime Binamewale bine Iicetna Gone

¹¹ Cäme ätrunga binamewale, gone niya mene jaji weeme nuuja poto cidi me. Lui te teeme biname ne jüicetnuge, tabe cuta Acejiyame me cotre mene conocono me jaawenuge, ingle cotre mene te jüicenige egä weene miiji biname bine owecu wawena, yepä iicetna lui owecu lica gyene. Peei lui weeme kaakesea lica gyene cotre ne atraname egä miiji gyene acatame, coo niya gyene peei name pi miiji abmalame. Yepä, weene miiji cotre ne cängena jaawenuye.

¹² Pisi nyene yepä taatu cotre oogära biname, lui te ibibi gyene biname bine toraca atraname, piba poto biname bine niya cabu ca äsecreraame waadename, cuta nuuja poto bine äyebllengame. Peei name pi maane, baa laasi näte lui te mäame biname ne jaatranute?

Gone Mene Papa Iicema Weeme Miiji Kaakesea poto cidi me

¹³ Yoo, cäme mene matikolä pisi nyene teeme täápume lui cina Acejiyame cäco teeme kaakesea poto cidi me jaatranusi, piba jüicemusi egä, “Page coo pama ciyeciye, cine piyemopo pui babo cewe me naclenige. Cine yepä kämäge puma pa ninajipi aletnale-tna kaakesea wawena täápume. Cine bucurage rarekaake pa jääpänemepesi.”

¹⁴ Agesa cäme mene pepu biname täápume; weene umle lica gemi ciyeciye ngena te äbitenige! Weeme ireclota leca lui kroke glääsi pana gyene, lui pisi nyene matikolä padare piba läyebllingtuge.

¹⁵ Weene apu cire jüicejiye egä, “Mime Yageyame te liba singi gyene, cine piba ninajininige, ai kaakesea ne jewenenisi, peei ne piyepu cuta.”

¹⁶ Weeme kaakesea piyepu weeme ireclota lui Acejiyame me ime cabu temi. Gone weeme kaakesea täápume papa iicetneja, epu pana egä weeme ireclota lui weeme ime cabu sine. Acejiyame singi lica gyene pepu mule täápume.

¹⁷ Yoo, lui biname te liba umle gyene egä, “Cane miiji gäne peei gaabe cabu otnime,” yepä tabe lica läduge, tabe peei lui niya mule ne jaawenuge.

5

Cuta Dogwe Biname cina Teeme Daremu Cirege Pöpäna

¹ Cäme mene cuta pisi nyene gwidape dogwe biname bime täápume. Weene ele ingenitninege ajij mene cama, ingle mäpurage daremu pisi nyene weeme täápume.

² Weeme gwidapegwidape sabe läbitininusi, weeme miijimiji cäbletääpe potäte cina jaatecimusi.

³ Weeme rarekaake juju läbitininusi. Peei juju te weebibine opo iwatnininuge egä weene ceera cäco biname gemi. Muye te gwidape ne lipu yaataaclomuge, peei rarekaake te waniba pana weebibine sabe cire jiwenipi. Gwidape rarekaake weene tomitomi jaawenemuye ai ceräcerägäabu poto bimu täápume.

⁴ Weene lica toraca daremu yäcäremuye pui biname lui cina weeme calwacupi cabu kaakesea jaawenemusi. Teeme aitna mene itecijinege! Acejiyame mime Kokrerage Yageyame ituge ätecija teeme ala.

⁵ Ai gawecewe cabu weene iyeta weeme singi deedei piyepu gwidape ituge aletna. Weene weemämu ngeerangera cibi pana ire latwinuye. Yoo, agli täápume bimu te bii tatyaramtuge.

⁶ Weene biname bine ablaweja biname bau me papa yaawademuye, teeme gaabe liba lica gyene asatame. Poto cina cuta budre weeme bau ca itu jääpänepesi, siige.

Mene Awagrija piyepu Irecu Ätumuta poto cidi me

⁷ Yoo, cäme ätrunga binamewale, agesa mene weeme täápume lui cina mime Yageyame me acnenuta täápume jewagrijenisi. Teeme trämä cängena inajipi, epu pana gije liteta biname liyepu, lui te calwacupi kuu ne jaawagrijuge. Niinäce ngupe te täduge, gije ne uutaname jaawenuge. Ingwe ca ngupe te liba täduge, gije cepa ne piba yoororuge, siige kuu jaawenuge.

⁸ Weene pepu pana jewagrieniye, umle cama egä mime Yageyame me acnenuta bimu lui cudecewe lica gyene.

⁹ Cäme ätrunga binamewale, gone weeme nuuja bine jääingäjemuye, piba Acejiyame te weebibine lica birige atrana. Weene umle egä mime atrana biname cudecewera ge lica gyene.

¹⁰ Cäme ätrunga binamewale, sasa mename biname poto cidi me ngene jwaatwanani-nago, lui cina mime Yageyame me ngii cabu mene jii cemusi. Teeme pana mule ecateye lipu cewe oocana cabu ämyemutaname. Teepi lica nuuja biname ne jääingäjusi, yepä cängena jaawagrijiusi teeme äsecrera täapume.

¹¹ Page teepi babo mii jirage gemi, inge teeme ireclota cabu teepi ätrunga gaabe ne lica ebmalujisi, mäpu ne liba jääpänusi. Yoobu lui pepu biname ge. Maramara mäpu cina teeme bau me secluji, yepä tabe Acejiyame ne jitrunguji teebine asatame. Teeme ireclota cabu ca mine opo yaawatnusi Yageyame ne, tabe lipu babo mii jirage ireclota ingwe ca Yoobu ne ecäruji. Mime Yageyame me waadena mule pepu pana gyene babo owecu cama.

¹² Cäme ätrunga binamewale, agha baborage gwidape: Weene liba toraca mene singi iicaname, gone nuuja ngii cama awejena weeme mene toraca me äbitame, gone gawecewe ngii cama iicana, piyepu gone cabucewe ngii cama iicana, coo cuta nuuja ngii cama gone iicana. Weene mii jirage iicana egä, "yoo," coo "lica". Pei mene taatu jii cuye, piba weebibine lica atrana birige egä 'niiya mule biname gemi.'

¹³ Weeme yepä te liba mäpu cabu yaanajuge, tabe mii jirage Acejiyame bau irecu ätumutame. Weeme yepä te liba gege cama, tabe mii jirage Acejiyame ne awepyeräja uupera cama.

¹⁴ Weeme yepä te liba pita cama yaanajuge, tabe mii jirage ätrunga inge modamoda biname bine ala asogleca teeme gome irecu ätumutame. Teepi te mige ca yaaganusi mime Yageyame me ngii cabu.

¹⁵ Teeme irecu ätumuta te pita biname ne mii jirage me pa jaawenepi, teepi liba ätrunga cama jaawenusi. Mime Yageyame te piba pita biname ne pa yaarpinantepi, piyepu teeme niiya mule bine yäyebngemepi teeme cabu ca.

¹⁶ Pei name pi weeme niiya mule weemeweme ajanipeye piyepu weemeweme täapume irecu ätumutanipeye weene mii jirage me äbitame. Baborage kokre te täduge Acejiyame bau ca, biname te teeme ngenecu bora liba lamacetnäjuge, piba cängena irecu lätumutuge tabe.

¹⁷ Eliya me irecu ätumuta lui pepu kokre cama ge. Tabe binamerage ge mine liyepu, yepä tabe liba Acejiyame bau irecu ätumutuji ngupe ne iibaname, piba ngupe te lica pui gawe cabu seciruji nesae kämäge cebo ngalebora.

¹⁸ Pui padare te liba apiruji, tabe cuta irecu ätumutuji. Ngupe te dume cabu ca piba sitramuji, piba pui gawe cabu gije cina cängenarage uutinuji.

¹⁹ Cäme ätrunga binamewale, weeme yepä te liba läyebngituge Acejiyame me toraca gaabe cabu ca, weeme nuuja te liba teebine yaawecnistuge toraca gaabe cabu me, pei lui babo mii jirage gyene.

²⁰ Ai poto cidi me ngene ca egleye egä biname lui te nuuja ne teeme niiya gaabe cabu ca saawecnistuge, pui biname me seemo ne cuta saasatuge niiya puupu cabu me otnime, cuta piyepu teeme bucurage niiya mule bine yiisibrecmuge.

Yoo siige, cane ngii Yakobu, cäme mene ngälu peecwi yene.

PETERU ME NIINÄCE LETA

¹ Cane Peteru säne; Yeesu Keriso me ätyepäneji biname gäne. Cane weeme bau me yooärenine lui gemi Acejiyame me jääcräneji biname, weene lui cina tuucratnininuije ai maramara probins cabu lenajame: naace Pontus me, Galatiya me, Kapadokiya me, Asiya me, cuta piyepu Bituniya me.

² Ujarage, Aceji Babe te weebibine itu jijäcrininuji teeme biname me äbitame. Aceji Seemo peei kaakesea weeme yepäyepä trupa cabu ituge wawena, weene Yeesu Keriso me mene äcwetname piyepu teeme uudi ca kälyä päpäname, ingle tabe budre äbituji, siige teeme uudi te tapiruji weeme niija mule äcisejame.

Acejiyame me miiji te weeme cabu lenajame piyepu tabe weebibine baborage poode ceerame.

Toraca Ireclota Cabucewe je Pisi Nyene Mime täapume

³ Mine Acejiyame ne eso pa yääcäresi, lui mime Yageyame Yeesu Keriso me Babe piyepu Acejiyame gyene. Tabe baborage owecu gyene mime täapume, mibibine kirece ireclota itu nicärininuji, tabe liba Yeesu Keriso ne budre cabu ca erpinantuji. Yeesu me arpinenta cabu ca mine umle gemi egä tabe cuta mibibine cirege arpinera ten cama iyeteta lenajame.

⁴ Mine cuta umle egä miijimiji gwidape piti nemi cabucewe je mime täapume, ingle mine Acejiyame me bägräwale gemi. Peei gwidape lica gawecewe gwidape pana gemi, yepä ngälu cäco gemi, piyepu ocwäwa cäco, piyepu peei cina äblicäco sabe me äbita.

⁵ Acejiyame me kokre pisi nyene mibibine cängena waadename peei toraca ireclota cabu me iyeteta ten cama lenajame, ingle mine teebine jäätrungusi. Mime puupu pisi nyene cabucewe je amacetnäjäneji, piyepu peei äsecrera puupu ne cirege aboclomta ceräcerägäabu padare cabu.

⁶ Peei name pi mine ngenecu gege cama ninajininige, ingle mine toraca gege puma cirege lenaja. Ngänu gyene mine page puu ngenecu mäpu cama matikolä padare ninajininige, ingle maramara apicetnera cina mime bau me seclenige.

⁷ Mine naace popi peei apicetnera bine jääpänemusi egä peei cina mime Acejiyame cabu ätrunga ne toraca kokre me wawename. Yoo, mime ätrunga me apicetnera bine mine ngene ca eglemisi kula pana gwidape cabu ca, ngii gol. Nuuja taje biname cina gol kula bine baborage nuunu jaawenemusi daglamete äyebengame. Piba miijirage gol taatu tasatuge muye cabu ca. Ngänu gyene puu gol me lenaja lica iyeteta gyene, yepä muye ca miijirage jaawenemusi, piba cuta mime ätrunga bine lui baborage gemi gol cabu ca, miiji apicetnera kokre lenajame. Piba ceräcerägäabu bimü cabu Yeesu Keriso teemämu liba cire laboclomtepi, baborage miiji pisi nyene mime täapume lui cina pepu ätrunga cama gemi. Acejiyame bau ca mine piba awepyeräja, jamyacu apaclyera, piyepu miijirage ngii cire jääpänemepesi.

⁸ Mine puu Acejiyame ne lica ituge päpäna, yepä mime baborage singi pisi nyene teeme täapume; cuta page mine puu äblicäco teebine päpäna, yepä mine teebine cängena jäätrungusi. Peei name pi mime ngenecu gege epu baborage gyene, siige mine peei potu cidi me mene äblicäco.

⁹ Peei gege eei name pi gyene, Acejiyame mibibine niija cabu ca nisecrärenininige, niwadininige cabucewe me ten cama iyeteta lenajame. Peese nyene ingle mine teebine ätrungame.

¹⁰ Mime äsecrera niija cabu ca iyeteta ireclota cabu me, Acejiyame me sasa mename biname cina baborage singi peei potu cidi me umle äbitame. Teepi biname bine ingwerage padare täapume mene jejemujsi Acejiyame me owecu piyepu ätiyera mule potu cidi me mime täapume, yepä teepi umle äbitame liga läbitininusi, pajecu lica ge teeme täapume.

¹¹ Keriso me Seemo teebibine mene jejananemuji egä. "Ciige Acejiyame me jajeji biname Keriso te mage mäpu padare ne cire jääpänepi, peei cabu ca cire lasatepi, siige jamyacu apaclyera ne cire jääpänepi." Teepi peei mene potu cidi me mage ngene jotwanininujsi, ingle teepi babo singi ge umle äbitame egä lipulipu piyepu lui padare cabu peei mule te cirege äbita.

¹² Acejiyame piba teebibine umle jewananemuji egä pui mule te licarage teeme ireclota padare cabu cirege äbita, yepä ingwerage padare mime ireclota cabu mime täapume. Yoo, page Miiji Mene pajecurage jajanäneji gyene iyeta mime cabu me. Lui biname cina ai mene weebibine ituge jajanena, teepi cabucewe ca Aceji Seemo bau ca teeme umle itu jepänujisi. Peei mule pepu miijirage gyene egä Acejiyame me mename seemo cina cuta singi gemi cerämu umle äbitame peei täapume.

Weene Cängenarage Conocäco Inajipi!

¹³ Yoo, mine Acejiyame me miiji mule poto cidi me umle gemi, peei name pi mine ngene atwanena bine pa yaamacetnäjemepesi, cängenarage lenajame. Mime ngene atwanena bine pa yaacranemepesi Acejiyame me owecu piyepu miiji cabu me, mine lui bine teeme bau ca cirege päpäna Yeesu Keriso me acnenua bimucabu.

¹⁴ Page mine Acejiyame me bägrä gemi, peei name pi mine teeme singi pa jaawenepesi. Gonerage weeme sasa singi bine waadena, epu pana pui padare cabu lipu yaawadimuye, weene toraca gaabe poto cidi me liba umle cäco inajininuji.

¹⁵ Acejiyame lui te mibibine ituge jäjäcra, tabe conocäcorage gyene, peei name pi cuta mine miiji conocäco mule taatu jaawenemepesi.

¹⁶ Yoo, Oogäräneji Mene te apu jiicenige egä, “Weene cängena epucäco inajipi, ingle cane epucäco gäne.”

¹⁷ Acejiyame te iyeta biname bine yepä ibi cirege atrana teeme waweneca poto cidi me, nuuja te lica cirege asata atrana cabu ca. PEEI name pi mine lui cina teebine yaainusi Babe ca, mine miiji cuta teebine cängenarage opo gaabe me acita iyeta mime lenaja cabu ai gawecewe cabu je.

¹⁸ Acejiyame weebibine ituge äsecrera weeme kaakesaarewale bime krokeciye mule cabu ca. Mine umle gemi egä tabe lica rarekaake ecäruji mime äsecrera täápume. Rarekaake me daremu lui nuuja taje gawe me läbituge.

¹⁹ Yepä, tabe teeme ngenecurage bägrä Keriso ne ecäruji. Keriso budre äbituji, teeme uudi tapiruji mibibine äsecrera. Yoo, Israela biname bime sasa mule cabu teepi miijirage maamoi plongo ca yiwärusi teeme niija mule bine äyebhengame. PEEI plongo lui jamyacurage yaanajuge, teeme nuuja dupe lica birige. Yoo, Keriso pepu maamoi pana conocäco gyene. Tabe teemämu itu iiwäräjuji mime niija mule äyebhengame.

²⁰ Acejiyame camuge ai gawecewe ne wawena tabe liba Keriso ne jejuji mime niija cabu ca äsecrera biname me äbitame, siige ai padare cabu teebine ituge aboclomta mime täápume.

²¹ Yoo, Keriso me miiji kaakesea name pi mime ngene atwanena cina Acejiyame cabu yaacrajuge. Tabe te teebine budre cabu ca erpinantuji, piba cabucewe me ecanuji jamyacu apaclyera cabu lenajame. PEEI name pi mine Acejiyame ne jäättru-ngusi piyepu mime ngene atwana teeme cabu yaacranusi.

²² Mine Acejiyame me toraca mene ne ituge ätecija mime trupa bine amacetnäjame, ngälu siige page mine toraca singi me ituge äbita mime ätrunga binamewale bime täápume. Yoo, mine mime biname bime täápume baborage singi pa läbitipago iyeta mime ngenecu cama.

²³ Page mime kirece ireclota pisi nyene. PEEI ireclota lica ge mime mage babe bime cabu ca, ingle teeme bau ca ireclota lui ngälu cama gyene. Yoo, Acejiyame lui ngälu cäco gyene; tabe te ai kirece ngälu cäco ireclota mibibine itu nicärininuji pui padare cabu mine liba teeme mene jitrungujisi, ingle teeme iyeteta mene cabu kokre pisi nyene iyeteta ireclota ceerame.

²⁴ Oogäräneji mene te ai poto cidi me jiicenige egä,

“Iyeta biname bime ireclota lui baace pana gemi;

iyeta teeme miiji lui epu pana gyene baace popo me liiyepu.

Yoo, baace te budre läbituge,

cuta teeme popo cina saatrametnemuge,

²⁵ yepä Yageyame me mene lui iyeteta ngälu cäco gyene.”

Yoo, peei Miiji Mene ituge weebibine jajanena.

2

Mine Äjäcräneji Gemi Acejiyame bau ca

¹ Yoo, Acejiyame mibibine kirece ireclota nicärininuji, peei name pi mine miiji iyeta niija mule bine abmala. Walya mene icana gone, piyepu walya mule gone wawena, äcneca gone, cuta piyepu gone nuuja biname me gwidape ire patre agli.

² Epu pana matimati bägrä liiyepu iyeta padare singi ngame migi nänäjame, weene miiji Acejiyame me mene täápume pepu pana baborage singi äbitame, naace täápume weeme ätrunga te uutaname ngälu weene iyeteta ireclota ne päpäname.

³ Yoo, mine ituge päpäna egä Yageyame lui miijirage, owecu cama biname gyene.

⁴ Mine Yageyame bau me pa naclege, ingle mime ireclota teeme cabu ca gyene. Tabe epu pana gyene kula caage liiyepu, poto biname cina lui ne jäägysu egä raranga täápume miiji lica gyene, yepä Acejiyame te lui ne jejuji egä babo miijirage teeme täápume.

⁵ Tabe lui bine iyeteta ireclota nicärininige, mine lui mete kula pana gemi teeme täápume. Epu pana mete raranga biname te liiyepu kula bine yaawademuge teeme kula mete rarangame, Acejiyame mibibine niwadininige teeme ätrunga ingle bine wawename.

Acejiyame singi gyene mine teeme kirece muleyame iiwäreja biname me äbitame teeme singi mule Yeesu Keriso me ätityera cabu ca wawename.

⁶ Oogäräneji Mene pisi nyene pui kula poto cidi me, lui Keriso sine, egä,
 “Ire, cane babo miijirage kula jitränutenine,
 sipe caage täápume jecnenine Yerusalema cewe cabu Siiyona podo cabu je.

Lui cina teebine jäätrungusi,
 teepi lica birige ajiri me äbita, yepä miiji lenaja ne jääpänusi.”

⁷ Siige, Keriso lui babo miijirage gyene mime täápume lui cina teebine jäätrungusi. Yepä, lui cina singi lica teebine ätrungame, teepi cuta umle cirege tabe lipu baborage gyene! Oogäräneji Mene te peei poto cidi me jüicenige egä,

“Lui kula ne raranga biname cina jigysi,
 baborage bäbitige iyeta nuuja cabu ca.”

⁸ Oogäräneji Mene nuuja gome cuta jüicenige egä,
 “Ai kula te jaawenemuge biname bine naabe atropengäja,
 eei kula lui te teebibine jaawenemuge atrametname.”

Yoo, teepi naace name pi yaatrametnemuge, ingle teepi lica Acejiyame me mene jäätrungusi peei kula poto cidi me, lui Keriso sine. Pepu ge Acejiyame me singi teeme täápume.

⁹ Yepä, mine teeme pana lica gemi, mine Acejiyame me jäjäcräneji biname gemi, lui miiji kaakesea biname gemi mime Mope Biname Keriso täápume irecu ätumuta kaakesea wawename. Mine mara tomi cabu temi nuuja biname cabu ca, ingle mine Acejiyame täápume mara me ituge äbita. Mine Acejiyame me inglewale gemi, mine jäjäcräneji gemi mene jajanenname iyeta teeme miijimiji mule poto cidi me. Toraca, teeme mule mime täápume babo miijirage gyene. Tabe mibibine krokeciye cabu ca ala nisoglicipi teeme miijirage apacyera cabu lenajame.

¹⁰ Niinäce mine Acejiyame me ingle cabu lica ge, yepä page mine pui cabu temi. Niinäce mine nuuja umle lica ge Acejiyame me owecu poto cidi me, yepä page mine teeme owecu ne ituge päpäna.

Acejiyame me Kaakesea Mine Jaawenusi Toraca Ngenecu cama

¹¹ Cäme binamewale, mine catecewe biname pana gemi ai gawecewe cabu. Peei name pi mine miiji mime tääpe me niija singi bine ägyema, ingle peei cina mime toraca singi ne Acejiyame täápume sabe jaawenusi.

¹² Mine miiji iyeta padare cabu epu cängena lenajame teeme gome lui cina Acejiyame umle cäco gemi, egä teepi liba apu jaangemuge egä, “Teeme mule mara gyene peei name pi conocono,” pui biname cina mime miiji taatu waweneca pa jääpänepesi. Teepi piba Acejiyame ne cire yaawepyeräjepesi teeme acnenuta bimü cabu.

¹³ Yageyame me singi name pi, iyeta ai gawecewe mope biname bime cotre mine miiji jaawenemusi, egä miiji mime gawecewe babo mopeyame me mene cängena ätecijame.

¹⁴ Cuta piyepu teeme ingwe gaabe ca mope biname bime mene mine miiji ätecija, ingle babo mope biname te teebibine jäätyepäjemuge niija mule biname bine teeme daremu ceerame piyepu miiji mule biname bine awepyeräjame.

¹⁵ Acejiyame singi gyene mine cängena lenajame naace täápume pui biname lui cina buduma gemi Acejiyame me mule poto cidi me, teepi mime miiji taatu ireclota ne liba jääpänanusi, piba teepi iicetneja mene äblicäco.

¹⁶ Yoo, mime toraca Mopeyame lui cabucewe je yaanajuge, piyepu mine äsecräreji gemi ai gawecewe mule cabu ca. Yepä, mine äblicäco apu angi egä, “Cane asatäneji gäne gawecewe biname bime cotre cabu ca, siige miiji gäne ai niija mule wawename.” Eewe, pepu gone! Mine miiji iyeta mime ireclota cabu ca aboclomäja egä mine Acejiyame me biname gemi teeme singi bine wawenecame.

¹⁷ Mine iyeta biname bine cängena opo gaabe me yaacranemusi, iyeta ätrunga biname bine owecu jaawenemusi, mime gawecewe mopeyame me mene cängena jäätecijusi, piyepu lui mule täápume Acejiyame singi lica gyene, mine miiji wälu peei ne wawename.

Keriso pana Mule Mine Miiji Jaawenemepesi

¹⁸ Weeme poto lui cina nuuja biname bime kaakesea jaawenemusi, teepi miiji teeme babo biname me mene cängenarage ätecija; lica eei taatu me lui owecu cama teeme kaakesea bägrä bine ire jaatwemuge, yepä cuta owecu cäco babo biname me mene miiji ätecija.

¹⁹ Yoo, miiji gyene weeme nuuja täápume tabe liba poode ngene atwanena cama mäpu cabu cewe loocananuge, liba peei mäpu lica toraca daremu teeme niija mule täápume, piyepu tabe liba ngene jwaatwananuge apu egä, “Acejiyame singi gyene cane apu lenajame liba mäpu cabu.”

²⁰ Siige, ngena miiji gyene weeme täápume, weene liba cmecme ne bojäcu jääpänuye weeme niija wawena täápume? Yepä, weene liba miiji mule taatu jaawenemuye, puma cita ca cewe oocana bojäcu jääpänuye, piba Acejiyame weebibine miiji pa jiwenipi.

²¹ Yoo, peei täápume Acejiyame te mibibine ituge ala asogleca, ingle Keriso mäpu cabu itu cewe oocanauji mime niija mule äyebgame. Tabe mibibine niwabininuji lipulipu teebine ingwe äcwime.

²² Teeme nuuja niija mule lica ge, piijepu nuuja walya mene teeme tage cabu ca lica ituge asata.

²³ Teepi liba teebine jääcnecusi, tabe lica teeme mene jewecnistemuji. Teepi liba teebine niija me jaawenusi, tabe lica jaajemuge egä, “Cane ai ne pa yaawecnistepene.” Eewe, tabe iyeta teeme ngene atwanena Acejiyame me ime cabu icranemuji, lui te biname bine conocäco jaatranemuge.

²⁴ Keriso mime niija mule bine teeme tääpe cabu ewademuji baarge uli cabu me, naace täápume mine iyeta niija mule abmalame, piijepu conocäco mule cina mime ireclota cabu lenajame. Tabe dupe bine jepänemuji mibibine miiji me wawename.

²⁵ Yoo, mine lui epu pana gemi maamoi liijepu, lui te gaabe cabu ca lapesaruge, yepä Acejiyame mibibine gaabe cabu me cuta niwecnininuji mime seemo me Ire Atwiyame piijepu Yageyame ne ingwe äcwime.

3

Ai Mene Lui Coga Rooriye täápume

¹ Cuta agesa căme mene magebi täápume. Weeme rooriye bine yäatecijemuye piijepu teeme singi weene cängena jaawenemuye. Yoo, poto weeme rooriye liba Acejiyame me mene lica jäätrungusi, teepi weeme miijimiji mule liba jääpänemusi, puma cita ca Acejiyame täápume cuta singi läbitininusi.

² Mene ngānu gyene, ingle teepi pa jääpänepesi weeme jugi căco mule bine, piijepu weene teebibine lipu opo gaabe me yaacranemusi.

³ Yoo, weene liba singi gemi jamyacurage lenajame, edingāli amacetnājame, miijimiji cābletääpe piijepu oplacmelāja gwidape asigrerame peei lui babo gwidape lica gyene.

⁴ Pätä, weeme ngenecu bine yaamacetnājemuye ngenecu bojäcu piijepu owelaamelame lenajame. Pepu jamyacu te sasa me lica läbituge. Peei lui baborage gwidape gyene Acejiyame me opo gaabe je.

⁵ Sasa cabu ca magebi lui cina Acejiyame täápume mara me läbitininusi piijepu Acejiyame cabu teeme ngene atwanena bine yaacranemusi, teepi ngenecu cabu ca jamyacu ge, piijepu teeme rooriye me singi cängena sewademujisi.

⁶ Saara pepu magebi ge. Tabe Abrahamo me mene jättecijuge piijepu teebine yageyame ca yaainuge. Weene miiji gemi Saara ne ingwe äcwime, weene liba conocäco mule jaawenemuye piijepu lica wālu ne padare ceera weeme jamyacu ngenecu ne sabe wawename.

⁷ Age căme mene rooriye täápume. Weeme coga bime kokre lica gyene weeme pana baborage, peei name pi teebibine owecu cama opo gaabe me yaacranemuye. Weene umle gemi egä weene iyeteta ireclota ne ten cama cirege päpäna Acejiyame me owecu name pi. Weene pepu cängena inajininuge naace täápume nuuja gwidape te lica weeme irecu ätumuta mene bine iibecla.

Lipu Mule Gyene Miiji Biname Liba Mäpu cabu Yaanajuge

⁸ Age căme mene weeme iyeta täápume. Weene yepä ngene atwanena cama inajipi, weemāmu owecu piijepu singi läbitininuye, ingle mine iyeta Acejiyame me inglewale gemi. Peei name pi weeme nuuja bine owecu cama yätityäremuye, piijepu niinäce gaabe me jaawenemuye.

⁹ Yoo, nuuja biname te liba weeme yepä ne niija jaawenuge, gone teeme daremu ne awecnista. Nuuja te liba niija mene teebine jaajuge, gone niija mene ne jaawecnistute, pätä weene Acejiyame bau irecu lätumutinuye pui me miiji täápume, ingle Acejiyame weebibine ituge ala asogleca pepu lenajame teeme bau ca miiji päpäname.

¹⁰ Oogäräneji Mene te jäucenige egä,

“Lui te singi gyene gege

piijepu miijirage ireclota täápume,

tabe miiji teeme wätä ne cängena ire jaatwuge

niija mene iicema cabu ca,

piijepu walya mene te gone teeme tage cabu ca asata.

¹¹ Tabe miiji niija mule cabu ca latatrongäruge miiji taatu mule wawename.

Tabe miiji poode täápume singi piijepu peei cabu lenajame.

¹² Ingle mime Yageyame te conocäco mule biname bine cängena ire jaatwemuge,

piiyepu teeme irecu ätumuta mene cängenarage yäätecijuje.

Yepä, biname lui cina niiya mule jaawenemusi,
tabe teebibine kaake ca yääcelyäremuge.”

¹³ Siige, pama nuuja te lica weebibine niiya pa jiwenipi, weene liba singi gemi miiji mule taatu wawename.

¹⁴ Yepä, liba biname te weebibine niiya pa jiwenipi weeme miiji mule name pi, weene miiji taatu peei cabu ca pagege päpäna. Wälu gone biname täápume, cuta piiyepu mäpu ngenene atwanena gone yaacatuje.

¹⁵ Yepä, weene miiji Keriso ne niinäce puupu ecärepeye weeme ngenecu cabu, pi-iyepu teebine Yageyame me jaawenepeye weeme täápume. Yoo, biname te liba weeme yepä ne yääteluge aboclom-tame tabe ngena ne ngenene atwana ca joomluge, tabe miiji amacetnäjäneji lenajame miijirage daremu mene awecnistame.

¹⁶ Weene owecu cama weeme ätrunga ne cängena eboclomtete nuuja biname bime täápume. Weene cängena inajininuge, piba weeme ngenecu te lica mäpu läbituge niiya mule name pi, yepä weeme mule ne weene ngena ca yaagluye egä miiji taatu gyene. Piba biname lui cina niiya mene jicemusi weeme Keriso cabu miiji mule poto cidi me, teepi ajiri me pa läbitipesi teeme mene poto cidi me.

¹⁷ Yoo, weene liba mäpu jääpänuye weeme niiya mule name pi, peei weeme yene inge. Yepä, weene liba mäpu jääpänuye weeme miiji mule name pi, peei liba Acejiyame me singi birige, piba peei cabu pisi nyene miiji weeme täápume.

¹⁸ Yoo, Keriso cuta mäpu jepänuji, tabe liba budre äbituji weeme niiya mule äyebile-ngame. Tabe lui conocäco biname ge, tabe yepä gääbu budre äbituji, iyeta conocono biname bime niiya mule daremu ne peega ecatuji, gaabe mime täápume jewenuji Acejiyame bau otinime. Tabe binamerage tääpe cama budre, yepä cabucewe tääpe cama arpinantuji.

¹⁹ Tabe piba gawecewe ne ebmaluji, piyeme äduji Miiji Mene jajime pui sasa budre biname bime seemo bine, lui cina awamuta puupu cabu yaacrajuge atrana trämä.

²⁰ Peei lui eei bime seemo gemi, lui cina ujarage Nooa me padare cabu singi lica Acejiyame me mene äteciujame. Yoo, Acejiyame leca padare teebibine jewagriemuji teeme mene äteciujame, Nooa liba pui poo ne eranguji. Yepä, eit biname taatu cina teeme mene jiteciujajisi, pui poo bora me ebäcnujisi, pepu äsecräruji babo igi niye cabu ca.

²¹ Yoo, mime niye ca äciseja Yeesu me ngii cabu lui seeji pepu pana gyene. Mine niye ca äciseja ne ituge acata Yeesu me ngii cabu niiya mule daremu cabu ca äsecreraime, inge mine Yeesu Keriso ne jitrungujisi lui te budre cabu ca itu arpinantuji. Peei äciseja tääpe jugi ne lica birige äyebingta, yepä peei ca mine Acejiyame bau me latatrongärinago, teebine yaawejanusi mime ngenecu amacetnäja täápume.

²² Yeesu Keriso ituge otni cabu me; tabe puma cabucewe je Acejiyame me camu poto cidi me enajenige. Tabe iyeta mename seemo bine ire jetwenenemige piyepu iyeta nuuja kokre gwidape piyepu maramara mopeyame bine.

4

Acejiyame täápume Inajipi

¹ Naace name pi Keriso cewe oocananuji teeme ai gawecewe tääpe cabu, mine miiji teeme pana ngenecu kokre äbita, inge lui te teeme tääpe cabu cewe loocanuge, teeme täápume siige gyene niiya mule me kokre.

² Peei name pi ai gawecewe lenaja cabu weeme niiya singisingi mule gone jaawenemuye, yepä Acejiyame me singi taatu jaawenuye.

³ Uja baborage padare cabu weene epu biname bime niiya singisingi mule bine jewenemujiye lui cina lica Acejiyame ne jäätrungusi. Naace ge weeme poto bime ireclota cabu peega ge jugijugi mule piyepu singisingi niiya mule täápume. Nesae padare lica ge weene liba umle ge sice buduma äbita, piba buduma piyepu niyarage mule bine jaawenemuye. Weene uuje bine ituge ätrunga piyepu teeme täápume gogecupi itu jaawenemepeye.

⁴ Yoo, page weeme ceegewale cälu te jitenenemige, weene liba singi lica gemi ten cama abasutame pui mule cerämu wawename. Teepi peei name pi weebibine jisädininusi.

⁵ Peei ngänu gyene, teepi Acejiyame me opo gaabe cire laitnipesi iyeta peei mule täápume. Tabe amacetnäjäneji gyene iyeta biname bine atraname, teebibine lui cina ireclota gemi piyepu lui cina ituge budre äbita.

⁶ Yoo, ngena täápume pui toraca mene Keriso poto cidi me ituge jaji sasa budre biname bime seemo bine? Agesa inge: Teepi ituge budre päpäna, inge budre lui Acejiyame me daremu gyene iyeta biname bime niiya mule täápume. Yoo, teeme tääpe ituge budre, yepä Acejiyame te singi ge pui seemo bine cuta padare ceera Miiji Mene äteciujame teepi piba teeme pana ireclota cabu lenajame.

Acejiyame te Mibibine Miijimiji Kaakesea Nicärininuge

⁷ Ai gawecewe me ngälugaabe cudecewe lica gyene. Peei name pi weemämu cängena bojäcu ire latwinuuye, weeme ngene atwa-nena bine amacetrnäjäneji irecu ätumuta täापume.

⁸ Ai lui baborage gwidape gyene egä weene miiji weemeweme singi lenaja, ingle singi liba pisi nyene, weene miiji gemi biname bime bucurage conocono mule bine ngene ätrimelame.

⁹ Weemeweme awabläjipeye mete cabu äsinglentame, piiyepu mogobi wee-meweme awenäjipeye gege cama.

¹⁰ Yoo, Acejiyame iyeta mibibine maramara kaakesea ituge ceera. Mine peei kaakesea cängena jaawenemusi mime yepäyepä bine ätityerame.

¹¹ Acejiyame häärmi kaakesea lui ne yäacäruge, miiji tabe Acejiyame me mene ne cängena yaaboclomtuge. Acejiyame ätityera kaakesea lui ne yäacäruge, tabe miiji Acejiyame me kokre cama nuuja biname bine ätityerame, naace täापume iyeta mime kaakesea cabu Acejiyame me ngii awepänteji lenajame. Piba pajecu gyene egä mine Yeesu Keriso me biname gemi. Yoo, jamyacu apaclyera piiyepu kokre lui teeme yene iyeteta ngälu cäco. Eso.

Mäpu cabu Cängena Lenaja

¹² Cäme ngenecurage binamewale, mäpu apicetrnära liba mime bau täduge, cälu te äti gone, piiyepu ngenecu niya gone läbitininago. Pepu mäpu lui mime bau taatu lica gemi.

¹³ Peei name pi mine ngenecu gege äbitininago, ingle mime mäpu lui epu pana gemi Keriso lipu mäpu bine jepänemuji. Ceräcerägäabu bimu te liba cire tädepi, piiyepu iyeta biname cina Keriso me jamyacu apaclyera ne liba cire jääpänepesi, mine piba baborage gege cama cire ninajipi.

¹⁴ Yoo, mine liba äcneca nitecijinuge, ingle mine Keriso me binamewale gemi, mine ngenecu gege pa läbitipago, ingle naace popi Acejiyame me Seemo piba mime trupa cabu jamyacu apaclyera cama yaanajuge.

¹⁵ Miiji lica gyene egä mine mäpu bine jääpänemusi ingle naace name pi mine biname ne budre me yaaglusi, gwidape ne ero ca yaacatusi, coo nuuja niya mule bine jaawenemusi, coo piiyepu nuuja biname bime kaakesea jääsädusi. Pepu mule cabu ca mäpu liba jääpänusi, yoo mime ingle gyene.

¹⁶ Yepä, mine liba mäpu jääpänusi ingle mine Keriso me biname gemi, piba ajiri gone, yepä Acejiyame ne baborage eso yäacärusi egä mine Keriso me ngii cama gemi.

¹⁷ Acejiyame me atrana padare mameta gyene. Tabe teeme biname bine niinäce gaabe pa jaatranemepi. Yoo, tabe liba teeme atrana kaakesea ne giye pa labacitepi mime bau, piba mage mäpu teeme täापume lui cina Acejiyame me mene lica jäätrungusi,

¹⁸ Oogäräneji Mene te jücenige egä,
“Miiji mule biname cina mäpu bine pa jääpänemepesi,
piba pa läsecrärepi Acejiyame cama lenajame.

Yoo, piba lipu gyene teeme täापume,
lui cina Acejiyame me biname lica gemi,
piiyepe niya mule bine jäje jaawenemusi?”

¹⁹ Peei name pi mine lui cina mäpu jääpänusi ingle peei lui Acejiyame me singi gyene mime täापume, mine miiji mule ne gone yaabmalusi. Yepä, mimämu Acejiyame me ime cabu lacraninago mime miiji täापume. Tabe lui te iyeta biname bine itu jebenemuji, tabe lica mibibine ätityera cäco pa nibmalipi.

5*Acejiyame me Ätrunga Biname Lui Yepä Ingle Biname Gemi*

¹ Cäme mene pisi nyene ätrunga ingle bime mope biname täापume. Cane cuta piiyepu mope biname gäne. Yoo, cane Keriso ne itu jepänujine teeme cewe oocana cabu, piiyepu tabe teeme jamyacu apaclyera ne liba cire saaboclomtepi, cane cuta peei cabu cire nanajepi. Yoo, agesa cäme mene weeme täापume.

² Weene biname bine cängenarage ewademusi, Acejiyame lui weeme waadena täापume itu icäripi. Teepi epu pana gemi maamoi liiyepu, piiyepu weene epu pana gemi teeme ire atwi biname liiyepu. Weene weeme kaakesea cängena jaawenemuye, lica epu pana egä biname te weebibine giri jicranininuge, yepä ngenecu gege cama jaawenemuye, ingle Acejiyame pepu mule täापume myene singi. Gone rarekaake singi name pi ai kaakesea ne wawena, yepä toraca ngenecu cama jaawenemuye, ingle weene singi gemi Acejiyame me ätrunga biname bine ätityerame.

³ Weene babo me gone läbitininuye weeme bucurage mene ca. Weene miiji umle gemi egä biname lui maamoi pana gemi, teepi teeme ire atwi biname bine ingwe pa yäacwemepesi.

Peei name pi weene cängenarage inajipi, piba weeme ireclota miiji gyene nuuja biname cina ingwe äcwime.

⁴ Piba mime Ire Atwi Mopeyame Keriso liba cire tacnenutepi, mine miijirage daremu ne cire jääpänepesi. Mine teeme jamyacu apaclyera cabu cirege lenaja iyeteta.

⁵ Yoo, mamye biname, agesa mene weeme täápume, weeme mope biname bime mene yaacatuye. Weene iyeta weeme nuuja bine yäätityäremuye, teebibine niinäce me jaawenemuye, ingle Oogäräneji Mene te apu jiicenige egä, “Lui biname te liba singi teemämu babo äbitame, Acejiyame teebine jäägyuge, yepä lui biname te Acejiyame ne opo gaabe me yaacituge, Acejiyame teebine miiji jaawenuge.”

⁶ Yoo, mine miiji matikolä me äbita Acejiyame me opo gaabe, tabe piba mibibine cabu me wawena pagege, teeme miijirage padare cabu.

⁷ Iyeta mime ngenecu mäpu miiji Acejiyame ne yääcärusi; tabe babo owecu cama mibibine nitityärinuge.

⁸ Yoo, weene ire cama cängena inajininuge! Weeme cubuyame Satani tabe drowä glunubora gwidape pana gyene, layani pana waatnetnäjuge. Tabe jäärngemuge biname bine sabe wawename.

⁹ Weene Acejiyame ne jäätrunguye, teeme kokre cama imye-mutinuge, Satani me singi ne yääyecräjuye, ingle weene umle gemi egä weeme ätrunga binamewale iyeta gawecewe cabu teepi yepä pana mäpu bine jääpänanemus.

¹⁰ Mine liba mäpu cabu matikolä padare ninajininuge, Acejiyame lui te iyeta owecu piyepu ätityera cama gyene, tabe te mibibine peei cabu ca pa nisechräripi, kokre piyepu apineca cäco me niwenipi, piyepu mime ngene atwana Keriso cabu yaacranemepi. Tabe mibibine ituge asogleca teeme jamyacu apaclyera cabu Keriso cama cirege lenajame.

¹¹ Teeme yene kokre iyeteta ngälu cäco. Eso.

Peteru me Sebore Mene

¹² Yoo, Siila te cebine nätityärenige ai matikolä mene oogärame. Tabe cäme täápume Acejiyame me miijirage ätrunga biname gyene. Cane singi gäne egä ai mene cabu ca weene ätityera ne pa jepänepeye Acejiyame ne cängenarage ätrungame. Ai mene cabu cane weebibine umle jiwenininine Acejiyame me toraca owecu piyepu ätityera mule poto cidi me. Peei cabu weene cängena imyemutipi!

¹³ Lui cina ama Rooma babo cewe cabu labasecretnuge Acejiyame bau irecu ätumutame, teepi weebibine sebore jiwenininisi. Teepi weeme pana Acejiyame bau ca jäjäcräneji gemi teeme biname me äbitame. Cäme bägrä Mareko cuta piyepu weebibine sebore jiwenininige.

¹⁴ Weene weemeweme ajecletnäjipeye sebore mene cama, ätrunga biname bime singi mule liiyepu.

Poodé weeme iyeta bime cabu lenajame lui Keriso me biname gemi.

Cane ngii Peteru; cäme mene ngälu peese.

PETERU ME NEENENI MANU LETA

¹ Cane sāne Simona Peteru, Yeesu Keriso me ätyepāneji biname gāne teeme Miiji Mene kaakesea wawename.

Cane ai mene weeme bau yoogārenine lui cina miijirage ätru-nga ne ituge pāpāna cine liiyepu. Yeesu Keriso lui mime Acejiyame piiyepu mime niyya cabu ca Åsecrerayame gyene, tabe cuta conocācorage gyene, peei name pi tabe yepā pana miijirage ätrunga ne ituge ceera iyeta mibibine.

² Acejiyame me miiji te weeme cabu lenajame piiyepu tabe weebibine baborage poode ceerame weeme umle cabu ca Acejiyame poto cidi me piiyepu Yeesu mime Yageyame poto cidi me.

Acejiyame Mibibine Itu Nisoglicipi Teeme pana Mule Acatame

³ Acejiyame mibibine ituge jājācra teeme jamyacu apacyera piiyepu teeme miiji cabu lenajame. Mine liba teeme täapume umle läbitininago, tabe mibibine teeme kokre piba nicārininuge toraca miijirage ireclota cabu lenajame.

⁴ Tabe mibibine babo miijirage mene itu nicāripi mine teeme pana miijirage mule acatame piiyepu ai gawecewe me niyya singisingi mule cabu ca uucratname.

⁵ Pepu pi mine lui cina teebine jäätrungusi mine kokre läbitininago miiji mule wawename. Piba mine singi Acejiyame poto cidi me cerāmu umle äbitame teeme singi bine wawename.

⁶ Mine cuta lapicetnārinago mimerage singi bine gawe me acraname, piba mine liba māpu cabu ninajininuge, mine imyemutinuge, piiyepu cāngena teeme pana mule jaawenemusi.

⁷ Mine piba nuuja biname bine yāätityāremusi teebibine mime binamewale me jaawenemusi, siige mine toraca singi labitininago teeme täapume.

⁸ Mine peei mule bine liba jaawenemusi, piba mime ireclota cabu ca biname cina umle pa läbitipesi mime Yageyame Yeesu Keriso me mule poto cidi me. Yoo, lui biname cina teeme täapume cāngena umle gemi, teepi teebine jaawabudnitusi teeme ireclota cabu.

⁹ Yepā, lui biname te peei mule bine lica jaawenemuge, tabe irecu määsumāsu biname pana äblicāco ingwe gaabe me ire. Tabe itu ngene jäätrimalepi Keriso lipu teeme sasa niyya mule bine itu iyebenge-muji.

¹⁰ Yoo, cāme ätrunga binamewale, mine peei mule bine jaawenemusi lui cina jaawabudnitusi egā Acejiyame te mibibine ituge ala asogleca teeme binamewale me äbitame. Mine peei bine liba jaawenemusi piba lica nuuja gwidape te mibibine Acejiyame bau ca äyebenga.

¹¹ Mime niyya cabu ca Åsecrera Biname piiyepu Yageyame Yeesu Keriso te mibibine piba cire nisoglicipi teeme ngālu cāco waadena cabu lenajame.

¹² Peei mene cane bii yogārine, ngānuge weene puu umle gemi piiyepu weeme ätrunga kokre gyene peei toraca mene cabu, yepā cane singi weebibine jāje ngene apecname peei poto cidi me.

¹³⁻¹⁴ Yoo, cane umle gāne cāme budre cudecewe lica gyene, ingle mime Yageyame Yeesu Keriso cebine itu conocāco umle nawenumi, peei name pi cane weebibine jāje ngene jipecnininune peei gwidape poto cidi me ngālu cāme budre.

¹⁵ Cane peei ne cāngena yoogārenine, ingle cane singi lica gāne weene ngene ätrimelame cāme budre ingwe gaabe ca.

Cine Keriso ne Itu Jepānujisi Teeme Jamyacu Apacyera cabu je

¹⁶ Yoo, itemene lica gyene peei mene cine lui weebibine ituge jajanena mime Yageyame Yeesu Keriso me babo kokre piiyepu acnenuta poto cidi me. Cine cime irecu ca jepānujago teeme jamyacu apacyera ne.

¹⁷⁻¹⁸ Cine ten cama puga ge pui podo cabu Acejiyame liba teebine jamyacu apacyera ecāruji, tabe teebine piba ewepyerājuji egā, “Agesa cāme ngenecurage bāgrā. Tabe iyeta cāme singi conocāco jaawenemu-ge; cane baborage singi gāne tee-me täapume.” Yoo, cine cimāmu itu nitecijinuji peei tagepogogo lui cabucewe ca tāduji mime Aceji Babe me jamyacu apacyera cabu ca.

¹⁹ Mime nuuja toracarage mene pisi nyene Keriso poto cidi me. Peei lui Oogārāneji Mene Acejiyame me sasa mename biname bime bau ca. Iyeta teeme mene mine miiji cāngena abiberāja, ingle peei lui epu pana gyene ngale te liiyepu krokeciye cabu ca saapacyāruge. Teeme mene te mibibine pepu pana umle nicārininuge bucurage gwidape poto cidi me, lui ge niināce mine umle lica. Yepā, mine liba teeme mene poto cidi me ngene jwaatwananinago, piba apacyera te mime bau tuungepmaluge, ingle Keriso Guji Wale pana tuungepmaluge mime ngenecu bora je.

²⁰ Yoo, agesa baborage mene: Biname te äblicäco teemämu Aceji Seemo me ätityera cäco umle äbita peei gwidape poto cidi me, Acejiyame lui jüicenige teeme Oogäräneji Mene cabu,

²¹ ingle Acejiyame me mename biname cina teemerage singi mene lica jüicemujsi, yepä Acejiyame me mene jejanemujsi Aceji Seemo teebibine lipu ecäremuji.

2

Walya Abiberäja Biname

¹ Yoo, niinäce Israela biname bime padare cabu puga ge poto walya biname, lui cina teemämu lainininusi Acejiyame me mename biname ca, yepä teeme mene lica ge Acejiyame bau ca. Page cuta piyepu poto walya biname piti nemi, lui cina teemämu lainininusi abiberäja biname ca Acejiyame poto cidi me, yepä teeme abiberäja lui walya piyepu conocono gemi. Teeme mene te ätrunga ne sabe jaawenuge. Mime Yageyame lui te iyeta biname bine itu isecräremuji teeme niyya mule daremu cabu ca, teepi teebine lica jäätrungusi, yepä jaainusi. Peei name pi teepi teeme mäpu daremu ne wata pa jääpänepesi.

² Bucurage biname cina teebibine ingwe pa yäcwemepesi teeme niyya singisingi mule cabu me. Teeme niyya mule name pi biname cina niyya mene pa jüicemepesi toraca mule poto cidi me.

³ Pui walya biname cina singi rarekaake weeme bau ca päpäname teeme sinäme abiberäja mule cabu ca. Yoo, Acejiyame teeme mule bine jäägyemuge, tabe amacetnäjäneji enajenige teebibine iisibrecame.

⁴ Mine Acejiyame me mule poto cidi me ngene pa jwaatwa-naninago. Ujarage pui mename seemo lui cina niyya mule jewenujsi, Acejiyame te teebibine padare lica ecäremuji, yepä teebibine yisabemuji niyya puupu me. Teepi puma krokeciye cabu icrajenige, siige äblicäco äsecrera ngälu atrana bimu te liba cirege atyaramta.

⁵ Cuta Acejiyame te lica padare ecäremuji pui biname bine lui cina ai gawecewe cabu niinäce icrajuji, yepä babo igi niyye ne tityepuji pui niyya mule biname bine aglecame. Yoo, Nooa piyepu ten cama lui seben biname taatu tabe teebibine isecräremuji. Nooa tabe biname bine mene jejanemujsi Acejiyame me singi wawenecame, yepä biname cina singi lica ge ätecijame.

⁶ Acejiyame te cuta Sodoma piyepu Gomora cewe biname bine jigyemuji, peei neeneni cewe bine muye ca juubudäruji ngälu tuuwe mriibe taatu ebmalemuji, ingle tabe singi ingwe ca biname cina Sodoma piyepu Gomora cewe poto cidi me ngene apecname, piba wälu äbitame niyya mule wawenecame.

⁷ Yepä, tabe Loota ne isatuji. Loota lui miiji mule biname ge, tabe mage ngenecu mäpu cama yaanajuge teeme cotre umle cäco ceweyame bime sargi mule name pi.

⁸ Yoo, Loota ten cama senajenäjumi bimu gaabegabe. Tabe singi lica ge teeme niyya mene ätecijame piyepu teeme niyya mule päpänename, peei name pi mage ngenecu mäpu ge. Acejiyame teebine isatuji, yepä teeme cewe biname bine teeme mäpu daremu ecäremuji.

⁹ Peei cabu ca mine umle läbitininago egä Acejiyame te ibibi gyene teeme biname bine äsecrera teeme mäpu cabu ca, lui cina teebine jäätrungusi. Tabe cuta miiji gyene niyya mule biname bime daremu bine oomlana ngälu atrana bimu te liba cire tatyaramtepi; teepi piba teeme mäpu daremu cirege päpäna.

¹⁰ Yoo, mäpu daremu pisi nyene teeme tääpume lui cina teeme tääpe me jugijugi singi bine jaawenemusi piyepu Acejiyame me singi ne jäägyusi.

Pui walya abiberäja biname lui pepu gemi. Teepi teemämu lasicnantinusi egä baborage gemi; teepi ajangotna cäco gemi. Teepi wälu lica cabucewe jamyacu apacyera cama seemo bime poto cidi me, yepä teebibine jääcnecimusi.

¹¹ Yoo, Acejiyame me mename seemo puu baborage kokrerage gemi ai walya abiberäja biname cabu ca, yepä teepi lica pepu äncaca mene jüicemusi teepi liba teebibine jaaitnäjemusi Acejiyame me opo gaabe.

¹² Yepä, peei walya biname cina ngene atwanena cäco gemi. Girigale drego pana teepi teeme singi papa jaawenemusi. Teeme lui budre mule gyene. Teepi wälu lica niyya mene iicaname pui poto cidi me teepi lui umle cäco gemi. Yoo, biname cina girigale drego bine joomlemusi, yaaglecimusi, siige teeme ireclota lapiruge. Cuta pui walya abiberäja biname bine pepu pana pagege cuta iisibreca.

¹³ Teepi biname bine ngenecu mäpu me jaawenemusi, peei name pi mäpu daremu ne cirege päpäna. Ngänuge bimü padare, teepi ajiri lica gemi teeme singisingi mule wawenecame, piba gigri deedei weene cama läbitininusi. Teepi weeme ätrunga ingle bine jugi me jaawenusi, weebibine ingletnäjinusi.

¹⁴ Magebi ne liba jwääpänusi, teepi singisingi läbitininusi teeme tääpume. Teeme niyya jugijugi mule bucurage gemi, yepä lica gyene teeme tääpume ibibi. Ngenecu onya biname

bine teepi teeme angletneja gaabe cabu yaawadanemusi. Teepi babo umle gemi lipu teeme niya singisingi bine päpäname. Yoo, teepi teeme mäpu daremu cirege päpäna.

¹⁵ Teepi toraca gaabe ituge abmala, conocono gaabe ne ituge acata. Teepi Balam Bosoro me hägrä ne ingwe yääcwusi lui te niya gaabe ne ecatuji ai name pi tabe baborage singi rarekaake peei gaabe cabu ca päpäname.

¹⁶ Yoo, dongki te Balam ne eblawäjuji biname pana tagepogogo ca, siige teeme buduma conocono mule ne jibuji.

¹⁷ Pui walya abiberäja biname teeme nuuja miiji lica gemi. Teepi epu pana gemi niye cupicu liiyepu lui niye cäco läbituge. Teepi epu pana carbe liiyepu weene liba niye täapume singi birige, yepä buuwe te pui carbe ne yääyeblingtuge. Pepu carbe me miiji ätiyera lica ge. Yoo, Acejiyame pui biname bime täapume krokeciyerage puupu ituge amacetnäja.

¹⁸ Teepi mope babo läbitininusi piyepu buduma mene jaajanemusi. Teepi biname bine yaangletnäjemusi lui cina gije jaabacitusi niya buduma mule bine abmaläcemame, teebibine walya mene yaabiberäjemusi egä, "Weeme täape me singisingi mule bine jaawenemuye."

¹⁹ Teepi teebibine walya jaajanemusi egä, "Weene kälyä gemi iyeta cotre cabu ca; weene miiji gemi weeme singi wawena." Yepä, pui walya abiberäja biname teeme singisingi mule te teebibine joomlemuge. Teepi äblicäco gemi peei cabu ca uucratna, lui te teebibine sabe jaawenemuge. Yoo, ngena te biname me singi ne joomluge, biname ne peei te jaawabuge ngena wawename.

²⁰ Yoo, biname lui te mime niya cabu ca Äsecrerayame piyepu Yageyame Yeesu Keriso ne jäätrunguge, tabe lasatuge ai gawecewe me niya mule cabu ca. Tabe liba ngenecu onya piba läbituge, tacnenutuge ingwe gaabe me, siige pui niinäce mule cuta jaawenemuge, peei lui babo niyarage gyene teeme täapume. Tabe liba niinäce cabu ca Yeesu Keriso poto cidi me mene lica birige ätecija, teeme täapume peei lui mäpu gyene, yepä tabe liba Yeesu Keriso poto cidi me yäätecijuge, piba ingwe ca jäägyuge, teeme täapume peei lui baborage mäpu gyene.

²¹ Pui biname täapume miiji cirege tabe liba conocäco gaabe poto cidi me umle lica cire läbiteji, ingle peei umle cama tabe liba Acejiyame me singi ne teeme täapume kaake me jaawenuge, tabe babo mäpu daremu ne cirege acata.

²² Yoo, teeme poto cidi me toraca gyene sasa biname bime mene egä, "Drego te tacnenutuge teeme aake luma yaacuge," cuta nuuja mene egä, "Blome ne liba jääcisäjus, tabe tacnenutuge teeme paamuli cabu me cuta lenajame." Pepu pana gyene biname lui te cääri teeme niya cabu me tacnenutuge.

3

Mene Mime Yageyame me Acnenuta poto cidi me

¹ Cäme ngenecurage biname, cane weeme bau me mene itu yoogärepene. Cuta agesa cäme nuuja oogära mene, ingle cane singi gäne egä weene toraca mule poto cidi me cääri cuta ngene jotwananipeye.

² Weene ngene jotwananipeye pui mene poto cidi me, Acejiyame me sasa mename biname cina lui mene ituge oogära. Cuta cääri ngene jotwananipeye pui mene poto cidi me mime Yageyame piyepu niya cabu ca Äsecrerayame te itu jejuji wawename. Peei mene cine lui Keriso me ätyepäneji biname cina weebibine ituge ceera.

³ Niinäce, weene miiji cängena umle äbitineye apu egä ai gawecewe liba mameta gyene apira, piba poto biname pa saaclepi lui cina teeme niyarage singi bine pa jaawenemepesi. Teepi weebibine niyarage bääclena me jiwenipesi egä.

⁴ "Nää, weeme Yageyame te itu jijujuji egä tabe pa tacne-nutepi? Tabe cije baa, lese nyene? Cime saarewale cabu ca biname cina ireclota cama yaacrajuge ai gawecewe cabu, piba budre läbitininusi. Nuuja mara mule lica ituge äpletnta ai gawecewe te liba tacuji ngälu page." Teepi piba walya mene pa jüicemepesi egä, "Weeme Yageyame te lica pa tacnenutepi; ai gawecewe te lica mara me pa läbitepi."

⁵ Yoo, pui biname cina singi lica opo awatname egä sasa ujarage Acejiyame te mene jejemuji piba taatu cabucewe dume cama piyepu gawecewe cina tacujäsi. Gawe te tegeluji niye cabu ca.

⁶ Piba Nooa me padare cabu, Acejiyame mene jejuji, niye te tegeluji, siige gawecewe biname bine iyeta irmemuji.

⁷ Yoo, ai gawecewe piyepu cabucewe Acejiyame me mene miji pi aanajenige, ngälu tabe peei bine muye ca cire juubudäremepe. Atrana bimu liba cire tädepi, piba biname lui cina singi lica gemi Acejiyame me mene ätecijame, tabe teebibine cire yisabemepi muye puupu cabu me iyeteta lenajame.

⁸ Cäme binamewale, gone ngene jitrimalinuge egä mime Yageyame me ngene atwanena mara gyene mime cabu ca. Yoo, yepä bimu coo tausen kämäge, peei lui mara lica gyene; mime Yageyame täápume teepi lui yepä pana gegi.

⁹ Yoo, poto biname cina apu jaangemuge egä mime Yageyame te lica teeme mene ibibi jaawenuge ai gawecewe iibyagecame, yepä peei toraca lica gyene. Tabe teeme mene toraca me cire jaawenemepi. Yepä, tabe biname bine jewagrijenemige teeme niija mule cabu ca atatröngärame teeme bau me, ingle tabe singi lica gyene nuuja biname ne ajarame.

¹⁰ Mime Yageyame cire tädepi. Biname cina piba cälu te cire jäätemepi, ingle naace popi teeme otni lui ero biname pana ogä cirege. PEEI CERÄCERÄGÄBU BIMU CABU CABUCEWE TE BABO MUMWÄMU CAMA CIRE LAPESAREPI. Wale bine muye te cire yaabemepi. Ai gawecewe iyeta gwidape cama cire lapesarepi.

¹¹ Yoo, ai name pi iyeta gwidape cina pepu cire labyagicipesi, mine miiji cängena ire cama ninajininige. Mine Acejiyame me singi piiyepu conocäco mule bine jewenenemisi.

¹² Mine Acejiyame me acnenua bimu ne jewagrijenisi, cuta kaakesea jewenenisi peei bimu te watata otnime. Toraca gyene egä pui bimu cabu muye te cabucewe ne cire jiibyagecepi, piiyepu peei baborage nuunu cabu iyeta wale cina pa juudräjemepi, piba cire lapiripesi.

¹³ Yepä, mine Acejiyame me mene jitrungenisi egä tabe kirece cabucewe piiyepu gawecewe bine cire jaawenemepi. Puma ätrunga biname cina conocäco taatu cire yaacrajepe.

¹⁴ Yoo, cäme binamewale, mine peei bimu ne jewagrijenisi, peei name pi mine lopicetnärinago iyeta padare conocäco piiyepu epu cäco lenajame Acejiyame me opo gaabe je, teeme singi taatu wawename, piiyepu poode cama lenajame.

¹⁵ Mine umle gemi ngena name pi Acejiyame me acnenua lui däägurage gyene. Tabe biname bine padare ecärenemige teebine ätrungame, siige tabe teebibine mäpu daremu cabu ca äsecrerame. Yoo, peei umle mene mime ngenecurage biname Paulo te ituge oogära weeme bau me. Acejiyame te peei umle teebine ecäruji.

¹⁶ Tabe yepä mene iyeta teeme leta cabu jiicuge mime Yageyame me acnenua poto cidi me. Yoo, poto teeme mene lui mäpurage gemi umle äbitame, cuta poto umle cäco biname lui cina lica cängena ngene jwaatwananinusi, teepi Paulo me mene walya pana yaaboclomäjusi. Teepi cuta Acejiyame me poto nuuja Oogäräneji Mene pepu conocono jaawenemusi. Teeme yene mäpu daremu peei täápume.

¹⁷ Cäme binamewale, weene umle gemi pepu biname poto cidi me. PEEI TÄÄPUME CÄNGENA IRE, PIBA PUI NIIBA MULE BINAME CINA WEEBIBINE LICA TORACA GAABE CABU CA ÄYEBLENGA TEEME WALYA ABIBERÄJA CA. GONE WEEME TORACA ÄTRUNGA GAABE NE ABMALA!

¹⁸ Yepä, cerämu labiberäjininuye mime Yageyame piiyepu niija cabu ca Äsecrerayame Yeesu Keriso poto cidi me, teeme miiji piiyepu umle cina babo me äbitame weeme cabu. Yoo, jamyacu apaclyera lui teeme yene page piiyepu iyeteta ngälu cäco. Eso!

Cane ngii Peteru, siige cäme mene.

YOANE ME NIINÄCE LETA

Ireclota Mene poto cidi me

¹ Lui tage achedna cabu ca, cine lui ne titecijanenanumesi, lui ne tepänenanumesi irecu ca, lui cabu me ire nicijenanimi, cuta lui ne toomlananumesi ime ca, cine teeme poto cidi me yoogärenisi. Tabe lui Ireclota Mene gyene.

² Ai ireclota te liba taboclomtuji, cine tepäne-nanumesi, cine siige page jewabudnitenisi, egä tabe laasi nyene. Lui te iyeteta gyene, lui te Babe cama ge, siige cime bau me taboclomtuji, cine teeme poto cidi me weebibine jijananenininago.

³ Cine ngena ituge päpäna, ngena poto cidi me cine ituge ätecija, cine peei poto cidi me jijananenininago weebibine naace tääpume egä weene piba cine cama yepä me äbitame epu pana cine lipu yepä gemi Babe piyepu teeme Bägrä Yeesu Keriso cama.

⁴ Cine ai ne naace tääpume yoogärenisi egä mime gege te baborage äbitame.

Acejiyame Lui Apaclyera Gyene

⁵ Cine lui mene ituge ätecija Acejiyame me Bägrä bau ca, cine lui mene cuta weebibine jijananenininago, pui mene apu gyene egä Acejiyame lui apaclyera gyene, teeme cabu nuuja krokeciye lica gyene.

⁶ Peei name pi mine liba jüicusi, egä mine Acejiyame cama yepä gemi, yepä mine krokeciye cabu waatninago, mine peei lui walya waatrominago, conocäco mule bine lica jaawenimusi.

⁷ Yepä mine liba apaclyera cabu ninajininuge Acejiyame liyepu, mine piba yepä ngene atwana cama ninajininuge, siige teeme Bägrä Yeesu Keriso me uudi te jugi cäco me niwenininuge iyeta niya mule cabu ca.

⁸ Mine liba jüicusi egä mine conocäco biname gemi, mine mimämu langletnäjinago, siige mime cabu nuuja toraca mene lica gyene.

⁹ Yepä mine liba mime niya mule bine jaawabudnemusi, Acejiyame toraca piyepu conocäco gyene, siige mime niya mule lica yaawadimuge, jugi cäco me niwenininuge iyeta conocono mule cabu ca.

¹⁰ Mine liba jüicusi, egä mine conocono mule lica ituge wawenetnäja, mine siige Acejiyame ne walya me jaawenusi, teeme mene mime cabu lica gyene.

2

Keriso Lui Mime Ätityera Biname Gyene

¹ Cäme binamewale, weene ätrunga cabu ca lui cäme bägrä gemi, cane ai ne yoogärinine weeme bau me naace tääpume egä weene niya mule lica wawenecame. Yepä laati te liba niya mule bine jaawenimuge, mime pisi nyene conocäco biname Yeesu Keriso, lui te Babe me opo gaabe je niwärintinuge.

² Tabe peese nyene biname lui te mime niya mule daremu ne egluji. Yoo, tabe mime taatu niya mule daremu ne lica egluji, iyeta biname bime.

³ Mine liba Acejiyame me mene yäacwetnusi, mine siige umle gemi apu egä mine umle gemi tabe.

⁴ Laati te liba jüicuge, egä tabe umle gyene Acejiyame, yepä teeme mene lica yäacwetnuge, tabe walya biname gyene, teeme cabu lica gyene toraca mene.

⁵ Yepä laati te liba Acejiyame me mene jäätecijuge, tabe toracarage singi birige teeme tääpume. Peei cabu ca mine umle gemi, egä mine Acejiyame cabu ninajininuge.

⁶ Laati te liba jüicuge, egä tabe Acejiyame cabu yaanajuge, tabe miiji epu lenaja Yeesu Keriso liyepu.

Kirece Mene Ätecija tääpume

⁷ Cäme miijirage binamewale, cane lui mene yoogärinine weeme bau me, kirece mene lica gyene, pätä pui sasa mene gyene, weene lui ituge ätecijana, weene liba weeme ätrunga ne yaacitepeye Yeesu Keriso cabu me. Ai lui pui sasa mene gyene, weene lui niinäce itu itecijipi.

⁸ Yepä nuuja poto ta kirece mene gyene, cane lui yoogärinine, siige Keriso cabu ca cuta piyepu weeme cabu ca ituge päpäna, egä ai lui toraca mene gyene, inge krokeciye te äyebtingtenige weeme cabu ca, toraca apaclyera te tuungepmalenige.

⁹ Laati te liba jüicuge, egä tabe apaclyera cabu enajenige, yepä tabe nuuja ätrunga biname ne jäämugetnuge, tabe camu krokeciye cabu yaanajuge.

¹⁰ Yepä laati te liba nuuja ätrunga biname tääpume singi läbitanuge, tabe apaclyera cabu yaanajuge, siige teeme cabu nuuja mule lica gyene, lui te nuuja biname bine jaawenimuge conocono mule wawenecame.

¹¹ Yepä laati te nuuja ätrunga biname ne jäämugetnuge, tabe krokeciye cabu yaanajuge piyepu waatnuge. Tabe umle lica gyene liiyeme läduge, ingle krokeciye te teeme irecu yaacwabuge.

¹² Cäme binamewale, ätrunga cabu lui kirece gemi, cane yoogärenine weeme bau me, ingle naace popi weeme niya mule äcisäjeji gemi Keriso me ngii name pi.

¹³ Cane yoogärenine weeme bau me lui niinäce gaabe biname gemi ätrunga cabu, ingle naace popi weene umle gemi Keriso, lui te agedna cabu ca gyene. Piiyepu lamlecu ätrunga biname, cane weeme bau me yoogärenine, ingle naace popi weene iyeta niyaniya mule bime yageyame ne ituge apremela.

¹⁴ Cäme binamewale, ätrunga cabu lui kirece gemi, cane ai lui bii byoogärine weeme bau me, ingle naace popi weene umle gemi Babe. Cuta niinäce gaabe biname gemi lui ätrunga cabu, cane ai lui bii byoogärine, ingle naace popi weene umle gemi Keriso, lui te agedna cabu ca gyene. Cuta lamlecu ätrunga biname, cane ai lui bii byoogärine weeme bau me, ingle naace popi weene kokre gemi piyepu Acejiyame me mene te weeme cabu yaanajuge piyepu weene ituge apremela iyeta niyaniya mule bime yageyame ne.

¹⁵ Gone singi äbita ai gawecewe mule poto cidi me piyepu ai gawecewe gwidape tääpume. Weene liba gawecewe mule tääpume singi inajininuge, weene piba äblicäco Babe tääpume singi lenaja,

¹⁶ Ingle naace popi ai gawecewe me mule lui Acejiyame bau ca lica gemi. Niya singisingi lui cina biname bine yaawadäjemus, piyepu biname cina ngena jääpänanemus siige singisingi läbitininusi, cuta piyepu iyeta ai gawecewe muleyame biname cina lui tääpume mage gege, ai mule lui Acejiyame bau ca lica gemi, yepä teepi ai gawecewe cabu ca gemi.

¹⁷ Gawecewe piyepu teeme iyeta gwidape, biname cina lui tääpume mage singi yaacrajuge, teepi apirininisi, yepä laati te Acejiyame me singi ne jaawenuge, tabe ngälu cäco yaanajuge.

Keriso me Äciseräjayame

¹⁸ Cäme binamewale, ätrunga cabu ca lui cäme bägrä gemi, ngälu gaabe mameta gyene. Weebibine ituge jaji, egä Keriso me Äciseräjayame te cirege otni, siige page bucurage piti nemi, peei name pi mine umle gemi, egä ngälu gaabe mameta gyene.

¹⁹ Teepi puu mime sobe cabu ca itu läsipesi, yepä teepi mine cama yepä lica gemi. Teepi liga mine cama yepä cirege, teepi mine cama cire yaacrajeji. Yepä teepi lipu ituge äyebengäja mime cabu ca, peei te niwabininige, egä teepi mine cama yepä lica gemi.

²⁰ Yepä Keriso te weebibine Aceji Seemo ca ituge äciseja, siige weene iyeta umle gemi, ngena gyene toraca mene.

²¹ Cane naace name pi lica yoogärenine weeme bau me, egä weene umle cäco gemi toraca mene. Pätä cane naace name pi yoogärenine, egä weene umle gemi toraca mene, piyepu weene umle gemi, egä toraca mene cabu ca äblicäco nuuja walya te otni.

²² Siige laasi nyene walya biname? Tabe peese nyene, lui te jüucuge, egä Yeesu lica gyene Keriso. Tabe Yeesu me Äciseräjayame gyene, siige jäägyuge Babe Bägrä wäsi bine.

²³ Laati te liba jäägyuge Bägrä ne, tabe Babe ne cuta jäägyuge; laati te liba yaacatuge Bägrä ne, teeme cuta Babe pisi nyene.

²⁴ Peei name pi weene lui mene itecijanipi, weene liba ätrunga biname me läbitipeye, kokre joomlepeye. Pui mene te liba weeme cabu yaanajuge, siige weene piba yepä gemi Babe Bägrä cama.

²⁵ Piiyepu Yeesu Keriso lui gwidape ceerame itu nijinui, iyeteta ireclota gyene.

²⁶ Cane weeme bau me ai mene yoogärenine eei biname bime poto cidi me, lui cina weebibine angletnejame äbitininisi.

²⁷ Yepä weene pepu lica gemi, Keriso te Aceji Seemo ca weebibine ituge äciseja, siige tabe weeme cabu yaanajuge, peei name pi weene singi lica gemi nuuja te weebibine abiberäjame, ingle tabe te ibiberäjininuge iyeta gwidape poto cidi me. Piiyepu tabe ngena ibiberäjininuge, toraca gyene, walya lica, peei name pi teeme abiberäja ne icwetnepeye, piyepu Yeesu Keriso cama yepä inajipi.

²⁸ Yoo cäme binamewale, weene ätrunga cabu ca lui cäme bägrä gemi, gone Yeesu Keriso ne yaabmaluye! Piba tabe liba cire taboclomtepi, mine wälu lica cirege äbita teeme tääpume, piyepu teeme acnenuta bimü liba cirege, mine piba nuuja singi lica ajiri name pi ämletnerame teeme bau ca.

²⁹ Weene umle gemi, egä Keriso lui conocäco biname gyene. Piba weene cuta miiji umle, egä iyeta lui cina conocäco mule bine jaawenimusi, teepi lui Acejiyame me bägräwale gemi.

3

Acejiyame me Bāgrāwale

¹ Weene jepāneye, Aceji Babe te lipu babo singi ituge mime tāāpume! Teeme singi epu baborage gyene egā mibibine niyinininusi Acejiyame me bāgrā ca, siige mine peei gemi. Gawecewe muleyame biname cina umle lica gemi mine, ingle teepi umle lica gemi Acejiyame.

² Cāme muijirage binamewale, page mine Acejiyame me bāgrā gemi, cuta camu gyene cāngena pajecu me ābita, egā mine lipu ābitame. Yepā mine umle gemi, egā Keriso te liba cire taboclomtepi, mine teeme pana cire läbitipago, ingle mine teebine cire jāāpānepesi epurage tabe liiyepu.

³ Siige laati te apu ngene atwana singi yaacituge Yeesu cabu me, tabe teeme ngenecu jugi cāco me jaawenuge, Yeesu me ngenecu lipu jugi cāco gyene.

⁴ Laati te liba niya mule jaawenuge, tabe Acejiyame me cotre ne jaatropangtuge, ingle niya mule lui cotre ibi mule lica gyene.

⁵ Weene umle gemi, egā Yeesu tāduji niya mule bine āyebļengājame, cuta weene umle gemi, egā teeme cabu nuuja niya lica gyene.

⁶ Peei name pi laati te liba Keriso cabu yaanajuge, tabe niya mule bine lica jaawenimuge. Yepā laati te niya mule bine jaawenimuge, tabe lica ituge teebine pāpāna cuta umle lica ituge tabe.

⁷ Cāme binamewale, ātrunga cabu ca lui cāme bāgrā gemi, weene gone nuuja ne ire taatu jaacituye weebibine angletnejame. Laati te liba conocāco mule bine jaawenimuge, tabe lui conocāco biname gyene Yeesu Keriso liiyepu.

⁸ Yepā lui biname te niya mule bine jaawenanemuge, teeme ingle Satani bau ca gyene, ingle Satani lui niya mule wawenecayame gyene agedna cabu ca. Acejiyame me Bāgrā te naace tāāpume tāduji Satani me kaakesea ne aglime.

⁹ Laasi nyene Acejiyame me bāgrā, tabe niya mule bine lica jaawenanemuge, ingle Acejiyame me ireclota pisi nyene teeme cabu. Tabe ābļicāco niya mule wawenena, ingle Acejiyame teeme Babe gyene.

¹⁰ Mine eei cabu ca umle läbitininago, egā Acejiyame me bāgrā lui gemi, Satani me bāgrā lui gemi, ingle laati te liba conocāco mule bine lica jaawenanemuge piyepu ātrunga biname bime tāāpume singi lica yaanajuge, tabe lui Acejiyame me bāgrā lica gyene.

Weene Muiji Weemāmu Singi Ābitanipeye

¹¹ Weene lui mene itecijanipi, weene liba läbitipeye ātrunga biname me, age sena pui mene: mine muiji mimāmu singi lenaja.

¹² Mine gone Adamu me bāgrā Kaino pana ābita, Satani te lui ne ecanuji, siige tabe teeme igane ne egluji. Tabe eei name pi igane ne egluji, ingle tabe conocono mule jaawenemuge, igane te conocāco mule jaawenemuge.

¹³ Cāme ātrunga binamewale, weene cālu te gone jitinuge, liba gawecewe muleyame biname cina jimugitninusi weebibine.

¹⁴ Ingle naace popi mine singi gemi ātrunga biname bime tāāpume, peei name pi mine umle gemi, egā mine budre gaabe ne itu yaabmalepesi, ireclota gaabe ne itu yaacatepesi. Laati te liba singi lica ātrunga biname bime tāāpume, tabe budre gaabe cabu camu yaanajuge.

¹⁵ Laati te liba jāāmugetnuge nuuja ātrunga biname ne, tabe teeme budre me wawena biname gyene. Piyepu weene umle gemi, egā lui te nuuja biname ne budre me jaawenuge, teeme cabu iyeteta ireclota lica gyene.

¹⁶ Yeesu lipu teeme ireclota ne iyemaluji budre tāāpume cimiji pi, mine peei cabu ca umle, egā toraca singi lipu gyene. Mine muiji cuta teeme pana mime ireclota āyemela pota ātrunga biname bime tāāpume.

¹⁷ Liba ātrunga biname yepā me iyeta gwidape piti nemi, siige tabe jāāpānuge, teeme ceege me gwidape lica gyene, yepā tabe lica yāācāruge, tabe piba ābļicāco iicana, egā Acejiyame me singi pisi nyene teeme cabu.

¹⁸ Cāme binamewale, ātrunga cabu lui cāme bāgrā gemi, mine gone mime singi bine aboclomta biname bime bau me mene taatu ca, yepā mine muiji teebibine owecu waweneca.

Acejiyame me Bāgrā Wālu Lica Gemi

¹⁹ Liba mime singi te lawabudnituge pota ātrunga biname bine ātityera ca, mine piba umle gemi egā mine toraca mule cabu ninajininuge, siige mine wālu lica cirege ābita Acejiyame me opo gaabe je.

²⁰ Mine liba ngene ca laglinago, egā mime niya mule piti nemi, mine umle gemi egā Acejiyame baborage gyene mime ngene ca agli cabu ca, tabe umle iyeta gwidape.

²¹ Cäme miijirage binamewale, mine liba lica ngene ca laglinago, egä mime niya mule piti nemi, piba mine wälu lica gemi Acejiyame me opo gaabe je aclajutame.

²² Piijepu mine teebine liba ngena täapume yäätinärusi, mine jääpänuusi, ingle mine teeme mene jäärungusi piijepu jaawenusi, teebine lui te ngenecu miiji me jaawenuge.

²³ Age sena Acejiyame mibibine lui täapume nijananinuge: mine miiji ätrunga acita teeme Bägrä Yeesu Keriso cabu me piijepu mine miiji mimemime singi lenaja, Yeesu lipu mibibine ituge jaji.

²⁴ Laati te liba Acejiyame me mene jäärunguge piijepu yääcwetnuge, tabe Acejiyame cabu pisi nyene, Acejiyame cuta teeme cabu pisi nyene. Mine eei cabu ca umle gemi, egä Acejiyame mine cama pisi nyene, ingle tabe lui Aceji Seemo ne ituge acita mime cabu lenajame.

4

Toraca piijepu Walya Seemo

¹ Cäme miijirage binamewale, weene gone jäärungimuye iyeta eei bine, lui cina jiiicusi, egä Aceji Seemo pisi nyene teeme cabu. Yepä weene teebibine epicetnäremepeye umle äbitame, egä lui seemo te enajenige teeme cabu, nää Acejiyame bau ca gyene coo lica. Weene apu wawename, ingle bucurage biname cina itu yaatengläjepesi, lui cina jiiicusi, egä teepi Acejiyame me tagepogogo mene jiiicemusi, yepä teepi walya gemi.

² Weene ai cabu ca opo yaawatnuye Acejiyame me Seemo ne, egä laati te liba jiiicuge, egä Yeesu Keriso lui biname me äbituji, pui biname cabu lui Seemo tabe Acejiyame bau ca gyene.

³ Yepä laati te pepu lica jiiicuge Yeesu poto cidi me, teeme cabu lui seemo te enajenige, tabe Acejiyame bau ca lica gyene, yepä tabe Keriso me Äciseräjayame me seemo gyene. Weene ituge ätecija, egä pui seemo te cirege otni, siige tabe page pisi nyene ai gawecewe cabu.

⁴ Yepä cäme miijirage binamewale, ätrunga cabu ca lui cäme bägrä gemi, weene Acejiyame memi, siige weene ituge apremela lui cina jiiicusi, egä teepi Acejiyame me tagepogogo mene jiiicemusi, yepä teepi walya gemi. Weene teebibine naace name pi ituge apremela, ingle weeme cabu lui Seemo tabe mage kokreyame gyene, yepä ai gawecewe mule cabu lenajayame biname bime cabu lui seemo, teeme toraca kokre lica gyene.

⁵ Teepi ai gawecewe memi, peei name pi teepi ngena jiiicemimusi, ai gawecewe cabu ca gemi, siige gawecewe muleyame biname cina jäätecijemusi.

⁶ Yepä mine Acejiyame memi. Laasi nyene umle Acejiyame, tabe mime mene yäätecijuge. Yepä laati te liba Acejiyame me biname lica gyene, tabe mime mene lica yäätecijuge. Peei cabu ca mine umle läbitininago, egä laasi nyene toraca Seemo cama, laasi nyene walya seemo cama.

Acejiyame Lui Ingle Gyene Toraca Singi täapume

⁷ Cäme miijirage binamewale, mine miiji mimämu singi lenaja, ingle Acejiyame lui ingle gyene singi täapume. Laati te biname bime täapume singi yaanajuge, tabe lui Acejiyame me bägrä gyene piijepu tabe umle gyene Acejiyame.

⁸ Laati te liba singi lica gyene biname bime täapume, tabe Acejiyame umle cäco, ingle Acejiyame lui ingle gyene singi täapume.

⁹ Acejiyame te teeme singi ne seboclomtuji mime täapume, tabe lipu teeme japurage Bägrä ne tityepuji ai gawecewe cabu me naace täapume mine ireclota ne teeme cabu ca päpäname.

¹⁰ Singi lui epu lica gyene, egä mine te Acejiyame täapume singi ituge, yepä tabe te niinäce singi itu niglinuji mibibine, siige teeme Bägrä ne tityepuji mime niya mule daremu täapume.

¹¹ Cäme miijirage binamewale, Acejiyame te liba pepu babo singi ituge mime täapume, mine cuta miiji mimemime singi lenaja.

¹² Nuuja biname te lica ituge Acejiyame ne päpäna, yepä mine liba mimämu singi ninajinuge, tabe pisi nyene mine cama, siige teeme singi te babo läbituge mime cabu.

¹³ Mine naace name pi umle läbitininago, egä tabe pisi nyene mime cabu mine teeme cabu, ingle tabe teeme Seemo itu nicäripi mibibine.

¹⁴ Babe te tityepuji teeme Bägrä ne ai gawecewe cabu me biname bine niya cabu ca kälyä wawename. Mine ituge ai mule ne päpäna siige poto biname bine jejananemenisi ai poto cidi me.

¹⁵ Piijepu cuta laati te liba jaaitnuge, egä Yeesu lui Acejiyame me Bägrä gyene, Acejiyame pisi nyene teeme cabu piijepu tabe lui Acejiyame cabu pisi nyene.

¹⁶ Mine umle gemi Acejiyame lipu singi gyene mime täápume, piijepu mine ituge ätrunga acita teeme peei singi cabu me.

Acejiyame lui ingle gyene singi täápume. Lui te singi yaanajuge Acejiyame piijepu ätrunga biname bime täápume, tabe Acejiyame cabu pisi nyene piijepu Acejiyame teeme cabu pisi nyene.

¹⁷ Singi te naace täápume miiji babo äbitame mime cabu, egä mine piba wälu lica cirege äbita atrana bimu cabu, ingle mime ireclota ai gawecewe cabu epu pana Keriso me liijepu.

¹⁸ Singi luma, wälu lica birige puma, ingle babo singi te wälu ne yääyecräjuge. Siige lui biname cabu singi te cäro camuge babo äbita, tabe wälu birige, ingle niija mule daremu awagrija luma, wälu cuta puma.

¹⁹ Mime singi pisi nyene Acejiyame täápume piijepu ätrunga biname bime täápume, ingle Acejiyame te niinäce singi ituge äbita mime täápume.

²⁰ Laati te liba jicuge, egä tabe singi Acejiyame täápume, yepä nuuja ätrunga biname ne jäämugetnuge, tabe walya biname birige. Laati te liba singi lica nuuja ätrunga biname täápume, tabe lui ne jääpänuge, tabe äblicäco cuta Acejiyame täápume singi, tabe lui ne lica ituge päpäna.

²¹ Pui name pi Keriso te mibibine ituge jaji egä, laati te Acejiyame täápume singi birige, tabe cuta miiji ätrunga biname bime täápume singi.

5

Ätrunga te Gawecewe Mule bine Yäätucäremuge

¹ Laati te liba jäätrunguge, egä Yeesu lui Keriso sine, tabe Acejiyame me bägrä gyene. Piijepu lui biname te singi yaanajuge babe täápume, tabe cuta singi yaanajuge teeme bägrä täápume.

² Mine liba Acejiyame täápume singi, piijepu jaawenanemusi tabe ngena täápume ituge mibibine jaji, piba mine umle gemi, egä mine cuta singi teeme bägräwale bime täápume.

³ Mine liba jaawenanemusi Acejiyame ngena täápume nijaninunge, peei te jaawabud-nituge, egä mime singi pisi nyene teeme täápume. Acejiyame ngena täápume nijaninunge, mäpu lica gyene awename,

⁴ ingle laasi nyene teeme bägrä, tabe ibibi gyene ai gawecewe mule bine apremelame. PEEI LUI MIME ÄTRUNGA LUI TE GAWECEWE MULE BINE YAAPREMALEMUGE.

⁵ Eei taatu biname te gawecewe mule bine yaapremalemuge, lui te jäätrunguge, egä Yeesu lui Acejiyame me Bägrä gyene.

Acejiyame te Yeesu Keriso ne Jeitnäjenige

⁶ Yeesu Keriso täduji ai gawecewe cabu me ai neeneni cewecu cama: teebine niije ca ituge äciseja piijepu teeme uudi te ituge apira. Teebine niije taatu ca lica ituge äciseja, yepä teeme uudi te cuta tapiruji. Aceji Seemo te ai neeneni cewecu bine jaaitnäjenige, siige toraca gegi, ingle tabe lui toraca mene jicinenige.

⁷ Yoo siige, teepi nesae gämi lui cina Yeesu ne jeitnäjenisi:

⁸ yepä lui Aceji Seemo, yepä lui niije, yepä lui uudi. Teeme aitneja mene lui yepä gyene.

⁹ Mine biname bime aitneja ne yaacatusi, yepä Acejiyame me aitneja lui baborage gyene, siige ai lui Acejiyame me aitneja gyene, tabe lui ituge jaji teeme Bägrä poto cidi me.

¹⁰ Laati te ätrunga yaacituge Acejiyame me Bägrä cabu me, Acejiyame pui biname me ngenecu cabu teeme Bägrä ne jeitnäjenige. Yepä laati te ätrunga lica gyene Acejiyame täápume, tabe teebine walya me jaawenuge, ingle tabe lica jäätrunguge, Acejiyame lipu teeme Bägrä ne ituge aitneja.

¹¹ Pui aitneja lui eei gyene, egä Acejiyame te iyeteta ireclota ituge ceera mibibine, mine lui ireclota ne jepäninisi teeme Bägrä cabu ca.

¹² Laati te liba teeme Bägrä cama yepä birige, tabe ireclota cama yaanajuge. Yepä laati te liba yepä lica birige teeme Bägrä cama, tabe lica ireclota cama yaanajuge.

Mene Ngälu cäco Ireclota poto cidi me

¹³ Cane ai ne naace täápume bii byoogärine weeme bau me, lui cina ätrunga ne yaacituge Acejiyame me Bägrä me ngii cabu, egä weene umle äbitame egä weene ngälu cäco ireclota pisi nyene.

¹⁴ Mine wälu cäco gemi Acejiyame me opo gaabe je, ingle mine umle gemi, egä tabe niticijinuge mine ngena täápume yaawejanusu teeme singi ibi.

¹⁵ Siige mine liba umle gemi, egä Acejiyame te niticijinuge mine ngena täápume yaawejanusu, mine cuta piba umle gemi, egä tabe nicärininuge, mine ngena täápume ituge awejena teebine.

¹⁶ Laati te liba jääpänuge, egä nuuja ätrunga biname te niija mule jaawenuge, lui mule te teebine budre me lica yaacanuge, tabe miiji pui biname täápume irecu ätumuta, siige

Acejiyame te teebine ireclota gaabe cabu me birige awecnista. Ai lui eei biname bime täápume lui bime niiya mule cina teebibine lica yaawadimusi budre me. Yepä piti nemi niiya mule lui cina biname ne yaacanusu budre me, cane peei täápume lica jiićenine irecu ätumutame.

¹⁷ Iyeta conocono mule lui niiya mule gemi, yepä iyeta niiya mule cina lica biname ne yaacanusu budre me.

¹⁸ Mine umle gemi, egä Acejiyame me bägräwale cina niiya mule lica jaawenanemusi, inge Acejiyame me Bägrä te teebibine jäälyenganemuge, siige Satani te äblicäco oomlana.

¹⁹ Mine umle gemi egä mine Acejiyame memi, piiyepu mine umle gemi egä Satani te iyeta ai gawecewe ne ecanenige.

²⁰ Cuta mine umle gemi, egä Acejiyame me Bägrä te ituge otni mibibine umle ceerame piba mine umle äbitame tabe, lui sine toracarage Acejiyame. Mine toracarage Acejiyame cabu ninajininige, piiyepu mine ninajininige teeme Bägrä Yeesu Keriso cabu. Tabe lui toraca Acejiyame gyene piiyepu ngälu cäco ireclota gyene.

²¹ Cäme binamewale, ätrunga cabu ca lui cäme bägrä gemi, weene cängena weemämu ire, egä uuje cina gone Acejiyame me puupu ne yaacatusi.

Mene ngälu peese.

YOANE ME NEENENI MANU LETA

Sebore Mene Oogära Biname bau ca

¹ Cane niinäce gaabe ätrunga biname te yoogärenine weeme ätrunga ingle cabu me, Acejiyame te lui bine itu jijäcripi piyepu lui bime bau me căme singi baborage gyene. Lica cane taatu singi gäne weeme täápume, yepä iyeta piyepu lui cina umle gemi toraca mene.

² Cine singi gemi weeme täápume, ingle toraca mene pisi nyene mime cabu piyepu iyeteta cire yaanajepi.

³ Acejiyame mime Babe piyepu teeme Bägrä Yeesu Keriso, teeme miiji te mime cabu lenajame, teepi mibibine owecu waweneme piyepu poode ceerame. Mine miiji toraca ätrunga piyepu singi cama teeme miiji ne, owecu ne, piyepu poode ne waadename.

Toraca Mule piyepu Owecu Mule

⁴ Cane baborage gege ge päpäname, egä weeme poto ätrunga biname cina inajininige toraca mene ibi, mime Babe te lipu ituge mibibine jaji.

⁵ Yoo, căme ngenecurage ätrunga binamewale, cane weebibine jijenininine, egä mine miiji mimemime singi lenaja. Cane ai lui kirece mene ne lica yoogärinine weeme bau me, yepä ai lui pui sasa mene gyene, mine lui itu nitecijanipi, mine liba ätrunga biname me läbitipago.

⁶ Singi lui eei gyene, egä mine jaawenimusi Acejiyame ngena täápume nijananinuge. Weene liba läbitipeye ätrunga biname me, pui padare cabu ca weebibine ituge jajanena, siige weene itu itecijanipi, egä weene miiji singi lenaja nuuja biname bime täápume.

⁷ Siige bucurage angletneja biname cina itu yaatengläjepesi iyeta poto ta. Teepi eei gemi, lui cina jicenis, egä Yeesu Keriso binamerage me lica äbituji. Apu lui cina jicenis, babo angletneja biname gemi piyepu Keriso me äciseräja biname gemi.

⁸ Weene miiji cängena ire atwipeye teeme täápume, piba cime kaakesea te papa me lica läbituge, yepä weene cime kaakesea cabu ca camle-camle daremu ne cirege päpäna.

⁹ Laati te liba lica yaanajuge Keriso me abiberäja cabu, yepä nuuja gaabe ne yaacatuge, teeme Acejiyame lica gyene. Yepä laati te liba cängena yaanajuge Keriso me abiberäja cabu, teeme piti negi Babe piyepu Bägrä.

¹⁰ Laati te liba läduge weeme bau me lica ai abiberäja cama, gone jaawabluye, weeme mete me gone yäasinglantuye.

¹¹ Laati te liba pipu biname ne jaawabluge, tabe lalenglecäjuge teta cama peei niyarage mule waweneme.

Yewo Mene

¹² Căme piti nemi bucurage mene iicaname weeme täápume, yepä cane singi lica gäne peba cabu oogärame, ingle căme ngene atwana singi pisi nyene peyeme otnime. Mine liba opo pa läpänipago, mine piba page jaatranepesi, siige mime gege te piba babo pa läbitepi.

¹³ Ama lui ätrunga ingle te jiwablininige weebibine.

Mene ngälu peese.

YOANE ME NESAE MANU LETA

Sebore Mene

¹ Cane niinäce gaabe ätrunga biname te yoogärenine căme miijirage biname Gayus bau me, cane lui täápume baborage singi.

² Oo, căme miijirage biname Gayus, cane irecu ätumutenine, egä iyeta gwidape miijirage lenajame mäame cabu piyepu mäame tääpe te miijirage lenajame epu pana, mäame seemo te lipu miijirage gyene.

³ Cane baborage gege ge, liba poto ätrunga biname peema cita ca saaclepi, cebine najepesi, maane lipu toraca ngenecu cama joomlenite toraca mene ne piyepu naanajinige peei toraca mene ibi.

⁴ Cane liba näteciuge, egä căme binamewale, lui cina căme täápume epu pana bägrä liyepu, toraca mene ibi icrajinige, cane baborage gege gäne. Nuuja gwidape te lica cebine pepu baborage gege me birige wawena.

Eso Mene Gayus bau me

⁵ Oo, căme miijirage biname, maane toraca ngenecu cama nuuja ätrunga biname bine yäättyeräjimute, ngänu gemi teepi maramara ätrunga ingle cabu ca.

⁶ Teepi te naaitnepesi mäame owecu mule poto cidi me ai ätrunga ingle bau me. Maane miiji mule ne jaawenute, maane liba yäättyeräjimute teepi ngena täápume singi gaabegabe täápume, teepi liba mäame cewe ne saabmalusi. Ai lui baborage gwidape gyene Acejiyame me opo gaabe je.

⁷ Teepi Keriso me kaakesea name pi teeme cewe bine itu saabmalempesi, siige otneninisi. Teepi nuuja gwidape bine lica yaawadimusi ätrunga căco biname bime bau ca,

⁸ peei name pi mime cabu sine teebibine ätityerame, siige piba mine teta cama lalengläcäjininago toraca mene ne acenename.

Mene Diyotrepes piyepu Demetriyus poto cidi me

⁹ Cane puu matikäli leta ne itu yoogärepepe ätrunga biname bime bau me peeyeme, yepä Diyotrepes lui te baborage singi weeme mope biname me lenajame, tabe singi lica căme mene acatame.

¹⁰ Peei name pi cane liba peeyeme pagege otni, cane teeme mule bine page jaaboclomäjemepene weeme opo gaabe je, tabe lipu walya idre yaacenanuge cime poto cidi me cibibine sabe wawename. Tabe ai taatu ne lica jaawenuge, tabe cuta läbwäricuge ätityerame lui ätrunga biname cina otneninisi Keriso me kaakesea gaabe cabu. Cuta peei taatu lica, tabe cuta jibemuge poto ätrunga biname cina teebibine ätityerame, siige lui cina teeme mene lica jäätecijemuge, tabe yääyblengäjimuge ätrunga ingle cabu ca.

¹¹ Căme miijirage biname, maane gone nuuja niyarage mule ne jätütute, yepä miijirage mule bine jitungemepi. Laati te miiji mule bine jaawenimuge, tabe lui Acejiyame me biname gyene. Laati te niya mule bine jaawenimuge, tabe umle lica gyene Acejiyame.

¹² Weene Demetriyus ne itityärepeye, ingle iyeta biname cina teeme poto cidi me jücemusi, egä tabe miijirage muleyame gyene, piyepu tabe iyeta gwidape jaawenimuge toraca mene ibi. Cine cuta peei yepä mene jücenisi, piyepu maane umle gäte, egä cine ngena jücenisi, toraca gyene.

Yewo, Gayus

¹³ Căme bucurage mene piti nemi meebine jajime, yepä cane singi lica gäne peba cabu oogärame.

¹⁴ Pätä căme ngene atwanena singi pisi nyene peeyeme watawata otnime, siige mine liba opo pa pa läpänepago, mine piba pa jaatranepago.

¹⁵ Poode mäame cabu lenajame. Ama lui ätrunga biname cina meebine naawablenisi. Yepäyepä jewabläjemepi mime ätrunga binamewale bine peema.

Mene ngälu peese.

YUUDA ME LETA

¹ Cane sāne Yuuda, Yakobu me igane, Yeesu Keriso me kaakesea bāgrā gāne.

Agesa mene weeme bau me Acejiyame te lui bine ituge asogleca, weene Aceji Babe me singi cabu piyepu Yeesu Keriso me ire atwana cabu inajininuge.

² Acejiyame me baborage owecu, poode, piyepu singi weeme cabu lenajame.

Ai Mene Lui Walya Abiberāja Biname bime poto cidi me

³ Cāme ngenecurage binamewale, cane liga weeme bau oogārame tābitumene eei poto cidi me egā Keriso lipu mibibine niya cabu ca nisechrāninige, piba nuuja mule te tādumi, siige cane miiji peei tāāpume oogāra niināce. Cane singi gāne weebibine jajime aclajutame kokre cama. Gone mara ātrunga ne yaacatuwe pui cabu ca Acejiyame lui ātrunga ituge ceera mine lui teeme biname gemi. Peei ātrunga lui yepā gyene iyeteta.

⁴ Yoo, poto biname lui Acejiyame me biname lica gemi, teepi āmletnāreji pana mime ātrunga inge maramara cabu ituge ābācna. Teepi angletneja mene jiicemusi egā Acejiyame me owecu mule name pi teepi conocāco gaabe cabu ca āsecrāreji gemi teeme conocono singisingi mule wawenecame. Peei conocono gyene. Sasa cabu ca Acejiyame me Oogārāneji Mene te jiicenige egā pui cina māpu daremu ne cirege pāpāna, inge teepi mime Yageyame Yeesu Keriso me waadena ne jāāgyusi.

⁵ Yoo, Acejiyame me mule daremu awecnista poto cidi me, weene umle ituge, yepā cane singi weene cāāri ngene jotwa-nanineye mime Yageyame te sasa Israela biname bine lipu isecrāremuji Aikupito cabu ca, piba ingwe ca poto bine iyeblenge-muji lui cina lica ge ātrunga cama.

⁶ Pui niya mename seemo poto cidi me cuta ngene jotwananineye. Teepi lui cina teeme ire atwi kaakesea cabu cāngena lica icrajuji, yepā teeme toraca puupu ne sebmalujiisi cabu je. Teepi iyeteta oomleji yaacrajuge krokeciye puupu cabu ngālu teeme atrana padare cerācerāgāābu bimu cabu.

⁷ Weene cuta Sodoma Gomora poto cidi me ngene jotwananineye piyepu poto matimati cewe pui neeneni cewe mameta. Iyeta pui cewe cabu biname cina yepā pana niya mule tewenenājemumesi pui niya mename seemo cina liyepu. Teepi sargi mule jaawenemusi piyepu rooriye cina teemeteme lawadaninusi. Teepi teeme daremu ne jāāpānusi muye puupu cabu lenajame ngālu cāco. Mine peei cabu ca umle gemi egā pui mule tāāpume māpu daremu pisi nyene.

⁸ Yepā pana mule cabu pui walya abiberāja biname cina niya wama yaapicetnerājimusi, piba teeme tāāpe sabe jaawenemusi jugijugi mule ca. Teepi Acejiyame me cotre bine jāāgyemusi, piyepu niya mene jiicemusi jamyacu apaclyera cama mename seemo poto cidi me.

⁹ Yoo, cuta Maikol, mope mename seemo tabe lica pepu supra cāco mene jiicemuge. Ujarage, tabe liba Satani cama mene abajujāsi Moose me budre kaake poto cidi me Maikol lica claabe mene Satani ne jejuji, yepā daremu mene jejuji egā, “Acejiyame te meebine māpu daremu pa nāācārepi!” Peei mene taatu.

¹⁰ Yepā, ai walya abiberāja biname cina seemo pana gwidape bine yāāciserājemusi teepi lui umle lica gemi. Yepā, gwidape teepi lui poto cidi me umle gemi, glunubora girigale gwidape lipu umle, peei cina teebibine yaawademusi teeme budre tāāpume.

¹¹ Babo māpurage gyene teeme daremu. Kaino ne teepi ingwe yāācwusi. Balam pana teepi singi rarekaake pāpāna niya mule waweneca ca. Teepi Acejiyame me waadena ne jāāgyusi epu pana sasa biname Koorā te Moose me waadena ne lipu itu jigyuji. Teepi Koorā pana māpu daremu pa jāāpānepesi niya puupu cabu me āyēblengame.

¹² Epu pana wāmyā cina lipu cābletāāpe me miiji opo ne sabe jaawenusi, pui walya abiberāja biname cina weeme abasecretna piyepu deedei ābita sabe jaawenemusi. Teepi ajiri lica gemi bucurage deedei bine teemāmu ātrungecājame. Teepi epu pana gemi carbe liiyepu buuwe te lui bine yaawadanemuge, yepā ngupe cāco watninusi. Teepi epu pana uli gije liiyepu lui cina kuu cāco birige teeme yāyi padare cabu, peei name pi braju cama birige āpācuta, siige kuu cāco piyepu budre.

¹³ Epu pana weene niyarage baawe ne cudecewe ca liiyepu opo awatna, tabe giri liba tātnanuge, pepu pana weene pui niya biname bine opo yaawatne-muye teeme ajiri mule cabu ca. Teepi epu pana wale liiyepu lui cina dume cabu waatnetnājininusi, weene āblicāco weeme gaabe ne teeme bau ca acata. Yoo, Acejiyame te krokeciyerage puupu ne ituge amacetnāja puma teepi iyeteta lenajame.

¹⁴ Yoo, Enoka lui Adamu me siks manu kaakesaare ge, ujarage tabe mene tiicuji pepu biname bime poto cidi me egä, "Mime Yageyame te cire tädepi teeme bucurage mename seemo cama

¹⁵ iyeta biname bine atraname, lui cina lica gemi Acejiyame me binamewale, teebibine awabudnäjame iyeta teeme niyaniya mule cabu ca, piyepu iyeta teeme babo niyarage mene cabu ca Acejiyame poto cidi me, cuta peei name pi teebibine cirege atraname egä babo niyarage gemi."

¹⁶ Yoo, pui biname cina ämugetna mule cama gemi, jäje nuuja biname cama labajininusi. Teeme niya singi cina teebibine yaawadanemusi. Supra cäco teepi babo tage ca mene jücemusi piyepu teemämu lawepyeräjininusi. Teepi cuta umle gemi nuuja biname bine papa awepyeräja teeme singi pepu päpäname.

Ai Bääirmi Mene Lui Cängena Lenaja poto cidi me

¹⁷ Yoo, cäme binamewale, gone ngene jitrimalinuge pui mene mime Yageyame Yeesu Keriso me ätyepäneji biname cina lui mene weebibine itu jijinanipesi ingwe ca padare poto cidi me.

¹⁸ Teepi apu jijananipesi egä, "Ceräcerägäabu padare cabu, puma cirege biname lui cina weeme miiji mule bine bääclename me jaawenemusi, cuta teeme niya singi cina teebibine ewa-danenemisi."

¹⁹ Pepu mule biname cina biname bine maramara me jaawenemusi, ingle teeme singisingi cina teebibine yaawadanemusi, piyepu Aceji Seemo lica gyene ten cama.

²⁰ Yepä, cäme binamewale, weeme conocäco ätrunga pisi nyene; weeme ireclota peei cabu yaanajuge, piyepu weene Aceji Seemo me kokre ca Acejiyame ne yaawejanuye.

²¹ Weene Acejiyame me singi cabu cängenarage inajipi, mime Yageyame Yeesu Keriso me padare ne jewagrijeje tabe owecu cama weebibine iyeteta ireclota cabu me waadename.

²² Weene owecu cama yäätityäremuye teebibine lui bime ätru-nga neenenineneni pana gemi.

²³ Poto biname lui mameta gemi muye puupu me otni, teebibine itityäremeye Acejiyame me gaabe cabu otnime. Weene nuuja poto biname bine owecu cama yäätityäremuye teepi ireclota gaabe päpäname, yepä cängena ire, gone teeme niya mule ne yaacatuje. Teeme jugijugi cäbletääpe piyepu singisingi mule bine iyeta jäägyemuye.

Awepyeräja Acejiyame tääpume

²⁴ Acejiyame tabe ibibi gyene weebibine gaabe cabu cängena waadename atrama cäco, weene piba teeme jamyacu apacyera cabu teeme opo gaabe cirege atyara conocäco piyepu gege cama.

²⁵ Tabe taatu Acejiyame gyene, lui te mibibine niya cabu ca isecräremuji, mime Yageyame Yeesu Keriso me kaakesea name pi. Yoo, jamyacu apacyera, awepyeräja, kokre, piyepu conocäco lui teemi nemi agedna cabu ca, page, piyepu iyeteta ngälu cäco. Pepu yaanajeje!

Cane ngii Yuuda, siige cäme mene.

APOKALUPO

Ai Peba Ngena Tääpu Myene

¹ Ai mene lui eei gwidape poto cidi me Acejiyame lui bine eboclomäjimuji Yeesu Keriso bau me. Tabe naace name pi eboclomäjimuji, egä Keriso te piba teeme kaakesea bägrä bime bau me aboclomäjame ngena cina mameta gemi äpletnera. Siige Keriso te tityepuji teeme mename seemo ne ai gwidape bine aboclomäjame teeme kaakesea bägrä Yoane bau me.

² Yoane ituge jajanena iyeta, tabe lui ituge päpänenä. Pui lui Acejiyame ngena ituge iicema piyepu Yeesu Keriso ngena ituge aitneja.

³ Gege gyene laati te yaacnuge ai peba ne ciige mule poto cidi me; cuta gege gemi laati bi yäätecijemuge, siige yääcwetnusi, ingle padare mameta gyene ai gwidape cina äpletnerame.

Yoane Jewablenemige Seben Ätrunga Ingle bine

⁴ Cane Yoane ai mene ne yoogärenine seben ätrunga ingle cabu me Asiya probins ngalebora. Miiji piyepu poode weeme bau me Acejiyame bau ca, lui tage niinäce gaabe je, lui sine page, cuta lui te iyeteta cire yaanajepi, piyepu seben seemo bime bau ca, teeme babo adnata puupu opo gaabe je lui cina icrajenemige;

⁵ cuta piyepu Yeesu Keriso bau ca, lui te cängenarage teitnejanumi toraca mene ne, lui te niinäce gaabe biname gyene budre cabu ca arpinentame, piyepu lui te niinäce gaabe biname gyene iyeta gawe maramara mope biname bime tääpume ai gawecewe cabu ta.

Yeesu Keriso singi gyene mime tääpume, tabe teeme uudi ca mibibine kälyä ituge wawena mime niya mule cabu ca.

⁶ Tabe niweninujuji iiwäreja biname me lenajame, lui cina ten cama pagege biname bine waadena, piyepu Acejiyame teeme Babe tääpume pagege kaakesea wawena. Tabe baborage apacyera piyepu kokre cama iyeteta lenajame. Ai mene toraca gyene.

⁷ Iteciinege! Tabe carbe cabu cire tädepi! Iyeta biname cina cirege teebine päpäna, cuta eei cina lui teebine jigadujisi kalaku ca. Iyeta biname cina ele cire yaangenetnemepi teeme tääpume. Ai lui toraca mene gyene.

⁸ Yageyame, babo kokre Acejiyame, lui sine page, lui tage niinäce gaabe je, cuta cire yaanajepi iyeteta, tabe apu jiceniige egä, “Nuuja gwidape camu ge, cane lui uja ge; cuta liba cire lapiripesi, cane cire nanajepi.”

Keriso Aboclomtige Yoane bau me

⁹ Cane Yoane weene cama yepä ätrunga biname gäne. Mine iyeta Keriso me binamewale gemi. Cane epu mäpu cabu nanajiniige weene liiyepu. Iyeta mibibine Yeesu Keriso te niwadiniige, cuta mine iyeta miiji mäpu cabu bojäcu lenaja. Ingle cane Acejiyame me Mene ne secanenäjumene, biname bine tejanenäjumene Yeesu poto cidi me, peei name pi noomlujisi, nacitujisi curä cabu me ngii Patmos.

¹⁰ Yageyame me bimu* cabu Aceji Seemo te puga nacenanuji, siige cane näteciuji cäme kaake poto cidi ca baborage tagepogogo, moole ala liiyepu.

¹¹ Tabe najuji egä, “Maane ngena bine jepänanenemite, peba cabu yoogäremepi, jityepemepi ätrunga ingle bime cabu me seben maramara cewe cabu me, Epeso me, Mirina me, Pergamo me, Tiyatira me, Sardi me, Piladelpiya me, Laodikea me.”

¹² Cane atatrungtujine, egä laati te mene najaniniige, siige cane jepänimujine seben lampa dade bine, lui gol ca wawenäneji ge.

¹³ Pui gome cane jepänujine lui te biname pana ge. Tabe lecaleca cäbletääpe asigräneji ge, gol seea ca amlmalteji ge dare gome.

¹⁴ Teeme mope piyepu edingäli bulu taatu ge, epu pana egimope carbe coo sääwiye me ngäli liiyepu. Teeme irecu cina uliobo pana ayenujäsi.

¹⁵ Teeme ernge toplacmujäsi ayiayi braasi ayana liiyepu. Teeme tagepogogo epu pana ge, niyye te lipu podo cabu ca täcwäjiuce babo ala cama.

¹⁶ Teeme camu poto ime cabu puga ge seben wale. Tage cabu ca cubuturikä te tasatuji, neeneni poto äsweji ge, girirage. Teeme opo lui epu pana, bimu apacyera te lipu baborage yaanajuge bimu duusa ge.

¹⁷ Cane liba jepänujine teebine, teeme ernge gawe me natramuji budre pana. Tabe puma cita ca teeme camu poto ime ne secituji cäme papa cabu, najuji egä, “Wälu gone! Cane niinäcerage gäne, cuta ceräcerägääburage gäne.

* **1:10:** Yageyame me bimu: Ama Yageyame me bimu lui Sande bimu gyene.

¹⁸ Cane ireclotayame gäne. Cane budre äbitujine, cuta arpinantujine, siige cane iyeteta, iyeteta gäne. Cane budre ne ituge apremela piipepu cane te joomlenine aadiri täápume kii ne.

¹⁹ Pei name pi maane yoogäremepi, maane lui gwidape bine jepänenemite page, cuta lui cina ingwe ca cire läbitipesi.

²⁰ Cane naaboclomtenine, căme ime cabu lui seben wale ngeno memi, cuta seben gol ca wawenäneji lampa dade ngeno memi. Seben wale lui seben ätrunga ingle bime seben mename seemo gemi, piipepu seben lampa dade lui pui seben ätrunga ingle gemi.”

2

Mene Epeso Ätrunga Ingle bau me

¹ “Yoogärepi Epeso ätrunga ingle me mename seemo bau me egä,

‘Lui te joomlemenige seben wale bine camu poto ime ca piipepu lui te otnenige seben gol ca wawenäneji lampa dade gome, tabe apu jiičenige egä:

² Cane umle gäne iyeta weeme poto cidi me. Cane umle gäne weene lipu kokre cama kaakesea itu jaawenemepeye, cuta weene lipu bojäcu ituge lenaja mäpu cabu. Cane umle gäne, egä weene ire taatu lica jaacranimuye nüya mule biname bine; cuta weene itu yaapicetnäremepeye lui cina jiiçusi egä teepi Keriso me ätyepäneji biname gemi, yepä teepi lica. Weene ituge päpäna, egä teepi walya biname gemi.

³ Weene bojäcu inajininige mäpu cabu; weene bucurage mäpu bine itu jääpänamepeye căme name pi, yepä weene lica luucratnipeye.

⁴ Yepä age sena cane lui täápume singi lica, egä weene lipu niinäce singi căme täápume, weene pipu singi ne ituge abmala.

⁵ Weene ngene jotwipeye, egä niinäce weene lipu ituge lenaja, siige tatatrongäripeye, jewenepeye weene niinäce lipu ituge wawena. Weene liba atatrongära căco, cane ädenine, iyebllingtenine weeme lampa dade ne teeme puupu cabu ca.

⁶ Yepä weeme pisi nyene cane lui mule täápume singi: weene jäägyemuye Nikolayame biname* bime mule bine, cane lipu jäägyemune.

⁷ Weeme liba tablame piti nemi äteciçjame, iteciçjinege, Aceji Seemo te ngena jejenenemige ätrunga maramara ingle bine. Laati te cire yuutrutepi, cane cire jaajepene tabe kuu loolo me ireclota uli cabu ca, Acejiçjame me calwacupi cabu lui te uutenige.’”

Mene Mirina Ätrunga Ingle bau me

⁸ “Yoogärepi Mirina ätrunga ingle me mename seemo bau me egä,

‘Lui te niinäcerage gyene, cuta ceräcerägääburage gyene, lui te budre äbituji, cuta arpinantuji, tabe te jiičenige egä:

⁹ Cane umle gäne weeme mäpu; cane umle gäne egä weene gwidape căco gemi, yepä toraca weene dogwe biname gemi. Cane umle gäne lipu niyaniya mene jiiçemusi weeme poto cidi me, lui cina lainininusi Israela biname ca, yepä teepi lica. Teepi Satani me ingle biname gemi.

¹⁰ Weene wälu gone läbitininuye, weene lui mäpu ne mameta gemi päpäna. Iteciçjinege! Satani te singi gyene weeme poto bine krokeciye mete cabu me acraname weebibine apicetnärame. Weene pagepe pei mäpu cabu ten bimü cama lenaja. Ngänu gyene, teepi budre me piglecipesi, yepä weene gone nabmaluye cebine, cane piba iyeteta ireclota cire icäripene.

¹¹ Weeme liba tablame piti nemi äteciçjame, weene iteciçjinege, Aceji Seemo te ngena jejenenemige ätrunga maramara ingle bine. Laati te cire yuutrutepi, teebine neeneni me budre† te lica sabe cire jaawenepi.’”

Mene Pergamo Ätrunga Ingle bau me

¹² “Yoogärepi Pergamo ätrunga ingle me mename seemo bau me egä,

‘Lui me cubuturikä pisi nyene, neeneni poto äsweji ge, tabe jiičenige egä:

¹³ Cane umle gäne egä weene luma inajininige, Satani te puma biname bine ewadene-mige, yepä weene toraca gemi căme täápume. Antipa lui te toraca naitnäjuji cebine, teebine liba budre me eglujisi puma Satani te luma enajenige, cuta pui padare cabu weene ätrunga ne lica ebmalujije.

¹⁴ Yepä weeme piti nemi nesae căme singi căco mule. Weeme poto cina Balam me abiberäja ne ingwe icwetniniye. Tabe peese nyene, lui te jejuji Balaki ne tabe Israela

* **2:6:** Nikolayame biname: Nikolayame biname lui eei gemi lui cina uuje bine iiwäräneji deedei bine yäärwäjimusi piipepu sargi mule jaawenimusi. † **2:11:** neeneni me budre: Neeneni me budre poto cidi me mene cuta pisi nyene Apokalupo 20:14 cabu piipepu Apokalupo 21:8 cabu.

biname bine opo ire wawename cibi ărngăjame, lui cibi ca uuje bine ituge iiwăreja, cuta piyepu sargi mule wawename.

¹⁵ Piiyepu weene poto piti nemi, lui cina ingwe icwetniniye Nikolayame biname bime abiberăja ne.

¹⁶ Peei name pi weene tatatrongăripeye weeme niia mule cabu ca, cije cane lădune pui biname bime cama cubu iicaname cubuturikă ca, căme tage cabu ca lui te tasatenige.

¹⁷ Weeme liba tablame piti nemi ătecijame, itecijinege, Aceji Seemo te ngena jejenenemige ătrunga maramara ingle bine. Laati te cire yuutrutepi, cane teebine cirege ămlităneji deedei ngii maana ceera piyepu bulubulu kula ceera kirece ngii cama. Nuuja te umle lica birige, nuuja me kula cabu ngena ngii, yepă lui te yaacatuge, tabe taatu umle birige.’ ”

Mene Tiyatira ătrunga Ingle bau me

¹⁸ “Yoogărepi Tiyatira ătrunga ingle me mename seemo bau me egă,

‘Acejiyame me Băgră lui me irecu cina ayenăsi uliobo pana piyepu lui me ernge oplacmelăja braasi ayana pana gegi, tabe jicenige egă:

¹⁹ Cane umle găne iyeta weeme poto cidi me. Cane umle găne, weene lipu singi gemi biname bime tăăpume, lipu toraca gemi, lipu kaakesea jewenenemiye piyepu măpu cabu lipu kokre inajininige. Cane cuta umle găne, egă weene page magerage kaakesea jewenenemiye niinăce kaakesea cabu ca.

²⁰ Yepă weeme pisi nyene căme singi căco mule. Weene ire taatu jociteniye magebi ngii Isabela ne, lui te lainuge Acejiyame me mename biname ca. Tabe căme kaakesea băgră bine ebiberăjenemige, opo jewenenemige conocono gaabe cabu otnime sargi mule wawename piyepu cibi ărngăjame, lui ca yiwărăjemusi uuje bine.

²¹ Cane padare tocărume ne tabe atatrongtame teeme niia mule cabu ca, yepă tabe singi lica teeme sargi mule ne abmalame.

²² Peei name pi cane teebine pita măpu pa wăăcărepene, cuta eei bine lui cina sargi mule jewenenisi ten cama. Teepi baborage măpu ne pa jăăpănepesi căme bau ca, teepi liba lica pagege abmala niia mule bine pui magebi cama căme bau me atatrongărame.

²³ Cane cuta budre me pa yaaglecemepene pui magebi me ingwe ăcwiyame biname bine iyeta ătrunga ingle cina piba păpăname, egă cane age săne lui te umle iyeta biname bime yepăyepă ngena atwanena piyepu singi. Cane cirege weeme mule ibi weeme yepăyepă bine daremu ceera.

²⁴ Yepă weene poto cina piti nemi Tiyatira je, lui cina lica yaacatepeye peei niyarage abiberăja ne. Weene lica ituge abiberăja lui ne yaainusi Satani me sungaberage ogă mule ca. Peei name pi cane lica nuuja gwidape tăăpume jijenininine,

²⁵ yepă kokre cama joomlepeye weeme ngena pisi nyene, ngălu cane cire lacnenutepene.

²⁶⁻²⁷ Laati te cire yuutrutepi piyepu căme singi ne cire jaawenepi ngălu ngălugaabe me, cane pui biname ne yepă kokre cirege ceera, cane lui kokre ne ituge acata Babe bau ca. Cane ayana suru pana kokre ne cire yăăcărepene tabe gawe maramara biname bine waadename piyepu sabe wawename căme cubuyame bine, epu pana gawe ca wawenăneji disii ne lipu yaatebicusii.

²⁸ Cane cuta teebine Guji Wale cirege ceera.

²⁹ Weeme liba tablame piti nemi ătecijame, itecijinege, Aceji Seemo te ngena jejenenemige ătrunga maramara ingle bine.’ ”

3

Mene Sardi ătrunga Ingle bau me

¹ “Yoogărepi Sardi ătrunga ingle me mename seemo bau me egă,

‘Lui me piti nemi Acejiyame me seben seemo, cuta lui me piti nemi seben wale, tabe jicenige egă: Cane umle găne iyeta weeme poto cidi me. Biname cina apu jengenemige, egă weene ireclota gemi, yepă weene budre gemi.

² Peei name pi weene arpinăripeye, weeme ngena camu pisi nyene, kokre joomlepeye, cije iyeteta lapesaruge. Cane jepăninine egă weene lui mule bine jewenenemiye, căme Acejiyame me opo gaabe conocăco lica gemi.

³ Peei name pi weene ngena jotwipenye weene ngena ituge abiberăja piyepu ătecija. Pui ne kokre joomlepeye, tatatrongăripeye weeme niia mule cabu ca. Weene liba arpinera căco, cane peeyeme eromaame pana cire lădepene. Weene umle lica căme otni padare luci yene.

⁴ Yepă nesae cina piti nemi Sardi cewe je, lui cina teeme căbletăăpe bine juji căco ewetnenemisi. Teepi cane cama bulubulu căbletăăpe cama cire waatnipesi, ingle teepi miiji gemi peei tăăpume.

⁵ Laati te cire yuutrutepi, tabe apu bulubulu cäbletääpe cirege asigra. Cane lica cirege iisibreca teeme ngii ne pui peba cabu ca, iyeteta ireclota täápume luma ngii bine ituge oogära. Cäme Babe piyepu teeme mename seemo bime opo gaabe je cane cire yaainepene teebine cäme biname ca.

⁶ Weeme liba tablame piti nemi ätecijame, itecijinege, Aceji Seemo te ngena jejenenemige ätrunga maramara ingle bine.’ ”

Mene Piladelpiya Ätrunga Ingle bau me

⁷ “Yoogärepi Piladelpiya ätrunga ingle me mename seemo bau me egä,

‘Ai mene lui teeme bau ca gyene, Acejiyame täápume lui te mara me ituge äbita piyepu lui toraca gyene. Tabe te Daawida me kii ne joomlenige, siige liba jiiitnuge, nuuja te äblicäco armi; liba yaarmuge, nuuja te äblicäco iitnana. Tabe apu jiićenige egä:

⁸ Cane umle gäne iyeta weeme poto cidi me. Cane umle gäne, egä weeme kokre matikäli gyene, yepä weene cäme abiberäja ne kokre joomleniye, cuta lica naineniye cebine. Cane weeme täápume gaabe ituge iitnana, nuuja te äblicäco gyene armi.

⁹ Itecijinege! Satani me biname peema piti nemi, lui cina lainininusi Israela biname ca, yepä teepi walya waatromininusi, teepi Israela biname lica. Cane pa jaawenemepene teepi weeme bau me otnime kokorare ca äpedname weeme ernge gome, siige teepi umle pa läbitipesi, egä cane singi pisi näne weeme täápume.

¹⁰ Ingle weene kokrerage imyemutinuge mäpu cabu, cane lipu itu jijipene weene wawename, peei name pi cane cuta piwärimtipene, lui mäpu te pa tädepä iyeta poto ta ai gawecewe biname bine apicetnärame.

¹¹ Cane mameta gäne acnenuta. Weene kokre joomlepeye, weeme ngena pisi nyene, piba nuuja te lica cirege uutecra weeme daremu ne.

¹² Laati te cire yuutrutepi, cane cire jaawenepene mutre caage me cäme Acejiyame me iiwäreja mete cabu je, siige tabe licarage abmala pui mete ne. Cane teeme cabu cire yoogärepepe cäme Acejiyame me ngii, cuta piyepu cäme Acejiyame me cewe ngii, Kirece Yerusalema, lui te cire täinepi cabu ca cäme Acejiyame bau ca. Cane cuta cäme kirece ngii ne teeme cabu cire yoogärepepe.

¹³ Weeme liba tablame piti nemi ätecijame, itecijinege, Aceji Seemo te ngena jejenenemige ätrunga maramara ingle bine.’ ”

Mene Laodikea Ätrunga Ingle bau me

¹⁴ “Yoogärepi Laodikea ätrunga ingle me mename seemo bau me egä,

‘Lui te Acejiyame me mene ne toraca me jewenenige, lui te toracarage jeitnäjenige teebine, piyepu lui sine agednayame iyeta gawecewe gwidape täápume, Acejiyame lui bine ituge wawenetnäja, tabe apu jiićenige egä:

¹⁵ Cane umle gäne iyeta weeme poto cidi me. Weene seemo ireclota cabu toraca budre lica gemi, weene cuta toraca ireclota lica gemi. Oo, cane lipu singi gäne peei nuuja täápume.

¹⁶ Yepä ingle weene ejijejija gemi, peei name pi cane weebibine piyäripene, biname te lipu niyarage niyye ne yaaclemutuge teeme tage cabu ca.

¹⁷ Weene jiićenige egä, “Cime iyeta gwidape piti nemi, cine nuuja gwidape täápume singi lica gemi.” Yepä weene opo lica ewatneniye, egä weene lipu niyarage piyepu owecumete gemi. Weene dogwe biname lica gemi, yepä weene cuutacuta gemi, irecu määsumäsu gemi.

¹⁸ Peei name pi cane jijenininine cuta golrage aletname cäme bau ca naace täápume weene piba toraca dogwe päpäname. Cane bulubulu cäbletääpe bine jeletnemepeye cäme bau ca weeme peei cuutacuta ajiri ne acwabame. Cuta ngängye bine jeletnemepeye weeme irecu cabu acraname piba weene cängena päpäname.

¹⁹ Cane umle jewenenemine, eblawäjenenemine, cane lui biname bime täápume singi. Peei name pi weene miiji toraca ngencuc cama atatröngäripeye weeme niyaniya mule cabu ca.

²⁰ Itecijinege! Cane gaabe gome nämyemutenige, eyäjenine. Laati te nätecijuge cäme tagepogogo, siige gaabe jiiitnuge, cane labacitune, teta cama deedei yäärwäjimune, tabe cane cama.

²¹ Laati te cire yuutrutepi, cane cire yaacanepene cäme gome adnatame tabe puma cita ca cane cama biname bine waadename epu pana, cane lipu yuutrutujine, siige adnatujine cäme Babe gome ten cama biname bine waadename.

²² Weeme liba tablame piti nemi ätecijame, weene itecijinege, Aceji Seemo te ngena jejenenemige ätrunga maramara ingle bine.’ ”

4

¹ Ai ingwe gaabe ca cane cabucewe je grana ne jepänine iitneji ge. Niinäce tagepogogo cane lui itu näteciijumi, moole ala pana ge, apu najige egä, “Tädi aima cabucewe me! Cane gwidape naawabetnärinine, ingwe gaabe ca lui cina cire läpletneräjipesi.”

² Piba taatu Aceji Seemo te cebine nacenani ge. Cane cabucewe je babo adnata puupu ne jepänine, lui cabu yepä te adnatäneji enajige.

³ Teeme opo epu toplacmeläjige yaspere piyepu karneliya kula liiyepu. Pui babo adnata puupu gome cänibäniba te aclitige. Teeme kala epu ge emeraldidi kula me liiyepu.

⁴ Poto twentifoo modamoda adnatera puupu cina babo adnata puupu ne jewaclomtisi. Twentifoo modamoda biname pui puupu cabu adnatäreji puga ge. Teepi bulubulu cäbletääpe asigräreji ge, piyepu teeme mope cabu puga ge gol ca wawenäneji krauni.

⁵ Babo adnata puupu cabu ca paamlepamle cina toplacmeläjininisi, maadubi te ala sengeni ge piyepu babo ala puga ge. Teeme opo gaabe je seben ngale cina ayinisi. Pui lui Acejiyame me seben seemo gemi.

⁶ Teeme opo gaabe je cuta puga ge glaasi malu pana gwidape, lui päpäna taaturage ge.

Babo adnata puupu ne fooma ireclota gwidape cina jewaclomtisi iyeta poto ta. Teeme owe gaabe ca, kaake poto ca iyeta irecu taatu ge.

⁷ Niinäceyame me opo lui layani pana ge; pumacitacayame me opo lui buli pana ge; pumacitacayame me opo biname pana ge; ceräcerägäabuyame te epu pana ge warye, lui uujeni ge.

⁸ Teepi iyeta lui siks taame cama ge. Teeme iyeta poto ta irecu puga ge, ngalebora ca, kaake poto ca. Teepi iyeta padare, ciye bimu, apu jiiemusidi egä,

“Epućäco, epucäco, epucäco gyene

Yageyame, kokrerage Acejiyame,

lui tage niinäce gaabe je, lui sine page,

lui te iyeteta pa yaanajepi!”

⁹ Iyeta padare fooma ireclota gwidape cina liba yaawepyeräjusi, opo gaabe me yaacitanusi, eso yäcäranusi, lui te iyeteta gyene, babo adnata puupu cabu enajeni ge,

¹⁰ piba twentifoo modamoda biname cina yaatrametnemalemuge teeme opo gaabe je. Teepi teeme krauni bine juuwemusi, yaacranimusi babo adnata puupu opo gaabe je, jiiucusidi egä,

¹¹ “Cime Yageyame, cime Acejiyame,

maane miiji gäte biname cina meebine awepyeräjame.

Maane miiji gäte teepi meebine opo gaabe me acitame

piyepu iicaname egä, ‘Maane kokrerage gäte,’

ingle iyeta gwidape maane te ituge wawenetnäja.

Määme singi ca teepi itu äbitininujisi,

ireclota itu jepänujisi.”

5

Äclubäneji Peba piyepu Maamoi

¹ Cane äclubäneji peba ne jepänine teeme camu poto ime cabu, babo adnata puupu cabu lui te enajeni ge. Pui peba cabu neenenidi potopoto oogäräneji ge, seben uli ngate ca klaje wawenäneji ge.

² Puma cita ca cane jepänine, Acejiyame me babo kokre mename seemo te baborage tagepogogo ca jiiicige egä, “Laati te miiji gyene ai ngate bine äyebhengäjame peba ne iitnaname?”

³ Yepä nuuja ne lica jepänisi cabu je, gawe je, gawe ngalebora je, lui te miiji gyene peba ne iitnaname ngalebora ireme.

⁴ Cane ele nangenige, ingle nuuja ne lica jepänisi, lui te miiji gyene pui peba ne iitnaname coo ngalebora ireme.

⁵ Puma cita ca twentifoo modamoda biname bime yepä te najige egä, “Ele gone naan-geneni ge! Ire, Layani pisi nyene Yuuda me ingle cabu ca, babo biname Daawida me kaakesaare, tabe te ituge uutruta teeme cubuyame bime cabu ca, peei name pi tabe miiji gyene seben ngate bine äyebhengäjame peba ne iitnaname.”

⁶ Puma cita ca cane jepänine Maamoi ne aclajuteji babo adnata puupu gome, fooma ireclota gwidape piyepu twentifoo modamoda biname bime cole cabu. Tabe epu pana ge, egä teebine uja ituge agli. Teeme seben gaale piyepu seben irecu puga ge. Pui irecu lui Acejiyame me seben seemo gemi, lui cina ätyepäneji gemi gawecewe me iyeta poto ta.

⁷ Siige Maamoi te ädige, peba ne ecatige teeme camu poto ime cabu ca, babo adnata puupu cabu lui te enajeni ge.

⁸Tabe liba pui peba ne ecatige, puma cita ca fooa ireclota gwidape cina piyepu twentifoo modamoda biname cina itrametnemalemige teeme opo gaabe je. Teeme yepäyepä cina joomläjemisi ala-ala gwidape ngii haapi bine piyepu gol disi bine, lui bora miijimiji lengo gwidape ge uubudera täapume. Pui miiji lengo gwidape lui Acejiyame me binamewale bime irecu ätumuta mene gemi.

⁹Teepi kirece uupera ne etangisi Maamoi täapume apu egä,

“Maane miiji gäte peba ne acatame
teeme ngate bine äyebengäjame,
ingle naace popi meebine budre me naaglujisi,
siige määme uudi ca sewecnimujite Acejiyame bau me
ingle maramara, mene maramara,
gawe maramara, tääpe maramara biname bine.

¹⁰Maane te jewenimujite teebibine
biname bine waadena biname me
piyepu iiwäreja biname me lenajame
mime Acejiyame täapume kaakesea wawename.

Teepi te cirege gawecewe ne acana.”

¹¹Puma cita ca cane jepänine Acejiyame me mename seemo tomi ne, lui baborage ge. Teepi epu bucurage ge, egä äblicäco acnema. Teepi babo adnata puupu ne jewaclomtisi, cuta fooa ireclota gwidape bine piyepu twentifoo modamoda biname bine jewaclomtemisi. Cane nätecijige,

¹²teepi oräre uupera ne etangisi egä,

“Maamoi lui ne eglujisi,
miiji gyene cine meebine awepyeräjame,
ingle määme conocäco pisi nyene
iyeta gwidape bine waadename.

Määme piti nemi dogwe, umle, kokre,
maane baborage gäte,
määme ngii caburage gyene,
peei name pi cine meebine eso nääcärenisi.”

¹³Cane cuta nätecijige iyeta gwidape cina cabu je, gawe cabu je, gawe ngalebora je, niiye ngalebora je – iyeta lui cina ireclota cama gemi – teepi apu uupera ne etangisi egä,

“Lui te enajenige babo adnata puupu cabu cuta piyepu Maamoi,

teebibine laawepyeräjesi, ngii babo jaawenesi,
opo gaabe me laacitesi iyeteta.
Teeme kokre iyeteta yaanajege.”

¹⁴Siige fooa ireclota gwidape cina teebibine mene jewecniste-misi, jiicisi egä, “Peei lui toraca mene gyene!” Piba modamoda biname cina itrametnemalemige gawe cabu me Maamoi me opo gaabe je teebine awepyeräjame.

6

Maamoi te Siks Uli Ngate bine Jewalimige

¹Puma cita ca cane jepänine Maamoi te seben ngate cabu ca yepä ne äwäluta piyepu nätecijige fooa ireclota gwidape bime yepä te iicana maadubi pana tagepogogo ca egä, “Tädi!”

²Cane ire acitine, jepänine, bulubulu cooso te puga ge. Cooso cabu lui te tädige, gagari cama ge, piyepu teebine krauni ecärisi. Siige tabe wälu cäco ädige cerämu cubuyame bine budre me aglecame.

³Maamoi te liba neeneni manu me ngate ne jewälutige, cane nätecijige neeneni manu me ireclota gwidape te iicana egä, “Tädi!”

⁴Piba nuuja cooso te tädige, lui ududi ge. Cooso cabu lui te tädige, teebine conocäco ecärisi cubu mule ne acaname gawecewe cabu me piba biname cina teemeteme budre me aglecame. Teebine baborage cubuturikä ecärisi.

⁵Maamoi te liba nesae manu me ngate ne jewälutige, nesae manu me ireclota gwidape te jiicige egä, “Tädi!” Cane ire acitine, jepänine, cäsäcäsä cooso te puga ge. Cooso cabu lui te tädige, teeme ime cabu puga ge skeil.

⁶Pui fooa ireclota gwidape bime cabu ca cane biname pana tagepogogo nätecijige, skeil cama biname ne jejige egä, “Yepä bimu me daremu ca aletna yepä liita wiiti plawa coo piyepu yepä bimu me daremu ca aletna trii liita baali plawa. Yepä maane olibi uli bine piyepu waina seeasea bine sabe gone jaawenimute.”

⁷ Maamoi te liba fooa manu me ngate ne jewälutige, cane nätecijige fooa manu me ireclota gwidape te iicana egä, “Tädi!”

⁸ Cane ire acitine, jepänine, mulimuli pana cooso te puga ge. Cooso cabu lui te tädige, teeme ngii Budre, piyepu Aadiri te teebine ingwe ca sicwige. Teebibine kokre ituge ceera gawe me cebocebo biname bime cabu ca nuuja cebo ne acatame, budre me aglecama cubu ca, pita ca, gane ca, drowä girigale gwidape ca.

⁹ Maamoi te liba faib manu me ngate ne jewälutige, cane piba jepänine iiwäreja dade ne. Teeme gawe me puga ge eei biname bime cable, lui bine ituge agleca, ingle teepi Acejiyame me Mene wälu cäco ituge iicema.

¹⁰ Teepi jiiçisi baborage tagepogogo ca egä, “Oo babo kokrerage Yageyame, maane conocäco piyepu toraca gäte! Luma ngälu padare cine cirege lenaja, ngälu maane gawecewe biname bine cire jitraneemi, daremu cire ecäremepi cime agleca name pi?”

¹¹ Teeme yepäyepä bine lecaleca bulubulu cäbletääpe ecäranemisi, jejemisi teepi matikäli trämä cerämu lenajame, ngälu pui ngälu ne cire joomlepi lui ituge acita teeme pana Acejiyame me kaakesea bägrä bine budre me aglecama, teebibine lipu ituge agleca.

¹² Puma cita ca cane jepänine Maamoi te siks manu me ngate ne jewälutige. Babo ocejaja puga ge. Bimu te cäsä me äbitige, siige apaclyera lica ge; cuta piyepu mabye te uudi pana ududi me äbitige.

¹³ Wale cina itrametnemige gawe cabu me, epu pana uli kuu lipu saatrametnemuge, babo buuwe te liba uli ne jaakocnäjuge.

¹⁴ Dume te äclubicige, epu pana waaku ne lipu yäclubicusi, siige ämlitige. Iyeta podo piyepu curä cina äyebengäjininisi teeme puupu cabu ca.

¹⁵ Maramara gawe mope biname, teeme ingwe poto ca lui mope biname, cubu mutre biname, dogwe biname, modamoda ngii biname, iyeta aletnänejä biname piyepu iyeta poto biname, teepi ämletnininisi kula waja cabu je coo piyepu modamoda kula uuwa cabu je.

¹⁶ Teepi ala abayaninisi modamoda kula cabu me piyepu podo cabu me egä, “Weene nibaletnecineye, nimletnineye eei me irecu cabu ca, lui te babo adnata puupu cabu enajenige piyepu Maamoi me claabe cabu ca!”

¹⁷ Teeme babo claabe bimu age sena, siige nuuja te äblicäco gyene ireclota lenaja.”

7

Yepä Hanred Footifoo Tausen Israela Biname

¹ Ai mule ingwe gaabe ca cane jepänimine fooa Acejiyame me mename seemo bine aclajuteji gawe me fooa mutre cabu ta. Teepi jiihemisi fooa buuwe bine piba nuuja te lica äpwäjame gawe cabu, malu cabu, glunubora je.

² Cane cuta nuuja mename seemo ne jepänine, bimu acita gome ca lui tädige. Teeme gwidape pisi nyene ireclota Acejiyame me cewecu ne acitame biname bime cabu je. Tabe baborage tagepogogo ca ala abayige pui fooa mename seemo bime bau me, lui bine kokre ituge ceera sabe wawename gawe ne piyepu malu ne.

³ Tabe jejemige egä, “Gone sabe wawena gawe ne, malu ne, uli bine, ngälu cine mime Acejiyame me cewecu ne pa yaacitanepesi teeme kaakesea bägrä bime mangace cabu!”

⁴ Puma cita ca cebine najisi, luma ngälu biname cina cirege pui cewecu ne acata. Teepi lui yepä hanred footifoo tausen biname gemi Israela biname bime twelb ingle cabu ca.

⁵⁻⁸ Teepi twelb tausen biname ge yepäyepä ingle cabu ca:

Yuuda me ingle cabu ca,
 Rubena me ingle cabu ca,
 Gaada me ingle cabu ca,
 Asera me ingle cabu ca,
 Napatali me ingle cabu ca,
 Maanasa me ingle cabu ca,
 Simeona me ingle cabu ca,
 Leebi me ingle cabu ca,
 Isakari me ingle cabu ca,
 Seblona me ingle cabu ca,
 Yoosepa me ingle cabu ca,
 Benjaminina me ingle cabu ca.

Baborage Biname Tomi Bulubulu Cäbletääpe cama

⁹ Ai mule ingwe gaabe ca cane jepänine baborage biname tomi ne, acnema äblicäco ge. Teepi lui gawe maramara, ingle maramara, tääpe maramara, mene maramara biname ge. Teepi jeclajutäjemige babo adnata puupu opo gaabe je piyepu Maamoi me opo gaabe

je. Teepi lecaleca bulubulu cäbletääpe asigräreji ge, uli laame ime cabu ge teeme gege ne awabudnitame.

¹⁰ Teepi baborage tagepogogo ca abayaninisi apu egä,
 "Mime Acejiyame, lui te enajenige teeme babo adnata puupu cabu
 piyepu Maamoi,

teepi te biname bine niya cabu ca birige äsecreral!"

¹¹ Iyeta mename seemo cina jeclajutäjimige, babo adnata puupu ne jewaclomtisi, cuta piyepu fooa ireclota gwidape bine piyepu twentifoo modamoda biname bine jewaclomtemisi. Teepi itrametnemalemige babo adnata puupu opo gaabe je Acejiyame ne opo gaabe me acitame, siige jüicisi egä,

¹² "Ai lui toraca mene gyene!

Mine miiji iyeta padare cabu mime Acejiyame ne awepyeräja, opo gaabe me acitena, eso ceerana!

Tabe baborage gyene, umleyame gyene, kokreyame gyene!

Teeme ngii caburage gyene iyeteta iyeteta!

Ai mene toraca gyene!"

¹³ Puma cita ca twentifoo modamoda biname bime yepä te cebine nätemlige, "Maane nää umle gäte, laati bemi ai lecaleca bulubulu cäbletääpe asigräreji biname? Teepi luma cita ca gemi?"

¹⁴ Cane jejine egä, "Babo biname, cane umle lica gäne, yepä maane umle gäte." Tabe nawecnistige, najige egä, "Ai lui eei biname gemi, babo mäpu cabu ca lui cina ituge äsi. Teepi teeme cäbletääpe bine itu jicisäjemuji, bulu me itu jewenimujisi Maamoi me uudi ca.

¹⁵ Peei name pi teepi jeclajutenenemige Acejiyame me adnata puupu opo gaabe je, teeme kaakesea ne jewenenisi teeme mete cabu iyeta padare cabu, ciye bimu. Lui te adnatänej gyene babo adnata puupu cabu, tabe ten cama enajenige, teebibine jilyenge-nemige.

¹⁶ Teepi ingwe ca lica pagege lolomecewe coo niyemecewe; bimu te lica atara, coo nuuja nuunu te lica oomlana teebibine,

¹⁷ Ingle Maamoi lui te jeclajutenige babo adnata puupu opo gaabe je, tabe te teebibine pa ire jaatwemepi, pa yaawademepi ireclota niye gome me. Cuta Acejiyame te pagege teeme iyeta elemäcu äciseja."

8

Ceräcerägääbuyame Uli Ngate

¹ Maamoi te liba seben manu me ngate ne jewälutige, cabucewe te bojäcu enajige cebocebo awa cama.

² Cane puma cita ca jepänimine seben Acejiyame me mename seemo bine aclajuteji Acejiyame me opo gaabe je. Teebibine ecäranemisi seben moole.

³ Cuta nuuja mename seemo te tädige, jeclajutige iiwäreja dade gome. Teeme ime cabu puga ge gol disi miijirage lengo gwidape acrana tääpume, siige bucurage ecärisi tabe alenglecäjame Acejiyame me binamewale bime irecu ätumuta mene cama siige uubuderame gol ca wawenäneji iiwäreja dade cabu, lui babo adnata puupu gome puga ge.

⁴ Tabe jeclajutige Acejiyame me opo gaabe je. Teeme ime cabu ca miijirage lengo kloka cina äsige cabu me Acejiyame me binamewale bime irecu ätumuta mene cama.

⁵ Siige tabe pui gol disi ne ecatige, cuta uliobo ne ecatige pui iiwäreja dade cabu ca, ecitige disi cabu me, ijarige gawe me. Piba taatu maadubi te ala sengenige, poto modamoda ala puga ge, paamlepamle cina toplacmeläjininisi, ocneja te cewe ne tedodyeräjige.

Seben Mename Seemo cina Moole bine Jecnäjemisi

⁶ Pui seben mename seemo lui bine moole ecäranemisi, teepi amacetnäjininisi äcnäjame.

⁷ Niinäceyame te liba teemanu ne jecnäjige, piba aisi ipecu cina, lui uliobo piyepu uudi cama alenglecäjininisi, babo kokre cama gawe me itrametnemige. Uliobo te peema cita ca äpletnutige, siige yepä poto gawe te ayige, neeneni poto gawe cina abmaläsi. Yepä poto gawe me uli cina ayinisi, neeneni poto gawe me abmalinisi. Baace cina ayinisi iyeta poto ta.

⁸ Neeneni manu me mename seemo te liba teemanu moole ne jecnäjige, podo pana gwidape lui te uliobo cama ge, piba ajarige malu cabu me, siige yepä poto malu me niye te atepingitige uudi me, neeneni poto malu me niye cina abmaläsi.

⁹ Lui poto malu me niye te uudi me äbitige, iyeta ireclota gwidape bine budre me eglecimige, buto bine cuta sabe jewenimige.

¹⁰ Nesae manu me mename seemo te liba teemanu moole ne jecnäjige, baborage wale te piba itramige gawe me. Epu äinige ngale pana, siige yepä poto gawe me baduge bora me piyepu waja bora me abacitanige. Neeneni poto gawe me baduge piyepu waja cina abmalinisi.

¹¹ Pui wale me ngii lui Caapo. Pui yepä poto gawe me niye cina caapo me äbitinisi. Bucurage biname cina budre äbitinisi, teepi liba enisi pui niye ne.

¹² Fooa manu me mename seemo te liba teemanu moole ne jecnäjige, cabu je bimu me yepä poto te äplige, neeneni poto cina abmaläsi; mabye me cuta yepä poto te äplige, neeneni poto cina abmaläsi, cuta yepä poto me wale cina äplegicini, neeneni poto me wale cina abmalinisi, piba pui poto bimu, mabye, wale apaclyera lica ge. Pui name pi bimu me yepä padare krokeciye ge, neeneni padare apaclyäreji ge; cuta ciye me yepä padare krokeciye ge, neeneni padare apaclyäreji ge.

¹³ Puma cita ca cane jepänine yepä warye te tuujanenige cabu je. Tabe baborage tagepogogo ca tiicige egä, “Ogi nemi, ogi nemi, ogi nemi, lui cina inajininige gawe cabu. Weene baborage mäpu ne pagege päpäna, cerämu nesae mename seemo cina liba pagege teeme moole bine äcnäja.”

9

¹ Faib manu me mename seemo te liba teemanu moole ne jecnäjige, cane piba jepänine wale ne, lui ituge atrama gawe cabu me. Piiyemrage cupicu puga ge, lui armeji ge. Pui wale ne kii ecärisi pui cupicu ne iitnaname,

² siige tabe jiiitnige. Baborage kloka te tasatige, epu pana budni ne lipu juubudärusi, carbe bine icwabimige piiyepu bimu ne cuta icwabige.

³ Pui kloka cabu ca sesi cina täsige gawe cabu me. Teeme kokre puga ge biname bine pita ceerame, epu pana potetagetage te lipu biname ne yäägutuge babo pita cama.

⁴ Teebibine jejemisi, “Gone sabe jaawenimuye baace bine, uli bine coo nuuja uutana gwidape bine, yepä pui biname bine taatu sabe jewenemepeye, lui bime mangace cabu lica gyene Acejiyame me cewecu.”

⁵ Teebibine jejemisi faib mabye ngalebora biname bine pita mäpu ceerame, yepä lica budre me aglecame. Teeme peei pita te epu pana ge, potetagetage me äguta cabu ca lipu pita ne jääpänsi.

⁶ Pui padare cabu biname cina naabe liga budre me cire läbitipesi, yepä teepi budre lica cirege. Teepi babo singi budre me, yepä teepi budre te lica cire joomle-mepi.

⁷ Pui sesi cooso pana ge, lui bine cubu tääpume yaama-cetnäjimusi. Teeme mope cabu puga ge gol ca wawenänej krauni pana gwidape, opo lui biname pana ge,

⁸ edingäli lecaleca ge, giricu lui layani pana ge.

⁹ Teeme dare cabu puga ge epu pana ayana gwidape, cubu cabu lui ca biname cina dare bine jäälyengimusi. Teeme taame puuwämu epu pana ge, bucurage cooso cina lipu kariyota bine yäälädnimusi cubu cabu je.

¹⁰ Teeme kiira gaale cama ge potetagetage me liiyepu. Teepi pui gaale ca biname bine sabe jaawenanemusi faib mabye ngalebora, siige teepi pita ne jääpänsi.

¹¹ Teeme mope biname yepä mename seemo puga ge. Tabe te ire jetwenige pui piiyemrage cupicu ne. Heberu mene ca teeme ngii lui Abadoni, Griik mene ca lui Apolyoni. Teeme aboclotu lui egä ‘Sabe Wawenayame’.

¹² Yoo siige, yepä mäpu te peega bapirige, piiyeme cerämu neeneni mäpu gegi otnime.

¹³ Puma cita ca siks manu me mename seemo te jecnäjige teemanu moole ne. Lui gol ca wawenänej iiwäreja dade puga ge Acejiyame me opo gaabe je, pui me fooa mutre cabu ca cane nätecijige tagepogogo,

¹⁴ lui jejige siks manu mename seemo ne egä, “Fooa mename seemo bine jii biremepi, lui cina ätäyäneji gemi Euprates babo baduge gome.”

¹⁵ Siige teebibine jii birimisi puirage kämäge, mabye, bimu, padare cabu teepi yepä cebo biname bine budre me aglecame, neeneni cebo bine abmaläcemame.

¹⁶ Cane nätecijige luma ngälu cubu biname cooso cama puga ge. Pui lui neeneni hanred milyon ge.

¹⁷ Wama pana cane cooso bine jepänimine piiyepu teeme papa cabu lui biname ge. Teepi ayana gwidape asigräreji ge teeme dare bine älyengame. Pui älyenga gwidape lui uliobo pana ududi ge, sapiri kula pana sisi ge, cuta piiyepu sulphur pana mulumuli ge. Cooso bime mope layani pana ge. Teeme tage cabu ca täsige uliobo kloka cama piiyepu niyarage lengo gwidape ngii sulphur.

¹⁸ Pui nesae gwidape cina: uliobo, kloka piiyepu sulphur, cooso bime tage cabu ca lui täsige, seglecemisi yepä cebo biname bine, neeneni cebo cina abmalinisi.

¹⁹ Pui cooso bime kokre lui tage cabu ca ge piiyepu kiira cabu ca ge. Teeme kiira lui cobyame mope pana ge, siige pui ca biname bine sabe jewenanemisi.

²⁰ Lui biname cina budre lica äbitaninisi ai mäpu cabu, teepi lica ätecitininisi ime ca wawenänej gwidape bine awejename. Teepi camu ewejanemisi niyaniya cable bine,

piiyepu gol ca, silba ca, braasi ayana ca, kula ca, uli ca wawenäneji gwidape bine, lui cina äblicäco ge päpäna, ätecija, otnetneja.

²¹ Cuta teepi lica tatatrongärininisi biname bine agleca mule cabu ca, mowä mule cabu ca, sargi mule cabu ca, gwidape ero cabu ca.

10

Acejiyame me Mename Seemo te Yoane ne Peba Ecäriqe

¹ Puma cita ca cane jepänine Acejiyame me nuuja kokre mename seemo te äina je cabucewe ca. Carbe te teebine icwabigige cäbletääpe pana. Cänibäniba te aclitige teeme mope gome. Teeme opo epu apaclyäreji cama ge bimu liiyepu, piiyepu teeme ernge neeneni uliobo wädräji liiyepu.

² Teeme ime cabu puga ge matikäli peba, lui te iitneji ge. Tabe teeme camu poto ernge ne malu cabu ecitige, säwäci poto ernge ne doro cabu ecitige,

³ siige baborage tagepogogo ca ala abayanige layani me tagepogogo liiyepu. Seben maadubi cina teebine jewecnistisi.

⁴ Siige teepi liba ala sengenetne-mige, cane oogärame äbitine, yepä piba taatu cane tagepogogo nätecijige, cabucewe ca lui te najige egä, “Gone yoogärute, seben maadubi cina ngeno me bii jicisi. Peei lui ogä mene gyene.”

⁵ Puma cita ca pui mename seemo cane lui ne jepänine aclajuteji malu cabu piiyepu doro cabu, tabe teeme camu poto ime uutige cabucewe me.

⁶ Acejiyame lui te iyeteta gyene, lui te jewenimuji cabucewe, gawecewe, malu piiyepu teeme cabu lui iyeta gwidape, teeme ngii cabu pui mename seemo te jicigige egä, “Siige! Cerämu awagrija lica gyene.

⁷ Seben manu me mename seemo te liba teeme moole ne pa jäänäjepi, Acejiyame piba pa yaapirepi teeme ogä ngeni atwana ne, tabe lui ituge jaji teeme kaakesea bägrä bine, lui teeme mename biname gemi.”

⁸ Puma cita ca niinäce cane lui tagepogogo nätecijige cabucewe ca, cääri najige egä, “Äte, peba ne ecati lui iitneji gyene pui mename seemo me ime cabu, lui te jeclajutenige malu cabu piiyepu doro cabu.”

⁹ Cane siige ädine, jejine matikäli peba ceerame. Tabe najige, “Ecati, erwi! Määme came cabu caapocapo enajenige, yepä maane liba erwenite, määme tage cabu mite taatu, uri liiyepu.”

¹⁰ Cane peba ne ecatine teeme ime cabu ca, siige erwine. Cäme tage cabu epu mite enajige uri liiyepu, yepä liba erwine, cäme camuge bora caapocapo ge.

¹¹ Puma cita ca cebine najisi egä, “Maane miiji cääri yepä gääbu jejananemepi, ngena cina cirege äbitena gawe maramara, mene maramara, tääpe maramara biname bime tääpume piiyepu gawe mope biname bime tääpume.”

11

Neeneni Aitneja Biname

¹ Puma cita ca cebine suru näcärisi, atonera suru pana, najisi egä, “Äte, iiwäreja mete ne etoneräji, cuta puma lui iiwäreja dade ne etoneräji. Maane cuta ecnemi lija biname cina irecu ätumutenininisi puma.

² Yepä pui mete caale kaake poto ca lui puupu, pui ne gone yaatoneräjute, inge pui puupu lui ceereji ge nuuja biname bine, lica Israela biname bine. Teeme ime cabu sine. Teepi te footituu mabye ngalebora sabe cire jaawenepesi Acejiyame tääpume lui babo cewe ne mara me ituge wawena.

³ Cane cäme neeneni aitneja biname bine cire jäätyepene. Teepi ragre pana cäbletääpe cama cirege. Teepi Acejiyame me Mene cire jaajananemepäsi yepä tausen neeneni hanred siksti bimu ngalebora je.”

⁴ Pui neeneni aitneja biname lui neeneni olibi uli gegi piiyepu neeneni lampa atacwa dade gegi, lui cina jaclajutenige ai gawe Yageyame me opo gaabe je.

⁵ Laati bemi liba singi sabe wawena teebibine, uliobo te tasatuge teeme tage cabu ca, siige teeme cubuyame bine yaataclomemuge budre me. Yoo, laatibi liba läbitininusi teebibine sabe wawena, peei biname bine pepu birige budre me agleca.

⁶ Teeme conocäco pisi nyene ngupe iibaname, siige teepi lui padare cabu Miiji Mene cirege jajanena, pui padare cabu ngupe te lica acira. Teeme cuta conocäco pisi nyene waja niye bine uudi me wawename piiyepu maramara mäpu bine ätyepejame gawecewe cabu me, teepi liba singi.

⁷ Siige, teepi liba teeme mene jajanena kaakesea ne cire yaapirepäsi, piba drowä gwidape, lui te piyemrage cupicu cabu ca cire tasatepi, ten cama cire larngepi. Tabe teebibine cire läätucärepi, siige budre me cire laaglepi.

⁸ Teeme budrekaake cina cirege gaabe cabu lenaja pui babo cewe cabu je, teeme Yageyame ne luma jibyecrujisi toto ca baarge uli cabu. Pui babo cewe ne ngene ca agli mene ca Sodoma ca piyepu Aikupito ca einenisi.

⁹ Iyeta gawe maramara, mene maramara, ingle maramara, tääpe maramara biname cina cirege teeme budrekaake bine päpänenä nesae piyepu cebocebo bimu cama. Teepi singi lica cirege teebibine gape cabu me acitame.

¹⁰ Gawecewe biname cina teeme budre name pi gege cirege. Siige peei name pi teepi cirege giiregire mule wawenetnäjä piyepu owecu gwidape cire läcäranipesi, ingle pui neeneni mename biname cina teebibine baborage mäpu me cirege wawena.

¹¹ Nesae piyepu cebocebo bimu ingwe gaabe ca Acejiyame te tityepige ireclota buuwe-mope ne teeme cabu ca, siige tabe abacitanige pui neeneni biname bime trupa ngalebora me, piba teepi abujengtäsi. Iyeta lui cina jääpäniisi teebibine, mage wälu ge.

¹² Puma cita ca pui neeneni mename biname cina äätəcijige baborage tagepogogo cabucewe ca iicana egä, “Siclege aima!” Teepi puma cita ca teeme cubuyame bime irewale carbe cabu aalige cabu me.

¹³ Puirage padare cabu baborage ocneja puga ge, siige babo cewe yepä poto ne sabe jewenige, nain poto cina abmalininisi. Seben tausen biname bine budre me eglecimige. Lui cina abmalininisi, mage wälu ge, siige Acejiyame lui te enajenige cabucewe je, teebine ewepyeräjisi.

¹⁴ Yoo, neeneni me mäpu te peega bapirige. Cerämu pisi nyene yepä.

Seben Manu me Mename Seemo te Teeme Moole ne Jecnäjige

¹⁵ Seben manu me mename seemo te liba teeme moole ne jecnäjige, cane piba nätecijige cabucewe ca tagepogogo cina oräre iicana egä, “Mime Yageyame piyepu Keriso, tabe lui ne tityepuji, teepi ituge gawecewe ne acata teeme ime cabu me, siige teepi te pa yaacanepäsi iyeteta.”

¹⁶ Piba twentifoo modamoda biname, lui cina teeme adnatera puupu cabu icrajenige Acejiyame me opo gaabe je, teepi owe ca gawe me itrametnemalemige, Acejiyame ne opo gaabe me ecitisi,

¹⁷ jüicisi egä,

“Yageyame, babo kokre Acejiyame,

lui sine page, lui tage uja,

cine eso nääcärenisi,

egä maane mäame babo kokre ca ai gawecewe ne ecanenite.

¹⁸ Gawe maramara biname cina babo niyya me bäbitininisi,

ingle mäame claabe padare te bii tatyaramtige.

Ai lui padare gyene budre biname bine atraname.

Padare te bii tatyaramtige mäame kaakeseyame,

Acejiyame me mename biname bine daremu ceeraname

piyepu iyeta mäame binamewale bine,

lui cina wälu ituge mäame täapume matimati cabu ca ngälu modamoda me.

Padare te bii tatyaramtige sabe wawename pui bine, lui cina sabe jewenenisi ai gawecewe ne.”

¹⁹ Puma cita ca cabucewe je iiwäreja mete te iitnige, siige lui uli boks ngalebora ten cotre bine ewetnenemisi, pui te pajecu me äbitige. Peei mule te liba äbitige, paamlepamle cina toplacme-läjininisi, ala puga ge, maadubi cina ala sengenetnemige, ocneja puga ge piyepu aisi ipecu cina sitrametnemige gawe cabu me.

12

Magebi piyepu Drowä Gwidape

¹ Puma cita ca cane jepänine, mara opo gwidape te lui aboclom-tige dume cabu. Pui lui magebi ge. Tabe bimu ca asigräneji ge cäbletääpe täapume piyepu maybe te teeme ernge gawe mage. Teeme mope cabu lui twelb wale ca wawenäneji krauni puga ge.

² Tabe lui mäpumäpu ge, adnatame äbitige pita ala cama.

³ Cuta nuuja mara opo gwidape te aboclomtige dume cabu. Pui lui baborage ududi siible seben mope cama piyepu ten gaale cama. Teeme pui seben mope iyeta krauni cama ge.

⁴ Teeme kiira ca tabe yepä poto wale bine jewälidnemige, siige yiisabimige gawe cabu me. Neeneni poto me wale cina abmalininisi. Tabe jeclajutige pui magebi me opo gaabe, adnatame lui te äbitige, naace täapume bägrä te liba aplimla je tabe piba ärmitame.

⁵ Siige tabe bāgrā ne jirngige, lui te iyeta biname bine cire yaawademepi ayana suru ca. Yepā, bāgrā jwuutecrisi, ewepläcītisi Acejiyame bau me teeme adnata puupu cabu me.

⁶ Magebi te uucrige daapo taatu cewe cabu me. Acejiyame te puma puupu ne itu semacetnājumi teeme täápume. Teebine puga ire jotwisi yepā tauseni neeneni hanred siksti bimu cama.

⁷ Piba cubu puga ge cabucewe je. Acejiyame me babo mename seemo Maikol piyepu teta cama lui mename seemo, teepi arnginisi siible cama. Siible te teeme mename seemo cama liga naabe uutrutame äbitanige,

⁸ yepā tabe äblicäco ge, peei name pi teepi äblicäco cabucewe je cerämu lenaja.

⁹ Siige pui babo siible ne sijarisi gawe cabu me iyeta teeme mename seemo cama. Tabe pui sasa cobyame gyene, lui ne Diyabolo ca piyepu Satani ca einenisi, ai gawecewe ne lui te ituge angletneja.

¹⁰ Piba cane nätecijige baborage tagepogogo cabucewe je iicana egä,
“Siige Acejiyame te page byuutrutige!

Tabe teeme kokre ne biiri seboclomtige, egä tabe te biname bine ewadenemige! Piyepu teeme Keriso te page teeme conocäco ne beboclomtige gawecewe täápume, ingle Diyabolo te Acejiyame me opo gaabe je cerämu lica enajenige ätrunga biname bine iicetname ciye piyepu bimu cabu je.

Teebine siige gawe me bijarisi.

¹¹ Cime ätrunga binamewale cina ituge uutruta teeme bau ca Maamoi me uudi ca piyepu teeme aitneja mene cabu ca.

Teepi singi ge teeme ireclota bine äyemelame budre täápume.

¹² Peei name pi cabucewe piyepu lui cina puma, weene miiji gege!

Yepā ogi nemi, lui cina inajininige gawe cabu piyepu malu cabu, ingle Diyabolo peeyeme ituge otni.

Tabe babo niyarage gyene,

ingle tabe umle gyene, egä teeme täápume padare matikäli piyeme.”

¹³ Siible te liba umle äbitige, egä teebine gawe cabu me bijarisi, tabe gije abacitige pui magebi ne äcwetnename, bāgrā ne lui te jirngige.

¹⁴ Magebi ne ocārisi babo warye me neeneni taame tabe uujaname teeme puupu cabu me daapo taatu cewe me. Teebine puma pa ire jwaatwepesi nesae piyepu cebocebo kāmäge cama, piba teebine siible te äblicäco oomlana.

¹⁵ Puma cita ca siible te igi niye ne isatige teeme tage cabu ca magebi me ingwe poto ca teebine acatame.

¹⁶ Yepā, gawe te teebine utityārige, äpälutige, niye ne irmitige, siible me tage bora ca lui te tasatige.

¹⁷ Siible te babo niyarage me äbitige magebi täápume, ädige teeme poto bāgrā bime cama cubu me. Teepi iyeta eei gemi, lui cina Acejiyame me Mene ne jäätrungusi piyepu Miiji Mene jaajanemusi Yeesu poto cidi me.

¹⁸ Siige siible te abmalige malu cabu aclajutame.

13

Neeneni Drowä Gwidape

¹ Cane drowä gwidape ne jepänine malu cabu ca arpata. Tabe ten gaale cama piyepu seben mope cama ge. Teeme gaale iyeta krauni cama ge piyepu iyeta teeme mope cabu ngii puga ge Acejiyame me ngii ne sabe wawename.

² Tabe baborage glunubora pusi pana ge, ngii lepadi. Teeme ime, ernge lui bea pana ge, tage layani me tage pana ge. Siible te teeme kokre ecārige drowä gwidape ne, cuta ecārige teeme babo adnata puupu tabe puma cita ca biname bine waadename.

³ Drowä gwidape me yepā mope epu pana ge, egä uja ituge budre me agli, yepā pui budre dupe te läsumurepi. Iyeta biname cina mutäcäco äbitininisi, siige teeme singi cabu otnenininisi.

⁴ Teepi iyeta siible ne opo gaabe ecitisi, ingle tabe kokre itu yääcärepi drowä gwidape ne. Teepi cuta drowä gwidape ne opo gaabe ecitisi, jicisi egä, “Nuuja te lica gyene drowä gwidape pana. Nuuja te äblicäco teta cama arngi.”

⁵ Acejiyame te ire taatu jecitige drowä gwidape ne tabe mope babo äbitame piyepu Acejiyame me ngii ne sabe wawename. Teeme pui drowä gwidape me cuta conocäco puga ge babo biname me lenajame footituu mabye ngalebora.

⁶ Siige tabe gije abacitige Acejiyame ne, teeme ngii ne piyepu teeme lenaja puupu ne ängejame cuta eei bine, lui cina cabucewe je icrajinige.

⁷ Acejiyame ire taatu jecitige tabe teeme binamewale cama arngime, teebibine apremelame. Cuta teeme conocāco puga ge tabe babo biname me äbitame iyeta maramara ingle, maramara gawe, maramara tääpe piyepu mene maramara biname bime tääpume.

⁸ Iyeta biname cina gawecewe cabu teebine opo gaabe me cire yaacitepesi, yepä eei biname lica lui bime ngii ituge oogāra ireclota peba cabu agedna me niinäce gaabe je. Pui peba lui Maamoi myene, lui ne eglujisi.

⁹ Weeme liba tablame piti nemi, itecijinege ai mene!

¹⁰ Lui gemi oomlemame, siige cire joomlemepesi. Lui gemi cubuturikā ca budre me aglecame, siige cubuturikā ca budre me cire yaa-glecemepesi. Ai mäpu mule cina singi Acejiyame me binamewale cina kokre piyepu ätrunga cama aclajutame.

¹¹ Cuta cane piba nuuja drowā gwidape ne jepänine, gawe cabu ca lui te tasatige. Teeme neeneni gaale puga ge maamoi pana. Tabe siible pana mene jücemige.

¹² Niinäceyame drowā gwidape te teeme kokre ecārige pui nuuja ne. Siige tabe teeme irewale giri jicranimige ai gawecewe ne piyepu teeme cabu lenajayame bine niinäce drowā gwidape ne opo gaabe me acitame, lui me niiyarage dupe äsumureji ge.

¹³ Tabe pui neeneni manu drowā gwidape te modamoda ciitaca mule bine jewenimige; tabe jewenige uliobo ne cabu ca äiname gawe me biname bime irewale.

¹⁴ Acejiyame te ire taatu jecitige tabe ciitaca mule bine wawenecame niinäce drowā gwidape me irewale. Ai ciitaca mule ca tabe engletnäjemige iyeta biname bine ai gawecewe cabu. Tabe jejemige niinäce drowā gwidape pana gwidape ne wawename, lui ne niinäce yaaglepesi cubuturikā ca budre me, yepä siige ireclota ge.

¹⁵ Acejiyame te ire taatu jecitige neeneni manu drowā gwidape te ireclota buuwemope äpwäclutame pui niinäce drowā gwidape pana gwidape ne siige tabe mene iicemame piyepu budre me aglecame, laati bemi lica teebine opo gaabe me acita.

¹⁶ Pui neeneni manu drowā gwidape te giri jicranige iyeta biname bine, matimati biname modamoda biname, dogwe biname owecumete biname, aletnäneji biname coo poto biname, teepi cewecu ne acatame teeme camu poto ime cabu coo mangace cabu.

¹⁷ Nuuja te äblicāco gwidape bine aletna coo piyepu aletname waadena, teeme liba pui cewecu lica gyene. Pui cewecu lui niinäce drowā gwidape me ngii gyene coo teeme ngii namba gyene.

¹⁸ Maane miiji umle cama ai ne opo awatname. Laasi nyene umle biname, tabe te jäärngege, drowā gwidape me namba ngeni myene. Pui namba lui biname me ngii tääpu myene. Pui lui 666 gyene.

14

Maamoi piyepu Teeme Binamewale

¹ Puma cita ca cane ire acitine, jepänine Maamoi ne aclajuteji Siiyona podo cabu. Ten cama puga ge yepä hanred footifoo tausen biname, laati bime mangace cabu oogäräneji ge Maamoi me ngii piyepu teeme Babe me ngii.

² Cane cabucewe ca tagepogogo nätecijige epu pana niye te lipu podo cabu ca babo ala cama täcwäjuge piyepu cuta babo maadubi me ala liyepu. Pui tagepogogo cuta epu pana ge, biname cina lipu haapi bine jäänäjimusi.

³ Pui yepä hanred footifoo tausen biname cina jeclajutemige babo adnata puupu piyepu fooa ireclota gwidape piyepu twentifoo modamoda biname bime opo gaabe je, siige kirece uupera ne etangisi puma. Nuuja te ibibi lica ge peei uupera ne abiberäjame, yepä pui yepä hanred footifoo tausen biname lui cina Keriso me uudi ca aletnäneji gemi gawecewe cabu ca.

⁴ Teepi lui eei biname gemi, lui cina cogacoga mule umle cāco, ingle teepi camu tääpe cama gemi. Teepi Maamoi ne ingwe icwensisi, tabe liiyeme läduge. Teebibine ituge aletna gawecewe biname bime cabu ca. Teepi lui Acejiyame me piyepu Maamoi me binamewale gemi. Teepi epu pana gemi ire acita cabu niinäceyame kuu lui yääcārusi Acejiyame ne.

⁵ Teeme tage cabu ca nuuja walya mene te lica ituge asata, coo nuuja niya mule ne lica ituge päpäna teeme cabu.

Nesae Acejiyame me Mename Seemo cina Mene Jücemisi

⁶ Puma cita ca cane jepänine yepä mename seemo te cabu je uujana. Miiji Mene lui iyeteta gyene, tabe pui ne ecenanige iyeta biname bime bau me gawecewe cabu, ingle maramara, mene maramara, tääpe maramara, gawe maramara biname bime bau me.

⁷ Tabe baborage tagepogogo ca jüicige egä, “Acejiyame tääpume miiji wālu, teebine miiji awepyerāja, ingle padare te bii tatyaramtige tabe biname bine atraname. Opo gaabe me eciteye, lui te jewenimuji cabucewe ne, gawecewe ne, malu ne, waja bine.”

⁸ Teeme ingwe gaabe ca nuuja mename seemo te tädige, jiiçige egä, “Siige, tabe bitramige! Babo cewe Babloniya te bitramige! Teeme sargi mule* cina sabe jaawenemepesi iyeta gawe maramara biname bine. Teeme pui sargi mule lui kokre waina niye pana ge, siige tabe biname bine jaawenemepi pui nanime.”

⁹ Pui neeneneni mename seemo bime ingwe gaabe ca nuuja te cuta tädige. Tabe jiiçige baborage tagepogogo ca egä, “Laati te liba opo gaabe me yaacituge drowä gwidape ne coo teeme pana wawenäneji gwidape ne, coo liba ime cabu coo mangace cabu teeme cewecu ne yaacatuge,

¹⁰ tabe te miiji Acejiyame me claabe waina niye ne nani. Ai lui wainarage niye ge, Acejiyame me claabe ge, tabe lui ne epadurige kaapo cabu me. Apu biname bine cirege ädnäja uliobo wädräji cabu piyepu niyyarage lengo gwidape ngii sulpur wädräji cabu Acejiyame me mename seemo bime piyepu Maamoi me opo gaabe je.

¹¹ Pui uliobo lui ätuma cäco gyene. Teeme kloka cina iyeteta täseninini cabu me. Laatibi drowä gwidape ne coo teeme pana wawenäneji gwidape ne opo gaabe me yaacitusi, coo laatibi teeme ngii ne yaacatanusi mangace cabu coo piyepu ime cabu, teepi ciye bimu diibe oocana lica cirege pui uliobo cabu ca.

¹² Acejiyame me binamewale cina, laatibi teeme mene yäätacijemuge piyepu laati bemi toraca Yeesu tääpume, teepi gone onya te agli pui drowä gwidape me gaabe cabu otnetnejame.”

¹³ Puma cita ca cane näteçijige cabucewe ca tagepogogo te iicana egä, “Maane apu yoogäri egä: Gege gemi pui biname cina ama cita ca ngälu Yageyame me kaakesea cabu lui cina budre ne cire jääpänepesi.” Acejiyame me Seemo te jewecnistige teebine egä, “Toraca mene gyene! Teepi pagege ngene oocana teeme mäpu kaakesea cabu ca, ingle mene te teeme kaakesea poto cidi me ten cama ädenige.”

Gawecewe me Ire Acita Padare

¹⁴ Puma cita ca cane ire acitine, bulubulu carbe ne jepänine. Pui carbe cabu puga ge adnatäneji biname pana gwidape. Teeme mope cabu puga ge gol ca wawenäneji krauni piyepu ime cabu girirage turikä calwacupi ne ärucname.

¹⁵ Iiwäreja mete cabu ca cuta nuuja mename seemo te tasatige, baborage tagepogogo ca ala abayige pui gwidape bau me, carbe cabu lui te enajige egä, “Maane gije abaciti määme turikä ca kuu bine alacname, ingle ärucna padare te bii tatyaramtuge. Gawecewe te ngade bewangige ärucna tääpume.”

¹⁶ Siige lui te adnatäneji enajige carbe cabu, teeme turikä ne sjarige gawe cabu me, siige iyeta ngade bine irucnimige.

¹⁷ Iiwäreja mete cabu ca tasatige nuuja mename seemo te. Tabe cuta girirage turikä cama ge.

¹⁸ Iiwäreja mete cabu iiwäreja dade gome ca cuta nuuja mename seemo te tasatige, lui te uliobo ne ire jaatwuge. Tabe öräre ala abayige pui mename seemo bau me, lui me ime cabu girirage turikä puga ge. Tabe apu jiiçige egä, “Määme turikä ca jelacnimi waina kuu bine, ingle ngade bewangetnemige gawecewe me calwacupi cabu.”

¹⁹ Siige pui mename seemo te teeme turikä ne sjarige gawe me, jelacnimige waina kuu bine, siige yiisabimige kula cupicu bora me ämungejame. Ai lui Acejiyame me daremu gyene niya mule biname bime tääpume.

²⁰ Waina kuu bine jimungäjemisi kula cupicu ngalebora je babo cewe kaakepoto cidi ca, siige uudi te tasatige pui ämungeja puupu cabu ca igi niye pana, lui niye yepä piyepu cebocebo miita uugle ge piyepu trii hanred kilomiita leca ge.

15

Seben Acejiyame me Mename Seemo cina Lui Mäpu bine Tityepemisi

¹ Piba cane jepänine mara opo gwidape ne cabucewe je, cälu te äti pana baborage gwidape. Pui lui seben mename seemo ge seben mäpu mule cama. Pui lui ceräcerägäabu mäpu mule gemi, ingle teepi Acejiyame me claabe ne pa yaapirepesi.

² Puma cita ca cane jepänine gwidape ne, lui glaasi malu pana ge, uliobo cama alengläcitäneji ge. Cane cuta jepänimine lui cina ituge uutruta drowä gwidape cabu ca, teeme pana wawenäneji gwidape cabu ca piyepu teeme ngii namba cabu ca. Teepi glaasi pana malu gome jeclajutemige, haapi bine joomlemisi, Acejiyame lui ecäranemige.

³ Siige teepi etangenisi Acejiyame me kaakesea biname Moose piyepu Maamoi, teeme uupera ne apu egä,

* **14:8:** sargi mule: Ai lui toraca sargi mule lica gyene. Biname cina uuje bine jäärungemepesi, lica Acejiyame ne. Peei lui epu pana gyene, egä teepi sargi mule ne jaawenepesi.

“Yageyame, kokrerage Acejiyame,
maane ngena jaawenute, baborage piiyepu miijirage gyene!

Gawe maramara biname bime Mopeyame,
määme mule lipu conocäco piiyepu toraca gemi!

⁴Yageyame, iyeta biname cina wälu gemi määme täapume
piiyepe määme ngii ne ewepperäjjenisi,
ingle maane taatu gäte epucäco.

Iyeta gawe maramara biname cina cirege otni
meebine opo gaabe me acitame,
ingle teepi määme conocäco atrana ne ituge päpäna.”

⁵Ai ingwe gaabe ca cane jepänine cabucewe je lui iiwäreja mete te iitneji ge. Pui mete cabu puga ge cäbletääpe ca wawenäneji mete, Acejiyame luma enajenige.

⁶Iiwäreja mete cabu ca pui seben mename seemo cina täsige, lui bime mäpu mule puga ge. Teepi bulubulu cäbletääpe asigräreji ge, lui jugi cäco piiyepu oplacmeläja cama. Teepi gol seea ca ätäyäneji ge dare cabu.

⁷Foa ireclota gwidape bime yepä te ecäranemige teeme yepäyepä bine gol disi. Acejiyame lui te iyeteta gyene, teeme claabe ca apanäneji ge pui disi cina.

⁸Acejiyame me kokre piiyepu apaclyera iiwäreja mete ne epu pana icwabige, kloka te lipu mete ne yaacwabuge. Nuuja te äblicäco ge piiyeme abacita, ngälu pui seben mename seemo bime mäpu cina liba pa lapiripesi.

16

Seben Ceräcerägääbu Mäpu Mule

¹Puma cita ca cane nätecijige baborage tagepogogo iiwäreja mete cabu ca, lui jejemige pui seben mename seemo bine egä, “Äte, ecebmäläjemeye gawe cabu me Acejiyame me claabe cama lui seben disi gemi!”

²Piba niinäce manu mename seemo te ädige, ecebmälige teemanu disi ne gawe cabu me, siige lui cina drowä gwidape me cewecu ne itu yaacatepesi cuta lui cina teeme pana wawenäneji gwidape ne itu opo gaabe me yaacitanepesi, teepi mage niiyarage pita droobo bine jepänanemisi.

³Puma cita ca neeneneni manu mename seemo te teemanu disi ne ecebmälige malu cabu me. Niyye te epu pana äbitige budre biname me uudi liiyepu, siige iyeta ireclota gwidape cina budre äbitinini puma.

⁴Cuta nesae manu mename seemo te teemanu disi ne ecebmälige baduge bora me piiyepu waja bora me, siige niyye cina uudi me atepलगंजिनिसि.

⁵Cane nätecijige niyye bine lui mename seemo te ire jetwemenige, jicige egä,
“Oo, maane epucäco Acejiyame gäte,
maane lui tage uja piiyepu lui säte page!

Määme atrana lui conocäco gyene.

⁶Teepi yaaglecemepesi määme binamewale bine
piiyepe määme menameyame bine,
siige maane becärimite uudi teepi nanime.

Teepi teeme niyya mule daremu becatisi.”

⁷Puma cita ca cane nätecijige iiwäreja dade gome ca tagepogogo egä, “Yageyame, kokrerage Acejiyame, määme atrana lui toraca gyene piiyepu conocäco gyene.”

⁸Puma cita ca foa manu mename seemo te teeme disi ne ecebmälige bimu cabu me, siige bimu te baborage nuunu me äbitige, biname bine ebemige teeme nuunu te.

⁹Biname bine niyyaniya ebemige, yepä teepi Acejiyame me ngii ne sabe jewenanisi, lui me ime cabu sine ai mäpu bine ätyejeame. Teepi singi lica teeme niyya mule cabu ca atatröngärame piiyepu Acejiyame me ngii ne awepperäjame.

¹⁰Puma cita ca faib manu mename seemo te teeme disi ne ecebmälige drowä gwidape me babo adnata puupu cabu me. Krokeciyye te icwabige tabe lui gawe ne ecanige. Biname cina wätä ägutaninisi pita name pi.

¹¹Siige teepi caburage Acejiyame me ngii ne sabe jewenanisi teeme droobo piiyepu pita name pi, yepä teepi teeme niyyaniya mule cabu ca lica atatröngärinini.

¹²Puma cita ca siks manu mename seemo te teeme disi ne ecebmälige Euprates baborage baduge cabu me. Baduge te yuuri-cnige, gaabe me äbitige naace täapume gawe mope biname cina otnime bimu acita gome ca.

¹³ Piba cane nesae niiyarage cable bine jepänimine. Teepi poogä pana ge. Teeme yepä te siible me tage bora ca tasatige, nuuja te drowä gwidape me tage bora ca tasatige, nuuja te walya mename biname* me tage bora ca tasatige.

¹⁴ Teepi niyaniya seemo gämi, lui cina ciitaca mule bine jewenenemisi. Teepi cirege otnetneja gawecewe cabu ta maramara gawe mope biname bine abasecretname yepä gome me teepi cubu iicaname kokrerage Acejiyame me babo bimü cabu.

¹⁵ "Iteciijinege, cane eromaame pana ädenine! Gege gyene pui biname, lui te ireclota enajenige, teeme cäbletääpe bine cängenarage ire jetwemenige, piba tabe cuutacuta lica cire waatne-pi, siige biname bime sobe cabu tabe ajiri lica cirege."

¹⁶ Puma cita ca pui seemo cina jebasecretnimisi gawe maramara mope biname bine puupu cabu me, Heberu mene ca lui puupu ne einenisi Armagedona ca.

¹⁷ Siige seben manu mename seemo te teeme disi ne ecebmalige buuwemope cabu me. Iiwäreja mete cabu babo adnata puupu cabu ca baborage tagepogogo te jiicige egä, "Siige, bapirige!"

¹⁸ Paamlepamle cina toplacmeläjininisi, babo ala puga ge, maadubi cina ala sengenetnemige piyepu baborage ocneja puga ge. Niinäce pepu baborage ocneja ne lica ituge päpäna agedna cabu ca ngälu ai padare cabu.

¹⁹ Babo cewe te äplige nesae cebocebo me, piyepu cuta maramara gawe cabu ta modamoda cewe cina sabe äbitinisi. Acejiyame te ngene lica jitrimalige babo cewe Babloniya poto cidi me, siige tabe jebenige waina niye nanime kaapo cabu ca. Pui waina niye lui teeme Acejiyame me claabe ge.

²⁰ Iyeta curä cina apeseräjininisi, iyeta podo cina baa liiyeme äbitinisi.

²¹ Modamoda aisi ipecu cina sitrametnemige cabu ca biname bime papa cabu me. Teeme yepäyepä bime mäpu lui footifaib kilo ge. Yepä biname cina Acejiyame me ngii ne sabe jewenisi ai mäpu miji pi, ingle mage niiyarage ge.

17

Babo Sargi Magebi piyepu Drowä Gwidape

¹ Disi cama lui seben mename seemo, teeme yepä te tädige cäme bau me, najige egä, "Tädi, cane naawabenine, babo sargi magebi ne lipulipu cirege daremu ceera, pui babo cewe ne lui bucurage niye gome ituge raranga.

² Gawe maramara mope biname cina ten cama sargi mule ituge wawena, piyepu biname cina sice buduma pana me ituge äbita teeme sargi mule waina niye nani cabu ca."

³ Puma cita ca Aceji Seemo te nacenanige cebine, mename seemo te nacanige biname cäco cewe cabu me. Puma cane jopänine magebi ne adnatäneji ge ududi drowä gwidape papa cabu. Tabe lui seben mope cama ge piyepu ten gaale cama ge. Teeme iyeta tääpe cabu niiyarage ngii oogäräneji ge Acejiyame ne sabe wawename.

⁴ Magebi te ududi piyepu ciryäciryä cäbletääpe asigräneji ge, acwabäneji ge gol ca wawenäneji abasogära gwidape ca, oplacmeläja kula ca piyepu kusa ca. Teeme ime cabu gol kaapo puga ge, lui apanäneji ge teeme jugijugi mule ca piyepu sargi mule ca.

⁵ Teeme mangace cabu oogäräneji ge ngii, lui me aboclomta ogä gyene. Apu oogäräneji gyene,

BABO CEWE BABLONIYA, LUI INGLE GYENE
IYETA JUGIJUGI PIYEPU SARGI MULE TÄÄPUME
AI GAWECEWE CABU.

⁶ Cane jopänine, egä tabe sice buduma pana gwene Acejiyame me binamewale bime uudi nani cabu ca piyepu eei bime uudi nani cabu ca, lui bine ituge budre me agleca Yeesu cabu ätrunga miji pi.

Cane liba jopänine teebine, cane mage mutäcäco äbitine.

⁷ Pui mename seemo te cebine nätemlige egä, "Maane ngeno me mutäcäco bäbitite? Cane naajenine, ai magebi lui ngena tääpume mwene, piyepu cane naajenine, pui seben mope cama ten gaale cama drowä gwidape lui ngeno myene, magebi lui me papa cabu onajenige.

⁸ Maane lui drowä gwidape ne niinäce jääpänepete, lui uja yaanajepi, siige page lica gyene, tabe mameta gyene cuta cääri asata piyemrage cupicu cabu ca, yepä sabe cire läbitepi. Ai gawecewe cabu lenajayame lui bime ngii lica ituge oogära ireclota peba cabu, Acejiyame te luma ngii itu yoogärimuji agedna me niinäce gaabe ca, teepi cirege cälu te äti liba cire jääpänepesi ai drowä gwidape ne, ingle tabe uja yaanajepi, siige page lica gyene, yepä cuta cire tacnepi.

* **16:13:** Fwalya mename biname: Ama cita ca ngälu neeneni me drowä gwidape lui te tasatapi gawe cabu ca, pui ne einenisi walya mename biname ca. Tabe niinäce drowä gwidape me ngii cabu mene jiicemuge biname bine conocono gaabe cabu me waadename.

⁹ Umle biname lete nemi, teepi te ai mule ne ngene ca aglime. Drowä gwidape me seben mope lui seben podo gemi, magebi te lui papa cabu onajenige. Teepi cuta seben gawe mope biname gemi.

¹⁰ Faib cina itu itrametnemuji, yepä te pisi nyene, yepä te camu gyene otni. Tabe liba cire tädepi, tabe matikäli padare taatu cire yaanajepi.

¹¹ Cuta pui drowä gwidape lui te uja yaanajepi, siige page lica gyene, liba cire tacenutepi, tabe eit manu babo biname me cire yaanajepi. Tabe cuta peese nyene pui seben mope biname bime yepä, siige tabe budre gome me cire lädepi.

¹² Maane lui ten gaale bine jepänimite, teepi lui ten gawe mope biname gemi, lui cina camu gemi mope biname me äbita. Teepi liba cire läbitipesi mope biname me, teepi pui drowä gwidape cama gigri matikäli taatu padare cabu biname bine cire yaawadepesi.

¹³ Teepi yepä ngene atwana cama cirege, siige drowä gwidape ne teeme kokre cire yääcärepesi.

¹⁴ Teepi cire larngipesi Maamoi cama, yepä Maamoi teeme binamewale cama pa yaapremalemepi teebibine, ingle tabe iyeta yageyame bime Yageyame gyene piyepu iyeta mopeyame bime Mopeyame gyene. Teeme binamewale eei gemi, Acejiyame lui bine ala ituge asogleca piyepu äjäcra. Teepi siige toraca gemi teeme täapume.”

¹⁵ Mename seemo te cuta apu cebine najige egä, “Maane lui niye bine jepänimite, sargi magebi te lui gome onajenige, teepi lui gawe maramara, ingle maramara, täape maramara, mene maramara biname bime täapu memi.

¹⁶ Maane lui ten gaale bine jepänimite piyepu lui drowä gwidape ne jepänite, teepi pui sargi magebi ne cire jwäägyepesi. Teepi teeme iyeta gwidape bine cire yaawademepesi, cire jwiirecemepesi siige cuutacuta cire waabma-lepesi. Teepi teeme mäju bine cire yäärngäjemepesi, siige uliobo cabu cire waaceratepesi.

¹⁷ Pui ten gawe mope biname cina cirege ai bine wawenetnäja, ingle Acejiyame te cire jaawenemepi teepi wawename, tabe ngena täapume singi. Siige teepi yepä ngene atwana cama teeme kokre drowä gwidape ne cire yääcärepesi. Teepi drowä gwidape ne cire jäätecijepesi, ngälu Acejiyame me mene ibi cire läbitipesi.

¹⁸ Lui magebi ne jopänite tabe lui babo cewe täapu mwene, luma cita ca ire jetwenenemisi iyeta gawe maramara mope biname bine.”

18

Babo Cewe Babloniya Itramige

¹ Ai mule ingwe gaabe ca cane piba jepänine nuuja mename seemo ne, lui te cabu ca täinige. Tabe babo kokre cama ge piyepu teeme apaclyera te gawecewe ne epaclyäriige.

² Tabe babo tagepogogo ca ala abayanige egä, “Siige tabe bitramige! Babo cewe Babloniya bitramige!

Tabe bäbitige jugijugi piyepu niyaniya cable bime lenaja puupu me.

Cibu cäco niyarage ele cina puma teeme mete bine bii berangäjemisi.

³ Iyeta gawe maramara biname cina teeme waina niye ne senumesi, teeme sargi mule me kokre waina niye ne.

Gawe maramara mope biname cina ten cama sargi mule yaacnepesi piyepu gawecewe me iyeta aletnaletna biname cina teeme bau ca bucurage rarekaake bine jääpänanemepesi, ingle tabe singi teeme bau ca gwidape aletname teeme lijaliya singi bine ngene aglime.”

⁴ Puma cita ca cane cuta nuuja tagepogogo cabucewe ca nätecijige, lui jiiicige egä, “Täsineye cäme binamewale, täsineye peei cewe cabu ca. Gone yääbäcnuye teeme niya mule cabu me, piba weene ten cama yepä niya daremu ne lica cirege päpäna.

⁵ Teeme niya mule epu bucurage gemi, egä bii jegeletnemige cabucewe me, siige Acejiyame te ngene bii jotwige teeme niyarage mule täapume.

⁶ Pepu jewenepeye teebine, tabe lipu weebibine itu jiwenipi. Tabe ngena ituge wawena weeme täapume, weene cuta neeneni me daremu ewecnistepeye. Jengärepeye teeme kaapo ne neeneni gäabu kokre waina niye ca, tabe lui waina niye weebibine itu icäripi.

⁷ Puma ngälu mäpu piyepu ele ecärepeye, tabe luma ngälu lawepyeräjepi piyepu gwidape papa cabu yaanajepi. Tabe teemämu apu jiiicanenige, ‘Cane age säne babo mope magebi. Cane nuuja cuubla lica gäne; cane nuuja singi lica gäne ele me.’

⁸ Peei name pi yepä bimu cabu mäpu biijabija cina teebine cire jaabale-tnecepesi, naace pita, ngenecu mäpu, gane. Teebine uliobo cabu cirege uubudera, ingle Yageyame, Acejiyame, lui te teebine cire jaatranepi, tabe babo kokreyame gyene.”

⁹ Siige gawe mope biname lui cina ten cama sargi mule yaacne-musi piyepu teeme singisingi cabu me yääbäcnusi, teepi ele cire yääwäyepesi liba cire jääpänepesi uliobo kloka ne, teebine lui te cire yaabenepi.

¹⁰ Teepi cudecewe je cire yäämyemutemepi, inge teepi mage wälu cirege teeme mäpu name pi. Teepi cire jüicespi egä, "Oo babo cewe Babloniya, babo kokreyame cewe, lipu niyarage gyene mäame täápume! Maane watatarage atrana ne bii jepänite."

¹¹ Ai gawe cabu gwidape bine aletname lui biname cina yaawadimusi, teepi cuta ele cire yääwäyepesi teebine, inge ingwe ca laati te teeme bau ca gwidape bine cire jaaletnemepi:

¹² teeme gol, silba, oplacmeläja kula piyepu kusa; müjimiji opo bulubulu cäbletääpe, silk cäbletääpe piyepu cäbletääpe lui ududi piyepu ciriyäciriya kala cama; maramara uli müjimiji lengo cama, maramara gwidape lui bine wawenäneji gemi elepent me giricu ca, müjimiji uli ca, braasi ayana ca, ayana ca, bulubulu kula ca ngii maabolo;

¹³ piyepu maramara gwidape lui cina mite yääcärusi deedei ne, müjimiji lengo kloka cama lui gwidape, opo piyepu edingäli agana müjimiji lengo gwidape; waina niye, oil, bulu, wiiti kuu; kau, maamoi, cooso piyepu kariyota, cooso cina lui bine yälädnäjemusi. Teepi cuta aletnäneji biname bine yaawadimusi aletname cuta piyepu biname bime ireclota bine.

¹⁴ Aletnaletna biname cina jejisi egä, "Maane lui müjimiji gwidape täápume babo singi naanananumi, siige lica gemi. Määme iyeta dogwe piyepu anglangla gwidape cina niya bäbitinisi, ingwe ca lica cirege päpäna."

¹⁵ Yoo, lui biname cina pui babo cewe cabu me gwidape bine yaawadanemepesi aletname, puma cita ca rarekaake jääpänanemepesi, teepi cudecewe je cire yäämyemutemepi, wälu cama ire cirege teeme mäpu täápume. Teepi ele cire yääwäyepesi,

¹⁶ cire jüicespi egä, "Oo baborage cewe, lipu niyarage gyene teeme täápume! Tabe lasigruge müjirage opo bulubulu cäbletääpe ca, ududi piyepu ciriyäciriya kala cama cäbletääpe ca; cuta labasogäruge gol ca wawenäneji gwidape ca, oplacmeläja kula ca piyepu kusa ca.

¹⁷ Siige, watatarage teeme bucurage gwidape cina niya bäbitinisi."

Siige iyeta buto waapo awadena biname, buto cabu kaakesea biname, buto cabu otnetneja biname piyepu malu cabu lijali ja kaakesea biname gemi, teepi iyeta cudecewe je cire yäämyemutemepi.

¹⁸ Siige liba jepänisi teeme kloka ne cabu me agela, jüicisi egä, "Oo, nuuja cewe lica gyene ai cewe pana!"

¹⁹ Teepi uubli ca aganininisi, ele ewäyisi, jüicisi egä, "Lipu niyarage gyene ai baborage cewe täápume! Teeme bau ca iyeta lijali buto yageyame cina teeme rarekaake bine jääpänanemusi. Siige watatarage iyeta teeme gwidape cina niya bäbitinisi."

²⁰ Cabucewe, maane müji gege, inge pui babo cewe te lipu niya ne bii jepänige! Acejiyame me binamewale, weene müji gege; Keriso me ätyepänepi biname piyepu Acejiyame me mename biname weene cuta müji gege, inge Acejiyame te niya daremu becärige teebine, naace name pi tabe lipu weebibine jiwepi.

²¹ Puma cita ca yepä kokre mename seemo te babo kula ne ecatige, ijarige malu cabu me, jüicige egä, "Babo cewe Babloniya ne apu cirege gawe me ajara, siige ingwe ca lica cirege päpäna.

²² Ingwe ca lica cirege mäame gaabe cabu ätecija haapi ala ne, nuuja uupera ne, gogogo ala ne, moole ala ne. Biname cina lui maramara kaakesea bine jaawenimusi, teebibine ingwe ca lica cirege mäame cabu päpäna. Deedei gädnäja guugla ingwe ca lica cirege ätecija mäame cabu.

²³ piyepu lampa ngale ne ingwe ca lica cirege päpäna mäame cabu, cuta ciwelooloyame bime atejälmuta gege ne ingwe ca lica cire jääpänepesi mäame cabu. Apu cirege äbita, inge mäame aletnaletna biname, lui niinäce gaabe ge ai gawecewe cabu, piyepu mäame mowä piyepu piiseba mule biname cina gawe maramara biname bine itu yaangletnäjemepesi.

²⁴ Määme gaabe cabu cuta ituge apira Acejiyame me mename biname bime uudi piyepu cuta teeme poto binamewale bime uudi, cuta iyeta biname bime uudi, lui bine ituge agleca ai gawecewe cabu."

19

¹ Ai ingwe gaabe ca cane nätecijige bucurage biname cina iicana pana tagepogogo cabucewe ca, lui jüicige egä,

"Acejiyame ne ewepyeräjeyel

Ireclota, iyeta müji piyepu kokre mime Acejiyame memi,

² inge teeme atrana lui conocäco piyepu toraca gyene.

Tabe jutranige babo sargi magebi ne,

lui ai gawecewe ne ire jaarmetnanuge teeme sargi mule ca.

Acejiyame te mäpu daremu bii bocäriige;

ingle tabe teeme kaakesea bägrä bine budre me itu yaaglecanemepi.”

³ Teepei cuta cääri abayaninisi egä, “Acejiyame ne ewepperäjeje! Babo cewe me kloka te iyeteta cire jaagelepi cabu mei!”

⁴ Puma cita ca twentifoo modamoda biname piyepu fooma ireclota gwidape cina itramet-nemalige gawe cabu me, Acejiyame ne opo gaabe me ecitisi, babo adnata puupu cabu lui te enajenige. Teepei jüicisi egä, “Toraca, Acejiyame ne ewepperäjeje!”

Maamoi me Atejäclmuta Soriyomu

⁵ Piba cane nätecijige tagepogogo te babo adnata puupu gome ca jüicige egä, “Iyeta Acejiyame me kaakesea bägrä, lui cina wälu gemi teeme täapume matimati cabu ca ngälu modamoda, weene mime Acejiyame ne ewepperäjeje!”

⁶ Siige puma cita ca cane nätecijige bucurage biname cina iicana pana tagepogogo, epu pana niye te lipu babo ala cama täcwäjcuge podo cabu ca, cuta maadubi ala pana ge. Teepei apu jüicisi egä,

“Acejiyame ne ewepperäjeje!

Yageyame, mime kokrerage Acejiyame,

tabe sine page Mopeyame!

⁷ Mine müiji ngenecu müiji piyepu gege ninajinege!

Mine teeme ngii ne yaaweperäjesi,

ingle Maamoi me atejäclmuta padare te bii tatyaramtige.

Teeme ngulebägrä te amacetnäjäneji gwene teeme täapume.

⁸ Teebine ituge jugi cäco bulubulu cäbletääpe ceera

tabe asigrame.”

Ai bulubulu cäbletääpe lui Acejiyame me binamewale bime conocäco mule gemi.

⁹ Puma cita ca mename seemo te cebine najige egä, “Maane yoogäri egä: gege gemi, lui cina ala asogläcneji gemi Maamoi me atejäclmuta soriyomu täapume.” Cuta tabe jüicige egä, “Ai lui Acejiyame me toraca mene gyene.”

¹⁰ Cane teeme ernge gawe me natramige teebine opo gaabe me acitame, yepä tabe najige egä, “Peei ne gone jaawenute! Cane cuta Acejiyame me kaakesea bägrä gäne maane liiyepu cuta mäame poto ätrunga binamewale cina liiyepu, iyeta lui cina joomlenisi toraca mene ne, Yeesu lui ne ituge awabudnita. Maane Acejiyame ne opo gaabe me eciti!”

Yeesu lui toraca mene ne ituge awabudnita, peese nyene lui te Acejiyame me mename biname bine ngenene atwana yäcäranemuge.

Biname Lui te Bulubulu Cooso cabu Tädiige

¹¹ Puma cita ca cane jepänine cabucewe te iitneji ge, cuta bulubulu cooso ne jepänine puma. Cooso cabu lui te tädiige, teeme ngii lui Toraca piyepu Conocäco. Teeme atrana piyepu cubu iicana lui conocäco gyene.

¹² Teeme irecu lui uliobo wäd räji pana ge, piyepu teeme mope cabu puga ge bucurage krauni. Teeme cabu ngii puga ge, yepä nuuja te umle lica gyene, ngena ngii gyene. Tabe taatu gyene umle.

¹³ Tabe lui cäbletääpe ca asigräneji ge, uudi cabu ituge iiglenuta. Teeme ngii lui Acejiyame me Mene gyene.

¹⁴ Cabucewe caami cina teebine ingwe sicwisi, bulubulu cooso cabu seclige. Teepei jugi cäco bulubulu cäbletääpe cama ge.

¹⁵ Bulubulu cooso cabu lui te tädiige, teeme tage cabu ca girirage cubuturikä te tasatige. Tabe pui turikä ca cire yaawecetnäremepi gawe maramara biname bine. Tabe teebibine ayana suru ca cire yaawecetnäremepi. Tabe kokrerage Acejiyame me claabe ne cire yaaboclomtepi. Biname te lipu jäämungäjemuge waina kuu bine migi apirame, tabe pepu cirege Acejiyame me cubuyame bine ämungeja.

¹⁶ Teeme cäbletääpe cabu piyepu wawe cabu ngii oogäräneji gyene egä,

IYETA MOPE BINAME BIME MOPE BINAME,

IYETA YAGEYAME BIME YAGEYAME.

¹⁷ Puma cita ca cane mename seemo ne jepänine bimu cabu aclajuteji. Tabe baborage tagepogogo ca ala abayanige iyeta ele bime cabu me, lui cina cabu je uujaninisi egä, “Naaclege, tabasecretnineye Acejiyame me babo soriyomu täapume!

¹⁸ Naaclege gawe maramara mope biname bime mäju cibu me, cubu mope biname bime mäju cibu me, caami biname bime mäju cibu me, cooso bime mäju cibu me, teeme waadenenayame bime mäju cibu me. Iyeta biname bime mäju cibu me naaclege, aletnäneji biname bime mäju cibu me piyepu poto biname bime mäju cibu me, iyeta biname bime mäju cibu me modamoda biname cabu ca ngälu matimati me.”

¹⁹ Puma cita ca cane jepänine drowä gwidape ne piyepu jepänimine gawe maramara mope bina bine piyepu teeme caami bine. Teepi abasecretnäneji gemi naace täápume cubu iicaname biname cama, lui te bulubulu cooso cabu tädige, piyepu teeme caami cama.

²⁰ Drowä gwidape piyepu walya mename biname, lui te ciitaca mule itu jaawenemepi teeme opo gaabe je, teebibine joomlisi. (Teeme pui ciitaca mule ca tabe ituge angletneja, lui cina drowä gwidape me cewecu ne itu yaacatanepesi, cuta teeme pana wawenäneji gwidape ne lui cina itu opo gaabe me yaacitanepesi.) Siige teebibine ireclota cama aajarisi uliobo puupu cabu me, luma niiyarage lengo gwidape ngii sulphur ayenige.

²¹ Teeme caami bine cubuturikä te eglecimige, lui turikä te tasatige pui me tage cabu ca, bulubulu cooso cabu lui te tädige. Iyeta ele cina teeme mäju bine erngäjimisi, ngälu camuge äbitinisi.

20

Satani te Cirege Ätäyäneji Lenaja Yepä Tausen Kämäge Ngalebora

¹ Cane puma cita ca jepänine, Acejiyame me mename seemo te cabucewe ca täinige kii cama piyemrage cupicu ne iitnaname, cuta teeme ayana seea puga ge.

² Tabe joomlige siible ne, pui sasaraige cobyame ne, Diyabolo ca piyepu Satani ca lui ne einenisi. Tabe jetäyige teebine yepä tausen kämäge täápume,

³ ijarige piyemrage cupicu bora me, cupicu ne kii ca ermige, klaje jewenige tabe puma lenajame ngälu yepä tausen kämäge cina liba cire lapiripesi, siige tabe piba biname bine lica angletneja. Peei ingwe gaabe ca teebine cirege asata, iibira matikäli padare cabu lenajame ai gawe cabu.

⁴ Puma cita ca cane jepänimine mope biname bime adnatera puupu bine piyepu lui cina adnatäreji ge puma. Teebibine conocäco ituge ceera atrana täápume. Cane cuta eei biname bime cable bine jepänimine, lui bine ituge budre me agleca, inge teepi Yeesu ne itu teitnejanumesi, piyepu Acejiyame me Mene ne itu tejanemumesi. Teepi lica ituge drowä gwidape ne awejena coo piyepu teeme pana wawenäneji gwidape ne. Teepi cuta teeme cewecu ne lica ituge acatena mangace cabu coo piyepu ime cabu. Teepi ireclota cabu me täcnäriige, mope biname bime adnatera puupu cabu adnatäriige, siige Keriso cama gigri ai gawecewe ne ecanisi yepä tausen kämäge ngalebora.

⁵ Poto budre biname cina ireclota me lica täcnäriige, ngälu peei yepä tausen kämäge cina liba apirinini. Ai lui niinäce budre ca arpinera gyene.

⁶ Babo gege gemi, lui cina budre cabu ca niinäce cirege arpinera; teepi Acejiyame me binamewale gemi. Uliobo puupu lui neeneni me budre gyene, tabe teebibine lica cirege oomlema, yepä teepi iiwäreja biname täápume cire yaacrajemepi Acejiyame täápume piyepu Keriso täápume. Piyepu teepi Keriso cama gigri cire yaacanepesi ai gawecewe ne yepä tausen kämäge ngalebora.

Satani ne Epremalisi

⁷ Yepä tausen kämäge cina liba cire lapiripesi, Satani ne piba cirege asata cupicu cabu ca, siige iibira.

⁸ Tabe cire waatnepi iyeta poto ta gawe maramara biname bine angletnejame, naace Googi piyepu Maagogi biname bine. Tabe teebibine cire jaabasecretne-mepi cubu iicaname. Teepi epu bucurage gemi malu cabu koriyo liyepu.

⁹ Teepi ai gawecewe cabu eplidnärisi, Acejiyame me binamewale bime lenaja puupu ne jewaclomtisi, piyepu pui babo cewe ne tabe lui täápume singi. Yepä uliobo te täinige cabucewe ca, siige eglecimige teebibine.

¹⁰ Satani lui te teebibine ituge angletneja, teebine ijarisi uliobo piyepu niiyarage lengo gwidape ngii sulphur wäd räji cabu me, niinäce liiyeme ituge ajara drowä gwidape naabine walya mename biname. Teeme puma peei mäpu cabu lenaja iyeteta gyene, ciye bimu.

Ceräcerägäabu Atrana

¹¹ Puma cita ca cane jepänine bulubulu babo adnata puupu ne, cuta lui te adnatäreji gyene puma. Cabucewe piyepu gawecewe cina uucrasi teeme opo gaabe ca, siige teebibine ingwe ca lica cirege päpäna.

¹² Piyepu cane jepänimine budre biname bine matimati cabu ca ngälu modamoda me, teepi babo adnata puupu opo gaabe je jeclajutemige. Siige peba bine jepatnäjemisi. Cuta nuuja peba ne jepatnisi, naace ireclota peba ne, ngälu cäco ireclota päpäna täápume luma ngii oogäräneji gemi. Budre biname bine teeme mule ibi jitranimisi, peba cabu lipu oogäräneji gemi teeme poto cidi me.

¹³ Malu te teeme cable bine sewecnimige, budre piyepu aadiri cina cuta teeme cable bine sewecnemäsi, siige teebibine jitranimisi teeme mule ibi, teepi ngena ituge wawenetnäja.

¹⁴ Siige budre piyepu aadiri bine aajarisi uliobo puupu cabu me. Pui uliobo puupu lui neeneni me budre gyene.

¹⁵ Piyeme cuta iyeta eei biname bine yiisabimisi, lui bime ngii lica ge ireclota peba cabu, luma ngii ituge acrana ngälu cäco ireclota päpäna tääpume.

21

Kirece Cabucewe piyepu Gawecewe Cirege Lenaja

¹ Cane piba kirece cabucewe naabine kirece gawecewe jääpänine. Niinäce cabucewe piyepu gawecewe cina ituge apira, cuta malu te ituge apira.

² Cane cuta jepänine babo cewe, kirece Yerusalema ne, Acejiyame tääpume lui ne ituge mara me wawena, tabe teeme bau ca täinige cabu ca. Tabe epu pana abasogäräneji ge, ngulebägrä ne lipu waabasogärusi tabe atejäclmuta äbitame.

³ Cane nätecijige baborage tagepogogo te babo adnata puupu cabu ca iicana egä, "Ire, Acejiyame me lenaja puupu page biname bime cama gyene. Tabe teta cama cire yaanajepi, teepi teeme binamewale cirege. Tabe Acejiyamerage te ten cama lenaja, tabe teeme Acejiyame cirege.

⁴ Tabe cirege teeme irecu cabu ca ele mäcu äciseja. Puma ingwe ca piba budre lica cirege, nuuja ngenecu mäpu lica cirege, ele lica, pita lica, ingle sasa mule cina uja ituge apira."

⁵ Siige puma cita ca babo adnata puupu cabu lui te enajenige, jiiçige egä, "Cane iyeta gwidape bine kirece me jewenenemine!" Tabe cuta cebine najige egä, "Ai mene ne yoogäri peba cabu, ingle toraca gyene piyepu miiji gemi ätrungame."

⁶ Tabe cuta jiiçige, "Siige, iyeta gwidape cina wawenäneji gemi! Cane lui niinäcegaabeyame piyepu ceräcerägäabuyame, cane agedna piyepu apira gäne. Laati te niyemecewe, cane conocäco yäacärune tabe nanime ireclota niye waja cabu ca daremu cäco.

⁷ Laati te yuutrutuge, tabe cäme bau ca jääpänuge, egä cane teeme Acejiyame cirege, tabe cäme bägrä cirege.

⁸ Yepä lui cina wälu ajiri birige Yeesu ne aitnejame, cuta lui cina teeme ätrunga bine yaabmaläcemusi, lui cina jugijugi mule bine jaawenanemusi, lui cina biname bine budre me yaaglecimusi, lui cina ero mule jaawenusi coo sargiyame birige, cuta lui cina mowäyame, piyepu lui cina yiwäräjemusii uuje bine piyepu ime ca wawenäneji gwidape bine, iyeta lui cina walya waatromininusi, teebibine cirege piyeme iisaba, luma uliobo piyepu niiyarage lengo gwidape ngii sulpur cina ayenäsi. Ai lui neeneni me budre gyene."

Kirece Yerusalema te Täinige Cabu ca

⁹ Pui seben Acejiyame me mename seemo lui bime seben disi puga ge ceräcerägäabu mäpu mule cama, teeme yepä te tädige cäme bau me, najige egä, "Tädi, cane naawabenine Ngulebägrä, Maamoi lui ne cire waacatepi, tabe teeme coga cire waanajepi."

¹⁰ Siige Aceji Seemo te cebine nacenanige, mename seemo te nacanige baborage podo caburage me. Tabe puma cita ca nawabige Acejiyame me babo cewe Yerusalema ne, cabucewe ca lui täinige Acejiyame bau ca,

¹¹ teeme apaclyera cama toplacmeläjinige. Tabe epu pana toplacmeläjinige oplacmeläja kula liyepu, epu yaspere kula liyepu, päpäna taatu ge.

¹² Tabe caburage atreji cama ge, piyepu twelb grana cama ge, twelb mename seemo cina lui bine ire jaatwemusi. Grana yepäyepä cabu twelb Israela ingle bime yepäyepä ngii oogäräneji ge.

¹³ Bimu acita gome ca nesae grana ge, kämäge poto ca nesae grana ge, bimu äpula gome ca nesae grana ge, uule poto ca nesae grana ge.

¹⁴ Babo cewe me atreji ingle tääpume twelb modamoda kula bine acranäneji ge. Teeme cabu Maamoi me twelb ätyepäneji biname bime ngii oogäräneji ge.

¹⁵ Lui mename seemo te cebine mene najanige, teeme gol ca wawenäneji suru puga ge pui cewe ne atoneräjame teeme atreji piyepu grana cama.

¹⁶ Pui cewe me daamle piyepu leca yepä ibi ge. Siige mename seemo te teeme suru ca etoneräjige cewe ne. Tabe neeneni tausen fooa hanred kilomiita leca ge, cuta daamle pepu ge, cuta cabu me galena pepu ge.

¹⁷ Mename seemo te cuta atreji ne etoneräjige. Teeme cabu me galena lui sebbenti miita ge. Biname te lipu suru ca mete ne yaatoneräjuge, pui mename seemo te pepu cewe ne etoneräjige.

¹⁸ Atreji lui yaspere kula ca wawenäneji ge, piyepu cewe lui golrage ca wawenäneji ge, glaasi pana, päpäna taaturage.

¹⁹ Pui twelb kula lui ingle gemi atreji tääpume, maramara oplacmeläja kula ca abasogäräneji ge. Niinäce manu ingle kula lui yaspere kula ge, neeneni manu lui sapiri kula ge, nesae manu lui agate kula ge, fooa manu lui emeraldii kula ge,

²⁰ faib manu lui sardenus kula ge, siks manu lui karneliya kula ge, seben manu lui krusoliti kula ge, eit manu lui beruli kula ge, nain manu lui topasi kula ge, ten manu lui krusoprasi kula ge, lebin manu lui jakiniti kula ge, twelb manu lui ametisti kula ge.

²¹ Twelb grana lui miiri ca wawenäneji ge; yepäyepä grana lui yepäyepä modamoda miiri ca wawenäneji ge. Babo cewe me gaabe lui gol ca wawenäneji ge, iyeta päpäna taaturage, glaasi pana.

²² Cane iiwäreja mete ne lica jepänine puma, ingle Yageyame, babo kokre Acejiyame piyepu Maamoi, teepi puma cirege iyeteta lenaja, peei name pi nuuja ingle lica gyene mete täapume teebibine luma awejename.

²³ Babo cewe me nuuja ingle lica gyene bimu piyepu mabye teeme apaclyera täapume, ingle Acejiyame me apaclyera te epaclyärenige, piyepu Maamoi lui teeme lampa gyene.

²⁴ Gawe maramara biname cina pui apaclyera cabu cire waatnipesi, piyepu gawecewe me mope biname cina cire yaawademepesi teeme dogwe bine piyeme.

²⁵ Teeme grana lica cirege armi, ingle ciye lica cirege.

²⁶ Gawe maramara biname bime ngena dogwe piyepu miijimiji gwidape piti nemi, teepi piyeme cire yaawademepesi.

²⁷ Yepä nuuja nüyaniya mule biname cina piyeme lica cirege äbäcna, piyepu lui te ajiri cama mule jaawenimuge, cuta piyepu lui te walya waatromuge. Eei taatu cina cire yäbäcnepesi, lui bime ngii oogäräneji gemi Maamoi me peba cabu iyeteta ireclota täapume.

22

¹ Pui mename seemo te cuta nawabige ireclota niye baduge. Niye te päpäna taaturage ge, glaasi pana. Teeme mopecu lui Acejiyame piyepu Maamoi teeme babo adnata puupu ge,

² siige puma cita ca sewelenige babo cewe gaabe cole cabu ta. Pui baduge me neeneni poto ta yepäyepä ireclota uli puga ge, lui cina twelb gäabu kuu jääpänanemäsi yepä kämäge ngalebora, iyeta mabye gaabegabe yepä gäabu. Teeme laame lui maramara gawe biname bime pita müji wawenename.

³ Nuuja gwidape te lica gyene pui cewe cabu, Acejiyame te lui ne ägyi. Acejiyame piyepu Maamoi, teeme babo adnata puupu puma cirege. Acejiyame me kaakesea biname cina teeme täapume kaakesea puma cire jaawenepesi.

⁴ Teepi teeme opo ne cire jääpänepesi, piyepu teeme mangace cabu Acejiyame me ngii oogäräneji cirege.

⁵ Puma ciye lica cirege. Teepi nuuja singi lica lampa coo bimu apaclyera täapume, ingle Yageyame, Acejiyame, tabe sine teeme apaclyera. Teepi cirege mope biname me lenaja iyeteta, iyeteta.

Yeesu me Acnenuta

⁶ Puma cita ca pui mename seemo te cebine najige egä, “Ai peba cabu lui mene, toraca mene gemi, piyepu müji gemi ätrungame. Yageyame, Acejiyame, lui te ngena atwana sääcäranemuge teeme mename biname bine, tabe tityepige teeme mename seemo ne teeme kaakesea bägrä bine umle wawenename, egä ngena cina pagege watatarage äpletnera.”

⁷ Yeesu apu jiičenige egä, “Itecijinege, cane mameta gäne otni. Gege gemi, laatibi jäätrungimusi ai peba cabu lui mene gemi ciige padare poto cidi me.”

⁸ Cane, Yoane te nätecijuji ai mene piyepu jepänemujine iyeta ai gwidape bine. Lui mename seemo te nawabetnäruji iyeta ai gwidape, cane siige natramuji teeme ernge gawe me teebine opo gaabe me acitame.

⁹ Yepä tabe najuji egä, “Peei ne gone jaawenute! Cane yepä kaakesea bägrä gäne Acejiyame täapume maane liiyepu, mäame binamewale Acejiyame me mename biname cina liiyepu, piyepu iyeta lui cina ai peba mene yäätcejimuge. Maane cebine gone opo gaabe me nacistute, yepä Acejiyame ne opo gaabe me eciti!”

¹⁰ Tabe cuta najuji egä, “Ai peba cabu ngena mene gemi ciige padare täapume, gone yäämlitumi biname bime bau ca, ingle padare mameta gyene ai gwidape cina äpletnerame.

¹¹ Yoo, laati bemi niyya mule biname, teepi pepu lenajame; laati bemi jugijugi muleyame biname, teepi pepu lenajame; laati bemi müji mule biname, teepi pepu lenajame; cuta laatibi Acejiyame täapume mara me ituge äbita, teepi pepu lenajame.”

¹² Yeesu jiičenige apu egä, “Itecijinege, cane mameta gäne acnenuta. Cane căme daremu bine cire yaawademepene biname bine ceeramete teeme wawenetaja ibi.

¹³ Cane niinäcegaabeyame piyepu ceräcerägäabuyame, cane agedna piyepu apira gäne.

¹⁴ Gege gemi pui biname, lui cina teeme căbletäape bine jugi căco jääcisäjemus, naace täapume teeme piba conocăco pisi nyene kuu loolo me ireclota uli cabu ca piyepu grana cabu äbäcname babo cewe cabu me.

¹⁵ Yepä, babo cewe me kaake poto cidi ca cirege lenaja jugijugi mule biname, mowä piiyepu piiseba mule biname, sargi mule biname, budre me aglecayame biname piiyepu lui cina yiwäräjemusii uuje bine piiyepu ime ca wawenäneji gwidape bine, cuta lui cina baborage singi walya mene me, siige iyeta padare cabu walya mene jiiicanimusi.

¹⁶ Cane Yeesu te căme mename seemo ne ituge ätyepa ai gwidape poto cidi me weebibine jajanenname ätrunga maramara ingle cabu. Cane lui Daawida me kaakesaare gäne, cane jamyacu apacyera Guji Wale gäne.”

¹⁷ Siige Aceji Seemo piiyepu Yeesu me binamewale cina jiiicenisii egä, “Tädi!” Iyeta lui cina yäätacijemuge ai peba mene, teepi cuta miiji iicana egä, “Tädi!” Iyeta lui cina niyemecewe gemi piiyepu singi nanime, naaclege daremu căco ireclota niye nanime.

Cerăcerăgăăbu Umlē Mene Gyene

¹⁸ Cane Yoane, cane singi gäne umle mene jajime lui te yäätacijuge, ai peba mene ne liba yaacnemusi ciige gwidape poto cidi me: maane liba nuuja mene alenglăcita peei cabu, Acejiyame te cuta nuuja gwidape ne cire yaacitepi măăme daremu cabu. Tabe peei măpu cire năăcăranepe, ai peba te lui bine jeitnăjenenemige.

¹⁹ Cuta maane liba nuuja mene ne yăăyebliŋgtute ai peba cabu ca ciige gwidape poto cidi me, Acejiyame te cire yaawademepi măăme bau ca, tabe ngena miiji tăăpume jiiicenige ai peba cabu. Tabe meebine cire niibepi ireclota uli kuu loolome piiyepu Acejiyame me babo cewe cabu me otnime.

²⁰ Lui te jeitnăjenige, egä ai peba mene toraca gyene, tabe jiiicenige egä, “Toraca gyene, egä cane mameta gäne otni.” Yoo siige, tădepi Yageyame Yeesu!

²¹ Mime Yageyame Yeesu me miiji te lenajame iyeta Acejiyame me binamewale bime cabu! Mene ngălu peese.